

**АБДУЛЛА  
ҚОДИРИЙ**

**Рўмонлар**

**Абдулла Қодирий**

**РЎМОНЛАР**

**ЎТКАН КУНЛАР  
МЕҲРОБДАН ЧАЁН**

**Тошкент**

**Ғафур Ғулом номидаги Адабиёт ва санъат нашриёти**

**Қодирий, Абдулла.**

Ўткан кунлар; Мәхробдан чаён: Рўмонлар. — Т.: Faafur Fyulom nomidagi Adabiyet va san'yat nashrieti, 1994 — 656 б.

Хурматли ўқувчи, мана, қўлингизга яна "Ўткан кунлар", "Мәхробдан чаён" рўмонларини олдингиз. Бу сафар ҳам ушбу рўмонларни яна бир олам таассуротлар билан ўқиб тутатишингизга аминмиз. Чунки "Ўткан кунлар" 1926 йилги ва "Мәхробдан чаён" 1929 йилги илк нашрлари асосида босилди. Абдулла Қодирийнинг айтишича: "Бу икки китобни бир марта эмас, беш марта ўқиши керак. Шунда сиз турмушни, тарихни, сиёсатни, одобни, тилни ўрганасиз".

**Кадыри, Абдулла. Минувшие дни; Скорпион из алтаря:**  
**Романы.**

Үз2

Қ 4702620201 – 39  
М 352 (04) –94 1994

© Faafur Fyulom nomidagi  
Adabiyet va san'yat nashrieti,  
1994 й.

ISBN 5-635-01388-0

# ҮТКАН КУНЛАР

Чыңгызбек даңызынан даңбылардан жазылган



## ЁЗГҮЧИДАН

Модомики, биз янги даврга оёқ қўйдиқ, бас, биз ҳар бир йўсунда ҳам шу янги даврнинг янгиликлари кетидан эргашамиз ва шунга ўхшаш достончилиқ, рўмончилиқ ва ҳикоячиликларда ҳам янгаришға,<sup>1</sup> халқимизни шу замоннинг "Тоҳир-Зуҳра"лари, "Чор дарвеш"лари, "Фарҳод-Ширин" ва "Баҳромгур"лари билан танишдиришка ўзимизда мажбурият ҳис этамиз.

Ёзмоқга ниятланганим ушбу — "Ўткан кунлар", янги замон рўмончилиги билан танишиш йўлида кичкина бир тажриба, яна тўғриси бир ҳавасдир. Маълумки, ҳар бир ишнинг ҳам янги — ибтидоий даврида талай камчиликлар билан майдонға чиқиши, аҳвларининг етишмаклари ила секин-секин тузалиб, такомулга юз тутиши табиъий бир ҳолдир. Мана шунинг далласида ҳавасимда жасорат этдим, ҳаваскорлик орқасида кечатурган қусур ва хатолардан чўчиб турмадим.

Мозийға<sup>2</sup> қайтиб иш кўриш хайрлик, дейдилар. Шунга кўра мавзуъни мозийдан, яқин ўткан кунлардан, тарихимизнинг энг кирлик, қора кунлари бўлған кейинги "хон замонлари"дан белгуладим.

Абдулла Қодирий (Жулқунбой)

1 Янгармоқ—янгиланмоқ.

2 Мозий—ўтмиш, ўтган замон.

## БИРИНЧИ БҮЛИМ

---

### 1. ОТАБЕК ЮСУФБЕК ҲОЖИ ЎГЛИ

**1264**-нчи ҳижрия<sup>1</sup>, далв<sup>2</sup> ойининг 17-нчиси, қишиқи кунларнинг бири, қуёш ботқан, теваракдан шом азони эшитиладир...

Дарбозаси шарқи-жанубига қаратиб қурилған бу донғдор саройни Тошканд, Самарқанд ва Бухоро савдогарлари эгалаганлар, саройдаги бир-икки ҳужрани истисно қилиш билан бошқалари мусофиirlар ила тўла. Сарой аҳли кундузги иш кучларидан бўшаб ҳужраларига қайтқанлар, кўб ҳужралар кечлик ош пишириш ила машғул, шунинг учун кундузгига қараганда сарой жонлик: кишиларнинг шақиллашиб сўзлашишлари, хаҳолаб кулишишлари саройни кўкка кўтаргундек.

Саройнинг тўрида бошқаларга қараганда кўркампрак бир ҳужра, анови ҳужраларга кийиз тўшалгани ҳолда, бу ҳужрада қип-қизил гилам, утталарда<sup>3</sup> бўз кўрпалар кўрилган бўлса мунда ипак ва адрес кўрпалар, наригиларда қора ҷароғ сасиганда, бу ҳужрада шамъ ёнадир, ўзга ҳужраларда енгил табиъатлик, серчақчақ кишилар бўлғанида бу ҳужранинг эгаси ҳам бошқача яратилишда:

Оғир табиъатлик, улуғ гавдалик, кўркам ва оқ юзлик, келишкан қора кўзлик, мутаносиб қора қошлиқ ва эндинина мурти сабз урган бир йигит. Бас, бу ҳужра бино ва жиҳоз ёғидан, ҳам эга жиҳатидан диққатни ўзига жалб

<sup>1</sup> Мелодий 1845-46 йиллар.

<sup>2</sup> Далв—22 январь-22 февраль.

<sup>3</sup> Утта—у ерда.

этарлик эди. Қандоғдир бир хаёл ичида ўлтургучи бу йигит Тошкандининг машҳур аъёнларидан бўлган Юсуфбек ҳожининг ўғли — Отабек.

Сарой дарбозасидан икки киши келиб киргач, улардан бирави дарбоза ёнидағи кимдандир сўради:

— Отабек шу саройга тушканми?

Бизга таниш ҳужра кўрсатилиши билан улар шу томонга қараб юрдилар. Бу икки кишининг биттаси гавдага кичик, юзга тўла, озроқчина соқол-муртлик, йигирма беш ёшлар чамалиқ бир йигит бўлиб, Марғилоннинг бойларидан Зиё шоҳичи деганинг Раҳмат отлиқ ўғлидир, иккинчиси: узун бўйлик, қора чўтири юзлик, чағир кўзлик, чувоқ соқол, ўттуз беш ёшларда бўлган кўримсиз бир киши эди. Бу йигит яхшигина давлатманд бўлса ҳам лекин шуҳрати нима учундир бойлиги билан бўлмай, "Ҳомид хотинбоз" деб шуҳратланган, кишилар Ҳомид орқасидан сўзлашканда унинг отиға тақилған лақабни қўшиб айтмасалар ёғиз "Ҳомидбой" дейиш ила уни танитаолмайдирлар. Ҳомиднинг Отабек билан танишлиги бўлмаса ҳам Раҳматка яқин қариндош — Зиё шоҳичининг қайниси, Раҳматнинг тоғаси.

Улар ҳужрага келиб кирдилар. Отабек келгучиларни улуғлаб қаршилади.

— Бизни кечирасиз, бек ака, — деб Раҳмат узр айтди, — вақтсиз келиб сизни тинчсизладик...

Отабек уларга юқоридан жой кўрсатар экан, ёқимлиқ бир вазиятда:

— Тинчсизламадингизлар, бильъакс қувонтирдингизлар, — деди, — шаҳрингизга биринчи мартаба келишим бўлғани учун танишсизлиқ, ёлғизлиқ мени жуда зериктирган эди.

Шу орада ҳужрага бир чол кириб ул ҳам меҳмонлар билан сўрашиб чиқди. Бу чол Ҳасанали отлиқ бўлиб олтмиш ёшлар чамасида, чўзиқ юзлик, дўнгтироқ пешоналик, сариққа мойил, тўғарак қора кўзлик, оппоқ узун соқоллик эди. Соқолининг оқлигига қарамасдан унинг қаддидиа кексалик аломатлари сезилмас ва тусида ҳам унча ўзгариш йўқ эди.

Отабек меҳмонларни танчага ўтқузиб фотиҳадан сўнг Ҳасаналидан сўради:

— Тузикмисиз, ота?

— Худойга шукур, — деди Ҳасанали, — бояғидан бир оз енгилладим... Мазмуни ис теккан экан.

— Баъзи юмушлар буюрсам...

— Буюрингиз, ўғлим.

— Раҳмат, ота, бўлмаса бизга чой қайнатиб берингиз-чи.

— Хўб, бегим.

Ҳасанали чиқди. Раҳмат Отабек билан яна бир қайта соғлиқ сўрашқандан кейин сўради:

— Бу киши кимингиз бўладилар, бек ака?

Отабек Раҳматнинг саволига жавоб бермай эшикка қарди. Ҳасаналини ҳужрадан узоқлатиб сўнгра жавоб берди:

— Қулимиз.

Бу сўздан нима учундир Ҳомид ажабланган эди.

— Қулингиз?

— Шундог.

Ҳасаналини болалиқ вақтида Эрондан киши ўғирлаб келгучи бир туркман қўлидан Отабекнинг бобоси ўн беш тилло баробарига сотиб олған эди. Ҳасаналининг Отабеклар оиласида қуллиқда бўлғанига элли йиллар чамаси замон ўтиб, энди Отабеклар оиласининг чин бир аъзоси бўлиб кеткан. Ҳўжаси Юсуфбек ҳожига, айниқса ҳўжазодаси Отабекка итоат ва ихлоси том<sup>1</sup> бўлиб, бунинг эвазига улардан ҳам ишонч ва ҳурмат кўрар эди. Ҳасанали ўттуз ёшлиқ вақтида сотиб олинған бир чўрига уйлантирилган бўлса ҳам, аммо ўғул-қизлари бўлмаған, бўлсалар ҳам ёшлиқда ўлиб кетканлар. Шунинг учун бўлса керак, Отабекка ихлос қўйиб, унга ўз боласи каби қарар: "Ўлганимдан кейин руҳимга бир калима қуръон ўқуса, бир вақтлар Ҳасанали ота ҳам бор эди деб ёдласа, менга шуниси кифоя" деб қарор берган ва ҳозирдан бошлаб Отабекка бу тўғрида сипоришлар<sup>2</sup> бериб, ундан самимий вაъдалар олиб юргучи оқ қўнгиллик бир қул эди.

Ҳасанали устида бўлған ҳалиги гапдан кейин Раҳмат сўради:

— Тошкандан нималар келтирдингиз, бек ака?

— Арзимаган нарсалар: газмол, қалапой афзали<sup>3</sup> ва бир оз қозон.

— Марғилонда газмол билан қалапой афзалининг бозори чаққон, — деди Ҳомид.

Отабек миқрози<sup>4</sup> билан шамъ сўхтасини кесиб тузатди.

1 Том—тўла, тўлиқ.

2 Сипориш—топшириқ.

3 Қалапой афзали—пошнаси баланд, рандли ковуш.

4 Миқрози—шамъ сўхтасини кесадиган қайчи.

Орада ётсирашка ўхашаш бир ҳол бор, нима учундир бир сўзлаб икки тўхтар эдилар. Бу ўнгтайсиз ҳолатдан чиқиши ва сўзни сўзга улаб юбориш учун Раҳмат тиришкандек кўринар эди.

— Марғилонни қандай топдингиз, бек ака, хушландингизми, ё?..

Бу саволнинг жавобига Отабек иккилангандек ва ўнгтайсизлангандек бўлди.

— Нима десам экан... Марғилонни ҳар ҳолда... хуш кўрдим, Марғилон Туркистонимизнинг тўқуғучилиқ ҳунарида биринчи шаҳридир.

Иккиланиб берилган бу жавобдан Ҳомид билан Раҳмат бир-бирларига қарашиб олдилар. Отабек бу ҳолатни сезди ва ўзининг сўзини кулгуликка олиб изоҳ берди:

— Келган кунимдан Марғилонингизни хушламай бошлиған эдим. Чунки танишларим йўқ, мусофиричилик билиниб қолаёзған эди... Энди бу соатдан бошлаб Марғилондан розиман, негаки, йўқлаб келгучи сизнинг каби қадрдонлар ҳам бўлур экан.

— Кечирингиз, бек ака, — деди Раҳмат, — мен сизнинг Марғилон келганингизни бу кун отамдан эшитдим. Йўқса, албатта сизни зериктирмас эдим.

— Аниқми?

— Тўғри гап, — деди Раҳмат, — отам Тошканд борғанларида тўп-тўғри сизнинг эшикингизга тушсинлар-да, сиз саройга тушинг. Бу тараф билан сиздан ўпкани биз қилсақ арзайдир.

— Ҳаққингиз бор, — деди Отабек, — аммо биринчидан сизнинг ҳавлингизни сўроғлаб топиш менга қийинроқ кўринди, ундан сўнг молимизни ортқан түякашлар шу саройга тайинланған эдилар.

— Ҳар ҳолда бу узр эмас.

Ҳасанали дастурхон ёзиб қумғон киргизди. Одатий та-каллуфлар билан дастурхон ва чойга қаралди. Ҳомид нонни ширнига булгар экан, сўради:

— Ёшингиз нечада, бек?

Отабекнинг лаби қимиrlамасдан чой қуйиб ўлтурган Ҳасанали жавоб берди:

— Бекка худо умр берса, бу йил ҳамдуна бўлса тўппат-тўғри йигирма тўрт ёшга қадам қўядирлар.

— Йигирма тўрт ёшга кирдимми, ота, — деди бек, — чиндан ҳам неча ёшга кирганимни ўзим билмайман.

— Йигирма тўрт ёшга кирдингиз, бек.

Ҳомид тагин сўради:  
— Уйланганмисиз?  
— Йўқ.

Ҳасанали Отабекнинг ёлғиз "йўқ" билан тўхташига қаноатланмади ва бу тўғрида ўз томонидан изоҳлар беришни лозим кўрди:

— Бек учун бир неча жойларга қиз айтдирмак исталингган бўлса ҳам, — деди, — аввал тақдир битмаганлик, ундан кейин бекнинг уйланишка бўлған қаршилиқларидан бу кунгача тўй қололмай келамиз. Улуғ хўжамизнинг қатъий ниятлари бу сафардан қайтгач, бекни уйландиришидир.

— Манимча, уйланишдек нозик бир иш дунёда йўқдир, — деди Раҳмат ва Отабекка юз ўғирди. — Уйлангач хотининг табъингга мувофиқ келса бу жуда яхши; йўқса мунчалик оғир гап дунёда бўлмас.

Отабек Раҳматнинг бу сўзини самимият билан қаршилади.

— Сўзингизнинг тўғрилиғида шубҳа йўқ, — деди, — аммо шуни ҳам қўшмоқ керакки, оладирған хотинингиз сизга мувофиқ бўлиши баробарида эр ҳам хотинга мувофиқуттабъ<sup>1</sup> бўлсин.

Хотинга мувофиқ бўлиш ва бўлмаслиқни унча кераги йўқ, — деди Ҳомид эътиrozланиб, — хотинларга "эр" деган исмнинг ўзи кифоя... Аммо жиян айткандек, хотин деган эрга мувофиқ бўлса бас.

Раҳмат кулиб Отабекка қаради. Отабек ҳам истеҳзолик табассум ораси Ҳомидга кўз қирини ташлади.

— Уйланишдаги ихтиёrimiz, — деди Раҳмат, — отоналаримизда бўлғанлиқдан оладирған келинлари ўғилла-риға ёқса эмас, балки унинг ота-оналари ўзларига ёқса бас. Бу тўғрида уйлангучи йигит билан эр қилгучи қизнинг лом-мим дейишкага ҳақ ва ихтиёрлари бўлмай, бу одатимиз маъқул ва машруъ<sup>2</sup> ишлардан эмасдир. Масалан, мен: ота-онамнинг ёқдиришлари билан уйландим... Аммо хотиним ота-онамга мувофиқ бўлса ҳам менга мувофиқ эмас, сиз айткандек, эҳтимол мен ҳам хотинимга мувофиқ эмасдирман... Сўзингиз жуда тўғри, бек ака.

Отабек Раҳматнинг сўзини ихлос билан эшитди ва "сен нима дейсан?" дегандек қилиб Ҳомидга қаради.

<sup>1</sup> Мувофиқуттабъ—табға мос, муносиб.

<sup>2</sup> Машруъ—шаръий.

— Жиян, — деди Ҳомид Раҳматка қараб, — бошлаб уйланишиңг албатта ота-онанг учун бўлиб улардан ранжиб юришингни ўрни йўқ. Хотининг кўнглингта мувофиқ келмас экан, мувофиқини олиб хотинни икки қил. Буниси ҳам келишмаса учунчисини ол. Хотиним мувофиқ эмас деб зорланиб, ҳасратланиб юриш эр кишининг иши эмас.

Раҳмат Отабекка кулимсираб қаради-да, тогасига жавоб берди:

— Хотин кўпайтириб, улар орасида азобланишнинг нима ҳикмати бўлсин? — деди. — Бир хотин билан муҳаббатлик умр кечирмак менимча энг маъқул иш. Масалан икки хотинлиқнинг биттаси сизми? Уйингизда ҳар кун жанжал, бир дақиқа тинчлигингиз йўқ.

— Сенингдек йигитлар учун албатта битта хотин ҳам ортиқчалиқ қиласидилар, — деб кулди Ҳомид. — Кўб хотин орасида азобланиш ўзи нима деган сўз? Қамчинингдан қон томса, юзта хотин орасида ҳам роҳатланиб тириклик қилаласан. Мен бу кунгача икки хотин ўртасида туриб жанжалга тўйгунимча йўқ, аммо хотинни учта қилишга ҳам ўйим йўқ эмас.

— Сизга тараф йўқ, тога.

Ҳомид мағрур бир тусда Отабекка қаради. Отабек унинг сўзидан кулимсираган эди.

Ҳасанали паловға урнаш учун ташқариға чиқди. Отабек меҳмонларга чой қуийиб узатди. Ҳомиднинг ҳалиги сўзидан кейин орадаги баҳс кесилган эди. Учавлари ҳам бир нарсанинг хаёлини сургандек кўринар эдилар. Бир неча вақт шу ҳолда қолишиб Раҳмат тогасидан сўради:

— Мирзакарим aka қизини эрга бердими, эшийтдингизми?

Бу саволдан нима учундир Ҳомиднинг чеҳраси бузилди ва тилар-тиламас жавоб берди:

— Бундан хабарим бўлмади. Гумонимча, бермагандир...

Раҳмат сўздан четда қолдирмас учун Отабекни ҳам ораға олди:

— Бизнинг Марғилонда бир қиз бор, — деди, — шундог кўхлишки, бу ўртада унинг ўхшashi бўлмас, деб ўйлайман.

Ҳомид бир турлиқ вазиятда ер остидан жиянига қаради. Тогасининг ҳолидан хабарсиз Раҳмат сўзида давом этти:

— Шаҳримизда Мирзакаримбой отлиғ бир савдогар киши бор, бу шунинг қизидир. Балки сиз Мирзакарим акани танирсиз, у бир неча вақт Тошканда қутидорлик қилиб турған экан?

— Йўқ... Танимайман.

Ҳомиднинг юзидаги бояғи ҳолат яна ҳам кучланиб гүё тоқатсизланғандек кўринар эди, Раҳмат давом этти:

— Унинг ҳавлиси пойафзал растасининг бурчагидаги иморатдир. Ўзи давлатманд бир киши; Тошканد ашрофларининг<sup>1</sup> кўблари билан алоқадор бўлғанлиқдан балки отангиз билан таниш чиқар.

— Эҳтимол, — деди Отабек ва нима учундир ғайрихтиёрий бир тебранди. Унинг юзида бир ўзгариш ва вужудида бир чайқалиш бор эди. Ундаги бу ўзгаришдан Раҳмат хабарсиз бўлса ҳам, аммо Ҳомид уни ер остидан таъқиб этар эди. Бу таъқиб Отабекдаги ҳалиги ўзгаришни пайқабми ёки тасодуфийми эди, бу тўғрида бир мулоқаза айтиш, албатта мумкин эмас. Яна бир неча вақт жим қолдилар.

— Энди бизникига қачон меҳмон бўласиз, бек ака?

Раҳматнинг бу сўзи билан Отабек хаёлидан бош кўтарди:

— Худо хоҳлаған вақтда бўлармиз...

— Йўқ, бек ака, — деди Раҳмат, — сиз аниқлаб бир кунни таъйин қилингиз, биз бу ерга сизни таклиф қилгали келганимиз.

— Овора бўлмоқнинг нима зарурати бор?

— Бунда овора бўлиш деган нарса йўқ. Иложи бўлса сизни бу саройдан ҳавлиға кўчирамиз. Ҳозирга бир кунни таъйин қилиб бизга меҳмон бўлинг-чи... Отам сизнинг билан ўлтуришиб Тошканд аҳволоти тўғрисида сўзлашмакка муштоқдирлар.

— Бу саройдан сизларнига кўчишим оғир, — деди Отабек, — аммо отангизнинг зиёратларига боришга ҳар қачон ҳозирман.

— Соғ бўлинг, бек ака, борадирған кунингизни таъйин қила оласизми?

— Маълумингиз, кечлари бўш бўламан, шунинг билан бирга отангиз қайси вақтни ихтиёр қилсалар ижобат этишдан ўзга чорам бўлмас.

— Саломат бўлингиз, — деди Раҳмат, — шуни ҳам сиздан сўрайин: ўлтуришка бегона кишилар ҳам айтилса мумкинми, озор чекмасмисиз? Ҷақирилганда ҳам ўзимизга яқин ва аҳл кишилар бўлур, масалан, Мирзакарим қутидор каби.

1 Ашроф — эътиборли кишилар, улуглар.

Бу вақт Отабекнинг тусига ҳалигидек ўзгариш чиқди эрса-да, лекин сездирмасликка тиришиб жавоб берди:

— Маним учун фарқсиз.

Ошдан сўнг меҳмонлар хайрлашиб чиқдилар.

## 2. ХОН ҚИЗИГА ЛОЙИҚ БИР ЙИГИТ

Отабек ўзи билан кўришкан мундаги иккита ёт кишини танимағанлиқдан бир-икки қайта уларни кўз остидан кечирди. Буни пайқаган Зиё шоҳичи уларни Отабекка танитди:

— Амакларингизни сиз танимағандирсиз албатта, — деди. — Бу киши отангизнинг яқин дўстларидан Мирзакарим қутидор. Бу зот Андижон саводгарларидан Акрам ҳожи.

Мирзакарим исмлик қирқ беш-элли ёшлар чамасида қора қош, қора кўз, кўркам юз, яхшигина кийинган бир киши бўлиб, Акрам ҳожи элли беш ёшлар орасидағи бир кекса эди. Отабек қайтадан Мирзакарим қутидорни кўздан кечирди:

— Ота қадрдонлари билан танишдирганингиз учун раҳмат, амак, — деди ва Акрам ҳожи билан Мирзакарим акага тавозуъланди. — Отам сизлардек яқин дўстларига салом айтишни менга амонат топширган эдилар.

— Раҳмат, сог бўлсинашлар.

Мажлис Зиё шоҳичининг уйида Отабекнинг меҳмондорчилиги учун йиғилған, юқорида исмлари ўткан зотлардан бошқа Ҳомид, Раҳмат ҳам Ҳасанали бор эдилар. Танишдирнидан сўнг Отабек билан Қутидорнинг кўзлари бир-бирларига тез-тез учраша бошладилар. Қутидор ниманидир Отабекдан сўрамоққа оғзини жўплаб турса ҳам Акрам ҳожи билан Зиё шоҳичининг алла нарса тўғрисидағи гаплари кети узилмай давом этар эди. Уларнинг кўзи учунчи тўқнашишда қутидор кулимсираб қўйиб сўради:

— Мени эслай оласизми, бек?

Отабек диққат ва эътибор билан қутидорни кузатиб жавоб берди:

— Йўқ, амак.

— Неча ёшга бордингиз?

— Йигирма тўрт ёшга...

Қутидор ўзича нима тўғрисида дир ҳисоб юритди-да:

— Воқиъян сиз мени эслай олмассиз, — деди. — Мен Тошкандда қутидорлиқ қилған вақтимда тахминан сиз беш-олти ёшлиқ бола эдингиз... Гўёки, мен Тошкандда

кечагина турғандек ва кечагина сизнинг ҳавлингизда меҳмон бўлғандекман...Аммо ҳақиқатда орадан ўн беш-йигирма йил ўтиб сиз ҳам катта йигит бўлғансиз, умр — отилған ўқ эмиш.

— Сиз бизнинг ҳавлида бўлғанмисиз?

— Кўб мартабалаб меҳмон бўлдим, — деди қутидор, — ул вақтида бобонгиз ҳам ҳаётда эдилар.

Бу иккисининг сўзларига қулоқ солиб четда ўлтурган Ҳасанали ҳам гапка аралаши:

— Амакингиз бизнинг ҳавлига келиб турадирган вақтларида сиз ёш бола эдингиз, бек, — деди. — Амакингиз сизни саройларга ҳам олиб тушар эдилар.

Отабек уялув аралаш кулимсираб қутидорға қаради:

— Таассуфки эслай олмайман, — деди. Қутидор тагин нимадир айтмакчи бўлған эди, Акрам ҳожи унга йўл бермади:

— Ҳожи акамиз бу кунда қандай иш билан машгуллар?

Отабек:

— Тошканд беги ёнида мушовир<sup>1</sup> сифати билан турадирлар.

— Азизбек бу кунда ҳам Тошкандга ҳокимдир?

— Шундог.

— Сотқи бек кетсин, Азиз бачча денг, — деди Ҳомид ва Акрам ҳожига қараб кулди. — Яқингинада Мусулмон чўлоқнинг базими шу Азиз бачча билан қизир эди, — деди, улуғ бир нарса кашф эткандек мағур, мажлиска қараб чиқди. Ҳомиднинг заруратсиз айб текшириши мажлиска ётроқ туйилган бўлса керак бир-бирларига қаравиб олдилар. Бу ўринсиз текшириш мажлисни бир оз сукутка юборди-да, сўнгра Акрам ҳожи саволида давом этти:

— Ҳокимингиз жуда золим эмиш, бу тўғри сўзми?

— Тўғри сўз, — деди бек. — Азизбек зулмидан аҳоли жуда тўйған.

Отабекнинг бу жавобидан ёлғиз Акрам ҳожигина эмас балки, мажлиснинг бошқа аъзолари ҳам ажабландилар. Отасининг валинеъмати<sup>2</sup> бўлған бир бекнинг зулмини иккор этиш ҳақиқатан ҳам таажжубка лойиқ эди. Азизбекнинг Туркистон хонлигининг энг золим ва мустабид

<sup>1</sup> Мушовир — маслаҳатчи.

<sup>2</sup> Валинеъмат — хўжайин.

саналған бекларининг бири ва унинг ўз қарамогида бўлған Тошканд аҳолисига қилған зулмлари Фарғонага достон, аммо Акрам ҳожининг бу саволи Азизбекнинг энг яқини бўлған бир кишининг ўғлини синааб кўришлик учун эди. Бу синаш натижаси Акрам ҳожининг таажжубини ортдирди ва бунинг сиррини билишка қизиқсинди:

— Отангиз Азизбекнинг мушовири экан, — деди Акрам ҳожи, — нима учун уни бир оз бўлса ҳам йўлға солмайдир?

— Кечирингиз амак, — деб Отабек кулимсиради, — сиз отамнинг мушовирилигини бошқачароқ онглағанга ўхадингиз... Бизнинг бекларга ҳукм вақтида ҳам мушовир бўлмоқ имконсиз нарсадир. Отам Азизбекнинг мушовири ва яқин мусоҳиби<sup>1</sup> саналса ҳам ва лекин бу жузъий ишлардагинадир, бунинг учун сизга бир мисол келтурай, бу иш шу яқин оралардагина бўлди: Тошканддаги жумъалик гап мажлисларидан бирида бир киши Азизбекни маҳтар ва бу маҳтовга қарши иккинчиси "нега мунча маҳтайсан, Азизбекнинг асли бир бачча-да" дер. Уларнинг бу музокараларини четдан эшлиб турган хуфиялардан бири сўзни Азизбекнинг қулогифа еткузар. Эртасига Азизбек мазкур икки кишини ўз ҳузурига олдириб маҳтовчига улуғ мансаб ато қиласа ва иккинчисини ўлимга буюрар... Бу ҳукм мажлисида ҳозир турган отам маҳкумнинг гуноҳини сўрағанида Азизбек жаллодга бақирап: "Тезроқ олиб чиқ!" Отам тағин қўллиқ қилғанида жаллодга буюрар: "Қўлингдагини бўшатиб, ўрнига ҳожини олиб чиқ!"

— Мана кўрдингизми, отамнинг қадру қийматини.

— Бўлмаса аҳоли хонга шикоятнома ёзмайдирми?

— Нечанчи шикоятномани сўрайсиз, — деди Отабек, — Азизбекдан зулм, жафо кўрганлар билан бирликда энди ўнинчи шикоятномамизни юборғандирмиз.. Лекин хоннинг йўлбошчиси бўлған кишининг ўзи зулмда Азизбекдан неча зина баланд ўринни ишғол эткучи кимса бўлса, биз қандоғ қилайлиқ. Аммо шуниси ҳам борки, шу кейинги вақтларда Азизбек Қўқоннинг ёрлиғ ва фармонларини илтифотсиз қолдира бошлади. "Итоатдан бош тортмасин..." деган мулоҳазада ёзған шикоятномаларимиздан марказнинг кўз юмиши ҳам эҳтимолдир. Ҳар ҳолда Тошканд аҳолиси Азизбек истибдодидан ортиқ тўйинди, кимдан кўмак сўрашга ҳам билмайдир.

<sup>1</sup> Мусоҳиб — ҳамсуҳбат.

Юсуфбек ҳожининг қандай одам экани айниңса Акрам ҳожига онглашилиб бу тўғрида ортиқ баҳс қилинмади ва сўз бошқа хусусларга ўтди.

Зиёфат самимият билан чақирилғанлиқдан дастурхон қадрлик меҳмонга маҳсус турланган эди. Зиё шоҳичи билан ўғли Раҳматнинг ҳар замон меҳмонларни дастурхонга қисташлари бошқаларнинг иштиҳоларини очишга сабаб бўлса ҳам, аммо бизнинг Отабекка сира ҳам асар қилмас, хаёлланиб ўлтурас эди. Ул нима тўғрида хаёл суриб, қайси тўғрида ўйлар эди? — буни билиш қийин бўлса ҳам бироқ унинг ҳозирги баъзи ҳаракатлари диққатни жалб этарлик эдилар: хаёл сурас экан унинг кўзлари ихтиёrsиз каби қаршисидағи қутидорга қарайдирлар, қутидорнинг кўзи ўзига тушди дегунча кўзини ундан олиб дастурхондаги кўнгли тиламаган нарсаларга урина бошлидир... Отабекнинг бу ҳолини мажлисдагилар сезмасалар-да, аммо Ҳомид уни таъқиб эткандек эди.

— Савдо билан қандай шаҳарларга бордингиз, бек? — деб қутидор сўради.

— Ўзимизнинг шаҳарлардан кўпини кўрдим, — деди бек, — ўрис шаҳаридан Шамайга<sup>1</sup> ҳам бордим.

— Ҳа, ҳа, сиз Шамайга ҳам бордингизми? — деб Зиё шоҳичи ажабланди.

— Ўткан йил борған эдим, — деди бек, — боришим ноқулай бир вақтга тўғри келиб кўб мاشаққатлар чекдим.

— Чин савдогар сиз эмишсиз, — деди қутидор, — биз шу ёшқа келиб ҳали ўзимизнинг каттароқ шаҳарларимизни ҳам кўралмадик; сиз ўриснинг Шамайигача борғансиз.

— Юрган дарё, ўлтурган бўрё эмиш, — деди Акрам ҳожи.

Ўрис шаҳарларига бориб савдо қилгучилар Туркистонда жуда оз ҳисобда бўлиб, чет элларни кўрган Отабек мажлиска тансиқланди. Ўрислар тўғрисида алла қандай хаёлий ривоятлар эшитиб юрган қутидор ва Зиё шоҳичиларнинг Отабекдан ҳақиқий ҳолни билгилари келиб, ундан Шамайдага кўриб, кечирганларини сўрадилар. Отабек Шамай хотиротини сўзлаб берди. Ўрисларнинг сиёсий, иқтисодий ва

1 Семипалат шаҳри. Ҳон замонларида Туркистон савдогарларининг ўрис билан олиш, бериш—савдо шаҳарлари бўлгандир (*муаллиф*).

ижтимоий тараққиётларини эшиткучиларни тонға қолдириб, ортиқ тафсилоти билан айтиб чиқғач:

— Шамайга бормасымдан илгари ўз ҳукуматдорлиғимизни кўриб; бошқалар ҳам шундайдир, деб ўйлар эдим, — деди бек, — лекин Шамай маним бу фикримни ост-уст қилиб, ўзимни ҳам бутунлай бошқа киши ясади. Мен ўриснинг идора ишларини кўриб, ўз идорамизнинг худда бир ўйинчиқ бўлғанлигини иқорор этишка мажбур бўлдим...

Бизнинг идорамиз бу кунги тартибсизлиги билан кетаберса ҳолимизнинг нима бўлишига ақлим етмай қолди. Шамайда эканман қанотим бўлса, ватанимга учсан, тўппа-тўғри хон ўрдасига тушсам-да, ўриснинг ҳукумат қонунларини бирма-бир арз қилсан, хон ҳам арзимни тингласа-да, барча элга ёрлиғ ёзиб ўриснинг идора тартибини дастуруламал этишка буюрса, мен ҳам бир ой ичидаги ўз элизни ўрисники билан бир қаторда кўрсан... Аммо ўз элизмга қайтиб кўрдимки, Шамайда ўйлаганларим, ошиқанларим ширин бир хаёл эмиш. Бу ерда сўзимни эшиткучи бирав ҳам бўлмади, бўлсалар ҳам: "Сенинг орзунгни шу хонлар эшитадими, шу беклар ижро қиласидими?" деб мени маъюс қилдилар. Илгарироқ мен уларнинг гапига бовар қилмай юрсан ҳам сўнгидан тўғри сўзни айтканларини билдим. Дарҳақиқат мозористонда "ҳайя алал-фалаҳ"<sup>1</sup> хитобини ким эшитар эди.

Мажлис Отабекнинг Шамай таассуротини мароқ билан эшиткан, шу кунгача ҳеч кимдан эшитилмаган унинг Фикрларига ажабланган эди. Истиқбол қайгуси тушига ҳам кирмаган бу Туркистон оталари Отабекнинг даруни дилдан чиқариб айткан гапларидан ҳиссасиз қолмадилар.

— Амири Умархондек одил пошшо бўлса, — деди қутидор, — биз ҳам ўрисдан ошиб кетар эдик.

Зиё шоҳичи:

— Бизнинг бу ҳолга тушишимиз ўз феъли хўйимиздан.

Акрам ҳожи:

— Тўғри.

Ҳомид ҳам бошқалардан қолишмас учун: "Худо кофири нинг дунёсини берган" деб қўйди.

<sup>1</sup> Ҳайя алал-фалаҳ — қутқарилишга шошилинглар, нажотта келинглар (азон чақириғи).

— Манимча, ўриснинг биздан юқоридалиғи унинг иттифоқидан бўлса керак, — деди Отабек, — аммо бизнинг кундан-кунга орқага кетишимиизга ўз ора низоъимиз сабаб бўлмоқда, деб ўйлайман, бошқа хил айтканда Зиё амакимнинг фикрлари қисман тўғри. Орамизда бу қўрқунч ҳолатка баҳаққи тушинадирган яхши одамлар йўқ, биль-акс бузгучи ва низоъчи унсурлар томир ёйиб, ҳар замон содда ҳалқни ҳалокат чуқурига қараб тортадирлар. Бу кунги қора чопон<sup>1</sup> ва қипчоқ низоъларини сизга бир тимсол ўрнида кўрсатайин: ўйлаб қўрилсин, бу низоълардан бизга қанчалиқ фойда ва қипчоқ оғайниларга нима манфаат ҳосил бўлмоқда? Фақат бундан фойдаланғучилар икки ҳалқ орасига адоват уругини сочиб юргучи бир неча эъвогар бошлиқларғинадир. Масалан, Мусулмонқулни ким холис одам, деб ўйладир? Унинг юрт учун қон тўкишдан бошқа нимага фойдаси тегди? Мусулмонқул ўз ғарази йўлида орада йўқ низоъларни қўзғаб куяви Шералихонни<sup>2</sup> ўлдириди, гуноҳсиз Муродхонни шаҳид этти, қўй каби ёввови Тошканд ҳокими Салимсоқбекни ўлдириб, ўрнига Азизбекдек золимни белгулади ва ўзини мингбоши эълон қилиб, ақлсиз бир гўдакни (Худоёрни) хон кўтариб эл елкасига минди. Тузик, агар Мусулмонқул бу ишларни бир яхши мақсадни кузатиб қилғанда, золимларни ўртадан кўтариб, юртка осойиш берганда унга ким нима дея олур эди? Ҳолбуки, Тошканд тарихда мисли кўрилмаган Азизбек каби ваҳшийни фақат шу Мусулмонқул қўлидан олди. Башарти Мусулмонқул чин инсон бўлса, инсондан ваҳший туғилғанини ҳеч ким эшиктан чиқмас. Модомики, ўз ғарази йўлида истибодд орқали эл устига ҳукмрон бўлғучилар йўқотилмас эканлар, бизга нажот йўқдир, магар шундай ғаразчиларни улар ким бўлсалар ҳам иш бошидан қувлаш ва улар ўрнига яхши ва холис одамларни ўтқузиш нажотимизнинг ягона йўлидир.

Отабек мажлиска тамоман янги ва эшитилмаган фикрларни сўзлаб кетти, улар бекнинг оғзига анқайишиб

<sup>1</sup> Қипчоқлар ўзбекларни қора чопон, деб атаганлар (муал.).

<sup>2</sup> Шералихон Мусулмонқулнинг синглисига уйланган эди. Шералихоннинг ўғли Худоёрхон, шу Мусулмонқулнинг синглисидан тугилди. Мусулмонқул яхши иш кўриш учун жиёни Худоёрға қизини бериб, ўзига куяви қилган эди. Шералихон Норбўтахоннинг акаси. Ҳожибекнинг ўғли (муал.).

қолған эдилар. Дарҳақиқат ўз ора битмас низоъларнинг асли маншаинини<sup>1</sup> ул яхши онглаб таҳлил қилас ва дуруст қиймат берар эди. Унинг шу йўсун мулоҳаза ва фикрлари мажлиска чувалған ипниң учини топиб бергандек бўлиб, лафзан бўлмаса қам маънан уларнинг таҳсин ва олқишларини олди.

Отабек хуфттан намози учун таҳорат олишга меҳмонхонадан чиқған эди, унинг кетича:

— Отанинг боласи-да, — деб Зиё шоҳичи меҳмонларга қараб қўйди.

— Умри узоқ бўлсин, — деди Акрам ҳожи, — йигитларимиз ичида энг ақдлиги экан... Агарда хон кўтариш маним қўлимда бўлса эди, хон қилиб Отабекни кўтарар эдим... Узи ўқуганми?

Бу маҳтовлар билан терисига сигмай кеткан Ҳасанали жавоб берди:

— Тошканд Беклар беги мадрасасининг<sup>2</sup> пешқадам муллабаччаларидан эди, лекин уч йилча бўлди, хўжамиз мадрасадан олиб савдо ишига қўйдилар.

— Худо ҳар нарсадан ҳам берган йигит экан, — деди қутидор.

Аҳли мажлис Отабекни кўкларга кўтариб маҳтар эди, лекин Ҳомид бу маҳташларга иштирок этмас ва нимадандир гижингандек кўринар эди. Шу орада қутидорнинг "уйланганми?" деб Ҳасаналидан сўраши Ҳомидга. Яна бошқача ҳолат берди. Ҳасаналининг сўрағучига бекнинг қиз ёқдирмаслигини сабаб кўрсатиб шу кунгacha уйланмай келганлигини тафсили билан ҳикоя қилиб беришидан сўнг ул тоқатсизланғандек бўлди:

— Балки бегингизнинг тамаълари хон қизидадир, — деди истеҳзо билан Ҳомид,—бундог йигитлар уйланганларида ҳам киши қизини умр бўйи азоб ичида ўтказадирлар...

Сабабига тушиниш қийин бўлған бу истеҳзога қарши Ҳасанали сукут қилолмади:

— Мен унинг хон қизини олиш мақсади борлигини билмайман, — деди кулимсираб, — бироқ ул хон қизини

<sup>1</sup> Маншаъ — бошланиш, келиб чиқиш жойи.

<sup>2</sup> Беклар беги — Тошкентнинг олди мадрасаларидан, Эскижўва майдонида бўлган. 1923-1924 йилларда бузиб юборилган.

олса арзимайдирган йигит эмас... Ҳатто зархарид<sup>1</sup> қули бўлғаним ҳолда менга ҳам қаттиғ сўз айтишдан сақланған бир йигит ўз никоҳида бўлған озод бир қизга албатта заҳмат бермас, деб ўйлайман. Баъзи хотин урадирган ва хотин устига хотин олиб, хотинлариға зулм қиладирган ҳайвонсифат кишилардан бўлиб кетиши менимча эҳтимолдан жуда узоқдир, иним мулла Ҳомид...

Ҳасанали ўткан фаслда Ҳомиднинг ўз оғзидан хотинлариға қарши қамчи ишлатканини эшилган эди. Шунга биноан унинг бу охири жумласи Ҳомидни ерга қаратиб, лом дейишкага мажол бермай қўйди. Зиё шоҳичи қайниси Ҳомидга "тузатилдингми?" дегандек қилиб қаради ва Ҳасаналидан афу сўради:

— Кечирасиз, ота, — деди, — бизнинг Ҳомидбой шунақа қўланса гаплар учун яратилған одам.

Қутидор ҳам Ҳасаналининг кўнглини кўтариб тушди:

— Гапингиз тўғри, ота, — деди, — Отабек хон қизига лойиқ бир йигит экан.

Баҳслашиб учун Ҳомидга йўл қолмаған эди. Бир турлик илжайиб ер тегидан Ҳасаналига кўз ташлади.

Ошдан кейин бошлаб Ҳомид, сўнгра бошқа меҳмонлар тарқалишдилар. Отабек билан қутидорнинг йўллари бир бўлғанилиқдан биргалашиб кетдилар. Қутидор ҳавлисига қайрилур экан, бек билан хайрлашиди:

— Албатта бириси кун бизникига марҳамат қиласиз, тузикими?

— Хўб, амак.

— Бизники мана шу бурчакдаги эшик... Қайтага бу кун бизникида қолсангиз бўлмасми-а?

— Раҳмат... Хайр, саломат бўлингиз.

Улар тўхтаб сўзлашқан ўринларидан хайрлашиб узоқлашғач шундаги бир бурчакдан чопонига бурканган бир киши чиқиб, ҳалигишлар келган томонға қараб юрди...

### 3. БЕК ОШИҚ

Сарой тинч уйқуда, тун ярим. Ҳасанали ҳужраининг узун бурама қулуфини очиб ичкарига шамъ ёқди ва бекнинг тўшагини ёзиб унинг кириб ётишини кутиб

<sup>1</sup> Зархарид—тилла баробарига сотиб олинган.

турди. Аммо Отабек нима учундир тез кира бермади. Ҳужра эшигини очилғанидан, шамъ ёқилиб, ўрин ёзилғанидан гүё хабарсиз каби устунга суюлғанча қотиб турар эди.

— Ўрнингизни ёздим, бек.

Отабек бу сўз билан ҳужрага кирди ва бориб тўшаги ёнига ўлтурди. Ҳасанали бекнинг ешиниб ётишини кутиб турар, чунки уни ётқузиб ёқилған шамъни ўзи билан нариги ҳужрага олиб чиқмоқчи эди. Бироқ Отабек тўшаги ёнига ўлтурди-да, яна ўйлаб қолди...

Отабек бир неча кунлардан бери Ҳасаналининг кўзига бошқача кўринар эди.

Ҳасанали Отабекда шу кунгача кўрилмаган қизиқ бир ҳолатка беш-олти кундан бери ажабсиниб юрап эди. Ҳасаналини ажабсингирган ҳолат ҳам бекнинг шунинг сингари хаёл ичидаги барчани унтутиб қўйиши ва бошқа ишларга эътибор ва парвосизлиги эди.

Ҳасанали бекнинг ҳозирги ипидан-нинасигача бўлған қизиқ ҳолини узоқ кузатиб турди. Лекин Отабек хаёл суришдан зерикмаса ҳам Ҳасанали кузатишдан зерикди:

— Менда юмишингиз йўқми?

Отабек бу гапни онгламади шекиллик Ҳасаналининг юзига кўтарилиб қаради-да, яна кўзини бир нуқтаға тикиб қолди. Бу ҳолатдан Ҳасаналининг андишаси ортиб, бекнинг бунчалик ангравланишига қандай маъно беришни ҳам билмас эди. Отабек шу ҳолда тағин қанчагачадир ўлтурди, ниҳоят уйқудан уйғонған кишидек сўчиб ўзини кузаткучига қаради:

— Чиқиб ётмайсизми?

— Менда юмишингиз йўқми?

— Нима юмишим бўлсин, шамъни ҳам олиб кетинг.

Ҳасанали шамъни олиб, ўз ҳужрасига чиқди. Унинг ҳужраси Отабекники билан бир қаторда бўлиб, газмол, пойафзал ва шунинг сингари моллар ила тўлған ва Отабекдан бошқа, алоҳида ҳужрада туриши ҳам шу молларни сақлаб ётиш учун эди. Ҳасанали ўрнини ёзар экан "тавба" деб қўйди.

Юқоридан сўзланғанидек Отабекдаги бу ҳолатни бирар ҳафталардан бери пайқаса ҳам ҳозиргидек андишага тушмаган ва бунчалик диққат этмаган эди. Хўжазодасидаги бу ҳолат уни ҳар турлик мулоҳазаларга олиб кета бошлиди. Тўшаги устига ўлтуриб, оқ соқолини ўнг қўли билан тутамлаб ўйлар эди: савдо тўғрисида бирар хато қилдими,

Зиё шоҳичиникида таомдан тузукроқ тотинмади, бирар оғриғи бормикин... Мусоғирчиликда оғриса... Аммо бу мулоҳазаларининг биттасига ҳам ўзи қаноатланмади. Зоро савдо тўғрилари ундан яширин эмас, оғриғандага ҳам албатта шикоят эшитар эди.

Ўйлаб-ўйлаб бир нарсага ҳам ақли еталмагач, ўрнидан туриб тоқчада ёниб турған шамъни ўчирди. Ҳужра орқа-ўнгни ажратиб бўлмаслиқ қоронғуланди. Қоронғуда туртениб ҳужра эшигига келди-да, авайлаб гижирлатмай эшикни очди ва секингина ташқарига бош чиқарип саройни кузатди. Киши йўқлиққа қаноат ҳосил этиб, маҳсичан оёғини оҳиста қўйиб Отабек ҳужрасининг ёнида тўхтади, саройни яна қараб чиқди. Сарой қоп-қоронғи тинч уйқуда, аммо бу тинчликни сарой отхонасидаги отларнинг карт-курт хашак чайнашлари ва атрофдаги хўрзозларнинг қичқиришларигина бузар эдилар. Ҳасанали секингина дарича остига ётиб ҳужра ичига қулоқ солди. Ҳужра ичи тинч эди. Орадан уч-тўрт дақиқа фурсат ўтиб ҳужрадан шип эткан товуш эшитмади. Тағин бир неча дақиқа қулоқ узмай туриб, сўнгра ўрнидан қўзғалмоқчи бўлған эди, ичкаридан "уфф" деган ихраш эшитди. Ҳасаналининг қулоқлари тиккайиб ўрнидан турди, кўзи олаланған эди:

— Бек оғриқ, —деди кўнгилдан ва жазмланиб ҳужра эшигига юриб келди. Эшикни очиб Отабек ёнига кирмакчи эди. Эшикни итаришқа борған қўлини қолдириб "балки оғриқ эмасдир" деб тўхталди. Яна кирайми, йўқми, деб иккиланиб турғандан кейин юриб ўзининг ҳужрасига келди. Аммо Отабек тўғрисидаги ташвиши бояғидан ўн қайта ортқан эди. Ешиниб ухларга ётқан бўлса ҳам бекнинг хусуси уни кўз юмғали қўймади. Бек тўғрисида ҳар турлик хаёлларга бормоқда эди. Юсуфбек ҳожининг: "Уғлим ёш, сен дунёнинг иссиқ-совуғини татиган ва маним ишонган кишимсан. Уғлимнинг ҳар бир ҳолидан хабар олиб туриш сенинг вазифандир", деб таъкидлаши, Отабекнинг онаси — Ўзбек ойимнинг ёшлиқ кўз билан: "Сени худоға, Отамни сенга топширдим!" — деб ёлборишлари, зориллашлари унинг қулоқлари остида такрорланғандек бўлар эдилар. Ухлаб кеталмади. Кўйнакчан эгнига чопонини ёпиниб ўрнидан турди, ҳужрадан чиқиб Отабек даричаси остига яна келиб ўлтурди.

Тун аёз, изгириқ ел тўрт тарафка югуриб жон ачит-

макчи бўлар эди. Ҳасанали ярим яланғоч ҳолда жунжайиб дарича остида, изгириқ қучогида ўлтурас эди. Ул еган совуғига илтифот этмас, вужудини изгириққа топшириб, фикрини ҳужра ичига юборған эди. Ҳужра ичига бир мунча қулоқ солиб ўлтургандан кейин, узун тин олиб бошини тирқишидан узди, Отабекнинг пишиллаб ухлаган товшини эшитиб бир даражада тинчланди. Васвасадан ариёзған бўлса ҳам ўрнидан қўзгалмади, нима учундир тагин ҳам совуққа жунжиб ўлтура берди. Орадан яна бир неча дақиқа фурсат ўтиб, Ҳасанали тамом тинчланди, ҳам туриб кетмакчи бўлди ва шу ҳолатда ичкаридан уйқусираш эшитди:

— "...қора кўзлари, камон қошлари..."

— А-а-а, — деди Ҳасанали ва қайтадан қулогини тирқишиқа олиб борди. Энди унинг бутун борлиги қулоқ бўлиб айланган, ўзини унутиб барча диққати ҳужра ичига оғсан эди. Ўртадан кўб фурсат ўтмади, бояги уйқусираш яна такрорланди:

— "Ой каби юзлар, кулиб боқишлиар, чўчиб қочишлар... Уфф".

Ҳасанали учун биринчиде онглашилмай қолган маънолар бу кейинги гап билан ешилди. Ҳасанали эндиги ўлтуришни ортиқча топиб ўрнидан турди, ҳужрасига кирап экан бошини чайқаб ўзича сўзланди:

— Бек ошиқ.

Ўрни устига чопонини ёпди-да, кўрпаси ичига кириб ўлтурди ва "чиндан ошиқми?" деган савонни кўнглидан кечирди. Таниш бўлмаган бир шаҳарда кимнинг бўлса ҳам қизига учрашсин, беш-олти кун ичиди бу янглиғ уйқуда ҳам... масалага бу жиҳат билан қараб бекнинг ишқига ишонгуси келмас эди. Аммо иккинчи томондан қулоги остида бекнинг ўз оғзидан эшитилган — "кулиб боқишлиар, чўчиб қочишлар..." жумлалари такрорлангандек бўлиб хўжазодасидаги бир неча қунлик ўзгаришска муҳаббатдан бошқа ҳодиса, деб маъно бералмас эди. Бу икки турлик масалаларнинг ўнг-терсини айландириб муҳокама қилди ва ўлчади. Ҳасаналининг ўзи тарозунинг ишонмаслиқ палласида бўлса ҳам — "кулиб боқишлиар, чўчиб қочишлар" ҳамон қулоқлари остида такрорланар эдилар. Тун тонг отарға яқинлашқан, унинг уйқулиқ мияси ҳеч бир турлик бу муаммони еша билмас эди. Кўб ўйласа ҳам бир қарорға кела олмади. Аммо эртага бекнинг ўзини синааб кўрмакчи бўлиб кўзи уйқуға кетди.

#### 4. МАРГИЛОН ҲАВОСИ ЁҚМАДИ

Эрталабки чой ҳозирланған, Отабек хомуш ўлтуруб Ҳасанали эрса унинг ҳолини таъқиб этмакда эди. Орадаги сўзсизлик бир пиёладан чой ичкунча бузилмади. Охирда Ҳасанали Отабекнинг туисига бир неча қайта кўтарилиб қўйди.

— Бир неча кундан бери хомушроқ кўринасизми?

Отабек савол ташлағучига қараб олди ва тасдиқ ишорасини бериб:

— Билмадим, — деди ва бир оз тўхтаб изоҳ берди. — Хомушлигим сизга ҳам сезилдими, билмадим... Маргилон ҳавоси мизожимга тўғри келмаганга ўхшайдир...

— Айтканингиздек, — деди Ҳасанали. — Маргилоннинг ҳавоси бузиқ экан, бир-икки кундан бери маним ҳам аҳволим ўзгариб бошлади. Маргилондан тез жўнамасақ мен ҳам ишдан чиқадирған ўхшайман...

Бу гапдан кейин Ҳасаналининг кўзи бекка тикилган эди, агар тундаги уйқусираш Ҳасаналининг ўйлаган эҳтимолига тўғри келса ўзининг ҳалиги сўзи Отабекка бир ўзгариш беришида шубҳа қилмас эди.

Отабек боши берк кўчада қолғандек бўлди, жавобга қийналди:

— Кетамиз... — деди бир оз ўйлагандан кейин, — мол баҳолари тўғрисида битиша олмай турамиз — олғучилар арzon сўрайдирлар. Шунинг учун тағин бир неча кун қолишимизга тўғри келармикин... Билмадим...

Ҳасаналининг синаши ниҳоятига еткандек бўлди, ҳатто юқоридағи жавобни эшиткан вақтида нима учундир ўзини бир турлиқ кулгидан аранг тўхтатиб қолған эди. Яна ўргада хомушлик ҳукм суриб, Ҳасанали ишни тузикрак очиш ва ё шу кўни қолдириб кетабериш талашида эди. Ҳасанали бекнинг ҳар бир сиррига ўзини маҳрам ҳисоблаганлиқдан, дарҳақиқат Отабекка маҳрам бўлишига лойиқ бир меҳрибончилиққа эга бўлғанлиқдан хўжазодаси билан очиқ сўзлашиб фикрига келди. Бир неча дақиқа муқаддима учун режа қуриб ўлтургандан сўйиг тилга келди:

— Ўғлим, Отабек.

— Сўзлангиз.

— Айтингиз-чи, мен сизнинг кимингиз?

Отабек Ҳасаналининг мақсадига тушинолмай мажҳул унга назар ташлади:

— Сизми? — деб кулимсиради. — Отам бўлмасангиз ҳам мени оталиқ муҳаббати билан суйган содиқ ва меҳрибон бир кишимсиз — яъни маънавий отам.

— Баракалла, ўғлим, — деди Ҳасан, — жавобингиз ўз ўйлаганимчадир. Энди сиздан шуни ҳам сўрайин: хўжасига содиқ бир қул, сизнинг таъбириңгизча маънавий бир падар ўз ўғлига ёмонлиқ согинарми, бу тўғрида жавоб берингиз-чи?

Отабек кутимаган бу саволдан ажабланди:

— Сўзингизга тушинолмадим, ота, — деди, — шундог бўлса ҳам жавоб бераман: бу кунгача сиз ёлгиз менга эмас — бизнинг оиласизга оталиқ мавқиъида туриб, яхшиликдан бошқани согинмай келасиз.

Ҳасанали тусини бузмади:

— Илгарироқ балки шундог бўлғандир, аммо энди, айниқса сиз...

— Айниқса мен... очиб сўзлангиз.

— Айниқса сизнинг менга сақлаған ишончингиз тугалганга ўхшаб, ўзимдан қандог камчилик ўтканига ҳайратдаман.

— Қизиқ гаплар сўзлайсиз, — деди Отабек, таажжуви ортқан эди. — Менга қандог ёмонлиқ согиндингизски, сизга ишончим битсин? Васвасаланишнинг ўрни йўқ, мундан сўнг ҳам сизнинг хайриҳоҳона кенгашларингизга, ҳам вужудингизга муҳтожман, амонатим, бошқам мундан кейин ҳам она қорнида сақлағандек сизда сақланишига ишонаман ва бунга сизнинг ҳам амин бўлишингиз керак, ота.

— Лекин... тил билан кўнгил бошқа-бошқадир, ўғлим...

Отабек бу терс ва қўрс муқобаладан тоқатсизланди:

— Янглишасиз, ота.

— Янглишмайман, билъакс билиб, қаноатланиб сўзлайман.

— Тилим билан кўнглимнинг бошқалигини исбот қилингиз.

Ҳасанали гиналик қиёфада қошларини чимириди ва:

— Мендан яшириб юрган бир сиррингиз бор, — деди.

— Сиздан яширган бир сиррим бор?

— Бор ўғлим, бор, — деди Ҳасанали, — агар даъвонгиз тўғри бўлса, менга чиндан ўз кишим деб қарасангиз ўша сирни яширмангиз.

Отабек тўсатдан ўзгариб, бояги асабийлик ҳолатини ўйқотти, шундог бўлса ҳам ўзини йигиб кулган бўлди:

— Ҳали шунақа сиздан яширин сиррим борми?

— Бор.

— Бўлса марҳамат қилиб кашфингизни сўзлангиз.

Ҳасанали пиёлани оғзиға кўтариб, чойни ҳўплади, кашфини очти:

— Марғилонга келган кунлардан бошлаб сизда қизиқ бир ҳолат бор, — деди, — сиз бу ҳолатни "Марғилон ҳавоси ёқмади" деб таъбир қилсангиз ҳам мен мундан бошқа нарсалар пайқайман...

Отабек ўзига қаттиғ тикилиб турған Ҳасаналидан юзини четка буришка мажбур бўлди. Гўё бу сеҳргар чол ҳамма сирни бетдан ўқуб олар эди. Ҳасаналини ҳамон ўзига тикилиб турғанини билиб манглайнини қашиған бўлди:

— Хўш, давом этингиз...

— Бу сиррингизни мендан яширмоқчи бўласиз, — деди тамом қаноат билан Ҳасанали, чунки, энди ўз кашфига жуда ишонған эди. — Хайр, яширмоқча ҳам балки ҳаққингиз бордир... Аммо шу кўйи сир сақлаш билан бирав натижага етиш мумкинми?

Отабек қип-қизил қизарип гуноҳкорлардек ерга қараған эди. Ҳасаналининг ўзига падарона тараҳҳум<sup>1</sup> туси кириб, кексаларга маҳсус оҳангдор бир товуш билан бекнинг устидаги оғир юкни ола бошлади:

— Айби йўқ, ўғлим, — деди, — муҳаббат жуда оз йигитларга мұяссар бўладирған юрак жавҳаридир. Шунинг билан бирга кўб вақтлар кишига заарлик ҳам бўлиб чиқадир. Шунинг учун куч сарф қилиб бўлса қам унитиш, кўб ўйламаслиқ керакдир.

Бу кейинги гап билан Отабек кўтарилиб Ҳасаналига қаради ва узоқ тин олиб яна ерга боқди. Гўё бунинг ила "унитиш мумкин эмас" деган қатъий сўзни айткан эди. Орага сўзсизлик кирди. Иккиси ҳам фикрга толған эди. Ҳасаналининг ортиқча берилиб ўйлаган кезда соқолини қайриб тишлиайдирған бир одати бўлиб, ҳозир ҳам соқолини ямлаш билан машгул эди. Узоқ ўйлагандан сўнг ишнинг очилмай қолған қисмини ешишни бошқа вақтга қолдирмоқчи бўлди. Чунки Отабек шунинг ўзига яхшигина қизариниб, бўртинган эди.

<sup>1</sup> Тараҳҳум—раҳм, шафқат.

## 5. КИРОЙИ КУЯВИНГ ШУНДОФ БҮЛСА

Пойафзал бозори ва унинг бурчагидаги ҳавли... Ўқуғучи албатта бу ҳавлиниң эгаси билан таниш чиқар. Кўримсиз, чирк босиб қорайған, жуда кўб хизмат қилиб кексайған, очиб-ёпқанда анвоғи — турлик доди-фарёд қиладирған, бунда саналғаң сифатларини бир ерга жамъ-лаб натижа чиқарғанда "шарти кетиб, парти қолған" бир дарбозанинг остонасидан уч-тўрт қадам ичкарига кирилса Бухоро зиндонларидан бирйини ҳис этилур ва қоронғу йўлакниң ниҳоятидаги, ёруғлиққа томон ошиқилур. Қоқилиб, суқилиб йўлак зиндонидан қутилингач, бир улуғ ариқ ёқасига, ўрдадек ҳавлига чиқилур ва роҳат тин олинуру. Ҳавлиниң кунчиқарида кунботишға қаратиб солинған, унча маҳтарлиқ бўлмаса ҳам аммо замонасининг олдинги биноларидан ҳисобланған бир айвон билан бир уйга кўз тушадир. Саҳн ва бинолар киши зотидан бўш, шунинг учун бу ҳавли оиласиниң ташқариги қисми — меҳмонхона эканлиги онглашилур. Саҳнинг тун ва кунботар жиҳатлари кичкина ҳужралар билан ўралған ва бу ҳужраларниң барча эшиклари ёпиқ ва қулуфланған ҳолда бўлиб моллар билан бандлиги ва уй эгасининг давлатлик киши бўлғанлиғи билинур. Ҳавлиниң жануб тарафи дўконлар орқаси, аммо катта туп гилос ёғочлари қоплаб ётадирлар.

Энди биз ташқари ҳавлини қўйиб меҳмонхонанинг ёнидан ичкарига кирамиз. Ичкари ҳавлиниң йўлаги ҳам наригисидек усти ва бағри ёпиқ — қоронғу, йўлакниң ниҳоятига бориб ўнгта юрилса ахтахонага, чапка юрилса биринчи мартаба кирганимиздек улуғ бир ҳавлига чиқармиз. Ҳавлиниң тўрт тарафи турлик эҳтиёж бинолари билан ва тўрдаги бинонинг икки биқуни катта уйлар билан ўралған бўлиб шу икки уйниң орасига ўлтурган кошинкор ва нақшин чорхари айвон бу ҳавлиниң биринчи мартаба кўзга чалинадирған ортиқлиқларидандир. Шу чорхари айвонниң ўрта бир ерида, устига атлас кўрпалар ёпилған танчанинг тўрида деворга суюниб, аврасига қора мовут сирилған совсар пўстин кийиб бир киши ўлтурладир. Бу киши билан иккинчи мартаба танишиб ўлтурмаймиз, чунки, бу одам ўқуғучи билан танишкан — Мирзакарим қутидор. Танчанинг икки биқунида икки хотин: булардан биттаси ичидан атлас кўйнак, устидан одими хон атлас гуппи кийгандар, бошига оқ даканани хом ташлаған, ўттуз



عبدالله عاصم  
٤ مارس ١٩٢٦ (جامعة تونس)  
الطب

беш ёшлар чамалиқ гүзал, күшбичим бир хотин. Юзидан мулойимлиқ, эрига итоат, тұғрилиқ маңолари томиб турған бу хотин қутидорнинг рафиқаси — Офтоб ойим. Иккінчиси етмишлардан ўткан бир кампир, Офтоб оймнинг онаси — Ойша биби. Ұчоқ бошида қўполғина, қирқ беш ёшлар чамалиқ яна бир хотин чой қайнатиб юрадир. Бу хотин эрса оиланинг чўриси — Тўйбека. Биз булар билан танишишни шу ерда қолдириб айвоннинг чап тарафидаги дарича орқалиқ уйга кирамиз, ҳам уйнинг тўрига солинган атлас кўрпа, пар ёстиқ қучогида совуқдан эринибми ва ё бошқа бир сабаб биланми уйғоқ ётқан бир қизни кўрамиз. Унинг қора зулфи пар ёстиқнинг турлик томонига тартибсиз суратда тўзгиб, қуюқ жингтила кипрак остидаги тимқора кўзлари бир нуқтаға тикилганда, нимадир бир нарсани кўрган каби...қоп-қора камон, ўтиб кеткан нафис, қийиғ қошлари чимирилганда, нимадир бир нарсадан чўчиган каби... тўлған ойдек губорсиз оқ юзи бир оз қизиллиқға айланганда, кимдандир уялған каби... Шу вақт кўрпани қайириб ушлаган оқ нозик қўллари билан латиф бурнининг ўнг томонида, табиъатнинг ниҳоятда уста қўли билан қўндирилған қора холини қашиди ва бошини ёстиқдан олиб ўлтурди. Сариқ рупоҳ атлас кўйнакнинг устидан унинг ўртача кўкраги бир оз кўтарилиб турмоқда эди. Туриб ўлтургач бошини бир силкитди-да, ижирғаниб қўйди. Силкиниш орқасида унинг юзини тўзғиган соч толалари ўраб олиб жонсўз<sup>1</sup> бир суратка киргизди. Бу қиз суратида кўринган малак қутидорнинг қизи — Кумушбиби эди.

Кумушбиби бир неча кундан бери совуқ ҳаво тегдиди, бош оғриги ва кўз тинишка ўхшаш оғриқлардан шикоят қилиб юрар, шунинг учун онаси "тинч ухласин, ортиқ уринмасин" деб бу кун намозга ҳам уйғотдирмаған эди.

Кумуш кийиниб уйдан чиқди, Тўйбека томонидан ҳозирланиб берилған иссиг сув билан юзини ювди. Уйига кириб артиниб, тузатингач айвонга чиқди. Айвондагиларга салом бериб отасининг ёнига келиб ўлтурди.

Қутидор қизини кузатди:

- Тузикмисан, қизим?
- Йўқ отажон, бошим ҳамон оғриб турадир.

<sup>1</sup> Жонсўз—жон ўртовчи, азоб берувчи.

Қутидор қизининг пешонасини ушлади:

— Эй-ха, Кумуш, ҳали иссиғинг бор, — деди. —

Ұзингни тежа қизим, ўрнингни қалин қилиб бурканиб ёт, терласанг ёришарсан, қизим. Тўйбека, Кумушнинг чойини оқлаб берчи.

Офтоб ойим эрининг сўзини кучлаб тушди:

— Иссиғи бор, юзи ҳам қизариб, бўртиб турибдир.

Ўзининг руҳсиз товши билан Ойша буви ҳам гапка аралащи.

— Нах кечаси билмапсиз, нах мени қўрқутиб энкантенкамни чиқарди. Иситмаси аралаш алланучка сўзларни айтиб чиқди...

Кумушбиби ялт этиб бувисига қараб қўйди.

— ўша ҳарорати гаризанини ҳаммаси,<sup>1</sup> — деди қутидор. Мен бу кун бирар ҳакимдан сўраб қарайчи... Ол қизим, шу пиёладаги чойингни иччи, — деди ва тагин бир қайта қизини кузатди.

Чойни ичиб бўлғандан кейин қутидор фотиҳа ўқуб ўрнидан турди.

— Мен сенга айтиб қўяй, Кумуш, — деди турар экан қутидор Офтоб ойимга, — бу кунга бир меҳмон айткан эдим. Чўрингни чиқарип меҳмонхонани тозалат. Анови янги қоплаган кўрпаларингни бер, танчага ўшани ёпсин. Катта гиламни ҳам чиқар, уйингда меваларинг бор эдими?

— Бор.

— Бор бўлса яхши. Бир оздан сўнг эт олиб киргузарман, варақи пишириб қўйингиз.

Офтоб ойим варақи пиширишдан бу кунги меҳмоннинг унча-мунча киши бўлмаганлигини билди.

— Қанақа меҳмон эди?

— Сен танимассан, тошкандлик бир йигит, таги шу ердаги уч-тўртта оғайнилар. Тузикми, айтканларимни уқдингми?

— Уқдим-уқдим.

Кумушбиби отасининг сўзига илтифот қилмади. Қутидор дўконига жўнағандан кейин Офтоб ойим Тўйбекани меҳмонхонага буюрди ва ўзи хамир қилишга ўлтурди. Кумушбиби хомуш эди. Бир нарса тўғрисида ўйлармиди ёки бош оғриғиси кучликмиди, ҳар ҳолда на-

<sup>1</sup> Ҳарорати гариза—табиий ҳарорат, иситма.

мозшом гул каби ёпиқ эди. Қаршисида ўлтурған бувиси-нинг ўткан-кеткандан қилған ҳикояларига зернибина қулоқ берар ва кўнглини очиш учун айтилган қизик сўзларига илжайиш билан жавобланар эди.

Кумушбиби ўзининг бир соатча вақтини шу кўйи ке-чирди, сўнгра ўрнидан туриб кичкина латиф оёқларига отасининг яқиндагина олиб берган қала кавшини кийди ва ошхона юмиши билан қоришиб ёткан онасининг олдига борди.

Кумушбиби энди ўн еттини қўйиб ўн саккизга қадам босқанликдан бўйи ҳам онасига етаёзган, аммо жуссаси онасига кўра тўлароқ эди. Онасининг юмишига бир оз қараб турғандан кейин ташқарига томон кетди. Айвоннинг бир четидан меҳмонхонада гилам тўшаб уринган Тўйбекага қаранган бўлди-да, айвоннинг ўрта устунига келиб суюнди. Энди бояғига қараганда бир оз енгиллангансумон, жон олгучи қора кўзлари ҳаракатлана бошлиған, бўғриққан қизил юзлари очилинқираған эдилар. Айвон устунига суюнгач, қора қийиг қошларини чимириб кўча йўлак томонга қаради, бир оз қараб турди-да, айвондан ерга тушиб йўлак томонга, ариқ бўйига кетди. Сув бир дўконнинг остидан чиқиб, бу ҳавлида уч-тўрт қулоч чамаси очиқ ҳавода оқар ва кўприк-том остига кетар эди. Кумушбиби ариқ бўйидан бир ўринни кўзлади, сакраб нариги юзига ўтди ва чўнқайди. Унинг кўзлари мулой-имғина сув устига оғдилар. Ариқнинг мусаффо тиниқ суви ёвошгина оқиб келар, Кумушбибининг қаршисига етканда гўёки, унинг таъзими учун секингина бир чарх уриб қўяр, ўз устида ўлтурған соҳиранинг<sup>1</sup> сиҳрига мусаххар<sup>2</sup> бўлған каби тағи бир каттароқ доирада айлангач, оқистагина кўприк остига оқиб кетар эди. Ариқ сувининг ниҳоятсиз бу ҳаракатини узоқ кўздан кечириб ўлтурғач, қўл узатиб сувдан олди ва юзини ювди. Унинг юзини ўпид тушкан сув томчилари билан ариқ ҳаракатка келиб чайқалди, гўёки сув ичиди бир фитна юз берган эди... иккинчи, учунчи қайталаб юз ювишда бу фитна тағи ҳам кучайди...

Нозик оёқлар толдилар шекиллик, садаф каби оқ тишлигини бир-икки қайталаб чайди, ариқ бўйини ва унинг сувларини ташлаб кетди.

<sup>1</sup> Соҳира — сеҳрчи қиз.

<sup>2</sup> Мусаххар — сеҳрланган, таслим бўлған, бўйсунган.

Бояғыға қараганда анчагина енгилланиб ичкарига кирди, ҳаракатлари ҳам бир мунча ўзгарған эди. Ойша буви ундағи бу ўзгаришдан сўйинди:

- Енгил тортдингми, қизим?
- Шукур...
- Энди ортиқ уринма қизим, тинч ўлтур.

\* \* \*

Қиши күнлари бир тутам, "ҳа дегунча" кеч бўладир. Бу кун ҳам "ҳа дегунча"га ҳам қолмай кеч бўлған, меҳмонларнинг келишканига ярим соатлаб вақт ўткан эди. Қутидор меҳмонларни ихлос ва самимият билан кутар, зиёфат қуюқ-суюқлари билан тўла-тўқис давом этар эди. Тўйбека ичкари билан ташқарига<sup>1</sup> югуриб дастурхон янгилаш, чой ташир эди. Хизмат тугала ёзғандан кейин Тўйбека ўзининг совуб қолған ошини емак учун Офтоб ойимлар ёнига ўлтурди.

Сўздан сўз чиқиб Офтоб ойим Тўйбекадан сўради:

- Меҳмонлар қанақа кишилар экан, танидингми?

— Нах сиз ёш меҳмонни кўрмабсиз, дунёга келмабсиз, — деди Тўйбека ўнгу терс ош чайнаб, — бир чиройлик, бир ақёллик, тагин ўзи ҳаммадан юқорида ўлтурадир; ҳали йигирмага ҳам бормагандир, мўйлаби ҳам эндиғина чиқа бошлаган... Нах бизга куяв бўладирған йигит экан, — деди ва Кумушка қараб кулиб қўйди. Бу сўздан Офтоб ойим ҳам кулимсираб қизига қаради:

— Ана Кумуш, —деди, —эшитдингми, опангнинг сўзиши. Тўйбека сенга эр топқан, сен бўлсанг бошим огрийдир, деб ётасан.

Кумушбибининг сезилар-сезилмас кулимсирашидан ёқутдек иринлари остидаги садафдек оқ тишлиари кўриниб кетди эрсада, бироқ унинг бу ҳоли тезлик билан тундлиққа алишинди.

— Қолған хизматларингизнинг биттаси энди менга эр топиш эди.

Тўйбека Кумушнинг тундланишини эلامади:

— Эй... синглим, ҳали сен билмайсан, — деди, — у йигитни бир кўргин-да, ҳу деб кетабергин... сен тугил, шу

<sup>1</sup> Чўри хотинларда кишидан қочиш расми йўқ эди (*муал*).

ёшым билаи меним ҳам унга текким келди, — деди ва хахолаб юборди.

Кумушбиби чирт этиб юзини Тўйбекадан ўгириди.

— Тезроқ тегиб қолинг.

— Кошки эди тегалсам, — деди Тўйбека, мен унинг бир тукига ҳам арзимайман. Аммо сен бўлсанг унинг билан тенглашар эдинг. "Тенг-тенги билан, тезак қопи билан" ха-ха-ха!..

Тўйбеканинг шунингдек ҳангамалари бошқа вақтларда Кумушни яхшигина кулдирса ҳам ҳозир унга ётишиб келмади шекиллик, аччигланган кўйи ётиш учун уйига кириб кетди. Офтоб ойим "бачча-маччадир" деб ўйлаган эди. Шунинг учун бу тўғрида сўз очмади.

— Ташқаридан хабар олингиз-чи, опа, — деди Офтоб ойим, — чой керак бўлдимикин.

Тўйбека нари-бери ошини сб ташқарига чиқиб кетди. Орадан дақиқа вақт ўткан ё ўтмаган эди ҳовлиқиб айвонга келди:

— Туф-э, қуриб кетсин, жоним чиқиб кетди-я!

Бир соатдан бери жойнамоздан қўзғалмай тасбиҳ ағдариб ўлтурган Ойша буви Тўйбекани бошдан-оёғ кузатиб яна ишига машғул бўлди. Офтоб ойим илтифотсизгина кулимсираб танчадан сўради:

— Нима бўлди, нега мунча қўрқиш?

Тўйбека дамини ростлаб устуннинг тегига ўлтурди:

— Поччамдан дастурхонни олиб қоқиши учун гиолоснинг ёнидан ўтарманми, аллаким балога туртиниб кетдим. Қўрқанимдан оз қолдики, додлаб юборсам... Чамаси меҳмонларга қараб турған экан.

— Кимбало экан?

— Қоронғуда яхши ажратолмадим, тусини гира-шира анови қора Ҳомидға ўхшатдим. Тағи уми, бошқами худо билсин, шатир-шутир қилди-да, чиқиб кетди.

\* \* \*

Қутидор меҳмонларни жўнатиб ётиш учун чешинар экан, Офтоб ойим сўради:

— Чиройлик йигит, ақдлик йигит, деб маҳтий-маҳтий Тўйбеканинг ичаги узилди, у ким эди?

— Меҳмонимиз ўша эди, — деди қутидор, — тошкандлик Юсуфбек ҳожи отлиғ яқин ошнамнинг ўғли.

— Тўйбеканинг маҳтаганича борми, ўзи?

— Бор, — деди қутидор ва гиталанди,<sup>1</sup> — худо кишига ўгул берса шундайни берсин-да.

Офтоб ойим кула-кула Тўйбеканинг Отабек тўғрисида сўзлаган гапларини ва Кумуш билан бўлған мажаросини сўзлаб чиқди. Қутидор ҳам кулгидай ўзини тўхтатолмас экан:

— Тентагингнинг ақли бало, киройи куявинг шундог бўлса, — деди.

## 6. ТОШКАНД УСТИДА ҚОНЛИҚ БУЛУТЛАР

Бу кунларда Марғилонда шундай хабар чиқиб қолди: "Тошканд ҳокими бўлған Азизбек Қўлонга қарши бош кўтарган. Хон томонидан хирож (закот, солиқ) учун юборирилган девон бекларини ўлдириган!" Иккинчи кун бу хабар таги ҳам бошқача тўн кийди: "Мусулмонқул Нормуҳаммад қушбегига беш минг сипоҳ қўшиб, Тошканд устига жўнаткан!"

Бу хабарлар халқ томонидан жуда оддий, ортиқча совуқдонлилиқ билан қариши олнидилар. Бу воқиъага ҳеч ким ажабсинмади ва бунда фавқулоддалиқ кўрмади. Халқ бунга ҳақли эди, чунки, бундай тинчсизликларни энди кўра-кўра жуда ҳам ўрганиб қолған, бу кун бўлмаса эртага ўзининг ботирбошисининг, офтобачисининг, хуллас ким бўлса ҳам бекларидан бирининг шундай тинчсизлик чиқаришига "мумкин ва бўладирған иш" деб қарар эди. Аммо биз Отабекни бу тўғрида халқ билан биргалаштира олмаймиз. Чунки ул бу хабарга совуқдонлилиқ билан қарай олмас эди ва қарай олмади. Бу хабарни эшитар экан, еб тургани оғзида, юткани бўғзида қолди: бундай ўзбошимчалиқ орқасидан ўзининг очиқ қўзи, ўтқир зеҳни орқалиқ мудҳиш, фалокатлик манзаралар кўрас, миллатини — халқини — мусулмонини қўрқунч жар, тегсиз хаҳаннам ёқасида, йиқиљи олдида топар эди-да, сеска-ниб "ўзинг сақла тангрим!" дер эди. Бу хабарни эшиткандан сўнг гангигб эсини йўқотди, яраси янгиланди:

Оқ билан қорани ажратолмаган фуқаронинг бир неча гаразгў мустабидлар кайфи йўлида бир-бираисининг қонига ташна бўлишлари ва натижада истиқболнинг ваҳим кўринишлари!

<sup>1</sup> Гиталанмоқ — жоннишмоқ.

Шундай қайгулар ичида бўкиб ўлтуар экан Ҳасанали қўлида бир мактуб билан ҳужрага кирди. Мактубни Отабекка узатиб — "Тошкандан эмиш, отангиздан бўлса керак" деди. Отабек хатни очди: катта қофозда, йўғон қалам билан ёзилған узун бир мактуб эди. Ўқуди (айнан):

"Хувалбори<sup>1</sup> ... кўзимизнинг нури, белимизнинг қуввати, ҳаётимизнинг меваси ўғлимиз мулла Отабекка етиб маълум ва равшан бўлғайким, алҳамдуллоҳ биз дуогўй падарингиз, муштипар онангиз ва яқин дўстларингиз мунда ҳақ таолонинг ҳифзи ҳимоятида сиҳҳат ва саломат бўлиб кўз нуримизнинг дуюи жонини субҳи шом, балки аладдавом<sup>2</sup> раббулоламиндан ражо<sup>3</sup> ва таманно<sup>4</sup> этмакдамиз. Жаноби ҳақ бод фурсатларда<sup>5</sup> яқин ва саъид<sup>6</sup> соатларда тўқис-тугаллик бирлан дийдор кўришмакка насиб ва рўзи қилсин, омин ёраббулоламин. Баъда<sup>7</sup> сўзимиз: ўғлим, Марғилонга сиҳҳат ва саломат етиши мактубингни олиб ҳақ таолоға шукурлар қилдиқ. Бизнинг Тошкандан аҳвол сўрасанг, балки Марғилонга ҳам эши-тилгандир, мунда Азизбек қандоғдир бир кучка таяниб Қўёнга исён этди. Хазина ҳисобини олиш учун келган девон бекларини ўлдириб ўрда дарбозасига осди, бунга қарши Қўён ҳам тинч ётмаған бўлса керак. Бу кун Кировчидан<sup>8</sup> беш минг сипоҳ ила Нормуҳаммад қушбегини Тошканд устига буориulgаниғин эшиштидик. Фуқаронинг тагин қандоғ кўргуликлари бор экан, ўғлим!

Кечагина қонлик қиличини· фуқаро устида юргузиб турған Азизбекка унинг тифи зулми билан қора қонига беланилған ўғлининг, отасининг, онасининг, оғасининг мазлум гавдаси тупроқ остида ҳали чириб битмай туриб бу кун ҳалқ янга Азизбекка, ўша қонхўрга ўз қони билан ямин<sup>9</sup> этди; Азизбекни то ўзининг бир томчи қони қолғунчалиқ ҳимоя қилмоқча онд ичди. Азизбекнинг буйруғи билан кеча ўрда тегига барча Тошканд ҳалқи

1 Хувалбори — ул тангри, ул яратгучи.

2 Аладдавом — доимо, ҳамиша.

3 Ражо — умид, тълак.

4 Таманно — истак, хоҳиш.

5 Бод фурсат — тез вақтда, тезликда.

6 Саъид — баҳтили.

7 Баъд — кейин, сўнг.

8 Кировчи — Қурама билан Телов орасида катта бир қишлоқдир (муал).

9 Ямин — онт, қасам.

*Иифилған*, бу йифинда уламолар ҳам бор, фузало ҳам бор; хулоса, шаҳарнинг ҳар бир синфидан ҳам ҳозир эди. Азизбек ўрда қоровулхонасидан турниб фуқароға салом қилди. Азизбекнинг саломига мушарраф бўлғучиларнинг кўзларидан ёшлар оқмоқда эди. Ўғлим, сен бир қадар оқ билан қорани ажратма оласан, ёзғанларимни дикқат билан ўқи.

Азизбек ўрда дарбозасига осилған икки гавдани кўрсатиб сўради:

"Фуқаро! Кўрасизми бу икки гуноҳкорни, нима учун бу жазога мустаҳиқ<sup>1</sup> бўлдилар?"

Халқ:

"Билмаймиз, тақсир!"

Азизбекнинг ўзи жавоб берди:

"Булар Мусулмон чўлоқни саркардаларидан, қипчоқларнинг ўйлбошчиларидан ва қора чопоннинг душманларидан бўлған икки тўнғизининг гавдалари! Мен буларни сиз қора чопон фуқаром томонидан ўч учун ўлдирдим, сиз қора чопон оғайниларнинг қипчоқ қўлида шаҳид бўлған қариндошларингизнинг руҳларини шодландирмоқ учун ўлдирдим! Еки бу ҳаракатим адолатдан эмасми, фуқаро?"

Халқ жавоб берди:

"Адолат! Хўб қулғансиз, тақсир! Қипчоқларнинг жазолари шундай бўлмоғи керак!"

Азизбек мақсадға кўчди:

"Сиз қора чопонликларга холисона қулған бу хизматимга қарши албатта қипчоқлар қасдимга тушарлар, мени Тошканд ҳокимлигидан азл<sup>2</sup> этмакчи ва қўлларидан келса ҳамто ўлдирмакчи бўлурлар! Сиз бу эҳтимолга қандоғ қарайсизлар?!"

Халқ ўзининг қуйидаги жавоби билан кўкни кўтарди:

"Бир томчи қонимиз қолғунча йўлингизда жон берамиз! Қипчоқларда ҳад бўлғаймики, биз тирик турған хойда сизнинг бир тола мўйинингизни ҳам қулсанлар!"

Азизбек халқга ташаккур айттиб ярасини ёрди:

"Раҳмат фуқаро! Эшиштаманки, қипчоқлар Нормуҳаммад қушбеги қўл остида Тошканд устига ҳаракат бошлиған эмишлар. Бунга қарши бизнинг ҳозирланишимиз керакми, йўқми, фуқаро?!"

<sup>1</sup> Мустаҳиқ — муносиб, лойиқ.

<sup>2</sup> Азл — бўшатиш, мансабдан тушириш.

**Халқ:**

"Керак, албаттa керак, тақсир! Агар рухсат берсангиз бу кундан бошлаб қўргонларни тузата берамиз!"

**Азизбек:**

"Раҳмат фуқаро! Орқамда сизнингдек фуқаром турғандан менга ҳеч бир қайғу йўқдир!"

**Халқ:**

"Сиз омон бўлиб осойиш ўлтурсангиз қипчоққа йўл бермаймиз, тақсир! Қўргон тузатишкa фотиҳа берингиз тақсир!"

Азизбек фотиҳа берди. Халқ уруш ҳозирлигига киришиди. Ана, ўғлим, бизнинг халқнинг ҳолига йиғлашни ҳам билмайсан, кулишни ҳам! Ҳар ҳолда Тошканд устига яна қонлиқ булутлар чиқди, ишнинг охири нима билан тинчланар — бу бир худоғагина маълумдир. Бошқа сўзлардан ҳам ортиқроқ эсингга шуни солиб ўтайки, сиёсат тўғриларида ўйланиброқ сўзла! Арзимаган сабаблар билан талаф<sup>1</sup> бўлған жонларни ҳамиша кўз олдингда тут! Сен билан меним кўнгилларимиздаги яратғучига маълум бўлиб, аммо Фарғонада мени Азизбекнинг шерикидир, деб ўйлашлари ва сени бир фитначининг ўғли, деб танишлари эҳтимолдан йироқ эмасдир, шу жиҳатларни мулоҳаза қилиб оёғ бос! Бу тинчсизлик вақтида сен билан меним ҳаётимизнинг таҳлика остида бўлғанлигини унутма! Шуни ҳам айтаб қўяйки, бу тинчсизлик босилмагунча Тошкандга келмаслигинг маслаҳатдир. Тошканд тинчлангандан кейин (агар саломат бўлсан) ўзим хабар юборурман. Мунда барча ёру дўст саломат, мендан Ҳасаналига салом айт! Аддои<sup>2</sup> отанг Юсуфбек ҳожи. Тошканд, 27 далв ойида 1264-нчи йилда ёзилди".

Отабек мактубни тугатиб, тушунмай ўткан жумлаларини қайтадан кўздан кечирар экан, Азизбек воқиъаси устига келганда ихтиёрсиз "тулки" деб юборди.

"...босилмагунча Тошкандга келмаслигинг маслаҳатдир!" — бу жумлани ўқуғанда, — ундоғ бўлса сира тинчимангиз, — деди-да, ёвошгина илжайиб қўйди...

1 Талаф — нобуд бўлиш.

2 Аддои — дуо қилувчи.

## 7. МАЖБУРИЯТ

Қўқондан ҳар кун деярлик хабарлар келиб турар эди. "Қўқон сипоҳи томонидан Тошканд ўралди" деган хабарга энди ўн беш кунлаб вақт ўткан эди. Аммо ҳануз — "Тошканд олинди" деган гап йўқ эди.

Кечадан бери кишилар оғзида: "Нормуҳаммад қушбети яраланган, Қўқон йигитидан бир ярим мингги қирилған" деган хабар юриб кетди. Чамаси Азизбек осонлиқ билан жон берадирган кўринмайдир.

Анови ярасининг устига Тошканд фожиъаси келиб қўшилғач, Отабек тағин ҳам хаёлчанланған, тағин ҳам хомушлигини ортдирған эди. Ҳатто баъзи кунлар ҳужрасидан ташқарига чиқмас, кишилар билан сўзлашмас, бошқача айтканда кундан-кунга гўшанишинликка яқинлашиб борар эди.

Бу кун эрталабки чойдан сўнг Ҳасанали кечаги фикрини чинлаб амалга ошироқчи бўлди. Чунки Отабекдаги ўзгариш — кундан-кунга рангининг синиқиб бориши, ҳужрадан четка чиқмаслиги, хомушлиги ва бошқалар Ҳасаналини яхшигина қўрқўвга солған, ўзининг фақат томошачигина бўлиб юришидан ризосизланған эди. Дуруст, ул Отабекнинг муҳаббатига воқиф бўлғанидан бери бир дақиқа ҳам уни ўзининг кўз ўнгидан узоқ тутмаған: маҳбубаси ким, кимнинг қизи, бирар ёбини қилса мумкинми? — Мана шунингдек масалаларни текшириб, билиб ҳам ўйлаб келган эди. Аммо бу тўғрида Отабекнинг кўмагига чинлаб бел боғлашдан уни баъзи эҳтимоллар тўхтатиб: "Отабек ёш, ёшлар муҳаббати учар қуш, балки, бу кун-эрта унугиб ҳам юборар" каби мулоҳазаларда бўлинған эди. Ниҳоят Отабекдаги ўйчанлиқ ва ўзгача ҳолларнинг кундан-кунга кучайиб бориши Ҳасаналини ҳалиги мулоҳазадан воз кечдириб, бошқа йўсунларни қаратмоқча мажбур этди.

Гарчи унинг қарори бир нуқта устида тўхтаган бўлса ҳам шу ҳолда тиниб турмади, яна юз турлик бошқача йўсунларни ўйлади, минг турлик хаёлларга бориб қайтди, аммо уларнинг биттасини ҳам Отабек оғриғига эм деб топмади ва ниҳоят:

— Кўрайчи, қадамим муборак бўлармикин, — деб қўйди.

Кечлиқ ошни ўтказгач, Ҳасанали ўз ҳужрасидан кийиниб чиқди-да, Отабек ёниға кирди. Отабек "Бобурнома"

мутолааси билан машғул эди. Бэззи бир өхтимолларга қарши ўзининг ниятини билдиримай:

— Менда юмишингиз йўқми, бек? — деб сўрали Ҳасанали. — Ҳаммомга бормоқчи эдим...

Отабек кўзини китобдан узмай жавоб берди:

— Юмишим йўқ, бораверингиз.

Ҳасанали чиқди. Қош қорайиб, қоронгу тушасзган эди. Ҳаво булат, ачиг, совуқ сл тўрт томонга югурар, онда-сонда қор учқунларини қувалаб зириқтирап эди. Эрув вақтида ярим белдан лой кечишкага тўгри келадирган кўчаларнинг лойи қатқалоқланган, шунинг учун юргучи қийналмас, аксича ола-чалпоқ қор пагаларини босишдан вужудка келган оёғ остидаги "гарч-гурч" товушлари кишига бир турлик кайф, мусиқавий енгизлилк берар эдилар. Дўйонлар ёпиқ бўлсалар ҳам чойхоналар очиқ, кишилар ўртага гулхан солиб, чойхоначининг баччасини тоҳи ўзларига хон кўтариб ва тоҳи "хон қизи" деб ҳам қўядилар. Хон сайлағучилар орасида ёш йигитлар бор бўлғанидек, катта саллалилар мулланамолар, стмиш ёшлиқ кексалар ҳам кўринадирлар... Қиши кечалари жуда узун, шунинг учун чойхоналар обод; ҳалқ лаззатланиб баччанинг табаррукланган чойини ичадир, ҳуснига тамошо қилиб худонинг қудратига ҳайрон қоладир...

Ҳасанали Зис шоҳичининг ташқарисига келиб кирдида, меҳмонхона даричасига қаради. Дарича тирқишидан кўрилган ёргулиқ меҳмонхонада киши борлиқни билдирап эди. Ҳасанали тузатиниб олди ва ичкарига кирди. Зис шоҳичи намоз ўқумоқда бўлиб, меҳмонхона чет кишидан ҳоли эди. Бу тасодуфдан Ҳасанали сўйинди ва Зис аканнинг намозни битиришини кутиб ўлтурди. Зис шоҳичи ёнига салом берсиб жойнамоздан орқасига қараб қўиди. Фотиҳага қўл кўтарди. Фотиҳадан сўнг келиб Ҳасанали билан сўрашди:

— Келинг ота, тинчтикли?

— Шукур, тинчлик.

Танча теварагига ўлтуришдилар. Бир мунча вақт сўзсиз эдилар. Зис шоҳичи бу вақтсиз ташрифка тушуна олмай "нима қилинб юрасан?" дегандек этиб, бир неча қайта Ҳасаналига қараб олди.

— Ажбланмангиз, бой ака, келишимда бир мажбурият бор.

— Сизни Отабек юбордими?

— Йўқ, ўзим келдим, бой ака.

Зиё шоҳичи яна тушина олмади. Тўғриси ҳам Ҳасаналининг бу келиши Зиё ака учун ёт бир иш эди. Чунки, Ҳасанали Отабекнинг қули. Қуллар билан жиддий муомалада бўлинмоқ айниқса Зиё шоҳичилардек одамларга фавқулодда бир иш. Бунинг устига мажбурият остида ўзича келиши...

Зиё аканинг боши қотиб охирда сўради:

— Мажбуриятингиз?

Ҳасанали кулимсираб олди:

— Мажбуриятимни эшитсангиз балки ишонмассиз.

— Хўш.

— Ўзингизга маълумки, — деди тузикланиб Ҳасанали, — Марғилон келганимизга йигирма беш, бир ойлар чамаси фурсат ўтди. Шундан бери Отабек дардманд.

Зиё ака ажабланган эди:

— Қандай дардмандлик, Отабек соғ-ку?

— Тўғри айтасиз, — деди Ҳасанали, — аммо мен ҳам унинг дардига бир неча кунлаб тушинмай юрган эдим.

— Хўш, дарди?

— Муҳаббат.

— Муҳаббат?

— Муҳаббат, — деб тақрорлади Ҳасанали. — Шу йигирма беш кунлик бир муддатнинг ичида ул бутунлай одамгарчиликдан чиқаёзди. Бу ўргада қандай ташвишларга тушмадим, сўрасангиз.

— Кимга муҳаббат қўйған, хабарингиз бўлдими?

— Бўлди. Қутидорнинг қизига.

— Ҳа-ҳа-а! — деб юборди Зиё ака ва бир оз ўйланғандан кейин сўради, — буни сиз аниқ биласизми?

— Аниқ биламан.

— Ӯзи айтдими?

— Ӯзи айтмаса ҳам шунга яқинлашдириди.

— Отабек қизни қаерда кўрган?

— Афсуски буни била олмадим.

Ҳасаналининг келиш мажбурияти ва нима учун келганилиги Зиё акага яхши онглашилди эрсада, яна шундай бўлса ҳам сўради:

— Энди нима қылмоқчисиз?

— Ҳузурингизга келишимнинг бош сабаби ҳам шундайдир, — деди Ҳасанали. — Бу тўғрига сиз қандай йўллар кўрсатасиз ва нима кенгашлар берасиз, албатта шунга қараб бир иш қиласиз, деб хизматингизга келдим.

Зиё ака ўйлаб қолди. Қизиқ гап, деб бир-икки қайта

нос отиб олди. Бу орада Ҳасанали бошдан-оёқ ҳикояни сўзлаб чиқди.

— Нозик гап, — деди охирда Зиё ака, — агар биз Отабекни бу ердан уйландирив қўйсақ, ҳожи биздан хафа бўлмасмикин?

— Кўб яшанг, бой ака. Қулингиз ҳам бу тўгрида кўб ўйладим. Хафа бўлса нима чораким, биз шу ишка мажбур бўлған бўлсақ. Шунинг билан бирга Юсуфбек ҳожи ҳам унчалик ақлсиз кишилардан эмаски бу гапка хафа бўлса. Аммо мен қутидор кўнадими, йўқми, деб бу томонни ўйлаб турибман?

Зиё ака яна ўйланиб бош қашинди:

— Айтганингиздек масаланинг бу тарафи ҳам нозик, — деди, — аммо қутидорнинг Отабекка қарашини яхши билсан ҳам ўртада йироғлиқ масаласи бор... Қизимни мусофирига бермайман, деб қўярмикин, билмадим...

— Менимча қутидорнинг олдидан бир йўли ўтилсин, — деди Ҳасанали, — агарда кўниб хўб деса-ку хайр, кўнмаган тақдирда бу хабарни Отабекка еткузсак зора шунинг билан кўнгли совиб тушса.

Ҳасаналининг бу сўзи Зиё акага ҳам маъқул бўлиб тушди:

— Бўлмаса, қутидорникуига қачон борилсин, дейсиз?

— Бундаги ихтиёр сиздадир.

Зиё ака ўйлаб турди-да, юзига кулги чиқарди:

— Ҳозир борамиз, — деди, — биз ҳам умрда бир совчилик қиласи.

Зиё ака кийиниш учун қўзғалған эди, Ҳасанали ундан сўради:

— Маним ҳам бирга борғаним маъқулми ёки ёлғиз ўзингиз?

Зиё ака қўл силкиб:

— Сизнинг боришингиздан зарар йўқ, — деди.

## 8. ҚУТЛУФ БЎЛСИН!

...Зиё шоҳичининг кулиб айткан сўзларига қутидор сира ҳам тушинмас ва кутилмаган меҳмонларнинг келиш сабабини сўрамоқдан ийманар эди.

— Оловни қўятуриб, қудаларга дастурхон олиб чиқингиз.

Зиё шоҳичининг бу кулгулигидан сўнг қутидор танчага олов қалашни қўйиб дастурхон буюриш учун ичкарига

құзғалди. Унинг кетидан Ҳасанали: "Тақдир биткан бүлсін-да" — деб қүйған эди, шоқици қатый қилиб: "Иншооллоқ битар, шундог йигитни куявлукка қабул қилмagan бир кишини биз одамға санамаймиз", — деди.

Қутидор қайтиб чиқди... Зиё ака билан Ҳасанали маңнолиқ қилиб бир-бирларига қарашиб олмоқда әдилар. Қутидор айниқса Зиё аканинг оғзини пойлаб, күнгли чақирилмаған мәҳмонардан тушинмоги қийин бұлған бир маңнони сезинмакда эди. Орадаги сўзсизлик узоққа чўзи-лабергач, қутидор Ҳасаналидан сўради.

— Бек саломатми?

Зиё ака сўз ўнқови келганини пайқаб Ҳасаналининг жим туришиға ишорат қилди ва ўзи жавоб берди:

— Бизнинг сизга чақирилмаған мәҳмон бўлишимиз ҳам Отабекнинг соғлиги учундир.

Қутидор бу жавобдан бир нарса тушинолмади ва шунинг учун қайталаб сўради:

— Отабек согми?

— Бу кунгача Отабек саломат, — деди Зиё ака салмоқлаб, — аммо бекнинг мундан кейинги соғлиги сизнинг қўлингизда қолғанга ўхшайдир.

Қутидор яна тушинолмай таажжуб билан мәҳмонарға қараб олди.

— Тушинолмадим...

— Яъни Отабек бу кунгача саломат, — деди Зиё ака яна.

— Аммо мундан кейинги соғлиги сизнинг қўлингизда...

— Меним қўлимда?

— Сизнинг ихтиёрингизда.

— Отабек каби бир йигитнинг соғлиги ҳар бир ақлли киши учун мақсад бўлса ҳам, — деди таажжуб билан қутидор, — лекин сўзингизнинг шуниси қизиқдирким, бир йигитнинг соғлиги иккинчи бир кишининг ихтиёрида бўлсін.

Зиё ака бояги вазиятини бузмади:

— Ажабланмангиз, ўртоқ, — деди, — бекнинг мундан кейинги соғлиги сизнинг ихтиёрингизда; бу ўйин эмас — тўғри гап.

Қутидор тўсиндан муддаонинг ким ва нима тўғрисида бўлғанлигини пайқаб қолди ва ўзида бир турлик ўнгтайсизлик сезди. Зиё ака Тўйбеканинг ёзған дастурхонини тузатиб, кулчаларни синдириди. Ҳасанали билан қутидорни нонга таклиф қилиб ўзи мақсадни очиқроқ онғлатмоқчи бўлди:

— Мұхаббат деган нарса жуда оз кишиларга насиб бўладирган бир дурри бебаҳодир, — деди Зиё ака. — Қадрдонингиз Юсуфбек ҳожининг ўғли Отабек — бир неча кунлардан бўён пинҳоний бир дард билан оғрир эди. Кўринишда унинг қули, аммо ҳақиқатда Отабекнинг маънавий падари бўлған Ҳасанали ота унинг махфий дардининг асли омилини излайдир, бекнинг ўзи бўлса ўз ҳоли тўғрисида ҳеч нарса сезидирмай дардини яширадир. Шундое қилиб хўжасига ихлослик Ҳасаналининг тажрибалик кузатишидан бекнинг махфий дарди узоққа қочолмай натижада сир очиладир... Шариъат ишига шарм йўқ, дейдирлар ўртоқ, агарчи сиз билан менга бир мунча оғирроқ бўлса ҳам яна сўзлаб ўтишга ҳожат бор: кунлардан бир кун тақдир шамоли юрадирда бир кимсанинг иффат пардаси остида ўлтурган қизининг юзидағи ниқобни кўтариб иккинчи томондан бизнинг Отабекни шу афифага<sup>1</sup> рўбарў қиласидир. Шу дақиқадан бошлаб бекда у афифага қарши бир ишқ, ҳам чин бир ишқ туғуладир...

Зиё шоҳичи ўз тонидан ҳам яна бир мунча гапларни қўшиб чатиб, сўзини тугатди. Қутидор яхшигина ўнгғайсизланған эди. Қутидоргина эмас, совчилар ҳам ўнгғайсизланған эдилар. Масаланинг нозиклиғига учавлари ҳам тушинарлар ва шунинг учун иттифоқ қилғандек чуқур бир сукутка кеткан эдилар.

Гарчи муддао кун каби ошкора бўлған бўлса ҳам нима учундир қутидор яна ўзини тагофилга солиб сўради:

— У кимнинг қизи эмиш?

Зиё шоҳичи қутидор тарафидан ўзига бериладирган шу саволни кутиб турған эди.

— Сизнинг каримангиз, — деди.

Қутидор ўзининг жойсиз саволидан ўқиниб ерга қаради. Уртада тагин сўзизлик, ўнгғайсизлик бошланди. Бир неча фурсат шу йўсун жимгина ўлтуришкандан кейин яна Зиё шоҳичининг ўзига гапиришка тўғри келди:

— Биз ўзимизнинг бу келишимизда сизнинг учун дунёга орзуғулиқ бир ўғул ҳадия этканимиздек, иншооллоҳ қайтишимизда ҳам Отабек учун мужассамаи иффат бўлған бир рафиқа тухфа қиласмиз.

Бу сўздан кейин Ҳасаналининг юраги безиллай бош-

1 Афифа — покиза қиз.

лади. Чунки шу дақықа қутидор оғзидан ё рад ва ё қабул жавоби эшитар эди. Иккинчи томонда, кутимаган бу совчилиққа ишонишни-да, ишонмасни-да билмай шошиб ўлтурган қутидор ҳам ўзининг оғзига тикилиб тургучи иккى кишига қандай жавоб айтиш учун гарангсиган эди.

— Отабек каби бир йигитни ўғул қилиш шарафига ноил бўла олсам ўзимни энг баҳтлик оталардан санар эдим, — деди ниҳоят қутидор, — аммо бу тўғридаги ҳамма ихтиёр ўз қўлимда бўлмай орада кўкрак сути бериб ўсдирған хотин ҳам бор... Бу иш учун ёлғиз ўзим қабул жавоби берсам-да, онаси бир чеккада қолдирилса эҳтимол пухта иш қилмаган бўлармиз. Агар маслаҳат кўрсаларингиз бу тўғрида унинг билан кенгашиб кўрар эдим...

Қутидорнинг жавобидан самимият ва ихлос маънолари томиб турар эди. Жавобни эшиткан совчиларнинг томирига умид қонлари югуриб кетди.

— Бу от савдоси эмас, умр савдоси буродар, — деди Зиё ака, — янгамиз билан кенгашингиз, Отабек ва отаси тўғриларида билғанларингизни сўзлангиз, шундан кейин хўб ўйлашиб бизга жавоб берингиз.

Шу гапдан кейин қутидор меҳмонларни қолдириб ичкарига кирди. Кумушбиби ухлашқа ётқан эди. Тўйбека бўлса ўзининг ўчоқ боши ёнидағи уйчасини титратиб хуррак отар эди. Қутидор уй эшигини очар экан айвонда ўзини кутиб ўлтурган Офтоб ойимға деди:

— Шамъни олиб кирчи олдимга.

Уй жиҳозга ғоятда бой, гўё музахона тусини берар эди. Тахмонда турлик рангда атлас ва шоҳилардан қопланған кўрпалар, тахмон тоқчаларига уйилган пар ёстиқлар, қатор-қатор хитойи жононлар: косалар, кўзалар, чинни чойдишлар, лаганлар, кумуш қинлик ханжар ва қиличлар, қалқон ва сипарлар, дорга солинган турлик-турлик эр ва хотин кийимлари: пўстин, чакмон ва бошқалар, қип-қизил гилам ва шоҳи кўрпачалар киши кўзини қамашдирар дарражада эдилар.

Ошиқиб оғзини пойлаған Офтоб ойимға қутидор бир илжайиб қўйди-да:

— Хотин, сен ҳали эшикдаги совчилардан хабарсиздирсан? — деди.

Офтоб ойим эрининг "совчи" хабарини оддийгина қаршилади, чунки энди иккى-уч йилдан бери уйларига кун сайи совчилар жамоаси ёғилиб ётқанлиқдан бу совчилар ҳам ушаларнинг бирисидир, деб ўйлаған эди:

— Хайрлик бўлсин, кимлар совчи?

Қутидор яна бир кулиб қўйди:

— Зиё шоҳичи, тағин сенга номаълум бир киши.

Офтоб ойим бу кунги совчиларнинг қутидорга бошқача-роқ ўзгариш берганларини пайқади ва буни эрининг са-мимият ҳам ошиқишидан сезди:

— Ким учун келганлар?

— Бундан ўн беш кунлар илгари биз бир Тошкандлик савдогар йигитни меҳмон қилған эдик, балки эсингдадир?

— Эсимда бор, Тўйбека мактаб кирган йигит.

— Ўлма хотин, — деди қутидор, — ана шу йигит учун келганлар.

Бу сўздан Офтоб ойим безонглаб тушти ва эрига қарши ризосизлик вазиятини олди:

— Мусофири-ку?!

Офтоб ойимнинг бу сўзи билан қутидор бош қашиниб олди ва умидсиз бир товушда:

— Мен ҳам шунисига ҳайрон бўлиб қолдим, — деди. — Йўқса ўзи айни биз қидирған, ҳар тўғрида ҳам етук бир йигит эди.

Офтоб ойим бошқа хотинларимиздек эрининг раъии ва хоҳишини, умуман бутун шахсини эҳтиром қилгучи бир хотиндир. Шунинг учун эрининг ҳозирги раъиини гарчи ўз тилагига бус-бутун зид топса ҳам ёлғиз "мусофирик" масаласи билангина гапка хотима бермай, бошқа тараф-лардан ҳам камчиликлар топиб асослик суратда қутидор-нинг Отабекка томон ҳароратлананаёзган юрагига совуқ сув сепмакчи бўлди:

— Ўзи қандай кишининг ўғли, отаси сизга танишми?

Офтоб ойимнинг бу саволи ўзи учун зарарлик бўлиб чиқди. Чунки қутидор, Юсуфбек ҳожининг қандай киши бўлғанлигини, бу кунда қайси ишда эканлигини ва ўзига бўлған муносабатини майда-чуйда тафсилотлари билан сўзлаб чиқиб, сўзи охирида: "Йигитнинг наслини айбситиб бўлмайдир, тўғрисиға кўчканда бу йигит наслан биздан аллақанча юқорида турадир", — деб қўйди.

Офтоб ойим энди иккинчи турлик йўл билан кетди:

— Уйланганми, йўқми?

— Уйланмаган. Буни қайсиидир бир мажлисда унинг қулидан эшиткан эдим.

— Ёши нечаларда бор?

— Кўб бўлса йигирма беш ёшларда бўлур, бўлмаса йигирма икки--йигирма учлардан ошқан эмас.

— Нима мажбуриятда бизга куяв бўлмоқчи, Тошканддан қиз топилмаганми?

— Топилса ҳам ёқтирмас экан, — деди қутидор ва ўнгтайсиз ҳолатда воқиъани шипшишиб чиқди. Масаланинг бу янглиғ бошланишига ва бунинг устига эрининг мойилланишига Офтоб ойим нима дейишни билмай қолди. Тузик, эрининг майлини анчагина далил ва сабабларга суюниб бўлган бир майл эканини онглаған, куяв бўладирған йигитни ўзларига ўғуллиққа лойиқ бир кимса эканини ҳам яхши тушинган эди, аммо ҳозир бу гаплардан ҳам илгарироқда "мусофирик" масаласи турад; бир неча йиллардан бери мувофиқ куяв излай-излай ниҳоят Тошкандлик бир мусофирига бериш хўрлиги Офтоб ойим учун оғир эди.

— Энди қандай қенгаш берасан, хотин?

Офтоб ойим ўз фикрини очиқ айтишка юраксина олмас, эрининг кўнгли олинишидан қўрқар, аммо — "мусофирик" масаласига жону дилдан қарши эди.

— Сиз мувофиқ кўрган бир ишка қарши тушиб, раъйингизни қайтаролмайман, — деди кўб ўйлағандан кейин Офтоб ойим, — чунки нима бўлганда ҳам сизнинг оталиқ исмингиз бор, ҳам кўброқ ихтиёр сизнинг қўлингиздадир. Мен албатта кўзингизнинг оқу қораси бўлган ёлғиз қизингизни ярамас, бўлмағир кишига тутиб берарсиз, деб билмайман. Бу жиҳат билан бу ишка ризолигим билинса ҳам бироқ қаршилигим шундадирки, куяв тошкандлик бўлгандан сўнг қизингизни ўзи билан бирга олиб кетар ва сиз билан мени ёлғиз боламиздан айирап... Бунга қолганда сизни билмасам-да, аммо менинг бундай жудолиққа сира тоқатим йўқдир... Мана шу тарафни снгилроқ ўйлағанга ўҳшадингиз, жоним.

— Сўзларинг тўгри, хотин, — деди ўйлаб қутидор, — лескин тақдир битканданми, нимадан бўлса ҳам бу йигитка қарши кўнглим жизиллаб турадир. Бу фикрим сенга маъқул тушадими, йўқми, ҳар ҳолда биз энди узоқ ўйлашиб ўлтурмайлиқ-да, ўз хоҳишимизча қилиб жавоб берайлик: масалан, совчиларға ризолигимизни билдириб, аммо Кумушни Маргилондан олиб кетмасликни шарт қиласлиқ. Агар шартимизни қабул қиласлар ёлғиз боламиз икки бўлиб — айни бизнинг муддаомиз; йўқ, қабул қиласлар ул вақтда киналари ўзларидан бўлсин, мана бу маслаҳатка нима дайсан, хотин?

— Мусофирилиги?

— Биз таънани куяв қилмаймиз, — деди қутидор, —

бизга чин йигит керак, халқ "мусоғирға берди" деб сүз қылса — қылсан.

Офтоб ойим эридаги майлни бошдаёқ пайқаган эди, шунинг учун тилар-тиламас "ўзингиз биласиз" жавобини берди. Жавобни олиб қутидор совчилар олдиға чиқыла маълум шартни уларга зълон қилди. Бу шартни Отабек исмидан Зиё шоҳичи қабул этиб қутидорни Отабекдек бир йигитни куяв қилиши билан табриклади ва шу такаллуф-сиз совчилик илиа умр савдоси биткан ҳисобланди. Икки ёшнинг муҳаббатлик, увалик-жувалик бўлишлариға дуо қилингач совчиларга заррин тўйлар кийдирилди. Ҳасанали қутидорға ўзининг миннатдорчилигини айтиб тугата олмас, сўз ораларида уни дуолар билан ғарқ этмақда эди.

— Тўйлар муборак бўлсин.

— Сизга куяв ўғул муборак бўлсин.

Қутидор ихлос ва самимият билан:

— Қутлуғ бўлсин, — деди.

## 9. ҚАРШИЛАШ

Бу кунги кутилмаган тун Ҳасанали отани гангиткан, унинг кекса кўзлари уйқу билан тамом чаплашиб олган эдилар. Ул бу хабарни эртага эрталаб қайси йўсун билан бекка билдириш йўлларини ўйлар эди. Бу фавқулодда сўйинч хабарни бекнинг қайси йўсунда қаршилашини ўйлар эди. Бу хабарни эшитиш билан Отабекда кўриладирган ўзаришларни, ҳолларни, ҳаракатларни... барчасини бирмабир кўнглидан кечирав эди. Бу гапни эшияткач, ҳафталаб ҳужра ичидан чиқмай ётқан бекни кўчаларда, бозорларда, қутидор уйларида шодланиб, руҳланиб юрганини кўрап эди. Бу ўйларни тугаткандан кейин унинг кўзлари уйқу сари юмила бошлаб, қархисига Отабек келиб тўхтар эди: "Ота, мен сизнинг бу қилган яхшилигингизни сира унутмасман" деб миннатдорлик қилғандек бўлар эди. Ҳасанали уйгониб кетар ва қайтадан шу тўғрида ўйлаб бошлар эди: "Бечора. Суйганинг тўғрисида ўйлай-ўйлай бошларинг оғриб, оҳлар тортиб ётадиргандирсан... Ердамчинг йўқлигидан умидинг кесилиб, ҳасратингни кимга айтишни билмайдиргандирсан. Қайғирма бегим. Ҳасанали отанг у тўғрида ҳам сени ёдидан чиқармади... Бу кеча сенинг қайгулиқ кечаларингнинг энг кейингиси ва ойдинлиқ ҳам шеъриятлик тунларингнинг арафасидир, бегим".

Ҳасаналининг кўзлари тагин уйқуға кетар, қархисига

Отабек билан күхлик, күркем бир қыз кесиб чиқар ва иккиси унга қараб илжайишар әдилар: "Бизнинг чин отамизсиз" дегандек бўлар әдилар. Ҳасаналининг яна уйқуси қочар эди.

— Ёшим олтмиш тўртка етди, ўғул-қизим бўлмади... Дунёдан чароғчисиз бораман... Дарвоқиъ Отабек менга ўгуллиқ қилмасми, хотини менга қызы бўлмасми, уларнинг болалари мени "бобо" деб кетимдан югурмасмикинлар? Тупроқ остларида унутилиб ётқан кезларимда: "Бир вақт Ҳасанали отамиз ҳам бор эди", деб ёдласалар, яхшилиқ билан эсласалар стар менга шу.

Тунлар узоқ, тонгни отдириб, Отабекни қувондиришгача сабр чидамас, кўз юмишга ҳалигидек хаёллар монсө бўлар әдилар. Шу йусун ярим ҳолатда тонгни отдириб сўйинтириш соатлари ҳам етди.

Чойдан кейин ҳужрасига чиқиб кеткан Ҳасанали қўлтуғида бир нарса билан кириб бек қаршисиға ўлтурди. Отабекдаги сукут, хаёл, фикр каби ҳолатларни юлиб, юлқиб олиб, улар ўрнига чечак доналари экиб, умид сувлари сепмакчи эди — Ҳасанали:

— Энди муборак бўлсин, сизга, — деди.

Отабек тушинолмай Ҳасаналига қаради. Ҳасанали илжайган кўйи қўлтуғидағи заррин чопонни олиб сандал устига қўйди.

— Бу қандай чопон? — деб сўради бек.

— Муборак бўлсин, дедим-ку.

— Нима муборак бўлсин?

— Сизга иффатлик ва севимлик рафиқа билан қутидордек қайин ота, Ҳасаналига келин.

Отабек қизиқ ҳолатда қолди: бир турлик титраб кетди, кўзлари қинидан чиқар даражага етди. Ғайрихтиёрий қўзғалиб ўлтургандан кейин сўради:

— Бу нима деган сўзингиз?

— Нима деганимни сўрамангиз ва деганимга ишонабсингиз, — деди кулиб Ҳасанали, — мен сизни қутидорнинг қизига уйландиришка қарор қилиб, қароримни ҳам бу кун кечаси Зиё шоҳичи билан амалга оширдим... яъни қутидорнинг қизига сизнинг учун унашиб келдик.

Отабек гангигиб, шошиб сўради:

— Қайси қизига унашиб келдингиз?

— Қутидорнинг ёлғиз қизига, — деди Ҳасанали, — бундан хотиржамъ бўлингиз, бек. Зиё шоҳичи эрталабки чойни ичиб борарман деган эди, биз унинг билан ҳали тўй кенгашларини қиласмиз.

Отабскнинг тусида курсанд ва хафалиги мажхул бир ҳолат бор эди. Унашиш масаласига қарши тушмаганидек, сўйинчини ҳам ошкор қилмади...

\* \* \*

Кумушбиби уйқудан туриб, фавқулодда бир ҳолга учрайтирип:

Бир кечада ҳамманинг тушига "тўй" кириб чиқған. Тўй учун янги кўрпалар қопламоқчи бўладирлар, пар тўшаклар олмоқчи бўладирлар, куяв учун қандай кийим ярашмоғи ҳам баҳс қилинадир, Офтоб ойим эрига олтин камар олмоққа буюрадир... Тавба, демай чора йўқ: Офтоб ойимларнинг куявлари ким, қайси қизларини эрга берадирлар, уларнинг Кумушдан ҳам бошқа қизлари борми? — Уларнинг қизлари ёлғиз, демак Кумуш эрга бериладир... Тушинарлик гап эмас:

— Эрга ким тегадир?

— Кумуш.

— Кумушбиби куявни ёқтирадирми, йўқми? Бу тўғрида унинг фикрини билиш керакми, эмасми?

— Сўзлаш ҳам керак эмас, билдириш ҳам.

— Нега?

— Чунки одат шул! Кумуш ота-она ёқтирган кишига рози бўлиш учун мажбур!

Кумушбиби куявнинг ким бўлғанлигини Тўйбеканинг шу сўзларидан сўнг пайқаб олди:

— Мана бескачим, — деди кулиб Тўйбека. — Тўйбека опангни сен ҳеч нарсага санамайсан. Бироқ унинг нафси-ламрда каромати бор. Опанг бир нарсани тилига ва ё кўнглига олдими, даррав фаришталар "омин!" дейдирлар. Анови кунги ёш исҳонни сенга маҳтасам аччиғландинг, аммо келиб-келиб бу кун сени ўшанга бердилар... Энди мундан кейин Тўйбека опангга ихлос қўй, бескачим!

Бу хабарни эшиткучи Кумушбибининг қора кўзлари жиқ ёшга тўлиб, кипраклари ёш билан беландилар.

— Йиглама бескачим, — деди Тўйбека, — биз биламиз сизнинг кўз ёшларингизнинг нимага эканин: эрлар сўйингандан кулсалар, сизга ўхшаш қизлар йиғлайдирлар; сизнинг йиғлаганингиз — қувонганингиз... Мени эрга берганларида сенга ўхшаш мен ҳам йиғлаган эдим, аммо ичимдан никоҳ кунининг тезроқ келишини кута-кута ўлган эдим.

— Тоқатим тугади, опа, — деди Кумуш, — ортиқ сүзламангиз!

— Сүзламайман, — деди Түйбека, — лескин сирасини сүзлайман... Ох, күрсанг эди бир куявни. Қандай чиройлик, қандай ақдлик эканини билар эдинг, бекачим. Юлдузингиз нах бир-бириңгизга түрги тушкан экан, иккингиз ҳам бир-биравингиздан камлигингиз йўқ.

Кумушбиби ортиқ чидалмади, қўрқунч бир товуш билан ҳайқирди:

— Ох, ўламан, кўб сўзлама!

Кумушнинг бу товшига Офтоб ойим билан Ойша кампир уйдан югуришиб чиқдилар:

— Нима бўлди, нима бўлди?

Кумушбиби онаси билан бибисининг уйдан чиқишлари ила бошини сандалнинг кўрпасига буркаб, ётиб олди. Тўйбека жуда қўрқкан эди:

— Қаллиғи тўғрисида сўз очқан эдим, мен билан уришиди.

Офтоб ойим Тўйбскани қарғаб берди:

— Сен ақлсиз ўлгур, Кумушни уялтиргансан! Тинч юрсанг сени бирақ бир нима қиладими? Бор, ишингга бор!

Оналар Кумушнинг бу ҳайқиригини уялғанга йўйдилар-да, яна уйга кириб бисот кавлашка, тўй ҳозирлигини кўриш카 машгул бўлдилар.

Кумушбиби бир неча фурсаткача шу кўйи бурканиб ётди. Сўнгра ўрнидан туриб ташқари ҳавлига қараб кетди. Кўб инғлаганиқдан кўзлари қизарған, қовоқлари шишкан, юзлар бўрткан эди. Аммо бу ўзгаришлар унинг ҳуснини, латофатини бир зарра ҳам камитмай балки, ўн қайта оширган эдилар. Ташқарига чиқғандан кейин айвоннинг тумшуғига келиб ўлтурди ва ўнг қўлининг кафтига юзини олиб фикрга толди. Шу ҳолда узоқ қолди. Шундан кейин ул қўлинни юзидан бўшатди-да, энтиқиб дам олди ва кимнидир излагандек, кимнидир куткандек теварагига қараб қўйди...

— Ариқ бўйи, сирлик ариқ бўйи.

Ёшлиқ кўзлар ариқ бўйига тушиб, нозик осёқлар ариқ бўйи томонга ҳаракатландилар. Ул ариқ бўйига еткач, маълум ўринга сакраб ўтди-да, чўнқайди. Бир ҳовуч сув олиб юзидан тўкиб туширди ва оҳистагина йўлак томонга қараб олгандан кейин сувнинг оқишига кўзини тикиди. Кумушнинг дардини ҳеч ким билмас, унинг хаёлига ҳеч ким тушинмас, магъришу ариқ бўйи тушингандек, билган-

дек... Сирлик ариқ бўйи унга нималарнидир сўзлар, ундан нималарнидир тинглар, бунга четдан ҳеч ким воқиф бўлаолмайдир-да, бўлмоғи ҳам мумкин эмас.

Кўзларидан оққан марварид томчиларини шу сирлик ариқ суви билан ювди, бир мартабагина ювди эмас — қайталаб-қайталаб ювди. Бояги аччиғидан бир мунча тинчланиб, кўз қизиллиқлари кеткан ҳолда битта-битта босиб ичкарига қайтди.

## 10. ТЎЙ, ҚИЗЛАР МАЖЛИСИ

Қутидорнинг ташқарисига эр меҳмонлар, ичкарисига хотин меҳмонлар тўлғанлар, улар қуюқ, суюқ ошлар, ҳолва, нишолдалар билан иззатланадирлар. Ташқаридан бир қўша созандалар дутор, танбур, гижжак, рубоб, най ва амсоли<sup>1</sup> созлар билан дунёга жон суви сепиб шаҳарнинг машҳур ҳофизлари ашула айтадирлар. Тўй жуда ҳам руҳлик...

Ичкарида хотинлар мажлиси: оналарча айтканда, улар қумтупроқдек кўб, бироқ мажлиснинг боришида тартиб йўқ, ҳавли юзи ва уйлар хотинлар билан тўлган, қайси ҳавли юзида бир товоқ ошни еб ўлтурадир, ким йиғлаган боласини овитиш билан овора, бирав ёр-ёр ўқуб, тағин биттасининг қувончи ичига сигмай хахолаб дунёни бузадир, хуллас бағ-буғ етти қат кўқдан ошадир...

Офтоб ойим қайгулироқ, туси бир оз синикғансумон... Меҳмон кутиб чарчағаниданми, нимадан бўлса ҳам жуда калавлаган, баъзан қиласидирған ишидан ҳам янгишиб кеткани, масалан, уйга кирмакчи бўлиб таванхонага кириб қолғани кўриладир. Тўйга келган хотинларнинг "Тўйлар муборак, куяв муборак!" деб сўрашлариға ҳам ишончсиз бир оҳангда "Қутлуғ бўлсин", дейдир.

Офтоб ойим донхонанинг эшигидан туриб хотинлар орасидан кимнидир ўз ёнига чақирди. Ёши эллидан ошқан, кулгуси ичига тўлиб тошқан бир хотинни дувурдан<sup>2</sup> чиқиб, ўзига қараб юрганини кўргандан кейин доинхонага кирди. Хотин ҳам ичкарига киргач, Офтоб ойим эшикни қия бесклади-да, қайгулиқ бир боқиш билан хотинга қаради.

1 Амсол—ўхшашлар, кабылар.

2 Дувур—хотинлар на болаларнинг гала-говур сұхбати ва ҳаракати.

— Нега қайғулиқ күринасан, Офтоб?

Офтоб ойим узоқ тин олиб эшикка қаради ва ярим товуш билан:

— Шу чоқда ичимга чароғ ёқсалар ҳам ёримайдир-да, згачи, — деди ва күзига жиқ ёш олди.

— Нега?

— Қизим тұғрисидан...

— Қизингта нима бўлди?

— Унашилғанига бу кун еттинчи кун, — деди Офтоб ойим, — шундан бери Кумушингиз тун ҳам йиглайди, кун ҳам, сабабини сўрасам сира жавоб бермайдир-да, дўлонадек кўз ёшисини оқиза берадир. Бу кун тагин йигиси ошиб тушди. Ҳайтовур ялиниб, ялпоғланиб аранг ҳаммомга юбордиқ.

Хотин Офтоб ойимнинг бу гапидан ҳайрон бўлди ва ўйлаб сўради:

— Нимабало, куявинг кўрксизми?

— Ўзим кўрмадим, — деди Офтоб ойим, — аммо кўргучиларнинг сўзларига қарағанда ўхшашиз кўркам, тенгсиз ақлли бир йигит эмиш... Отасининг ўзи йигитни яхши кўриб куяв қилған эди.

— Кумушнинг ўзи йигит тұғрисида ҳеч нарса билмайдирми?

— Биладир, — деди ойим, — унинг олдида биз жўрттага куявни маҳташамиз, лекин бу маҳтовларни эшигуси келмай, қайтага йигисиниғина ортдирадир.

Хотиннинг ҳам бу гапдан ҳайрати ортди ва бунда қандай сир борлиғига ақли етмади. Офтоб ойимни юпатиш учун ўткан кеткандан ва бошда йиглаб эрга теккан қизларнинг чимилдиқда йигит билан апоқ-чапоқ бўлишиб кетканларидан ҳикоя қилди:

— Қайғрма, Офтоб, — деди, — куявинг бунчалик сулук бўлса, гап-сўзда тенги бўлмаса, ҳали чимилдиқда қизингнинг печак гулдек (чирмович ўти) бўлиб эрига чирмашқанини кўрмиз.

— Оҳ, опажон, — деди, умидсизча ойим, — маним бунга кўнглим чопмайдир.

— Чопсин, Офтоб. Мен бундай йиглоқ қизларнинг кўпини кўрдим, шундай қизларнинг уялмай-суялмай чимилдиқда ҳатто йигитдан ҳам ортдириб ҳаракат қилғанларини ҳам кўрдим, сенинг қизинг ҳам шуларнинг биттаси, қайғрма, Офтоб.

— Илоҳи шундай бўлсин-да.

— Бўлади-бўлади, — деди кулиб хотин, — шошма-чи, Офтоб. Агар қизинг мен айткандек ўзгариб кетса менга нима берар эдинг?

— Сизга бош-оёғ кийим.

— Сўзингдан қайтма, Офтоб. Печак гулдек бўлиб эрига чирмашқанини кўрармиз ҳали, худо кўрсатса, бор, ўйнаб-кулиб меҳмонларингни кут!..

Шундан кейин икави донхонадан чиқиб хотинлар орасиға кирди.

\* \* \*

Қизлар мажлиси — гуллар, лолалар, тўтилар, қумрилар мажлиси! Бу уйда — Кумушшибининг тоғасининг уйда қизлар мажлиси, гуллар мажлиси!

Бу уйга ўттуз-қирқ чамалиқ қизлар йигилғанлар, йигилишдан мақсад: қизлар ўзларининг энг латиф, энг гўзал бир аъзоларини бу кун хотинлиқ оламига узатмоқчидирлар. Бу узатиш мажлисини жонлик, руҳлик ўтказмак учун барча қизлар ўзларининг энг асил, энг нафис кийимларини кийиб, фавқулодда ясаниб, ҳусн оламини яна бир қат, яна бир қайта бежабдирлар. Агар бу уйга кириб, бу мажлис аъзоларини бир мартаба кўздан кечирсангиз, ҳозирданоқ айтиб қўйиш мумкинки, албатта эсингиз чиқиб кетар:

— Бу гулми, кўҳлик? Йўқ, наригиси! Ундан кўра буниси! Барисидан ҳам ўттаси!.. Ана шундай қылиб эсдан ҳам ажарсиз, гул танлашда бир қарорға келалмай эл ичиди кулгига ҳам қолурсиз, расво ҳам бўлурсиз.

Мана, мажлис аъзолари шунақангги бир-биравидан ўтоқ малаклар, парилар эдилар. Мажлиснинг шоиралари, ўйинчилари, чилдирма ва дуторчилари — барчаси ҳам ҳозир бўлиб фақат Кумушшибигина ҳаммомдан қайтмаган эди. Шунинг учун мажлис очилмаган, очилса ҳам руҳсизроқ, Кумуш келгач, мажлиска руҳ киришига барча ишонадир ва уни тўзимсизланиб кутадир.

Кимдир, орадан биттаси "келишди!" деб юборди. Барча қизлар уйнинг даричаси ёнига уймалашиб ҳавлига қарадилар. Чиндан ҳам ул ёнида икки янгаси билан келган эди. Шу чоқда бизга Отабек керак эди! Нега десангиз ул келсин эди-да, суйганини бир кўрсин эди: ҳаммом билан ул... фақат жонғина сўрайдир, мажруҳ кўқсларга ўққина отадир... Бошдағи оқ шоҳи рўймол, ичдаги оқ шоҳи

кўйнак, устдаги оқ кумуш заррин сирилган пўстин, бағбақаларни ўраб ўпид турған ёқа қундузларининг келишкани, солиниб тушкан қора жингила соchlарнинг бўйин теварагига чирмашқани, хом нуқра юзларнинг бўгриқцани...

Янгалар Кумушни ҳавлидан туриб қизларга топширдилар:

— Мана Кумушбиби — сизларга, қизлар! Кумушнинг кўнглини яхшилаб очинглар, қизлар!

Икки-уч қиз чопиб ҳавлиға тушдилар-да, Кумушбибидан паранжини олиб уйга бошладилар. Янгалар Кумушни қизларга топшириб кетдилар. Ҳавли эр ва хотиндан бўш, ёлғиз қизларғагина хосланиб қолди.

Кумушбиби бошлагучи қизлар билан уйга кирди, ундан онгқан атир ислари билан уй тўлди. Қизлар ўзларининг бир турликкина сўзлашишлари билан Кумуш ила кўриша бошладилар:

— Эсонмисиз, саруполар муборак?

Кумушбибининг қизларга берган жавоби эшитилар, эшитилмаслик эди:

— Қутлуғ...

Кумушбиби уйнинг тўрига ўтқузилди. Қизлар уйнинг теварагига ўлтуришиб олғандан кейин ораға нима учундир бир жимжитлик кирди. Қизлар маънолиқ қилиб ер остидан Кумушка қарайдирлар. Мажлисда бир хил маъюсият. Қизлар нимани ўйлайдирлар ва нима тўғрисида маъюсланидирлар, бу эрса қизларнинг бизга номаълум бўлган ички сирларидир.

Қизлар ипка чизилған гулдек уй теварагини олғанлар, бунинг устига ёвошлиқ, ўйчанлиқ уларнинг тусларига маънавий бир ҳусн ва жиддият бериб, бирга юз ҳусн қўшқан эди. Агар биз шу кезда заршунослиқ учун енг шимарсак, яъни гулни — гулдан ажратадурган бўлсақ боягидек эсанкираб, мутарафдид<sup>1</sup> қолмаймиз, чунки Кумушбиби лолалар ичидаги бир гул ва ё юлдузлар орасидаги тўлған ой эди.

Орада ҳамон бояги жимжитлик ҳукм сурар эди.

Ҳар бир мажлиснинг жонландиргучи, идора қилғучи бир-икки қаҳрамони бор бўлғанидек, бу қизлар мажлиси ҳам шундай қаҳрамонлардан ҳоли эмас эди. Мажлисни

<sup>1</sup> Мутарафдид — тарафдудланиш, иккиланиш.

бунчалик руҳсизланиб, маъюсият ичида қолишига Гулсин-биби чидаб туролмади:

— Биз нима учун йигилдиқ-да, нимага ср чизишиб ўлтурамиз! — деди. — Биз бу ерга аза очқали келдикми?

Гулсиннинг ёнига Хонимбуш қўшилишди:

— Кўб ўйлашманг, ўртоқлар! — деди, — барибир бу гап ҳаммамизнинг ҳам бошимизда бор! Тур Савра! Ҳавлига олов ёқиб чилдирманги қизит! Аноргул, сен дуторингни ол! Кумушбиби, сиз унча хәёл сурманг, кулиб ўлтуринг. Барибир эртага жойсиз чеккан қайғингиздан ўкинарсиз! — деди-да, мажлисни ост-уст кулдирив юборди. Кумушбиби ҳам ихтиёрлик, ихтиёrsиз бу кулгуликка тортилиб, унинг ёвошқина илжайишидан ёқутдек лаблари остидағи садаф каби оқ тишлари бир оз кўриниб қўйдилар.

Шу гапдан кейин мажлиска кутилмаган бир руҳ кирди. Аноргулнинг қўлидаги дутор "Ўртоқлар" кўйини танларга ларза бериб, тарона қилди. Хонимбиби қизларга қистатиб ўлтурмай ўрнидан сакраб турди-да, ўйнаб ҳам кетди. Дутор ёнига чилдирманинг чертмаги келиб қўшилгандан кейин базм тагин ҳам жонланди. Чапаклар ҳам кўтарилиди. Ўйин қизиб борар эди, унинг дарича эшиклари бекланиб тоқчаларга шамъ ёқилгандан сўнг, базмнинг руҳи яна ошди. Ел билан ўйнашиб ёнған шамъ нури қизларни алла қандай ажиб ҳолатка қўймоқда, мажлис эрса "Алиф лайло" ҳикояларидағи "парилар" базмини хотирлатмоқда эди. Дутор "Ифор" кўйини чалиб, чилдирма ҳам нозик йўл билан унга қўшилиша борди. Ўйин ҳам бир турлик назокат касб этиб, Гулсинбиби йўргалай кетди. Дутор кўнгилнинг алла қандай ингичка жойини қитиқладириб, чилдирма юракни нимагадир ошиқдириб, Гулсин қизнинг йўргалаши борлиқ аъзони зириллатадир. Базм жуда қизиқ, жуда кўнгиллик эди.

Кумушбибини ҳам бу қизиқ базмдан бошқалардек ҳисса оладир, сўюниб қувонадир, деб ўйланмасин, чунки унинг вужуди қизлар базми ичида бўлса ҳам хаёли алла қаёқларда учиб юргандек, кўзлари ўйнагучи қизларда бўлса ҳам, аммо ҳақиқатда бошқа бир нарсани кўргандек... Кўринишдан натижা чиқарив айтканда, бу қизиқ мажлис унинг учун базм ўрнини эмас, аза жойини тутқандек...

Икки соатлик қизиқ бир базмдан сўнг қизлар чарчадилар-да, ўйинни тўхтатдилар. Гулсин билан Хонимбиби

Энди дутор билан қўшиққа ўлтурдилар. Гулсин ўзининг қўнғуроқдек товши билан "Йигларман" куйидан бошлади:

Ўртоқларим, қўлга олсан торимни,  
Беихтиёр ёллайдирман ёrimни!

Иккинчи қайтариб айтишда унга Хонимбиби қўшилишди. Бир турлик, бир оҳанглик нафис, мусиқавий товушлар кишининг борлиқ вужудига, қон томирлариға ажойиб бир ўзгариш берган эдилар. Шу ҷоқача мўлтайиб, хаёл ичидаги шўнгигиб ўлтурган Кумушбиби бир сесканди-да, қўшиқчи қизларга қаради. Қизлар иккинчи байтка ўтдилар:

Бир кўриниб яғмо<sup>1</sup> қилган кўнглимни,  
Қайтиб яна кўралмадим норимни!

Шу вақт кутилмаган жойда Кумушнинг икки қўзи жиқ ёшқа тўлған эди. Учунчига ўтдилар:

Агар кўрсам эди яна ёrimни,  
Багишлардим ҳама йўқу боримни!

Тўртинчи:

Билурмикин, билмасмикин у золим:  
Кунлар-тунлар тортқан оҳу зоримни!

Кумуш тоқатсизланғандек эди...

Бешинчи:

Чинин айтинг ўртоқларим менга сиз,  
Қайта бошдан кўрарманми ёrimни?

Кейинги:

Кетди тоқат, кетди сабрим...кетдилар...  
Синдирарман уриб ерга торимни!

Бу кейинги байтка қулоқ солғучи қолмади. Чунки ёнидаги қизга осилиб йиглай бошлаган Кумушбибига ҳар ким таажжубда, ҳар кимнинг қўзи, қулоги шунда эди.

— Нима бўлди, Кумуш?

<sup>1</sup> Яғмо—асир, талон-тарож.

— Нега йиглайсиз, Кумуш опа?

— Бирар жойинг оғрийдирми, Кумуш?

Кумушбиби ўз устига дув йигилған қызларға күзини очиб қаради-да, ҳушёр тортқанлардек бир ҳаракат қилиб қўйди ва тез-тез чўнтағидан рўймолини олиб кўз ёшисини қурилди.

— Нега йигладинг-а?

Бу савонни бергучи Гулсинга Кумуш куч билан илжай-иб қаради-да:

— Ўзим... — деди.

— Вой шўргинангга шўрва тўкилсин, Кумуш! — деди Гулсин, — мен шундай эрни топиб тексам бошим кўкка етар эди!

Гулсиннинг гапига қызлар кулишдилар. Кумуш жуда хафа кўринганликдан унинг кўнглини очмоққа тўғри кеслар эди. Шунинг учун бошқа ўйинларни қўятуриб мажлиснинг энг қизиқ тарафи бўлиб саналған лапар айтишка кўчдилар. Гулсин куяв рўлини ўйнар, Хонимбиби Кумуш рўлида, иkkисининг бир-бirisiga қараб ўқишибан лапарла-ри барчани кулдириб, ичакларни узар даражада. Бироқ Кумушнинг тишининг оқини кўриш жуда қийин, унинг ҳамма иши фақат мунгғайиб хастланишқина...

Қызларга тўйхонадан ошлар, таванлар келиб тортилди. Ошдан кейин янгалар келиб, қызлардан Кумушни сўрадилар. Қызларнинг "Йўқ, биз Кумушбибини сизларга бермаймиз!" деб ўйнаб айткан сўzlари Кумушбибига чиндек бўлиб эшитилар, янгалар билан уйдан чиқар экан, кўмак сўрагандек қызларға термулиб қарап эди. Шу йўсун қызлар ўзларининг бир ўртоқларини хотинлиқ дунёсига узатиб, мажлисдан тарқалишдилар.

## 11. КУТИЛМАГАН БАХТ

Кумушбибидан ваколат олиш ҳам жуда қийин бўлди. Домланинг: "Сизким Кумушбиби Мирзакарим қизи нафсингизни тошкандлик мусулмон Отабек Юсуфбек ҳожи ўғлиға бағишламоқ ваколатини амакингиз Муҳаммадраҳим Йўлдош ўғлиға топширдингизми?" деган сўроғи олти, етти қайтарилиғандан кейин, шунда ҳам янгалар қистоғи остида аранг унинг ризолиги олинди.

Кечки соат бешларда қутидорнинг ҳавлиси тўрт кўз билан куяв келишини кутадир. Куяв учун паловлар, қуюқ-суюқ ошлар, неча турлик неъматлар ҳозирланиб,

булар ҳам куявнинг интизорида турадирлар. Ниҳоят соат беш яримларда куяв келди. Йигитма-үттуз чоғлиқ ёш йигитлар — Раҳматнинг ўртоқлари, улар орасида Отабек — куяв кўринди: бошида симоби шоҳи салла устидан қора мовут сирилган совсар пўстин, ичида ўзининг Шамайда тикиргани осмони ранг мовут камзул, мовут шим: оёғида қалапой афзали, белида Кумушбинонг уста қўли билан тикилган шоҳи қийиф... Юзлар қизил, оғиз ирпайган, кўзлар ўйнаб аллакимни қидирадир. Ошларини еб бўлсалар ҳам жўрттага куяв кўриш учун ўлтурған маҳалла кишилари бир-бирларини туртишиб: "Тузик-тузик, куявликка арзигундек, чаки чаккига тушмапти, ол-маю-анор" дейишилар. Томда куяв кутиб ўлтурған хотинлар ичидан Офтоб ойимнинг эгачиси ошиқиб синглиси ёнига тушди-да: "Офтоб, даррав исириқ ҳозирла, куявнингни ёмон кўздан ўзи асрасин!" деди. Қутидор эшик остида қўл қовиштириб меҳмонларни кутиб оладир, ер остидан куявига кўз қирини ташлаб, кишига сездирмай ўзича кулимсираб қўядир. Меҳмонхона айвонида оқ соқоллиқ, кўркам сиймо оғиртабиъалик домла билан Зиё шоҳичи, Ҳасанали, қиз вакили ва тагин бир неча кишилар ўлтурадирлар. Йигитлар куявни домлалар қаршисига келтуриб тўхтатқандан кейин Отабек вакили бўлған Зиё шоҳичи билан Кумуш қиз вакили Мұҳаммадраҳим ораларида маҳр масаласи очиладир. Кўб тортишқандан сўнг қўйидағи маблағлар маҳр қилиб белгуланадирлар: уч юз олтин пул, мундан кейин олиб бериш ваъдаси билан Марғилондан ўрдадек бир ҳавли, соғиш учун сигир, асбоби рўзгор... Бунга Отабек ҳам ўз ризолигини билдирадир. Домла хутба бошлайдир. Форсийча ўқулған ҳамд, салавот ва бошқалардан сўнг хутба энг нозик бир ўринга келиб тўхтайдир: "Сизким Отабек Юсуфбек ҳожи ўғли Кумушбии Мирзакарим қизини ўзингизга шаръий хотинлиқга қабул қиласизми?" — форс тилида сўралған бу савол Отабекнинг кулгусини қистатиб, кўнглидан кечирадир:

— Қабул қиласизми-я?

Ул биринчи сўроқдаёқ — "учиб, қўниб қабул қиласиз" деб жавоб бермакчи бўлса ҳам бироқ ҳалқнинг — "ўлиб турған экан" деб қиладирған таънасидан чўчиб, жавоб бермайдир. Яна бир қайта юқоридағи "сизким фалончи..." жумласи домла тарафидан такрорланадир. Куявларга учунчи сўроқда жавоб бериш одат ҳукмида бўлса ҳам, Отабек бу такаллуфка чидалмайдир. Гўё учунчи сўроқ

ўрнига "Энди олмас экансиз Кумушбииини..." деб мажлис бузиладирғандек сезиладир-да, ҳамма товшини қўйиб, бар-чаға эшилдириб "Қабул қилдик!" деб юборадир.

Домла алҳамдулиллоҳ алҳамдулиллоҳ... билан никоҳни тутатиб мажлис томонидан келин билан куявнинг ҳақла-риға дуо бошланадир, ҳамма дуога қўл кўтариб, ҳатто томдаги томошачи хотинларгача "омин" кўмаклашадирлар ва шундан кейин никоҳ мажлиси ёпиладир. Йигитлар куяв-ни меҳмонхонага олиб кирадирлар, зисфат бошланадир.

Отабекда бир дақиқага бўлсин тўзим бўлмаган бир вақтда бир неча соатларга қараб чўзилған бу томоқ маж-лиси билан албатта ул яхши чиқиша олмайдир. Хуфтангя яқин банаъжи<sup>1</sup> бир иштиҳо билан ейилиб бўшатилған лаган, товоқлар олиниб дастурхонлар йигилди. Бизнингча бир ярим соат, Отабекча аллақанча йил ҳисобланған бир фурсат ўтиб, ниҳоят янгалар куяв сўрадилар. Икки ёшға муҳаббатлик умр сўраб фотиҳа ўқилғандан сўнг Отабек ичкарига узатилди.

Ҳасанали меҳмонхона айвонида бекни кутиб турар эди:

— Энди куявлик муборак бўлсин, бегим?

— Қутлуғ бўлсин.

Ҳасанали бошдан-оёқ бскни кузатди, оталиқ муҳаббати билан бекнинг орқасини сйлади ва ёшлиқ кўзлари билан дуо қилиб унга рухсат берди. Отабек янгалар кутиб турған тарафка юрди. Ул ҳозир қизиқ ҳолатда эди: бу нима гап, тушими, ўнгими, нима гаплар ўтиб, нималар бўлмоқда, бўлиб турған иш ҳақиқатми?

Биз ичкарига кирамиз: ҳавлининг икки томони то Кумушбииининг ўйигача қатор куяв куткан хотинлар, бола-чақалар билан тўлған. Баъзан куткучи хотинларнинг қўлида ёниб турған шамъ. Куяв тушадирган уй тўй мол-лари билан жуда ҳам бежалган. Юқорида ёзилиб ўтилған қутидор уйининг аксар жиҳозлари шу уйга, Кумуш қиз ўйига кўчирилган. Бир буларгина эмас хотин-қизлар қўли билан чатиб ишланган турлиқ зийнат чодирлари билан ҳам бежалган, шипда катта қандил, қандилда ўттузлаб шамълар ёниб уйни сирлик бир ҳолатка қўядирлар. Бур-чакда қизлар мажлисида кўрилған оқ кийимлар билан Кумушбии турадир... Унинг ҳусни бежалган уйининг оқлари, кўклари, сариқлари ва қизиллари билан товланиб

1 Банаъжи — ниҳоятда, беҳад.

хаёлий бир сиймода... Кўз ёшларини оқузиб янгасининг сўзиға қулоқ осмайдир. Ташқаридан эшитилган "куяв! кував!" сўзи билан тагин ҳам унинг кўз ёшиси кўпайиб туси ҳам ўзгарди. Янгаси Қумушми шу ҳолда қолдириб ўзи югирганича эшикка чиқди. Куяв келар эди: икки томонни сириб олған хотин-қизлар ўртасидан Отабек келар эди. Унинг кетидан Офтоб ойимнинг эгачиси исирақ тутатар эди. Хотинлар қўлларида шамъ билан унга қарап ва узатиб қолур эдилар. Куяв уйнинг ёнига етди. Унинг юзи уятидан жуда қизарған, қочқали жой тополмас эди. Шу кезда уйнинг эшиги очилди-да, янга томонидан қаршиланди.

— Кирингиз, бек.

Отабекнинг юрак уриши эҳтимол янгасига ҳам эшитилар эди... Отабек уйга киргандан кейин янгаси ташқари чиқиб, эшикни ўзи кўрарлик қия қилиб ёпди... Уйнинг тўрида ёнини Отабекка бериб рўймолининг учини тугибми, йиртибми Қумушшиби турадир ва ким келди, деб ёнига қарамайдир. Рўймол тугиши билан машгул латиф қўлларини чет қўл келиб сиқди:

— Жоним.

Қумушшиби бегона қўлдан сесканди ва қўлларини қутқазмоққа тиришиб:

— Ушламангиз, — деди ҳам сиқувчи қўлдан қутилиш учун орқага тисланди.

Титраган ва қовжираган бир товушда:

— Нега қочасиз? Нега қарамайсиз? — деди бек. Қумушшиби шу чоқгача қарамаған ва қарашни ҳам тиламаган эди. Мажбурият остида, ёв қарashi билан сескингина душманига қаради... Шу қарашда бир мунча вақт қотиб қолди. Шундан кейин бир неча қадам босиб Отабекнинг пинжига яқин келди ва эсанкираган, ҳаяжонланған бир товуш билан сўради:

— Сиз ўшами?

— Мен ўша, — деди бек. Иккиси ҳам бир-бирисига беихтиёр термулишиб қолдилар.

Кумушшиби оғир тин олиб:

— Кўзларимга ишонмайман, — деди.

Отабек кўзларини тўлдириб қараб:

— Мен ҳам, — деди.

Шу вақт икки лаб ўз-ўзидан бир-бирисига қовишиди... Кичкина нозик қўллар елка устига, кучлик қўллар қўлтиқ остига ёпиштилар.

Кумушшиби Отабекнинг юзига узоқ тикилиб турди-да:

— Кутылмаган бир баҳт, — деди вә ўзининг отидек бир нарсанинг товши каби қилиб кулиб юборди. Бу кулиш ҳавалиларгача эшитилди. Қия очилиб турган уй эшиги ҳам қаттиғина бекланди. Кумушбиби Отабекнинг қўлидан ушлаб қўйида ёзиб қўйилған дастурхон ёнига бошлади:

— Сиз бўлғанлиғингизни илгаридан билганимда бошқача қаршилар эдим, — деди.

— Бошқа деб ўйладингизми?

— Ўлаш қаерда, сиз бўлурсиз, деб кўнглимга ҳам келмаган эди, — деди-да, тагин кулиб юборди.

Дастурхон ёнида Кумушбибининг латиф билагига Отабек олтин узук солур экан, ул ерга қараган ҳолда эди.

— Мен сизга ҳеч нарса ҳам ҳозирламаган эдим...

— Ҳозирламаганингиз учун ўқинасизми?

— Ўқинмангиз, — деди бек, — сиздан бир нарсани сўрасам аямассиз?

— Аямайман.

Отабек Кумушбибининг лаблари устидаги қора холига ишорат қилиб:

— Шу ердан бир ўпиш берсангиз сиз ҳам катта эсадлик ҳозирлаган бўлур эдингиз, — деди.

Кумушбиби қизаринди.

\* \* \*

Отабек Марғилон келганинг иккинчи куни пойафзал бозорида бўлған эди. Аср намознинг вақти ўтиб борғанлиқдан ул шундаги дўкондорларнинг бирисидан таҳорат олиш учун сув сўради. Кўчадаги сув ариқнинг тегидан — сой оқар, шунинг учун ундан фойдаланиш қулай эмас эди. Дўкондор унга сувнинг қулай ўрнини кўрсатди: "Мана шу бурчакдаги дарбозадан ичкарига кирсангиз ариқнинг юза жойини топиб таҳорат олурсиз" деди. Отабек дўкондорнинг кўрсатишича қутидорнинг ташқарисига кирди. Шу вақт тасодуфан нима юмиш биландир меҳмонхонадан чиқиб келгучи фариштага кўзи тушди. Кумуш ҳам ариқ ёқасига келиб тўхтаған чингилин<sup>1</sup> йигитка беихтиёр қараб қолди. Ихтиёрий эмас, гайри ихтиёрий иккиси ҳам бир-бирисидан бир мунча вақт кўз ололма-

1 Чингилин — ихчам, бежирим.

дилар. Охирда Кумуш нимадандир чўчиғандек бўлди, енгилгина бир ҳаракат билан ўзини ичкари йўлак томонга бурди. Бу бурилишдан унинг орқа ўнгини тутиб ёткан қирқ кокиллари тўлқинландилар. Кумуш ичкарига қараб чопар экан, йўл устидан ариқ бўйида қотиб турган йигитка яна бир қараб қўйди ва бу қарашда унга енгилгина бир табассум ҳам ҳадя қилди... Кумуш ичкарига кириб кўздан гойиб бўлди, лекин Отабек яна бир неча дақиқа ерга миҳлангандек қотиб турди... Охирда кўзини катта очиб ўткан дақиқада учрашкани хаёлий гўзални истаб хаёлланди. Бироқ ҳақиқат бошқача эди. Таҳорат олмоқ учун ариқ бўйига ўлтурди. Аммо кўзи хаёл яширинған йўлакда эди. Таҳоратланиб бўлди, яна кўзини ўша тарафдан узолмади. Артиниб олғандан кейин яна оёғ устида тўхтаб қолди. Яширинған гўзал иккинчи қайта кўринмади, эҳтимолки, Отабекни ипсиз боғлаб, ўзи қайси бурчакдан бўлса ҳам асирига томоша қилар эди.

Кўб кутди, аср намозини қазо қилиб куч билан қутидор уйидан чиқди ва шу дақиқадан бошлаб унда муҳаббат можароси туғилған эдиким, бу ёғи ўқуғучимизга маълумдир. Кумушбибининг юқорида "Сиз ўшами?" деб сўраши шунга биноан бўлиб, аммо унга масаланинг онглашилмай қолиши ва чин баҳтни билъакс кутиб олиниши қизиқ эди. Шундай қилиб икки ёшнинг биринчи ҳам соғ муҳаббатлари қовишиш билан натижаланди.

## 12. ЧАҚИМЧИЛИҚ

— Бу кун етти кун... Отабек қутидорнинг қизига уйланди.

Ул бу хабарни Қўқондан қайтишда эшиткан эди. Ўзининг қиёфатига яраша қўрқунч йўллар излар экан, қулоқлари тегида "...қизига уйланди" — жумласи такрорланиб тургандек бўлар эди.

Унинг Қўқондан қайтиши иккала хотини учун ҳам улуғ бир фалокат бўлди. Чунки арзимаган бир сабаб билан иккаласи ҳам яхшигина таёқ сб олди. Шунинг учун икки кундаш унинг олдига киришдан қўрқиб, яна тўғриси унинг совуқ афтини кўришдан жирканиб ҳавлининг четчетида юрарлар, икки кундаш билиттифоқ унга ўлим сўярлар: "Қўқонда ўлса, ўлугини итлар еса биз ачинарми эдик" деярлар эди.

Ул ўлтурган кўйи нима тўғрида бўлса ҳам жуда бош

огритиб ўйлар эди. Шу чоқда унинг тусидан йиртқицилиқ, бир гуноҳсизнинг устига ҳужумга қозирланған ваҳшийлик белгулари кўрилур эди. Ҳар ҳолда ул яхшилиққа эмас, қандоғ ҳам бўлса бир ваҳшийликка йўллар, режалар излар эди. Охири унинг юзида истеҳзолик бир илжайиш кўрилди-да, бир нарсага қарор қўйғандек бир ҳаракат ясади ва ўрнидан сакраб туриб қозиқдаги кирлаб кеткан салласини қўлига олди ва ҳавлига чиқди. Ташқарисида беш дўконлаб иш тўқиб турған ҳалфа, шогирдларига баъзи таълимотларни бергач, бир улуғ дарбоза орқалиқ кўчага юрди. Ўралиб битмаган салласини тузата-тузата тор, кирди-чиқдилик кўчалар билан шаҳарнинг кунботар томонига, беклар маҳалласига қараб кетди.

Беклар маҳалласининг бошланишида, жанубга қаратиб қурилган улуғ бир дарбозанинг ёнида икки нафар милтиқ ва қиличлик йигит сўзлашиб турар эдилар. Буларнинг ёнига бизга маълум киши келиб тўхтади ва улардан сўради:

— Бек уйдамилар?

Сўзнинг белига тепкани учун йигитнинг бириси ўшшайиб сўрагучига қаради, иккинчиси қўллари орасидаги милтиғи билан ичкарига ишорат қилиб жавоб берди:

— Бор!

Дарбозадан ичкарига кирилгач, сарой каби бир ҳавли, айвонда ўн бешка яқин яроғлиқ йигитлар тўнкалардан гулхан солиб, исиниб ўлтурмакда эдилар. Ул тўрдаги айвон орқалиқ юриладирган уйнинг эшигига тургучи йигит оғасининг ёнига борди ва қўрбоши билан учрашмак орзу-сида бўлғанлигини айтиб ундан киришка ижозат сўради. Йигит оғасининг раҳбарлиги билан ичкарига кирди: бошига кўк салла чулғаган, эгнига ўратепанинг босмасидан чакман, белига кумуш камар боғлаб кумуш қинлик қиличини тизасига босқан, қора танлик бўлса ҳам кўкнорими, таряқми истеъмолидан юзи саргайған қирқ-элли ёшлар чамалиқ бир киши ёрлиқсумон бир ёзўни ўқуб ўлтурмоқда эди. Қўрбоши келгучининг саломига эътибор-сизгина жавобланған бўлди-да, руҳсиз бир товуш билан:

— Нима қилиб юрибсан? — деб сўради.

— Тақсир, сизга арз бор.

Йигит оғаси келгучини қолдириб чиқди. Келгучи эшик ёнида оёғ устида қўл боғчаб турар эди.

— Қандай арзинг бор?

— Тақсир... ижозат берсангиз ўлтурсам...

— Хұб, ўлтур.

Келгучи күб тутулиб тузы ўнгган гилам устидан юриб бориб, құрбоши қаршиисига тавозиъ билан ўлтурди. Құрбоши құлидағи ёзувиңиң буқлаб қўйниға тиқди-да, келгучини ер остидан кузатди:

- Қасерликсан?
- Тақсир... шу ерлик, Марғилонлик.
- Отинг нима?
- Тақсир... Ҳомид.
- Нима касб қиласан?
- Устакорлик.
- Яхши, арзингни гапир?

Ҳомид ўзининг товшиға ясама бир оҳанг бериб арзини бошлади.

— Жаноби падари арус<sup>1</sup> шаҳаншохи Мусулмонқұл баҳодир замони адолатларыда ҳам, — деди Ҳомид, — қора чопонлиқтар ҳануз тинч ётмай юртни қипчоқ оғаларға қарши оёғландирмоқчи бўладирлар, ишни яна тадбирсиз қора чопонлар қўлиға олиб мамлакатни бузгунилиққа солмоқчи бўладирлар Биз бундай бузуқилар ёлғиз Тошкандаги Азизбек билан унинг йўлбошчиси бўлған Юсуфбек ҳожи, деб билар эдик. Бироқ уларнинг уруғи бизнинг Марғилонға ҳам сочиған экан.

Қўрбошининг кўзи ола-кула келди:

— Нима дейсан? У ким экан Марғилонда??

— Биттаси машҳур бузуқи тошкандлик Юсуфбекнинг ҳозирда Марғилонда турғучи ўғли — Отабек исмлик йигит, иккинчиси унинг ҳаммаслаки ва қайнотаси бўлған Мирзакарим қутидор.

— Ҳали-я?

— Шундоғ, тақсир.

— Сен бу гапни қаёғдан билдинг?

— Шу кунларда уларнинг бир мажлисларыда бўлған эдим, тақсир...

— Хўш, хўш, мажлиса?

— Мажлиса кўб гаплар ўтди, тақсир, — деди Ҳомид, — мажлиснинг бошлуғи бўлған Отабек қипчоқларнинг зулм ва таъаддисини<sup>2</sup>, қипчоқлардан ишни олмоқ учун Тошкандда Азизбек ва ўз отаси бошлиқ билфсьл иш бош-

<sup>1</sup> Падари арус — қайнота.

<sup>2</sup> Ташакку — адоват, зўравонлик.

лағанларини сўзлаб, Марғилоннинг ҳам мундан сўнг оёққа қалқиши кераклигини айтди... Мажлис аҳли, айниқса Мирзакарим унинг сўзини кучлаб тушди. Агар бу ишнинг олдини олинмаса, ҳукумат ва мамлакат учун натижа қўрқунчdir, тақсир.

— Мажлис кимницида эди?

Ҳомид тарафидан кутимаган бир савол. Ҳомид ўзига берилган бу савол қаршисида тараддулланиб қолди. Чунки мажлис ўрнини айтса поччаси билан жияни Раҳматнинг ҳам қўлға тушишлари аниқ ва бунинг билан ул ўз оёғига болта қўйган бўлар эди. Шу мулоҳаза юзасидан ул тутилиқди:

— Мажлис ўрни ёдимда йўқ, тақсир.

Мантиқсиз бу жавобга қарши қўрбоши аччиғи билан бақириди:

— Ёдимда йўқ?!

Ҳомид гарантисиди ва бир хил синиқ товушда:

— Эсимда бўлса ҳам нозик бир жой эди, тақсир, — деди.

— Нозик бир жой эдими! — деб қўрбоши заҳарханда қилди, — агар айтмасанг ўша муттаҳамлар тиқиладирган чуқурга сен ҳам ташланасан.

— Кечирингиз, тақсир.

Қўрбоши йиртқичлардек бўкириди:

— Кечириш йўқ!

Ҳомид учун энг кейинги чорадан бошқа илож йўқ эди — чўнтак кавлашка тутинди ва юз мashaққат билан ёнчигини чиқарди. Ёнчиқдан ўнга яқин олтинларни саноқсизча олиб, қўрбошига узатди:

— Тақсир... сизга атаган назримиз эди...

Ҳомид кавлана бошлаганданоқ қўрбошининг устидан со-вуқ сув сепилган эди. Ул олтинларни ёнига солиб жойлагач товуш ҳам эски ҳолига қайтиб, сўзлар ҳам мулоҳим тортди.

— Демак, нозик жой эди, дегин Ҳомидбой.

— Тақсир...

— Бадбахтлар шундай маслаҳат қилдиларми ҳали?

— Тақсир... Бу ишнинг олдини олинмаса натижа ёмон албатта.

— Албатта биз ўша бузуқиларнинг жазоларини берармиз... Мен ҳозир бориб бекка арз қиласай, шу кечадан қолдирмай қўлга оламиз муттаҳамларни, — деди қўрбоши.

Ҳомиднинг чеҳраси очилиб кеткан эди. Қўрбоши ўзининг имо ва ишорасига ўтканликдан унинг кўзида ўч олиш қувончлари ва ундан кейинги Ҳомиднинг ўзига маълум бўлган бир баҳт умидлари ўйнار эдилар. Қўрбоши

тоқчадан давот, қалам олиб олдига қўйди-да, ёзувга ҳозирланиб сўради:

— Айтчи Ҳомидбой, муттаҳамлар кимлар эди?

— Биттаси тошкандлик Юсуфбек ҳожининг ўғли — Отабек.

Қўрбоши ёзди:

— Ҳа-ҳа! Ҳали Юсуфбек ҳожининг ўғли дегин. Бизнинг Марғилонни ҳам қонға ботирмоқчи экан-да, муттаҳамлар, иккинчиси?

— Шу кунларда Отабекка қизини берган марғилонлик Мирзакарим.

— Пес-песни қоронгида топқан экан, учунчиси?

— Отабекнинг қули — Ҳасанали.

— Тўртингчиси?

Ҳомид бир оз ўйлаб жавоб берди:

— Билмадим... Ҳозир Марғилондами, йўқми андижонлик Акрам ҳожи.

Қўрбоши ёзди:

— Иш катта экан, тагин?

— Энди йўқ, тақсир, — деди Ҳомид ва сўзига шуни ҳам қўшди, — Отабек билан Мирзакарим қўлга олинсалар илоннинг боши янчилган ҳисобланиб, ўзгаларининг қўлидан иш келадирган одамлар эмас, тақсир.

Қўрбоши ёзувни битириб қўйнига тиқди — "Бўлмаса иш битди, эртага эрта билан можарони эшитарсан" — деди. Ҳомид ўрнидан туриб қўрбошига қуллиқ қилиб чиқди.

### 13. ҚАМОҚ

"Ёрмозор" мавзида шаҳар қўргонига тиралиб солинган ўрда. Ўрда дарбозасининг саҳни ботмонлаб ҳисобланган мевазор бўлиб, бунда олма, ўрик, нок ва тут ёғочлари хилигина бор эдилар. Дарбозанинг икки биқинини ўраб олған, лойига гуллар, нақшлар туширилиб ишланган саккиз газлар юксакликда ўрда қўргони, дарбозанинг икки бурчида<sup>1</sup> алачами, бўзданни узун чопонлар кийиб, бошлирига қулоқчин қўндириган, қайиш камар устидан қилич тақиниб милтиқларига суюнган икки йигит кўринадирлар — булас навбатчи ўрда қоровули, қоронги тушишка яқин-

<sup>1</sup> Бурч — қатъя ва қўргон деворининг бурилиш жойларига ва дарбоза ёнларига қурилган соқчилар турадиган қоровулхона

лашқанлиқдан қия ёпилиб турған дарбозани кимдир, ичкаридан биттаси зичлаб ёпди-да, күч сарф қилиб дарбозанинг зўр занжирини шарақ-шуриқ этиб боғлади. Ҳозир бизга ўрда ичига кириш мумкин бўлмағани учун қўргоннинг ташқари теграсида айланиб турайлиқ: дарбозанинг сўл биқинига қараб икки юз адим кетсак қўргон девори тугалаб, бурчка стиладир. Қўргон бурчига қоровул туриш учун махсус манора шакилли жой ясалған бўлса ҳам ҳозирда навбатчидан холидир. Шундан кейин бир бўшлиқ ер билан қўргоннинг жанубига қараб кетиладир. Тўрт юз адимлар борилғач, қўргоннинг шарқи-жануби бурчига стилиб, бу бурчни ҳам ановисидек қоровулсиз топиладир. Бу бурчдан қараған кишига қўргоннинг гарби-жануби бурчи ҳам кўриниб, шу йўсунда ўрданинг тўрт бурчини айланиб чиқилса бир минг олти юз адим босилған бўлиб ўрданинг ғарб томонидан биз танишқан ўрда дарбозасига келинадир.

Ҳозир қоронги ҳам ўбдан тушканлиқдан киши-кишини танимаслиқ даражада эди. Бояги дарбоза устида кўринган қоровуллар ҳамон қора ҳайкал каби қотиб турар эдилар.

Шаҳар ичидан ўрда дарбозасига қараб келмакда бўлған бир неча от оёғларини эшитиб қоровуллардан биттаси — "туёқ товшими?" деб иккинчисига савол ташлаб қўйди. Иккинчи қоровул мўралаб-мўралаб йўлға қаради:

— Уч отлиқ кўринадир.

— Вақтсиз келгучи ким экан?

— Бундай вақтда қўрбошидан бошқа киши келмас эди, эҳтимол ўшадир.

Дарвоқиъ қўрбоши ўзининг икки йигити билан етиб келди ва отидан қўниб жиловини йигитининг қўлиға берар экан, қоровулларга буюрди:

— Дарбозани очсинлар!

Қоровуллар ичкарига хабар бергандан сўнг дарбоза очилиб, қўрбоши ичкарига кирди. Ўрданинг теварак ма-соҳатини<sup>1</sup> биз чамалаб кўрган эдик, шунинг учун ўрданинг қай даража кенг бўлиши ҳам бизга қиссан маълум. Аммо ўрданинг кўпроқ қисми дарбоза томонида қолдирилиб, жанубга тортилған хатти мустақим<sup>2</sup> бир девор

<sup>1</sup> *Масоҳат* — сатҳ, юза, майдон.

<sup>2</sup> *Хатти мустақим* — тўғри чизиқ.

билан бўлингган эди. Нариги томон ўрданинг ичкари қисмини ташкил этиб, унда бек — ҳоким оиласи турар эди. Ўрданинг ташқариги қисмининг уч тарафи (жануб, шарқ, гарб) биносиз, фақат қўрғон деворларининг зиналари эди. Аммо иморат қисми дарбоза билан бир қаторда бўлиб, сўл биқинида девонхона, унинг қаторида бўйига қирқ, энига йигирма олчин жой олган ўн беш даричалик каттакон чорхари уй, ичидаги элли чоғлиқ бек йигитлари гулхан солиб ўлтурап эдилар. Бу уйнинг қатори ошхона, отхона ва шунингдек ҳожат уйларини ташкил этар эдилар.

Қўрбоши дарбозабон ёнида тўхтаб, ундан сўради:

— Бек ичкаридамилар?

Дарбозабон дарбозани кучаниб ёпар экан, жавоб берди:

— Билмадим, тақсир.

Ўрданинг чароғчиси дарбоза яқинидаги машъала ёғочига ўт бериб, бутун ўрда ичи ёриб кетди. Қўрбоши дарбозанинг ўнг тарафига қараб юрди. Бу томонда ниҳоятда зийнатланиб бино қилингган олий иморатлар бўлиб, шаҳар усталарининг ҳамма санъат ва маҳоратлари шу биноларда гавдаланур эди. Қўрбоши биринчи эшик ёнида турган яроғлик қоровулдан ўтиб, кичикрак, нақшилиқ бир уйга кирди. Иккинчи эшикдан ўтиб, улуғ бир золга чиқди. Зол жуда нафис ишланган эди: олтин қандилдаги элликлаб шамъларнинг нури билан мунақаш деворларнинг олтин, кумуш, кўк-қизил, оқ-пушти, сариқ-қора гуллари юлдузлардек яшнаб, уйга бир хаёлийлик берар эдилар. Уйнинг остига тўшалган қизил лола гуллик гилам кишини гўё бир чаманда ҳис этдирап эди. Золнинг тўрида, кичкина ҳалдор бир эшикча ёнида, атлас кўрпача устида ўн беш ёшлар чамалиқ, қизил духобадан кийинган кўркам бир ўғлон палов еб турар эди.

Қўрбоши эшикдан кирап экан, ўғлонга қараб кулимсиради:

— Ҳа, Аҳмадхон, сиз шу ерда экансиз, — деди.

Аҳмадхон жойидан қўзгалмади:

— Мен ҳамиша шу ерда, қани ошга.

— Раҳмат. Қушбети ичкаридадирлар?

— Ичкаридалар, — деди Аҳмадхон, — мен тўйиб қолдим, келсангизчи.

— Бўлмаса табаррук қўлингиз билан битта ошатингиз.

Аҳмадхон қўлига сиққунча ош олиб қўрбошига тутти, қўрбоши ихлос билан Аҳмадхоннинг қўлидан ошади... Ул

ошнигина эмас, ҳатто Аҳмадхоннинг қўлини ҳам ошай-дирған эди.

Кўб фурсат ўтмади. Тўрдаги кичкина эшик очилиб ичкаридан тўла юзлик, ўсиқ қошлиқ, оғир қарагучи кўзлик, сийрак соқол, ўрта бўйлиқ, устидан кимхоб тўн кийиб, белига қилич осқан қирқбеш ёшлар чамасида бир киши кўринди. Аҳмадхон билан қўрбошининг ўринларидан туриб таъзим қилишларидан бу зотнинг ким эканлиги билинар эди. Бу киши келиб атлас кўрпача устига ўлтурди ва ўзининг салмоқ товши билан:

— Қалай, Холиқбек, — деди, — юргларингиз тинчликми, ўлтуринг.

— Худойға шукур, давлатлари кўланкасида, — деб қўрбоши тавозиъланди ва қўл қовиштириб қушбесгининг яқининга чўккалади. Аҳмадхон бўш лаганни дастурхони билан кўтариб қушбеги кирган эшикдан чиқди.

— Кечаги ўғрилар нима бўлди, қўлга туширдингизми?

— Давлатлари кўланкасида... Ўғрилардан биттаси тутилди, давлатлари ёри<sup>1</sup> берса қолғанлари ҳам ушланур, деб ўйлайман.

— Бошқа нима хабарлар бор?

Қўрбоши юзига жиддийлик ҳолати берди:

— Давлатлари ёри берса ҳукуматимиз учун қўрқунч бўлған бузуқилар уясини топқандекман, — деди.

Қушбеги ўзига ўнгтайсизлиқ бермакда бўлған қиличини тизасига олиб ҳамон совуққонлиқ билан сўради:

— Қандай бузуқилар уаси?

— Қандай бузуқилар уаси бўлсин, тақсир, — деди қўрбоши, — дунёда қора чопонлиқлардан ҳам кучлирак бузуқилар бўладими?..

Қушбеги кўтарилинқираб олди ва кўзлари бир оз каттароқ очилди:

— Хўш?

— Маълумингиз улардан Азибек билан Юсуфбек Тошканнда билфсьъ исён чиқарип ётадирлар. Бироқ улар шунинг ўзигагина қониқмай Марғилонни ҳам бузиш фикрига тушканлар ва шу мақсадда бу срга одам ҳам кўндирганлар.

— Одами ким, танидингизми?

— Танидим, тақсир,— деди қўрбоши мағрур бир оҳанг-

<sup>1</sup> Ёри—кўмак, ёрдам.

да, Юсуфбек ҳожининг ўғли ва ўзимизнинг Марғилондан ҳам яна бир неча бузуқилар.

— Юсуфбек ҳожининг ўғли?

— Тақсир... исми Отабек.

Қушбегининг кўзи ёнди... Манглай этлари тиришиб, сўл қўйл билан соқолини тутамлаб фикрга кетди. Бу хабар унга бошқача таъсир берган эди: Тошканднинг Кўқонға қарши исён қылған бир замонида, исёнчилардан бири ҳам биринчиси бўлиб танилған Юсуфбек ҳожидек бир кимсанинг ўз ўғлини Марғилонга юбориб, бунда ҳам исён чиқариш қасдила бўлмоги унингча жуда яқин ва шубҳасиз эди.

— Ул ҳозир қаерда турадир?

— Мирзакарим қутидор исмлик бир кишиникида.

— Мирзакарим билан қандай алоқаси бор эмиш?

— Баракалла, тақсир, — деди қўрбоши, — Отабекнинг Марғилондан топқан энг яқин кишиси шу қутидордир. Мундан бир неча кун илгари Отабекка ўз қизини бериб куяв ҳам қилибдир. Айтишларича Отабекнинг барча режалари шу қутидор билан кенгашиб бўлар экан.

— Уларнинг теварагига кимлар йигилған?

Қўрбоши қўйнидаги ёзувни олиб қушбегига узатди:

— Ҳозирча менга маълум бўлған бузуқилар шунда.

Қушбеги ёзувга кўз юргутиб рўйхатдаги кишиларни дарҳол келтуришга буюрди. Қўрбоши қуллиқ қилиб чиқғач, яна бир қайта ёзувни ўқуб фикрга толди.

\* \* \*

Ўтаббой қушбеги<sup>1</sup> ҳозиргина ичкари ўрдадан қайтиб чиқған эди. Шу орада қўрбоши кириб унга қуллиқ қилди:

— Келтирдим, тақсир. Бироқ иккисини тополмадим.

Қушбеги чидамсизлик билан:

— Отабекни-чи? — деб сўради.

Қўрбоши музafferона жавоб берди:

— Тутдим, тақсир, қутидорни ҳам.

— Олиб кирингиз.

Қушбеги тинчланди, қўрбоши даҳлиздан ташқарига ишо-

<sup>1</sup> Ўтаббой қушбеги қипчоқ бекларининг тузукларидандир. Бу киши Марғилонда 1263-67 ҳижрий йиллар орасида бек бўлиб турди. Мусулмонқулнинг аслидан сўнг унинг ўрнига мингбоши (ҳарбия ва бош вазир) бўлиб белгуланди. Марғилонда Ўтаббойдан қолған осор ҳам бор. (муал).

рат берди ва қайтиб қүшбегига рухсат қулиғи адо қилди ва ундан изн олиб ўлтурди. Эшикдан икки қороллик йигит мұхофазатыда Отабек ва қутидор күрініб бекка қулиқ қылдилар. Қүшбеги яроғлиқ йигитларни қайтишга буюриб, гунохкорларни ғовашина қилиб ўз алдыға чақирди. Отабекда тушинмасликдан башқа ўзгариш сезилмаса ҳам қутидор жуда құрққан, ранги ўчкан зди. Иккиси тәнглиқда қүшбетига қарши чўққаладилар. Отабекни ортиқча бир диққат билан кўз тегидан ўткарғач, қүшбеги сўради:

- Отабек деган сизми?
- Тақсир, ман.
- Тошкандлик Юсуфбек ҳожининг ўғлисиз?
- Тақсир.
- Ҳозир Марғилонда турасизми?
- Тақсир.
- Марғилон келганингизга кўб бўлдими?
- Қирқ кунлар чамаси.
- Марғилонга нима юмиш билан келган эдингиз?
- Савдогарчилик билан, тақсир.
- Ўзингиз ёлғизми?
- Бир кишим бор эди.

Қүшбеги қўлидаги рўйхатка қараб олди ва давом этди:  
— Ҳасанали ким бўладир?

Отабекдаги бояги тушинмаслик бир шубҳага алишинди.  
Аммо парвосизча жавобини бераверди:

- Қулимиз бўладир, Тошканддан келгандаги йўлдошим шу сиз айткан Ҳасанали эди.
- Ҳасанали бу кунда қаерда?
- Марғилонда.
- Сиз билан бирга турадими?
- Йўқ. Саройда бир мунча молларимиз бўлар эди, саройда молларга қараб турадир.
- Бу киши кимингиз?
- Қайнин отамиз.
- Кўбдан берими?
- Бу кун саккизинчи кун...
- Илгари ўзингиз уйланган эдингизми?
- Йўқ.
- Ўзингиз тошкандлик бўлатуриб нима мажбурият остида Марғилондан уйландингиз?

Бу саводдан Отабек бир оз ўнгтайсизланиб тўхтади.  
Аммо бу ўнгтайсизланишдан қүшбегининг олдида башқа бир ҳақиқат очилғандек бўлди:

— Жавоб берингиз.

— Тақдир, тақсир.

Қүшбеги бир оз ўйлаб олиб яна савол берди:

— Марғилонда кимларни танийсиз?

— Марғилонда уч-тўрт кишидан бошқа одамни танимайман.

— Акрам ҳожини танирсиз?

— Танийман. Унинг билан бир неча мажлисларда ўлтуришкан эдим.

— Бу кунда Акрам ҳожи ошнангиз қаерда?

— Билмадим, тақсир, — деди ва қайин отасига қаради.

Қутидор жавоб берди:

— Акрам ҳожи бу кунларда Андижонда бўлса керак, тақсир.

— Їёб. Отабек, сиз жавоб берингиз: Акрам ҳожи билан бўлған мажлисингиз кимникида эди?

Отабек бундай сўроқларнинг бекорга эмаслигини пайқаб, бунинг тегида қандай бўлса ҳам бир гап борлигига ишонди:

— Бириңчи мажлисимиз мундан бир ой чамаси бурун Зиё ака деганинг ўйида, иккинчиси (қутидорга имо қилиб) бу кишиникида бўлған эди. Шу мажлисларда Акрам ҳожи ҳам бор эди.

— Зиё аканикида бўлған мажлисингизга кимлар иштирок қилди?

— Мен, Зиё шоҳичи, бу киши (қутидор), — деди ва бир оз ўйланиб олди, — Зиё аканинг ўғли — Раҳмат, Акрам ҳожи, Ҳасанали, Ҳомид исмлик яна бир киши.

Ҳомид исмини эшиткан қўрбоши тасдиқ қилғандек бир ҳаракат ясад қўйди. Қүшбеги қўрбошига ер тегидан кўз юбориб олди-да, давом қилди:

— Иккинчи мажлисингизда кимлар бўлди?

— Иккинчи мажлисимида бояги кишиларгина бўлди. Фақат Ҳомид йўқ эди.

— Боя, Марғилон келганимга неча кун бўлди, дедингиз?

— Қирқ кунлар чамаси.

— Яхши, — деди қүшбеги, — айтингиз-чи, қирқ кунлаб Марғилонда қолишингизнинг сабаби нима эди?

— Маълумки, ҳозир Тошканд қамал (муҳосара) ҳолатидадир. Шундай вақтда Тошкандга қайтиш ўзи ақлсизлик бўлар эди.

— Қорачопончи бўлғанингиз учун, — деди истеҳзо қилиб қүшбеги, — қипчоқ оғайнилардан қўрқдингизми?

— Сўзингизга тушинолмайман, — деди кулиб Отабек. Бу гапни оддий кишига айткандек қилиб сўзлади. Қутидор унинг бу айткан гапидан эмас, кулишидан ниҳоят даражада қўрқувфа тушиб ўзида иссиғлиқ-совуғлиқ бир ҳолат ҳис эткан эди. Ҳокимларга гарчи тўғри бўлганда ҳам дағалроқ сўз айтиш ўлимни тилаш билан тенг эди. Ўтаббўй қушбеги замона ҳокимларининг тузуги бўлса ҳам, кўб бўлмаса озроқ уларнинг таъсири бунда ҳам бор эди. Отабекнинг бу гапидан қизишди:

— Қипчоқ душмани бўлған отангиз Юсуфбек ҳожини унутдингизми. Отангизнинг сизга берган ваколати қаерда қолди?

— Қипчоқ душмани ким, отам кимга қандай ваколат берган, худо ҳаққи учун очиб сўзлангиз, йўқса ёриламан, тақсир!

— Ўзингизни тағофулга<sup>1</sup> солманиз, бек йигит, — деди қушбеги, — отангизни ким эканини, сизни Марғилонга нима учун юборганини, қутидор билан мунда қандай ишлар қилмоқда бўлғанлигингизни, барчасини ҳужжатлари билан биламиз. Сиз марғилонлик оғайниларни қипчоқларга қарши оёқландирмоқчи бўласиз, буни ҳам яхши биламиз!..

Отабек } — Ё салло!  
Қутидор }

Отабек азбаройи бўғилиб кетканидан кўкимтил товланған, қутидор безгаклардек титрай бошлаган эди. Отабек ўзини куч билан йигиштириди:

— Бунда зўр туҳмат бор, тақсир, — деди, — отамни қипчоқ душмани ва мени Марғилон оғайниларини исёнга ҳозирлаш учун келган, деб ўйлайсизми?

— Ўйламаймиз, аммо яхши биламиз. Қутидорнинг сизга нима учун қизини бериб, куяв қилғанига ҳам яхши тушинамиз.

Қутидор суратдек қотиб қолди, Отабек бўлса ўзидаги ҳаяжонни куч ҳол билан тарқатишга тиришар эди. Қушбеги билан қўрбоши бу икки гуноҳкорни таъқиб этар, улардаги ҳар бир ҳаракатни ўзларича бир нарсага йўяр эдилар.

Уч-тўрт дақиқалик сукутдан кейин Отабек тилга келди:

— Биз бу дақиқада сизнинг фикрингизча гўё бир зъвогар, гўё бир исёнчи бўлиб танилиб турибмиз, — деди бек, — чиндан ҳам шундоқ кишилармизми, йўқми буни албатта

<sup>1</sup> Тағофул—билиб билмасликка олиш.

сизнинг текширишларингиз, ҳақиқатларингиз кўрсатар. Мен сизнинг қиличингиз остида ўлимдан қўрқиб ёки сизга хушомад учун сўзламай ҳукумат кишиларимиз орасида тушинадирған бир одам бўлғанилингиз вожидан отамнинг ҳам ўзимнинг қандай фикр ва маслак кишиси эканлигинизни айтиб ўтмакчи бўламан: биз на қипчоқларга тарафдор бир киши ва на шаҳарлик оғайниларга. Бу икки фирмә<sup>1</sup> бизнинг назаримизда бир-бирисидан мумтоз, идора ишида бири биридан ортиқроқ ҳалқлар эмасдир. Шунга биноан Туркистон ҳалқларининг истиқболларини бу икки фирманинг биттасига ҳавола қилиш байни қўйни бўрига топшириш қабилидан бўладир. Нега десангиз, ҳар икки томоннинг иш бошига интилган кишиларининг кўкрагига қўл солиб кўрсангиз, бирисининг фақат эл таламоқ, бойлиқ ортдирмоққагина бўлған гаразини, иккинчисининг кўркли хотинлар, юқори турмишлар учун бўлған мақсадинигина кўриб, икки орадан "Элни тинчтай, эл ҳам роҳат тирикчилик қилсин" деган учунчи бир олий мақсадни ҷароғ ёқиб ахтарсангиз ҳам тополмассиз. Мана биз, тақсир, шу кейинги ишда кўрилмаса ҳам фақат ширин хаёллардагина юрган олий фирмәга ўзимизда тарафдорлик ҳис этамиз. Отамнинг Азизбекка яқин туриши қипчоқ душмани, қорачопон тарафдори бўлганидан эмас, балки бояги маслакка бир хизмат қилмоқ учундир. Таассуфки, отамнинг Азизбекдан бўлған умиди бўшка кетди: бу кун ул ўзининг ярамас хаёли йўлида хондан юз ўғирди ва бу орада қанча гуноҳсизнинг қони тўкилишига сабаб бўлмоқдадир. Маним бу сўзларимга ишонинг, ишонманг ихтиёр албатта сиздадир. Аммо бундоғ энг жўн бўйтон билан қораланишимга виждоним қаршисида сўнг даража муazzабман<sup>2</sup>, тақсир!

Қушбеги Отабекнинг бу гапларидан яхшигина тараффуддуга тушкан эди, аммо — "Азизбекнинг оталиги ва кенгашчиси" бўлған Юсуфбек ҳожининг ўғли бўлиши унинг миясини қотирған, балки, бу гаплар шундай эҳтимолларга қарши дастур қилиб берилган бўлмасин, деган фикрга келган эди. Отабекнинг юқоридағи гапларидан сўнг бўлған ундаги ўзгариш ҳам фақат бу ишни яхшилаб текшириш ва ҳозирдан бир ҳукм бермасликкина бўлди.

<sup>1</sup> Фирма—гурӯҳ, бўлак.

<sup>2</sup> Муazzab—азобдаман.

— Ҳар ҳолда сизнинг яхши ниятлик кишилар бўлмаганингиз кўзимиз ўнгидадир, — деди қушбеги, — шунинг учун то ҳакиқат ошкор бўлгунчалик ҳар иккингиз зинданда қоларсиз.

Отабек бир сўз айтмай сукут қилди. Қутидор "чора йўқми?" дегандек қилиб куявига қаради. Қушбегининг ишорати билан йигитлар ҳозир бўлиб, гуноҳкорлар зинданга жўнатилдилар. Қушбегининг — "Эртага уйда мажлис қурилғанларни ва бу мажлисда иштирок қилған бошқаларни ҳам қўлға олиб, ҳузуримга келтирингиз!" деган амридан сўнг қўрбоши ҳам рухсат олиб чиқди.

#### 14. НАЖОТ ИСТАБ ТОШКАНДГА

Бу кун саккиз кундан берига — "кутилмаган бир бахт" эгаси бўлиб олған Кумушбиби учун бу ҳол кутилмаган бир бахтсизлик, кутилмаган бир фалокат эди. Эндиғина "Бекни уйлантиридим, суйганига қўшиб қувонтиридим" деб бу уйлантиришнинг ҳусни ва қубҳини<sup>1</sup> тузукраккина ўйлай олмаган Ҳасанали учун ҳам бу воқиъа кичкина гап, озғина қайғу эмас эди. Қўзининг оқу қароси, ёлғиз қизини маҳтоворлик куявга бериб, қизи билан куявининг бир дақиқа ҳам бир-бирларидан ажраша олмағанларини кўриб кўйнагига сиғмай юрган Офтоб ойим учун куявигина эмас ҳатто эрининг ҳам бу вартага<sup>2</sup> тушмоги чидай оларлиқ бир ҳол эмас эди. Кумушбиби ўзининг "кутилмаган бир бахти" учун ишонмағандай бўлиб юрар эди. Чиндан ҳам мундан кейин қайтадан қовишмоғига ишонмай қўйди. Ҳасанали "кутилдим" деган эди, яна тоғдек қайғуға тутилди, Офтоб ойимнинг сўйингани ичига тушди.

Кумушбиби билан Офтоб ойимнинг бу фалокатка қарши топқан-тутқанлари ёлғиз кўз ёши тўкишкина бўлди. Бу фалокатнинг оғирлиғи яна ўзининг тоғдек катталиги билан Ҳасаналининг устига тушди. Кумушбиби эри билан отасининг најотларининг кимдан кутишни билмас эди-да, қора кўзларини жиқ ёшға тўлатиб — "энди нима қила-миз?" дегандек Ҳасаналига термулар эди. Қутидор оиласида бошқа эр зоти бўлмаганингдан Офтоб ойим қарин-

<sup>1</sup> Ҳусни ва қубҳи — яхши ва ёмон томони.

<sup>2</sup> Вартага — гирдоб, ҳалокатли жой.

дошларидан "жонкуяр" деб танилған киши Кумушнинг тоғаси Аҳмадбек бўлиб, ул ҳам умрининг кўпини Қўйқондами, Хўжандами ўткарар, шунинг учун ундан ҳам ёри кутиш узоқ гап эди. Мана бу жиҳатдан ҳам Кумуш ва онасининг бирдан бир ишонгандари яна Ҳасаналининг ўзи эди.

Барча оғирлиқ Ҳасаналининг устида. Ўзингнинг туғилиб ўқсан ерингта оға-иниларинг, билиш-танишларинг бўлиб ҳар нучикда улардан шунингдек оғир кунларда сўз билан, иш билан бир ёрдам ола биласан. Аммо бизнинг Ҳасанали Тошкандда эмас — Марғилонда, мусофаратда, кишиларини танимаган бир шаҳарда. Бошда Ҳасанали Зиё шоҳичи билан унинг ўғли Раҳматдан яхшигина умид туткан, ҳар ҳолда улардан бошқа таяннорлик кишим йўқ, деб ўйлаган эди. Баҳтка қарши бу фикридан ҳам теъза қўйл ювди: Зиё ака билан Раҳмат ҳам қўлга олиндилар ва Ҳасаналининг ўзи ҳам қидирила бошланди. Ҳасанали ва Кумушби биларнинг қайгулари яна бир қат ошти, қўрқунчи устига қўрқунч қўшилди. Ҳасанали ҳам Отабеклар билан бирликда биринчи кун қўшилиб қамалған бўлар эди, бироқ унинг саройда бўлиши улардан ажралиб қолишига сабаб бўлған эди. Қўрбоши йигитлари томонидан Ҳасанали ҳам қидирилиб бошланғач, улардаги "балки бу кун, эрта бўшатиб юборарлар" деган умид ҳам бўшга чиқди. Бошда Ҳасанали ўз эрки билан ҳукumatка топширилиб, маҳбусларга жазо келса бирликда тортиб, қутилиш мұяссар бўлса бирга қутилишга ўйлаб қараган эди. Унинг бу фикрига Кумуш билан онаси қарши тушдилар: "Сизнинг озод юришингиз маҳбуслар учун балки фойдалик бўлар" дедилар. Ҳасаналининг ўзи ҳам уларнинг раъйини мувофиқ топди. Бироқ унинг ташвиши икки қат ошди: ҳар дақиқа ҳадукда, қўрбоши йигитларидан қочиб яширинишига, ҳар соат жой янгилашша мажбур эди.

Ҳасанали кунларини томоқсиз, тунларини уйқусиз ке-чира бошлади: "Отабеклар нега қамалдилар, қандай гуноҳлари бор экан? Отабекнинг ипидан-нинасигача бўлған сирри унга маълум эмасми?" — Бу жиҳат билан ўйлаганда — "Қутидорларнинг бирар ишлари балосига қолди-ёв" — деб фикр қиласар эди. Бу фалокатни умумийроқ текшириб бошласа, халқ оғзида мақол ўрнида истеъмол қилинган "Ажалингнинг етиши қулған ёзигингдан"<sup>1</sup> эмас —

<sup>1</sup> Ёзиқ — гуноҳ, айб.

бек акангнинг қонсираши" деган гап кўнглига тушар эди-да, беихтиёр уфлаб юборар эди.

Орадан беш кунлаб ўтди, маҳбуслар зиндан балосидан қутила олмағанлариdek, уларнинг қамалиш сирлари ҳам ҳеч кимга билинмади. Ҳасанали шу беш кун ичида маҳбусларнинг нажотлари йўлида қора пуллик иш чиқара олмағанидек, бундан кейин ҳам бир иш қила олишига кўзи етмай қолди. Чунки қўрбоши йигитларидан сақлана олишнинг ўзи ҳам унга катта вазифа даражасида эди.

Нихоят Марғилонда туриш фикридан қайтиб, Тошканд жўнаш хаёлига тушди. Бу кунларда ҳам Тошканд тинчсизлиги бир тарафлик бўлмаган, ҳануз Тошканд Қўқон сипоҳлари томонидан муҳосара ҳолатида эканлиги тўғрисида хабарлар келиб турмоқда эди. Ҳасанали бу гаплардан хабарсиз эмас, Тошкандга кириб олишнинг қайдаражга қўрқунч бўлғанлиги ҳам унинг кўз ўнгига эди. Иш шундог бўлса ҳам ул Тошканд жўнаш учун ўзида бир мажбурият ҳис этар, нажот йўлларини энди Тошканддан изламаса бошқа чора йўқ эди. Қарорни шунга бериб, бу фикрини Кумуш билан Офтоб ойимга сўзлади. Уларда эпақалик бир мия, Ҳасаналига йўл кўрсатадирган ихтиёр қолмаган, топқанлари фақат йиғи эди. Ҳасаналининг "Сиз билан маним қўлларимиздан бир иш чиқадирган ўхшамайдир. Нима бўлса ҳам мен Тошканд бориб, нажотни ўша ердан изламасам бўлмас" дейишига қарши Кумушбиби бир хил синиқ товушда:

— Марғилондан топилмаган нажот Тошканддан топилсинми? — деди.

— Биз энди шунга мажбурмиз, қизим, — деди Ҳасанали, — қайнин отангиз эҳтимол бунинг бирар чорасини топар.

— Биз энди шундай қолаберамизми, агар золимлар... — деди-да, Кумуш сўзининг охирини айталмай ўқраб юборди. Ҳасанали ҳам ўзини куч ҳол билан йигидан босар экан, Кумушни юпатди:

— Үндай бўлмагир хаёлларга тушманг, қизим, — деди, — қўшбеги бошқаларга қараганда инсофлик ҳокимдир. Худо хоҳласа, мен Тошканддан қайтқунча улар ҳам зиндандан қутилувлар.

Бу кун кечаси ул йўл тайёрикликларини кўрди. Миниб кетиши учун қутидорнинг саман йўргасини белгулади. Эртаси эрталаб Марғилоннинг Қўқон дарбозасидан биринчи галда чиқғучи Ҳасанали бўлди.

## 15. ТОШКАНД ҚАМАЛДА

Бу күн Тошканд қамалининг элли биринчи куни. Со-вуқ бир оз юмшаб тушкан, қүёш очиқ ҳавода ҳаракат этмакда эди. Ерлар эриб, ҳамма ёқ шилт-пилт лой, қўргон кунгираларидағи қировлар буғқа айланиб кўкка кўтарили-макда эдилар.

Бу күн тонгдан бошлаб, Тошкандинг Самарқанд дар-бозаси томонидан бўлган қўқонлиларнинг ҳужумлари ўзлари учун сўнг даража ҳалокат билан тугалган. Қўқон сипоҳлари эндиги ҳужумгача шикаст-рехтларини тузатиш, яраларини боғлаш, дамларини олиш учун қўргон ёнидан қаёққадир—қўшларига<sup>1</sup> кетканлар. Қармоққагина эмас сўзлашқа ҳам даҳшат: Камолон дарбозаси билан Самарқандгача бўлган қўргон ослари (бу икки дарбоза оралари беш юз адим келадир) бошсиз ва иштондан бошқаси туналган инсон гавдалари билан тўлибдир. Бу очиқ мозористонни қўргон кунгиралари устида мудофаъа-дан сўнг чарчаб, қуёшда жилиниб<sup>2</sup> ўлтурган саллалик, қалпоқлиқ ва попоқлик Тошканд мудофиълари минг тур-лик шодлиқлар ичида томоша қиласидирлар. Бу икки дар-боза орасида икки хил ҳолат ҳукм сурадир — қўргон осларида жаҳаннам даҳшати билан ялангоч, боши танидан олиниб қора қонига беланган одам гавдалари ётиб, қўргон устида иккинчи кишилар дунё шодлиги ичида сузадирлар.

Қўргон устидаги қаҳрамонлардан биттаси кула-кула бир саркардани отиб ўлдирғанлигини сўзлаб: "Падар лаъ-натини ўзим хўбам отдим-да, отининг устидан уч газ кўтарилиб йиқилди!" дейдир. Тағин биттаси ўликлар ичи-дан кимнидир кўрсатиб: "Ана, ана, ҳов ана! Ўша қипчоққа ўқ тегиб ўлиб ўлалмай, юриб юралмай инграб ётқан экан. Қиличим билан бошини шартта кесиб, белидаги олтин камари ва устидаги кимхоб пўстунини олиб чиқдим!" дей-дир. Ҳар ким бу кунги урушдаги ўзининг эрликлари би-лан, қўлга туширган олтин камари, ёқут кўзлик узуги, совсар пўстуни, кумуш қинли қиличи ва бошқа ўлжаларни билан маҳтанадир.

Шу вақтда қўргон устидан қўшиқ товши эшитиладир:

<sup>1</sup> Қўш — вақтинча қўниш жойи.

<sup>2</sup> Жилиниб — исиниб.

Замонинг замон бўлсин — ёр,  
Азиз бегинг омон бўлсин — ёр.

Дардига даво топмай — дўст  
Норматинг ёниб ўлсин — ёр!<sup>1</sup>

Биз энди шу ўликлар ёни билан қўргон бўйлаб бир оз илгарига юрсак олти газ юксакликда, беш газ кенглика, икки ёни саккиз газлик қўргон девори билан ўралған, кунботарға қаратиб қурилған Самарқанд дарбозаси ёнида тўхтармиз. Теварагимиздан душманнинг ҳужум қилиш қўрқунчи бўлғанлиқдан биз ортиқча чидамсизлик билан дарбозани қоқа бошлармиз:

— Очингиз бек ака, тезроқ очингиз!

Дарбоза беклари бизга илтифот қилмай ўлтураберадирлар. Бизнинг ўн беш дақиқалиқ жон аччиғида қашағанимиздан кейин дарбозабонлардан биттаси зерикиб секингина қўргон деворига чиқадир-да, мўралаб бизга қарайдир. Ул бизни аниқ тошкандлик бўлғанимизга ишонса дарбозага солинган нортуюянинг бошидек қулфни минг мاشаққат билан очиб, занжирини тушурадир. Биз ўзимизни ичкарига олғач, дарбозабон ўзининг ҳазми кўтарган қадар бизга пўнғиллайдир-да, дарбозани берклаш ҳаракатига тушадир. Энди биз дарбозабоннинг ҳайъатига қараймиз: ошланған қўй пўстагидан пўстун кийиб, белига бутун бир бўздан белбоқ боғлаган ва белбоғига ярим газ чамалиқ калид осқан, туркман попоқлик бир киши. Шундан кейин биз дарбозанинг ўнг томонига қараб юруймиз. Дарбозадан ўн беш адимлар нарида, шийпонга ўхаш тўрт тарафи очиқ бир бинода дарбоза беклари гулхан солиб, чилим чакиб ўлтурадирлар. Биз қўргоннинг ости билан илгарилашда давом этамиз. Энди биз бояғи мудофиъларни<sup>2</sup> ичкаридан кўрамиз: мудофиълар қўргоннинг энг юқориги погонасида ўзларининг турлик тус ва бичиқдаги кийимлари билан қайсилари шашвар тутиб,

<sup>1</sup> Нормат—Нормуҳаммад қушбеги: Тошканни муҳосара қилгучи қўқонлилар—қипчоқлар амири лашкари (*муал.*).

<sup>2</sup> Мудофиълар халқ ичидан чиқған мерғанлар бўлиб, шунинг учун уларнинг ёши ва кийимлари ҳам турличадир. Ўрда йигитлари ёлгиз бекнинг муҳофазатида эдилар. Қўргонлар муҳофазати халқ қўлида эди (*муал.*).

қайсилари милтиқ ушлаб, құрғон кунгирасига сүяниб, бошларини қуёшға беріб үлтүрадырлар. Құрғоннинг Камолон дарбозасигача бұлған құруқ<sup>1</sup> ўринлари шунингдек мудофиълар билан тұлған бўлиб, ўзига бир турлик кўриниш ташкил этадир.

Камолон ва Самарқанд дарбозаларининг ўрта бир ери бўлған құрғон остида кимхоб тұн кийиб, симоби салла ўраған, белига кумуш камар боғлаб, қилич тақинган бир бек олдиаги бир уюм нарсага ишорат қилиб ёнидағи бир йигитка ниманидир уқидирмоқда эди. Биз яна элли-олтмиш адим юриб ҳалиги сўзлашиб турған беклар яқинига борақ, құрғон ташқарисида құрган даҳшатларимизни ўзининг кўлагасида қолдиратурған яна бир "даҳшатлар тепаси"га кўзимиз тушадир-да, қўрқувимиздан соатлаб ҳушимизни йўқотиб қўйишига мажбур бўламиз.

Уч-тўрт юз инсон бошидан турғузилған бир тепа!

Қаричга келадирган узун соқоллар, бошдағи хун олуд<sup>2</sup> сийрак соchlар, бўзарған юзлар, қонға беланиб, ярим очиқ ҳолда қорачиқ ўрнини бир оқлиқ босқан кўзлар дунёга ва шу ҳаётка лаънат уқуғандек қарайдирлар. Айниқса бир бош, эҳтимолки ҳали йигирма йилни ҳам ўтмагандир, мурти ҳам чиқмаған. Хун олуд қуюқ қошлари остидағи ярим очиқ кўзлари кимнидир излагандек қарайдир... Ярим очиқ иринлари ичидағи оқ тишлиари билан тилини гарчча тишилаган-да, гўё шу турмишда, шу бесар<sup>3</sup> халқ ичидаги туғилғани учун "аттанг" ўқыйдир.

Бу бошлар уюми устида турған құрғон бегиси ёнидағи йигитка бошлар орасидан бирини кўрсатиб, ўз танишларидан бир бекнинг боши бўлғанлигини сўзлайдир. Шу пайтда Камолон дарбозаси томонидан яроғланған учта отлиқнинг от чоптириб келгандар кўрилиб, құрғон устида үлтурған мудофиълар ичидаги олаговур қўпти:

— Ҳудайчи, Сулаймон ҳудайчи!<sup>4</sup> —дейишиллар.

Ҳудайчи құрғон беги қотига<sup>5</sup> етиб, бесар ҳазратларининг

1 Қўруқ — мудофиълар қўригига сақлаб турладиган жой.

2 Хун олуд — қонға беланган.

3 Бесар — боши айланған; ақлсиз.

4 Ҳудайчи, удаайчи—адиотант маъносига бўлиб, одатда хон келиш олдидан халқни огоҳландириб ўткучи бекдир. Азибек ўзига ҳудайчи белгулаган эди (муал).

5 Қот—ҳузур, олд.

ҳозир етиб келишларига башорат берди, яна отининг бошини буриб йигитлари билан орқага қайтди. Ҳудайчибосининг хабаридан бу кунги улуғ музafferиятни қутлагали Азизбекнинг келиши маълум бўлар эди.

Ҳудайчи жўнағач, қўргон бегининг пайтавасига қурт тушиб, типирчилаб қолди ва у ёқдан-бу ёққа югира бошлади:

— Ҳой қўргон устидаги азаматлар! Ҳозир бўлингиз, ясов тортингиз, бек келадирлар! Ҳой Ҳусайнбек, дарбозабонларга югир, ҳозир турсинлар! Фанибек юзбоши, сиз йигитларингизни тартиблангиз! Ясовулбоши, ҳозир бўлингиз!

Қўргоннинг қўруқ ўрнидаги қаҳрамонлар ҳаракатка келдилар, юқори қўруқдан бир поғона қуйига тушиб сафясов тортдилар. Шовқин-сурон орасида қўргон беги от устида қўргоннинг у бошидан-бу бошига чопиб:

— Ҳозир бўл, йигитлар! Тартибингни тузат, саломга тайёрлан! — деб қичқириб юрар эди. Қаҳрамонлар қўлларидағи милтиқ, шашвар, ойболта, қилич ва найзалари билан тизилишиб олдилар. Сафнинг ўрта еридан яшил байроқ кўтарилди. Шунинг билан Азиз парвоначининг истиқболига лозим ва вожиб<sup>1</sup> бўлған барча тартиб ва тантанага ҳозирланилган бўлинди.

## 16. АЗИЗБЕК

Орадан уч-тўрт дақиқа ўткандан кейин Камолон тарафидан бир юз чамалиқ саркарда ва йигитлари билан Азизбек кўринди. Тилла жабдуқли қизил айғирга минган, қуёш ёғдуси билан турлиқ туска кириб товланадирған, ёқа ва этакларига олтин уқа тутилган кимхоб тўн кийиб, белидаги олтин камарга кумуш қинли жазоири қилич осқан, бошига оқ шоҳидан салла ўраб, оёғларини кумуш узангига тираган, сийрак қошлиқ, чўққи соқол, буғдой ранглик, қирқ беш-элли ёшлар чамалиқ бир киши эди. Унинг орқасидан қора отга отланиб, зангори мовутдан уқалик тўн кийган, кумуш камарнинг ўнг томонига қилич, сўлига тўғангча қистирған, бошига барра попоқ кийиб, жин ялаған деганларидек қошсиз, қорамтил юзлик, икки чакагининг устида бир оз, иягода бир оз сийрак,

<sup>1</sup> Вожиб—бажарилиши мажбурий, фарз.

күримсиз қора соқолиң, күзлари ичига ботиғроқ, аммо қон құйилғансумон бир киши келар эди. Бу киши Азизбекнинг амири лашкари ва ўңг құли бўлған Райимбек додхоҳ эди. Унинг қаторидағи иккинчи киши кичикрак саман отка отланиб, устига Бухоронинг ола байроқ мата-сидан чопон кийиб, камар ўрнига чопонини тутмалаган, бошиға катта салла ўраб, қамчи сопи билан эгарнинг қошиға тася қылған; тұла күркем юзлик, катта мalla кўзлик, узун мөш-гуруч соқоллик мулланамо бир зот бўлиб, бу киши яроқсиз эди. Азизбек орқасидан келгучи бу икки отлиқдан сўнг сипоҳлар туржуми бошланиб, за-нгкор мовутдан тизагача тушкан калта камзул, қизил мовутдан шим, оёғда сагри этик, бошда Райимбек додхоҳнинг бошидағидек попоқ, аммо уст томони қизил мовутдан, оқ қайищдан камар, сўлиға қилич осилиб, ўңг томонига тўғангча қистирилған қар қаторда тўрттадан отлиқ келмакда эдилар. Сипоҳларнинг кекчаликлари тўғрисидағи нуқсонни эътиборга олинмаса, кўриниш мунтазам эди.

Қўргон устида ясов тортқан қаҳрамонлар қўл боғлаб икки букилгансумон таъзим билан Азизбекни илгарига ўтказа бошладилар. Азизбек уларга қарши олтин соплик қамчисини кўкрагига кўндаланг қўйиб боши билан хам жавоб ишораси бериб олдинлар эди. Шу кезда бошлар уюми ёнида турған қўргон бегиси отидан ерга тушиб жиловини қовиширилған қўллари орасига олди. Бошлар уюми билан Азизбек ораси қирқ-элли от адими қолган эди. Азизбек қаҳрамонларнинг саломларига жавоб қайта-ришни ҳам унугиб, кўзини кесик бошларга тикди. Азизбекнинг орқасидаги саркарда ва сипоҳлар ҳам бу даҳшат уюмига эгарга қийшиқ ўлтурууб томоша қилиб келар эдилар. Азизбек кишилари билан бошлар ёнига келиб тўхтади.

Азизбек бир мунча вақт бошларга томоша қилиб турди-да, қаршида қўл боғлаган қўргон бегига қараб илжайди:

— Баракалла гайратларингизга, — деди Азизбек, — бу кун қипчоқларга рустамона жавоб бериб, ўзларини ҳам итдек қирғансиз. Бунчалик гайрат кўрсаткан фуқароларга раҳмат, дунё тургунча турсинлар!

Азизбек ташаккурини битиргач, ҳудайчи қўргон усти-даги қаҳрамонларга ҳамма товшини қўйиб қичқирди:

— Бек жаноблари бу кунги рустамона гайратларин-гизга раҳмат айтиб, ҳақларингизга дуо қиласидирлар!

Мудофиълар дунёни бузиб жавоб бердилар:

— Қуллиқ тақсир, қуллиқ! Тақсиримиз дунё тургунча туриб, сояи давлатлари бошимиздан кам бўлмасин!

Азизбек қамчисини кўндаланг қўйиб мудофиъларга қуллиқ қилди ва ҳудайчига буюрди:

— Қўргон бегига кимхоб тўн, юзбошиларга атлас чон, бошқа йигитларга уч тангадан пул инъом берилсин.

Ҳудайчининг хабаридан сўнг мудофиълар жавоб қайтардилар:

— Давлатлари зиёда бўлсин!

Хазиначилар сипоҳлар орқасидан икки отни етаклашиб ҳудайчи ёнига етдилар. Бир отнинг устига чопонлар ортилған, иккинчи отдағи катта хуржиннинг икки кўзи лиқ танга эди. Бошлаб ҳудайчи от устидан бир кимхоб тўнни олиб, қўргон бегига кийдирди. Қўргон беги тўнни кийиб Азизбек ҳақига узун дуо қилди. Сўнгра ҳудайчи бир йигитка тўн қўлтиқлатиб, иккинчи йигитка тангалардан олдириб қўргон беги билан бирга қаҳрамонлар ёнига чиқди. Қўргон бегининг кўрсатишича кимга уч танга пул, кимга адрес чопон улашилиб бошланди.

Азизбек от устидаги бошлар уюми теварагида айланиб Райимбек доддоҳ ва ола-байроқ тўнлик кишига ўзининг таниш саркардаларидан бўлған кимларнингдир бошларини кўрсатмакда, тирик вақтларида нима ишларда бўлиниб ва қора чопонлиларга қандай зулмлар қилғанларини сўзламакда эди. Азизбекнинг бу гапларини Райимбек доддоҳ самимий эшитса ҳам ола-байроқ тўнлик одам "тақсир, тақсир" билан жавоб бериб, бошлар уюмидан жирканган-сумон эгарининг қошига кўзини тикиб турмоқда эди.

Ярим соатлик бир фурсатдан кейин қўргоннинг бошдан-оёқ ясов тортқан қаҳрамонлариға инъомлар улашилиб битди-да, ҳудайчи ўзининг қуруқ хуржини билан Азизбек қотига келиб қуллиқ қилди. Азизбек қаршисида қўл боғлаб турған қўргон бегидан сўради:

— Йигитларингизнинг барчаси ҳам қуруқ қолмадими?

— Давлатингиз соясида, тақсир.

— Қипчоқларнинг бу кунги ҳужуми қай вақтда бўлди?

— Тонг ёрир-ёrimas Оқ тепа<sup>1</sup> томонидан тўп ота бош-

<sup>1</sup> Оқ тепа—Самарқанд дарбозасининг гарбидаги бир мавзий исми (муал).

ладилар, — деди қўргон беги, — ўн беш дақиқа ўтар-ўтмас отлиқ қипчоқ қўшинлари кўриниб Самарқанд дарбозасига югирдилар. Шунгача мен ҳам давлатингиз соясида икки дарбоза ораларига мерғанларни яйратқан эдим. Бошлаб Самарқанд дарбозаси қўруғидан отишга буюрдим. Мерғанлар ўн беш дақиқа орқасини узмай миљтиқ ўт бериб турдилар. Қипчоқлар бизнинг томондан отилган миљтиқ ўқларига чидалмай, Самарқанд дарбозасини ташлаб, Камолон дарбозасига юзландилар. Сўнгра давлатлари кўланкасида Камолон қўруғидаги мерғанларни ишка қўйдим. Бир соат чамаси отишқандан сўнг ёв бизнинг ўқимизга чидалмай, икки дарбоза орасида уч-тўрт юз ўлик қолдириб, қочишга мажбур бўлди. Биздан ёлгиз беш киши ўлиб, тўққиз киши яраланди.

Азизбек жуда завқланған эди, яна бир қайта баракалла ўқуб, сўради:

- Нормат қипчоқ кўриндими?
- Йўқ тақсир, қўргон яқинига йўламади, йўлағанда...
- Ушанга ҳозир бўлмоқ керак.

— Давлатлари ёри берса, албаттa бизнинг муддао ҳам шунда...

Азизбек ўз оғзи билан мудофиъларга "Мен сизлардан рози!" деб қичқирди ва мудофиъларнинг қий-чув дуолари остида сипоҳлари билан Самарқанд дарбозасига томон ҳаракат қилди.

Бу кун Азизбек ғолибият далласида қўргонлардан бир айланиб чиқмоқчи эди. Шунинг учун Самарқанд дарбозасидан ўтиб қўргон ости билан Чақарға қараб юришдилар. Қўргон Чақарнинг чуқур жарлик ариғига тақалиб тугалар эди. Чақар суви устига қўргон тиклаш мумкин бўлмай, жарнинг усти қўргондан табитий бўш эди. Аммо жарнинг нариги томони бир тепадан иборат бўлиб, жануб биқини маълум Чақар суви билан, гарби Бўз сув ва Кўкча ариғи билан ўралган бурун каби бу тепа қўргонсиз ҳам душманнинг ҳужумига ўнгтайсиз эди. Тепа устида сипоҳ туриши учун бир неча бинолар солинган, жануби-гарбига қаратиб бир, гарбға қаратиб бир ва шимоли-гарбига қаратиб яна бир; бариси учта тўп қўйилган эди. Бу тепа устида доимий тўпчи ва қоровуллар турар эдилар.

Азизбек сипоҳлари ила жарга тушди ва сув кечиб ҳалиги тепага юзланди. Тўпчи, қоровуллар кўздан кечирилиб, уларга бир неча тангадан инъом берилди. Шундан кейин тепанинг кун чиқишига қараб қайтдилар. Чунки

тепанинг бошқа томонлари юқорида айтилгандек бир неча терак бўйи жарлик бўлғанлиқдан Кўкча дарбозасига ўтиш учун Сузук ота мозори яқини билан Кўкча ариғига тушилур ва ундан кейин Кўкча қўргонлариға қайтиб келинур эди. Кўкча қўргонлари қўргуғида анови қўргонларни-кидек мудофиълар кўб бўлмаса ҳам, йўқ ҳам эмас эдилар. Ҳудайчи Азизбекдан илгарироқда қўриқчиларни огоҳландириб борар, милтиқ, шашвар туткан ёш ва кекса муҳофизлар уни саломлаб қарши олар эдилар ва Азизбек-нинг "Раҳмат фуқароларим!" сўзини эшишиб яхшигина талтайшиб қолар эдилар. Шу равишда Кўкча, Чигатой, Сакбон, Қорасарой, Тахтапул, Лабзак дарбозаларини ўтиб, энг кейин Қашқар дарбозасига етдилар.<sup>1</sup> Қашқар дарбозаси ўрдага яқин бўлғани учун мунда муҳофиз ва сипоҳлар талайгина бор эдилар. Уларнинг саломларига кўмилиб, Азизбек Қашқар дарбозасининг муюшига еткан ҳам эди, ташқаридан кимнингдир дарбозани ошигич тақ-тақ ургани эшитилиб, Азизбекнинг оти ҳуркибми, қўрқибми кетига бурулиб тўхтади. Бошқалар ҳам тўхташға мажбур бўлдилар. Азизбек қаршисида қўл боғлаб турған дарбоза бегига бақирди:

— Нега қараб турасан, дарбоза устига чиқ, ким экан у ит?!

Дарбоза беги югуриб қўргон деворига чиқди:

— Тақсир, бир чол!

— Дарбозангни очиб, ичкарига ол! — деди Азизбек. Дарбоза очилди. Ташқаридан саман отини етаклаб Ҳасанали кирди-да, кутилмаган иш устидан чиқғани учун қўрқиб, Азизбекка салом берди.

## 17. ЮСУФБЕК ҲОЖИ

Райимбек додхоҳнинг ёнидаги бизга таниш ола-байроқ тўнлик киши Ҳасаналини кўриши ҳамоно:

— Ҳа-а-а, бизнинг Ҳасанали-ку! — деди, — кел, Ҳасан кўришайлик, Отабек эсонми?

Ҳасанали келиб кўришди, Юсуфбек ҳожи кўришар экан, Азизбекка деди:

<sup>1</sup> Тошканднинг булардан бошқа яна Қўқон, Қаймас ва Бешёғоч исмлик дарбозалари бўлиб, ҳаммаси ўн иккни дарбозадир. Қаймас дарбозаси бу кунги Тупроққўргоннинг эски шаҳар муюшида (*Ўқчи маҳаллада*) (муал).

— Бу бизнинг кишимиз тақсир, Марғилондан келадир.

Азизбек лабини тишлаб қолди. Чунки тақиљлатиб, оти-ни ҳуркиткан Ҳасаналини жаллодға топшириш нияти, ал-батта йўқ эмас эди. Юсуфбек ҳожининг сўзига жавоб бермай йўлида давом этди. Ҳасанали сипоҳлар орқасидан, Юсуфбек ҳожи Азизбек кетидан ўрдага қараб юрдилар. Ўрда дарбозасига еткандан кейин кутиб турған ўрда беги Азизбекнинг қўлтиғидан олиб отдан туширди. Азизбек ўрда ичига кирмакда экан, Юсуфбек ҳожи отдан қўниб сўради:

— Менга рухсатми, бек?

Азизбек йўл устидан ҳожига қаради:

— Рухсат, эртага чойни ўрдага келиб ичинг.

— Яхши, тақсир.

Юсуфбек ҳожи сипоҳлардан бирининг қўлтиқлаши билан отига миниб, нарида кутиб турған Ҳасаналига қараб юрди. Сипоҳлар ҳам ўрда ичига от етаклашиб кира бошладилар.

Юсуфбек ҳожи Ҳасаналининг вақтсиз ҳам Отабексиз қайтишидан ташвишланган ва қандай бўлса ҳам бир фалокат юз берганига ишонган эди:

— Нега вақтсиз келдинг, Отабек соғми? — деб сўради.

Юсуфбек ҳожи Ҳасаналига етмасданоқ бу саволни берди, Ҳасанали эшитмадими ёхуд эшитса ҳам эшитмаганга солиндими, ҳар нучук жавоб бермади.

— Нега индамайсан?

— Отабек саломат...

— Бўлмаса нега вақтсиз келдинг, Отабек қани?

Отабекнинг қамалишидан хабар бериш Ҳасанали учун жуда оғир туйилган эди. Ниҳоят кўзидағи ёшини артди-да:

— Отабек Марғилон ҳокими тарафидан қамалди, —деди.

— Нега, нега? — деди ҳожи, отидан сачраб йиқилишга еткан эди. — Сабаби нима?

— Сабаби маълум эмас.

— Астағфируллоҳ, — деб қўйди ҳожи, ўзини бир оз тўхтатқан эди.

Ҳасанали Отабекнинг Марғилон борғанидан тортиб, қамалишигача бўлган ҳикояларини сўзлаб кетди. Юсуфбек ҳожи бекнинг уйланишини ҳам оддий гаплар қаторида эшитиб ўткарди.

— Марғилонда туриб бир иш чиқаришға кўзим етмандан кейин Тошканд келишкага мажбур бўлдим, — деди Ҳасанали ва шу гап билан можарони сўзлаб тугатди.

Ҳожи воқиъани эшитиб, чуқур бир мuloҳаза ичида борар .  
эди. Унинг қандай киши бўлғанини Тошканднинг етти  
ёшаридан етмиш ёшаригача билғанликдан гузар ва  
маҳаллаларда унга дуч келган кишилар жойларидан туриб  
салом берарлар, ҳожи бўлса жавоб қайтариши билмас,  
гўё кишиларни ҳам кўрмас эди. Ниҳоят шу ҳолда кўб  
юргач, орқасида келмакда бўлған Ҳасаналига қараб оти-  
нинг бошини бурди ва:

— Отабек билан бирга қамалғанларни неча киши де-  
динг? — деб сўради.

— Уч киши: бири Мирзакарим қутидор, иккинчи Зиё  
шоҳичи, учунчи Раҳмат.

— Яхши, сен бу тўртавининг ўлтуришларида  
бўлғанмидинг?

— Бўлған эдим.

— Нима ва қайси тўғриларда сўзлашдилар, Отабек  
қипчоқларга қарши сўзламадими?

— Сўзламади. Бошқаларнинг ҳам бу тўғрида сўзлари  
бўлмади.

— Уларнинг мажлисларида бўлмаған вақтинг ҳам  
бўлдими?

— Ҳар бир ўлтуришларида мен ҳозир эдим.

— Яхши, сен улар билан қай ерларда ўлтуришдинг?

— Биринчи мартаға Зиё аканикида бўлдиқ, иккинчи...

— Тўхта, Зиё аканикида меҳмонлар неча киши эди-  
лар?

— Қутидор, Отабек, андижонлик Акрам ҳожи, мен,  
Зиё аканинг қайниси — Ҳомид деган бирағ. Зиё ака ва  
унинг ўғли... Ҳаммаси етти киши.

Юсуфбек ҳожи отининг ёлини қамчиси билан тарап  
экан, уч-тўрт дақиқа ўйлаб қолиб, сўнгра сўради:

— Иккинчи ўлтуриш қаерда бўлди?

— Иккинчи ўлтуриш Зиё аканикидан икки кун сўнг  
қутидорникида бўлди. Бу мажлисда ҳам ўша биринчидаги  
кишилар эдилар. Ёлғиз Ҳомид йўқ эди.

— Тагин қаерда ўлтуришдингиз?

— Бошқа жойда ўлтуришмадиқ...Мундан йигирма кун-  
дан кейин тўй бўлди. Тўйда албатта бундай сўзлар гапу-  
ришилмайдир.

— Иккинчи мажлисингизда ким ҳали, Ҳомид дединг-  
ми, нега йўқ эди?

— Билмадим, нега йўқ эди...Қутидор айтмаган бўлса  
керак.

— Қамалгучилар: Отабек, қутидор, Зиё ака, Раҳмат; шундоғми?

— Шундоғ, ҳожи.

— Сени ҳам құрбоши йигитлари қидирдилар?

— Қидирдилар.

— Акрам ҳожи Андіжон кеткан эди. Шунинг учун уни тополмадилар, шундоғми?

— Шундоғ.

— Ҳомидни-чи?

— Уни қидирмадилар шекииллик... Отабек қамалғандан сүнг алла қаерда күргандек бўламан.

— Бизга келин бўлмишни, гўзал, дедингми?

— Илоҳи Отабек саломат қутилсин, муҳаббат қўйғанича бор...

— Келиннинг сулувлиги Марғилонда маълум эканми?

— Маълум экан, тилларда достон экан.

— Ҳомид уйланган йигитми, билдингми?

— Уйланган. Бизнинг ҳужрага келганда, икки хотини борлигини ўз оғзидан эшиткан эдим.

— Ҳомид сизнинг ҳужрага нима учун келган эди? — деб сўради ҳожи, нега буни боя сўзламаган эдинг?

— Эсимдан чиқибdir, — деб узр айтди Ҳасан, — Ҳомид Раҳмат билан бирга Отабекни Зиё аканикига таклиф қилғали келган эди ва биз уларга ош-сув қилиб жўнатқан эдик. Аммо уларнинг ундан-бундай сўзлари бўлмаган, тўғрилиқча келиб кеткан эдилар.

— Яхши, ўша Ҳомидни сен қандай одам, деб ўйлайсан?

— Қўланса сўзлик, ичи қорароқ бир йигит эди, — деди Ҳасанали, бир оз борғач сўради: — Отабекнинг ишини оғир, деб ўйламассиз?

Ҳожи жавоб бермади. Ул жавоб бергали ҳам қўрқар эди. Унингча иш жуда нозик, ғоятда қўрқунч эди. Чунки, Марғилон зиндонида ётғучи қипчоқ душмани бўлған Азизбек оталигининг ўғли эди. Тошканднинг исен чиқарған бир замонида Отабекдек бир йигитнинг Марғилонда қандай гуноҳ билан бўлса-бўлсин ушланиши ҳар жиҳатдан ҳам мудҳиш эди.

Ул ўғлининг қутилиши йўлида ҳар бир мулоҳаза кўчасига кириб чиқмоқда, аммо ҳар бирисидан ҳам бўш ва умидсиз қайтмоқда эди. Энг сўнг ўғлига ҳужум қилған бу фалокатнинг тадбиридан ақли ожиз қолди, мияси ишлашдан тўхтади ва шундан сўнг — "Парвардигоро, кексай-

ган кунларимда доғини күрсатма" деди ва күз ёшлари билан соқолини ювди.

— Ҳасанали, зинҳор унинг қамалғанини онаси билмасин.

— Албатта.

Шундан сўнг отларини етаклашиб ичкарига кирдилар.

## 18. ЖАР

... Бу кун соат ўн иккода Отабек ила қутидорнинг исёңчилиқ гуноҳи билан дорға осилишларини жарчи шаҳарга хабарлаб юрар ва ҳалқ оғзида Отабекларнинг эмиш-мемиш ҳикоялари эди.

Ҳомид ила биргалашиб кирган мишлоғи қўрбоши ташқарифа чиқмоқға буюрди-да, Ҳомидни ўлтуришкан имлади.

Қўрбоши ниманидир сўзламоқчи бўлса ҳам, негадир унинг тили осонлиқ билан ҳаракатка келмас ва ўзи ҳам бир турлик ўнггайсизлиқда эди. Ниҳоят қўрбоши ўзига бир турлик жасорат берди:

— Боболар: "Дунёники мири кам икки" деганлар, — деди, — тўғриси ҳам шундоғ: ўзингни юз ёқға урсанг ҳам тирикликтининг яна бир бошқа ямоги чиқиб турадир...

Туйғун<sup>1</sup> Ҳомид қўрбошининг нима мақсади борлигини пайқади:

— Тўғри сўзлайсиз, тақсир, — деди, — дунёники ҳамиша мири кам икки, шу етишмаслик балосидан тўйиб, баъзи вақтларда кишининг дунёдан чиқиб кеткуси келиб қоладир. Яхшиким, дунёда ошна, оғайнин деган кимсалар бор... Агар шулар бўлмаса-чи, киши алла қачон дунёдан чиқиб кетадир. Шунинг учун мен оғайниларни кўзларим устида тутаман, уларни муҳтожлиқ чоғларида кўрсам, ўзимни гарав қўйиб бўлса ҳам эҳтиёждан чиқаришга тиришаман.

Қўрбоши тизаси устига кўндаланг қўйған қиличининг икки тарафидан босиб, бир қўзгалиб қўйди:

— Бали, бали, мулла Ҳомид, мундай оғайниларнинг са-

<sup>1</sup> Туйғун—сезгир.

дақаси кетсанг ҳам арзир, — деди, томоқларини қириб қўйди. — Шу кунларда ўғилчаларнинг ёши етиб, суннати набионани<sup>1</sup> бажо келтириш тақозо этадир... Тўй керакларидан кўпини тадорик қилған бўлсам ҳам, етишмаган ерлари ҳам кўб. Шуни сизнинг келишингиз олдида ўйлаб ўттурап эдим...

— Бек ака, — деди Ҳомид ва тусиға ясама кулиш чиқарди, — сиз аччиғлансангиз ҳам айтай: беклар зоти кишига сира ҳам ошна бўлмас эканлар. Айниқса сиз ҳамон ўзингизнинг беклигингизга бориб, истиғнонгизни<sup>2</sup> эскича олиб борасиз... Бошингизда шунчалик қайғингиз бўлур эмиш-да, бир оғиз менга айтмас эмишсиз?

Қўрбоши Ҳомиднинг заковатига қойил бўлиб илжайди:

— Йўқ, йўқ, мулла Ҳомид, — деди, — бу ёқда гап бор: қукумат хизматида турғанингдан кейин юз ёқнинг мулоҳазасини қиласр экансан...

— Тузик, бек ака, аммо маним ошначилигим тамом бошқачадир, — деди Ҳомид ва ёнчигини чиқариб бир қўлидан иккинчи қўлига олтинларини санаб тушира берди. Қўрбошининг кўзи олтинлар устида ўйнаб булар баракасида қиладирған суннат тўйисини, Марғилон беклари олдида ортдирадирған обрўсини ўйламоқда эди. Олтинлардан йигирматаси ажратилғач, саноққа ишонмай кўриб турғаним тушми, деб уйқусиради. Ҳомид олтинларни узатди, — мана, бек ака, бу арзимаган олтин холис ошналигимизнинг боғланишидир, яна етмагани бўлса қараб турмасмиз.

Қўрбоши титраб, қахшаб олтинларни жойлади. Ҳомиддан ниҳоятда курсанд эди:

— Хўш, мулла Ҳомид, энди бу кунги ҳангамалардан сўзлашайлиқ, — деди бек. — Поччангиз ила жиянингизнинг бу ишка оралашиб қолғанлари ёмон бўлди-да.

Бу сўздан Ҳомиднинг юзига қайғириш аломати чиқди ва зътибор билан қўрбошининг оғзига қаради.

Қўрбоши давом этди:

— Бу икки бегуноҳнинг қамалишларига ҳам ўша ярамас сабаб бўлди. Йўқса уларни қамоққа олишга қушбеги буюрмас эди. Аммо кечаги қушбегига сўзлаган сўзингиз

<sup>1</sup> Суннати набиониа—пайғамбарнинг йўл-йўриги.

<sup>2</sup> Истиғно—зътиборсизлик, кибрланиш.

Отабек ила қайин отасини ўлимга маҳкум қылғанидек, поччангиз ила жиянингизни бир қадар оқладыр. Шунинг учун ҳам мен борған сўнг бўладирған ҳукм мажлисида эҳтимол қариндошларингизни қутқазишга муваффақ бўлурман. Ҳар ҳолда қариндошларингизнинг қаттиғ жазо тортишлари шубҳаликдир, сиз пайқадингизми, йўқми кеча мен жарчиға бу кунги осилгучиларни Отабек ила Мирзакарим бўлғанлигини таъйинлаган эдим.

— Марҳаматингизга қуллиқ, — деди Ҳомид, — аммо шундог бўлса ҳам қариндошларим тўғрисида хавфданман...Бунинг бошқачароқ бир збини топиб бўлмасмикин?

Бояги мукофотлар қўрбошини чинлаб бош оғритишга мажбур этар эди. Бу тўғрида ул анча ўйлаб олди:

— Кечада қушбеги олдида Отабекларни қай равищда айблаб сўзлаған эдингиз, тағин бир эшишиб ишнинг режасини олай-чи?

— Қушбегига сўзлағаним шундай эди — "Отабек айтди: энди бизнинг Тошканд ҳалқи қипчоқларнинг жабру зулми ва тадбирсиз идораси остида ётиб жуда тўйди. Бошлаб Тошкандан қипчоқ балосини йўқотиш учун Азизбек ва отам бошлиқ исёнга тайёрландилар. Шу мақсадда Марғилон оғайниларини ҳам қипчоқларга қарши оёқлан-дирмоқ учун мени бу ерга юбордилар. Биз токай қипчоқлар қўл остида эзијамиз ва бир ҳовуч далатобларга бош эгамиш, деди. Отабекнинг бу сўзига қутидор ва Акрам ҳожилар қўшилишиб, унга бу йўлда ёрдамлашмакчи бўлдилар. Аммо мен бўлсан бу гапка қарши тушиб: сизларнинг бу фикрларингиз янгишидир, биз уч йил бўйи жаноби Ўттабой қушбегининг қўл остларида яшаб ҳеч бир зулм кўрмадик. Шу ҳолда ҳукумат устига иқдомимиз<sup>1</sup> куфрони неъмат<sup>2</sup> бўлур, дедим. Отабек менга қаттиғ сўзлар айтди. Поччам ила жиянум бўлса маним фикримда эдилар, аммо уйимизга келган меҳмон, деб уларга очиқ қаршилик қилмадилар. Бу мажлисларни кейин мен бир неча вақт Отабек ва йўлдошларининг қонлари тўкилмасин, деб бу гапни ичимга солиб юрдим. Бироқ Тошканда Азизбек ва Юсуфбек ҳожилар исёни бошланғандан сўнг, ўзимнинг бу ишимни ҳукуматимиз учун хиёнат билib, қўрбоши

<sup>1</sup> Иқдом—қадам босиш; оёқ ости қилиш.

<sup>2</sup> Куфрони неъмат—қадрини билмаслик, кўрнамаклик, нонкўрлик.

жанобларига хабар бердим. Ўзимнинг содиқона бу хизматим эвазига жанобларидан ожизона ўтингчим шулки, бу сирни сизларга билдиргучи мен бўлғанлигимни ўзларидан бошқа кимарса билмасин, ҳатто муттаҳамлар ҳам сезмасинлар" — мана, фақирнинг Отабекларни айблашим ва қариндошларни оқлашими холосаси шундан иборатdir.

— Баракалла, — деди қўрбоши, — сизнинг бу гапларингиз жуда ҳам ўринлик тушкан, мен ишонаманким, Зиё ака билан Раҳмат қутилурлар.

— Буни нимага суяниб айтасиз?

— Суянчигимиз маълум, — деди қўрбоши, — қушбегига Отабек ила қутидорни осмоқ фикрини берган бу сўз, поччангиз билан жиянингизни нучук қутқармасин.

— Поччам билан жияним илгариги сўроқда қандай жавоб берган эдилар, буни хотирлай оласизми?

— Уларнинг жавоблари кечаги сизнинг оқлашингизга сира ҳам қарши келмайдир. Чунки улар мажлисда бундай сўз бўлмади, деб тондилар. Бу эрса ўз уйларига келган меҳмонларни риоя<sup>1</sup> қилишлари бўлиб чиқадир-да, яна иш сизнинг оқлашингизга ёпишиб келадир.

Ҳомид тағин бир мулоҳазага тушкан эди. Унинг бу ҳолини кузатиб турган қўрбоши:

— Энди ортиқ ўйламангиз, мулла Ҳомид, — деди, — орада сиз қўрқарлиқ ҳеч бир иш ийўқ.

Ҳомид нимадир айтмакчи бўлар эди-да, ўнгтайсизланиб тўхтар эди. Бир, икки қайта оғзини жўплаб қараса ҳам яна сўзлай олмади. Қўрбоши унинг бу ҳолидан хабар топди:

— Гапуринг, гапуринг, мунда ёт киши ийўқ.

Қўрбошининг бу сўзи далласида Ҳомид жасоратланди:

— Бу кун ҳукм мажлисида поччам ила жияним сўзларидан янгилишиб кетсалар нима бўладир?

— Нега янгилишнлар, улар билғанларидан ортиқни албатта сўзламаслар. Ўлим деган нарса кўз ўнгига келиб тўхтағандан кейин Отабекдек меҳмонлар риояси кўнгилдан ювилур, сўзнинг тўғрисини айтишқа мажбур бўлурлар ва иш ҳам сизнинг айблаш, оқлашларингиз руҳига келиб тўхтар.

Ҳомид яна ҳам ўнгтайсизланиб тушди, ўзининг ички

<sup>1</sup> Риоя — ҳурматлаш; андыша.

сиррига шу чоқғача тушина олмаған құрбашыға лаънатлар үқур экан:

— Айблаш, оқлаш сүзларимнинг руҳини сиз бир әкқа құйяберинг-да, ишнинг ички томонини мулоҳаза қилинг, құрбоши ака, — деди.

Хоин ила сотилған күзлар тұқнашдилар-да, бир-бираисидан маъно олишдилар ва орага бир неча дақықа сўзсизлик, жим-житлик кирди. Құрбоши чиндан ҳам бу ўрингача Ҳомиднинг ички сиррига мутталиъ<sup>1</sup> бўлмаған, қўлиға кирган олтинларни ҳам ёлғиз унинг қариндошларининг қутилишлари йўлидаги чойчақалар, деб билар эди. Аммо энди илгари ва ҳозирда киссасига тушкан олтинларни Отабек ила қутидорнинг қон баҳолари эканлигини сезиб виждан тўлқинланади ва мутарафдид бўлди. Қўрбошининг бу ҳоли Ҳомидни маълум икки йўл устида қолдирған эди. Бу икки йўл устида қолған Ҳомид саросима эди. Ўзини жаҳаннамга юбориш ва најотка чиқариш ихтиёри қаршисидағи бекнинг қўлида эди. Унга тез-тез қарап ва ҳол тили билан унга яна кўб олтинлар вайда қиласр эди. Бу вайдаларни Ҳомиднинг юзидан ўкуған қўрбоши — "икки кишининг хун баҳолари!" деб қичқирмоқда бўлған виждан садосини эшишиб ўлтурмади:

— Энди бунга қарши қандай йўллар кўзлайсиз?

Ҳомид ўзининг најот томонига оғишқанини сезиб энтиқди:

— Құшбегига қілған айблаш, оқлаш йўлларимни поччам ила жиянимга тушиндириш керак, деб ўйлайман.

— Тушиндирсак тагин яхши.

— Раҳмат, бек ака, ундоғ бўлса вақт қочирмасдан уларнинг ёнлариға тушиб, то ҳукм вақтиғача уқдира оласизми?

— Мумкин, ўзингиз тушсангиз яна яхши.

Ҳомид бошини чайқади:

— Отабек ила қутидорларнингтина эмас, ҳатто поччам ила жиянимнинг ҳам маним бу ишларда иштироким борлигини билмасликлари керакдир.

— Маъқул. Аммо бунда сизнинг мақсадингизға қарши бир гап борким, ҳукм чогида құшбеги сизни йўқласа нима бўладир? Бу тақдирда улар сизнинг бу ишни омили бўлғанлигингизни билмасларми?

Масаланинг бу томони ҳам Ҳомид учун ёмон эди.

<sup>1</sup> Мутталиъ — хабардор, огоҳ.

Фариштадек соф қолда қолмоқчи бўлган Ҳомиднинг бу ҳол сиррини очар, юзидағи ниқобини олишга, рақиблар ила юзма-юз келишка мажбур этар эди:

— Ҳукм мажлисида бўлмаслигимни уҳдангизга ололмайсизми?

— Уҳдага олмоқ қийин, — деб бош чайқади қўрбоши, — аммо бу бир эҳтимолгинадир, чунки, қушбегининг бир нарсага қарор бергач, ортиқ текшириб ўлтурдирган одати йўқдир.

Ҳомид узоқ ўйлаб турмади, юзидағи совуқ бир ўзгариш ичида:

— Майли, башарти юзлашмоқча тўғри келганда ҳам мен ҳозир, — деди, шундан сўнг ажралишдилар.

## 19. ҲУКМНОМА

Ўткир, қонсираған ханжарини белига осиб, ойболтасини кўтарган жаллод қушбегининг ҳукмига мунтазир эди. Қушбегининг ўнг томонида қўрбошидан тортиб шаҳар аъёнлари, қаршисида Отабек, қутидор, Зиё шоҳичи ва унинг ўғли Раҳмат — гуноҳкорлар ва уларнинг орқасида муҳофиз йигитлар.

Отабек билан қутидорнинг гуноҳлари улуғ бўлғандикдан қўлларида киshan, Зиё aka билан Раҳматнинг қўлларида бу нарса йўқ эди. Қутидорнинг юзига ўлик тузи кирган, Отабек бўлса гарангсиган қиёфатда. Ановилар ўzlарини бир мунча тетик тутмоқда эдилар.

Қушбеги ўзининг ёзилиб қўйилган ҳукмномасини қўлиға олиб ўқишга ҳозирланди. Ҳамма тип-тинч, ерга қараған эди:

“Менким Марғилон ҳокими Ўтаббой қушбеги ўз ҳукмимни хоқон ибни хоқон жаноби олий Худоёрхон исми шарифларидан эшитдираман...”

Худоёр исмини эшиткучи аъён унинг таъзими учун ўринларидан туриб яна ўлтурдилар.

Қушбеги ҳукмини ўқуди: “Эътимодлик<sup>1</sup> бир кишининг шаҳодатига биноан тошкандлик Юсуфбек ҳожининг ўғли —

<sup>1</sup> Эътимод — ишонч.

Отабек, бу кунда хонимизга қарши бош күтартган Азиз парвоначи ва ўз отасининг ваколатлари билан Маргилон келиб, бу ердаги фуқароларни ҳам хон жанобига қарши оёқландирмоқчи бўлған. Отабекнинг бу ҳаракати ууламир<sup>1</sup> бўлған жанобга боғийлиқ<sup>2</sup> бўлиб, уни, яъни Отабек Юсуфбек ҳожи ўғлини ўлим жазоси билан жазолаш тақозо этадир. Иккинчи, Отабекка бу йўлда кўмакчи бўлиб юрган Маргилон фуқароси Мирзакарим қутидор ҳам шу жазога сазовор тутиладир. Зиё шоҳичи билан ўғли Раҳмат бу боғийлиқдан хабардор бўлатуриб, вақтида ҳукуматка маълум қўлмағанлари учун бир йилдан зиндан жазосига маҳкум бўлурлар!"

— Ҳақсиз жазо, — деб Отабек кулимсираб қўйди... Кутидор бўлса чин ўлик тусига кирган эди.

Зиё ака билан ўғли зинданга жўнатилдилар ва Отабек билан қутидор жаллод қўлига топширилдилар-да, шунинг ила ҳукм мажлиси тамом бўлди.

Орадан ўн дақиқа чамаси фурсат кечкан эди, қушбенинг аъёнга сўзлаб ўлтурган ҳикоясини тезроқ битишини кутмакда бўлған қўрбоши ниҳоят чидалмай ўрнидан турди ва:

— Дор остига бориб ҳукм ижроси вақтида ҳозир туришимга ижозатлари бўладирми? — деб сўради. Ул бу сўзни тугатар-тугатмас ўрда қоровули Пирмат кўринди-да, қушбегига қулиқ қилди:

— Бир хотин киши арзим бор дейдир, кирсинми?

Қушбеги қўрбошиға рухсат ишорасини бериб, Пирмат-ка деди:

— Кирсин.

Ўхшамаган ерда бир хотиннинг арзга келиши қўрбошининг кўнглига шубҳа солди. Мажхула<sup>3</sup> хотиннинг қандай арзи бўлғанилигини билиб кетишга тиласа ҳам қушбегидан рухсат олиб қўйғани учун маҳкамадан чиқишига мажбур эди. Қўрбоши маҳкамама эшигидан даҳлизга чиқар экан, эскигина паранжига ўралған бир хотин қушбеги тўғрисиға тўхтаб, букилиб таъзим қилди. Хотинда ҳаяжон ва энтикиш ҳолатлари бор эди. Шунинг учун қўрбошининг бояги шубҳаси яна кучайди, қушбегининг кўзидан

<sup>1</sup> Ууламир — буюк амир.

<sup>2</sup> Богий — исёнчи.

<sup>3</sup> Мажхула — нотаниш, номаълум.

йўқолиб туриш мақсадида ўзини эшикнинг орқасига олиб кетмай тўхтади.

Хотин шошибилиб кавшини ешди-да, эшик остида нимадир паранжи ичидан охтаринди. Хотиннинг бу ҳаракатига тушинолмай ажабланган қушбеги:

— Ичкарига кириб арзингизни сўзланг, опа, — деди.

Хотин ичкарига кирди ва қушбеги олдига бориб унга нимадир берди-да, орқасига қайтиб эшик ёнига келиб турди. Хотиннинг бериб кеткан нарсаси уч, тўрт букланган бир қофоз эди. Қушбеги секин-секин қофоз тахларини оча бошлади...

— Худо ризоси учун тезроқ. Йўқса... икки гуноҳсизнинг қонуларига ботарсиз!

Хотиннинг бу сўзидан аъён бир-бирларига қарашдилар. Қушбеги тез-тез қофоз тахларини очиб битирди ва йўғон қалам билан ёзилған узун бир мактубни ўқумоқча олди. Мактубни ўқуб чиқиш узоқча чўзилғанлиқдан хотин ниҳоятда тоқатсизланған эди. Охирда қушбеги мактубнинг сўнгрогига келиб тўхтади-да, чақириди:

— Пирмат, Пирмат!

Пирмат югуриб кирди.

— Лаббай, тақсир!

Қушбенининг товшида шу чоқғача эшитилмаган бир ҳолат бор эди:

— Даррав ҳалиги осилиш учун юборилған гуноҳкорларнинг орқасидан от билан югир! Дор остидан бўлса ҳам қайтариб кел! Буйргумни қўрбошига айтсанг унар!

Пирмат қуллиқ қилиб даҳлиз томонга қаради:

— Қўрбоши ҳам шу ердалар, — деди.

— Ҷақир!

Даҳлиздан қўрбоши кириб қуллиқ қилди.

— Ҳизмат, тақсир.

— Яхши, сиз кетмаган экансиз, — деди қушбеги, — Пирмат билан бориб, дарҳол бояғи гуноҳкорларни қайтариб келингиз.

Шубҳасини бекорга бўлмаганини сезган қўрбоши ёнида тик турғучи хотинга қараб олди:

— Сабаб, тақсир?

— Сабабини суриштирадирган вақт эмас, чоп дедим, чоп!

Қўрбоши қуллиқ қилиб Пирмат билан чиқди. Унинг кейинидан қушбеги "падар лаънат" деб сўкиниб аъёнларга қаради. Энди хотиннинг ҳаяжони бир оз босила тушкан эди. Қушбеги қўлидағи хатни яна ўқушға тутинди. Аъёни

шаҳар бунчалик ишқа яраған қүшбегининг қўлидағи мактубга ва уни келтиргучи хотинга қарашибоқда эдилар. Қүшбеги мактубни иккинчи мартаға ўқуб чиқиб хотинга қаради:

— Ўлтурингиз, синглим, — деди.

Хотин ўлтурмакчи бўлған эди паранжи ичидан унинг атлас кўйлаклари ва нафис оқ қўллари кўриниб кетди. Қүшбеги ер остидан хотинни кузатди-да, қўлидағи мактубнинг орқа, ўнгини текшириб қаради. Мактуб анчагина уринган, қогози шалоқланған эди. Сўнгра хотиндан сўради:

— Қутидор билан Отабекнинг кими бўласиз, синглим?

— Қутидорнинг қизи, Отабекнинг хотини.

Бу сўзни эшилкучи аъён бир-бирларига қарашиб қўйдилар.

— Буни нега илгарироқ олиб келмадингиз?

Қүшбегининг бу саволидан Кумушбиби қўрқунч бир маънони онглади. Гўё "иш ўткан сўнг келибсан" дегандек тушинган эди. Шунинг учун ул титроқ бир овоз билан сўради:

— Энди ярамайдими?

— Йўқ, йўқ, қизим, — деди қүшбеги, — мен нега кеча ва ўткан кунларда олиб келмадингиз демакчиман.

Кумушбиби бир энтикиб қўйди ва ўзини тўхтатиб:

— Ўзим ҳам бу мактубни шу бу кун кўрдим, — деди.

— Мактубни илгари кўрмаган эдингизми?

— Кўрмаган эдим.

— Мактуб қаерда экан?

— Унинг эски камзулининг чўнтағида экан<sup>1</sup>.

Шу гапдан кейин қүшбеги мактубни ўзига яқин ўлтурған Азим понсад бошига узатди:

— Сиз ҳам ўқуб кўринг-чи, понсад, — деди ва Кумушдан сўради, — ўқуганмисиз?

— Ўқуганман.

— Эрингизнинг ҳукуматка қарши ҳаракатини илгари ҳам билар эдингизми?

— Қанақа ҳаракатини?

<sup>1</sup> Бу мактуб ўткан фаслларнинг биттасида ёзилиб ўткан эди. Ўқугучи Юсуфбек ҳожининг Тошканд тинчсизлиги чогида Отабекка ёзган хатини хотирласа керак (муал.).

— Масалан, биз отангиз билан эрингизни нима учун осмоқчи бўлдиқ?

— Ҳақсиз, гуноҳсиа!

— Бу мактуб билан эрингизни ўлимдан қутила олишини сизга ким айтди?

— Ўзим билдим.

— Бўлмаса илгаридан эрингизнинг ўша ҳаракатини ҳам билар экансиз-да?

— Йўқ, тақсир, — деди Кумуш. Қушбегининг мақсадига энди тушиниб олган эди, — мен онам билан то шу кунгача уларнинг нима гуноҳ билан ҳамалғанларини билалмай ҳасратда эдик. Фақат бу кун кишиларнинг оғзидан эшитиб билдики, сиз уни Тошкандан исён чиқарғали келгучи, деб гуноҳкор қилур экансиз. Онам билан маним баҳтимга кутмаган жойдан мўъжизадек бу мактуб топилди-да, мен хизматингизга югурдим... — Кумуш сўзини тутгата олмади, чопишидан ҳаллослаған Пирмат даҳлиздан кўриниб, бекка қуллиқ қилди:

— Дор ёнидан қайтишдилар!

Кумушбиби сараб Пирматнинг юзига қаради ва узоқ тин олиб қўйди. Шу чоқғача хат ўқуб ўлтурган понсадбоши мактубдан яхши асарланган эди. Мактубни ёнидағига берар экан, қушбегига деди:

— Бу хат тошкандлик Юсуфбек тўғрисидағи фикримизни тамом ўзгартадир, тақсир! Унинг Азизбек томонлиқ бир киши эканлиги Фарғонанинг ҳар бир хос<sup>1</sup> ва оми оғзида нақл қилинса ҳам аммо ҳеч кимса унинг ичига кириб чиқмағандир. Ҳар кимнинг кўнглидагини ёлғиз бир худодан бошқа ким билсин!

“Ёв қочса ботир кўпаяр” қабилидан шу чоқғача лом демай ўлтурган шаҳар аъёнлари ҳам масалани онглаб, сўзга аралаша кетдилар:

— Худо ҳақни ноҳақ қилмади, бечора ёш йигитнинг ҳақсизга қони тўкилмади.

— Қутидордек қўймизож бир одамнинг бундай зўр иш-ка оралашқанлигига ақл ҳам бовар қилмас эди.

Гўё бу сўзлар Кумушбибининг ўчкан чарогини қайтадан ёқарлар, умид осмонининг йўқолиб, яшириниб кеткан юлдузлари яна қайтадан ўз ўринларига келиб қўнғандек

<sup>1</sup> Хос — юқори табақа, амалдорлар.

бўлурлар, унинг кўз ўнгида жой олған қоралиқлар шу ёқила бошлаған нажот шамълари партави билан ўз-ўзларидан йўқолғандек кўринарлар эди.

Даҳлиз эшиги остида бир дуркум оёқ товушлари эши-тилиб қўроши кўринди.

— Келишдилар, тақсир, кирсинларми?

Қушбеги жавоб бериш ўрнига мактубни олиб кўрпача остига яширди ва Кумушбибини танбижлади: "Мажлисда маним рухсатимдан бошқа сўзлашингиз отангиз билан эргизингизнинг ўлимларини тилашингиздир, тушиндингизми?" Кумуш қабул ифодасини бергандан сўнг қушбеги даҳлизда қараб турған қўрошига "Кирсинлар" деди.

Кумушбиби уларни боя йўл устида, йигитлар орасида кўрган бўлса ҳам бироқ даҳшат ичидаги фақат ўрдага қараб югура берган эди. Энди "Кирсинлар" жумласини эшилткач, юраги ортиқча шопириниб кетди, унинг истиқболига туришни ва бўйнига осилиб йиглашни тиласа-да, қаршиси-даги "олабўжилар" бунга мониъ эдилар. Шу вақт йигитлар олдида, қўлларида кишан бўлгани ҳолда Отабек билан қутидор кирдилар.

— Йигитлар, сиз чиқингиз! Қўроши, сиз кишанларни ешингиз! — деб буюрди қушбеги.

Ўзининг мундан кейинги қўргуликларини фожиъалар во-дийсида кўрган қўроши бошлаб кишан калидини қутидор қўлиға солди. Калидни буар экан, унинг қўли дир-дир қалтирамоқда эди. Ҳомиднинг номаълум бир гарази йўлида қурбон қилинаётган ва бу гаразда ўзининг ҳам иштирокининг борлиғига қойил<sup>1</sup> бўлған қўроши ишни бу янглиғ аксланишидан сирнинг очилғанини муқаррар билиб, ўзини шу соат жаллод қўлиға топширилишини аниқ кутмақда эди. Минг бало билан қутидор қўлинини бўшатиб, гал Отабекка етди. Отабек қўлларини бўшатгучи қўрошининг бунчалик титраб, қалтирашидан ўз рақибларидан биттаси шу киши бўлғанини ўйлади. Гарчи ўзининг нажоти ҳали қоронғу эрса-да, қўрошини бир синаб куриш учун ҳамма қучини икки кўзига йигдида, унга қаради. Фавқулодда даҳшат кабоб эткан унинг кўзлари қаршисида қўрошининг гуноҳкор кўзларини чидай олмадиларда ерга бокдишлар. Отабекнинг бу синаши ўз фикрининг тўғри бўлиши билан натижаланди.

<sup>1</sup> Қоима — ицрор.

Қүшбегининг буйруги билан икки гуноҳкор тиз букиб ўлтурдилар. Қўрбоши ҳам тўрбасини йўқоткан гадойдек қушбегининг чап ёнига, Кумушбибининг юқорисига бориб ўлтурди. Отабек ва қутидорнинг кўзлари Кумушбибига тушкан бўлса ҳам ўз қайгулари билан бўлиб унга илтифот қилмаганлар, ҳоким маҳкамасида паранжилик хотиннинг нима қилиб юрганлигидаги фавқулоддалик ҳам эсларига келмаган эди. Дор остидан қайтиш сирри, қўлдаи кишаларни олиниш сабаби уларни жуда шоширган, шунинг учун қушбегининг оғзига қараган эдилар. Қушбеги бўлса негадир узоқ ўйлаб ўлтурас, тезда гап очмас эди. Бу ҳолдан бутун мажлис аҳли қабзиятда,<sup>1</sup> қирқ қулоқ бўлиб унинг оғзига тикилган эдилар. Аммо бу ҳолга қўрбоши жону дилдан тарафдор, шу ҳолда бир неча кунлаб эмас, йиллаб сўзсиз қолишини тилар эди.

— Отабек, — деди қушбеги сўз бошлаб, — қўлга олинган кунингиз, менга ўзингиз билан отангизнинг қандай кишилар бўлганингизни, яъни маслакингизни сўзлаган эдингиз. Аммо биз ўшал сўзларингизга далил ва исботсиз ишона олмаймиз. Сизни дор остидан қайтариб келишимиз ҳам ўшал даъвонгизга бирада исботингиз борми ёки қуруқ бир гапми, доб хукмнинг ижросини бир оз фурсатка тўхтатишдир. Энди сиз ўшал даъвонгизни исбот қила оласизми?

— Ўшал кунги маним сўзлаганларим, отам билан маним ички сирларимиз эди, — деди бек, — албатта бунга гувоҳ ва исбот топиш қийиндир. Агарда отам келиб маним сўзимни қувватлағанда ҳам бари бир сиз, ўғлини қутқазиш учун сўзладир, дер эдингиз-да, зъвогарларнинг гапига ишониб ўз ҳукмнингизни қила берар эдингиз.

Яшиндек сўққан унинг бу сўзларидан қушбеги ўзини аранг тўхтатди:

— Демак, ўша сўзларингизни исбот қилиш учун ҳужжатингиз йўқ?

— Йўқ... Исбот учун виждонимдан бошқа шоҳидим йўқ.

— Яқин орада Тошканндан бирада нарса олғанимидингиз?

— Яъни нима?

— Масалан хат.

Отабек кўб ўйлай олмади, бутун борлиги билан ҳаракат қилиб қичқирди:

<sup>1</sup> Қабзият — диққат бўлиш, дилгирилик.

— Олдим, олдим! Исботим ҳам бор!

Аъёни шаҳар унинг бу ҳолига чидаб туролмай кўзларига ёш олдилар.

Отабек яна деди:

— Одам қўшсангиз мен келтурай гувоҳимни!

— Тинчланингиз, Отабек, — деди қушбеги, Отабек бир оз ўзини йигиб олғандан кейин сўради, — нима олган эдингиз?

— Мактуб.

— Кимдан?

— Отамдан.

— Қачон?

— Тошкандда исён бошланиш олдидан.

— Ундан кейинн-чи?

— Олмадим.

— Отангиз ўша хатида нималардан баҳс қиласр эди?

— Тушунмаган Тошканд ҳалқини Азибекнинг макрига учканидан, энг охирда... — асаланиб тўхтаб олди, — маним шу ҳолга тушмоғимни каромат қабилидан сўзлаб, менга бир мунча насиҳатлар ҳам қилған эди.

Отабекнинг бу сўзидан кейин понсадбоши — "энди бўлар" дегандек қилиб қушбегига қаради. Қўрбоши эрса Отабекнинг устида ҳали бунчалик тергашлар борлиги учун ўзини бир оз тўхтатиб қолди. Қушбеги кўрпача остидан хатни олиб Отабекка кўрсатди:

— Бу қанақа мактуб, танийсизми?

Отабек кўргучи кўзларига ишонмагандек:

— Танийман, — деди, — таърифини сизга сўзлаганим, отам мактуби! Таажжуб, буни сизга ким келтириди, тақсир?

Қушбеги енгилгина илжайиб Кумушбибига ишорат қилди:

— Нажот фариштаси, — деди. Қутидор билан бек ялт этиб Кумушка қарадилар. Энди Кумуш ортиқ чидаб туролмади:

— Отажон, мен қизингиз!

Отабекнинг қулогига эшитилган бу товуш унинг юрагини ингичка ерига бориб теккан эди. Эсини йўқотиб турған қайин отасига қарамай:

— Сизми, Кумушми? — деб сўради.

— Мен, мен!

Бу савол-жавоб ила икки вужуднинг ҳамма ҳасратлари, аламлари бир-бирларига онглашилған, икки товушнинг

бир-бирисига келиб қўшилишидан иккисига ҳам тил билан онглатиб бўлмаслиқ бир ҳол юз берган эди.

— Бу сенми, қизим?

— Мен, отажон!

Бу ўрингача бошқа бир мулоҳазада ўлтурган қушбеги уларнинг сўзларини бўлиб, Отабекдан сўради:

— Қулингиз Ҳасаналини нега шу кунгача топиб бўлмади?

— Қамалған кунимдан берига ундан хабарим йўқ, тақсир, — деди-да, Отабек Кумушка қаради.

— Бу кун ўн икки кун; Ҳасанали ота Тошканд кетмишдир, шундан бери ундан дарак бўлмади, — деди Кумуш.

— Тошканд кетишкан уни нима мажбур қилди? — деб ўринисиз бир савол берган эди қушбеги, Кумушбиби унинг нима учун кетканлигини айтib қаноатлантириди.

Масала яна хат устига ўтиб, Отабек қушбегидан сўради:

— Қўлингиздаги мактуб билан эҳтимол биз оқланған чиқармиз? — Қушбегидан тасдиқ ишорасини олиб давом этди. — Ҳозир биз сизнингadolatlik ҳукмингиздан бир нарсани сўраймиз: ул шулдурким, бизнинг тўғримизда ёмон мақсад билан сизга чақимчилик қилғучи зъвогар ва ғаразгўлар бу мажлиска ҳозирлансишлар-да, ўзларининг машъум кашфларини ва ё кўрган-эшитканларини исбот қилиб бизни қайта бошдан дор остиға юборсинлар. Биль-акс исбот қилолмас эканлар, бизга қазиған чуқурларига ўзлари йиқитилсинлар! Адолатингиздан бизнинг талабимиз шул! — деди ва қўрбошиға қаради. Унинг юзида қўрқиш ва изтироб аломатлари кўрди.

— Талабингиз ўринлик, — деди қушбеги, — аммо ҳасмингизни<sup>1</sup> бу мажлиска ҳозирлаш учун вақтимиз оздир ва лекин бу кун уни қўлға олармиз ва бириси кун бешовингизни бир ерга жамълаб ўз ҳукмимизни берармиз, — деди. Кумушбибига юзини ўғирди. — Қизим, сизнинг бунчалик заковат ва жасоратингизга отангиз билан эрингиз ҳар қанча ташаккур айтсалар ва ўзларининг мундан сўнгти умрларини сизнинг баҳшишингиз<sup>2</sup>, деб билсалар

<sup>1</sup> Ҳасм — душман, рақиб.

<sup>2</sup> Баҳшиш — карам, марҳамат.

арзир. Мен ҳам сизнинг бу хизматингиз эвазига эрингиз билан отангизни ҳозирдан бошлаб озод қилдим. Аммо Отабек иш бир тарафлик бўлгунча ўзининг қочмаслиги учун кафил беришка мажбурдир.

Ҳамма мол ва мулки билан қутидор Отабекка кафил бўлди ва қушбегининг ҳақиға дуо қилиб, учавлари маҳкамадан биргалашиб чиқдилар.

— Зиё ака билан ўғли Раҳматни бўшатингиз, сўнгра ановини қўлга олингиз! — деган амрни олиб, қўрбоши ҳам силжиди. Шунинг ила бу кунги ҳукм мажлиси тамом бўлиб, шаҳар аъёнлари таажжуб ичидаги тарқала бошладилар.

## 20. ИСТИҚЛОЛ<sup>1</sup> ДАРДИ

Етмиш кунлик бир муҳосарадан кейин уч минг сипоҳни бир ярим мингта тушуриб, бир ярим минг сипоҳни Тошканд қўргонлари остида қурбон бериб, Нормуҳаммад қушбеги қуруқ қайтишга мажбур бўлди.

Бу етмиш кунлик қамал вақтида Азизбекнинг содиқ фуқаролари бўлған тошкандликлар азтаҳидил унга хизмат қилиб, жонбозлиқ кўрсатиб, ниҳоят қипчоқларни умидсиз Қўқонга қайтаришга ноил бўлдилар. Ноил бўлдилар, аммо ўзлари ҳам яхшигина бўлиб қолдилар. Етмиш кунлик бир қамал, етмиш кунлик четдан ва энг ози қишлоқлардан муносабатни узиб туриш, албатта Тошкандни бўлдириб қўйған эди. Бу етмиш кунлик бир қамал Тошканднинг ҳали йигиштириб кира олмаған донларини, экинларини ёв қўлида қолдирди. Савдо ишлари бутунлай тўхтаб, савдо гарлар зўр фалокатка учрадилар. Косиб, фақир халқнинг ҳоли жуда ёмон эди: ноңсиз, донсиз, кийимсиз, сувсиз, алоҳозал-қиёс<sup>2</sup> сиз, сиз бўлиб энг охирги чекка еткандағина қамал балосидан "ялтирасин, қалтирасин" музafferият билан қутилдилар. Халқ ўзининг бу етмиш кун ичидаги тортқан мashaққат ва азобларини қипчоқлар устидан чалған ғалабаси билан бир даражага ювди-да, касбига, экинтикинига уриниб кўришни ўйлади, тўғриси ўйлай ҳам

<sup>1</sup> Истиқлол — мустақиллик

<sup>2</sup> Тошкандга сув берадирган "Солор" ариги қипчоқлар тарафидан бўйилган, ҳатто тегирмон ишлари ҳам ёргучоққа қолған эди (муал).

<sup>3</sup> Алоҳозал-қиёс — шунга ўхшаш, шунга мувоғиқ.

олмади... Азизбек, мундан кейинги Тошканднинг мустақил ҳукмдори Азизбек! Қипчоқларга чалған ғалабаси учун ул терисига сиғмайдир... Ул энди "Қипчоқлар Тошкандни олиб қолсалар..." деган мудҳиш хавфдан қутилған, ул энди Тошканд ва атрофининг хони, хоқони! Энди духоба ва атласлар устидагина ўлтурмоққа қаноатланмай ўз шашнига, ўз құдратига мувоғиқ тожлар, тахтлар ясамоқчи. Ўзининг эски маҳрамига күнгли түлмай башқа бир ўйинчи, ашулачи, ҳусндор бир маҳрам топмоқчи ва ўзининг бу машҳур маҳрами билан ер юзига (Туркистан ва Бухорога) донғ, шұхрат чиқармоқчи!

Азизбек энди жуда хотиржамъ эди. Қипчоқларнинг қайтадан Тошканд устига келишларини эҳтимол ҳам тутмас эди. Чунки ўзининг қипчоқларға берган зарбасини уларға юз йилсиз ўнғалиш бермас, деб билар эди.

Ҳамма иш жойида, лекин бир нарсагина күнгилнинг ңичка, ингичка ерини жароҳатладыр. Азизбек кўзига ҳозир ёргуғ дунё қоронғу, бу қоронғулиқ ичиде бояғи ширин хаёллар, ишлатиладирган тожу тахтлар ва бошқалар кўринмай қоладирлар: етмиш кунлик қипчоқ уруши минг турлик йўллар билан йигилган хазинани барбод берган, хазина қипчоқлар устидан ғалаба ва истиқлол мастиклари йўлида қуриған, фуқаронинг жон отиб, қипчоқларни қириб йўйғанлари учун инъомларга, эҳсонларга ва озиқ-овқатларға қурбон қилинған.

Мана шу эди Азизбекнинг кўз ўнгларини қоронғулатадирган жароҳат!

Бу ишнинг кенгашига эмас, берилған қарорни амалга ошириб беришлиқ учун Юсуфбек ҳожига йигит юбориб, ҳозир уни тўрт кўз билан кутиб ўлтурап эди. Ниҳоят ярим соатлик бир кутишдан сўнг Юсуфбек ҳожи эшик остидан кўринди. Азизбек одатий қаршилаш ёнига бир навозиш<sup>1</sup> ҳам илова қилиб, ҳожига юқоридан жой кўрсатди. Бу фавқулодда навозиш сабабини ўйламоққа ҳожининг вақти йўқ, чунки ўзининг қайғуси ўйлашқа, фикрлашқа етарлиқдир. Кўзининг оқу қораси бўлған Отабекнинг ҳоли нима кечти, қоронғи зинданларда, рутубатлик, заҳ ер осталарида очлиқдан, ташналиқдан, соvuқлиқдан азиз кўкрагини ерга бериб жон бердимикин? —

<sup>1</sup> Навозиш — сийлаш, марҳамат.

Золим беклар, қонхўр ҳокимлар, раҳмисиз жаллодлар, машъум дорлар ва қўрқоқ ҳалқлар орасида кекса отасини, муштипар онасини кўралмай дунёдан кетдимикин? — Мана шундай минг турлик васвасалар ичидаги қаршилини Азизбекни ҳам<sup>1</sup> унутмоқда эди. Азизбек бўлса — "жавоҳир қадалған тожлар, олтин тахтлар, нозанин паривашлар, донғдор маҳрамлар" ҳақидағина ўйлар эди.

— Ҳожи, — деди Азизбек сўз очиб, — маним сизни ўрдага чақирғаним сабабини албатта билмагандирсиз?

Юсуфбек ҳожи хаёлидан кўз очди:

— Тақсир... чақиришингиз албатта фуқаронинг тинчлиги раоёнинг<sup>1</sup> роҳати, ҳукуматнинг барқарор турмоғи учундир.

Ҳожининг бу сўзи Азизбекни яшиндек урди. Унинг кўз ўнглари қоронғиланиб, ҳалиги ширин хаёллар таги қоронғилиқда яшириндилар. Ул ортиқча ўнгтайсизланди ва тилар-тиламас:

— Шундоғ... — деди ва бир оз ўйланиб қолғандан кейин, етмиш кунлик қамал билан хазинамиз жуда гарифланди, ҳатто шу кейинги кунларда сипоҳларнинг озиги учун ҳам қийналиб қолдиқ. Мана шу тўғриларда сизни кенташка чақирған эдим.

— Маъқул, тақсир.

— Мен бу тўғрида бир қарорга ҳам келиб қўйдим.

— Қарорлари муборак бўлғай.

— Қарорим шундан иборатдирким, эртадан бошлаб юртка ўттуз икки тангадан солиқ сочасиз.

Юсуфбек ҳожи юрт бесаранжомлиги ва ўгул қайғуси билан асабийлашкан эди. Азизбекнинг бу аблажона қарорига қарши қизишди. Азизбекнинг бу золимона буйруғига қарши қаттиғ сўзлар айтишка ўйласа ҳам аччигини қандай кишига айтилишини ўйлаб, ўзини бир оз йиғди.

— Тақсир, амрингизга қарши тушадирған жойим йўқ, — деди, — лекин шунисини бир оз ўйламоқ керакки, юрт етмиш кун қамал кечирди. Онадан түгма азоблар, очлиқлар ўткарди ва ўткармакда. Менга қолса бу кунларда ўттуз икки танга эмас, ўттуз икки қора пул солиш ҳам оғирдир. Юрт беш-ён кун орқа-ўнгини олсин, сўнгра... — Ҳожи сўзини тугата олмади, ҳожининг терс сўзига чидалмаган Азизбек ваҳшийларча ҳайқирди:

<sup>1</sup> Раоे — бир ҳукмдорнинг қўл остидаги ҳалқ.

— Нима дейсан?!

Хожи ишнинг бунчалик ёмонга кетишини ўйламаган эди. Шу дақиқада ишнинг олдини олмаса, энди гап фақат Азизбекнинг жаллод чақиришига келиб қолди:

— Тақсир, сиз йиф, дер экансиз эртага эмас, бу кунданоқ йигит орқалиқ жаллод чақиришга жўбланганди тили ўз зарарига ҳаракатланди:

— Ўрда бегига айт, ҳожига бир кимхоб тўн чиқариб кийдирсин! — деди.

\* \* \*

Юсуфбек ҳожи эгнида кимхоб чопон билан ўрдадан чиқди. Ўрдадаги "Чопон муборак бўлсин!" деб сўра-гучиларга истеҳзо илжайиши остида бир турлик муҳмал жавоб берар эди. Ул ўрда кўпргудан ўтар экан, бояғидек қилиб ўзича яна бир кулимсираб қўйди ва телбаларча ўз-ўзига сўзланиб кетди: "Ўттуз икки тангадан солиқ йиф, эмиш... Бир ҳафтадан кейинга қолмасин эмиш... Солиқ йигишда қаршилиқ қилганни даррага ётқизиш, мувофиқ кўрилганда осдириш ҳаққи ҳам менга берилган эмиш... Гўё Юсуфбек ҳам ўзидек бир қонхўрга, бир золимга айлансин эмиш... Мен қонхўрлиқ учун худонинг фарз қилған ҳажини адо қилмадим; олдимда ўғлум бор, менда бошқаларнинг ўғленини даррага ётқизиш чогида кўндаланг келадирган виждан бор, дин бор, диёнат бор. Бизнинг ҳалқни ер ютсин. Азизбекнинг тулкилигига учди-да, унинг кечаги зулмларини унутди, етмиш кунлаб бир замон жон бериб, жон олиб ниҳоят хизмат ҳаққи учун ўттуз икки танга мукофот, энг кейинги бурда нонингни ҳам бер!"

## 21. ИНҚИЛОБ

Юсуфбек ҳожи устида бояғи кимхоб тўни билан Шайхантаҳурнинг Занжирлигига етиб, гузарда йигилиб ўлтурган ва ўзига салом бериш учун ўринларидан турган ҳалқа хитоб қилди:

— Ўйинг кўйсин, мусулмонлар! Яхши деб йўлида жон берганинг Азизбек, бу кун сенларга яхшилигини ўттуз икки танга солиқ билан қайтармоқчи бўлди. Ҳозир сен-

ларга икки йўл: ўғул, қизингни сотиб бўлса ҳам ўттуз икки тангани Азизбек хазинасига тўлаш ёки эс борида этакни ёпиб Азизбекни орадан кўтариш... Уйинг куйди, мусулмонлар!

— Ўттуз икки танга!

Халқ Юсуфбек ҳожидан бир зарра ёмонлиқ ёки бўлмагир бир кенгаш эшишмаган ва шунинг учун ул қаёққа юрса, шу ёққа боришқа ҳозир турар эди. Айниқса ўттуз икки танга довруги гузар аҳлининг юракларини ўюшдириб, буни эшиши биланоқ исёнга қўл қўйдилар.

Бошлиб Занжирлиқ халқи кўчаларга чип<sup>1</sup> ташлаш, Азизбекка қарши уруш ҳозирлиги кўриш хаёлига тушди. Юсуфбек ҳожи то Эски жўвага еткунча ўзининг юқоридаги сўзини кўй, гузар халқига такрорлаб келмакда эди. Эски жўвада азим бир жамоат йигиб, Азизбек билан бўлган можаросини сўзлади ва устидаги кимхобни кўрсатиб истеҳзо тариқасида:

— Солиқни бермангиз демайман, чунки сизнинг итоатингиз менга бундоғ тўнлар берар! — деди.

Халқ ниҳоятда қизишиди. Гўё бириси қувраган тўқайга ўт туртди. Ҳўлу қуруқ деганларидек катта-кичик баробар ёнмоққа олди.

— Яхшилигимизни унуди, тўнғиз! Ўттуз икки тангани яхшилаб берайлик биз унга! Ози бир ой ўтмасданми, андишасиз?! — деган сўзлар эшитила бошлади. Даррав уч кишини Себзор, Кўкча ва Бешёғоч даҳаларига хабар учун жўнатилди. Ё қирилиб битиш ва ё Азизбекни орадан кўтаришка фотиҳа ўқулди.

Орада бир соат ҳам ўтмади, бутун дўконлар ёпилиб, Тошканд кўчалари чиплар билан тўлди. Барча яроғланған, урушка ҳозир эди. Шақарнинг олаланиш хабари ўрдага ҳам эшитилди. Ишни кичкина деб ўйлаған Азизбек шаҳардан аҳвол олиш учун Райимбек дотқони элли ҷоғлиқ йигит билан буюрди. Аҳвол олгучилар Занжирлиққа етиш билан нақ ишнинг қай даражага етканини пайқадилар: кўчалар чип билан тўлған, чип орқалари шашвар, милтиқ, ханжар, найза ушлаган оломон билан лиқ эди. Райимбек дотқонинг "Чипларни йигиштиргиз, ўзларингиз тарқалишингиз!" деб айткан яхши сўзига қулоқ солғучи бўлмади.

<sup>1</sup> Чип — гов, баррикада маъносида (муал.).

Дотқо дағаллік құлған эди оломондан биттаси мілтиқ отиб, иккі сипоҳни йиқіп ҳам қўйди.

Кечки соат тұрталар, асрдан бир оз әртароқ ҳукумат аскари билан халқ орасыда уруш бошланды. Ярим соатлар отиш, чопищдан сүнг сипоҳлар Занжирилиқ оломонларини қочириб, Баланд масжид чипига етдилар. Жон аччигіға учраган Азизбек ўрдага бир мұнча сипоҳ қолдириб, бутун күчини йиғиширган ҳолда Райымбек дотқо күмагига етишди. Бунинг ила сипоҳлар тағин ҳам күчайиб, оломонни Хадрага қараб сурышка муваффақ бўлдилар. Хадра чипида қонлиқ урушлар бошланды. Ўттуз иккі танга солиқ хавфида оломон ҳам Бешёғоч, Себзор, Кўкча даҳаларидан ўзига ҳар замон яроғлиқ ёрдамлар олиб турмоқда эди.

Бу кун кечаси Тошканд қон ичида, маҳаллаларда бўлған ҳукумат кишилари халқ томонидан ўлдириладирлар, уйларига ўт қўйилиб моллари талонга тушадир. Шаҳарнинг юраклик йигитлари Хадра чипига қараб чопадирлар, юраксиз ва кексалар гузар ва маҳаллаларга тўнкалардан гулхан солиб, "ўттуз иккі танга" қайғусида оломонга музafferият тилайдирлар.

Ярим кечалар вақтқи оломон Хадрадан Эски мискарликка қараб сурилишқа мажбур бўлди. Кутимаган бу сурилишлар Юсуфбек ҳожини катта ташвишқа солиб қўйди. Мундан сүнг халқнинг ўзига ишониб туролмай Тошкандини ололмай қайтқан Нормуҳаммад қушбегига ёрдамга етиб келиш учун чопар югуртириди.

Эски мискарликда иккі тараф ҳам тонг оттирдилар. Эрталаб яна қонли урушлар бошланды. Аммо халқ энди ўзини анча тутиб қолған ва ҳар дақиқа тўрт тарафдан янги кучлар олиб турар эди. Шунинг учун сипоҳлар бир адим илгари босолмай қолдилар. Аммо халқ сипоҳларни босса босқундек товранар<sup>1</sup> эди. Бу ҳолдан ниҳоятда бўғилған Райымбек дотқо қилич яланглаб, сипоҳлар олдида оломонға қараб югурди. Бироқ унинг бу файрати ўзи учун ҳалокат билан натижаланиб, Уста Мўминжон исмлик бир мілтиқ устасининг отқан ўқи билан кўкрагидан ярапалиниб йиқилди.<sup>2</sup>

<sup>1</sup> Товранмоқ — ҳаракат құлмоқ, тиришмоқ.

<sup>2</sup> Райымбек Қозоқбойбий ўғли. Бешёғоч даҳа, Лаклакхона маҳаллалик (муал.)

Райимбек дотқо Азизбек ҳокимиятининг тираги эди. Унинг қатлидан сўнг сипоҳлардан руҳ тушти. Ҳатто Азизбекнинг буйргига ҳам қулоқ солмай, тўс-тўска қочиб бошладилар. Ниҳоят Азизбек ҳам ёнидағи қирқ, элли содиқ кишилари билан қочиб, ўрдага қамалишга мажбур бўлди. Юсуфбек ҳожи бошлиқ ер ва кўкка сигмаған музаффар халқ ўрда теварагини қуршаб тушди. Азизбек тезда берилмагани учун минглаб халқ ўрда атрофидан силжимай, ҳатто ош-сувларини ҳам шунда еб хотиржамъ ётиб олдилар.

Азизбек учун кутилмаган фалокатлар юз берган эди. Қочиб қутилиш мумкин бўлгани ҳолда тузоққа тушкандек ўрдага ҳам қамалиб берган эди. Нима қилсин, қаноти йўқки учиб қутилса... Қамалишининг иккинчи куни ўрда томига чиқди, энг кейинги, ҳам энг пастарин чорани кўрмакчи эди бу хоқон. Бошлаб фуқароға салом берди, сўнгра синиқ ва ожиз қолған бир товуш билан халқа узр айтди:

— Энди мен ўзимнинг қилмишларимдан пушаймон бўлдим... Мен сизларнинг қилған яхшиликларингизни унутқан эканман... Сизлар ўзларингизнинг бу ишларингиз билан маним кеткан ақлимни яна миямга ўрнатдингиз... Раҳмат фуқаро... Гуноҳимни кечирингиз, қилмишларимдан пушаймон бўлдим, фуқаро!

Аммо халқ бундай ёлборишларга, тавба-тазарруъларга қулоқ солмади, чунки иш ўткан, гишт қолипдан кўчкан эди:

— Энди эсинг кирдими, ўғри? Бурундан ўйлаб иш қилсанг бошингда бу балолар йўқ эди! Сен бизларга нима ишларни қилмадинг? Кун сайин неча гуноҳсизларни осдирған, кесдирған, болаларимизни ятим, оналаримизни қон йиғлатқан сен эмасмисан? Ханжарингни хайф кўриб маҳалларга<sup>1</sup> чаён солиги солған, оғаларимизни чаён заҳри билан ўлдирған ким эди? Кет тўнгиз, кет, тавба қилиш замони ўтди, тақдирингта сен ҳам тан бер! — дер эди халқ.

Халқ шунингдек гаплар билан юз ёқдан унга ҳужум қилиб, ҳатто адабсиз сўзлар билан ҳам сўкар эди. Азизбек ҳамон "Тавба қилдим, фуқаро!" жумласи билан узрини айтиб туар эди:

<sup>1</sup> Маҳал — жой, маҳалла.

— Сиз яхшиларим, бұ қисқа ўйлашингиз билан ўз оёғингизға ўзингиз болта уриб, яна қипчоқлар құлиға қарам бұласиз! Маним тавbamни лоақал ўзларингиз учун қабул қылингиз!

Азизбекнинг бу сўзидан кейин оломон тағи қизишиб, қуйидаги сўзлари билан кўкни кўтарди:

— Икки қайта алданиш йўқ! Сендеқ итдан бизга қипчоқ яхши!

Халқнинг бу жавоби ишнинг не даражага етканини онглатарлик эди. Шу гапдан кейин Азизбек тамом умидсизланиб, дунёларча маъюсият ичида томдан тушиб кетди.

Юсуфбек ҳожининг Нормуҳаммад қушбегига юборган чопари Кировчи яқинида унга еткан ва қушбегини тамоми сипоҳлари билан Тошкандга қайтарған эди. Аламзада қушбеги бу сўйинч хабардан учиб-қўниб Азизбекнинг ўрдага қамалишининг учунчи куни карнай-сурнай билан етиб келди. Оломон ёнига қипчоқ сипоҳлари келиб қўшилғандан кейин ўрдага босиб кирдиларда, Азизбекни ушлаб ҳам олдилар.

Етмиш кун бир муддат овора қилиб, минглаб киши қонини тўкишка сабаб бўлған Азизбекни Қўқонга олиб бориб топшириш Нормуҳаммад қушбеги учун қийматли эди. Ул ўрдада ўлтурас экан, бундай улуғ душманни қўлға туширишнинг бош омили бўлған Юсуфбек ҳожига ўз миннатдорчилигини айтиб тутгата олмас, унинг бу хизматини хон билан Мусулмонқулға сўзлаб, унга катта бир мартаба олиб беришка ваъдалар берар эди. Албатта Юсуфбек ҳожига бу ваъдаларнинг ҳеч аҳамияти йўқ, фақат ул ўглининг соғлигини бilsа ва Марғилон зинданидан унинг учун қутқарилишига ваъда олса, унинг учун дунёларча мартаба ва ҳурмат эди. Қушбегининг ваъдасига илтифотсиз қулоқ бориб турди-да:

— Илтифотингиз учун раҳмат, қушбеги, — деди. — Мен энди дунёдан ўтаёзған бир киши: эндиғи мансабларга унча қизиқа олмайман. Агар маним қилған хизматим шундай илтифотларга лойиқ кўриладирган бўлса, хон жанобидан сўрайдирған бир неча тилакларим бор.

— Сўрангиз ҳожи, хон бермаганда ҳам олиб беришка мен кафил.

— Маним биринчи холис тилагим, албатта мазлум халқ тилидан бўладир: мундан сўнг Тошканд ҳокимлиғига ҳар қандай бўлмағир одам қўйилмасин.

— Хон жанобининг ҳамма мақсади ҳам шунда. Чунки,

биз Азизбек кабилардан халқниғина эмас, балки, ўзимизни ҳам қийнатдирмоқдамиз.

Тошканд беклиги тұғрисида күб музокара ва мусолаҳадан<sup>1</sup> кейин Юсуфбек ҳожи ўз яраси устида тұхтади. Үл биринчи мартаба ўлароқ ўзининг ички касалини ҳозиқ<sup>2</sup> деб Нормуҳаммад қүшбегига очди. Сүзлар экан, юраги машъум бир әхтимолнинг даҳшатидан титрар, тиلى ҳам осонлиқ билан ҳаракатланmas әди. Зеро ўзининг бу ўтиңчини қүш учкан сұнг отылмоқчы бўлған сопқон қабилицидан ҳисоблар ва фойдасиз бир илтимос деб чўчир әди.

— Агар маним бу хизматим ҳон жанобининг марҳаматига лойиқ кўрилур экан, — деди ҳожи, — менга энг манзур бўлған мукофот — ўғлимнинг озод қилинишидир. Дунё можаросидан қўл ювмоқчи бўлған бир отага кексайған кунларида фарзанд додини кўрмасликнинг ўзи ҳам улуғ мукофотдир, — деди ва кўзига ёш одди. Бундан қүшбеги ҳам насибасиз қолмай мутаассир<sup>3</sup> Юсуфбек ҳожига тасалло берди:

— Қўрқмангиз ҳожи, — деди, — Марғилон ҳокими үринисиз қон тўкувчи киши эмасдир. Қўқонга боргач, биринчи ишим ўғлингизни қутқариш бўлсин, жойсиз қайғуламангиз, ҳожи.

— Қуллиқ, қүшбеги, агар бу хизматни ўз зимманигизга олур экансиз, устимга катта миннат қўйған бўласиз... Бироқ мен қўрқаманким, сиз Қўқонға бориб еткунча иш вақтидан ўтсин...

Қүшбеги ҳам бу тўғрида ўйлаб қолди ва ҳожининг әхтимолидан чўчиб, шу соатда бир мактуб билан Қўқонга чопар юбормоқчи бўлдилар, бу ишнинг мувофиқ кишиси албатта Ҳасанали бўлғанлиқдан чопар бўлиб белгуланди. Ӯн беш кунлардан берига шундай хизматни кутиб ётқан Ҳасанали отнинг бошини Қўқон томонга қараб қўйди-да, дақиқа ичидаги кўзларга кўринмас бўлиб кетди.

Бир кун кейин Нормуҳаммад қүшбеги ҳам бир мунча сипоҳни Тошкандда қолдириб, Қўқонға жўнаш ҳаракатига тушди. Тошканд оломонининг талаблари билан Азизбекнинг иккиси оёғидан арқон билан боғлаб отнинг човига судратма қилдилар.

<sup>1</sup> Мусаллаҳа — сулҳ тузиш, келишиш.

<sup>2</sup> Ҳозиқ — билувчи, тушунувчи.

<sup>3</sup> Мутаассир — таъсирланган.

Сипоҳлар Қўқонга қараб ҳаракат қилар экан, Қўқон дарбозасига тўлған ҳалқ Азизбекнинг от оёқлари остида сурдалиб кетишига ҳузурланиб томоша қилар эди.

## 22. "БИР ҒАРИБИ БЕЧОРА"

Бу тарихдаги хон ўрдаси Қўқоннинг бу кунда Хода бозор аталған ўрнида эди.<sup>1</sup> Рўмоннинг ўн учуичи фаслида Марғилон ўрдасининг таърифи ёзилганлиқдан ва бу ўрданинг ҳам ташқариги айланаси ўша ўрда қабилидан бир тусда, бир услуб ва бир вусъатда<sup>2</sup> бўлғанлиқдан бу ўринда яна қоғоз қоралаш ортиқчадир. Ўрда дарбозаси, навбатчи қоровул, дарбоза саҳнининг кенглиги — барчаси ҳам ўшал ўрда сингари, аммо бунинг ташқариги кўринишидаги ортиқлиги тўрт бурчида қадалиб тўрган навбатчилари эди. Ўрда дарбозасидан ичкарига кирилгач, бундаги тузилиш Марғилондағидан тамоман деярлик бошқача бўлиб чиқар, шунга биноан бу ер билан танишмоқ эҳтиёжи тушар эди.

Ўрданинг ичкариги ўнг, чап биқинлари сипоҳ туриш учун солинган бинолар ва саҳнида биз Тошкандда кўриб танишқан равишча кийимлик сипоҳлар (йигитлар) турким-турким бўлиб, понсадбошилар қарамоғида қилич уриш машқини таълим олмоқда эдилар. Ўрданинг белидан, яъни шимолдан шарққа қараб бир хатти мустақим билан девор ва бул деворнинг икки тарафини баробар — линг<sup>3</sup> ташланиб, ўрданинг ичкари қисмиға хон саройига кириладирган дарбоза қурилған эди. Бу дарбоза эскиргансумол кўринса ҳам асли яратилишидаги нафислик, месъморий санъаткорлик ўчаёзган бўлса ҳам, бироқ ундаги ивир-живир сирлар, ўйма нақшлар ҳали ҳам кишини ҳайрон қолдиралиқ эдилар. Айниқса дарбозанинг икки биқинидаги "ўғирмагул" тарзи билан ишланган гулдасталар, дарбозаравоқидаги ганҷдан қабартирилиб ясалған бўртма нақшлар, гуллар ҳали ўзларининг нафосатларини унчалик йўқотмаган эдилар. Қуёш гарбга қараб оғқан, гулдасталар устига қўндирилған олтин ҳилол аломатлари қуёш нури

<sup>1</sup> Бу кунги маълум ўрдани Худоёрхон ўзининг иккинчи хонлиқ даврида бино қилдиргандир, эски ўрдадан ҳозир нишона йўқ (муал).

<sup>2</sup> Вусъат — кенглик.

<sup>3</sup> Линг — арқ, равоқ, тоқ.

билан күзни элитарлык даражада яшнар эдилар. Дарбоза-нинг икки ёнидағи махсус ишланған қоровулхона — суфа-чаларда икки нафар навбатчи турар эди. Навбатчидан ўтиб, дарбозага кирилса гүмбаз равишида йўлак, ўнгта юрилса девонхонага, сўлга кетилса хон маҳкамасига чиқиладир-да, маҳкама бўсағасида яна ҳалигиdek икки нафар навбатчига учрашиладир. Марғилон ўрдасида кўрганимиздек бир даҳлиз, аммо бу ўзининг нақшлари, гуллари, анвоғи сирлари, олийлиқ ва кўркамлиги билан Марғилонникини кўлагада қолдирадириқ эди эрса-да, эскирганлиги унииг ортиқлигига халал бермакда эдилар. Даҳлиздан ичкарига қаралса бир мунаққаш ва музайян зол, икки томонида хоннинг шоговулбошилари, ясовулбошилари дастурхончи ва офтобачилари, тунқотар ва парвоначилари оталиқ ва меҳттарбошилари ва таги алла қанча вазир-вузаролари қатор тизилишиб ўлтурмакда эдилар. Золнинг учунчи даричасидан нариғи томон бир юпқа мунаққаш девор билан ажратилган бўлиб, ичкарига кириладирган эшиклиз бир йўл, бу йўл билан ҳалиги девор иккига ажралиб, ҳар бир бўлим деворнинг ўртасида киши боши сифарлиқ бир туйнук, бу туйнуклар ёнида қўлиға ойболта ушлаган икки нафар жаллод қотиб турар эдилар. Шу жаллодлар орасидан ўтиб учунчи бўлимга кирилса, қаршида ярим газлар юксаликда тўрт оёқлиқ оқ мармардан ясалған таҳт устида олтин камарга тақилған олтин соплик қиличини тизаси устига кўндаланг қўйиб, қизил духобадан тикилған пўстун камзул устидан адрас тўн кийган, бошиға симоби шоҳи салла ўраган ўн саккиз ёшлар чамалиқ, чўзиққина юзлик, буғдой ранглик хон ўлтуар эди. Бу Худоёр<sup>1</sup> эди. Хоннинг сўл томонидағи олтин ҳаллик курси кишидан бўш, ўнгдаги — ички саройга кирадирган эшикча ёнидағи курси устида Ўратепа чакмани устидан қайиш камар боғлаб, соддагина қилич тақинған, бошиға оқ барра попоқ кийиб, башарасидаги бурни юзи билан бир қаторда деярлик текис яратилған, ўртача соқол, қисиқ кўз, буғдой ранг, ўрта ёшлиқ бир қирғиз — Мусулмонқул ўлтуар ва ҳозиргина ҳудайчи тарафидан ўзига

<sup>1</sup> Сайийд Мұхаммад Худоёрхон (1829—1879) 1845—1858; 1862; 1863—1875 йилларда Қўқон хони бўлган.

8 -1441

топширилған ариза ва мактублардан очиб ўқур эди. Ўқуб турған аризаси ажамиятсиз бўлса керак қоғозни иккига йиртди-да, оёғининг остиға ташлади ва иккинчи мактубни очди. Буниси Ўш ҳокими тарафидан ёзилған эди:

"Давлатимиз стуни, падари арүс<sup>1</sup> шаҳаншоҳи Мусулмонқул баҳодир ҳузурларига номаи ҳумоюн<sup>2</sup> баробари Ўш мадорисотида таҳсилда бўлинған фақир қирғиз туллобига<sup>3</sup> марҳамат буюрганилари ҳадое<sup>4</sup> туллобининг даражаи илмияларини имтиёзан тақсим қилиндилар. Ашадду<sup>5</sup> фақир ва эҳтиёждада авқоти<sup>6</sup> талх<sup>7</sup> мурурига<sup>8</sup> мажбур ва масбур<sup>9</sup> ўлган қирғиз муллалари падари арүс шаҳаншоҳининг алтоғи<sup>10</sup> шоҳоналаридан риқватка<sup>11</sup> келиб обидийда<sup>12</sup> қилдилар ва ҳактаоло даргоҳи васиъасидан<sup>13</sup> адуби<sup>14</sup> бадкирдорларига<sup>15</sup> зафарёб<sup>16</sup> бўлмоқларини ва Золона<sup>17</sup> яшаб Амир Темур Кўрагондек жаҳонгир бўлмоқларига дуо ва ниёз этдилар. Баъда хотири отир<sup>18</sup> олийларига маҳфий қолмағайким шаҳар ва атроф зулларимиз давлати азимаи қавиялари<sup>19</sup> сояи ҳимоятида нобоб бадъаҳдлар хавотир ва хавфидан тинчdir. Нома охирода ёш шоҳимиз жаноби хоқони хавоқин, сultonи салотин ҳазратларига падари арүс шаҳаншоҳининг па-

1 Падари арүс — қайнота.

2 Ҳумоюн — муборак, қутлуг.

3 Туллоб — талебалар.

4 Ҳадое — ҳадалар, соғалар.

5 Ашадду — ўта, ниҳоятда.

6 Авқот — нақтлар.

7 Талх — аччиқ, ёмон.

8 Мурур — ўтказиш, кечириш.

9 Масбур — сабр қилувчи.

10 Алтоғ — лутфлар, карамлар.

11 Риқват — кўнгил бўшлиқ, кўнгил юмшоқлик.

12 Обидийда — кўз ёши.

13 Васиъа — кенг.

14 Адуб — душман, ёв.

15 Бадкирдор — ёмон ниятли.

16 Зафарёб — галаба қилувчи, голиб.

17 Золона — "Шоҳнома" асаридаги 100 йилдан ортиқ яшаган Зол образига нисбат бериллиб — узоқ вақт яшамоқ мазмунидা.

18 Хотири отир — дили равшан, бегубор.

19 Азимаи қавия — кучли ва қудратли.

ноҳи ҳимоятларида кўб йиллар давру даврон, оғият<sup>1</sup> ва саломатлик тилаб навкарлари..."

Мусулмонқул Худоёрга ўш аҳволини сўзлаб, учунчи мактубни очди, бу мактуб хусусий бир кишидан бўлса керак, муҳр ва ўзга такаллуфлардан холи эди:

"Мазлумлар додиға, мақҳурлар<sup>2</sup> фарёдиға ўзининг адолатлик қиличи билан етишғучи Мусулмонқул қипчоқ хизматларига... кўзларим зулм ёши билан жиқ, кўнглим давлат хоинлари қўрқунчидан титраган бир ҳолда қалам тебратаман. Давлатнинг содиқ бир фуқароси, ихлослик бир йигити давлат устига ўзининг мудҳиш зарбасини ташлаб турған бир бадъаҳд ўғлини ўшандорки отасининг ваколати бирлан иккинчи бир тинч, улуғларга мутеъ, фармонбардор<sup>3</sup> бир шаҳар аҳлини оёғландирмоқ бўлған эди. Уни исботлари, шоҳидлари бирлан дор остига тортқучи содиқ бир қулни кўкларга кўтариши ўрнига қамамоқ ва оёғифа зулм занжирини урмоқ бўладирлар... Мусулмонқул жанобидек бир баҳодирдан андиша қилмай унинг душманларини сарфароз<sup>4</sup> айлаб дўстларини ғамкин қиладирлар".

Мактубнинг туманлик маъносига тушина олмаган Мусулмонқул бу ўринда тўхтади-да, мактубнинг охирига кўз ташлаб олди:

"Бунгача маним ҳаяжон ва қайғу орасида ёзған йўлларимға балки тушунмагандирсиз, бунинг учун ғазабланмай бу гуноҳимни сизга содиқ бир қуллиғим йўлиға кечирурсиз. Бу кундаги Тошканд исендининг бошлиқларидан бўлған Юсуфбек ҳожи Азизбек нонкўрнинг машварати<sup>5</sup> бирлан марғилонлиқларни ҳам жанобингизга қарши оёғландирмоқ мақсадида ўз ўғлини мунда юборған экан. Фақир содиқ қулингиз бу эъвогар йигитнинг теварагига ўз тараффорларини ийғиб қурған бир мажлисларига рост келиб ва унинг Марғилонга нима учун келганлигини пайқаб, ниҳоятсиз ҳавфка тушдим. Унинг сўзлари қипчоқларни

<sup>1</sup> Оғият — тинчлик, омонлик.

<sup>2</sup> Мақҳур — қаҳр-газабга дучор бўлған.

<sup>3</sup> Фармонбардор — бўйруқни бош тошламасдан бажарувчи.

<sup>4</sup> Сарфароз — хурсанд, юксак.

<sup>5</sup> Машварат — кенгаш, маслаҳат.

йўқотиб, ҳукуматни шаҳарликлар қўлиға олиш эди. Қипчоқлар хайриҳоҳи камина қулингиз бу сирни ичимга ютолмай, бир неча воситалар бирлан Марғилон ҳокими Ўтаббойга билдирам. Ўтаббой қушбеги Юсуфек ҳожининг ўғли бўлған мазкур Отабек билан унинг тарафдори ва қайин отаси Мирзакарим отлиқ кишини қўлға олиб зиндан қилди. Қушбегининг чақириши бирлан ҳузурига ҳозир бўлиб, Отабек оғзидан нимаики эшиккан бўлсан бир-бир сўзлаб бердим. Ҳолис шаҳодатим сўнгидан Отабек билан қайин отаси Мирзакаримни қушбеги осиб ўлдиришка буюрди. Аммо Ўтаббойнинг кисаи хиёнатига Мирзакаримнинг ҳавлисидан келиб тушкан бир ҳалта олтинлар баробарига дор остига еткан эъвогарларни ўлимдан озод қилди, давлатнинг содиқ қулларидан бўлған камини ҳолисни муттаҳамлар ерига зиндан қилмоқ ва осиб ўлдиримоқ бўлди. Чунки камина қулингизнинг сизга шикоят қилишимдан бениҳоят қўрқар эрди. Аммо давлатлари ёри бериб, садоқатлик хизматкорларингиздан бўлған Марғилон қўрбошисининг ёрдами бирлан Ўтаббойнинг чангалидан аранг қутилишга муваффақ бўлдим..."

Мактубнинг шу ерига етканда Мусулмонқул хатдан бош кўтарди. Ҳозир унинг кипраксиз қисиқ кўзларида ўтлар ёнмоқда эди. Қичқирди:

— Чилим!

"Шундое қилиб сизнинг ўз кишингиз бўлған Ўтаббой туз ҳақингизни унуди. Бир ҳамён олтин деб душманларингиз тарафига ўтди. Сизнинг хайриҳоҳ қулларингиздан бўлған бири ўз шаҳрини ташлаб Кўқон қочмоқча ва улуғ даргоҳингизга сифинмоқча мажбур бўлди. Мен, ҳолис қулингиз ўзимнинг садоқатим эвазига бундай мукофот олғаним учун қайғирмайман ва лекин Ўтаббой ва Отабек каби хоинларни кундан-кунга куч олиб давлати шаҳриёрига даҳшатлик бир фалокат туғдиришларидан қайғираман. Бу мактуб содиқ бир қулнинг ҳолис садоқатидан бир намунаидир. Мен шунинг ила шояд ўз бўйнимдаги вазифани адо эткан бўлурман. Шояд давлат душманларини ўз оёғларидан ўтишиб<sup>1</sup> кетишларига сабаб бўлған бўлурман.

Ўзимнинг бу хизматим эвазига бир мукофот олиш муддаосида бўлмағанимдан ва нимаики жаноблари йўлида машақкат чеккан бўлсан ўзимнинг бир виждоний вазифам

<sup>1</sup> Йитмоқ — йўқ бўлмоқ.

деб билиб, бу мактубда ўз отимни ёзишга ҳам тиламадим. Ёш хонимизға тинч ва шавкатлик даер, давлат хоинларига ўлим тиляб бир гарibi бечора".

Мусулмонқул ниҳоятда тутоққан эди. Ҳозирги борлиқ аламини тамакудан оладирғандек ҳудайчи келтирған чи-лимгә ёпиши-да, шиғ-ғ этдириб, сархонани синдириш да-ражасига еткүзіб тортди. Оғзидан пага-пага тутун чиқарар экан, хатнинг мазмунини Худоёрға сүзлади. Тош-канд устига юборған сипоҳлари билан Нормұҳаммад қуш-бегини ниҳоят Тошкандин ололмай қайтиш хабарини эши-тиб, сўнг даражада маъюсият ичидә ўлтурған Мусул-монқул учун бу мактуб яра устига туз сепиш қабилидан тағин ҳам аламлик бўлиб тушкан эди.

— Ҳудайчи!

— Лаббай тақсир!

— Мирзани чақир! — деди Мусулмонқул, сўнгра қўлидаги мактубни таҳифа солар экан, Худоёрға деди: — Эшитдингизми, ўглим! Азизбек билан Юсуфбек бизга ни-малар қилмоқчи бўладирлар? Үзимизнинг содиқ кишимиз, деб ўйлаған Ўтаббой ҳам душманларимиз билан биргала-шиб бошлиған... Хайр, қўлларидан келганни қилиб кўр-синлар-чи, биз ҳам мундан кейин ўшандоғ кўрнамаклар билан қиласидирған муомаламизни билармиз.

Ўз салтанатига рахна солишдан иборат бўлған бу хабар-лардан Худоёрхоннинг мутаассир бўлғанлиғи белгусиз, ул бу гапни эшитмасдан илгари қандай бўлса, ҳозирда ҳам шу ҳолда ўзгаришсиз эди. Мусулмонқулнинг ёниб турған, ўтдек тутоқиб сўзлаған гапини сукут билан кечирмаслик учунгина бўлса керак қуруқ ва ширасиз қилиб:

— Ҳаммадан ҳам Ўтаббойни айтингиз, абраҳ бир одам экан, — деди, — мени сийламаганда ҳам сизни риоя қилса керак эди.

— Яхшилиқ қилған кишингдан ҳеч бир яхшилиқ қайт-мас экан, — деди Мусулмонқул. — Жумладан биттаси кўз ўнгимизда — Азизбек. Мен уни ёшлигидан бошлиғ ўз қўлимда ўстирдим, Тошканд ҳокимлигидан Салимсоқбек-ни олиб<sup>1</sup> унинг ўрнига ҳоким тайинладиқ. Бироқ шунчага

<sup>1</sup> Салимсоқбек Шералихоннинг катта ўғли, Худоёрнинг ўгай акасидир. Унинг таҳт даъво қилишидан қўрқиб, Мусулмонқул ўлдирирган эди. Чунки ёш Худоёр хон бўлиб турған фурратда Мусулмонқул ўз билигича иш қиласиб, лоақал Худоёр эсини танигунча давр суро олур эди (муал).

лик яхшилиқларимизга қарши натижада бизга ёғий<sup>1</sup> бўлди, бўлсин: ул Тошкандинг ўзигагина қаноатланмай Марғилон билан ҳам иш қилмоқчи бўлса, бунисини ҳам биз кўрайлик.

Мирзабоши кириб хонга қуллиқ қилди ва Мусулмонқулға қараб қўл боғлади. Мусулмонқул яна хумори бўлған эди — "Чилим!" деб ташқариға қичқириди, сўнгра мирзабошига деди:

— Ҳозир Марғилон ҳокими Ўтаббой қушбегига бир хат ёзиб, чопар билан юбор. Хатни олған замон Юсуфбек ҳожининг ўғли Отабек деганни олиб ҳузуримизга келсин!

Мирзабоши қуллиқ қилиб орқаси билан юриб чиқди.

### 23. МУСУЛМОНҚУЛ

Аркони давлат<sup>2</sup> йигилиб Худоёр тахтига минган, Мусулмонқул ҳон бўлмаса ҳам хонлиқдан-да юқори бир кучка молик бўлған сиёsat курсисига ўлтурган эди. Бошлаб оталиқ кириб хонга салом берди ва унинг ҳақиға узун дуо қилиб чиқди. Оталиқдан сўнг ўзга аъён бирма-бир кириб, дуо қилиб чиқа бошладилар. Дуюхонларнинг энг сўнгтида ҳудайчи кўринди, салом ва дуодан кейин юзини Мусулмонқулға ўгуриб:

— Марғилон ҳокими Ўтаббой қушбеги қузури олийлариға кириш учун изн сўрайдир! — деди.

Ҳамма фикри-зикри Ўтаббой устидагина қолган Мусулмонқул бу хабарни эшлитиш билан кучлик бир тин олиб ҳудайчига қаради:

— Елғиз ўзими ёки ёнида кишилари ҳам борми? — деб сўради.

Ҳудайчи яна бир қуллиқ қилди:

— Ўн чоғлиқ яроғлиқ йигитлари ҳам бор.

— Тағин-чи?

— Яроғсиз яна бир йигит ҳам кўринди.

— Ўтаббойнинг ўзини ҳузуримизга киргиз, — деди Мусулмонқул, қуллиқ қилиб чиқа бошлаган ҳудайчини яна тўхтатиб сўради: — Ўтаббойнинг йигитлари ўрданинг ташқарисидами, ичкарисида?

<sup>1</sup> Ёғий — ёв.

<sup>2</sup> Аркони давлат — давлат арбоблари.

— Тақсир, ичкарисида.

— Яхши, қүшбети бизнинг әнға киргандан сүнг ўрда йигитлари уларга ҳозир бўлсинлар!

Худайчи қуллиқ қилиб чиқди. Унинг кетидан Мусулмонқул товшига музafferият оҳангি бериб хонга деди:

— Ўғриларнинг иккиси қопқонға тушди, хон!

— Толеъмиз.

Қүшбети кирди. Хонга икки букилиб таъзим килғач, келиб унинг қўлини ўпди. Ўтаббойнинг мулоқоти учун Мусулмонқул ҳам гўё қеч нарса кўрмагандек ўрнидан туриб унинг билан қучоқлашиб кўришди. Ўтаббой Мусулмонқулнинг кўрсатиши билан хоннинг чап томонидаги курсига ўлтурдди. Ул Мусулмонқулнинг самимий мулоқотидан қўрқувлиқ юрагини бир қадар тўхтатиб олган эди. Курсидан яна туриб хонга қуллиқ қилиб боз<sup>2</sup> ўлтурдди. Мусулмонқул қүшбетини ер тегидан кузатар экан сўради:

— Юртларнинг тинчлиқми, ўзингиз ҳам соғмисиз?

— Алҳамдуллиллоқ, ёш шоҳимизнинг давлатлари ва ҳусни таважжұллары<sup>3</sup> соясида юртимиз тинчлиқ, фуқаромиз жаноби олийнинг дуюи жонлари билан машғуллар.

Худоёр озғина ишорат билан унга ташаккур билдириди. Бунга қарши қүшбети курсидан қўзғалиб қуллиқ қилди. Мусулмонқул муртини силаб ниманингдир мулоҳазасида эди. Унинг бу ҳоли бирар дақиқага чўзилғанлиқдан Худоёр билаи қүшбети унинг оғзига тикилган эдилар.

— Сизнинг хабарингиз бўлдими, йўқми биз Тошканд устига юборған Нормуҳаммад қүшбетидан жуда ярамас бир хабар олдиқ, — деб Мусулмонқул Ўтаббойга қаради, ундан хабарсизлик жавобини олғач, сўзида давом этти, — Нормуҳаммад қүшбети уч минг сипоҳ билан етмиш кун Тошкандни қамаб ётиб, ниҳоят бир иш чиқара олмай одамлари билан қайтмоққа мажбур бўлибдир. Азизбек билан Юсуфбек ҳожиларнинг азтаҳидил қаршилиқлари бизнинг кишиларни қуруқ қайтишга мажбур қилибдир. Мана шунинг учун мундан кейин бизнинг бошқа бир йўл билан иш кўрмагимиз тақозо қиласадир... Кеча биз кимдандир Юсуфбек ҳожининг ўғли бўлған Отабек деганини сизнинг Марғилонда деб эшилдик. Мундан сўнгги Тошканд

1 Мулоқот — учрашиш, қўришиш.

2 Боз — яна.

3 Таважжұх — юзланиш, хайриҳоҳона қарам, гамхўрлик.

тўғрисида кўрадирган тадбирларимиз учун унинг кераги бўлур, деб ўйлаб сиз билан бирга уни ҳузуримизга чақирган эдик... — Бу жойда қушбеги Мусулмонқулни тўхтатди-да, кулди, сўнгра Худоёрға деди:

— Отабек устида анча можаролар бўлиб ўтди. Бунинг қикояси узун, алҳол мингбошининг раъйларини эшитайлик... давом қилингиз-чи.

— Отабек ўзингиз билан биргами? — деб сўради Мусулмонқул, биргалик жавобини олиб, тамом хотиржамъ бўлған ҳолда давом этти: — Юқорида айтканимдек минбаъд<sup>1</sup> тадбир йўли билан Азизбекни йўқотишдан бошқа чорамиз йўқдир. Бизнинг бу кейинги режамиз йўлида иш берадирган киши бўлса ул ҳам менга қолса шу Отабек бўлур. Чунки бошқаларга қараганда унинг Тошканд бориши ва Азизбекнинг яқин одамининг ўғли бўлгани учун унинг билан алоқада бўлиши, заҳар бериш ва ё бошқача бир йўл билан уни орадан кўтара олиши, унга энг қулай бир ишдир. Оғриқнинг тузаласи келса эмчи ўз оёғи билан келур, деганларидек, Отабекни Марғилонда бўлиш хабарини эшитиб хон билан мен жуда қувонишидик... Мана сизни чақиришдан бўлған мақсадимиз шудир. Яна сизнинг бу ҳақдаги раъингиз нима бўлса эшитамиз.

Мусулмонқулнинг бу сўзларига Ўтаббой қушбеги тамом ишонған, аммо Худоёр эрса унинг илгариги мақсадини яхши билғанлиқдан бу сўнгғи гаплар билан ниҳоятда тараддудга тушкан эди. Тўғриси ҳам Мусулмонқулнинг бу кейинги гапи кишини мутарафдид<sup>2</sup> қўлмай қўймас эди.

— Бу фикрингиз манимча ҳам маъқул, — деди қушбеги, — аммо бунда бир гап бор, ул ҳам: Отабек бу вазифани ўз бўйнига оладими, йўқми масаласидир. Чунки Отабекнинг Азизбек тарафдори бўлғанлигига шу ўртада ўзим текширган бир иш мени шубҳага тушурадир. Шундогки, мундан йигирма беш кунлар илгари, қўрбошимнинг хабар бериши билан Азизбек тарафидан Марғилонда тўполон чиқарғали келгандир, деб ўйлаб, ёнидаги бир неча кишилари билан зинданга солдирдим. Унинг Юсуфбек ҳожининг ўғли бўлиши ҳам ўша мулоҳазамнинг тўғрилигига мени ишонтирас эди. Яна қўрбошига Отабек устидан ши-

<sup>1</sup> Минбаъд — бундан кейин.

<sup>2</sup> Мутарафдид — ўйланниб қолмоқ, иккиланмоқ.

коят қылғучининг шаҳодати билан бу шубҳамга ишониб, мундан беш кун илгари Отабек билан унинг қайин отаси Мирзакарим деган маргилонлиқни ўлим жазосига ҳукм қилдим. Гуноҳкорларни дор остига олиб кетканларига бир мунча фурсат ўткан эди, маҳкамага бир хотин ҳозир бўлиб, қўлимга бир мактуб берди. Ўқуб қарасам, Азизбек Тошкандда Қўқонға қарши исён чиқармоқчи бўлиб юрган фурсатда Юсуфбек ҳожи томонидан ўғли Отабекка ёзилған бир мактуб бўлиб маним қўл, оёғимни бўшаширди. Чунки бу мактуб Юсуфбек ҳожининг Азизбекка тамоман қарши бир киши бўлғанилигини онглатар эди. Гуноҳкорларни дор остидан қайтаришга мажбур бўлдим. Мен фақат шу мактуб далолатига бовар қилиб, гуноҳкорларни бўшата бермай, қўлимдан келганча яна текшириб тергадим. Отабекнинг сўзлари кишини тамом ишонтиарлиқ даражада мактубга мувофиқ эди. Шундоғ бўлса ҳам фақат Мирзакаримни озод қилиб, кейинги тергашлар тамом бўлғунчалиқ Отабекни кафилга бердим. Ўзининг бирар адовати учун бундай гапларни қўзғатиб юрган бўлмасин, деб ҳалиги менга шаҳодатниятни ушлаб Отабек ва бошқалар билан юзлаширмоқчи бўлғанимда нима сабабдандир ул қочди. Шу кунгача уни топиб бўлмади. Мунинг қочиши гарчи бу шаҳодатниятни бирар адоват юзасидан бўлған сиъоят<sup>1</sup> эканини онглатар эди эрса ҳам мен яна ҳануз Отабекни кафолатда сақлар эдимки, жаноби олийдан бу хабар етди. Дарҳол Отабекни йигитлардан ўратиб саодатхонаи шаҳаншоҳига жўнадим. Отабекнинг Марғилон можароси шундан иборат бўлиб, манимча Отабек устида ҳали шундай тергавлар бораёткан бир вақтда унга бундоғ жавобгарлик вазифани топшириш қалай бўларикин, дейман..:

Мусулмонқулдек маккор тулкининг ўйлаганларини қушбегининг тўғри сўзлари ост-уст қилиб, Ўтаббой тўғрисидағи сиғанлари бир мунча озайиб тушди. Аммо Мусулмонқулнинг икки киши устига йўналган қаҳру газаби ўзининг борлиқ даҳшати билан фақат Отабек устига тикилди ва Тошканд қўргонлари остида қурбон бўлган сипоҳларининг қонини Азизбекнинг ўнг қўли бўлғанинг ўғлидан олмоқчи бўлди.

<sup>1</sup> Сиъоят — чақимчиллик.

— Юсуфбек ҳожининг мактуби ёнингиздадир?

— Тақсир, — деди қүшбеги, мактубни олиб Мусулмонқулга узатди. Мусулмонқул ўнда-сўнда мактубка кўз югуртириб чиқди-да, заҳарханда ичиди Ўтаббойга қаради:

— Юсуфбек ҳожининг қурған ҳийлаларига тушинимагу-чи эҳтимол Марғилондан топилмағандир! У тулки ўз ўғлини Марғилонда тўполон чиқариш учун, деб юбориши-даёқ ҳар бир эҳтимолга қарши бу мактубни ёзиб берган, бунга Марғилон калваклари тушинимасалар ҳам биз туши-на оламиз! — деди ва мағрур бир тусда Худоёрға қараб қўйди. Қүшбеги унинг бу истеҳзосини ютишка мажбур эди. Чунки озғина тилдан тойса ўзининг ҳам Отабек қаторига киритилишини яхши онглар эди. Сукут қилди:

— Ҳудайчи!

— Қулингиз!

— Ҳалиги қүшбеги билан бирга келган йигитни ҳузуримизга ҳозирла!

Мусулмонқулнинг апти ортиқ даҳшатлик бир ҳолга кирган, тахт устига қўндирилған жонлик Худоёр ҳайкал ҳам сукутда, ўзининг нима бўлишига тушинимаган Ўтаббой ҳам борлиқ, йўқлиқ ҳолатда...

Отабек ҳудайчи орқасидан кириб хонға таъзим қилди ва қўл боғлаб тўхтади. Отабек Мусулмонқул отини, унинг йиртқичлигини яхши билса ҳам, аммо шахсан ўзини кўрмаган, шунинг учун хоннинг ёнидағи хоқонға илтифот этмади. Унинг бу илтифотсилиги Мусулмонқулга асарсиз қолмади-да, аччиги устига аччиг, кек устига кек қўшилди ва шулар ичиди ясалиб чиқған бир истеҳзо илжайиши ва бир товуш билан:

— Манга қаранг, бек йигит, — деди. Отабек ўзига қа-рагач: — Сиз ким бўласиз? — деб сўради. Ул ҳануз бояги масхара ҳолатда эди.

— Мен Отабек.

— Дунёда Отабекдан кўпи борми, сиз қандай Отабек?

— Отабек Юсуфбек ҳожи ўғли.

— Ҳа-а-а, шундог денг-чи... Тошкандлик Юсуфбек ҳожиким, Азизбегимизнинг гумаштаси бўлған зоти шарифнинг ўтиллари?

Отабек бу чўлтоқ супургини таниди ва унинг ис-теҳзоларини пайқади. Ул бундан сўнгти кўргулигини та-мом маъноси билан онглаб, маъносиз бу саволларга жавоб бериб ўлтуришдан сукутни хайрлик топди. Гўё ўзининг бу сукути билан Мусулмонқулга маънолик бир жавобниifo-

да қилар эди. Чиндаи ҳам Мусулмонқул бу сукутдан таҳқирланди, тутуни кўкка кўтарилар экан бақирди:

— Нега жавоб бермайсан??

— Сиз мени қандай таниған бўлсангиз-бўлингиз, мен ўшандог кишининг ўғли, — деди бек. — Мен билан отам сиз билан қушбегига бир неча турлик бўлиб танилсақ-да, ўз виждонимиз олдида бир турликинадирмиз! Шунинг учун сиз тилаган тарафингизга ҳукм қилингиз-да, буй-руғингизни бераверингиз!

Мусулмонқулнинг юзидағи бояғи аччиғлар ерини бир завқланиш вазияти олди. Кулимсираш ичидা Отабекни кузатар экан:

— Дав юрагинг бор экан, йигит... Ҳайфки, гуноҳинг бўйнингда<sup>1</sup>, — деди ва чақирди: — Жаллод!

Эшик ёнида кутиб турган ойболталиқлар ҳаракатландилар:

— Ханжаримиз қонсираган!

Жаллодларнинг олдида кирган ҳудайчи хонға арз қилди:

— Тошкандан бир чопар бор, ҳузурингизга кириш учун изн сўрайдир!

Худоёр Мусулмонқулға қаради. Мусулмонқул эрса Отабекни жаллодга топшириш учун ўнгланған тилини қисишига мажбур бўлди. — Кирсин! — деди ва ўзидан амр кутиб турган жаллодларга: — Бир оздан сўнг, — деди, чиқиб турмоққа ишорат қилди. Негаки, чопарнинг Тошкандан бўлиши бу ҳукмда бир оз шошмаслиқни истар, чопар воситаси билан ҳам бу ҳукм эҳтимол ҳақлик бир ҳукм бўлиб чиқар ва Мусулмонқул ҳам лоақал ўз умрида бир мартаба бўлса-да, ўринлик қон тўйкан бўлар эди.

Отабек гарангсигансумон деворга суюнған, мундаги аллақандай маъноларни онглатқан тахт, тоҷ, хон, бек каби лаш-лушлар унинг кўз ўнгида қора пуллик қадру қийматлизис... Тўгриси ул ажиб бир табиъатка кирган, унинг вужуди қуруқ ва ҳиссиз... Йўқ, ул сезса-да, билса-да, гўё

<sup>1</sup> Мусулмонқулнинг ўзи ҳам фавқулодда юраклик эди. 1853 м. тарихида Мусулмонқул қўқонилларга асир тушиб, уни тўпдан отиб ўлдириш учун дордек бир нарсанинг устига ўткузалар. Иккинчи томондан тўпка ўт бериш кутиладир. Шу вақтда кишилар Мусулмонқулдан сўрайдилар: "Энди қалайсан, чўлоқ?" Мусулмонқул кулибкина жавоб берадир: "Алҳамдуиллоҳ, ҳали ҳам сизлардан юқори бир ерда ўлтурибман!" (Муал).

оёг, құли боғланиб бүгизланишға ҳозирланған бир қүй каби қайралаётқан пичоққа бутунлай парвосиз, құрқувсиз томоша қилар зди. Бу турмиш, бу ҳокимият, чеки күрінмаган бу қоронғилиқ... унинг учун сира қизиқарлық эмаслар: ул йүқ зди — тинч зди, ул келди — тинчимади, ул яна йүқ бўлса эҳтимол яна тинчир зди. Мана шунинг учун ҳам ул безрайган зди. Фақат... фақат шу турмишдаги биравгина унинг кўнглидан тезроқ ювилмас ва ювилиши ҳам қийинде... Ниҳоят бундан ҳам қуттилғандек бўлди. Аммо... сўнг нафасида унинг билан видоълашса, бўғозига ханжар ботар экан, унинг ўзига қарабқина кўзи нурсизланса... Унинг ҳамма орзуси шу зди ҳозир.

Ҳудайчи чопарни бошлаб кирди. Чопар номани тиз букиб Худоёрға топширгач, орқасига қайтиб, кўзини девордаги безрайганга ташламасунми... Ул ўзининг хон ҳузурида бўлғанини ҳам унуди-да, ўзини Отабек устига ташлади, Тошканд чопарининг бу куттилмаган ҳаракати хонни, Мусулмонқулни, қушбеги ҳам ҳудайчини ва олдинги золда ўлтурган аъённи бир ҳайратда қолдирған зди. Отабекнинг тасалло бериши билан Ҳасанали ундан қўл тортди эрса-да, бироқ ундан ҳаяжон, йиги ҳали аримаган зди.

— Адаб! — деб қичқирди Мусулмонқул, сўнгра ўзига қараб қўл боғлаган Ҳасаналидан сўради, — сен кимнинг чопари?

— Нормуҳаммад қушбегининг.

— Қаердан?

— Тошкандан, тақсир.

Мусулмонқул таажжуб ичидага ўзига Худоёр томонидан узатиљиган номани олди. Очиб киши эшитарлик қилиб ўқуди:

“Еш хонимизға ва падари арас شاҳаншоҳи Мусулмонқул баҳодир ҳузурларига. Еш шоҳимизнинг баҳт ва толеълари руҳсиз танларимизга қайта бошдан руҳ, маъюс кўнгилларимизга қайтиб чиқмаслиқ умид бағишилади. Фақир қуллари мундан тўрт кунлар илгари Тошкандан сипоҳлар билан умидсиз қайтишиға мажбур бўлиб, ул тўғрида ҳузурларига хабар ҳам юборған здим. Шу ҳолда биз сипоҳлар билан Кировчи яқинига еткан ҳам здик, орқамиздан бир чопар етиб Тошканда Азизбекка қарши исён бошланғанини, бизни кўмак учун Юсуфбек ҳожининг Тошкандага чақирғанлигини сўзлаб, унинг исмидан бир мактуб берди. Мен дарҳол сипоҳларни Тошканд қайтишиға буюордим-да, хабар олғани иккинчи куни Тошкандага етдим.

Биз Тошкандга киргандыа Юсуфбек ҳожи бошлиқ оломон Азизбекни ўрда ичига қамаб ётар эканлар. Оломон, айниқса Юсуфбек ҳожи бизни жуда яхши қаршиладилар. Биз борғандан кейин ўрдага босиб кирдик-да, Азизбекни ушлаб олдиқ. Башда мен Юсуфбек ҳожини балки, Тошканд беклиги учун таъмаланур деб ўйлаған әдим. Аммо унинг бутун ўрда ва хазина, ашё ва яроқларини маним қўлумга топшириши бу фикримни бўшка чиқарди. Юсуфбек ҳожи ниҳоятда таъмасиз, ҳалқ манфаатини кузаткучи бир одам экан. Биноан алайҳи<sup>1</sup> унинг тўғрисидағи бизнинг сун занларимиз<sup>2</sup> хато бўлиб чиқадир. Унинг Азизбекка қарши ҳалқни оёғландириши ҳам бизнинг Тошкандан жўнашимизнинг иккинчи куни Азизбекнинг нечоғлиқ сиқилған ҳалқ устига ўттуз икки тангадан чочкан соғлиғи бўлибдир. Тошканд ҳалқи Азизбекнинг ҳийласига алданиб, бизга ёғийлиқ қилғани учун пушаймон ва унинг зулмидан қутилғани важдан хурсанддир.

Мен Юсуфбек ҳожининг бунчалик катта хизмати эвазига, хон ҳазратидан улуғ бир мартаба олиб беришка ваъда берган әдим, ул бунга қарши узр айттиб, Тошкандга инсофлик бир бек белгуланса, маним учун кифоя, деди. Унинг хон жанобидан куткан бир марҳамати бор эканким, шу яқинда савдо билан Марғилонда юрган ёлғиз ўғлини номаълум бир сабаб ила Ўтаббой қушбегининг қамаганлигини эшишибдир. Унинг бу хизматини бираар мукофотка арзигулук кўрсалар, ўшал қамоқда бўлған ўғлини озод этмак учун хон ҳазратларининг қиласидирған иноятлари ҳар бир нарсадан ҳам унга азизроқ бир мукофот бўлур. Фақир қулингизча ҳам Юсуфбек ҳожининг давлатимиз устига, қўйған бу миннати кичкина гап эмасдир. Биноан алайҳи унинг ўғли гарчи ўлим жазосига сазовор бўлса ҳам, марҳамати шоҳонанинг жўшға келтириши билан навкарларича ҳам мувофиқ кўриладир. Вақтинча Тошканд беклигига Қўшдодҳони белгулаб, ёнига бир мунча сипоҳлар бердим. Ўзим Азизбекни олиб тезда хизматларига юрсам керак, Нормуҳаммад қушбеги, муҳр".

Мусулмонқул мактубни тутатди-да, уятсиз равишда Отабекка қараб илжайди ва ҳудайчига буюрди.

<sup>1</sup> Биноан алайҳи — шунга биноан.

<sup>2</sup> Сун зан — гумон, тахмин, шубҳа.

— Иккита заррин түн келтир!

Отабекнинг мўъжиза қабилидан сўнг дақиқаларида иккинчи қайта қутилишини кўрган Ўтаббой қушбеги беихтиёр ёқасини ушлади. Худоёрхон ҳам йиртқич қайнин отасининг чангалидан қутилғанини табрик қилгандек Отабекка кулиб боқди.

Мусулмонқул оқсоқланиб, ўз қўли билан Отабекка заррин түн кийгузар экан:

— Отангизнинг катта хизмати соясида ўлимдан қутилғанингиздек заррин тўнлиқ ҳам бўлдингиз, — деб яна бир қайта уятсизланди.

Тагин бир неча кун туриб қайтмоқ учун Отабек Марғилонга, Ҳасанали ота Юсуфбек ҳожини тинчитиш учун Тошкандга жўнадилар.

(Биринчи бўлимнинг сўнгиги)

Рўмон, деб сизга тақдим қилинган бу нарса дунёга келиши биланоқ баҳтсизликка учрай бошлиған эди: беш йиллаб босила олмай ётди. Ниҳоят бу күн босилиш мұяссар бўлғанида ҳам турлиқ зарабаларга учради; имлоғи уч-тўртта имлочиликимиз томонидан тузатилиб (!) ажойиб бир қуроқ ҳолига келди, мұсаҳҳиҳларимизнинг мусоҳалалари<sup>2</sup> орқасида техника жиҳати кўз кўриб қулоқ эшишмаган бир йўсунда чиқди. Буларнинг сабаби босилиши чоғида ўзимнинг ҳозир бўла олмағанигум бўлди. Аммо бу ўринда ўзимнинг жаҳолатим тўғрисида айтиб туришини лозим кўрмайман-да, фақат ўқуғучиларнинг афвларини сўрайман.

Рўмоннинг иккинчи бўлимини бундай хатолардан соғ бўла олишига ваъда бери олмасам-да, аммо босилиши тақдиди ношир қўлида бўлғанигини билдириб қўяман.

Абдулла

<sup>1</sup> Рўмоннинг биринчи ва иккинчи бўлими 1925 йилда, учунчи бўлими 1926 йилда алоқида муқоваларда нашр этилиб, ушбу узрнома 1925 йилда чиққан биринчи бўлимига илова қилинган эди. Бу бўлим 1926 йилда қайта нашр этилади. Қўлингиздаги китобга биринчи бўлимнинг 1926 йилдаги қайта нашрини олдик.

<sup>2</sup> Мусоҳала — бенарво, беътибор қараш.

\* \* \*

Азизбек Тошканнан жүннатилди. Унинг ерига Құқондан Нормұҳаммад қүшбеги белгуланиб келди.

Азизбекни құлға тушириб бериш билан қипчоқлар назда ҳам Юсуфбек қожининг қадру қиймати юқори-ланған эди. Аммо ўзининг мансаб сүймаслиги важқидан яна эскича "Юсуфбек қожи" бўлиб қола берди. Шунинг билан бирга Азизбек ёнида қандай мавқиъ туткан бўлса, Нормұҳаммад қүшбеги олдида ундан ҳам юқорироқ ва маънолироқ эътибор қозонди. Унинг ҳар бир раъйига Нормұҳаммад қүшбеги қонунан мажбур бўлмаса-да, аммо маънан бир мажбурият ҳис этар эди: ўринсизга киши ўлдиришлар, вақтсиз ҳам ўринсиз солиқ солишлар, беҳуда ўрда исрофтлари, бўлмагур тақиқлар ва ортиқча диний тақаллуфотлар бир мунча эбка олиндилар.

Уч йиллаб Азизбек истибодидаги эзилган Тошканд халқи эркин нафас олди: савдо-сотиқ, әкін-тиқин ва касбикор күтарилиб бошлади. Одамлар жонланғандек бўлиб бу ҳолни:

"Замон-замон дориламон,  
Нормат тўрам бўлсин эсон!" —

деб бошлиған уларнинг ашуаллари ҳам ифода қиласар эди.<sup>1</sup>

<sup>1</sup> Нормұҳаммад қүшбегининг Тошканнадаги беклик даври тахминан 1270дан 73 йил ғижрайтагадир. Замона бекларининг ҳүшеррөгидир. Отам хон замонларida ўзи кўриб кечирган ўйлаб беклар ичидан шу Нормұҳаммадни чиқариб: "Юртни тиіч тутти, кўб яхши одам эди, худо раҳмати" деб қўяр эди (муал.).

## I. ОТА-ОНА ОРЗУСИ

Ўзбек ойим элли беш ёшлар чамалиқ, чала-думбул табиъатлик бир хотин бўлса ҳам, аммо эрига ўткирлиги билан машҳур эди. Унинг ўткирлиги ёлгиз эригагина эмас, Тошканд хотинларниға ҳам ом эди. Ўзга хотинлар унинг соясига салом бериб тўйларида, азаларида, қисқаси тиқ эткан йигинларидаги уйларининг тўрини Ўзбек ойимга атаған эдилар. Бир бугина эмас, қиз чиқаратурған, ўгул уйлантирадирған, суннат тўйи қиласидирған хотинлар ўз тўйларини Ўзбек ойим кенгашидан ташқари жўната олмас эдилар. Ўзбек ойим аралашқан тўйлик хотинларнинг кўнгилларидаги орзу-ҳаваслари ҳам эрлари томонидан камчиликсиз бажарилар, чунки "Ўзбек ойим шундоғ буюрдилар" деган сўз эрлар учун ҳам фарз каби эшитилиб, Ўзбек ойимнинг айтканича ҳозирлик кўрила бошланар эди. Бу томондан қарағанда Ўзбек ойимнинг ўткирлиги эрлар томонидан ҳам тасдиқ этилганлигини иқор қилишга тўғри келадир.

Ўзбек ойим унча-мунча тўю азаларга "кавшим кўчада қслған эмас" деб бормас эди. Шунинг учун хотинлар ўз тўйларини Ўзбек ойим иштироки билан ўтказиб олсалар, ўзларини шаҳарнинг энг баҳтлик хотинларидан санаб "манинг тўйимни бек ойим ўз қўллари билан ўтказдилар" деган жумлани мажлисларда ифтихор ўрнида сўзлаб юрар эдилар. Ўзбек ойимнинг обрўси ёлгиз шулар билангина чекланиб қолмас, уни ўрда хонимлари ҳам эҳтиром қилиб ўзларининг "онахонлари" деб билар эдилар. Шунга кўра қайси бир вақтларда ўрда ясовуллари Юсуфбек ҳожининг эшигига арава кўндаланг қилиб "ўрда беги ойим буюрдилар" деб Ўзбек ойимнинг ясануб чиқишини кутар эдилар. Бу томон билан қайси бир мажлисларда Ўзбек ойим хотинларнинг эсларини ҳам чиқариб юборар эди: "Кеча ўрда бек ойимдан менга арава келган экан феълим айнаб турған эди, бормай аравани бўш қайтардим... Бо худо, ўрда бескачи бўлса ўзига, дедим" дер эди. Иккинчи вақтда: "Ўткан кун ўрдага борған эдим: хонимлар ётиб қоласиз деб қўймадилар, ноилож бир кечада ётиб келдим" деб сўз орасига қистириб кетар эди. Бу сўзларни эшиткучи хотинлар ўзларининг қандоғ бир хотиннинг суқбатига ноил бўлғанларини ўйлаб, Ўзбек ойимнинг эҳтиромини тағин ҳам кучайтирас эдилар.

Ул ўз уйида ўлтурғанида ҳам устидаги атлас кўйнак

билин адрес мурсакни, оқ шоҳи дакана билан қаҳрабо тасбиҳни қўймай, қиши кунлари танчада пар ёстиққа сувалиб, ёз кунлари айвоннинг тўрига ёсланиб Ҳасаналининг хотини бўлған Ойбодоқقا, чўри қиз Ҳанифага хамирни ачитмасликни, паловни қирмоҷ олдирмаслиқни танибҳиљабкина ўлтуар эди.

Отабекнинг Марғилондан уйланиб қўйиши отаси учун унча ризосизликка мужиб<sup>1</sup> бўлмаса ҳам, аммо унинг ўгул тўйисидан боштаб, Тошканд қизларини ост-уст қилиб у "бунинг қизи яхши бўлса ҳам, уй-жойлари ярамас экан; бунинг уй-жойлари тузик бўлса ҳам, қизи кўрксиз экан; бунинг қизи-да, уй-жойлари-да тузик, бироқ зоти пас экан" деб қиз, қуда, уй, жой, насл ва насаб текшириб юргучи Ўзбек ойимнинг Отабекни уйландириб бунинг орқасидан кўратурган орзу-ҳавас, тўю томошаларини шартта кесиб қўйған бу уйланишка нима дейиши ва қандай қараши албатта маълум эди. Битти-битти ўғли Марғилон деган жойда, аллакимларнинг қўлида, асли номаълум кишиларнинг қизига уйлансин-да, бу кун-эрта ўғлумнинг орзу-ҳавасини кўраман, деб энтишиб ўлтурган ва ўгул боқиб катта қилған она — Ўзбек ойим икки қўлинин бурнига тиқиб қараб қолаберсин...

Бу хабарни Ҳасаналидан эшиткан кунлари ул бу ишка чидаб туролмади: "Энди менга мундоғ ўгул керак эмас... Оқ сутимни оққа, кўк сутимни кўкка соғдим..." Энди Тошкандга келмасин ул ўзбошимча бетиюқ!" деб бақириб-чақириб, йиглаб-сихтаб, дарду ҳасратни бошига кийиб олди. Орадан ўн беш кун ўтар-ўтмас Марғилондан Отабек келди. Уч ойлаб кўрмаган ўглини қучогига олиб кўришмак ўрнига ундан юзини ўгуриб, сам кимсан, келдинг-ми, деб сўрамади ва саломига алиқ ҳам олмади. Гўё ухламоқчи бўлған товукдек ҳурпайиб олди. Отабек онаси-нинг аразига алла қачон тушунганд, ҳам шу ҳолни Марғилондаёқ куткан эди. Бир-икки қайта узр айтиб кўргандан сўнг Ўзбек ойимнинг эпақага келишига ишонмай қолди ва шунинг учун ул ҳам гўё билмаган, тушунмаган кишидек юруй берди.

Турған гап, Отабекнинг Марғилонга узоқ бормай турushi мумкин эмас эди. Ўртадан икки ҳафта ўтар-ўтмас

<sup>1</sup> Мужиб — сабаб.

отасиға аллақандай баҳона күрсатиб, йўл ҳозирлигини кўра бошлайдир ва онасиға билдирмаёқ Марғилон жўнайдир. Ўзбек ойим ўғлининг "ўлганни устига чиқиб тепиш" қабилидан бўлған бу ҳаракатидан тутуни кўкка чиқиб, борлиқ қаҳру ғазабини эри устига тўқадир: "Сиз қариб эсингизни сб қолибсиз, ўғлингизни марғилонлиқга топшириб қўйиб, яна эл ичида бошингизни кўтариб юрмакчи бўласизми?.." дейдир.

Юсуфбек ҳожининг қизиқ бир табиъати бор: хотини билангина эмас умуман уй ичиси билан ҳар қандай ма-салса устида бўлса бўлсин узоқ сўзлашиб ўлтурмайдир. Отабекми, онасими, Ҳасаналими, ишқилиб уй ичидан би-рартасининг сўзлари ва ё кенгашлари бўлса, келиб ҳожининг юзига қарамасдан сўзлай берадирлар; мақсад айтиб биткандан сўнг секингина кўтарилиб унинг юзига қарайдирлар. Ҳожи бир неча вақт сўзлағучини ўз оғзиға тикилтириб ўлтурғандан сўнг, агар маъқул тушса "хўб" дейдир, гапка тушунмаган бўлса "хўш" дейдир, номаъқул бўлса "дуруст эмас" дейдир ва жуда ҳам ўзига номаъқул гап бўлса бир илжайиб қўйиш билан кифояланиб, мундан бошқа сўз айтмайдир ва айтса ҳам уч-тўрт калимадан нарига ошмайдир. Уй ичи унинг бу феълига жуда яхши тушунганикларидан кўпинча бир оғиз жавоб олиш билан кифояланадирлар. Аммо Отабек билан бирар тўғрида сўзлашмакчи бўлса, уни аксар меҳмонхонага чақириб ёки чақиритириб оладир. Ўзбек ойим юқоридаги ўзининг итоб<sup>1</sup> ва хитобига эридан бир илжайиб қўйиш жавобини олиб дами ичига тушадир ва чор-ночор ўттуз кунлаб бир замонни ўзича марғилонлиқни қарғаш билан кечирадир. Отабек Тошкандга қайтиб келиб, "энди араз битканdir" деган ўйда онасиға салом берадир. Араз битиш қаерда, Ўзбек ойимнинг ўғлига қарши кинаси тагин бир неча қат ортқан, аммо бу гал салом бергучига бир қарайдир-да, "ўғлим, менга салом бериб нима қиласан, марғилонлик онангнинг дуосини ол!" деб юзини четка ўгурадир. Ул онасининг бу киноясини кулгулик билан кечириб, яна эскича аразда қолаберадирлар. Отабек яна ўн беш кунни ўтказиб, тагин бир нозик сабабни ўртаға ташлаб онасиғнинг руҳсатисиз Марғилонга жўнаб соладир. Тагин Ўзбек

<sup>1</sup> Итоб — таъна, маломат.

оиймнинг ранги ўчкан, қони қочқан; товоқни косага, чўмични пислага уриб доди фарёд: "Сиз отамисиз, нимасиз ахир, ўғлингизни тийиб олиш сира эсингизга келадими? Ўғлингизнинг бу иши бечиз эмас: марғилонлиқ сиҳр қилдими, жоду қилдими ҳайтовур сиз шу йўсунда юруй берсангиз эрта-индин ўғулдан ажраласиз. Бу калвак ўғлингиз марғилонлиқнинг эшигига қул бўлиб ётиб оладир..." Аммо Юсуфбек ҳожи хотинининг сўзини бу гал ҳам эламайдир, фақат "Қўябер, хотин, ўзи соғ бўлса, бир кун эсини топар", деб қўядир. Бир ярим ойлар вақтни Марғилонда ўтказиб, тагин Отабек Тошкандга келадир. Тагин она-бола ораларида кина-кудурат... Тагин араз... Ўн беш кун ўтмасдан яна Андижон сафари, яна Ўзбек ойимнинг фиғони фалакка... Марғилонлиқнинг сиҳрчи-жодучисига ўлим тилаш; мени ўғлимдан ажратса ўзи ҳам суйганидан ажрасин, қарғиш...

Ниҳоят орадан бир йил чамаси вақт ўтиб Марғилонга қатнаш етти-саккизга еткач, Ўзбек ойимнинг гиди-гидиси билан бўлса керак Юсуфбек ҳожида ҳам бир ўзгариш кўрила бошлайдир. Хотинининг: "Ўғул ўсдиришни, ўгул тийишини билмайсиз" деб шилталашига: "Нима қил, дейсан энди?" деб сўрайдир.

— Биз Отабекни Тошканддан уйландириб бошини боғламасгъ, кун сайин унинг Марғилон югуришидан қутила олмасмиз. Тошканддан уйланса сув қуйғандек тинарқолар; Марғилон балосини эсидан ҳам чиқарар... — дейдир Ўзбек ойим. Яъни ҳамиша юрагини шопиртириб, миясини машғул қилған муддаони айтиб солиш фурсатини қочирмайдир.

— Ўғлинг қайтсан-чи, бўлмаса...

Эрининг бу сўзига Ўзбек ойим ортиқча қизишадир, лаби-лабига тегмай бобиллаб берадир:

— Сиз шу кунгача барча ихтиёрни ўғлингизга топшириб, болани бола қилмадингиз, бир худбин қилдингиз... Ўгул ўсдириш бу турда бўлмас; ул тиласин-тиламасин шартта-шартта тилаганингизча қилингиз-да, қараб тураберингиз. Сиз ўзингизнинг шу "ўғлинг билар" деган гапингиз билан қанча яхши жойлардан қолиб, ниҳоят марғилонлиқ балосига йўлиқдингиз... Эндики ихтиёр манда: ул келгунча бир яхши жойга унашайин-да, келгандан сўнг тўйни ҳам жўнатиб юборайлиқ!

— Туратур-чи...

Ҳожининг бунчалик бўш келиши Ўзбек ойимга қанот -

қүйруқ бергандек бўлди ва мундан сўнг тиниб-тинчиб туролмади. Шу гапнинг иқкинчи куни Ҳасаналини қўярда-қўймай арава қўшдириб шаҳарнинг тўрт томонига қиз кўриш учун юриб кетди. Маргилонлиқ келиннинг таърифини Ҳасаналидан кўб эшиктан эди. Отабекнинг кўнглини ўша гўзат маргилонлиқдан совитиш йўлида ундан ҳам кўхлик, ундан ҳам сулук қиз топиш кўйига тушди. Шунга кўра унга унча-мунча қиз сўмай, шаҳардаги кўб эшикларни санаашга тўғри келди. Еттинчи мартаба кўчага чиқишида Олим понсад деганинг қизи ёқа тушиб ҳожига арз қилинди. Ҳожи бошда хотинининг бу гапига кулди, ундан кейин "туратур, ўглинг келсин" деди. Ўзбек ойимнинг бобиллаши кучаябергач: "Нима қилсанг ўзинг бил, башарти ўглинг кўнмаса мен зўрламайман" деди. Ўзбек ойим әрига ялиниб бошлади:

— Бир сўзлигингизни қўйинг, эр; ўзи аслзода, лоақал бир оғиз ўглингизга айтиб ўтишка ваъда беринг-чи, — деди.

— Яхши. Ваъда ҳам берайин, аммо сан унашмай тур.

— Унашмайман, лекин ўғлингизга унашдиқ, деб эшидиармиз... Тузикми?

— Маъқул.

Шу ўлтуришдан сўнг Ўзбек ойим жуда ҳам жонланиб кетди ва эртасига Олим понсадникига қараб яна арава қўшдириди. Бу иккинчи совчилиқда гўё қудачалардек қарши олиниди. Олим понсадбошилар: Юсуфбек ҳожига қуда бўлар эканмиз, деб жуда ҳам тиplierлашиб қолган ва иззат-икромни ҳаддан оширган эдилар. Еган оғиз уялар қабилидан Ўзбек ойим ҳам муомалани қудаларча қилди, ҳатто: "Бек отангиз билан мен сўзни бир жойга қўйдик. Фақат иш Отабекнинг келишига қолди" деб қўйди. Кечқурун уйга қайтиб бу айткан сўзини ҳикоя қилган эди, ҳожи лабини тишлаб қолди ва "Санга сира ақл битмай кетар экан-да", деди.

Бир ойлаб кечиккандан сўнг Отабек қайтиб келди ва бу келишининг виждон азоби ва тиламаган бир таклифни эшитиш учунгина эмас, балки қабул қилиш учун бўлғанлигини пайқади. Ул бу гапни оғасининг илгари ачимсиқ сўзларини ва аразларини тугалганидан ва ўрнига сучук сўзлар, силлиқ муомалалар битиб "жон-соғ келдингми, болам"лариданоқ сезган эди. Бундай бўлмагур таклифни эшитмас учун ўзини честка олиб, отаси, айниқса онасиға йўлиқишдан қочиб юришка мажбур бўлди. Икки

орадаги бу қочиш-қувиши иши узоққа чўзилмай, бир кеч меҳмонхонада ота-ўгул сўзлашиб ўлтурганнинг устига Ўзбек ойим келиб кирди ва ўлтурмасданоқ ҳожига имлаб қўйди. Бу имкўйни Отабек пайқамаган бўлса ҳам лекин анув гапни аниқ шу мажлисда очилишига кўзи стиб, чиқиб кетишнинг иложини қилолмади. Ўзбек ойим келиб киргандан сўнг Юсуфбек ҳожи бир неча вақт ўйлаб қолди. Ўзбек ойим депсиниб-депсиниб эрига қараб олар эди. Анчагина сўзсиз ўлтургандан сўнг ҳожи мулойимона сўз очди.

— Ёғлим, ҳали сан эшитдингми, йўқми, ҳайтовур биз санинг устингдан бир иш қилиб қўйди...

Отабек маълумки, уларнинг "қилиб қўйған ёки қилмоқчи бўлған ишларини" албатта билар эди. Шундоқ ҳам бўлса билмагангага солинди:

— Ақаллик кишиларнинг ўғуллари устидан қилған ишлари албатта номаъқул бўлмас, — деди.

Ҳожи ўғлининг бу жавобидан ерга қаради ва нима деб давом қилишни билмай қолди. Истеҳзо аралаш хотинига қараб олди. Яна ораға жимжитлик кирди. Бу сўз сизлик маъносиға Ўзбек ойим тушуна олмаған эди. Бир оз қараб ўлтурғач, юраги қайнаб кеткандек бўлди:

— Биз санинг учун Олим понсадбошининг қизига унашиб қўйдиқ... Энди сан билан тўй маслаҳатини қилишмоқчи эдик...

Отабек онасиға бир оғиз сўз демай, маънолик қилиб отасиға қараб олди. Ҳожи уятликсумол "шундоқ" деб қўйди.

— Сизларни ранжитиб бўлса ҳам бир мартаба уйланган эдим-ку? Энди...

— Сан уйлансанг биз ранжирмидик? — деди кулиб ҳожи.

— Ранжимасаларингиз...

Ҳожи тузукланиб ўлтуриб олди:

— Бу ранжишдан эмас, ҳожатдан ёғлим.

— Нима ҳожат?

— Ҳасаналининг сўзига қарағанда, қайнин отанг қизини Тошкандга юбормас экан. Ўгул ўсдириб катта қилған онангнинг бўлса олдига келин қўйғуси келадир...

Отабек онасиға қаради:

— Бу кунгача келинсиз ҳам яшаб келдингиз, бундан кейин ҳам шусиз туриб бўлар-ку, — деди.

Ўзбек ойим марғилонлиқ томонидан сиҳрланган ўғлига

қарши қизишиб кетди. Бир йиллардан бери ичига йигиб келган кинасини түкиб берди:

— Мен сани бу умид билан боқиб катта қилмаған әдим... Сан бизнинг наслимизни күтариш ўрнига, ерга уриб булғадинг. Биз сани Марғилон андисига бунчалик мүккадан кетишингни ўйламаған әдик, адабсиз... ўзингта қолса шу марғилонлиқни хотинга ҳисоблаб кетаберар экансан-да, уятсиз!..

Отабек ҳам қизишиди:

— Хотин бўлмаса нима, ахир?!

— Қошлиқ, кўзлик бир анди!

— Анди деганингиз нима ўзи?

Юсуфбек ҳожи ўғлини босиш ўрнига жавоб бер, дегандек қилиб илжайган ҳолда хотинига қаради. Ўзбек ойим "анди" маъносини билдириб, андиларнинг сиҳрини рад қилиш учун бир оз тутилиқиб қийналди:

— Анди... анди... ўзи хитойми, нима бало... ўзи қалмоқдан тарқаған бўладир... Тушуммаган бўлсанг, лўлиларнинг бир тойифаси...

Бу жавобга Юсуфбек ҳожи ўзини ҳаҳолаб кулишдан тўхтата олмаганидек, Отабек ҳам кулиб юборди. Хотинининг тирноқ остидан кир излаб ва даъвосининг исботи учун гўлдирашидан ортиқча кулиб кайфланган Юсуфбек ҳожи кўзига чиқған ёшларни артар экан, жиддият билан ўғлиға деди:

— Ўғлим, сан онангнинг гапига аччиғланма. Ул ҳар нарса деса фақат Марғилондан ўйланганингга қаршилиғидан айтадир. Аммо мендан сўрасанг, Марғилондаги на қудамиз ва на келинимизни ѡч бир важҳ билан камсита олмайман, балки бизга қуда бўлмоққа энг мувофиқ кишилар эди, балли ўғлим, дейман. Санинг тиниб-тинчишинг, ўсиб-унишинг учун қувонмаган ота-она соғқа ҳисобланмайдир. Сан бунга яхши ишон. Аммо бизнинг ҳозирги баъзи бир раъйларимиз санга ётишиб келмас экан, бунга ҳаққинг ҳам бор, лекин иккинчи тарафдан бизни ҳам ҳақсиз ташлаб қўйма. Ўғлим, бизнинг сандан бошқа умид нишонимиз, ҳаёт қувончимиз йўқ. Дунёда кўриб ўтатурған барча орзумиз, ҳавасимиз фақат сангагина қараб қолған. Биз худои таолоға минглаб шукур айтамиз-ким, сан бошқаларнинг фарзандидек эслик-ҳушлик бўлдинг; кишилардек сан билан ифтихор қилолмасақ-да, сан орқалиқ хижолат чекмасимизга ишондиқ. Айниқса онангнинг санинг туфайли кечиратурған умидлари тобора

ортиб борди. Бу кун онанг санинг олдингта тиз чўкиб ва онанг кўнгли учун мен ҳам орага тушиб сандан сўраймиз: сан ўз хоҳишинг йўлида уйланган экансан, рафиқанг санга муборак бўлсин. Эслилик даъвосида юрган ота-онанг тилаги албатта шундан бошқа бўлмас. Шу билан бирга санинг сабаби вужудинг бўлған бир киши ўз ҳаёти ичидা боласи орқалиқ бир орзу-ҳавас кечирмакчи... Унинг бу орзусига ҳақ берасанми, йўқми яна ихтиёр ўзингда...

Ҳожининг бу сўзи Ўзбек ойимға нечоғлиқ ёқсан бўлса, Отабекни шу қадар ерга қараткан эди. Ҳожи ўзидан ошириб сўзлаған бу сўзларини шу гап билан тамомлади:

— Билган топиб сўзлар, билмаган қопиб, деганларидек онангнинг айтмакчи бўлған сўзи фақат шу эди. Бояги гаплари бўлса ўз ҳаққини ҳимоя йўлида унинг пописала-ригина бўлиб, мендан ҳам кўра онангнинг феълини ўзинг яхши биласан...

Отабек ҳамон сукутда, а Ўзбек ойим бўлса боши билан "шундоғ" ишорасини берар эди. Юсуфбек ҳожи юқорида ўткан гапларни қуруқ ва асоссиз сўзламаган, балки шу турмишнинг руҳи ва асосини бир даража айтиб ўткан, Отабек эса буни шу муҳитнинг бир ўғли бўлиб эшиткан эди. Тўгриси ҳам ул дадаси томонидан сўзланган ҳалиги қонунга қарши чиқиш учун лозим бўлған кучка молик эмас; бас, кучсиликнинг натижаси эса сукут эди. Ул бир томондан шундай орзу-ҳавас учун бола ўсдириған ота-онани мукофотландирмакчи ва отаси айткан хижолат чекдирмайтурған ўғуллардан бўлмоқчи эди эрса ҳам, иккинчи ёқдан ўзини асир эткан шаҳло кўзлар унга нафратланиб қарағандек бўлурлар, гўёки, вафосиз, ваъласиз, деб қичқираплар эди. Тўгриси ҳам уни ота-она мукофотига қарши осёқландирмоқчи бўлған нарса ҳалиги кўзларгина, аммо унинг бу исенномо ҳаракатидан бошқа унсурлар қилириш ва чиқариш албатта ўринсиз тушар эди. Ота-она орзусини ифо этишдан<sup>1</sup> бир сония ҳам ўзининг кўз ўнгидан ҳаёли кетмаган анув илоҳий муҳаббат учун ҳеч бир турлиқ камчилик келмасига ишонса ҳам ҳозир унинг юрагини бошқа бир ҳақиқат тирнай бошлаган ва вижданини фақат шу масалагина ўраб олған эди. Отабекча энг нозик саналған бу масала қаршидаги жавоб кутиб ўлтурғучиларни ниҳоят зериктирди.

<sup>1</sup> Ифо этимоқ — адю этимоқ, бажармоқ.

— Бизни кутдирма, ўғлим.

Отабек мағлуб бир боқиши билан бу сўзни айткучи отасига қаради ва ялинчоқ бир оҳангда жавоб берди:

— Мен сизларнинг орзуларингизни бажаришка — агар хурсандчилигингиз шу билан бўлса — ҳар вақт ҳозирман. Аммо бир бечорага кўра-била туриб жабр ҳам хиёнат...

Ҳожи ўғлининг мақсадига даррав тушина олмади ва сўради:

— Кимга, хотининггами?

— Йўқ, сизнинг оладирган келинингизга. Ўғлингизнинг вужуди билан орзунгизни қондириш осон бўлса ҳам келинингиз қаршисида мени бир жонсиз ҳайкал ўрнида тасаввур қилингиз.

Юсуфбек ҳожи ялт этиб хотинига қаради. Ўзбек ойимнинг бўлса оладирган келинига эътиномоди юқорилигидан ўйлаб-нетиб турмади:

— Майли, болам; буёқни ҳозир сан ўйламай қўй, — деди.

Отабек бир оғиз сўз айтмай сукут қилди. Юсуфбек ҳожининг эса ўғлининг сўзини тўғрилигига, кейиндан юз кўрсататурган кўнгилсиз ишларга ақли етса ҳам, аммо бир мулоҳаза юзасидан истиқболнинг қоронги ишларини ҳозир унча мулоҳаза қилиб кўрмади:

— Жуда тўғри айтасан, ўғлим; бироқ онангнинг бир мулоҳазасизлигига бошдаёқ мен лабимни тишлаб қолған эдим. Ҳозирда ҳам шу ҳолда қолмоққа мажбурман, — деди ва: — Биз ҳозир андишанинг бандаси, мен эмас онанг биравни ишондириб қўйған: бизнинг оиласдан лафзсизлик чиқиши менга маъқул кўринмайдир.

Отабек ота-она орзусига ўз таъбирича жонсиз ҳайкал бўлиб ризолиқ берди. Аммо ўз ризолигининг шарти қилиб тўйдан илгари Марғилон бориб келишини ва бир даража уларга айтиб ўтишни, шундан сўнг тўй бошлишни аҳд қилди. Ишнинг снгил кўчишига сўйинган она Отабекнинг бу шартига лом демасдан кўнди ва орзулиқ тўйни тез бошлиш учун ўғлини Марғилон кетмакка қистай бошлади.

## 2. УНУТМАЙСИЗМИ?..

Унинг бу галги Марғилон йўлиға қўзгалиши ортиқча бир оғирлиқ билан, иккиланиш билан ўралған эди. Кумушбиби учун дунёга сигмаслиқ бир шодлиқнинг, кўргучи кўзларига ишона олмаслиқ бир баҳтнинг бу гал кўтариб

бўлмайтурған бир қайгу, чидаб бўлмайтурған бир ҳасрат бўлиб боришини ул яхши тушунар эди. Ҳар бир гал Марғилон борғанида олиб боратурған нафис совғалари бу гал жуда заҳарлик, ортиқча аламлик бир совғага айланган, Кумушшиби бу совуқ кундаш совғасини кўрганда эҳтимол... нималар бўлар ва қандоғ ҳолларга тушар эди. Бу мудҳиши совғани эҳтимолки унинг ота-оналари ҳам қабул қилмаслар: бирдан-бир ёлғиз қизлари учун бундай гапнинг ярашмасини айтиб: "Совғанг ҳам керак эмас, ўзинг ҳам" деган жавоб билан юзига ҳам урарлар. Мана, унинг бу галги оғир ҳаракати ва қўзғалишига нималар сабаб эди.

Бу оғриқقا орзу эгаларининг қистоқлари ниҳоят берди. Яъни чор-ночор бу тутуриқсиз совғани кўтариб йўлға тушишка мажбур бўлди.

Отнинг бошини ўз ихтиёрига қўйған, илгаригидек юрак ошиқишилари ичida отни тез юришка қистамай сувга тушкан нондек бўкиб-бўшашиб, юз хил совуқ, ярамас хаёллар қўлида эзилиб, ўзининг дунёда борми-йўқмилигига ҳам тушунмай кета берадир.

Ҳозир кўклам кунлари: қирлар, тоғлар, сойлар; кўк-қизил, оқ-қора, сариқ-зангор, пушти-гўлас ва тагин алла қанча ранглик чечаклар билан устларини бежаб, қиши билан тўнгтиб<sup>1</sup> аранг стишкан ошиқларига янги ҳаёт, янги умид берадирлар. Қиши бўйи алла қайси гўр остларида жунжиб чиқган қуш зотлари: чумчуқлар, читтаклар, тўргайлар, саъвалар ва бошқа алла қанча қуш дуркумлари ўз тўплари билан вижир-вижир, чуғур-чуғур сайраб куладирлар, ер юзини туткан чечак гиламлари устини ўпид яладирлар, ётиб чўқийдирлар, сапчиб учадирлар... узоқ-узоқдан какку қуш ҳам арзи вужуд қиладир: "какку-ка��ку".

Поенсиз қирларнинг ниҳоятсиз бижир-бижир кўриб тўймаслиқ кўк гиламлари ва уларнинг димогларга мажбурий искаткан даво ислари, ёқимлиқ ҳидлари ҳар қандоғ ишдан чиқаёзган ҳаёт эгасини озғина бўлса ҳам эпка ола биладирлар. Шунингдек бу чечак қирлари ўз бағрида сувзаб борған бизнинг Отабекни ҳам ўзига қаратмай

<sup>1</sup> Тўнгмоқ — музламоқ.

қўймайдир. Унинг фикри анув қоронгулиқлар ичида сусза ҳам кўзи чечак ва сабзалар томошасида, димоги ҳидлар истишомомида,<sup>1</sup> қулоги қушлар нағмасида бўладир. Нима бўлса ҳам теварагидаги кўклам бежакларини кўздан кечира борадир. Бора-бора фикри ҳам шу кўринишлардан ҳисса олмоққа бошлайдир.

— Ҳов ана бир қалдиргоч. тўғрига қараб ўқдек отилиб борадир, учкан йўлида вижир-вижир сайраб ҳам қўядир. Қалдиргочнинг қайгуси йўқ, суйганининг олдига тезроқ стиш учун шошадирғандир: сайроби ҳам суйганининг кўриш шодлиги учундир... Бахтлик қалдиргоч: олган совғаси ҳам қўрқунч эмасдир, ота-онасининг ҳам орзу-ҳаваслари йўқдир. Уларнинг турмиш қонунлари жуда сингил, икав-икав, суйган-суйганни оладирлар-да тоғларда, ерларда, кўкларда учеб юруйбсрэдирлар. Мен ҳам шу қалдиргочдек унинг сари отилиб, вижир-вижир сайраб учар эдим...

Унинг қалдиргочлиқ қаноти ота-она мукофоти билан қайрилган. Унга учкали ёрк бермайдирлар. Лекин ҳайвон унинг қайрилган қанотига қарамасдан ўзининг эски адим ташлашида қирлар, тоғлар ошиб, сувлар кечадир; етти-саккиз қайта бориб келган таниш шаҳарига интилгандан интила бсрэдир. Бу ошишлар, бу кечишлар ўзга вақтларда Отабек учун ҳузур ва ошиқиши бағишилаган бўлсалар, бу гал уни нафратландирадирлар, бормай қайтиш фикри ҳалидан-ҳали кўнглига келиб турадир.

Узоқда қўш ҳайдаб юрган йигитнинг ашуласи эшитиладир: "Икки ёрни ажратувчи бу фалакнинг гардиши!" Руҳлик, кучлик кўкракдан чиқған бу ашула теваракни зир-р этдириб юборгандек, Отабекка ҳам бошқача бир таъсир бсрэдир. Гўё бу дсҳқон унинг истиқболидан ҳикоя қилғандек бўладир. Бу байт дсҳқоннинг оғзидан яна такрорланиб тагин теваракни ёнғиратадир.<sup>2</sup> Энди Отабекнинг кўнглидан бир гап ҳам ўтиб кетадир: "Икки ёрни ажратқучи бу фалакнинг гардиши эмас, ота-онанинг орзуси!" Ўзининг сирлиқ маъносига Отабекнинг истиқболини олиб кўринган бу байт ниҳоят уни йиғлатадир. Кўз ёшлари юзи орқалиқ эгарининг қошиға ва отининг ёлига тома бошлайдир...

<sup>1</sup> Истишомом — ҳидлаш, искаш.

<sup>2</sup> Ёнғирамоқ — янгралиқ.

Марғилонға түрт қўниб кирав эди, бу гал олтинчи қўнишда етди. Теваракдан аср азони эшитилган вақтда отдан қўнди. Отини қутидорнинг йўлагига етаклар экан, негадир юраги ўйнаб кетди. Бу гал ўз одатидан ўн кунлар чамаси кечиккани учун "балки кутиб ўлтурғандир" деб ўйлаб ҳалиги юрак ўйногиси тағин ҳам кучайди ва ўйлакдан меҳмонхона ҳавлисига чиқғач, ихтиёrsиз отининг бўйнига суюлиб тўхтамоққа мажбур бўлди.

Чиндан ҳам ул айвоннинг олдидаги кутиб ўлтурган эди. Хаёлот ичидаги Отабекнинг келиб кирганини сизмай ҳам қолди. Ниҳоят қора оҳу кўзларни тўлдириб бунга қаратиб олғач, ўрнидан турди-да, ичкари ҳавлисига бурилиб кета берди. Бу бурилиш маъносига Отабек алла қачон тушиниб қолған, бу ўзининг кечикиб уни зориқдирғани учун... Кечикиш учун бунчалик араз қилған бу гўзалнинг кундаш учун қандоғ ҳолга тушмоғи маълум эди. Отабек тамом бир эсанкирашда қолди. Отини ахтахонаға боғлаб, совғасалом тўлдириб келган ипак хуржинни кўтариб ичкарига кирди. Суюкли куявни ўйлакда кўрган Офтоб ойим қилиб турған юмишини улоқтириб Отабекнинг олдига югурди, жонини минг тасаддуқ қилиб кўришкач, кечиккани учун нечоғлиқ ташвишлар тортиб ва қандоғ тушлар кўрганини лаби-лабига тегмай сўзлай кетди. Аллақаёқларда юрган Тўйбекса ҳам югурга келиб сўрашмоққа уялса ҳам, аммо "чиройлик йигит"нинг қўлидағи хуржинни олди.

Офтоб ойим югурга-югурга қат-қат кўрпачалар солиб, куявни ўлтуришка таклиф қилди ва қаршилашни ҳар галгидан ҳам ошириб юборди. Лекин Отабек бу қарши олинишларга жуда ишончсиз қарап, бу кун бўлмаса эртага "ота-она орзуси" билан бу сийланишларни бирдан ўзгариб кетмагига имон келтуриб, қайси йўсунда ўлтуриб олганини ҳам пайқамас эди. Офтоб ойимнинг бир қанча яхши тилаклар билан бўлған дуосига ҳам ишончсиз қўл кўтарди ва машъум "орзу"нинг бундог яхши дуоларни ост-уст қилишини ўйлади. Фотиҳадан кейин Офтоб ойим товоқни хурмага, хурмани товоққа урушдириб куявга қатиқ олиб чиқди ва Отабекнинг ичмаганига ҳам қўймай "ичингиз, йўл губорини оладир" деб қистай бошлади. Сўнгра Тўйбекани чой қайнатишга буюриб ўзи куявни билан сўрашди:

— Отангиз, онангиз саломатларми?

— Шукур, сизга салом айтдилар.

— Ҳасанали отам соғми, нега сиз билан келмади?

— Шукур, соғ, баъзи ишлар билан бўлиб келолмади, —  
бу жавобни бериш ҳамоно кўнглидан кечди: "Нега ёлғон  
гапирасан, Ҳасанали тўй ҳаракатлари билан машғул эмас-  
ми ..."

Отабекнинг кириб ўлтурганига бир неча дақиқа фурсат  
ўткан бўлса ҳам ҳамон Кумуш уйдан чиқмади-да, аразини  
қаттиг ушлаганча ўлтуриб олди. Офтоб ойим куяви юзида  
кўрилган уйчанлиқни Кумушнинг уйдан чиқмаганлиғига  
йўйиб қизини чақирди:

— Кумуш! Қаллиғинг келдила-я, чиқиб сўрашишни  
ҳам билмайсан!

Офтоб ойимнинг шу йўсун чақириши уч-тўрт қайталаб  
бўлса-да, Кумуш эшитмаганга солиниб арзимаган нарсалар  
билан шуғулланған бўлиб чиқа бермади. Отабекнинг юзи-  
даги ўйчанлиқقا разм қўйған сайин Офтоб ойимнинг  
ҳалиги шубҳаси улгая борди, куянинг кўзини шамғалат  
қилиб қизининг олдига кирди ва шивирлаб Кумушни ури-  
ша бошлади: "Эсингни едингми қизим, эринг сани деб  
Тошканд деган шаҳардан келса-ю, сан ким келди деб  
олдиға чиқмасанг. Тур, чиқиб сўраш, аразлаб кетиб қолса  
нима қиласан?" Офтоб ойимнинг бу кейинги сўзи чиндан  
ҳам Кумушни ўйлатиб қўйди: "...Кетиб қолса нима қила-  
ман?" деган жумлани кўнглидан кечирди-да, онасидан ил-  
гарироқ гўёки, айвон тоқчасидан бир нарса оладиргандек  
бўлиб, ўзига термулиб турган Отабекка ер остидан секин-  
гина бир кулиб боқди ва тоқчадаги кераксиз бўлган бир  
пиёлани олиб, яна уйга кириб кетди.

Ўзбек ойимнинг сиҳирчи-жодучи деб қарғаши ҳам  
ҳикматсиз бир гап эмас. Кумушбибининг бу кулиб қараши  
Отабекка ажиб бир инқилоб ясаған эди. Ундаги оний бу  
ўзгариш жуда қизиқ ва сира ишонмаслиқ эди. Ул бу ер  
тегидан бир кулиб боқиши таъсири билан устидаги тогдек  
босиб ётқан "орзу"ни ағдариб солған ва қушдек снгил  
тотқан эди. Унинг оний бу ўзгариши шундан иборат эди:  
"Уларнинг орзу ва ризоликлари, бу ризолик шароғати  
билан топиладурған савоб, юртнинг юқори-қуий гаплари  
— барчаси ҳам Кумушнинг ёлғиз шу биргина кулиб қара-  
ши олдидан ўтаберсин!"

Оний бу ўзгаришдан сўнг тараддуғисиз шу қарорни  
кўнглидан кечирди: "Уларнинг орзуларини буларга  
сўзламайман-да, Тошкандларига ҳам бормайман".

Үндаги бу ўзгариш оний бўлғанидек жуда жиддий ҳам эди. Кўнглига неча кунлардан бери узала тушиб ётқан бу чигил "бир кулиб боқиш" сиҳри билан ешилган ва Марғилонда доимий турғунилиққа деб тугилган эди... Бу ўзгаришдан кейин онадан туғма бўлиб снгил торти, гўёки мундан сўнг ўзининг сиҳирлик кўзлари билан Отабекка яна кулиб қараб турар эди-да, гўёки шу кулиш билан ўз сиҳрининг қайси даражаларда кучлик бўлғанини сўзлаб фахрланар эди.

\* \* \*

Ўртадан ўн беш кунлар вақт ўтди. Кумушнинг қайтаб сўрашига:

— Чиндан-чиндан: мундан сўнг Тошканд бормайман, — деган жавобни берар эди. Кумуш бу гапка ажабланар, тўғриси, шодланар эди.

\* \* \*

Марғилон келганинг йигирманчи куни. Отабек ҳозиргина қаёққадир чиқиб кеткан эди. Қутидор одатига қарши бозордан кундуз соат учларда қайтиб келди-да, Отабекни сўради, йўқлигини билгандан сўнг хотинини меҳмонхонага бошлаб чиқди.

— Тинчликми? — деб сўрағучи Офтоб ойимга сўйинч ва ё қувончилиги билинмаган бир вазият билан жавоб берди:

— Тинчлик.

Меҳмонхонада эру хотин ёнма-ён ўлтуришдилар. Офтоб ойим бу боши-оёги йўқ ишдан ёрилар даражасига етاءзсан эди.

— Отабекдан ҳеч сўз эшитдингми? — деб сўради қутидор.

— Қандай сўз эшитай, ҳар қачон сўзлайдир, албатта мен эшитаман.

— Тошканд тўғрисида ҳеч гап айтмайдими?

---

<sup>1</sup> Сокит — тинч, осуда, хотиржам.

— Тошкандга бир гап бўлганми?

— Тошкандга ҳеч гап бўлмаган, — деб кулимсиради қутидор. — Маним муддаом бошқа тўгриларда. Қизингдан ҳам ҳеч гап эшифтадингми?

— Ҳеч гап... Ҳа, айткандек кеча, эрининг мундан кейин Тошканд бормаслигини сўзлагандек бўлган эди.

Қутидор бир ишка тушунгандек кўзини ўйнатиб олди ва сўради:

— Энди Тошканд бормас эмишми?

— Билмадим; чинми, чин эмасми, ҳайтовур қизингиздан эшиктандек бўлган эдим. Нима, ота-онаси билан уришиб келганми?

— Йўқ, — деди қутидор ва чўнтагидан бир нарсани ола-ола айтди, — мен бу кун Тошканддан қизиқ бир хат олдим.

— Кимдан?

— Қудангдан, — деди қутидор ва хатни оча-оча, — шуни сангя ўқуб бермакчиман, — деди.

— Ахир ўзи нима гап? — деб сўради Офтоб ойим.

— Эшиксанг биласан.

"Қудамиз Мирзакарим қутидорга ва қудачамиз хонимга етуб маълум бўлғайким, бизлар мунда соғ-саломатдирмиз ва ул жонибдаги<sup>1</sup> сиз ҳурматлик ва иззатликларни парвардигори оламдин сиҳҳатларингизни салоти ҳамса<sup>2</sup> олдида сўраб турмоқдамиз. Баъда маҳфий қолмағайким, куяв ўғлингиз хизматларига юборилған эрди. Иншооллоҳ саломат еткан бўлса керак. Аммо сиз ҳурматлуларга маълумдир, бизнинг шул Отабекдан ўзга фарзандимиз бўлмай, дунёда ўзимиздин кейин қолдиратурған туёқимиз ва кўз тиккан орзу-ҳавасимиз, умид ҳадафимиз<sup>3</sup> фақат шул Отабекдир. Муҳтарам сиз буродаримизнинг шул ягона ўғлимизни фарзандликка қабул қилиб, аммо бизнинг келин боламизни Тошкандга юбормағанлари бизнинг жанобларидин бўлған миннадорлиғимизни ва яна ўғлимизга бўлған марҳаматларини бир оз тугаллай олмадилар. Аммо каминалари бу хусуддаги айбни сизнинг устингизга бутунлай юклай олмаймиз, зероки бизнинг бошимизда бўлған "ёлғиз туёқлиқ" савдоси сизнинг ҳам бошингизда

<sup>1</sup> Жониб — томон, тараф.

<sup>2</sup> Салоти ҳамса — беш вақт намоз.

<sup>3</sup> Ҳадаф — нишон.

бордир. Начукким, Отабекнинг кўб умри Марғилонда ўтиб, бизларни ҳам сиз ўйлаған оғирлиққа солмоқдадир. Буродари азиз, сиз маним бу сўзларимдан хафа бўла кўрмангиз, зероки фақирингиз бу сўзларни бир ўйсуни келиш вожҳидин ёзib ўтдимиз. Дунё орзу-ҳавас ўйи дерлар. Юқорида баён қилинғанидек ва ўзлари билганларидек, айниқса қудачаларининг дунёға келиб куткани шу ёлғиз ўғулнинг орзу-ҳавасидир. Жаноблари бул ишқа ҳақ берурларми, йўқми, аммо азизларнинг рухсатларини олмасданоқ Отабекни Тошкандан ҳам тааллуқдор қилмоқчи бўлиб, бул маънига баъзи бир ҳаракатларини қилиб қўйған эрдик. Аммо бизларнинг бул раъйимизга ўғлингиз қарши тушиб ҳарчанд рад қиласа ҳам ниҳоятида онасининг сўзини ерда қолдирмаслиқ учун қабул қилған эрди. Аммо бул тўғрисидағи сиз жанобларининг рухсатларингиз баъдида жавоб бермакчи бўлиб, хизматларига кеткан эрди. Сиз ҳурматлулар бул маънини савоб топарсизларми йўқми, бу жиҳати яна марҳаматларингизга боғлиқдир. Бу мактубни ёзишдан қасдимиз<sup>1</sup> шулким, Отабекнинг бу иккинчи тааллуққа асло раъи бўлмай ва яна сизларга айтмай бул тарафда бизларни хижолат чекдириб қўярми, деб ўйладиқ. Буродари кироми, сиз дунё кўрган бир кеши-сиз. Ота сининг талабини хўб мулоҳафза қилиб кўрингиз, бу тўғридағи раъи ўғлингизга қараганда ҳам фақирларича сизларда бўлғани вожҳидин албатта кўндиришика саъӣ ва кўшиш<sup>2</sup> қилурсиз, деб ишонамиз Отабекнинг иккинчи тааллуқи тўғрисида келин боламизга билдирилмаса хўб эрди. Бизларнинг хурсандчилликларимиз йўлида Отабек билан бирга Тошканд тушиб, ўз қўллари билан тўйимизни ўтказишингизга ишониб Юсуфбек ҳожи ва қудачалари. 17-нчи савр<sup>3</sup> ойида 1265-нчи ҳижрияда ёзилди."

Қутидор хатни ўқуб битирди-да, хотинига қаради. Офтоб ойимга бу хат музлик сувга шўнгутиб олиш таъсирини берган ва ўлтурган ерида сирра бўлиб қотиб қолған эди. Оталар учун бундое гаплар унчалик ёмон таъсир бермаса-да, хотинларга қандай асар қилиши билгулукдир. Офтоб ойим учун гўёки қизининг бирар айби учун бу ишка мажбур бўлинғандек, Кумуш эса энди эрига суюмсиз,

<sup>1</sup> Қасд — мақсад, ният.

<sup>2</sup> Саъӣ ва кўшиш — ҳаракат қилмоқ.

<sup>3</sup> Савр — 22 апрель-21 май.

ишдан чиқған ва бурчакка тиқилған увададек бўлиб кўрина бошлиған эди. Мактубни эшикандек қулоқлари янглиш эшикандек бўлар эди.

— Тағин ўқуб кўрингиз-чи..

Қутидор хотинининг сўзидан кулди:

— Қайтариб ўқушнинг фойдаси йўқ, хатнинг мақсади сан онглағандек, — деди.

Офтоб ойим боши янчилған илондек тўлғанди:

— Қизим устига кундаш?!

Қутидор қафаска янги солинған қушдек уринмакка олған хотинини босмоқ бўлди:

— Ортиқча уринма, илгари ҳақиқатка тушун-чи...

— Ҳақиқати нимаси?

— Бунда гап бор.

— Нима гап бор?

— Агар бу ишда куявингнинг ҳам изи сезилгандада эди, сан эмас ман ҳам бу гапка чидамас ва қизим устига тушкан бу оғир масалани тинчлик билан қарши олмас эдим. Аммо бунда куявингнинг иштироки кўрилмай шунинг ила маним дамим кесилиб қолди. Ҳали унинг қизингта: "Мундан кейин Тошканд бормайман" деб айтканини сўзлаб эдинг-а?

— Ёлғонми, чинми, — деди Офтоб ойим тилар-тиласас, — эшикандек бўлған эдим.

— Эшикандек бўлған бўлсанг ҳам бу сўз чиндир, — деди қутидор, — нега десанг, хатнинг мазмунидан ҳам онглашиладирким, бу иккинчи уйланишкага Отабек бутунлай қарши бўлиб, фақат бу гап қудаларингнингтина ишларидир. Шунинг учун куявингнинг уйланишини қизинг устига чин маъноси билан кундаш деб бўлмайдир.

Офтоб ойим кутмаган жоида қутидор тамоман Отабекни иккинчи уйлантириш тарафида туриб сўзлар ва ўлганнинг устига чиқиб тепар эди.

— Агар Отабек бу иккинчи уйланишкага ризо бўлса эди, биринчидан рухсат олиш учун Марғилонга келиб юрмас...

— Шошманг-чи, — деди Офтоб ойим, — ўзингизча нимани сўзлай ётибсиз?

— Бу иккинчи уйланишда Отабекнинг ризосизлигини.

— Куявингизнинг ризолиги бўлмаса худо хайрини берсин, вассалом.

— Гап унда эмас-да, — деди кулиб қутидор.

— Нимада? — деди қизишиб Офтоб ойим. — Қизингиз

устига кундаш балосини ўз қўлингиз билан юкламакчи бўласиз шекиллик!

Қутидор совуққина қилиб кулиб қўйди:

— Тушинмай ётибсан, хотин.

— Ҳамма гапка тушиниб турибман.

— Тушинган бўлсанг бу хатка нима деб жавоб берамиз?

— Бизга маъқул эмас, денг.

— Маъқул эмас, дейиш билан иш битмайдир, бирарта далил кўрсатиш керак.

— Топарсиз, ахир далилини.

Қутидор тамоман тўнни тескари кийиб олған хотинига қараб бошини қашиб олди:

— Хатда иккинчи уйлантириш учун бўлған сабабни қизимизни Тошканд юбормаганигимизда кўрсатиладир, — деди қутидор. — Сан айтканча куявинг Тошкандан иккинчи уйланмасин-да, Кумушни қудаларинг олдига турғун қилиб юборайлиқ, тузикми?

— Нега мен ёлғиз қизимни Тошкандга юборай, — деди кўзини олаландириб, — биз қизимизни беришда Марғилондан ташқариға олиб кетмас ваъдаси билан берганимиз.

— Бу гапинг тўгри-я, — деди қутидор, — мен ҳам Кумушни Тошканд юбормоққа қаршиман. Гап бу ёрда: биз Отабекдан бу ваъдани олған чоқда, "Ота-онангдан кечасан, иккинчи уйланмайсан" деган ваъдани ҳам олганми эдик?

— Бундай ваъдани берган бўлсин-бўлмасин, — деди энтикиб, — суюб олғандан сўнг иккинчи уйланиш сўзини ҳам оғзиға олмасин.

— Ким айтди санга, оғзиға олди, деб?

— Ҳеч ким айтмаган бўлса ҳам сиз орага тушманг дейман, ўз оёғингизга ўзингиз болта қўйманг, дейман.

— Пичоқни ўзингга ур, оғримаса бошқага, деган бир гап бор, — деди жиддий вазиятда, — мендан ҳам сан яхшироқ тушиниб турибсанки, агарда бизнинг ризолигимиз бўлмас экан, Отабек сира ҳам иккинчи уйланмайдир. Масалан биз икав — қудаларнинг ўрнида бўлиб, ёлғиз ўғлимиз бошқа бир шаҳарда, биз танимаган бир қизга ўйланиб қолғанда — ўйлаб қара, чидай олурми эдик. Ўғлимиз кўнмаганда ҳам ўз шаҳримиздан иккинчи уйлантиришка киришмасми эдик. Бу тилагимизга қарши тушиб ўғлимизни ўз шаҳри ва ўз уйидаги олиб ўлтургучи қудаларимизга лаънат ўқуб, ўлим тиламасми эдик?

Бу сүз Офтоб ойимни бир оз ўйлатиб қўйди. Лекин ҳали ҳам осқ узатмаган эди.

— Энди нима қилмоқчисиз?

— Нима қилас эдим, — деди қутидор, энди ҳамма ихтиёрни ўз қўлиға олиб қўйған эди, — Отабек кўнмагандан ҳам кўндириб, ўзим биргалашиб Тошканд тушаман...

— Қизингиз бечорага...

— Қизимга ҳеч гап йўқ. Ҳали ҳам иззати, ҳурмати ўз қўлида.

— Қуриб кестсин шу дунёнинг ишлари!

— Қизингни Тошканд жўнатишкан кўн бўлмаса.

Офтоб ойим жавоб бериш ўрнига ўкраб-ўкраб йиглади.

\* \* \*

Қайин ота, қайин она, куяв... Бу уч бурчаклик ўлтуришдан Отабек кўнглида неча турлук шубҳа туғилмоқда эди. Бу одатдан ташқари чақириқ нега меҳмонхонаға бўлди? Нега Кумуш бу ўлтуришкан чақирилмади? Қайин онаси нега унга термулиб боқадир? Қутидор томонидан шу орада ул кутмаган бир савол ҳам ташланиб қўйилди.

— Отабек, уялмай, тортингмай жавоб берингиз; бу гал Тошканддан чиқишингиздаги асл мақсадингиз нимага эди?

Отабек тарафидан кутилмаган бу савол уни шоширди ва нима деб жавоб беришни билмай қолди.

— Ўзим... сизларни кўриш учун.

— Тўғрисини сўзлангиз, бек, — қутидор бу гапни ярим жиддий қилиб кулиб айтди. Чунки Отабекни шу йўсун баъзи ёқлардан таъмин этмакчи ва унга бу тўғрида жасорат бермакчи эди.

— Айтдим-ку.

— Тўғри айтмадингиз...

Отабек шошқан ҳолда эди:

— Тошканддан чиқғанимдаги мақсадни сўзлаш сизларга бир беҳузурлик берганидек ўзимга ҳам оғир... У тўғрида қатъий бир қарорга келганим учун сизларга сўзлаб ўлтуриш ҳам фойдасиз, — деди.

Офтоб ойим эрига қараб олди, қутидор ёвошқина бир товуш билан сўради:

— Сўзлаш оғирми?

— Менгагина эмас, ҳаммамизга ҳам оғир...

— Агарда биз ризолиқ берсамиз-чи?

Эрининг бу жасоратига қарши Офтоб ойимнинг юзига ризосизлиқ белгуси чиқди. Отабек эрса сесканиб уйқудан уйғонғандек бўлди ва иккиланиб сўради:

— Сиз нимага ризолик берасиз?

— Бу гал Тошкандан нима мақсадда чиқған бўлсангиз — ўшанга.

Отабек хижолат билан тер чиқарди:

— Тошкандан нима мақсадда келганимни биласизми?

— Биламиз, — деб кулди қутидор.

— Сизни бундай ишка ризолик учун ким ва нима мажбур этадир?

— Ҳеч ким мажбур қылмайдир, — деди кулиб қутидор, — мажбур қылған нарса: шундай қунлар учун ўғул ўсдирған ота-онанинг ризолиқларигина, балки сизни ҳам шу гап мажбур қилас.

— Отам билан онамнинг ризолиқлари учун шундан бошқа сабаб қуриб қолғанига нима дейишимни ҳам билмайман. Гарчи Тошканда экан чогимда бу ризолик йўлига бел боғлаған бўлсан ҳам, энди бу бел боғлашни бутунлай ўринисиз бўлганига тушиндим...

Офтоб ойим оз қолдики, "тўғри!" деб қичқирсин. Аммо қутидор хотиниға хўмрайиб қаради.

— Қисқароқ ўйлайсиз, Отабек, — деди, — отангиз бизга мурожаат қылмаганда эди, биз бу ишда бетараф қолсақ бўлар эди. Ҳозирда биз ҳам сизнинг сўзингизга қўшилсақ сиз эмас, ёмон отлиқ биз бўламиз.

— Унинг мулоҳазасини қилманг.

— Нега қылмайлиқ?

— Ҳамма айбни маним устимга юклаб жавоб ёзингиз.

Қутидор кулди ва сўради:

— Тошканда экан чоғингизда отангизнинг таклифини қабул қылған эдингизми?

— Қабул қылған эдим.

— Бизнинг рухсатимизни олғали Марғилонга ҳам келган эдингиз, шундогми?

— Шундоғ...

— Баракалла, Марғилонга келиб бу гапдан айнадингиз-а?

— Айнадим...

— Энди Тошкандга Марғилондан айнаб борасиз?

— ...

— Мана кўрдингизми, фақат бу ишда бизгина ёмон отлиқ бўламиз. Ўзингизнинг шу хатонгиз учун ҳам бу гапни қабул қилмоқча мажбуриз.

Отабек нима деб айтишдан ожиз қолди ва ўзининг болалиқ ҳаракатидан сесканди ва хижолат орасида сўради:

— Отам сизга қачон хат ёзган эди?

— Кеча олдим. Демак, кўндингиз?

— Мен бу гапка дурустлаб ўйламасдан жавоб бералмайман.

— Қанча ўйласангиз ҳам жавобингиз биргина бўлиши керак; яъни ризолиқ.

Қутидорнинг бу сўзи жуда ҳам қатъий эди. Бу қатъиятни онглағучи кўнгилдан чиқараёзган бу масалани чинлаб ўйламоққа мажбур эди. Нима бўлғанда ҳам кўнгилнинг бир чеккасини кирлатиб ётқан бу "ота-она орзуси" бир томондан қаралганда жуда енгил кўчкан эди. Аммо иккинчи томондан масаланинг ешилмаган ўринлари ҳам бор эди.

— Яхши, — деди, — мен сизнинг таклифингизга кўнайнин, аммо кўнишнинг ва ризолиқнинг зарури қизингизда эмасми?

Шу чоққача мунггайиб ўлтурған Офтоб ойим ялт этиб эрига боқди, яна чексиз бир меҳрибончилик назари билан Отабекка қаради.

— Сиз қизимизнинг андишасини қилиб ўлтурмангиз, бек, — деди қутидор, — бу ишни энг яхшиси унга билдири-масликдир, кейинроқ ўзи кўнишиб кетар, бу тарафлардан ташвиш лозим эмас.

— Йўқ, — деди бек, — мен бу ишка башарти кўнганимда ҳам қизингиздан яширмайман.

— Нега?

— Негаки унинг ризолигини олмасдан туриб, бу ишка оёғ қўйишим мумкин эмас.

— Агар кўнмаса-чи?

— Кўнмаса, мен ҳам кўнмасликка мажбурман.

Бу узил-кесил сўздан қутидор ўйлаб қолди. Офтоб ойим бўлса, қизининг қадрини бунчалик аршларгача кўтармакда бўлған йигитка ўзида чексиз муҳаббат, поёнсиз эҳтиром сезмакда ва нима учундир йиғлагуси ва куяви юзидан ўпкуси келмакда эди.

— Тузик, — деди қутидор, — унинг ризолигини ўзингиз олмоқчимисиз?

— Йўқ, негаки қизингиз учун ҳақорат бўлған бу сўзни айтиш маним қўйлимдан келадирган иш эмас, — деди. Эру хотин бир-бирларига қарашиб қўйдилар. Кейинги сўзни айтиб битиргач, Отабекнинг кўзига ёш келган эди. Ўзининг ҳолидан уялди шекиллик, уларнинг олдидан ту-

риб ташқарига чиқди. Ул чиқғандан сўнг эру хотин яна ярим соатча жанжаллашиб ўлтурдилар.

\* \* \*

Хуфтан намозидан сўнг янғиланган ташвишларни бир оз унугтирадар умиди ила пойчароғ ёнига ўлтуриб, Фузулий девонини варақлар эди. Аммо Фузулийнинг ранг-баранг шеърлари устида қаноатланиб тўхтамас, ҳамон варақлағандан-варақлар эди. Шоирнинг нафис шеърлари ҳозир унинг учун тузсиз сўзлар йигиндисидан бошқа бир нарса ҳам эмас эдилар. Ул шу вақт тўсиндан китобни ёпди-да, айвонга қулоқ солди. Чунки ҳозиргина сўзлашиб ўлтурган Кумуш билан онасининг товушлари ўчкан эди. Ул бу ҳолдан шакланди. Айвондан она-боланинг қаёқ-қадир йўқолгандарини пайқагач, тусида ўзгариш бўлғани ҳолда қайтиб келиб ўлтурди. Нима учундир ҳозир унда бирар фожиъага тушкучининг ҳолати бор эди. Киши изтиробка тушкан кезларда тилаб эмас, ихтиёrsиз баъзи бир йўсунсиз ишларга уринадир. Шунингдек ул ҳам жиддий бир равища Фузулий мутолаасига берилди.

Ул ўзининг шубҳасидаги гапка қониъ<sup>1</sup>, орадан ярим соатлаб эмас, бир соатлаб вақт ўтиб борған бўлса ҳам бу унга зерикарлик эмас, тез келгандан келмагани яхши; яхшилиқми, ёмонлиқми ҳайтовур бўладирған кўнгилсиз гапни кечиккани яхши... Фузулийни яхшилаб ўқуш кепрак. Шунинг учун ҳам маънолик шеърлардан бошини кўтармайдир-да, гўёски айтарсиз китобка михланган...

Кумушнинг уйга келиб киргани ҳам унга сезилмай ҳолди. Ул қушлар каби латиф товуш чиқармаслиқ қилиб гилам устидан юриб келди-да, секингина шамъ ёнига — Отабек қаршисига ўлтурди. Унинг кўйнагининг чиқарған сингилгина шамоли билан ёниб турған шамъ "лоп" этди-да, кўришкандек, ўйнашқандек бўлди. Бу ҳолдан китоб устига муккадан кетиб ўлтургучи чўчиб кўтарилиб қаради. Қаршисида: Фузулий таъбирича себи занахдони<sup>2</sup> негадир қизариб, новаки мижкони кўз ёшлари билан жуфталанган

<sup>1</sup> Қониъ — қаноат қилган.

<sup>2</sup> Себи занахдон — бағбақа.

ҳалиги пари эди... Биринчи қаращдаәк куткан ишининг тўғрилиғига инонди ва осийлар<sup>1</sup> каби кўзини ерга тикиди. Ул Кумушдан итобомиз сўзлар, аччиг хитоблар кутар; биринчи итобдаәк ота-она гуноҳига таеба қилишга ҳозирланар эди. Аммо иш ул куткунча чиқмади. Кутилмаган жойда, гўёки уни бу оғир ҳолдан қутқармоқчи бўлғандек:

— Фузулий яхши китоб, — деди Кумуш, — мен ҳам ёлғиз қолган кезларимда бу китобдан бошимни ололмас эдим, сизамми?

Отабек гарангсиб қолган, ўзини овутмоқчи бўлган бу олий жаноб гўзалга нима дейишни билмас, қаердан сўз бошлишқа ҳайрон эди:

— Ким йиглатди сизни?

— Йиглабманми?

— Кўзингиз, кипракингиз...

— Ўзи шунаقا...

— Йиглатган мен эмасми?

— Китобни нега ёпдингиз? Очиб ўқунг, мен эшитай.

— Ота-она ризолигини бир томчи кўз ёшингизга арзитдими?

— Мен рози, мен кўндим, — деди дафъатан Кумуш, бу сўзни нимадандир қўрқгандек шошиб айтди.

— Кўндингиз...нега, а?

Отабек таажжуб ва ҳайрат ичидаги эди.

— Негаки, — деди Кумуш, — мен сизга ишонаман...

— Шунинг учун...

— Шунинг учун кўндим...

— Кўнглингиз фаришталар кўнглидек.

— Сизнинг ҳам кўнглингиз...

Икки жон, икки юрак гўёки биттадек бир-бирисини онглар, бирисидан-бирисига ўтиб юрар эди шу вақт.

— Бўлмаса нега йигладингиз?

Бу саволдан Кумуш бир мунча ўнггайсизланиб, уят аралаш бир табассум билан:

— Ўзим... — деди ва кейинидан ўзининг ҳамма тилак ва шартлари матъносини жамъи бўлган, — мени унутмай-сизми? — деган сўрогини берди. Ул нима деб айтишқа сўз

<sup>1</sup> *Oсиў* — гуноҳкор.

тополмай қолди. Чунки юрак сирини ифода қиларлиқ жумла топиш мүмкін эмас эди. Жавоб беріш үрніга үзіча сұзланды:

- "Ота-она орзуси..."
- Биламан, — деди овутқучи товуш билан Кумуш.
- Маним орзумни ҳам биласизми?

Кумуш Отабек яқиниға сурілди ва тирсаклари билан унинг тизасига ёнбошлаб әркаланды...

\* \* \*

Қутидор тарафидан әртага Тошканд жұнаш әълони бөрілди. Иккисининг ҳамма вақтлари шамъ ёнида сұзлашиб кечди...

### 3. ҚОВОҚ ДЕВОНАНИНГ БЕЛБОҒИ

Оч қорингә салимсоқ еб, күкчой ичишдан зериккан кишилар чойхонага Қовоқ девонанинг кириши билан унга сүз қота қолдилар:

- Келинг-келинг, девона!
- Бир коса чойларинг борми, хұвари?
- Бор-бор, авлия, битта бачча бўлсангиз идиши билан сизники.

Қовоқ девона деганимиз ўрта ёш, сийрак соқол, қотма, кун иссиғлиғиға қарши ўчакишкандек бошиға эски телпак, әннига пахтасидан бошқаси тўзиб кеткан гуппи чопон кийиб, янги бўз белбоқни беш-олти айландириб боғлаған ва унга беш олтида чилим қовоқдан тортиб то сув қовоқ, носқовоқ ва томоша қовоқларгача осқан; қовоқларнинг оғирлигидан аранг ҳаракат қиласырған ўз замонасиинг машҳур бир девонаси эди. Бу девона Тошканднинг барчасига маълум; бесклардан, бойлардан; қисқаси шаҳарнинг катта-кичигидан ўзига ихлосмандлар ортдирған ва кўбларнинг тарафидан қилған кароматлари ривоят этилган бир мажнун эди. Шаҳардаги ҳар ким унинг ошнаси, қаромати билан бепарво бўлғанлар ҳам унинг қизиқ ҳаракатларига ва тутал сўзларига қизиқар эди. Бу чойхонадагилар ҳам шу кейинги синфдан эдилар.

Бирарта ихлосманд қўлидан боллаб томоқ еган бўлса керак, ҳозир ўшанинг чанқовини босмоқ фикрида эди.

— Баччанг ким, баччанг? Онам мени баччалик учун туғмаған... Чойингдан бер — чойингдан!

— Онангиз сизни нима учун туққан?

— Хоннинг қўйини боқиш учун, қовоқларни белга тақиши учун; чойингдан бер-чи, хўвари!

Девонага бир пиёла чойни ичишка ҳам тинчлик бермадилар. Улардан биттаси кўзни шамгалат қилди-да, белдаги қовоқдан биттасини юлиб ҳам қочди. Иш ёмонга айланди. Қувлаб тутолмади. Сўнгра келиб яна бир коса чойни ичди ва унга-бунга қовоги тўғрисида илтимос қилиб қаради. Бўлмагач, қовогини қўмсаб ҳўнгир-ҳўнгир йигла-моққа олди. Эрмакчиларнинг куткани ҳам фақат унинг ёши мишиғига, мишиғи тупугига қўшилиб йиглаши эди.

Қовоқни юлиб қочқан томдан келиб сүфанинг устидаги сўрига қовоқни осди ва ўзи тушиб девонанинг ёнига кетди:

— Ковоқ ўғрисини ушладингизми, девона?

— Йўқ, ука! Қовоғимдек шишиб ўлсин, қочқанча кетди!

Бирав Эски жўвада кўрганлигини ва қовоққа миниб кетаётқанини сўзлади. Иккинчиси "зап қовоқ эди-да" деган эди, учунчиси "аттанга" деб қўйди. Девонанинг ўпкаси шишиб кетди. Эрмакчилар унинг юрагига галма-гал ўт ёқар эдилар.

— Қовоғингизнинг ўзи бу иқтимода йўқ нарса эди-да, — деди бирав. Девона қовогининг таржумай ҳолини сўзлаб берди:

— Дадам мусаллас қовоқ, ойим мош қовоқ, мен бел қовоқ... — деди. Кулишдилар. Эрмакчилардан биттаси юқорида осилған қовоқни кўрсатиб ажабланди:

— Ийи-ийи, анув кимнинг қовоги-я?

Девона сўюкли қовогини сўрида кўриб қувона кетди:

— Вой хўварингни... жиннилар, вой эси йўқ хўварилар! Қовоғимни бер, жиннилар!

— Тузик-тузик, авлия. Қовоғингизни тушириб берсам нима берасиз?

— Сўраганингни ол, жинни... Ойим қишлоғига бек бўл, тентак: тилла жабдуқлиқ от мин, жинни...

— Мен Ойим қишлоғининг беклиги уҳдасидан чиқолмайман. Қовоқларингизнинг касбини айтиб берсангиз бўлади манга.

Девона бу шартка кўнди, қовоқ туширилиб, девонанинг қўлиға эсон-омон тегди. Маҳбуба ортиқча бир эҳтиёт ва эътибор билан белга — бошқа йўлдошлари ёнига тугилди.

— Қани, энди бўлсин, девона!

Қовоқ девона белидаги қовоқлардан битта эгри май-

могини кўрсатиб: — Манов Мусулмон чўлоқ, — деди, унинг ёнидаги кичкина томоша қовоқни туртиб: бунов, Худойбачча (Худоёрбачча,) — деди, сув қовоғини эркалаб "Нор калла" — (Нормуҳаммад қушбеги), — деди. Қолған иккита силлиқ қовоқчаларни "носқовоқ, юпқа томоқ", — деб қўйди. Эрмакчилар кулишилар. Бу қовоқ ўғрилари ичидан тезроқ қочиб қутилиш учун кетишкан интилган эди, бирави ушлаб қолди.

— Тўхтанг ҳали, гап бор! — девона сўқиниб тўхтади. — Манави белингиздаги белбогни қаердан ўғирлаб олдингиз?

— Қўй, жувонмарг бўгур!

— Ўткан куни ўғирлатқан белбогинг шу эмасми, Ка-  
римқул? — деб ёнидагига қаради эрмакчи.

— Ҳа, ҳа, худда ўғирлатқан белбогим, тутдик ўгрини!

Қовоқ девона худда белбогидан ажрайтургандек икки  
қўли билан белига ёпишди.

— Санники бу эмас, тентак!

— Йўқ, худда маники шу, еш, бўлмаса миршаб чақи-  
раман.

— Ҳўварингни... нима дейди бу!

— Тўғри айт, буни қаердан ўғирладинг?!

Девона белбогининг тугунига азтаҳидил ёпишқани  
ҳолда:

— Ўғирламадим, тентак, ҳожи поччангни тўйидан ол-  
дим, жинни! — деди.

— Ҳожи поччанг ким? Ёлгон сўзлама, ўғри!

— Ҳожи поччангни танимайсанми, тентак?

— Тошканда ҳожи поччадан кўпи борми, ўғри?

— Эсинг кетибди, жинни... Юсуфбес ҳожинг-чи. Ахир, тўй  
бўлди, базм бўлди, ўтул уйланди... қўй, жувонмарг бўгур!

Девона эрмакчилар қўлидан аранг қутилиб чиқди. Ам-  
мо уларнинг ичидаги кўзини боғлаған бир киши нима  
учундир девонанинг орқасидан эргашди. Чойхонадан анча-  
гина узоқлашқан эзилар.

— Девона! — деб чақирди ҳалиги эргашкувчи.

Девона ўзига қараб келгучи бу кўз оғригини таниди.  
Сўюкли қовоқлар устига келган бало бўлмасин учун,  
кетар экан, қовоқларини эҳтиётлаб ушлади:

— Нима дейсан, кўз оғриги?

— Қўрқмангиз, девона! — деди кўз оғриги ва адимла-  
рини тезлатди.

— Нима ишинг бор?

— Тўхтанг.

Девона аранг түхтади. Күз оғриги уни чўчитмас учун наридан туриб ёнчигини кавлий берди.

— Сизга назрим бор.

Бу сўзни эшитиб, девона йўлга тушди. Күз оғриги унинг кетидан югурди ва:

— Манг! — деб пул кўрсатди. Девона илтифотсиз кетаберган эди: — Тўхта дейман! — деб дўқ урди. Девона нарида тўхтади:

— Келма, келма, кўз оғриги!

Кўз оғриги ўн адимча нарида турди:

— Ҳали, ким ўғлини уйлантириди, дединг?..

— Ким уйлантириди, дединг?

— Айтинг-ку чойхонада!..

— Айтинг-ку чойхонада...

— Белбогни қасрдан олдинг?

— Бувинг берди.

— Тўғри айт!

— Тўйга келдингми?

— Тўйга келдим...

— Юсуфбеникигами?

— Юсуфбеникига.

— Белбогинг йўқми?

— Йўқ.

— Тўй ўтканда келибсан.

— Юсуфбе қайси ўғлини уйлантириди?

— Нечта ўғли бор?

— Нечта ўғли бор!

— Битта... Қоратгиндан келдингми, опанг омонми?

— Омон... қачон уйлантириди?

— Ўзинг уйланганмисан?.. Қоратгиндан исча кунда келдинг?

— Беш кунда. Қачон уйлантириди?

— Эшакка минибми, яёв?

— Эшакка миниб.

— Нашанг борми?

— Бор.

— Қитта бер-чи.

— Бераман, олдин айт; қачон уйлантириди?

— Тўй ўтканда келибсан, тентак... Манга-чи, бир тогора ош тегди.

— Бозордан ош олиб берсам сўсанми?

— Юзингга қачон чечак чиқди?

Кўз оғриги бу тутал сўзлардан асабийлашиб кетди:

— Қачон уйлантириди дейман?

— Тўй ўтканда келибсан дедим-ку... Бир ҳафта бўлди, ўн кун бўлди, бир ой бўлди. Ҳа, ҳа, чарлари энди бўлар эмиш... чарларга бор, Қоратегин.

— Тошкандан уйлантиридими?

— Хи, хи, хи, аҳмоқ. Тошкандан бўлмай, Қоратегиндан уйлантирсингми?

Шундан кейин кўз оғриғи чойхонага қайтди...

#### 4. ЖОДУГАР ҲИНДИ

Қайин отасининг оғриған касалидан тузала олмай ва ё тезроқ ўлиб тирикларни қутултиrmай "чарлар" балоси билан ўзини ипсиз боғланғани учун сўнг чекда сиқилган, шунга кўра онасиға ачитиб сўзламакда эди:

— Ўйлаб-боқинг онажон! Бир бечора сизнинг орзунингизни деб, қизи устига кундаш юклиди ва биргалашиб тўйингизни ўтқузиши. Иш кучидан қолиб, ўн кунлаб Тошканда юрди. Нима бўлғанда ҳам биравнинг яхшилигини билиш керак эди.

Ўзбек ойим ўзининг бир ҳафталик сўзини такрорлар эди:

— Энди нима қил дейсан болам, ўтқузмай кетишинг уят.

— Уят дейсизда, уятка ўзингиз тушинмайсиз.

Ўзбек ойим ўглининг терс сўзидан қизиши.

— Жуда ҳовлиқа берма, ўғлим. Чарлар ҳам ўтар, андининг юзини ҳам кўрарсан!..

— Онажон, — деди Отабек, — сизнинг заҳарлик сўзларингизга нима дейишкага ҳам ҳайронман... Биллоки, манинг ҳовлиқишим сиз айтканча бўлса... хотинимниғина эмас, унинг ота-оналарини андишасида шошаман. Уларнинг кўнгилларига гап келмасин деган мулоҳазада ҳовлиқаман. Мен сизнинг орзунингизга бутунлай қарши тушиб, Тошкандингизни тилга олмаслиқача борғанимда ўша бечоралар сизнинг риоянгиз билан мени бу ерга судрагандек қилиб олиб келдилар... Уятни билсангиз, энг ози шунинг андишаси керак эмасми?

— Бўлмаса чарларни кутмагин-да, югира қол, — деди Ўзбек ойим, — марғилонликнинг ўқчангдан<sup>1</sup> урганлиги аниқ экан.

<sup>1</sup> Ўқча — хаёл, ўй, фикр.

Отабек камоли бўғилғанидан сукут қилишга мажбур бўлди, чунки бу орзу-ҳавас онаси ярани ҳар замон каттароқ оча боришига жуда ҳам уста ва бу усталиқ унинг барча кутканларининг кундан-кунга бўшка чиқа борғанлигидан эди. Айниқса унга ҳозир бутун маъноси билан сир онглашилиб, марғилонлиқнинг жодусини жуда ҳам кучлик эканига имон келтирди. Ўғлининг орзу-ҳавасини кўрди — кўриш бўлса — орзулағандан ортиқ. Бироқ бу орзу-ҳавас орқасидан кутилган марғилонлиқ балосидан ўғлини қутқариш масаласи унинг тилагича бўлиб чиқмади-да, яна марғилонлиқнинг сиҳри ўтқирлик қилди... Никоҳ куни Отабекнинг кийимларини жуҳуд домладан ўқутишлар, марғилонлиқдан совитиб тошкандликка иситишлар — барчаси ҳам ҳозир ўз ажзларини<sup>1</sup> унга иқрор қиласар эдилар. Кейинги "беш-бош" домланинг берган тутатқи, эзиб ички, дуо ва туморлари ҳам негадир таъсир асарини сездирмадилар...

Ўзбек ойим марғилонлиқнинг домласини кучлик эканида шубҳа қилмаса ҳам аммо бир ишка жуда ҳайрон эди: жуҳуднинг қилған жодусини — жуҳуд, мусулмон домланикини — мусулмон дафъ қила олур эди; нега булар асар қилмайди сира? — Ҳозир Ўзбек ойим бунинг сиррини ўйлаб тополмас эди. Бу боши берк кўчада ул узоқ қамалиб қолмади — бунинг сиррини дафъатан топди, ҳам жуда тўғри топди: "Марғилонлиқнинг домласи жуҳуд ҳам эмас, мусулмон ҳам эмас — ҳинди! Ҳиндиларнинг ҳам ҳанноси<sup>2</sup>, бас, ҳанносининг сиҳрини на мусулмон домласи қайтарсину, на жуҳуд. Ўшал ҳиндининг ўзи қайтармаса, ўзга иложи йўқ!"

Нима қилмоқ керак? Тошкандда бирарта ҳинди домласи йўқки, иложини қилиб берса... Энди хотин боши билан марғилонга мурожаат қилсунми?

Бошка тушканни кўз кўрар, деган сўз бор. Ўзбек ойим ҳам бошига тушкан бу кулфатни кўришка мажбур эди: "Шу галдан қолдирмай Отабекнинг ёнига Ҳасаналини қўшиб Марғилонга юбораман, Ҳасанали у ердаги ҳинди домлага учрашиб, Отабек устидаги сиҳр-жодуларни ешдирсинг... Ҳинди ҳар қанча олса ҳам майли, бисотдан у-буни сотиб пул қилиб бераман".

<sup>1</sup> Ажз — ожиз, кучсиз.

<sup>2</sup> Ҳаннос — худодан ҳам қўрқмайдиган, қасамдан қайткан, маккора.

Отабек онасининг қаршисида бояги сукутка кетканича жим ўлтуар эди. Ўзбек ойим ҳалиги кашфиётдан қутилиб бу тўғрида сўнгти қарорини қам бериб бўлғач, Отабекка деди:

— Ўғлим... янги уйланган отинг бор. Маним олдимда ўлтуриб нима қиласан? Бечора ёлғуз ўлтурибdir.

Отабек онасиға бир қараб олди-да, жавоб бермади.

— Бор, болам, бор. Яхши эмас бу ишинг... — Ўзбек ойим сўзини бўлиб дарича ёниға келиб тўхтаган Ойбодоққа қаради.

— Сутчой тайёр бўлди, сузиб кирайми?

— Икки косани келинлик уйга бер, мен билан Ҳасаналинигини шу ерга келтир.

Ойбодоқ кета бошлиған эди, Отабек уни тўхтатди:

— Маникини ҳам шу ерга олиб кир, — деди. Ойбодоқ Ўзбек ойимға қаради. Ўзбек ойим ўғлиға хўмрайди. Отабек хўмрайишға илтифот қилмай, Ойбодоққа "шундоқ қил" ишорасини берди.

— Бўлмаса келинникини ҳам шу ерга бериб, ўзини чақир. Ҳасанали уйида ичсин, — деди Ўзбек ойим. Ойбодоқ кеткач, ўғлидан сўради, — бу нима қилиқ, болам?

— Қилиқ эмас.

— Келин билан бирга ичсанг нима бўлар эди? Биравнинг боласини мунчалик хорлаш яхши эмас.

— Бундан хорлағанлиқ чиқмайдир. Ўзини шу ерга чақирдингиз — иш битди.

Ўзбек ойим тагин нимадир айтмакчи эди. Ойбодоқ дастурхон кўтариб кириб қолди.

— Келинга айтдингми?

— Айтдим.

Дастурхон ёзилиб, тушлик чой келди. Ўзбек ойим косасига нон ташлаб кўзи эшикда, яъни келинни кутар эди. Келин эшикдан кўрингач, ўғлиға "қарши ол" дегандек қилиб қараб қўйди. Ўн етти ёшлар чамалиқ, кулчалик юзлик, оппоққина, ўртacha ҳуснлик Зайнаб қайнин онасининг тилак ва шаънига лойик тавозиз — одоблар билан битта-битта босиб дастурхон ёниға келди. Қайнин она томонидан "ўлтуринг" рухсати берилганидан сўнг, қисилиб-қимтиниб товуш чиқармайгина ўлтурди. Ўзбек ойимнинг кўзи ўғлида. Ўғли бўлса чойга нон ҳўллаб смоқда эди. Бир-икки қайта хўмрайиб-хўмрайиб ўғлиға қаради-да, унинг кўзини учрашдира олмағандан кейин, унга сўз қотишга мажбур бўлди:

— Чарларинг ҳам бўла қолмадики, қайин отангни бо-риб кўрсанг. Ёки чарларсиз ҳам кўра қоласанми?<sup>1</sup>

Зайнаб кўзини эрига тикиб қолди. Отабек салқингина онасига жавоб берди:

— Кўрсам бўладир... — деди ва кулимсирагансумол Зайнабка қаради. Зайнаб ҳам кулган бўлди. Шу кичкинагина кулимсираш Ўзбек ойимни анча тинчитди. Аммо мусоҳаба шунинг билан тўхталиб, орага яна бояғи жимжитлик кирди. Ўглининг миридан сирини ажратиб ўлтурғучи она яна олазарак оғриғига йўлиқди. Зайнабнинг кўзи тез-тез Отабекка тушар, у бўлса хўр-хўр чойни ичар эди. Бу ҳолдан Ўзбек ойим ич-этини еб, юткан луқмасининг мазасини ҳам билмас, қисқаси, ўлтуриш сўзсиз, гўё тузсиз ва маъносиз эди. Бу маъносизлик тадбирини кўриш яна Ўзбек ойим устида:

— Келин пошшога тилла узук буюрдингми?

— Буюрдим. Эрта-индин битиб қолар. — Отабек сўзни чўзмоқча йўл қўймади. Аммо онаси гапдан гап чиқариб, сўзга сўз уламоқчи эди:

— Тилла чочпопугингиз бор эдими?

Зайнаб эрига қаради ва ийманибгина жавоб берди:

— Йўқ.

— Йўқ бўлса олиб бераман, — деди Отабек. Ўзбек ойим анчагина жонланиб олди. Тағин ундан-мундан сўз уринтироқчи бўлған эди, унча муваффақиятлик чиқмай боштади. Сутчойдан сўнг қумғонда чой келди. Зайнаб биринчи пиёлага қуйиб ўрнидан турди ва қайин онасига икки қўллаб узатди, иккинчи пиёлани тўлдириб ўрнидан турмоқчи бўлған эди, уни Отабек тўхтатди.

— Мундан кейин чой беришда ўрнингиздан туриб ўлтурманг, — деди. — Ўлтурган ерингиздан берсангиз ҳам бўладир.

Лекин бу гап қайин онага ёқмади, эътиroz қилди:

— Нега ундоғ дейсан, бола. Ўриндан туриб чой бериш одамзоднинг зийнатидир, келинларнинг бор-йўғи келинлиги ҳам шунда-ку!

— Сизнинг учун ҳам ўлтуриб чой берсин, демайман, аммо бу такаллуфнинг менга кераги йўқ, — деди ва қўлидаги чойни тез-тез ичиб бўшатди. Фотиҳа ўқуб

<sup>1</sup> Тошканд одатича "чарлар" бўлмасдан туриб, куяв қайин ота, қайин онага кўринмайдир (муал.).

ўрнидан турар экан: — Албатта сизга ўрнидан туриб чой бериши лозим... — деди ва чиқди. Бу гапни Зайнаб чинга ҳисоблагани учун бошқа нарса пайқамаган, аммо Ўзбек ойим бўзариб қолиб даррав эсига ҳиндининг жодуси келиб тушкан эди.

Шу ўлтуришдан бир соатча кейин Ўзбек ойим уйни холилатиб Ҳасаналини ўз олдига чақиртириб кирди. Ҳасанали бу чақиртириқдан бир нарса ҳам сезмаган, чунки хўжабекасининг ички сиррига унча ошно эмас, чарлар маслаҳатидир, деб ўйламоқда эди. Ўзбек ойим уйнинг эшигини беклаб келди-да, Ҳасаналининг яқинроғига ўлтурди ва ярим товуш билан муддаони оча бошлади.

— Энди иш Тошканд домлалари билан битатурғанға ўхшамайдир... Ўйлаб қарасам, Марғилонлиқнинг домласи ҳинди экан. Шунинг учун ноилож сани олдимға чақиртиридим. Сан ҳам одамсумол гапимга тушиниб, бу тўғрида ақлинг етканча зеҳнингни югириргин... Ўзингта маълумки кундан-кунга марғилонлиқни унтиши ерига ҳар соат унга эси борадир. Бу ҳолларнинг барчаси ўша ҳиндининг жодусидан бўлиб, муаккиллар<sup>1</sup> Отабекнинг бўйнидан сиртмоқ солиб Марғилонға тортадирлар...

Ҳасанали хўжабекасининг кўбдан бери домла-хўжа билан саргардон бўлиб юришини билса-да, аммо унинг "ҳинди, сиртмоқ солиб тортиш" каби сўзларига тушинмади. Бекасининг феъли хўйини яхши билгани учун, яни унинг қарғашидан қўрқиб тушинмаганлигини билдирамадида, "қани гапнинг теги қаерга борар экан", деб жим, қулоқ солған бўлиб ўлтура берди. Аммо Ўзбек ойим сўзини ҳалиги ерда тўхтатиб: "Сан шунга нима кенгаш берасан?" деган савонни берди.

— Мен нима дер эдим... Сиз нимани маъқул кўрсангиз шу-да, — деди. Ҳасаналининг тушинмаслик орқасида берган бу жавоби Ўзбек ойимга ниҳоятда ётишиб келди:

— Баракалла, Ҳасан. Ана шунинг иложини ўзинг қиласан.

— Яхши...

— Эрта-индин чарлар бўлиб ўтса, албатта Отабек

<sup>1</sup> *Муаккил* — фаришта.

Марғилонға югирадир. Шу вақтда сан ҳам бир нарсаны баҳона қилиб бирға Марғилон борасан-да, қаердан бўлса ҳам ўша ҳиндини топасан ва назрини бериб яхшилаб қайтартириқ қилдирасан...

— Кимни?

— Кимни бўлар эди, Отабекни-да.

— Нега?

— Тушинмадингми?

— Тушиниш бўлса — тушиндим... Шунчаки аниқлаб олмоқчиман-да.

— Марғилонлиқ-ку Отабекни ҳинди домладан ўзига боғлатиб қўйибdir. Ана шуни сан ҳам пайқаб юргандирсан-ку?

— Пайқамаган бўлсам ҳам, аммо мақсадингизга энди тушиндим,— деди кулиб Ҳасанали. — Ниятингиз Отабекни марғилонлиқ келиндан совитиш.

— Баракалла, — деди Ўзбек ойим, — совитишкина эмас, унинг чангалидан Отабекни узил-кесил қутқариш.

Ҳасанали ҳайрон бўлди. Чунки хўжабекасининг марғилонлиқка мунчалик адовати бор деб ўйламас эди.

— Нега энди?

— Ўғлимни марғилонлиқларнинг қўлига бериб қўймайман-да, ахир. Бурун Тошканда хотини бўлмаган бўлса — энди бор, мундан кейин анди келинга бизнинг муҳтожлигимиз йўқ...

— Хайр, энди нима қилмоқчисиз?

— Нима қилишим кундан ҳам равшан, — деди Ўзбек ойим ва тамом қаноат ва ишонч билан бояғи мақсадни такрорлади: — Ўзингта айтканимдек Марғилондағи ҳинди домланинг ўзидан бир мартаба қайтариқ қилдирсақ марғилонлиқнинг сиҳр-жодулари ботил<sup>1</sup> бўлиб, Отабек ўз-ўзидан андини талоқ қилиб юборадир...

— Сиз марғилонлиқ ҳинди домланинг ўғлингизга қилған жодусини қаердан билдингиз?

Ўзбек ойим бу савол билан ўзининг кашфидан бир оз шубҳаланди-да, ишончсизроқ қилиб:

— Ўзим билдим, — деди.

— Ўзингиз қаёқдан биласиз, ахир бирав айтканdir сизга?

<sup>1</sup> Ботил бўлмоқ—бузилмоқ, бўшашмоқ.

— Ўз ақлым билан топдим.

Ҳасанали ўзини тутолмай кулиб юборди:

— Лекин шунга қолғанда ақлингиз бир оз янгишибдир...

— Нега?

— Негаки икки ўртада сиҳрчи ҳинди ҳам йўқ, сиҳр қилдирғучи марғилонлиқ ҳам, Отабек ҳам сиҳрланган эмас.

— Нега бўлмаса Отабек ҳадеб уйланса ҳам Марғилонга ошиқаберадир?

— Бунинг сабабини ҳали ҳам билмайсизми?

— Биламан, сиҳр-жоду қуввати.

— Жодуни ким қилдирадир?

— Қайин отаси, қайин онаси, қолаберса хотини.

— Янгишасиз, ойи.

— Нега янгишаман?

— Сиҳр-жоду қилишдан уларнинг мақсади нима, деб биласиз?

— Калвак ўғлимнинг ақлини ўғирлаб, пулини смакчилар.

— Пулини смакчилар? — деб кулди Ҳасанали.

Марғилонлиқ қудаларингизнинг давлати олдида бизникини йўқ, деса бўладир. Ундан кейин мен яхши биламанки, улар Отабекка уч пуллик ҳам рўзгор қилдирмайдирлар. Буни ўзим яхши билганимдек ўғлингизнинг ўзидан ҳам "уларнинг рўзгор қилдирмаганларидан жуда сиқиламан" деган сўзини неча қайта эшигдим. Шуни ҳам яхши билмоқ керакким, ўша жодугар қудаларингиз ёмон кишилар бўлғанларида Отабекни Тошкандан уйлантириш сиз ўйлаганча қулагай иш бўлмас эди. Ўғлингизнинг Марғилон боргандан сўнг ваъдасидан айнаганини албатта ҳожидан эшиктан бўлсангиз керак...

Ўзек ойим енгилаёзган бўлса ҳам, айниқса Ҳасаналидан тил қисиб қолгуси келмас эди. Гүёки шунча ўткан гапларга қиймат бермагандек:

— Мен бунинг сиррини энди хўб билиб олдим, — деб қўйди.

Ҳасанали кулди.

— Билсангиз ҳам янгиш онглабсиз, чунки бунинг сирри сиз ўйлаганча эмас.

— Қандоғ?

— Ўғлингизнинг ҳар замон Марғилонга ошиқмоғи... айниқса бу гал қайин ота, қайин оналаридан андиша қилибдир. Ундан кейин...

— Ундан кейин?

— Ундан кейин катта келинингиз ўғлингизнинг кўз очиб кўргани.

— Кўз очиб кўргани? — деди Ўзбек ойим ва истеҳзозланиб кулди. — Зайнаб ўша марғилонлиқча бўлмапти, дегин?

— Мен қаёғдан билай... Эҳтимол ўғлингизча шундайдир...

— Ўзинг уларнинг иккисини ҳам кўргансан, индалло<sup>1</sup> сўзла: улардан қайси бирисининг ҳусни ортиқ?

Ҳасанали бу савол қаршисида нима деб айтишка билмай қолди...

— Муҳаббат деган нарса ҳуснга қарамайдир...

— Қарайдирми, йўқми, сандан уни сўраётқаним йўқ. Қайси бириси кўҳликрак деб сўрайман?

Ҳасанали қийналди ва гапни бошқага чалғитиш учун:

— Энди маслаҳат нима бўлди? — деб сўради.

— Олдин сўзимга жавоб бер-чи, ер юткур!

— Саволингиз қизиқ, нима деб жавоб беришкан ҳайронман... Тўғрисини айтайми?

— Тўғрисини!

— Тўғрисини индалло сўзласам, — деди ва қийналиб тўхтади, — ҳар бир гулнинг иси ўз йўлиға.

— Тўғрисини дейман!

— Анув келинингиз ўлса — ўлиги ортиқ...

— Гапирма-гапирма, — деди Ўзбек ойим, — бошда шу марғилонлиқ балосига ўзинг сабабчи бўлғанмисан, ҳали ҳам ўшанинг томонини олиб сўзлайсан! Сандек соқоли узун, ақли қисқадан кенгаш сўраб ўлтурған мен ҳам аҳмоқ!

Ҳасаналининг чалғитиши ва ҳайрон бўлиши Ўзбек ойимнинг табиъатини яхши билгани учун эди. Ул ўз хоҳишига тескари келган ҳақиқатни кўрмайдирган қизиқ бир табиъатка молик эди.

— Ўзингиз тўғрисини сўзлатиб, тагин нега мендан ҳафа бўласиз, ойи, — деб муқобала қила бошлаган эди, Ўзбек ойим яна гуруллаб кетди:

— Бўлди-бўлди... тузингни ичиб, тузлиғингта тупурганинн худой кўтарсинг, — деди.

<sup>1</sup> Индалло — худо ҳақиқи, рост.

Ҳасанали хўжабекасининг қарғиши ва койиши остида кула-кула уйдан чиқди.

Бу мусоҳаба кўринишида Ўзбек ойимга унча ўзгариш бермагандек сезилса ҳам, лекин руҳан уни анча бўшаширган эди.

\* \* \*

Шу гапдан бир ҳафта чамаси кейин ва чарлар кутишнинг ўн бешинчи кунлари эди. Отабек меҳмонхонада тоқчадаги китоблар орасидан қандайдир бир китобни ахтарар экан, Ҳасанали унинг ёнига кирди.

— Панжшанба кун чарлар эмиш, хабарини бериб кетди.

Отабек китоблардан бирини сугуриб олди ва варақлар экан, "чарлари ҳам қурсин" деб қўйди. Кўнглидан кечириди: "Бу кун душанба бўлса, тагин орада тўрт кун бор".

— Мана бу хат ҳам сизга эмиш, — деди-да, Ҳасанали унга бир мактуб узатди, — боя бирав бериб кеткаи эди, — деди ва шошиб-пишиб қазо бўлаёзган аср намозини ўқуш учун жойнамоз ёзди. Отабек мактубнинг унвонига кўз ташлади: "Тошкандда... маҳалласида тургучи Отабек Юсуфбек ҳожи ўғлиға тегсин". Ким томондан ёзилғанлиги унга маълум бўлиб, қўлидағи китобни тоқчага қўйди ва шоша-пиша хатни очди.

Катта қоғозда туссизроқ сиёҳ билан ёзилған узун бир хат. Унинг кўзи ёзув устида сузди. Сузган сайин негадир унинг тусида улуғ бир ўзгариш, вужудида бир титроқ воқиъ эди. Бу хат унга сўйинч берар эдими, даҳшатми — ўзидан бошқага мажхул эди. Шу мажхул ўзгаришларнинг сўнг чекига бориб еткандан кейин хатдан кўзини олди ва ихтиёрликми, ихтиёrsизми, ҳайтовур бор товшича "Қўрқутмоқчи!" — деб юборди. Бу сўз билан Ҳасанали ҳам нари-бери намозини битирди-да, жойнамоздан бурилиб қаради:

— Нима гап?

— Ҳеч гап йўқ, — деди Отабек ва эсанкираш вазиятида унга қаради:

— Қўрқутмоқчи, дедингиз-ку, хат кимдан?

— Хатми? — деди ва шунинг ила бир оз эсини ўзига иғиб олғандек бўлди, — хат келинингиздан... Қўрқутмоқчи бўлиб бъязи бир кинояларни ёзибдир.

Бу гапни айткандан сўнг хатни буклай берди. Ҳасанали фотиҳа ўқуб Отабек ёнига келди.

— Киноялар ёзиши кечикканингиз учундир, — деди. Отабек тасдиқ ишорасини бергандек бош силкиб қўйди.

— Айниқса шу гал кечикишингиз бечора келинга оғир тушиб киноялар ёзишга мажбур бўлган, — деди Ҳасанали: — Аниги ҳам бечорага жуда оғир, "кундаш — хотин зотининг ўлуми" деганлар. Энди, нима бўлганда ҳам орангизда оз қолди, чарларни ўтказа жўнайсиз-да. — Отабек жавоб бермади, чунки Ҳасаналининг кейинги сўзидан ризо бўлмаган эди. Ҳасанали уни тинчтиш учун: — Агар кўнглингиз тинчимаса, — деди кулиб, — сиз ҳам киноялик бир хат ёзib берингиз. Хат келтургучи эртага хабар олиб ўтишини билдирган эди.

Отабек бу сўздан бир оз жонланғандек бўлди. Чунки унинг кўнглига бу киноялик мактубни жўрттага ёзилған бўлғанлиги келиб тушкан эди.

— Бу гап тўғрими? — деб сўради.

— Тўғри. Эртага эрта билан келиб, хат бўлса олиб кетмакчи эди.

— Яхши, — деб кулимсиради Отабек, — эрталаб келса хат бераман.

. Ҳасанали меҳмонхонадан чиқғач, ўзини тўхтатиб олғани ҳолда иккинчи қайта хатни кўздан кечирди:

"Вафосизга. Мен ўзимнинг бу мактубимни кўз ёшларим билан ёзаман. Негаки ҳозирда маним ёлғиз кўз ёшларимгина эмас, бутун борлигум сиёҳдир. Мен энди оғизлардаги "вафо" сўзига ишонмайман. Чунки мен ўзимнинг вафосига ишонғаним бир йигитдан улуғ вафосизлик кўрдим. Уятимдан кўзларимни очолмайман. Негаки еру кўклар, тоғу тошлар ва дунёдағи барча нарсалар манинг алданғаним учун кулиб масхара қилғандек қарайдирлар... Бу кунимдан, бу ҳасратимдан қутилиш учун ўзимга ажал чақираман. Лекин ажал ҳам мен шўрлиқдан нафратланғандек, гўё ул ҳам менга вафосизлик қиласадир.

Бегим, гарчи аччиғлансангиз ҳам айтишка мажбурман: сизда виждон, инсоф, раҳм, вაъда, вафо, яхшилиқни билиш, боринг-чи, одамгарчиликдан ҳеч гап йўқ эмиш. Биль-акс сиз: ҳийлакор бир тулки, оғзи қон бир бўри, раҳмсиз бир жаллод, уятсиз бир йигит!

Сизни ҳийлакор дедим: эсингизда борми, сода отамни, гўл онами қандоғлар қилиб алдадингиз? Ёдингизда борми, шамъ ёнида мени алдаб айткан сўзларингиз, берган вавдаларингиз, "маним орзум" деб қилған хитобларингиз,

түккан күз ёшларингиз?.. Бас, бу ҳийлалар, бу макрлар сиздан бошқа кимда топилсун?

Сизни оғзи қон бир бўри дедим: чунки сизда раҳм йўқ. Сиз ўзингизнинг заҳарлик тишларингиз билан мазлумлар кўксини, баёвлар бағрини чок этасиз; янги очилған гулларни, энди бош тортқан лолаларни вақтсиз сўлдирасиз, очилиш битмай ўлдирасиз!

Сизни уятсиз дедим: илгари ваҳшатингиз билан ўзингизнинг ҳаққингиз битканлигини билатуриб ҳам яна уялмай-қизармай виждонисизлар амрини берасиз ва уятсизлигингизни яна бир ҳат ортдирасиз!

Мен сизнинг баъзи бир даъволарингизга ҳайрон қоламан: отам Тошканда экан чоғда бу гапни айтишика уялған эмишсиз... Гўё бунинг ила номуслик бўлиб кўринмакчисиз шекилллик?!

Онам баъзи вақтларда:

Янги ёр топқанда, дўстлар, эскидан кечмоқ керак,  
Эскини ўлган санаб, латта кафан бичмоқ керак, —

байтини ўқуб қўяр, мен бўлсам ул вақтларда бунинг маъносига тушинмас эдим. Аммо... энди бу байтни кимга айтилганига ва унинг маъноларига хўб тушинмакдаман. Ташландиқлиқнинг сўнг ўтинчи қилиб сиздан шуни сўрайман: учунчи ёр топқанда иккинчи бечорага ҳам шундай уятсизлик қилинмаса эди. Бу тилагим учун ажабланмангиз, чунки, "пичоқни ўзингга ур, оғримаса ўзгага сол", дейдирлар.

Сизга янги ёр, менга уятсизликнинг қурбони бўлиш муборак. Кумуш эмас, Тупроқбиби ёздим. 17-нчи жавзо, 1265-нчи йил, Марғилон".

## 5. ХИЁНАТ

Қутидорнинг Тошкандан ёлғиз қайтиб келиши Кумушни анча энтиқдирган эди. Аммо Отабекка воқиъ бўлған узр масаласи бир қадар уни тинчиди. Ишонар-ишенмас шубҳа ва васвасалардан бир оз ариди: "Ул мени унутмаган, ваъдалари чин, сўзлари тўгри... Ул ҳам мени суяр экан..." деб бурунги одати билан тоғи эрининг йўлиға чиқиб кутмакка ҳам бошлади.

Отасининг келишининг саккизинчи куни эди. Ул бу кечаси кўрган баъзи бир тушларини унинг бу кун кели-

шига йўйди-да, эрталабдан туриб сочларини ешди. Сочлари орасидаги чигилларини диққат билан тараб, жом ёнига ўлтурди. Унинг нафис қора сочлари орқа-ўнгига тўзгиб ажиб бир манзара бердилар. Сочини қатиқлаб ва совунлаб ювғач, онасидан иккита қилиб ўрдирди. Офтоб ойимнинг: "Нега қирқ кокил қилмайсан?" деб сўрашига: "Қизингиз энди қизлик давридан ўтиб, келинлик даврига кирди. Қизингизнинг мундан сўнг куявингиздан бошқа совчилари ҳам йўқ", деб кулди. Аммо бу икки ўрим соч қирқ кокилига қарағанда жуда ҳам ўзига келишиб тушиб, унга яна бир қайта улуғворлиқ ва олийлиқ бағишладилар. Сочини ўрдирғандан кейин уйига кирди-да, кийимлар тахланған тоқча ёнига тўхтади. Равоқлик тоқчада унинг ўн беш чамалиқ асл кўйнаклари уюлган эди. Сариқ рупоҳ атласини кийишка чоғлаб кўрган бўлса-да, бироқ кўйнакни олган ерида бу фикридан қайтди. Қизилни... кўкни... олма гулини... қисқаси, қайси бирисини кийишка тараффудланди. Кўйнаклар ичида ўзига ярашмайдиргани йўқ: оқ олма учун барги ҳам, гули ҳам бир... Унинг ўзига сариқ атласи хуш келса-да, бироқ ҳозир ўз хоҳишини бир ёққа қўятуриб Отабек кўнглича кийинишкага қарор берди. Чунки Отабек кўпинча қора кўйнак кийишкага қистар эди. Совсар гули қора атлас кўйнагини кийиб, бошига зангор шоҳи рўймолини солди ва марварид кўзлик кичкина олтун ҳалқани қутидан олиб қулоғига тақди. Шу соддагина ясанышдан сўнг, иккинчи тоқчада тироғлиқ турған кўзги ёнига борди. Кўзги ичидан тўзгиб,чувалиб кўринган соч толаларини тўғрилаб ўзини кузатди. Кўзги ичидан кўринган малак ўз эгасини ҳам кайфандириб секингина илжайиб қўйган эди, нариги ёқдаги фитнаи даврон ҳам садафдек оқ тишлигини ёқут каби иринлари орасидан кўрсаткандек бўлди. Бу ҳуснга оталиқ вазифасини ўтағандек кўринган латиф бурни ёнидаги қора холини табиъиyllигига ишонмағандек қашиб кўрди ва кўзги ёнидан жўнади. Жўнар экан: "...чиройлик бўлса ҳам меникідек холи йўқдир" деб кўнглидан кечирди.

Кечки олов вақтида ташқари ҳавлисида у-буға овора бўлиб юрар эди. Бу кунги кўрган туши уни ортиқ ишонтирган, шунинг учун Тўйбеканинг ташқари ҳавлида қила-дирған юмишини ҳам ўзи бажармоқда, Тўйбекадан сув сепидириб ўзи ер супурар экан, қулоқлари йўлак томондан эшитиладирган оёқ товушларида эди.

Ҳавлидаги икир-чикир ишларини тамомлағач, айвон-

нинг олдиға ўлтуриб тузатинди, тузатиар экан, йўлакдан юриб келмакда бўлған бир оёқ товшини эшитиб юраги нима учундир ошиқиниб, шопириниб кетди. Оёқ товши ичкарига яқинлашған сайн ул ўзида титроқ аралаш бир ҳол сезар эди. Ниҳоят йўлакдаги оёқ товши тугалиб, Кумуш кутмаган жойда паранжилик бир хотин келиб чиқди. Кумуш узоқ бир энтикиб қўйди.

Хотин Кумушка қараб келар эди. Ул ердан бичиб олғандек пак-пакана, бурни юзи билан баробар деярлик теп-текис, кўзи қоқкан қозиқ ўрнидек чуп-чуқур, оғзи қулоги билан қошиқ солишар даражада жуда катта, юзи қирқ йиллик огриқларникидек сап-сариқ, қирқ беш ёшлар чамасида бир хотин эди. Кумушеби ўзига томон келгучи бу даҳшатлик хотинни умрида биринчи мартаба кўрар эди. "Нима қилиб юриби бу оч арвоҳ", деб ўйлади. Хотин ўн адимлаб узоқдан юзига совуқ ва тушда қўрқарлиқ бир кулги туси берди. Димоги билан "қих" этиб қўйди.

— Хи-хи-хи, айланай сиздан, пошша қиз! Мирзакаримбойнинг ҳавлилари шуми? — деб сўради. Кумуш "шу" жавобини бергандан сўнг ўзи билан кўришмакчи бўлған бу хотин олдиға икки адим юриб тилар-тиласас елкасини тутди. Унинг тўғри мавзун<sup>1</sup> қоматига ердан бичиб олинған мудҳиш хотиннинг қўллари зўрга етди-да, "эсонмисиз, пошша қиз" деб сўрашди. Хотин паранжиси билан айвоннинг олдиға ўлтуриб олғач, "уфф" деб чайқалди ва "анча йўл экан, тинкаларим қуриб кетди-я?" деб шикоятланди.

- Мирзакаримбойнинг ҳавлилари аниқ шуми?
- Шу.
- Сиз кимлари бўласиз бойнинг?
- Мен қизлари.

— Қих... сизга берсам ҳам бўлар экан, — деди хотин ва ёнчигидан бир хат чиқарди. — Ўглим Тошканд билан Марғилон орасида қатнаб олиқ-сотиқ қиласадир. Бу гал Тошканндан қайтишида бирав унга шу хатни бериб, Мирзакаримбойнинг ҳавлиларига тез еткузиб берасиз, деб илтимос құлубдир. Қих, хи-хи, айланай сиздан, пошша қиз, қих... Махтангулиқ бўлмасин, ўглим ҳам ўзимга ўхашаш биравнинг хизмати йўлида ўлиб қутиладир: бу кун туш вақтида Тошканндан келди-да, онаси билан сўрашишни

<sup>1</sup> Мавзун — бенуқсон, хушбичим.

ҳам билмай шу хатни қўлимға тутқизди. "Жон она, ўзим йўлда жуда уриниб келдим, санга адабсизлик бўлса ҳам даррав Мирзакаримбойниковини сўроғлаб шуни элтиб бер, бергувчи тез берасиз деб ўтинган эди", деди. Мен ҳам кўнгилчангман, айланай пошша қиз, касалдан яқинда турганим учун бир қадам босишига тоқатим бўлмаса ҳам савобдан қуруқ қолмайин, деб сургала-сургала ҳавлингизни сўроғлай-сўроғлай топқунимча ўлиб бўлдим... қих... — деди. Кумуш хатни хотиннинг қўлидан олиб раҳмат айтди ва хатнинг унвонига<sup>1</sup> кўз ташлади: "Марғилон шаҳрида сокин<sup>2</sup> Мирзакарим қутидор ҳавлисиға".

— Янгишмабсиз, ойи.

— Нега янгишай айланай сиздан, пошша қиз. Улуғ даргоҳларингизни кўчадаги ҳар ким билар экан, — деди хотин ва ялтоқланиб ўрнидан турди. — Энди мен кетақолай, болагинам йўлдан оч келиб, бир қошиқ иссиққа зориқиб ўлтургандир.

— Ичкирага киринг, чой қайнатайлиқ.

— Раҳмат, пошша қиз. Анчон ичармиз чой бўлса... қих. Бир кўрган билиш, икки кўрган таниш, дейдирлар...

Кумушбиби хотинни ортиқча қистаб ўлтурмади-да, йўлаккача кузатиб борди. Хотин йўлакка бурилар экан қайрилиб тўхтади:

— Бу дуниёда шунаقا ҳожат чиқаришлардан топқанмиз, агар Тошканѓами, Қўқонгами отангизнинг хат-патлари бўлса ўғлим бажонудил олиб кетадир. Шу ўрталарга келиб қолсан хабар олиб ўтайми? — деб сўради. Кумушнинг "йўқ" дейишка оғзи бормай "майлингиз, оғир келмаса" деб жавоб берди. Хотин йўлакка бурилди. Кумуш айвон томонга қайтар экан ошиқиб хатни очти. Хат кичикроқ қофозда ўлчавлик сўзлардан иборат эди.

"Кумушбиби бинти<sup>3</sup> Мирзакаримбойға — завжи<sup>4</sup> тошкандлик Отабек Юсуфбек ҳожи ўғлидан. Отангиз Тошканда экан вақтида мен бу ишини очмоққа оғирсинган, тўғриси уялған эдим. Маълумингиз, Тошкандан уйланганимдан сўнг елғиз бошимға ҳам Тошкандан, ҳам Марғилондан икки хотин ушлаб туриш оғирлиқ қила

<sup>1</sup> Унвон — адрес.

<sup>2</sup> Сокин — турувчи, яшовчи.

<sup>3</sup> Бинт — қиз.

<sup>4</sup> Завж — куёв.

*бошлади.* Шунинг учун бу икки хотиннинг бирисидан ке-чишка тўғри келиб, ниҳоят турмишим учун енгил ва орзумга мувофиқ бўлған бир нарсага қарор бердим. Ул ҳам тошкандлик хотиним билангина қолиб, сизни талоқ қилиш эди. Мактубни олған кунингиздан бошлаб ўзингизни мендан бегона ва никоҳимдан ташқари ҳисобласангиз бўладир. Маним бу талоқ хатимни албатта шариат пешволари шаръий ҳисоблаб иддангиз<sup>1</sup> битиш билан сизга бошқа эр қулмоққа ихтиёр берсалар керак. Отабек Юсуфбек ҳожи ўғли.

*13-нчи жавоз<sup>2</sup>, 1265-нчи йил, Тошканд".*

...Ул бу мактубни ўзининг сўнг томчи кучи билан ўқуб тамом қилди-да, жонсўз<sup>3</sup> бир товуш ила "уятысиз!" деб қичқирди ва ерга йиқилиб ўзидан кетди... Йиқилишда қўлидан чиқған қофоз парчаси шамол билан учиб бориб боши ёнига тушди. Йўлак панасидан мудҳиш башара чиқиб бир-икки қайта унга кулиб қарагач, йўқолди...

Бозордан қайтқан қутидор ерда ҳушсиз ётқан қизи устига даҳшат ичидаги югуриб келди. Чаккасини зах ерга бериб йиқилған ва кесак каби ҳиссиз қизини жонҳолатда қучогига олди. "Қизим... Кумуш... кўзингни оч!" Аммо Кумушдан жавоб йўқ эди. Даҳшати юз даражага ортқан ҳолда Кумушни кўтариб олиб ичкарига юрди. Уйда Офтоб ойим билан Тўйбека қий-чув қўпордилар. Айвонга ётқизган бўлсалар ҳам Кумушни ўзига келтириш чорасини билмай, тўғриси, нима чора кўришини эслари топмас эди. Баракат берсинки, эси ярим бўлса ҳам Тўйбека умрида биринчи иш қилди: совуқ сув келтириб Кумушнинг манглай ва 'кўксига сепкан эди, сесканиб ўзига келди. Ҳущдан ажралаёзган бечоралар бу ҳолдан сўнг бир оз жонланғандек бўлдилар. Кумушни совуқ тер босиб, бир неча вақт жим ётди, шундан кейин оҳистагина ўнгланиб ётиб олғач, кўзини очди.

— Нима бўлди, қизим, кўзингта бир нарса кўринидими?

Кумуш кўзини юмди-да, энтикиб қўйди. Жавоб бермади. Бу савол отаси томонидан ҳам берилгандан сўнг:

<sup>1</sup> Иdda — эрдан вжраган ёки эри ўлган хотинга ҳомиладорлиги аниқланганча шариат бўйича эрга тегиш ман қилинган юз кунлик муддат.

<sup>2</sup> Жавоз — 22 май-21июн.

<sup>3</sup> Жонсўз — жон ўртовчи, азоб берувчи.

— Мени ташқаридан ким олиб келди? — деб сўради.

— Мен, қизим!

— Ёнимда ҳеч нарса кўрмадингизми?

Қутидор бу саволдан бошқа гап тушинди:

— Йўқ, қизим, сен ўзинг ёлгиз ётар эдинг.

— Шундоқ ё... — деди. Сўзининг сўнгини айталмади.

— Гапур, гапур, қизим.

— Ёнимда бир хат бор эди... мени бу ҳолга қўйгучи шу хатдир, — деди, бу сўзни ниҳоятда кучланиб айтди.

Вақт хуфтанга яқинлашқан эди. Қизининг ҳалиги жавоби билан сабрсизликка тушкан қутидор қўлига шамъ олиб ташқарига чиқди ва ердан хатни олди. Қизини бунчалик фалокатка солған хатни олған еридан қўзгалмаёқ ўқуб чиқди. Хат ҳақиқатан жонсўз эди. Қутидорнинг ҳам оз қолдиким, ҳуши бошидан учсин... Сўнг чекда хўрланған ва фавқулодда чайқалған юраги билан ихтиёрсиз "маккор, инсофсиз!" деди. Кўз ўнглари қоронгуланиб бир неча вақт серрайганча қолди. Яна "яхшилиқни билмаган ҳаромзода" деб қўйди. Боя бу хатдан хабарсиз эди. Энди қизининг олдига кириб, унинг бетига қараш унга жуда ҳам оғирлашқан, чунки бу фожиъанинг боз омили деб ўзини таниған эди. Бориб айвоннинг олдига ўлтурди ва бошини қўллари орасига олди. Бу хўрлиқ, бу одатдан ташқари уятсизлик бечора қутидорни жуда эзган; нима қилмоқға, хўрланған, таҳқир этилган қизини не йўсунда юпатишша, бу қора кунларни қандоғ қилиб ўтказишша билмас эди. Шу ҳолда не вақтгачадир қолди. Эрининг кечикишидан хавфка тушиб, Офтоб ойим унинг ёнига чиққанда ҳам ул бояги ҳолда эди.

Эру хотин қизларининг ёнига кирдилар-да, унинг оёқ томонига ўтиб секин-секин ўлтуришдилар. Анчагина бир-бирларига қарашиб қолгач, Офтоб ойим олған таассуротини ичига ютаберишша чидалмади-да, ёгмурдек кўз ёшини тўка берди. Қутидор ҳам хотинини кутиб тургандек кўз ёшлари билан соқолини ювмакка олди. Кўзи юмуқ бўлса ҳам уларнинг ҳозирги ҳолларини сезиб ётган Кумушнингда қайнаб чиқған кўз ёшлари икки чаккасидан ёстиқға оқиб туша бошлади. Шу чоқда на учундир тоқчада ёниб турған шамъ ҳам лип-лип қилди-да, ўди... Шунинг ила бу ҳавлини чин маъноси билан қоронгулиқ босди.

Бу воқиъанинг учунчи куни Кумушбиби йиллаб ётгучи оғриқлардек сарғайиб озган, эндигина гунчадан чиқаёзган бу ёсиман гулни хониң құлларнинг заҳри сүліткан, фасод ўчогининг уятсиз муфсидлари<sup>1</sup> ҳусн бөгінинг бу янги эркасини ишонған ва күз тиккан жиҳати исмидан таҳқири қылдириб, умидсиз бир вужуд ёки жонсиз бир ҳайкал ҳолига қўйған эдилар. Унинг кўзларида доимий бир маъюсият, аримас бир ҳузн,<sup>2</sup> ҳар онда бир энтикиб чайқалиш эди. Офтоб ойим ҳам сўнг чекда хўрланған эса-да, лекин унга бу хўрлиқдан бурун у-бу билан қизини овитиши, унинг кўнглини очиб бу совуқ, уят гапни унутдириш, ҳар ҳолда кўзининг оқу қораси бўлған Кумушни бирар касалга чалинмаслиги йўлида тиришиш муҳимроқ эди. Ва икки гапнинг бирида "Ортиқ ўйлама, қизим... Эсингдан чиқар, энди хафа бўғанинг билан сира фойдаси йўқ", дер эди. Кумуш бўлса ҳушсизларча онасининг оғзиға ағраяр ва ҳар қачон маъюс эди. Кумушнинг бу ҳоли бечора онанинг юрагини узар, юз хил вассасаларга солар эди.

— Кумуш, — деди Офтоб ойим тушлик чойдан кейин, — қайтаға тогангникига бориб келмаймизми?

— Нима қиласиз тогамникида?

— Нима қиласиз тогамникида?

Кумуш онасининг сўзига нима учундир кулди ва "майли" деди.

— Тур бўлмаса, юз-қўлингни ювиб отлан, худо ўлим берсин уятсиз эрингга.

Кумуш мулоимгина қилиб онасиға қараб олди. Үрнидан туриб Тўйбека ҳозирлаб берган обдаста ёнига ювениш учун ўлтурди.

Улар тамоман йўлга ҳозирланған эдилар, йўлак томондан ўткан кун хат келтирган хотин кўринди. Кумушнинг кўзига бу хотин оғат каби кўринса ҳам, аммо иккинчи тарафдан ул сўйинди. Онасини келгучи хотин билан танишдириб, ким бўлғанлигини сўзлади.

<sup>1</sup> Муфсид — фасод қилувчи, бузуқи.

<sup>2</sup> Ҳузн — ҳазин, мунг.

— Хи-хи, айланай бойбуччалардан... Шундоғ қизимниң кига ўткан эдим, қих... алваддайн<sup>1</sup>, деб йўл устидан бурилиб кирдим... — деб пучук хотин сўзланиб келар эди. Она-бала қўлға олған паранжини ерга қўйишға мажбур бўлдилар. Хотин Кумуш билан кўришкач, ачинғансумон сўради: — Ҳа, айланай, пошша қиз, сизга нима бўлди, жуда ўзингизни олдириб қўйибсиз?

Пучукقا жой кўрсатиб, Офтоб ойим жавоб берди:

— Бир-икки кундан бери тоби йўқ.

— Худой сақласин, худой сақласин, — деди хотин, — қих... бевақт келиб сизларни йўлдан тўхтатдимми... хайр, худо синглимни ёмон кўздан асрасин, — деб фотиҳа ўқуди.

— Хуш келибсиз, — деди Офтоб ойим...

— Хушвақт бўлинглар, айланай, қих... — деди хотин ва Кумушка қараб давом этди, — анув кунги сўзингиз билан йўлдан қайрилиб кирган эдим. Эртага ўғлим Тошканд жўнамоқчи, отангизнинг хат-патлари бўлса... қих.

Кумуш жавоб бериш ўрнига онасиға қаради. Қизининг қаравидағи маънога тушинган Офтоб ойим "юборатурған хатимиз йўқдир" деб жавоб берди. Бу сўз билан пучук хотин ғилт этиб Кумушка қараб қўйди. Кумуш онасини унга хабарсиз кўрсатиб жавоб берди:

— Отамнинг хатлари йўқ, менини бор, озғина кутишка вақтингиз бўлса, ёзиб берар эдим.

Пучукнинг келишидан мақсади фақат шу ёзиб бериладирган хатгина эди. Кумушнинг ўтинчи унга мой каби ёқиб тушди:

— Ёзиб беринг айланай, пошша қиз, боратурған жоиймдан кечиксам-да, савоби бор-ку, қих... — деди. Кумуш хотиндан миннатдор бўлиб уйига хат ёзиш учун кирди.

\* \* \*

Юқорида Отабек томонидан олинған мактубнинг ҳақиқати мана шу йўсун хиёнатнинг натижаси эдиким, биз энди хиёнат қаҳрамонлари билан ўқуғучини танишибдирашимиз.

<sup>1</sup> Алваддайн — ваъдасиз бўлмайин.

## 6. ИСИТМА ОРАСИДА

Саратоннинг иккинчи куни... Марғилоннинг шимолида бўлған Б... маҳалласининг кунчиқар томонида жанубга қараб бурулған тор кўчанинг юқориги бурчагида отининг тизгинини ушлагани ҳолда бир йигит кийимига ўлтурган чанг-тўзонларини қоқар эди. Йигитнинг узоққина йўлдан келганлиги, унинг кипрак ва қошларига, ҳам эндиғина чиқа бошлаган соқол-муртларига ўлтурган тўзонлардан билгулик эди. Йигирма икки ёшлар чамасида бўлған бу йигит сариқ танлиқ, уккенинг кўзиdek чақчайиб, ўйнаб ва ёниб турған қизил кўзлик, юзига парчинланғандек юза (пучуқ) бурунлик, манглайи қанча ташқарига ўсиб чиқған бўлса, юзи ўшанча ичкарига кеткан, қисқаси вақтсизроқ яратилиб қолған бир маҳлуқ эди. Бурчакда ердан икки ярим газлар юксаклиқда кунботишга қаратиб қурилған иккита кўримсиз бир бетлик эшиклар юзларига ёпиқ ҳолда эдилар.

Маълум йигит бошидаги қалпогини қўлиға олди-да, ҳалиги эшикларнинг ўнг томонидағисини очиб, оти билан ичкарига юрди. Эшик ортиқча тор бўлғани учун оти сиқилибкина ўтди-да, энди узунғина усти очиқ йўлак бошланди. Йўлакдан сўнг ҳавли эди. Ҳавлининг шарқ ва жануб томонлари бузилиб-ёрилиб ётқан эски хароба иморатлар бўлиб, ҳавли юзи турлиқ ахлатлар билан булғанч, гўё йиллардан бери тозаланмаган, супурғи кўрмагандек эди. Ҳавлининг ўрта ерида паканагина балиқ тут ўсиб, остиға кул ва бошқа ахлатлар тўпланған эди. Ҳавлининг кунботар томонида харобалиқдан озғина берида бўлған, бояғи йўлакка тирадириб солинган икки даричалик бир уй, бу уй қаторида бир айвон бўлиб, шунинг ила бу ҳавлининг тиккайган биносининг ҳисоби тамом эди. Бу хонадоннинг ошхонаси бўлмағани учун бўлса керак ҳалиги айвоннинг бир бурчагига ўзоқ қурулған. Тутунлар билан айвон деганимиз қоб-қора ис, айвон бўлганига онд ичмакда. Бунинг устига ўзоқ бошидаги товоқ-қошиқлар, тогора ва қозонлар тартибсиз равишда ифлос ётарлар, қозон теварагида уймалашмакда бўлған уч-тўртта товуқлар мундаги ифлосликни яна бир қат оширмоқда эдилар. Айвоннинг нариги ёнидаги дарича орқалиқ уйга кирилур эди. Уйнинг ярмиси қуруқ ер — қоро шибдан иборат бўлса-да, аммо тўрида чақич боғлаб йилтирамакда бўлған — кир, юлдуз каби илма тешук жафокаш оқ кийиз, ҳам тахмондағи эски

сандиқ устига йигиб қўюлған бир тўда пахтаси чиқған увадалар кўрпа-ёстиқ отини ўз устиларига олур эдилар. Битта тоқчадаги чети учкан, қони қочқан уч-тўртта пиёла ва бир қора қумғонни, иккинчи тоқчадаги умрида ювиниб кўрмаган қора мис баркашни, бўш қозиқлар кўнгли учун осилған биттагина кир дастурхонни тилга олиш билан бу ҳавлининг бутун жиҳоз амлоки рўзгорини<sup>1</sup> ёзиб чиқилган бўлинур, бурчакдаги тоқчада қаттиғ нон мужиб ўлтурғучи сичқонни кўрсатиб ўтилмаса, бу уйда бошқа жонлиқ зот ҳам кўринмас эди. Қаршидағи бўғоти тушиб ўртаси емирилган, деворларидан бақа салласи униб чиқған хароба биноларнинг ўнда-сўнда кўрилмакда бўлған эски нақшларидан ва сирларидан бу оиланинг илгарида давлатлик бир хонадон бўлғанлиги, аммо бу кунда ортиқча фақириқда яшаганлиги онглашилур эди.

Йигит отини тут ёғочига bogлаб уйга томон юрган ҳам эди, бурчакдаги хароба уйдан ўзини тузатиб ўқуғучининг қутидор ҳавлисида кўргани пакана хотин гўё оналарнинг "зиёндош албасти" ларидек хунук қиёфатда йигитка қараб югуриб кела бошлади. Хотин йигит билан эсон-соғлиқ сўрашқач, иккиси уйга кирдилар. Йигит тўнини сшиб уйнинг тўрига иргитди, бошидан қалпогини олиб қозиқча илди. Шундан сўнг иккиси ҳам ўлтуришдилар.

— Қалай, — деб сўради хотин, — ишинг ўнгиданми?

— Чакки эмас.

— Ўзи ҳозир шу ерда эди. Эплаб келса шу эди, деб ташвишланиб ўлтурди. Сан келур олдингдагина чиқуб кеткан эди

— Уйига кетдими?

— Билмадим, келиб қолса керак. Ўзи ҳам қатнай-қатнай ўлаётидир, кеча уч қайта келиб-кетди, қих...

— Нимадан ташвишланадир?

— Ишни айтканимдек қилолмаса, ҳамма меҳнат тўрт пул, дейдир.

Йигит кулимсираб олғач сўради:

— Ўзимизнинг ишлар қалай?

Бу саволдан хотиннинг юзига умидсизлик туси кирди:

— Билмадим, дўстданми, душманданми ҳайтовур ол-

<sup>1</sup> Амлоки рўзгор — рўзгор бойликлари.

динг очилмай турадир, совчилиқта чиқмаған куним йўқ, қих... Ёмон қўшнини ер ютсин; Марайим кудингчи<sup>1</sup> бўшашибандек бўлған эди, уни ҳам қўшнилар ўлгур айнатибдирлар... Ҳомидбой бўлса бу кун унашсаларинг эртага тўйни бошлаймиз дейдир, қих... — Бу сўздан йигитнинг кўзлари олайиб алланучик туска кирди.

— Қайси қўшни экан, у?

— Қуриб кетсин, ёмон қўшнилар, қих... Ман санга қайси бир қўшнини тутиб берай, ҳаммаси ҳам айнатар эмиш.

— Сан манга ўша... ни кўрсатиб бер, тобини олиб қўяй ўша онангни...

Иккиси шу можарода эдилар. Йўлакдан киришидаёқ тутка боғланған ўзининг отидан одамининг келганини билган Ҳомид айвондан айланиб киришка сабри чидамай, даричадан ошиб уйга кирди-да, йигит билан қулоқлашиб кўриша кетди. Ўлтуар-ўлтурмас Ҳомид ундан сўрай бошлади:

— Хў-ў-ўш, Содиқ полвон, ишлар қанақа, Тошканда нима гаплар бор?

— Нима гаплар бўлсин. Тошканда тинчлик. Баҳона билан Тошкандни ҳам кўриб олдиқ.

— Эшигини топа олдингизми?<sup>2</sup>

— Топдим. Айтканингиздек унинг эшигини Тошканда ҳар ким билур экан.

— Бўлмаса, хатни ҳам топширгандирсиз?

— Топширдим.

— Бали, шер, хатни қўлингиздан ким олди?

— Бир чол.

— Юзи чўзиқроқ, чаккаси сиқиқроқ чолдир.

— Худда ўзи.

— Хатини ҳам олодингизми? — деди ва сабрсизланиб Содиқнинг оғзига тикилди. Содиқ юзига магрур бир тус ва овозига музafferият оҳанги бериб "хатини ҳам олдим" жавобини айтди. Бу жавобдан сўнг Ҳомиднинг оғзининг таноби жуда ҳам қочқан ва Содиқнинг елкасига қоқа бошлиған эди. Содиқ қўйнидағи хатни олур экан, ишлаткан ҳийласини ҳикоя қилди:

— Хатни чолға бердим-да, эртага Марғилон кетаман, хат берсаларингиз бемалол, дедим. Чол бир оз ўйлаб

<sup>1</sup> Кудинг — матони уриб текислаш.

<sup>2</sup> Фарғонада ҳавлини эшик дейдирлар (муал.).

олғандан кейин, ҳозирга хатимиз йўқ, сизга малол келмаса эрта билан бир хабар олиб кетмайсизми, ўзингиз ҳозирда қаерда турибисиз, деб сўради. Ман оғирсинган-сумол ўйланиб олдим ва хўб, дедим, қўшхонам узоқ бўлса ҳам бир хабар олиб ўтарман, дедим. Ишнинг ўнгланишига қувониб, бир кечани чойхонада кечириб эртасига ваъда вақтига яна бордим, имон топкур отам хатни муздак қилиб тайёрлатиб қўйган экан. Марғилон қаердасан, деб бир от, бир қамчи жўнай солдим.

Ҳомид хатни олур экан, Содиқнинг елкасига қоқиб "раҳмат, раҳмат" деб қўйди ва: "Биз ҳам сизнинг ҳаракатингизда", деган сўзни ҳам қўшди. Хатни очар экан, Ҳомиднинг юзида қувонч аралаш бир жиддият мушоҳада этилар эди.

"Умидим юлдузи, орзум чечаги, ҳаётим тираги Кумушимга! Киноя ва аччиғлар билан тўлиқ бўлған мактубингизни олдим. Хатни ёзған чоғингизда тамом бир ўт ичида, ғазаб денгизида сузғанлиғингиз гавдаланиб кўз ўнгимдан ўтдилар. Ўтдиларгина эмас, ҳатто менга шунчалиқ таъсири этдиларким, гўё маликасининг ғазабига учраған қул қай даражада эс-хушидан айрилса, қилар ишидан, ўйлар ўйидан янглишса манингда ҳозирги ҳолим бунинг юз даража юқорисига етди. Тўғриси заҳар олуд мактубингизга одамларча тушина олмадим ва тушинишга ҳам лузум кўрмадим, чунки ғазаб устида айтилган сўзлар ақлли кишиларча лойиқи муҳокама ва мутолаа бўлолмас, гулхандан сўнг аланга ҳисобини ҳеч бир вақтда олинмас. Лекин мактубингизнинг бир ўрнига нима маъно бериш учун тамоман ожиз қолдим: "Илгариги сўзингиз билан ўзингизнинг ҳаққингиз битканлигини билатуриб ҳам яна уялмай, қизармай виждонисизлар амрини бериб қўясиз-да, уятсизлиғингизни яна бир қат оширасиз..." ва "Отам Тошкандда экан кезда бу гапни айтишска уялған эмишсиз", "гўё бунинг билан номуслик, уятчан бир йигит бўлиб кўринмакчисиз шекиллик?!"

— Бу сўзларингиз билан нима демакчи бўласиз, танингиз соғми? Дуруст, ман отангизга бирга кеталмаслигими ни, ҷарларни уч-тўрт кун кутиб қолишимни бир неча вақт айтальмай юрдим ва ниҳоят отангиз кетишска рухсат сўрай бошлиғач, отам орқалиқ узримни айтдирдим, бас, бунда қандай уятсизлик бўлсин, гумонимча иситмангиз қаттиғ ушлаган кўринадир ва бу телбаларча мактубингизни иситма орасида ёзған ўхшайсиз..."

Ҳомид мактубнинг бу ўрнига етканда ихтиёrsиз хаҳо-лаб юборди-да, "вой аҳмоқ" деб қўйди. Пучуқ хотин билан Содиқ кулиб унга қарасалар ҳам ул илтифотсиз ўқушида давом этди:

"Мактубни иситма орасида ёзганингизга тамоман қано-ат қилдим. Шунинг учун сизни айглашака ҳаққим йўқ, ҳам сиз маъзурсиз.<sup>1</sup> Бу киноя ва заҳарлик мактубни ёзиша сизни маҳбур эткин, мени ҳийлакор тулки, оғзи қон бўри, уятсиз йигит... ва тагин алла қанча мартабаларга мин-диришишларимнинг бош омили албатта отангиздан ҳам эшиккан бўлсангиз керак, шу кунгача чарлар балоси билан тутқун бўлишим орзу-ҳавас қайнотининг оғриб ётиш шумлигиdir. Ниҳоят сизнинг аччиғ ҳатингиз баракасида бу кун чарлар хабари ҳам келиб қолди. Сиз манинг бу ҳатимни ўқуб гуноҳларимни ярлақаб<sup>2</sup> турган кезларингизда албатта ман Марғилон йўлида бўлсан керак. Онангизнинг ўқуйтурган байти манинг шаънимга тамоман тескари, чунки ота-она орзуси ҳеч бир вақт янги ёрлик вазифасини ўтай олмас ва ҳамиша бошқаларнинг орзу-ҳаваси бўлиб қола берар. Сиз ўзингизни тупроқ билан тенглашдирмакчи бўлғансиз, лекин ман ҳозир Кумушка ҳам қаноатланмай Олтунбоби деб атамоқ фикрига тушдим..."

Борлиғим муҳаббатингиз алангаси билан туташқани ҳолда завжингиз Отабек. 26-нчи жавзо, 1265-нчи йил. Тошкандъ.

Мактубнинг бош томонини ўқуғанда Ҳомиднинг юзида кўрилган шодлиқ ўзгаришлари ҳатнинг охири билан нега-дир ювилғандек ва шодлиқ ўрнини чуқур бир мулоҳаза олғандек бўлди. Бир-икки дақиқалиқ фикрдан сўнг Ота-бекнинг "Сиз манинг бу ҳатимни ўқуб гуноҳларимни яр-лақаб турган кезларингизда албатта ман Марғилон йўлида бўлсан керак..." жумласини кўзидан ўtkазди-да, Содиқдан сўради:

— Тошкандан чиқғанингизга неча кун бўлди?

— Олти кун.

Содиқнинг жавоби унинг устидаги юкни тагин ҳам оғирлашдирғандек сезилиб ул бошини қўйига энгташдирди ва чувоқ соқолини тузатиб фикрда қолди. Ҳомиддаги ке-

<sup>1</sup> Маъзур — узрли, кечиравли.

<sup>2</sup> Ярлақаш — кечирмоқ, афв этмоқ.

йинги ўзгаришдан хабарсиз тахмондағи увадаларни туза-тиш билан овора бўлиб юрган пучуқ хотин Ҳомиднинг ёнига ўлтуриб, хунук бир илжайиш орасида сўради:

— Қалай, Ҳомидбой, ишлар ўнгиданми? Пошшанисага энди совчиликқа бораверамизми?

Ҳомид умидсизча бошини чайқади ва салмоқцина қилиб жавоб берди:

— Ишимиз ҳали у даражага еткан эмас, биз ҳозир фақат совчининг йўлидаги биринчи говнигина буздиқ.

Ҳомид пучуқ хотин орқалиқ Кумушнинг хатини олдириш билан ўзининг биринчи мартаға юборган хиёнатномасини фавқулодда бир муваффақият билан натижаланганлигини сезиб Отабек кўкрагига ҳам қўл солиб кўрмак ва унинг Кумушбибига бўлған муносабатини билиб, ҳам шунга қараб иш юритмак учун Кумушнинг мактубини Содиқ орқалиқ Тошқандга юборган. Содиқ эса ўқуғучига маълум мактубни Отабекка топшириб, Отабекнинг Кумушка ёзған мактубини ҳам олиб келган эдикি, юқорида бу хат Ҳомид томонидан ўқулиб ўтди.

Отабекнинг бу мактуби ортиғи билан ўзининг Кумушка бўлған муносабатининг ҳамон эски ҳолида боқийлигини ўзлон қиласар ва ўзининг осонлиқ билан рақибка берилмаганини сўзлар эди. Бу йўлда биринчи қадамини муваффақият билан босқан Ҳомид кейингиларини биринчидек кетиши учун қайгуланар эди. Бу кун-эрта Отабек келарда, Кумуш билан топишар, хиёнатноманинг ўзиники бўлмаганини исбот этиб, Ҳомиднинг ўйлаған ишини яна кейинга силтар ёки бутунлайга Ҳомиднинг умидини узар — мана бу очиқ, кўриниб турган эҳтимол эмас ҳақиқат олдида ул ҳайрон ва бунга қарши тадбир ўйлаш билан гаранг эди. Ул бу тўғрида узоқ ўйлаб турмади, бир нарсага қарор қўйған каби фикрдан кўзини очди ва пучуқ хотинга деди:

— Жаннат опа, бир чилим берингиз-чи, — Жаннат опа чилим солиш учун қўзгалғач, Содиқقا деди: — Иним Содиқбой, ишимиз жуда хом ҳали.

Содиқнинг қизил укки кўзлари ўйнаб жавоб берди:

— Фам еманг, ака, хом бўлса ўбдан пишитармиз, ўлмасак.

Содиқнинг бу жавоби Ҳомиднинг ишончини мойлағандек бўлди, тўпписини бошидан олиб наматка ташлағач, миннатдорлик оҳанги билан:

— Сан билан Жаннат опам тирик бўлсаларингиз пи-

шитармиз албатта, — деди ва Жаннат опа қўлидаги чилимни олиб такир-тукир қилиб пишилди ва ши-ғ-ғ-ғ этидириб сархонани синдириб юборар даражада ичига тортғач, оғзидан чиқған пага-пага тутунлар орасида чилимни Содиққа узатиб, Жаннат опага деди:

— Опа, сиз тағин бир мартаба қутидорнинг уйига хат олиб боратурган бўлдингиз...

— Қих, жоним билан айланай, Содиқ олиб келган хатними?

Ҳомид кулди.

— Йўқ, опа, агар бу хатни олиб борсангиз, шунчалик қилған ишларимиз бир пул деган гап бўладир. Илгари гал ёздириб берганимдек ўз режамизга мувофиқлаб Отабек тилидан яна бирини ўмартириб бераман.

— Хи-хи-хи, айланай, қих... Ман бу ишларни қаёқдан билай, Ҳомиджон.

— Албатта билмайсиз. Лекин мундан сўнг яхши билмогингиз керак, озғина янгилишиб кетсангиз ҳам ҳамма қилғанларимиз шамолға учадир, ундан сўнг... — тўсатдан бу ўринда Ҳомиднинг эсига ўзининг бир хатоси келиб тушди: биринчи гал Отабек тилидан ёзған сохта хатини унинг қўл ёзувини мулоҳаза қилмасдан юборган ва бу кунгача бу сирни қутидор, Кумушби билар томонидан сезилиб қолишидан қўрқиб келмакда эди. Энди бу иккинчи сохта хатни ёздиришда гарчи ҳозир Отабекнинг қўлёзмаси ўз қўлида бўлса ҳам яна қўрқунчи йўқ эмас эди. Эндиги хатни ниҳоятда эҳтиёт билан нусхага қараб ёздиришни кўнглидан ўтказди-да, яна қайси тўғридадир узоқ ўйлаб олғач, Содиққа деди:

— Иним Содиқбой, сизга ҳам яна катта хизмат бор, башарти...

— Кишининг хизматидан қочқан йигит эмасман!

Ҳомид Содиқ билан Жаннат опага қараб олди ва: — Шундоқми? — деб ишонмагансумол такрор сўради, ундан ижобий жавоб олғач, ёнини кавлашдира бериб: — Жаннат опа, — деди, Содиқ ҳориб қорни очиб келган кўринадир, ман ҳам эртадан бери томоқ еган эмасман, биз Содиқ билан сўзлашиб ўлтурсак-да, сиз мана шу пулга гузардан чиқиб бир чорак<sup>1</sup> эт келтириб, шўрба қилиб берсангиз. —

<sup>1</sup> Бир чорак — уч ярим-тўрт қадоқ чамаси тошдир (муал).

Жаннат опа паранжисинн ёпиниб этка кетди, сўнгра Ҳомид Содиқдан такрор сўради:

— Кишининг хизматидан қочқан йигит эмасман, денгчи? — негадир Ҳомид Содиқнинг такрор-такрор: "Қочқан одам эмасман, синамасдан хизматни айтаберинг" дейишига ишонмас эди. Ниҳоят:

— Башарти сизга буюрадирган хизматим бу кунгача қилған ишларингиздан тамоман бошқа ва оғир бўлса-чи? — деди. Содиқ Ҳомиднинг мақсадига тушунгандек бўлди ва ўйланиб турмай:

— Одам ўлдиришми? — деб сўради. Ҳомид Содиққа ишонмагани ҳолда бир дақиқа чамаси қараб турди, сўнгра теварагига аланглаб олгач, ҳазил тариқасида:

— Башарти одам ўлдириш бўлса-чи? — деб сўради.

— Бу кунгача иккитасини жойлаштирдим, учунчига ўтса нима қиласи? — деди Содиқ ва магрур кулиб қўйди. Бу сўздан сўнг Ҳомид устидаги юкни отқандек сўлиш олиб қўйған эди.

— Ман кишининг хизматини унутатурған йигит эмасман, — деди Ҳомид ва давом қилди, — ўгул бола учун ўгул болалигим, ёмон учун ёмонлигим бор, башарти шу хизматни бажариб беришни бўйнингга олсанг, онд билан айтаманки, давлатимнинг ярмиси саники бўлсин!

Содиқ ўлтурган жойдан қўлини Ҳомидга узатиб "қайтмайсизми?" деб сўради. Ҳомид қўлни олиб "сўз ҳам бир, худо ҳам бир" жавобини берди.

Шу куннинг эртасидан бошлаб, Содиқ қутидорнинг эшик олди теварагида Отабекни кутмакчи, ул келиб йўлакка кирди дегунча орқадан бориб унинг ишини саранжомламоқчи эди. Содиқнинг фикрича бу ишни дарбоздан ташқарида бажариш мувофиқ бўлса ҳам, нима учундир Ҳомид бунга кўнмай қутидорнинг узун қоронги йўлагини қулай билмиш эди. Содиқнинг "қай вақтда келар экан?" саволига:

— Албатта, шаҳарнинг дарбозаси эрталаб очилиб, шом билан ёпиладир, гумонимча эрталаб Қўқондан чиқса, аср вақтларида Марғилонга кирадир, — деди ва сўз охнрида орада сўзланиб ўтилган шартни яна таъкидлади.

— Яхши ўйла, Содиқ. Олам ҳодис қўлға тушиб қолсанг, сўроқ кезида айбни фақат ўз бўйнингга олиб орага мени қотиштирумайсан.

— Хотиржамъ бўлинг, Содиқ деганингиз бундай хумсаликни жаллоднинг қўлида ҳам қилмас, азбаройи худо.

— Ундан сўнг иккинчи шарт: бу сир фақат иккимизнинг орамиздагина қоладир, ўзинг ҳам сезган бўлсанг керакким, Жаннат опани этка овора қилишим уни ҳам бу сирдан ташқарида тутиш учун эди.

— Кўнглингизни мендан жуда тўқ тутаберинг, ака! Авғони ханжарингизни бераман деган эдингиз-а?

— Шўрба пишкунча келтураман, — деди Ҳомид ва кетди.

## 7. ҚУВЛАНИШ

Учунчи кундан буёқقا қутидорнинг эшиги теварагидан Содиқ айрилмас эди... Ҳозир кечки соат еттилар бўлиб қолғани учун бу кун ҳам унинг келмаслигига қарор берган ва кетишни чоғлар эди, лекин узоқдан келгучи бирар отлиқни кўрса балки шу бўлмасин, деб яна кутиб қолар эди. Аҳвол билиш учун бўлса керак, Ҳомид ҳам отига қийшиқ миниб ўтиб кетди. Савол назари билан қараган эди, Содиқ бошини чайқаб жавоб берди. Ниҳоят қутидор ҳам кундаги вақтда бозордан қайтиб уйига кирди. Вақт шомга яқинлашиб қолғанлиқдан битта-яримта дўконлар ҳам ёпилиб, ўткунчилар ҳам сийраксиб қолдилар. Шунча кутканнинг ўн дақиқаси деб бўлса керак, ул ҳамон шу ўртада айланиб юрар эди.

Пойафзал растасининг шарқقا қараб тортилған кўчаси бошидан бир тўда йигитлар мунга қараб келар эдилар. Бошда ул келгучиларни танимаган эди, йигитлар яқинлашиб келгач, ўзининг ўртоқлари эканини билиб ўнгтайсизланда бошлади. Ўзини улардан яшириш учун қутидорнинг йўлагини жўблаған ҳам эди, йигитлардан биттаси: "Бу ерда Содиқ нима қилиб юрибдир" деб юборди, иккинчи йигит "Содиқбой, Содиқбой!" билан чақиришга тутиниб, шунинг ила Содиқ бурилған жойида тўхтаб қолишга мажбур бўлди.

— Нега бу ерда тегирмончининг ишсиз қолған эшагидек жўнжайиб ўлтурибсан, Содиқ? — деди бир йигит. Бошқалар бунинг сўзига кулищилар. Содиқ ҳам кулгига иштирок қилиб, йигитларнинг яқинига келди.

— Биравда ишим бор эди, шуни кутиб ўлтурибман.

— Содиқ! — деди ҳалиги йигит ва Содиқдан "ҳа" жавобини олғач, — бурнингми Рисолат холамнинг рапидаси? — деди. Йигитлар тагин кўччани кўтариб кулишиб юбордилар.

— Жур, базмга!

— Қанақа базмга?

— Шамшодбекнинг базмига, ҳали Шамшодбекнинг тўйидан хабаринг йўқми? Жур, Содиқ жияним, башарангми дўлда қолған таппими?

Содиқ иккиланиб жавоб берди:

— Ман кейинроқ бораман.

— Эҳ хумса, — деди йигит ва ариқдан сакраб Со-диқнинг ёнига ўтди. Андижондаги Қаймоқхон ҳам келипти, базми жамшид десанг-чи, жур! — Йигит Содиқни судрай бошлади. Бошқалар ҳам унинг орқасидан итара кетдилар. Содиқ ўртоқларининг жабри остида иложсизгина борса ҳам лекин иккинчи томондан кутканини бу кун ҳам келмаслигига қарори ҳам йўқ эмас эди. Ўн-ўн беш отламдан сўнг ўртоқлариға итартириб ўлтурмасдан ўз ихтиёрича юруй бошлади. Кўчанинг жанубига қараб борар эдилар. Орадаги гарбга қараб тортилған кўчани ҳам босиб тўғрига ўта бошлаған эдилар, узоқдан от елдириб тўғрига келгучи отлиқни кўрган Содиқ кўчанинг ўртасида тўхтади. Ҳалиги муштумзўр йигит уни бир туртдида: "Юр, юр, итбачча, жинни-минни бўлдингми?" деб судрай бошлади, бошқалар ҳам унга тўрт томондан чугурчиқдек ёпишдилар. Шундай қилиб бечора Содиқни ўз холига қўймай кўчадан анчаги-на нарига сургаб кетдилар. Улар бу кўчадан ўттуз-қирқ адимлаб узоқлашган ҳам эдилар, ҳалиги узоқда кўрилган отлиқ тўриқ йўргасини қарсиллатиб катта кўчага чиқди ва йигитлар келган томонга — шимолга бурилди. Содиқ кетар экан, отлиққа бурилиб қаради. Ҳасаналидан хат олғани борганида отхонада кўрган қора тўриқ отни таниғани он қўлтуғига кириб олған рўдаподан қутилшига тиришиб боқди, лекин уҳдасидан чиқолмағач, кўзини йиртқичларча чахчайтириб "ит эмган даъюс!" деди қўлтуғидаги жонлик кишанга...

\* \* \*

Үёқ-буёқдан шом азони эшитила бошлаған эди. Маълум отлиқ қутидорнинг дарбозасида отини тўхтатди-да, ўнг оёгини узангудан узди. Шу вақтда шом намозидан қолмас учун шошилишиб қутидор ҳам йўлакдан чиқиб келди. Отини кўчанинг ўртасида қолдириб, қайнотаси билан кўришмак учун юргурган куяви олдида намозини ҳам унуткан қутидор дағ-дағ титраб тўхтаған эди. Кўришмак учун ўзига узатилған қўлни бўш ҳавода қол-

дириб, дарбозаси ёнига борди. Бундай муомала олдида Отабекнинг қандай ҳолда қолиши изоҳка унча муҳтоҷ бўлмаса керак. Ул турған жойида қозиқдек қоқилиб қолған эди. Қутидорнинг олдига юришнида билмас, сўзлашка ҳам тили келмас эди.

— Бу қандай ҳаракат, ота?

Қутидор титроқ ва ҳаяжонли бир товуш билан:

— Уятсизга манинг уйимдан ўрин йўқ, уятсиз билан сўзлашишка ҳам тоғатим йўқ... Борингиз, манинг эшигим ёнида тўхтамангиз! — деди-да, ўзини ичкарига олди ва дарбозани ёпиб шилдир-шилдир занжирини боғлай бошлади...

Отабек эсини бошига йигиб михланған еридан қўзғалғанда шом намози ўқулиб биткан, кишилар уйларига қайта бошлаганлар эди. Ул мошинавори келиб отига минди ва "чуҳ" деди, лекин от қўзғалмади. Икки-уч қамчидан сўнг толға боғланған тизгин шарт этиб узилиб кеткач, боя юриб кеткан отини ўтқунчилардан биттаси-нинг боғлаб турғанини эслади. "Чуҳ" деди. От кўчанинг шарқига қараб кетди.

Бу кетишда унинг ҳуши ўзида деб айтиш қийин, шунинг учун отнинг бошини қаёққа қараб солғани ҳам белгулук эмас, эҳтимолки унга ҳозир от юрса бас бўлғай. От кўчанинг айрилишига этиб "энди қаёққа юрамиз" дегандек тўхтаған эди, эгаси яна "чуҳ" деб жавоб берди. От шимолга қараб бурилди. Бу кўча билан узоқ юргач, олтинчи фаслда ўқуғучи билан танишдирилған Б... маҳалласига чиқиб, от яна қай томонга юришни сўраб тўхтади.

— Чуҳ.

От кўчанинг шарқига юриб ўқуғучига маълум бурчакдаги иккита эшикдан ҳам яна шимолга бурилиб, тор кўча бўйлаб узоқ кетди. Вақт ҳуфтанга яқинлашиб қолганлиқдан қоронғи. ўбдан тушкан эди. От ўзининг бу галги тўхташида эгасининг чуҳ-чуҳига ҳам сирт бериб туриб олди ва Отабек кўзини очиб йўл қараашга мажбур бўлди. Отнинг тор кўчанинг ниҳоятига этиб йўлсизликдан тўхталганини онглағач, ўткан ишлардан ўзига ҳисоб бера бошлади. Қайин отаси эшигига отини йўлга солғанини бир оз эсласа ҳам бошқасини билмас эди. Ҳар ҳолда Марғилоннинг четроғидаги боши берк бир кўчада ва катта бир дарбоза ёнида турғанлигини тушинди. Отнинг бошини буришни-да, бурмасни-да билмай бир оз ўйлаб тўхтади. Ул ўйлаб турғанда дарбоза ичкарисидан икки кишининг хайр-

лашиб ажралишқанлари сезилар эди. Ичкаридаги оёк товши дарбозага яқынлаша бергач, ул чиқғуциға ҳалақит бермас учун отининг бошини четка бурди. Отабек тұхтаған ўрин түрт томондағи иморатлар билан ўбдан қоронғи, шунинг учун дарбозадан чиқғучининг фақат бөшидағи оқ салласидан ўзгаси күзга илинmas әди. Чиқғучи дарбоза ёнида турған отлиқдан чүчибми ва ё ўзичами сүради:

— Ким отда турған?

— Ман, — деди Отабек ва ўзининг мантиқсиз жавобидан ўнғайсизланыб тузик жавоб беришка оғзини жұблаған ҳам әди, чиқғучи "сиз кимсиз?" деган саволи билан уни тұхтатиб қўйди.

— Ман... бир мусоғир ғарип, — деб жавоб берди-да, негадир томишқа интилган күз ёшисини күч билан тұхтатиб қолди. — Марғилонға шом вақтида кирған әдим, күзлаган жойимни тополмай адашдым...

— Қани бўлмаса, журиңг бизникига, меҳмон, — айткучининг сўз оҳангидан ўртоқлик бўйи келиб Отабекнинг димогига урса ҳам:

— Раҳмат сизга ака, — деди, лекин унинг бу сўзи ҳам ўринисиз кеткан әди.

— Ўзингиз адашдим, дедингиз-ку, тагин қаёққа бормоқчи бўласиз?

— Сизга оғир келмас...

— Оғирлиги йўқ, юриңгиз, — деди ва олдинға тушиб Отабекка йўл бошлади: — Ман ҳам сизга ўхшаган бир ғарип.

Отабек киши орқасидан кетди, олдинма-кейин сўзлашмасдангина кўчанинг оёғига қараб борар әдилар. Анчагина юргач, бошловчи "отингизга ҳам жой бор" деб қўйди. Отабек жавоб бермади. Шу кўйи сўzsизгинага кўчанинг бурилишига етдилар-да, киши Отабекни тұхташға буюрди, ўзи шошилиб ўқуғучига маълум Жаннат опа эшигининг чап томонидағи иккинчи эшикни очиш учун қулфни тимискилади. Эшикни очиши билан:

— Отдан қўнингиз, меҳмон, — деди, отни Отабек қўлидан олғач, — сиз хуржинингизни олиб йўлакдан тұғриға кираберингиз, — деди. Отабек хуржинни күтариб эшикка кирди, усти ёпиқ қоп-қоронғи йўлакдан ўтиб каттагина бир ҳавлига чиқди ва хуржинни ҳавлининг ўртасига элтиб қўйди. Киши отни бурчакдаги усти ёпиқ охиргами, суфагами боғлағач, келиб хуржинни олди.

— Қани айвонға, — деб йўл бошлади. Киши Отабекни ўтқузғач, тоқчадан сопоя лаган билан қовуқни олиб чақмоқ суртди. Шамъ ёқилди. Бу киши қирқ ёшлар чамалиқ, қоңсиз юзлик, сийраккина соқоллик, қўй кўз, кўб вақт мадраса риёзатини чекканнамо, қотма, узун бўйлик бир одам эди. Айвоннинг полос ва асбларида унча бойлиқ кўрилмаса ҳам пухта, озода, чирк юқтурилмаган йўсунда йигиштирилғанлигидан эгасининг ринд<sup>1</sup> табиъатлик эканига шаҳодат бермакда эди. Айвоннинг сўл томонида кўрилган бир эшик ила уйми, ҳужрами, борлиги билинар эди.

Уй эгаси Отабекни яхшилаб кўз остидан ўтқузғач сўради:

— Қорнингиз албатта очдир, меҳмон? — Отабекдан жавоб кутиб турмай ўзи ҳукм ҳам бериб қўйди. — Йўл билан албатта очиқсансиз, савзи-пиёз ва гўштларим ҳаммаси тайёр, фақат ўчиқка олов ёқсан, холос, ўзим ҳам ҳали хўрак қилғаним йўқ, кўб эмас озғина, бир чимдимгина қиласман. — Отабекнинг узрига қулоқ бермай ошга урнашка олди. Отабек энди ўткан ишларни кўз ўнгидан ўткуза бошлиған эди. Бу кунги беш дақиқа орасида бўлиб ўткан воқиъни ҳеч бир йўсун билан миясига сифдира олмас, чиндан бўлған иш деб ўйлашға ақли бовар қиласман эди. Лекин қулоқлари остида ҳозирғина айтилган "Уятсизга манинг уйимдан ўрин йўқ..." Борингиз, эшигим ёнида тўхтамангиз!" сўзининг садоси қандай бўлса ҳам унга бир ҳақиқатни очиқ сўзлар ва нафсида сезилган хўрланиш ва ҳаяжон буни тасдиқлар, бугина эмас юзига ёпилған дарбозанинг, шилдир-шилдир қилиб боғланған занжирнинг садоси ҳам бу ҳақиқатни таъкидлар эди. Бундан сўнг Кумушнинг заҳарлик муаммо мактуби бир сидира кўз ўнгидан ўтиб кетди. Мактубдаги тушиниши қийин бўлған нукта<sup>2</sup> ва ишоратлар яна бир қайта заҳар сочиб ўткандек бўлдилар. Лекин буларнинг барчасининг йигиб очиқ-оидин бир натижা чиқариш кучидан ожиз, гўё иситма вақтида бўлатурған тутуриқсиз, боғланишсиз алжи-билжи ҳолатни кечириб, ипни бир-бирисига боғлай билмас эди. Аммо ҳозирги дақиқада унга энг очиқ таъсир эткан нарса:

<sup>1</sup> Ринд — нозик, синчиков.

<sup>2</sup> Нукта — сир, сирли ибора.

"Борингиз, эшигим ёнида тўхтамангиз!" жумласи бўлиб, тўлқинланған иззати нафси ҳамиша "қора оҳу кўзларни" кўришка ўрганимиш юрак кўзини хўрлик пардаси билан яширишга тиришар эди. Воқъяън туғилиб эркалиқдагина ўскан, ҳаётнинг дағал муомаласидан бегона, фақат унинг сучук сўзларинигина тинглаб келган Отабекка бу хўрлик турмишдан биринчи зарба эди. Шунинг учун Кумушка бағишлиланған юрак тугунини ешилған ҳолда кўрар, гўё марварид туғилған ҳарир рўймол ўғирлиқдан сўнг оёқ остларида бўб-бўш ётқандек ва эгаси шу ўғирланған жа-воҳиротининг аламини чекиб турғандек эди.

Уй эгаси ошга савзи босиб Отабек ёнига келди, ул бошқа ҳиссиёт ва фикрларини вақтингчага унутиб, ўзини тетикликка олди. Уй эгаси Отабек ёнига ўлтурас экан, сўради:

— Сизники қаердан, меҳмон?

— Тошканддан, мулла ака.

— Исмингиз?

Отабек манглайини қашиб олғач, жавоб берди:

— Шокирбек...

— Марғилонға биринчи келишингизми?

— Биринчи келишим...

— Савдо важҳи билан келгандирсиз? — уй эгаси Отабекнинг қиёфат ва уст-бошидан савдогарга ўхшатқан эди.

— Йўқ... Ман асли Қўқонға келган эдим, аммо Марғилонда отам танишларидан биттасида озроқ оласимиз бўлиб, шу кишига учрашиб кетайин, деб Марғилонға ўткан эдим, — Отабек ўзининг ёлғонлашидан ўнграйсизланиб бир оз тўхтаб олди, — бу кишининг қаерда туриши менга очиқ маълум эмас эди ва Марғилонда бошқа танишм бўлмағанлиқдан ва вақтнинг кечлигидан адашиб қолдим...

Уй эгаси кулди:

— Насибдан қочиб бўлмайди, Шокирбек; бу кун кечаси менга меҳмон бўлишингиз бор экан. Учрашатурган кишингизнинг оти нима?

— Комилбой...

Уй эгаси ўйлаб турди-да:

— Бизнинг бу яқинларда бундай киши йўқ, эҳтимол нариги даҳададир, — деди ва туриб ошига қараб кетди. Отабек ўзининг қипқизил ёлғонлашидан виждони олдида қизаринди. Аммо ул бир томондан бунга мажбур ҳам эди, чунки унинг қутидор билан қамалиш ва ўлумга ҳукм

етилиш тарихи бутун Маргилонға машхур бўлиб ҳақиқий исмини яширмай айтканда, эҳтимолки бошқа сирларни ҳам очмоққа тўғри келар эди. Уй эгаси қозон ёнига кеткач, ул ҳам ўрнидан туриб ҳавлига тушди. Айвоннинг нариги ёни билан шарққа қараб кирилатурган бир йўлак орқалиқ бир боқчагами, майдонгами чиқилишини билиб шу ёққа юрди ва кичикрак бир мевазорга чиқди. Кечанинг қоронғилиғи устига меваларнинг қуюқ япроқлари қўшилишиб, бу майдон айниқса Отабекнинг ҳозирги кўнглига яқинлашиб келар эди. Унинг кўнгил меваси бу кунги қора воқиъа билан қандай ўралиб, йўқолиб кеткан бўлса бундаги дараҳтлар ҳам ўз меваларини кеча ранги билан бўяб, яшил япроқлари ила кўмган эдилар, яъни бунда ўскан дараҳтлар қандай мева берадир — ажратиш қийин эди. Ул шу қоронғизор билан қўшилишиб кеткандек ва қоронғилиқнинг қучогига кира борғандек мевазорнинг ичкарисига юруй борди. Ва ниҳоят бутоқлари багриға солиниб тушкан бир дараҳтнинг остига ўлтурди ва бу ўлтуришда узоқ фурсат қотиб қолғандек ҳаракатсиз эди. Ўн беш дақиқалардан сўнг ичига ел қамалған пуввакдек уффф этиб юборғач, ўрнидан турди. Боқчанинг кунботари билан харобазор иморатларни ёnlаб юрди.

Отабек айвонға қайтиб келганда, уй эгаси ошни дамлаб бўлиб, айвонда уни кутиб ўлтурмақда эди.

— Отингизга озроқ жоҳори бериб қўйдим.

— Раҳмат, мулла ака, — деди Отабек, уй эгаси нимадир сўзламакчи бўлса ҳам ўнгтайсизланғансумон Отабекка тикилиб-тикилиб қўймоқда эди.

— Касбим тўқуғучилик, Шокирбек, — деди уй эгаси.

• Отабек сўзни тугалмаганилигини билиб, унинг оғзиға қараб турар эди:

— Доим заҳда ўлтуриб ишлаганданми ёки ўзимнинг табиъатимда заифлик борми, ишқилиб нима бўлса ҳам кўб вақтдан бери бедармон тортиб юрибман, — деди ва давом этди, — тоҳо кўкрак ҳам оғриб қўядир. Яқинларда табибларга кўрсаткан эдим, қонингиз оз, қимиз ичинг, хўрак олдидан мавиз<sup>1</sup> истиъмол қилинг, деб кенгаш бердилар. Уларнинг кенгаши бўюнча уч-тўрт кун қимиз ва мавиз истеъмол қилиб боқсан эдим воқиъан бир мунча фойдаси

<sup>1</sup> Мавиз — майиз (узумдан ясалган май).

ҳам маълум бўлди. Сизга буни сўзлаб шуни айтмакчиманки, ош олдидан бир-икки пиёла мавиз ичиб юборсан, албатта бунга сизнинг қаршилигингиз бўлмас-а? — деди ва кулди.

— Қандай қаршилигим бўлсин, сиз маъзурсиз.

Уй эгаси илжайган ҳолда ҳужрага кириб, ўзининг таъбирича май эмас бир кўвача мавизни олиб чиқди, тоқчадан пиёла олгач келиб Отабекнинг ёнига ўлтурди. Мавизни пиёлага чулдиратиб қуяр экан, меҳмонига ер остидан муралаб кулимсираб қўйди.

— Сизнинг ҳам ичканингиз борми?

— Йўқ.

Тўғриси ҳам Отабек ичкулукдан қаттиғ ҳазар қилар ва бу кунгача майнин ўзига душман каби кўриб келар эди. Уй эгаси қуйган пиёласини симириб юборғач, сездирмаслик қилиб сесканиб қўйди ва:

— Аниқ ичмаганмисиз? — деб яна сўраган эди, Отабек бошини чайқаш билан кифояланди.

Қаттиғ узр бўлмағанда ичмаган ҳам маъқул, — деди ва иккинчи пиёлани тўлдирап экан, давом қилди, — лекин бу нарса бир томондан кишининг саломатлигига фойда берса, иккинчи жиҳатдан тирикликтининг қайгу ва аламларини-да унудириб турар экан. Бошимга ўлгунча унута олмаслиқ қайгу-ҳасратлар тушди, Шокирбек. Айниқса кейинги йилларда ўзимга ҳеч бир қаердан овинчоқ тополмай, ниҳоят шу аччиғ сув билан овинатурган ҳолга келиб қолдим, — деди ва узоқ тин олиб тўлғизган пиёласини олдиға қўйди. Иkkиси ҳам бир неча вақт сукутда қолдилар. Ул иккинчи пиёлани ичкач, Отабекни диққат билан кузатиб чиқди.

— Агар янгишмасам, сиз ҳам бир оз қайгулироқ қўринасиз меҳмон, бир пислани ичиб юбормайсизми?

— Раҳмат, мулла ака, — деди Отабек, аммо ўзида таърифи сўзланиб ўтилган нарсага бир эҳтиёж сеза бошлаган ва ўзини ҳам маъзурлар қаторига қўяёзган эди. Унинг бу ҳолини уй эгаси сездими ёки синаб кўрмакчи бўлдими ҳайтовур учунчи пиёлани тўлдириб Отабекка узатди:

— Қўлимни қайтарманг меҳмон. Иккимиз ҳам маъзур қўринамиз.

Отабек узрини айтиб, пиёлани олмай турған эди, ул ҳам пиёлани узатканча кулиб тураберди.

— Ман мавизни тамом шаръий қилиб тайёрлайман, тунов кун маҳалламизнинг охунлари ҳам ҳалоллигига фатво бериб кетдилар.

Отабек пиёлани олишга мажбур бўлди. Уй эгасининг айтканидек мавиз жуда ҳам тиниқ, яхши чиқған кўкчой каби мусаффо эди. Пиёлага узоқ қараб турмай ичиб ҳам юборди. Оч қоринга тушкан ўтқир май виж-ж этдириб меъдани қайнатди-да, томоқ остини ловуллатмоқча олди. Отабекка биринчи пиёлани ичирғандан сўнг, уй эгаси ошни сузишкага кетди.

## 8. БАХТ ВА БАХТСИЗЛИК

Ошни сузиг келтиргач, меҳмонни ошқа таклиф қилишдан бурун яна тоқчадаги күвачани олиб бир пиёлани түлдирди ва Отабекка узатди.

— Ичинг буни ҳам, сүнгра ошни сўмиз, — деди. Бу гал унча қистатишқа тўғри келмади, биринчи пиёла билан унинг кўз ўнглари жимиirlашмакка ва ўзида бир енгиллик ҳис этмакка бошлаган ва бу иккинчи пиёла гўё "мени ичсанг тагин ҳам енгил тортасан" дер эди. Отабекнинг иккинчи пиёласидан сўнг ошга ўлтурдилар. Битта "дон" ҳазмини ҳам тасаввур қилмаган унинг месъдаси кетма-кет тушиб турған луқмаларни зътиrozсиз қабул қилмоқда эди. Бундай иштиҳони, эҳтимолки, ул ўз умрида биринчи мартаба кўргандир. Томоқ орасида уй эгасининг берган саволларига яхши жавоб берганидек, ўзи ҳам баъзи сўзларни тўқиб юбормоқда, бояғи оз сўзликлар ўрнини эзмалик бўлмаса ҳам мўтадил бир ҳол олған эди.

Ошдан сүнг лаган ва дастурхонни йигишидириб олгучи уй эгасига сархуш ва қизарған күзлари билан узоқ қараб қўйди. Бу қарап унга миннатдорлиқ ва ташаккур қараши зди. Уй эгаси Отабекнинг ёнига иккита ёстиқ олиб қўйди ва биттани ўз ёнбошига ҳам олди.

— Ёнбошлангиз бек, — деди, бошлаб ўзи ёнбошлади, Отабек ҳам унга эргашди. Иккисининг орасидағи шамъ ел билан үйнашибгина нур сепар, иккиси ҳам сўз қўйишқандек шамъга кўз тикиб қандай ўйгадир берилгандек кўринар эдилар. Бир неча вақтдан сўнг уй эгаси кўзини шамъдан олди ва ер остидан Отабекни кузаткач, сўради:

— Уйланганмисиз, бек?

Отабекнинг кайфи кучликми эди ёки сўзни онгламай қолдими, ҳайтовур шу онда жавоб беролмади.

— Уйланганман.

Сүрағучи бир оз тұхтаб олғач, яна сүради:

— Хотинингизга муҳаббатингиз борми?

Отабек бу савол қаршиисида гарангсиб қолғандек бўлди, воқитъян орага оғир савол тушкан эди, билинтирмаслик қилиб уфлаб олди.

— Мұҳаббатим... йўқ.

— Яхши экан, — деди уй эгаси. Отабек унинг бу сўзига тушиналмай, "Нега?" дегандек қилиб қараб турар эди.

— Сўзимга ажабландингиз шекиллик?

— Йўқ, — деди Отабек, лекин унинг таажжуби уй эгасига очиқ кўриниб турар эди.

— Балки мұҳаббат баҳтлик кишилар учун яхшидир, лекин ўз тажрибамча, баҳтсиз киши учун бадбаҳтлиkdir. Масалан сиз агар чиндан ҳам хотинингизга мұҳаббатсиз бўлсангиз, ўзингиз ҳам иқорор қила оласиз: уйга кирсангиз хотининг оғирлик ва енгиллиги бирдак. Шундоқ эмасми?

— Шундоқ, — деди Отабек, аммо мұҳаббат тўғрисида сўзланган бу сўзлар унинг кайфлик кўзини оча ёздилар.

Уй эгаси давом қилди:

— Мен бу сўзларни ўз ҳолимдан чоғлаб айтаман, эҳтимолки мен янглишарман, — деди ва узоқ тин олғач, сўради: — Сиз уйлангандা ўзингиз ёқтириб уйландингизми ёки орадагиларнинг ёқтиришлари биланми?

Отабек сўрағучининг қандай муддаоси борлиғига тушумрай қолди.

— Онамнинг ёқтириши билан.

— Баракалла, — деди уй эгаси ва, — манимча ҳамма бало ўзинг кўриб, суйиб уйланища, — деди ва эшикучиси кутмаган жойда сукутка кетди. Отабек бир кўйнакни ўзидан бурун йирткан киши тўғрисида гўё ўз саргузаштининг эски тарихини мулоҳаза қила бошлиған, қаршиисида ўлтургучини-да, қайнин ота эшигидан қувланган киши деб билган эди. Қайнин отанг сени ҳам қувладими, деб айтмаса ҳам шунга яқин бўлған "суйган хотинингиз сизни ташлаб кетдими?" деган саволни берди. Уй эгаси бошини чайқади:

— Ташлаб кетишкан — кетди, лекин ўз ихтиёрича эмас, — деди. Отабек бу сўздан сўнг бунинг ҳам қайнин отаси ёки қайнин онаси томонидан зулм кўрганига ишонган эди.

— Ёмон одамнинг юзи қурсин, — деб қўйди, бу сўз уй эгасига тушунарлик бўлмади шекиллик, Отабекка савол назари билан қараб олди.

— Эзмалик бўлса ҳам бошимдан ўтканларни сўзлаб берайми, меҳмон? — деди.

Ўз саргузашти билан фарқсизға ўхшаб кўринган бу ҳикояни эшишишка унинг иштиёқи ортқан эди:

— Сиз сўзламасангиз-да, мен сўзлатмоқчи бўлиб турар эдим.

— Маним саргузаштимда сиз куткан қизиқлиқ йўқ. Лекин шундай бўлса ҳам сўзлаб берайин, — деди ва ёстиқни кўкрагига қўйиб олгач, ҳикоясини бошлади:

— Мен ўзим асли қўқонлиқман. Ота-онамдан ёшлиқда ятим бўлиб, тогамнинг қўлида ўздим. Ёшим 17-18 ларга борғандан сўнг ўз куним ўзимга қолиб, бир ўрготимнинг кенгаси билан бундан йигирма йиллар бурун Марғилонга келиб, бу кунги устакоримнинг отасига тўқувчилик ҳунарига шогирд тушдим. Тўрт йил чамаси қилган хизматимдан сўнг ҳалиги устакорга ҳалфа бўлиб ишлай бошладим. Бошқа йигитлардек ортиқча ўринисиз сарфларим бўлмагани учун оз замон ичидаги уч-тўрт тилла пуллик ҳам бўлдим. Ишимга ихлос билан қараганим учун манинг тўқуған ишларим ўзгаларнидан қадрлик юрар ва ҳалқ орасида ҳам отим "уста Алим кичкина" бўлиб шуҳратланган эди. Маълумки боғандалар<sup>1</sup> олдига қўпинча хотин-қизлар келиб, янги нусха қидириб юрийдирлар. Манинг тўқуған ишларим ва чиқарған нусхаларим ҳаммага мақбул, айниқса хотин-қизлар учун машҳур бўлиб, ҳар доим тўқув дўконим ёнидан хотин-қизлар айрилмас эдилар.

Кунлардан бир кун ҳали кишидан қочар даражага етмаган ўн уч-ўн тўрт ёшлар чамалиқ дўндиққина бир қиз келиб, мен чиқарған янги нусха шоҳидан сўради. Қизнинг сўраған нусхаси тўқилиб ва сотилиб кеткан эди. Шунинг учун "йўқ" деб жавоб бердим. Қиз кўзини жовдиратиб туриб, "манинг учун тўқиб беролмайсизми?" деб сўради. Мен қизнинг юзига қараб, "мумкин эмас опа, бир кийимлик шоҳи деб нусха бўяш оғир" дедим. Қиз сўзни айлантириб мендан ваъда олишга тиришар эди. Мен сўз орасида яна унга қараб олдим. Ёнимдағи ҳалфалардан биттаси қизға ўла<sup>2</sup>, "тўқиб беринг, уста, опани хафа қилманг!" деб қўйди. Учунчи қарашда ўзимда қизға қарши бир яқинлиқ ҳис эткан, унга узоққина қараб қолишга мажбур бўлған

<sup>1</sup> Боғандада — тўқувчи.

<sup>2</sup> Ўла — томон.

эдим. Гарчи қиз айткан нусхани тайёрлаш оғир бўлса ҳам қандайдир бир куч таъсирида ҳалиги қизга ваъда бериб юборибман. Ул чиқиб кеткач, қандай ваъда берганимни ўйлаб кўриб, ваъда куни келса тўқуй олмадим, деярман деган сўзни кўнглимдан ўтқуздим, лекин қизнинг гуноҳсиз ўйнаб турған қора кўзлари, қизил олмадек тарам-тарам юзлари ҳамон кўз ўнгимда кўриниб турар эдилар ва "манинг учун тўқиб беролмайсизми?" — сўзи қулоқ остимдан такрор айтилгандек бўлар эдилар.

Бир неча кун шу йўсун иккиланиб юргач, ниҳоят ўзимга тушинилмаган бир савқ<sup>1</sup> остида ваъдамни ифога ҳам бошлабман, бир кийим шоҳи, деб ўттуз кийим бўлатурған ипакни бўяш, танда, арқоқ, гўла машақатла-ри кўзимга ҳеч кўринибдир. Ваъдамдан икки кун илгариёқ шоҳини тўқиб, унинг келар йўлини пойлар эдим, ул келмас эди. Ниҳоят ваъда куни ҳам келиб ўтди, яна келмади. Сизга шуни ҳам айтиб қўяйки, бир кўрган кишингизнинг тусини албатта узоқ фурсат хотирингизда тутолмайсиз, лекин бу қиз тўғрисида ман тамом бошқача ҳолатда бўлдим: шундоқки, унинг қошини, кўзини, тусини, қўғурчоқдек қаддини кўз ўнгимда тута-тута тамом бир йиллик билишлардек бўлиб қолибман. Унинг товуш оҳанглари қулогим хотирасида у даража яхши сақлан-маган бўлса-да, аммо "манинг учун тўқиб беролмайсизми?" сўзини ҳозиргина эшиткандек бўлар эдим.

Ваъда кунидан уч-тўрт кун ўтиб кеткан бўлса ҳам ҳануз ул келмас эди. Мен унинг кўчасини сўраб қолмаганимдан хафа бўлар эдим. Чунки, шоҳини ўзим элтиб беришка ҳам энди ҳозирланиб қолған эдим. Бу кутиш кунларимда на учундир снимдағи халфа шогирдлар билан бўлатурған муомалаларим ҳам ўзгара бошлиған, яъни сўзларим дағал ва тундликка айланған, гўё бунинг ила Алининг кекини Валидан олар эдим.

Ниҳоят ваъданинг бешинчи куни қиз келди. Қизни кўриш билан мен борлиқ-йўқлиқ ҳолатда қолған, бир неча замон манинг учун сўз топиш ҳам қийинлашқан эди. Қиз шоҳини сўрамай менга термулиб турар эди. Унинг миннатдорчилигини фақат шоҳи билан олмоқчи бўлғаним учун бу ҳол менга оғир келди. "Нега ваъдага келмадин-

<sup>1</sup> Савқ — йўналиш.

гиз?" — дедим. Қиз ўнгғайсизланиб, гуноқкорларча күзини ерга тиккани ҳолда сўради:

— Шоҳини сотиб юбордингизми?

Ёнимга қўйиб ўлтурған шоҳини қизға узатдим. Ул шоҳининг орқа-ўнгини ағдариб кўрди ва "Яхши тўқибсиз" деб менга умидсизча қараб қўйди. Шоҳини менга бериб қўлидағи майда чақаларни олдимга тўқди.

— Шоҳингиз қанча пуллик?

Мен жавоб ўрнига чақаларни санаб чиқдим, битта олтмиш пуллик тангасидан бошқаси бир пуллик, беш пуллик занг босқан чақалар бўлиб, кўб вақтлардан бери йигилиб келганлиги маълум эди. Берган пули шоҳининг ярим баҳосини қоплар-қопламас бўлганлигини айтдим.

— Тағин қанча керак? — деб сўради.

— Уч танга, — дедим. Қизнинг ўйчан юзини яна қайгу босди. Мен унинг юзидан катта ҳусндор қизларда кўриладирган бир улуғлиқ томоша қиласар эдим ва унинг ўз ваъдасига кела олмағанлиги сиррини онглар эдим. Бу ёш фариштани бу ҳолда қолдиришга кўнглим бўлмади ва дедим:

— Қолғанини қачон олиб келасиз? — Бунга ҳам тез жавоб бермади ва жавобсизлик билан яна ўз ҳолини менга арз қилғандек бўлди.

— Пул топқанда келтирасизми? — дедим-да, унинг жавобини кутмай қўлиға шоҳини тутқуздим. Қиз менга ишонмай бошлиған эди:

— Менга ишонасизми?

Мен ишонч билдириб ўлтурмадим:

— Ўйингиз қасрда?

— Ч... маҳалласида.

— Кимнинг қизисиз?

— Шариф милтиқчининг қизиман.

— Отангиз қариб қолғанми?

— Ўлган. Онам бор.

— Акангиз йўқми?

— Йўқ. Битта кичкина ўғул укам бор.

— Ислингиз нима?

— Саодат.

Шундан сўнг Саодатни шоҳи билан жўнатиб юбордим. Саодат манинг бу ишимга ишонмайғина чиқиб кетди. Халфа шогирдлар: "Тузиксиз-ку уста", деб менга пичинг отишдилар. Аммо ман Саодат учун ҳар бир оғирлиқни кўттаргундек кўринар эдим...

Үй эгаси бўлған уста Алим ҳикоясини тўхтатиб, Ота-бекдан сўради:

— Ҳикоям узайиб кетди шекиллик, зерикдингизми?

Отабек уни ортиқча бир эътибор билан эшитар эди, сархушчасига:

— Сўзлай берингиз, — деди.

Уста Алим давом этди:

— "Менга уч танганинг аҳамияти йўқ эди. Аммо Саодат билан боғланиб туришим учун бу уч танга минг танганинг ишини қиласр эди. Орадан ўн кунни ўтқузиб, уч танга баҳонаси билан Саодатнинг уйига бордим. Саодат холасининг уйига кеткан экан, онасиға ўзимни танитиб, девор орқалиқ анчагина сўзлашдик: эри ўлиб эркаксиз қолғанидан, ип йигириб овқат ўткарғанидан ва қизининг кенгашмасдан шоҳи буюрганидан ҳасрат қилиб кетди; сўзининг охирида яна бир ҳафта кутиб туришимни илтимос қилди. Бир ҳафтадан сўнг алоқани узиб қўйиш манинг тинкамни қуритатурган бўлғани учун ишни бошқа режада юргизмакчи бўлиб айтдим: — Ўзингиз ип йигириб, кун кўриб турган бўлсангиз, сизга уч танга эмас, уч пул бериш ҳам оғир экан, агарда сизга маъқул бўлса кўнглимга бир гап келадир, шундоқки, сиз эркаксиз бўлғанингиздек мен ота-онасиз ёлғиз йигитман... Кўпинча кир ювдириш ва йиртиқ-ямоқ важҳларидан қийналаман. Ўша сиздаги пул эвазига бир неча вақт кир-пиримга қараб, йиртиқ-ямогимни ямаб берсангиз қандоқ бўлар экан... Кампир бу сўзимни мамнуният билан қабул қилди ва эртаси кунга кирларимни олиб келиш учун Саодатни юбормоқчи бўлди. Шундоқ қилиб бу кун боғланышни яхши асоска қуриб қайтдим. Эртасига Саодат келиб кирларимни олиб кетди. Уч кундан сўнг ювилган кирларни келтириб, тўқув дўконимнинг ёнида анчагина қараб ўltурди. Мен унинг келиши учун ҳар ҳафта панжшанба кунини белгуладим. Кундан-кун Саодатка қаттигроқ боғлана борғанимни онглар эдим, панжшанбани ҳайит сингари қаршилар эдим. Орадан уч-тўрт ҳафта ўткандан сўнг қўлига "ойингга элтиб бер" деб йигирма-ўттуз чақа пул ҳам бердим. Саодат билан алоқа қилғанимнинг тўртинчи ойида рамазон ҳайити келди. Фитир рўза баҳонаси билан Саодат учун саккиз тепки хон атлас, онаси билан укасига бўз кўйнак қилиб, Саодатларнинг уйига ўзим чақириб бордим. Саодат мени йўлакдан қаршилади ва гуноҳсизча қўлимдан тутиб ичкарига бошлади.

Мен: — Саодат, эсингни едингми, онанг мендан қочмайдими? — дедим. Саодат тортишида давом этиб:

— Қочмайди, ўзи менга устаканг келса қочмайман, деган.

Мен Саодатнинг йўлбошлиги билан ичкарига кирдим. Айвоннинг олдида Саодатнинг онаси ип йигириб ўлтуар экан, қизининг қўлида бегона йигитни кўргач, ҳайрон бўлиб қолған эди. Саодат мени ҳавлининг ўртасида қўйиб онасининг олдиға югарди ва:

— Устакам-ку! — деди. Онаси нари-бери даканасини тузатиб ўрнидан турди. Салом-аликдан сўнг сўрашдик. Саодат тегимга кўрпача ёзди, мен қўйнимдагини олиб ўртага қўйдим. Фотиҳадан сўнг бир оз ётсирашиб, уялишиб очилишолмай қолдиқ. Сўнгра кампир Саодатнинг маним тўгримда айтатурган сўзларидан муқаддима қилиб деди:

— Саодат сизни худда ўз акасидек яхши кўрадир, тунов кун ироқи собун олғил, деб ўттuz пул берган экансиз. Собунни олиб келгач, ётиб уйқуси келмади,вой устакамдан айланай,вой устакамнинг умрини худо баҳтимга узун қилсин, деб бутун тонгни-тонг отдириб дуо қилиб чиқди.

Бу сўзни кампир сўзлар экан, мен ўнгтайсизланиб кетиб ер остидан Саодатка қараб қўйдим. Саодат қизариб-бўзариб четка бурилиб олған эди. Кампир давом этди: — Мунчалик бизнинг ҳолимизга қайишганингиз учун беш вақт намознинг олдида мен ҳам ҳаққингизга дуо қилишни унумтмайман ва ҳафта сайн қилиб турған марҳаматингизни кўриб ўйлайман: худо бандасига меҳрибон, ҳолимизнинг раҳмини сб саховатлик бу йигитни бизга учратди деб, кўнглингиздаги ҳар на тилагингиз ўзига аёндир. Сиз ятимларнинг раҳмини есангиз, сизнинг ғамингизни ўзи есин. Кампир бир уфлаб олғач, деди: Манглайим шўрлик экан, болам, Саодатнинг Қаюмжон отлиқ бир акаси бор эди, ёши еттига чиқиб, отаси раҳматлик эндинина тўй қиласман, деб турғанда қизамиқ деган бир фалакат касал билан оғриб дунёдан ўтди, бунинг устига Саодатнинг отаси ҳам марҳум бўлиб бизларни ора йўлда қолдириб кетди. Лоақал шу бола бўлғанда ҳам эди, биз бу йўсун оғир кунларга қолмасми эдик, деб ўйлайман, — кўз ёшисини артиб сўзини битирди. — Бандасининг қўлидан келатургани оҳ-воҳдан нарига ўта олмас экан, болам!..

Мен кўнгил кўтарган бўлдим:

— Олдингизда ёш бўлсалар ҳам қизингиз ва ўғлингиз

бор экан, бу кун бўлмаса эртага ахир сиз ҳам ёруғлиқ кунга чиқиб қоларсиз, она, — дедим ва келтурган нарсанни кампирнинг олдига суриб: — Шу арзимаған нарсанни Саодат билан укасига ҳайитликка олиб келган эдим, бу айбим учун албатта мендан койимассиз, дедим.

— Одамгарчилиғингиздан ўргулай, — деди кампир ва оғзиға келган сўзлар билан duo миннатдорчилик қила бошлади. Бояғи сўздан кейин уялғанича биздан узоқроқда ўлтурган Саодат секингина бизнинг ёнға келди ва қоғозга ўралған кийимлики очиб атласни олди. "Бу менгами" деб мендан сўради ва жавобимни кутиб ҳам турмай йўллик бўзни олди. "Бу Сайфига" деди. Унинг орасидағи одими бўзни кўруб: "бу ойимга" деди. Саодат бу нарсаларни жуда оддий қилиб кўрди ва соддача ҳалиги сўзларни айтиб қўйди. Гёё бу нарсаларни илгаридан куткан эди. Атласни яхшилаб кўриб чиқғач, ёқтиргандек бўлди, бир менга ва бир атласка қараб туриб нимадир айтмакчи бўлса ҳам айтталмади. Мен нима демакчи бўлғанлигини сезган эдим. Бу орада биз кампир билан ҳасратлашиб турған эдик, ул келиб сўзни бўлди:

— Устака, — деди, мен қарадим. — Рўзамисиз?

— Рўзаман.

— Рўза бўлмасангиз чой қайнатар эдим, — деди. Онаси кулди.

— Чойни ҳайитда келганимда қайнатиб берарсан, — дедим.

— Ҳайитда келсангиз ош ҳам қилиб берар эдим, — деди ва онасиға қаради.

— Акангта ҳар нарса қилсанг ҳам арзийdir, қизим, — деди кампир ва на учундир кўзига ёш олди, мен ҳам аранг кўз ёшимни тўхтатиб қолдим.

— Бўлмаса бу кун ифтор қилақолинг. — Саодатнинг бу сўзиға онаси ҳам қўшилишди. Мен узр айтдим. Лекин ҳақиқатда эса, Саодат билан бирга ўлтуриб ифтор қилишни кўнгил истай бошлиған эди. Узоқ сўзлашиб ўлтурдим, бу уйдан чиқиб кетким келмас, бир соат орасида тамоман очилиб, сочилиб кеткан Саодатнинг болаларча қилигини кўриб тўймас эдим. Саодат тоҳ мен билан, тоҳ атлас билан машғул, бояғи уялиб туришини бир ёққа йигишдириб қўйған, онаси билан мени кулдириб, анчагина кўтарилиб қолған латиф кўкраги устига "сенгинадан айланай!" деб атласни босиб қучоқлар эди. Мен бўлсам гёё атлас эмас, қучоқлангучи ўзим бўлғандек кайфланар эдим.

Мен кампир билан хайрлашиб чиқа бошлиған эдим,

Саодат "Панжшанба кун борайми" деб сўради. Мен кампирнинг олдига қайтиб бордим-да, айтдим: — Саодатингизнинг бўйи чўзилиб қолган кўринадир, мундан сўнг мактабдан бўшаған вақтида Сайфини юборсангиз қалай бўлар экан ва қўлим бўшаған кезларда ўзим ҳам келиб турарман, — дедим. Гўё кампир ҳам мендан шу сўзни кутиб турган экан, ҳамиятимга ва ақлимга таҳсин ўқуди ва қизига қаради. "Ана, эшилдингми устакангнинг сўзини, энди вақт-бевақт кўчага ҳам чиқаберма!" — деди. Мен чиқатуриб Саодатка қараган эдим, мендан ўпкалагансумон кўринди. Аммо манинг бу сўзим бекорга эмас, балки халфа шогирдлардан бағзиларининг унга ёмон кўз билан қарағанларини пайқағаним учун эди.

Шу йўсунда Саодатнинг онаси ҳам мендан қочмай қўйиб, алоқамиз тагин ҳам қаттиглашди. Кутмаган бу муваффақиятим бир неча кунгача кўзимдаги уйқуни ҳам қочириб қўйди. Уч-тўрт кун гўё бу кун-эрта Саодатка уйланатурған каби ҳовлиқиб ҳам юрдим.

Унча-мунча нарсани аямағаним учун бўлса керак, тез замонда гўё Саодатлар оиласининг бошлиғи ҳолини олиб қолдим. Жума кунлари масаллиғни кўтариб Саодатларнинг кига борар, Саодатнинг қўлидан ош қилдириб еб қайтар эдим. Саодат кундан-кунга ўсиб борар, шу нусбатда ҳуснига ҳусн қўшилар ва мен баттар унинг мафтуни кесилар эдим. Шу ҳолда орадан икки йил чамаси фурсат ўтиб кетиб, Саодат ҳам ўн олти ўшларга стиб қолди. Энди манинг ошиқона термулишларим маъносини онглий бошлиған, негадир "ака" деб қилатурған хитобларни-да тарк эткан эди. Икки йилдан бери кампирнинг олдига совчи киргузишни ўйлаб келган бўлсам-да, аммо нима учундир Саодатдек қизға уйланиш баҳтига эришмакни ўзимга тасаввур қилолмас эдим. Бу тўғрида бўлған ҳамма умидим Саодатнинг онасидан эди, балки ўзи сўз очар ва ёким орага киши қўяр, деб кутар эдим. Орага бошлаб ўзим совчи қўйишдан ўнгтайсизланар, тўғриси ўзимга тушунилмаган бир хавф остида бу жасоратдан маҳрум эдим.

Бир кун одатимча Саодатлар уйига борган эдим. Ошсувдан кейин кампир Саодатни ўчоқбоши юмишига юбориб, менға қараб кулди:

— Саодатка бир яхши жойдан куяв чиқиб қолди. Кечада унашсак унашкунде ҳам бўлған эдик, бироқ сизнинг маслаҳатингизни олайин, деб совчиларни қайтардим, — демасинми, устимдан бир чеълак совуқ сув қуйғандек эн-

тикдим, қандай жавоб беришка тилем келмай қолди. Үзоқ вақт кесак каби ҳаракатсиз қолғач, күч орқасида тилемни базур шу сүзга ҳаракатлантиридим:

— Жойи яхши бўлса, ўйлаб кўриш керак...

Куявнинг кимнинг ўғли бўлғанлигини ва қандай касб қилишини шарҳ қила бошлиған эди, сабрим тамом битди:

— Ундоғ бўлса кеча совчиларни бекор қайтарибсиз, — дедим.

Кампир маним бу киноямга тушунмаған эди:

— Куявнинг теги-тахти менга маъқул бўлишка бўлди-я, фақат энди иш сизнинг кенгашингизга қараб қолди, сиз Саодатка ота бўлмасангиз ҳам лекин оталиқдан юқори ишларни қилиб келасиз. Эндиликда Саодатни узатишида ҳам оталиғингизни аямангиз, — деди. Бу сўз билан яна ўлганнинг устига чиқиб тепилгандек бўлдим. Чаён каби мени заҳарламакда бўлған кампирнинг тўғри сўзини эши-тиб туришка ортиқ тўзалмадим-да, эртагача ўйлаб жавоб беришни айтиб кампирнинг олдидан чиқдим.

Чиқғач, оёғи куйган товуқдек тўрт томонга югурга бошладим. Эпақалик бир гап эсимга келмас эди. Ниҳоят ақлимни бошимга йигиб, сирримдан воқиф бир ошнамга кенгаш солдим. Ул үзоқ ўйлаб турмай, эртаси кунга томонимдан совчи бўлиб кампирнинг олдига бормоқчи бўлди. Лекин бутун туни билан кўзимга уйқу келмай, тиканга ағнаған каби азобланар эдим ва сустлигим учун ўз-ўзимни сўкар эдим..."

Уста Алим ҳикоясини бу ерга еткузгач, шамънинг сўхтасини миқрозилади ва оғзини пойлаб тургучи Отабекдан "зериқмадингизми?" деб сўраб олиб, давом этди:

— Совчини юбориб тинчий олмадим, ишқа қўлим бор-мас ва бир жойда тўхтаб туролмас, у ердан туриб бу ерга ўлтурап, минг турлиқ хаёл билан довдир сифатига кирган эдим. Юборган кишим тезда қайта бермагач, бир-икки бора Саодатлар эшиги ёнига бориб келдим. Ниҳоят миям шишиб Саодатнинг уйи яқинида бўлған бир ёнгоқнинг соясида ўлтурган эдим, совчим чиқибо қолди-ку: юрагим орқамга тортиб кетди. Ва олдинга тушиб юруй бердим, чунки совчига учрашиб ҳақиқатни онглаш ҳам менга душвор<sup>1</sup> келган эди.

<sup>1</sup> Душвор — қийин, оғир, мушкул.

— Шошма-шошма, ҳо, куяв — деди совчим. Ҳазилманд бўлғани учун ишнинг чаппа кетканига ишонған, унинг бу "куяв" деган сўзини кинояга йўйған эдим, кетабердим. Ул орқамдан тез юриб кетди:

— Қани, тўнни еш! — деди ва тўнимни ўзига торта бошлади.

— Юрагим ёрилишга етди, ҳазиллашма! — дедим.

Ҳақиқатан сўзи чин экан, оғзидан ўпдим. Жиқ тўлған кўз ёшимдан ҳам уялиб турмадим. Совчим йўл бўйлаб кампир билан бўлған ҳикоясини сўзлаб кетди: Саодатка бир йилдан бери ҳар кун деярлик совчилар қатнар, кампир ҳаммасига ҳам боши боғлиқ, деб жавоб бериб келар экан. Шунинг баробарида манинг оғзимни пойлар ёки киши қўйишимни кутар экан. Ниҳоят бир тарафини чин ва бир тарафини сўз олиш муддаоси билан кечаги сўзни менга айткан ва шунга қараб иш қилмоқчи бўлған. Узун сўзни қисқаси кампирнинг жавоби: бир қизим эмас, юз қизим бўлғанда ҳам уста Алимга назир тортдим — бўлибдир.

Теримга сиғмас эдим: икки йиллик юрак дардим ниҳоят ҳозиқини топқан эди. Бир неча кун уялиб кампирнинг олдига бормай юрган эдим, ўғли орқалиқ йўқлатди. Бордим. Лекин боришимдаги сезгуларимни сизга бу тил билан тушинтиrolмайман. Мен борлиқ-йўқлиқ эшикдан кирганимда, Саодат кир ёяр эди. Мени кўргач, қизариниб кетди ва ёйилған кир ортиға яширинар экан, шаҳло кўзларидаги сезилар-сезилмас табассумнинг фарқига бордим.

Кампир билан уялишибина тўй тўғриларини сўзлашдик. Кампир ортиқча такаллуфлар қилишга йўл қўймаса ҳам, аммо ўзим Саодатнинг кўнгли ўксимасин учун тўйни катта қилишга тарафдор эдим. Кампир билан тўй ва нишоқ кунларини муқим қилгач, мен кетишка турдим. Саодат кир ёнида менга бир кўринингдан сўнг, қайтиб кўринмаган эди. А, мен бўлсанм яна уни бир кўрмакчи ва ўзига бир-икки оғиз сўз айтмакчи эдим. Ўчоқбошида қозон ювар экан, тўғри олдига юриб бордим. Ул мени сезмадими ёки сезса ҳам билмаганга солиндими, ҳайтовур орқаси ўгуруғлиқ энгташкан ҳолда ишка машғул эди. Бир ўрим бўлиб тушкан узун қўнгур сочи унинг ҳаракати билан қўлтуғи остида ўйноқлар эди. Анчагина орқасидан томоша қилиб турғач:

— Саодат, — дедим. Қаради. Ўчоқда ёнған олов ис-сигиданми ёки уядиданми унинг юзи қиб-қизил олма эди. Қўлидағи сочиғи билан олдимға яқин келиб тўхтади. —

Эшитдингми, — дедим. Ерга қаради. Уни ортиқча уялтирмас учун эшикка қараб юруй бошладим-да: — Майлим? — деб сүрадим. Жавоб ўрнига:

— Ош емай кетасизми? — деди. Бу унинг иккинчи турлиқ қилиб айтилган "майли" жавоби эди. Бир бугина эмас, қирқ йиллик қадрдан хотин томонидан эрига қилинатурған меҳрибончилиқнинг энг лаззатлиси эди. Чиқар эканман, "Ош емай кетасизми?" сўзининг кайфига тамом маст бўлған эдим".

Уста Алим шу сўнгти сўзларини айтиб битирар экан, Отабекнинг қошлари чимирилиб, гўё ўзининг ҳам шу йўсун хотираларининг абадий қайтиб келмаслик — йўқлиқға чиқғанлигини яна бир карра онглар эди. Уста Алим давом этди:

— Ўн кун орасида ҳозирликни битириб тўй қилдиқ. Ниҳоят Саодат меники бўлиб, саодатлик кунларим бошланди. Саодатка бўлған муҳаббатим бир даражага сизга маълум бўлғанлиқдан у кунлардаги масъудиятимни ҳам шу ўлчавға солиб била оласиз.

Рафиқам Саодат чин саъида<sup>1</sup> эди. Бу йил ўзимга кутмаган даражада бир куч ва истиқомат<sup>2</sup> ортдириб, тўй билан тугалган бойлиғимни қайтарган эдим. Туришка Саодатлар уйи торлиқ қила бошлаганлиқдан шу ҳавлини (Жаннат опа ҳавлисиға ишора қилиб) ҳозирғи қўшнимиздан сотиб олишга муваффақ ҳам бўлдим. Қайнин онам, қайним ва эру хотин шу ҳавлига кўчиб келиб тура бошладиқ. Кундан-кунга Саодатка бўлған муҳаббатим ошқанидек касбим ҳам унумлик бўла бошлаган, уйланишимнинг иккинчи йили ҳалиги қўшнимиздан ўзингиз кўрган боқчани ҳам сотиб олған эдим. Уйланишимнинг учунчи йили Саодат юклик бўлди. Эру хотин биримиз ота ва биримиз она бўлмоғимизни ўйлаб қувонар эдик. Кечалари ётиб уйқумиз келмас эди. Ниҳоят Саодатнинг ой-куни яқинлашди... — Уста Алим узоқ тин олишдан сўнг давом этди: — ...яқинлашди...лекин абадий бахтсизлик кунларим, манҳус<sup>3</sup> соатларим ҳам яқинлашди... — деди ва сўздан тўхтади.

<sup>1</sup> Саъида — баҳтиёр, қутли.

<sup>2</sup> Истиқомат — дадиллик, мустақиллик, барқарорлик.

<sup>3</sup> Манҳус наҳсга қолган, бадбаҳт.

— Давом қилингиз, — деди Отабек, уста Алим бир уфлаб олғач:

— Саодат боладан қийналиб уч кунгача азобланди-да, түртнинчи куни ўлди, — деди.

Отабекнинг кайфи тарқагандек бўлиб, кўзларини зўрайтириб очди ва ўзини ёстиқдан олиб ўлтургач, сўради:

— Ўлди?

Уста Алим кўз ёшисини артиб:

— Ўлди, — деди ва давом этди, — дунёга келиб кўрган бирдан-бир қувончимдан айрилган эдим. Ҳаётнинг ҳамма умримга кифоя қиласларлик мудҳиш зарбасини шодлиқ ичидан қаршилаған эдим. Ойлар бўйинча кўз ёшимни ёғмур каби тўқдим. Чунки менга бундан бошқа бир овинчоқ қолмаган эди. Кўз ёшларимнинг тийилмаганини кўрган қайнин онам Саодатнинг вафотининг иккинчи йили мени зўрлаб уйлантириди. Лекин бу иккинчи хотин менга Саодат бўлолмади. Ҳақиқатан саодатим кўмилган эди. Кейинги йилларда футурдан кета бошлаған қайнин онам қизидан йигирма ой сўнг, ўн бир ёшлиқ ўғлини менга ташлаб дунёдан ўтди. Қайнин онамнинг вафотидан сўнг, бийлик<sup>1</sup> ўз қўлига қолған кейинги хотиним фаҳш<sup>2</sup> суратда рўзгоримни тўзита бошлади. Ўрилиқча ва тўрилиқча қиморбоз акасига инъом қилишга киришди. Кундан-кунга ишим кейин кетиб, ишлаганим рўзгорга учурвоқ ҳам бўлмай бошлади. Ёмон хотиннинг шум қадами билан уйимдан барака кўтарилганлигини ва барча баракаларимни рафиқам Саодат билан бирга кўмилганлигини онглаб, кейинги хотинимни талоқ қилдим. Энди учунчи йилдирки, хотинсиз яшайман ва уйланишини ҳам ўйлаб кўрмайман. Чунки марҳума Саодат билан кечирган кунларимнинг тотли хотиралари менга абадий лаззат бағишилағанларидек, ҳам аччиғ-аччиғ йиглатадирлар. Уйланишимга кенгаш бергучи ўртоқларга: — Мен энди дунёдан ўткан киши, бу кун бўлмаса эртага ёр қабри устида ёнған шамъда ўзини ҳалок қилгучи бир парвона, — дейман.

— Эндики ўйлаганим фақат қайнимни уйлантириш, сўнгра... сўнгра юзни ёруқ қилиб Саодат қучогига кириш...: — деди ва дармонсизланган каби ёстиққа ёнбошла-

<sup>1</sup> Бийлик — ҳукмронлик.

<sup>2</sup> Фаҳш — қабиҳ, хунук, ярамас.

ди. Устанинг бу сўнгти сўзи Отабекни ортиқ асарлантирган, кўз чуқури бир-икки қайта ёш суви билан тўлиб чиқған эди.

Иккиси ҳам узоқ жим қолдилар. Отабек ўз қайғусини бутунлай деярлик унугтиб қўйған, қаршисидағи ерга сингибкина ётқан мужассам ишқдан кўз узолмай бошлади. Устанинг мозийсида эмас, ҳолида улуғ бир маъно кўрар эди. Аммо унинг истиқболида бир бўшлиқдан ўзга ҳеч гап учрата олмаса-да, яна улуғ бир маъно кўргандек бўлар эди. Ўз истиқболини ҳам шу устанини қабилидан кўрмакчи бўлса-да, бунинг учун бир нарса камдек, етишмагандек келар, иккинчи уста Алим бўлиш учун бир "ўлди" сўзини қўшқан билан ҳам уста Алим бўлиш қийинлигини онглай бошлади, чунки Отабек Кумуш томонидан сўқилган ва ташланған эди. Ҳолбуки Саодат сўқмаган ва ташламаган, балки эрининг бир гуноҳи сабабидан ёш умрини хазон қилған ва уста Алим қайнотини отаси томонидан ҳайвонча қувланмаган... ва қайнотини отаси томонидан куяв йўлиға тузоқ қўйилиб, Саодатни чиқарип олиш фикрига тушилмаган, яъни ораға шайтанат ораламаган... Бу сўнгти фикрни ул ўйламаган жойдан илҳом қабилидан тўқиб олған эди, яъни ўзининг Тошканндан уйланишига қутидор томонидан ризолиқ берилишини, ҳатто унинг тўйни ўз қўли билан ўтказиб келишини илгаридан ҳозирланиб келинган тузоқ, деб тушинган эди. Муҳокамаси шу ергача келиб еткач, уста Алим даражасига етиш учун ўзида ҳеч бир муносабат кўрмади... Уста Алим ёзиг берган ўринга кириб ётар экан, ўз-ўзига айтар эди: "Қувланишга, таҳқир этилишша лойиқ қўрилган Отабек уста Алим бўлишга ҳам сазовор эмас!" Ул уйқуга кетар экан, юраги болаларини учуриб кеткан карруқнинг уясидек бўб-бўш эди.

\* \* \*

Отабек эртаги намозга турғанда кўзи Шамшодбекнинг базимидан аzonда қайтиб келиб, донг қотиб ухлаб ётқан Сайфига тушди. Ўн беш ёшлар чамасида бўлған бу йигит ўзининг ўткур ҳусни билан Саодатдан хабар берар эди.

Бир-икки пиёла чой ичкан бўлди-да, уста Алим билан хайллашди.

## 9. УНУТОЛМАСА НИМА ҚИЛСИН?

Бу гал Отабекнинг кутилмаган равишида Марғилондан тез қайтиб келишини Ўзбек ойим ўзининг жуҳуд домладан қилдирған жодусининг ҳинд сиҳрини енгганлиги, деб сўйинган эди. Бироқ Отабекнинг кўписинча меҳмонхонада ётиб қолиши уни бу тўғрида шубҳага тушириб қўйған ва бунда қандай ҳикмат борлигини бевосита билиб олиш учун бирарта ромчи домлаға бориш фикрига тушкан эди. Юсуфбек ҳожининг бўлса бундай майда ишларни текшириб юриш учун фурсати ҳам йўқ, унинг Нормуҳаммад қушбеги ёнидан бўшаған вақти понсад ва бекларницида кенгаш ва зиёфатлар билан тугалар эди. Унинг диққатини жалб эткан нарса бўлса, ул ҳам Отабекнинг тадбирсиз сиёsat ва аҳмоқ бошлиқлар мавзуъидан олиб қиласатурған шикоят ва ҳасратини кейинги кунларда жимжит бўлиб кетканлиги эди. Бу кунларда Отабекка энг яқин турган киши Ҳасанали ота эди. Чунки Отабек бу кейинги кунларини меҳмонхонада ўтказганликдан Ҳасаналига ҳам унинг ёнига киришқа ва бир мунча сўзлашиб ўлтуришқа тўғри кела бошлаған эди. Шунинг учун Отабекнинг қайгулиқ ҳоллари, уйқусиз мутолаъада ўткан тунлари ва умуман ундаги ўзгарышлар бу тўғрида Ҳасаналини ўйлатса-да, сабабини сўрашға ботирлиғи етмас ва сўрашни ҳам фойдасиз деб билар эди. Чунки ул Отабекдаги бу ҳолларнинг сиррини билгандек, муҳаббати орасига чўб бўлиб тушкан кейинги уйланиши аламидан деб қарор қўйған эди.

Отабекнинг орзулиқ келин олдиға кирмаслиги важқидан Ўзбек ойим аччиғланди, ниҳоят аччиғига чидай олмаган бир куни меҳмонхонада Отабек ётар ўринини ёзиб турған чоқда кириб келди ва ёзилған ўринни бузиб йигиб ташлади ва:

— Меҳмонхонада ётабериб нима қиласан, ичкарига кириб ёт! — деб жекирди. Лекин ўғли энди алгариғи Отабек эмас эди, онасининг жекиругиға қулоқ солмади-да, қайтадан ўринни ёзиб бошлади. Ўзбек ойимнинг ғазаби тағин ҳам аланга олди:

— Сўзимни эшитасанми, кар?

Отабек совуққина қилиб жавоб берди:

— Кар эмасман, лекин сизнинг бу таклифингиз олдида ҳам кар, ҳам кўрман. Бу тўғрида сиз энди ортиқча бош оғритманг!

— Инсофсиз, адолатсиз!  
Отабек заҳарханда билан сўради:  
— Мен бошда сизга нима деган эдим?  
— Нима деган эдинг?  
— Келинингиз мендан яхшилиқ кўрмас, демаганми эдим? Сиз билан отам бунга кўнмаганми эдингиз, сиз буни инкор қиласизми?  
— Ота-онамдан ваъда олғанман, деб шундай хотинга жабр қилиб юра берасанми?

— Келинингизга жабрни хоҳламасангиз ва ўзингиз айткан инсофка қайтсангиз энг осон бир йўл бор, — деди ва онасидан маълум "нима?" деб берилатурган саволни кутиб тўхтади. Аммо Ўзбек ойим сўроқ ўрнига лабини тишлаб бошини икки елкасига тебратди. — Сиз сўрашни тиламасангиз-да, мен айттай: келинингизга жабрни хоҳламасангиз мендан талоқ қилдирингиз ва бир бечорага бу йўсун азоб бериб юрмангиз! — деди ва бир оз тўхтаб давом этди. — Сиз билган инсофни мен ҳам биламан. Бир бечорани фақат сизнинг кайфингиз учун азоб эмас, чеккан хўрлигини ўйлаб ҳар куни бир қат этдан тушаман... Агар ўз кайфингиздан кечсангиз яхши билингизким, бир эмас икки жонни азобдан қутқарган бўласиз, онажон! — деди. Ўзбек ойим ўғлининг бунчалик қатъий кетишини кутмаган эди ва бу йўсун қаттиғ муомалани-да Отабекдан биринчи мартаба кўрап эди. Сўз қайтаришга ўрин тополмадими ва ё жанжалнинг улгайишидан қўрқдими, ҳайтовур узоққина истеҳзоланиб қараб турғач, "эсингни ебсан, болам" дедида, меҳмонхонадан чиқди.

Отабек ёлғиз меҳмонхонада ётиб кун кечириш билангина қолмади. Кечалари алла қаёқларга кетиб, йўқолатурған одатлар ҳам чиқарди ва бир-икки қайта ортиқча маст бўлған ҳолда қайтиб, Ҳасаналини тамом ҳайратда қолдирди. Ул Отабекка насиҳат қилишни ҳам билмас ва бу сирни биравга айтиш учун ҳам ҳайрон эди.

Бир кун кечаси ул янги одати бўйича алла қаёққа кеткан эди. Ҳасаналининг кўнгли бу кун ҳам бир ишка гувоҳлик бергандек бўлиб, ичкарида ёткуси келмади, ўринни меҳмонхонага ёзиб, дарбозани занжирлаб келди. Агар бу кун ҳам ул ўша ҳолда қайтса, бир нарса демакчи, яъни қўлидан келган насиҳатни қилмоқчи эди. Ухламай кутиб ўлтурди. Аммо ул тунги соат ўн бир бўлса ҳам келмас, ўн иккода ҳам дараксиз эди. Ниҳоят кута-кута уйқуси танг қилғач, ўрнига чўзилиб кипрагини кипрагига

улаб ётди ва ухлаб кетканини ўзи ҳам сезмай қолди. Орадан номаълум бир муддат ўтиб дарбозанинг сўнақайсиз тақиллашидан чўчиб уйгонди ва йўлакка югурди. Қоронгуда занжирни тимискилар экан, "ким?" деб сўради ва жавобига "м-м-м-ман" деган сархуш товушни эшилди. Бу товуш унинг юрагини уюшдириб юборған ва "бу кун ҳам шунақа" деган сўзни кўнглидан ўтқузган эди. Занжирни тушириб, дарбозанинг бир табақасини очиши ҳамоно шу табақага суюлиб турган Отабек Ҳасаналининг оёғи остига йиқилиб тушди. Ҳасанали бу кунги кайфнинг ўтча кетканлигини пайқаган, йўлакни тутиб кеткан ичкулик исидан ўқчиёзған эди. Отабекни суюб меҳмонхонага келтурар экан, икки кўзи ичкари ҳавлининг эшигига, чунки Юсуфбек ҳожининг тунлари ташқариға чиқатурған одатининг шу вақтга тўғри келиб қолишидан юраги такапука эди. Отабекни ешинтирас экан, ризосиз бир оҳангда деди:

— Ўғлим, сизга шу шайтони ишнинг нима зарурати бор.

Отабек маастларча кулди:

— М-м-менга зарурати бўлмаса к-кимга бор??

— Нима бўлғанда ҳам мен бу ишингиздан рози эмасман, — деди Ҳасанали ва қандай жавоб эшитишини кутиб турди. — Отабек ўрнига ётиб олғач, кучлик қилиб бир уфдаб олди. Ҳасанали ундан жавоб кутар экан, бир оздан сўнг жавоб ўрнига хуррак товшини эшилди... Отабекнинг кутилмаганда бу янглиғ ярамас кўчаларга кириб кетишига ҳеч бир турлиқ маъно бералмай боши қотса ҳам, аммо унинг кўз ўнгидан игнага зўрлаб тақилған ип нарига кетмас эди. Ундан сўнг, икки ойлардан бери Марғилонни тилга олмаслиқ-да уни бир оз шубҳага тушириб, "орала-ридан бирав совуқчилик ўтдими экан" деб ҳам кўнглидан кечирди. Отабек билан бирга чой ичиш мақсадида эрталаб Ойбодоқнинг дамлаган чойига бормай, Отабекнинг уйгонишини кутиб юрди. Отабек тушка яқин уйғонгач, Ҳасанали чой ҳозирлади. Дастурхон ёзиб ўзини кутиб ўлтурған Ҳасанали ёнига қисиниб-қимтиниб Отабек келди. Тундаги ҳоли эсига тушиб бўлса керак бошини ердан кўтариб Ҳасаналига қарамас ва бир оғиз бўлсин сўз айтмас эди. Отабекнинг бу ҳоли Ҳасаналининг ничка юрагига қаттиғ таъсир эткан ва ўллаб қўйған насиҳатларни унуби, бекзодани бу оғир ҳолдан қутқазиш фикригагина тушкан эди.

— Ёшлик — бебошлиқ, деган экан машойихлар, — деб кулиб қўйди Ҳасанали ва, — уй ичидан битта-яримтаси сезиб қолмагай деб жуда хавотирда бўлдим... Ҳайтовур ҳеч ким пайқамапти, — деди. Отабек ташаккур эткансумон Ҳасаналига кулиб қаради ва ўзининг бу кетишидан ризосизлик билдирган каби энтикиб тин олди. Ҳасанали сўзни уринтириб Отабекни ўз ҳолига қўймас эди. Унар-унмасдан баҳс қилиб, ниҳоят бу унар-унмаснинг охирига шу савонни ҳам улаб юборди:

— Бу гал Марғилонга кечикдингизми?

Биз юқорида ҳам тутибо ўткан эдикким, Отабек на Юсуфбек ҳожига, на Ўзбек ойимга ва на Ҳасаналига Марғилондан тез қайтиб келиш сабабини айтмаган, Марғилон билан узил-кесил алоқаси узилганлигини чурқ этиб сўзламаган, сўралмаган сўзга жавоб берилмас қабилицандан жимжит аламини ичкулукдан олибгина юрган эди. Икки ойдан бери биринчи мартаба Марғилон тўғрисидан сўралған савол ҳам фақат шу Ҳасаналининг кейинги сўзи бўлиб, сирни очиш ўнқови-да келгандек эди. Лекин жавоб тамом ҳақиқатка мугойир<sup>1</sup> ва кишини ҳайратка соларлиқ бўлди:

— Бу кун жўнамоқчи бўлиб турибман, — деди.

Ҳасаналининг шубҳаси бўшка чиқди. Чойдан сўнг ул ўзининг сўзини амалда кўрсатиб, отасидан ҳам рухсат олиб қўйди ва пешиндан кейин йўлга чиқиш учун ҳозирлик ҳам кўра бошлади. Унинг сиррини билгучи ва "энди Марғилонда нима қиласан?" деб сўрагучи бўлмаганидек, ул бу сўроқни ўз-ўзига ҳам бериб қарамаган эди. Гўё бурунгидек Марғилон йўлиға ошиқиб ҳозирланар эди...

\* \* \*

Йигирма кун ўтар-ўтмас Марғилондан қайтиб келди. Бу борищдан бирар иш чиқара олдими-йўқми, бу тўғрини биз келаси фаслларнинг биридан ўрганармиз.

Келиб Тошканда бир ҳафта чамаси турди, сўнгра ёнига Ҳасаналини олиб Оқмасжид<sup>2</sup> шаҳрига жўнади. Ул

<sup>1</sup> Мугойир — қарама-қарши.

<sup>2</sup> Оқмасжид — Қизил Үрда.

икки йилдан бери тұхтаб қолған савдогарчылық ишини қайтадан бошламоқчи эди...

## 10. БИЗДА КИМ КҮБ ЙИГЛАЙДИР?

Файри машруу<sup>1</sup> талоқ хати текканига олти ойларча фурсат ўтиб кеткан эди. Кумушнинг гўзаллик таърифини гойибона эшишиб, оғзининг суви келгучи хотинлиқ ва хотинсиз орзумандлар "ётиб қолғунча, отиб қол!" сўзига амал қилиб, қутидорниги совчиларини турна қатор юбора бошлиған эдилар.

Албатта бунда шубҳа йўқдирким, Кумушнинг эрдан чиқған хабарини Кумушнинг ўзидан ҳам илгари тушинган ва Отабекдан ҳам илгари сезган Ҳомиднинг совчиси бошқа совчиларнинг муқаддимаси, ёз бошида келатурган қалдирғочларнинг йўлбошчиси эди. Ҳомиднинг совчиси бир марта ба келиш билангина қаноатланмади, уч-тўрт қайталақ келиб қутидорга Ҳомиднинг куяв ўғул бўлиш ниятида эканлигини арзу-ниёз қила бошлиди. Натижада Ҳомидбойнинг совчисига берилган жавоб шу бўлди: "Биз Ҳомидбойни ўзимизга куяв ўғул қилишдан ҳеч бир монеълик кўрмаймиз. Аммо қизимиз мундан сўнг эр қилмасга қаттиғ исрор<sup>2</sup> этадир. Шунга кўра Ҳомидбой бизни кечирсин". Бошқа совчиларга ҳам жавоб шу эди. Қутидор билан Офтоб ойимнинг бу жавоблари ўзларича эмас, балки Кумушнинг кўнглига қараб берилар эди.

Бироқ Кумушнинг: "Мен энди эр қилиб бўлдим, мундан сўнг эрга эҳтиёжим ийӯқ" деган қатый жавобига улар узоқ қулоқ солиб туролмадилар, чунки унинг бу исрорини "чидамаснинг сўзи" деб онглар ва тузукрак жойи чиқғанда, эрга беришка ҳам ҳисоблари ийӯқ эмас эди. Шунга кўра, келған совчиларнинг ўзларига ёқмаганига гуноҳнинг барини Кумушнинг бўйнига ағдариб жавоб берар, аммо иккинчи ёқдан тузукрак жойини кўзлар эдилар.

Кутимаган ерда шаҳарнинг энг олдинги аъён ва сарватдорларидан<sup>3</sup> бўлған Салим шарбатдор деганинг Ко-милбек исмлик ўғлидан совчилар келиб қолди.

<sup>1</sup> *Файри машруу* — шаръиятга зид.

<sup>2</sup> *Исрор* — қаттиқ киришиш; аҳд қилиш.

<sup>3</sup> *Сарватдор* — бадавлат, давлатманд.

Ота-онанинг кутканлари шундай тегу тахтлик куяв бўлгани учун биринчи мартаба совчиларни яхши сўзлар ва қуюқ-суюқ ошлар билан жўнатиб, иккинчи келишка ўйлашиб жавоб бературган бўлдилар. Эру хотин узоқ ўйлашиб турмай (чунки ўйлашатурган жой эмас эди) совчининг иккинчи келишида жавоб беришка қарор қўйдилар. Кумушнинг қарши тушмаги тўғрисида, албатта, уларнинг шубҳалари йўқ эди. Шунинг билан бирга ота-онанинг сўзини ерда қолдиради, деб ҳам ўйламас эдилар.

\* \* \*

Куз кунларининг оёғи ва қиши кунларининг боши эди. Дарактлардаги сариқ барглар тўқилиб тугалган, ер юзи ўзининг қиши кариб кийимини кийган эди. Тўрт томоннинг ўралғанлиги соясида япроқларини тўқилишдан сақлаб қолган бу гилос ёғочлари ҳам бу кун тунги қора совуққа чидалмай, слнинг озғина ҳаракати билан-да баргларини ширт-ширт узиб ташламоқда эдилар. Ҳаво очик бўлиб, қуёш тузуккина кўтарилиган, аммо унинг ҳам бу кун унча таъсири йўқ, бу кунҳи қора совуқ қуёш кучинида кессан эди.

Ўрта эшикдан Кумушбиби кўринди. Бурунги тўлалиги кетиб озгинланған ва лекин бу озгинлик унинг ҳуснига камчилик бермай, билъакс юқорилатқанлар. Камон қошлиари ортиқ мавж уриб ўзини кўрсаткан, бир оз бота тушкан шаҳло кўзлар тағин ҳам тим қоралиқ, тағин ҳам нурлилик касб эткан эдилар. Бу кунги совуққа қарши кийиб олған совсар пўстинининг ёқалиги кишининг ҳасадини ортдириб, нафис бағбақаларни ўпиб ётар эдилар. Бироқ унда бир камчилик бордек кўриниар эди: шаҳло кўзлар бурунгидек ўйнаб турмас ва сўнг чекдаги бир оғирлиқ билан ҳаракатланар эди. Бир томондан қарағандан бу оғирлиқ-да унга бир олийлиқ, улуғворлиқ багишландек. Келиб айвон муйишига ўлтурди-да, кўзларини оғирғина ҳаракатландириб кетма-кет чип-чип этиб тўқилмақда бўлған хазонларга қаради ва ҳар бир япроқни юқоридан кузатиб ерга қўя борди. Ул ерга тушкан ҳар бир япроқда ўзининг таржумай ҳолини ўқур, ўзини-да мавқиъидан айрилиб, ҳечка чиқиб турған шу хазонлардан айира билмас эди. Айира билмади-да, латиф кўкрагини тўрт энлик кўтариб тин олди ва кўзлари жиқ ёшға тўлди.

Енг ичидан бир-бирисига ўтқузилған икки қўлини баробар кўтариб кўз ёшини артар экан, ичкари ҳавлидан Офтоб ойим чиқиб келар эди. Ул ер остидан қизига кўз қирини ташлаб меҳмонхона эшигини очишга тутинди. Офтоб ойимнинг орқасидан Ойшабиби ҳам кўринди, келиб Кумуш ёнида тўхтаб сўради:

— Нима қилиб ташқарида ўлтурибсан?

— Ўзим, — деди Кумуш қошларини чимириб, четка юзини ўғирди.

— Меҳмонхонага кирсанг сан билан икки оғиз маслаҳатимиз бор эди.

— Нима маслаҳатингиз бор?

— Олдин кир, болам, — деди кампир ва Кумушнинг елкасига қоқиб турғизди. Улар ичкаридаги совчи хотинларни ёлғиз қолдириб, Кумушнинг сўзини олиш учун ташқарига чиқган эдилар. Аммо Кумуш бўлса совчиларнинг олдидан ризосизлигини онглатқандек бир намойиш билан кеткан эди. Ул меҳмонхонаға киргандан сўнг ҳам терсайиб тоқчалардан недир ахтарғандек юрина бошлади.

— Тоқчада сан қидирған нарса йўқ, келиб ёнимизга ўлтур, — деди Офтоб ойим.

— Ўлтурганимдан сизга бир пуллик фойда йўқ, совчинизга ўзингиз билган жавобни бераверинг!

Ойшабиби қизига маънолик қилиб бир қараб олди: — Болам, акир икки оғиз гап эшиит-чи олдин! — деди.

Кумуш ўлтура бермагач, Офтоб ойим қизиши.

— Қизим, санинг бу қаршилигингдан муддаонг нима?!

— Сиз билан отамга муддаомни неча қайталаб айтдимку: мундан сўнг бу ишни хоҳламайман.

— Дунёдан тоқ ўтасанми?

— Тоқ ўтаманми, йўқми, буни тангри биладир.

— Ман санинг ҳали ҳам ўша уятсиз эрингдан кўнгил узолмаганингни биламан. Санинг бу хомтамаълигинг кони болалигингдир. Сан яхши билки, мундан сўнг отанг ул уятсизга ўз уйидан жой бермаганидек, уятсизнинг ўзи ҳам узил-кесил сани ташлағандир. Агар сўзимга ишонмасанг мана буни ўқуб қара, — деди-да, Кумушга бир қогоз узатди ва давом этди. — Биз буни сан унга хат ёзғанингдан сўнг жавоб ўрнида олган эдик. Бироқ ўша вақтда бу уятсизнинг биринчи талоқ хатиси ҳам санга етиб ортқанлиқдан буни сини сандан яширган эдик. Ҳамон-да санинг умидинг кесил-

магани учун бу хатни ҳам күрсатмакчи бўлдим! — деди.  
Кумуш қоғозни онасидан олди:

"*Матлуқам*<sup>1</sup> Кумушбига Маним биринчи хатим билан сизнинг менга қилатурған эркаликларингизга бир чек қўйилған каби эди. Лекин бунга тушинмабсизми ва ё тушинишга тиламабсизми, ҳайтовор яна ҳам эски эркаликларингизни тарқ этмабсиз. Хатингизни ўқур ва ўзимни кулгидан тўхтата олмас эдим. Орзуға айб ўйқ, дейдирлар. Чекдан ошиб қилған ҳужумларингиз эски қадрдонлиғингиз отига кечириладир. Эндиликда сизга мендек вафосиз ва ҳийлагар бўлмаган янги эр топилғай эди, деб адди Отабек Юсуфбек ҳожи ўғли, 26 жавзо, 1265 йил, Тошканд".

Мактуб унинг юрак жароҳатини қайтадан тирнаб ташлаған эди. Кўз ёшини дув-дув тўкиб, хатни ўз таҳифа солди ва ўзидан жавоб кутиб турған ачаси билан онасиға деди:

— Мен бу уятысиз йиртқич билан ярашмоқ учун умид тутмайман, шунинг билан бирга эр ҳам қилмайман!

— Нега? — деб сўради онаси.

— Негами? — деди Кумуш ва йиғлаган кўйи жавоб бериб бошлади. — Негаки мен ўзимнинг суйган ва муҳаббат қўйған эримдан бунча уятысизлик, бу яиглиғ вафосизлиқ кўрдим. Энди эр деган шу бўлдими? Мундан кўра дунёдан тоқ ўткан яхшироқ, ёлғиз юрган тинчроқдир. Шунинг учун қизингизга эр отидан сўзламанг-да, яфроқ каби титратурған юрагига даҳшат ҳам солманг!

Бу сўздан сўнг Офтоб ойимнинг оналиқ кўнгли эриб кеткан, ичкарида жавоб кутиб ўлтургучи совчиларга қандай баҳона топиб киришни-да ўйлаб ўлтурмаған эди:

— Йиғлама, — деди. Кумушни меҳмонхонада қолдириб онаси билан чиқди.

\* \* \*

Салим шарбатдорники қутидорға ниҳоятда маъқул тушиб қолған эди. Шунинг учун хотини ва қизидан сўраб ўлтурмай бир кун дўконидан эркак совчилар билан битишиб ҳам келди ва хотинига "мен бу кун фотиҳа қилиб келдим, нима бўлғанда ҳам энди қизингни кўндирамасанг бўлмайдир", деди. Аммо Офтоб ойимнинг — эр отини

<sup>1</sup> *Матлуқа* — талоқ қилинган.

эшитканда титрай бошлайтурған қизи билан учрашмоққа асло тоқати йүқ, эрининг бу сўзини эшитканда тамом ўзини йўқотқан эди. Ул қизини кўндириш учун қутидорга ваъда берганда ўз ҳолини икки ёқдан ўқтанилған ханжар орасида қолгучига ўхшатар, қайси томонга қимирласа ҳам муҳлик<sup>1</sup> яра олишини аниқ билар эди. Шу кундан сўнг бечора онанинг оғир кунлари бошланди. Эрига берган ваъдасини асло бажара билмас, бул ҳақда қизига оғиз очиб сўзлай олмас эди. Ҳар кун бозордан қайтиб келиб биринчи сўзи "кўндиридингми?" бўлиб қолған эридан туни билан койиш эшитар ва кундузлари Кумушка оғиз очишига юраксина олмай азобланар эди.

Бир неча кундан сўнг қутидор ҳам энди ўз хатосини онглаған, чунки ҳар кун деярлик Салим шарбатдорникидан келиб тўй кунини сўрағучи кишига турлик-турлик баҳоналар айта бериб зериккан ва уятидан дўконга тушишни-да тарқ қилиш фикрига келаёзған эди. Бир кун дўкондан ниҳоятда аччигланиб қайтди ва Офтоб ойимни умрида эшитмаган сўкишлар билан сўқди: "Қизингни деб шаҳарда бош кўтариб юролмайтурған бўлдим. Кўндиранг кўндири, бўлмаса мендан умидингни уз, мен энди санларнинг дастингдан шаҳардан қочиб кетмасам бўлмайдирған даражага етдим!" деди. Эртаси кун бечора она қизига машъум мавзуудан сўз очишига мажбур бўлди. Қизининг ёнига ўлтуриб сўзлаш ўрнига юм-юм йиғлаб бошлади. Кумуш эса онасини бу ҳолға солған сирдан воқиф, шунинг учун йиги сабабини сўраб ўлтурмай, ул ҳам кўз ёшиси билан юзини ювмакка тутинди. Она-бала узоқ йиғлашдилар, кўз ёшлари биткунча бўзлашдилар.

— Бу кунлардан кўра дунёға келмаган бўлсам эди. Бу тириклигимдан кўра ўлиб кеткан бўлсам эди! — деди охирда Офтоб ойим.

— Янглиш сўзлайсиз, онажон! — деди Кумуш ва: — Сиз дунёда туришка лойик эдингиз, лекин сизнинг дунёдан тўйишингизга ва қон-қон йиғлашингизга сабабчи мен бўлдим. Мен сиёҳ бахт дунёға келмаган бўлсам эди сизга мунчалик кулфатлар, мунчалик андуҳлар ҳам йўқ эди. Шунинг учун сиз тангридан сўрангким, тезроқ мен машъ-

<sup>1</sup> Муҳлик — ҳалок қилувчи.

умани маҳв<sup>1</sup> этиб, сизга уч-түрт кун тинчлик берсин, онажон! Сизни бу ҳолда күришка ва ўз тилагим йўлида сизни қурбон этишкага ортиқ тоқатим битди. Ташландиқ бу қизингиз, қўлма-қўл юргучи бу ўйинчиқ қизингиз киму, сиздек бир меҳрибон онани қон йиглатиш ким? Йигламангиз, она. Сизнинг тўкиб келган кўз ёшларингизнинг бир томчисига ҳам бу ташландиқ қизингиз арзимас, сиз отамга манинг ризолигимни ташвишланмай билдираверингиз. Ул ҳам кишилар олдида бу баҳтсиз қизининг таънасига қолмасин. Сиз маним юзимга эзилиб қарамангиз, ўйламай-нетмай ризолигимни билдираверингиз! — деди ва юзига тўзгиб тушкан сочини тўғрилаб олғач, давом этди. — Агар сиз менга ортиқ ачинсангиз ризолигимнинг бир шарти қилиб тўйни келаси кузга бўлишини айтиб ўтингиз, агарда отам баҳтсиз қизининг бу тилагини қабул этса-этсун бўлмаса маним бу тилагим ҳам сизнинг бир томчи кўз ёшингизга арзимас онажон, сизнинг шодлигингиз йўлида ҳар бир оғирлиқларга бу баҳти қаро қизингиз розидир, онажон!

Офтоб ойим Кумушнинг бу сўзларига тўзиб туролмай, қизини бағриға босиб қучоқлади, она-бала тагии шиддатлик равишда кўз ёшига кўмилдилар...

\* \* \*

Офтоб ойимнинг қатъий исрорига биноан қутидор ҳам қизининг шартини қабул эткан. Қудалар ҳам келаси кузгача кутишка рози бўлған эдилар. Демак келаси кузга қутидор Салим шарбатдор каби бир кишига қудалашиб олганидек, Кумушбиби ҳам Отабек ўрнига Комилбекни алмашдирап эди.

## 11. НАВО КУЙИ

Халқимиз таъбирича, бу замонлар "мусулмонобод" бўлса-да, бироқ бу тантаналик таъбирни бузиб қўятурған ишлар ҳам йўқ эмас эди. Хон мусулмон, бек мусулмон, халқ мусулмон, бўнинг устига юриш-туриш ҳам мусулмонча, ҳукмлар ҳам шариъатча эди. Ўғирлиқ қилған учун

<sup>1</sup> Maҳv — йўқ қилмоқ.

қўл кесиладир ва ё дорга осиладир. Зони билан зониялар<sup>1</sup> ҳам пештоқдан ташланадирлар, ичкулик ичкан учун қирқ дарра уриладир. Раис афанди мулозимларига дарра кўтартириб, намозсизларни текширадир, фарзи айн билмаганларни урдирадир эди. Иш шунчалик нозик бўлатуриб ҳам ўғрилар ўз тирикликлари орқасидан қолмайдирлар. Эш ака билан Тош аканинг уйлари орқасидан тешилиб моллари ўғирлана берадир, пештоқдан қопқа бўғилиб ташланмоқ учун фоҳишалар ҳам етишиб турадирлар. Бутун умрида пешонаси сажда кўрмаганлар ҳам кўб, аммо фарзи айннинг бош томонидан тўрт-беш жумлани ҳар ким қийналмасдан сайрий олар эди. Кўб кишиларнинг уйларидаги мусаллас билан бўзалар хумлаб қайнаб ётса, иккинчи томонда расмий суратда ичкулик сотиш билан тириклик қилгучилар ҳам йўқ эмас эдилар. Тошканднинг Чуқур қишлоқ деган ерида қозоқлар томонидан очилған ва ҳамиша рустамнамо<sup>2</sup> кишилар билан айқириб ётқан бўзахоналар ҳам йўқ эмас эди.<sup>3</sup>

Беш ойлаб Оқ масжид сафарида юриб кеткач, Отабек тўғри шу Чуқур қишлоқ бўзахоналаридан бирига келиб тушкандек бўлди. Уни кундуз кунлари бўзахонада учратиб бўлмаса-да, аммо бўзахонага келмаган кечаси Жуда оз эди. Бўзагар Отабекнинг ким боласи эканлигини яхши билгани учун ҳамма ишни унинг тилагига қараб қилас, ул келди дегунча одий бўзахўрлар ёнига ўтқузмай ўзиннинг маҳсус ҳужрасига олиб кирад, бошқаларга берилатурган лойқа бўзадан бермай, бўзанинг гули билан меҳмон қилас эди.

Ҳозир ҳам ул шу бўзахонада эди. Энди учунчи кўвачани тугатиб, тўртинчини чақирган эди. Бўзагар кирди:

— Бўза берайми, бес? — деб сўради.

— Беринг, — деди ва: — Машшогингизни ҳам киргизинг!

Вақт ярим кечадан ҳам оғқан, кундуз кунидан бери ичишиб чарчаған хўрандалар бақиришиб-чақиришиб тарқалишқан эдилар. Бўзахона тинчиган эди. Қўлма-қўл юриб чарчаған машшоқ ҳам бўшаб, Отабекдан катта-катта

<sup>1</sup> Зони, зония — бузук ёр ва хотин.

<sup>2</sup> Рустамнамо — доно, ақдлик, давлатманд, забардаст.

<sup>3</sup> Бу бўзахоналар Маллахоннинг 1273-нчи йил Тошканд ҳокимлиги вақтида барҳам берилди (муал.).

эҳсонлар кўргани учун, вақтнинг кечлигига ҳам эътибор қилмай кирган эди. Машшоқ Отабекнинг сархуш қўлидан бир писёла бўзани ичкач, дуторини чертиб сўради:

— Қандай куйни чалай, бек ака?

Отабек сархуш товуш билан жиддийгина қилиб жавоб берди:

— Билсангиз, ҳайдалиш куйини чалингиз, ажралиш куйини чалингиз!

Машшоқ ажабсинган эди:

— Дунёда бундай куйлар борлигини умримда биринчи мартаға эшиштаман, бек ака!

— Дунёда бундай куй йўқ деб ўйлайсизми, сиз эшиштмаган бўлсангиз манинг эшиштканим бор... Билмасангиз, билган куйингизни чалингиз!

Машшоқ дуторини созлар экан, яна сўради:

— Бу куйлар янги чиқғанми?

— Янги чиқған.

— Қаерда эшиштингиз?

Отабекнинг кайфи тарқағандек бўлиб, машшоққа қаради:

— Бу куйларни Фарғонанинг Марғилонида эшиштдим... — деди.

Дуторни созлаш учун реза куйлардангина олиб турған машшоқ, Отабек кутмаган жойда "Наво"дан бошлаб юборган эди. Куйнинг бошланиши биланоқ унинг вужуди зирр этиб кеткандек бўлиб кейинги пиёласини бўшатди ва ихтиёrsиз равишда дуторнинг мунглик товшига берилди. Дутор товши қандайдир ўзининг бир ҳасратини сўзлағандек, ҳикоя қилғандек бўлиб эшишилар эди. Йўқ, бу ҳасратни ул ўз тилидан сўзламас эди — Отабек тилидан сўзлар эди... Отабекнинг кўз ўнгидан ўткан кунлари бирма-бир ўтнб бошладилар-да, ниҳоят "анув" хотиралари, "анув" ҳангомалари ҳам кўриниш бериб ўтдилар... Йўқ, ўтмадилар... унинг кўз ўнгига келиб тўхтадилар-да, шу кўйи турабердилар... Дутор бу кўринишни унинг кўз ўнгига келтириб тўхтатқач, бу фожиъага ўзи ҳам чида буролмагандек йиглий бошлади... Дутор қуруққина йигламас эди, балки бутун коинотни зирр этдириб ва хаста юракларни дирр силкитиб йиглар эди... Отабек ортиқ чида буролмади-да, рўймоли билан кўзини яшириб йигламоққа киришди... Ул кўз ёшларини тўхтатмоқчи бўлар эди. Бироқ ҳозирги ихтиёр ўзида эмас эди — ҳамма ихтиёр дуторнинг ҳазин "Наво"сида, тоқатсиз йигисида

эди... Дуторнинг нозик торларидан, тилсимлик юраклари-дан чиқған "Наво" куйи ўз ноласига тушингучи Отабекдек йигитларга жуда муҳтож эди. Ўз дардига тушинган бу йигитка борған сайин дардини очиб сўзлар, йиғлаб ва инграб сўзлар эди... Эшиткучи эса дунёсини унутиб йиғлар, кучини йиғиштириб йиғлар ва ҳасрату аламини кўз ёшиси билан тўкиб йиғлар эди...

Ниҳоят "Наво" куйи унинг бутун танидаги сувларини кўзи орқалиқ тўқдирди-да, фалакнинг тескари қаракатидан шикоят этиб қўйди ва дунёда ёлғиз ҳасраткина бўлмаганлигини билдиргандек ўзининг "савт" куйини ер юзига шодлиқ ва сўюнч ёғдириб арз эта бошлади. "Наво"нинг сиҳирлик "савт"и Отабекнинг кўз ёшларини қуритди-да, бир енгиллик бағишилди. "Наво" билан ювилиб кеткан унинг умид гулзорида янги чечаклар униб чиқди...

\* \* \*

Бу ўлтуришдан сўнг ул бир ойлаб бўзахонаға келмай кетди. Марғилондан қайтиб келгач, яна эски одатида давом эта бошлади...

\* \* \*

Отабекнинг ўша воқиъадан сўнгти Марғилон қатнашлари фақат натижасиз қуруққина бир қатнаш эди. Бу қатнашнинг ҳар бирисида уста Алимникига тушар, аммо ҳануз ундан ўзининг сиррини яшириб, Андижондан қайтиб келишини ва ё боришини, ва йўл устидан кўриб кетиш учун кирганини айтиб уста Алимни миннатдор қилас эди. Ул Марғилонда кўб тўхтамас, бир кун, узоққа тортилса икки-уч кун туриб қайтар, баъзи вақтларда йўл устидан "Хўжа Маъз" мозорини ҳам тунаб кетар эди. Унинг ўн кунлаб йўл машаққатини ўз устига олиб, Марғилонда қилатурған иши шу машаққатлар эвазига арзуғулиқ эдими, йўқми, ўқуғучи буни қуйидан онглар:

Марғилондан натижасиз, тамоман бўшка қайтиб Тошканд келгач, Кумушни унукандек бўлиб уч-тўрт кун у-бу билан овиниб юрар, сўнгра ҳафта, ўн кундан сўнг яна Марғилон тўғрисида ўйлаб бошлар, ўйлаб ўйининг тегига ета олмағач, ўзини қаёққа уришини билмай қолар, шундан сўнг ҳамма аламини Чуқур қишлоққа ҳавола қилиб, ўн-ўн беш кун босим ичканидан сўнг ичкулукдан ҳам

лаззатланмай қолар ва шунинг ёнида унинг кўнгли бир нарсанинг бўйини олғандек сезинар, гўё Марғилон борса бир гап бўлатургандек, бормай қолса кейинчаликда ўзи ўқинатургандек... Шундан сўнг тўсатдан Марғилон йўлиға тушибо қолар, йўлда борар экан, ўзини тўрт кўз билан кутиб турғандек сезилган Марғилонга ҳар нимадир бир соат илгарироқ етиш учун ошиқар эди. Лекин... лекин Марғилон дарбозасидан кириши ила унинг ҳоли ўзгариб бошлар, юраги қинидан чиқар даражада ўйнамоққа олур, айниқса пойафзал растасига яқинлашгач, унинг бу изтироби шиддатланур, пойафзал растасининг яқини билан бунчалик ўзгаришда қолған Отабек растанинг ўзида қандай ҳолға тушмоғини тасаввурдан ожиз келур ва раста кўринди дегунча отининг бошини чапка буриб юборар ва орқасидан кимнингдир "...борингиз, эшигим ёнида тўхтамангиз... уятсиз!" товши эшитилгандек бўлар эди... Уз-ўзига "ҳақиқатан мен уятсиз" деб қўяр ва шунинг ила ҳамма кутилган-кузатилган гаплар, беш кунлик йўл ма-шаққатлари ҳавога кетар, ҳатто хаёлда эмас ҳақиқатда ўйлаб қўйған қайнотини хотинини шариъатка чақириш фикри ҳам унутилар ва йўқолур, "ҳийлагарнинг юзини қозихонада кўрайми, ўзи ҳам қурсин, юзи ҳам!" дер эди-да, отини тўғри уста Алимнига қараб солар эди.

Отабек уста Алимни жуда юқори даражага қўйғанидек, унинг мажлиси билан ҳам анча енгиллашар, ўн йиллардан бери уста Алим юрагида сақланған ва қабрга ҳам бирга кетиши кутилган ишқ тарихини қайта-қайта эшилкуси келаберар, уста Алим ҳам ўзининг ўлган Саодати тўғрисидағи ипидан-игнасигача бўлған хотираларини такрор-такрор ҳикоя қилиб, ҳикояси охирида: "Пешонамга сифмади-да, ўлди" деб қўяр, бу сўз Отабекнинг ҳам юрагига совуқ сув сепкан таъсирини бериб, ул ҳам кўнглидан: "Маним ҳам пешонамга сифмади-да, тириклайн ўлди" деган сўзни ўтқузар эди. Шу ҳолда икки-уч кун уста Алимникида турғач, энг сўнгти мартаба Марғилон билан хайрлашкан каби шаҳарнинг ҳар бир нарласига алвидоъ назари билан боқар ва боши оғқан томонга кеткандек Марғилоннинг ўнгтай келган дарбозасига қараб йўл олур эди. Қўйонда бир-икки кун, Кировчида уч-тўрт кун, Қурара, Телов ва шунингдек қишлоқларда ҳам бир неча кунлаб қўна-қўна ниҳоят Тошкандга келиб стар яна... яна...

Отабекнинг Марғилонга бориб келиши шу йўсунда эди. Унинг сирри ўзидан бошқа ҳеч кимга маълум бўлма-

ғанлиқдан, орада унинг ҳолига кулгучи ва ундан ҳисоб олғучи бирав ҳам йўқ, фақат ул ҳамма ҳисобни ўз юрагидан олиб, ўз юрагига берар эди. Шу йўсун оромсизлик ва бе-саранжомлик ичida унинг ой-кунлари ўтиб турар эди.

## 12. ЖОНСЎЗ БИР ХАБАР ВА ҚЎРҚУНЧ БИР КЕЧ

Агар олған ҳисобимиз тўғри чиқса, бу гал унинг Марғилонга қуруқ қатнаб юришининг еттинчи қайтаси эди. 1267-нчи йилнинг кузи — бу воқиъага ўн саккиз, ўн тўққуз ойлар ўтиб кеткан эди.

Эрталабки чойдан сўнг уста Алим ўзининг қайниси билан ошхонаси ёнига янгигина қурган тўқув дўконлари ёнида ипакка оҳор бериш ила овора эди. Аммо ул бўлса, дўконхонанинг устунига суялган кўйи қандайдир бир ўй билан машгулдек кўриниар, устанинг Тошканд тўғриларида берган саволларига "шундоқ, ҳа, йўқ, албатта" каби қисқа жавоблар билан қарши турар эди. Ул шу кўйи ярим соатлар чамаси сўёзсизлик сўнгтида сўёзсизгина кўча эшик томонга чиқиб кета бошлади, уста Алим кўзини ишидан узиб сўради:

— Йўл бўлсин, Шокирбек?

Отабек йўлак ёнидан жавоб берди:

— Шаҳарни бир айланиб келмакчиман.

— Жуда яхши, — деди уста ва, — аммо пешиндан кечка қолманг, мен ошни дамлаб сизни кутиб ўлтураман, тузикими?

— Тузик, — деди Отабек ва йўлакдан ўтиб эшик олдига — кўчага чиқди. Чиқиши билан нариги эшикдан Со-диқ ҳам кўриниб қолди-да, Отабек билан тўқнаш келди. Содиқ илтифотсизгина унга қараб олғач, шоша-шоша ўнгдаги тор кўчага юриб кетди. А Отабек тўғрига, катта кўчага қараб юрди. Ҳаво булат эди. Оқ булатлар бўлғанлиқдан қўёшнинг нури унча кесилмаган, қуёш тўр рўймол ичida ўлтурған келинлар каби ер юзига сузилиб қарап эди. Булатларнинг оҳистагина сайдидан сезилар-сезилмас хафиғ<sup>1</sup> бир шамол юриб, енгилгина бир изгириқ ҳам юзга келиб тўқунар, бу изгириқ кишига унча роқатсизлик бермаса-да, лекин қаердадир дод қилинмоқда бўлған зигир майининг аччиғ исини димогқа келтуриб урушидан кишига бир беҳузурлик ҳосил бўлар эди.

<sup>1</sup> Хафиғ — енгил, майин.

Отабек йўлнинг айрилишига бориб тўхтаған эди. Юзидан иккиланиш ҳолати сезилар эди. Бу ҳолат икки йўл устида воқиъ бўлғанлиқдан онгланмоғи енгил, чунки бир томонда пойафзал раастасининг йўли, иккинчи ёқда тўғри кўча эди. Узоқ тўхтаб турмай собит ва кучлик адимлар билан пойафзал раастасига юрди. Гарчи бу кўча унинг юзига қизариб-оқариш ва бўзариб-сарғайиш туслари берар эди, яна ҳар ҳолда ул собит қадам эди, ўша воқиъдан сўнг, оналар таъбирича, "илон чиқған" бу кўчага биринчи кириши, биринчи жасорати эди. Кўчанинг бурилишида яна бир оз унинг адимлари секинлашса ҳам, лекин олдинлашини қўймай бораверди. Узоқдан қутидорнинг тилсимлик дарбозаси кўриниб турар эдий... Дарбоза ёнидағи машъум тол дарахти ҳам номуборак бир ишка гувоҳлик берган каби бўлар эди. Борлиқ кучини асабият марказига йигиб, тағин бир қайта дарбозага қараб олди. Бу қарашида бутун ўткан кунларини яна бир қайта хотирлағандек бўлди ва ихтиозот<sup>1</sup> орасида уфлаб юборди. Кўринган гилос ёғочларининг остида бир вақтларда кимдир бирав уни кутиб олар эди, энди-чи... Энди кимни кутар экан? — деган савол миясини шипириб кетди... Ул Кумушни таомонан ўз муҳаббатида боқий деб билар ва отасининг зулмига маҳкум, деб тушинар эди. Шунинг учун кўринган гилос ёғочининг куз билан сарғайған баргидек Кумушнинг заъфарон юзини кўрди, ўзи учун эмас, унинг қалби парчаланғандек бўлди. Ҳозир ул кутилмаган бир жасоратка молик бўлған каби эди. Кирайми, деб ўйлади, бевосита ўзи билан онглашайми, деб жасоратланди... Лекин... лекин дарбозанинг қаршисидағи машъум тол ёғочи унга қараб кулгандек бўлар эди: "Борингиз, эшигим ёнида тўхтамангиз, орсиз..."

Ул дарбозага яқинлашаёзған эди, нимадандир чўчиб четка бурилди. Чунки дарбозадан чиқиб қолған икки кишини кўриб, буларнинг бирини қайнин отаси бўлуб чиқмоғидан ҳурккан эди. Ҳайтовур чиқғучилар бегона одамлар бўлиб, олдинга тоба юрой бошладилар. Бояги "...орсиз" жумласи билан унинг кириш фикри тамоман сўнган эди. Аммо "биравлар" тўғрисида нима бўлганда ҳам бир гап эшитмак ҳаваси туғилған эди. Бу чиқғучилар гар-

<sup>1</sup> Ихтиозот — титтраш, қалтираш.

чи қутидорнинг ити ҳақида бўлса-да, бир маълумот берарлар-ку, деб ўйлади ва уларга етиб олиш учун адимларини кенгайтириди. Улардан уч-тўрт адим беридা борар эди. Бахтка қарши улар чурқ этмайгина кетар эдилар. Ниҳоят юз адимча борғандан сўнг, улардан сўз эшитишкада тўғри келди; бириси иккинчисига деди:

— Тўй билан никоҳни бу кунга қилганимиз яхши бўлди.

— Нима, жувонга ҳам тўй бошқа, никоҳ бошқа бўлармиди?! Борди-келди битта жувон қизи бор-ку, мунга тўйни бошқа, никоҳни бошқа қиласиз деганига ҳайронман.

— Ахир қутидор ҳам бообра одам-да, — деди биринчи киши.

Жонсўз бу хабарни эшиткан Отабекнинг ҳуши бошидан учкан каби бўлди-да, адим узган жойида михлангандек қотиб қолди. Гўё устидан бир челак қайнаган сувни ағдарған эдилар-да, бутун териси оёғига сидирилиб тушкан эди... Беш дақиқалаб йўл устида эсанкираган, ҳушсизланган кўйи қотиб турғач, мосинавори<sup>1</sup> бирдан юриб кетди... "Кишининг хотинини талоқсиз чиқариб олда, бу кун эрга бер", — деди ва телбаларча нима учундир кулиб қўйди, ўз-ўзига сўzlаниб Марғилон кўчаларида тен-такларча югурга бошлади. Унинг бу кунги ҳолиға қараш юракларни ёрганидек тасвирга ҳам қалам кучи ожиздир...

\* \* \*

Ойнинг ўн бешлари бўлса-да, ҳавонинг булутлиги билан ой кўринмас, чин маъноси билан қоронги кузнинг қоронги бир туни эди. Бир неча юз йиллардан бери яшаб фавқулодда зўрайиб кеткан "Хўжа Маъз" мозорининг ча-калаги бу қоронгилиққа бир манбаъ каби эди. Кучлик бир ел турған, қандайдир бир ишка ҳозирланған каби тўрт томонга югуриб юрар эди. Мозор чакалагининг бир бурчагида тутаб ётған тўнка ёнида соchlари ўсиб соқолига қўшилиб кеткан бир девона бу мудҳиш қоронгилиққа қарши курашкан каби гулханни ёндиришга тиришар, гулхан теварагидан айланиб қўлидағи касави билан тўрт томони-

<sup>1</sup> Мосинавори — машинално, ўз-ўзидан, беихтиёр.

дан ковлар эди. Ел борған сайин күчлана борди, чакалак тартибсиз ҳолга кириб кетди, битта-яримта түкилмай қолған япроқлар шитир-шитир түкилишка олдилар, қарга ва зоғчалар айни уйқу замонида тинчсизлагани учун елга қарши намойиш қылғандек ғо-ғу билан чакалак устидан айлана бошладилар. Ел кучайгандан кучайиб борар ва шу нусбатда мозор ичи ҳам яна бир қат құркунч ҳолға кирап эди, ел кетма-кет бўкурар, бунга чидай олмаған шох-шаббалар қарс-қурс синар, кекса ёғочлар гийқ-гийқ этиб ёлбориш товши чиқарар эдилар. Ел ортиқча бир газаб устida эди, ер юзидағи тиккайған нарсани букиб-янчыб ташламоқчи бўлғандек пишқирап эди. Чинорлардан бирисини ерни титратиб йиқитди, девонанинг гулханини ҳам тўнка-пўнкаси билан кўтариб чакалакнинг ичига отди. Бутун мозор ичини ўт учқуни ила тўлдириб, яна кўринишкага бошқача бир тус берди. Мозорни бу ҳолға солғандан сўнг гўё шунинг учун гайратланғандек бир оз пасая тушди, оч қолған шер каби пишқириб бўкуришлари босилғандек бўлди. Ярим соат чамаси жонсаракка учраб учиб юришка мажбур бўлған қарғалар елнинг газаби босилғанини бир-бирларига хабар бергандек ғо-ғу билан эски ўринларига қўна бошладилар. Кўкни ўраб олған қора булултар ҳам тўс-тўска бўлинниб, ой ҳам қора парда ичидан ярим юзини очиб ер юзига мўралаб қўйди. Гунбазнинг қаршиисидағи икки туп кекса чинорнинг искеlet каби қуруқ шохларига ел билан алла қаёқларга учуб кеткан бойқушлар тўпи ҳам келиб қўна бошладилар. Ой парчаланған қора булултар билан бекинмачоқ ўйнаган каби ҳали кўринишиб, ҳали яширинар эди. Ул ер юзига кулиб қарагандага мозорнинг чакалак қисмига айтарлик ўзгариш бера олмасада, гўристон қисмидаги дўмбоқ қабрларни ва уларнинг устидаги мармар қабр тошларини чуқур бир сукут ичидан экан тақдим қилар эди. Бойқушлар уяси бўлған икки туп чинорнинг қаршиисида гунбазга рўбарў-рўбарў қилиб солинган айвон-зиёратхона бор, аммо ой тик кўтарилганликдан зиёратхона ичи қоп-қоронги<sup>1</sup> эди. Чинор шохлари тасбиҳ каби чиззилған бойқушлар билан тўлған. Улар ой нуридан унча курсанд эмаслар, чунки ой ер юзига кулиб қарай бошласа, улар бошларини кифтлари ичига оладирлар-да, дум-дума-

<sup>1</sup> "Хўжа Маъюз" устига солинган гунбаз ва зиёратхона ҳам масжид 1265-нчи йилларда Ўтаббой қушбеги томонидан бино қилингандир (*муал.*).

лоқ бўлиб сиқилиб кетадирлар. Ой булутлар остига кирса, улар роҳатланған каби чиг-чиг-чиг, ки-ки-ки қилиб сайраб ҳам юборадирлар. Бу вақт шу бойқушлар сайроғи ичидан инганиш каби бир товуш ҳам эшитилгандек бўладир.

Масжид манорасидан руҳоният ёғдириб мунглик азои товши эшитилди-да, уйқу қучогида ётқан табиъат уйғониб жавоб берган каби жонғираб кетди. "Оллоҳу акбар"нинг сўнғи такрорида Отабек зиёратхона айвонидан тушди-да, шилдираб оқиб турған ариқ ёнида таҳорат олишка ўлтурди...

### 13. КУЛИБ ҚАРАМАҒАН БАХТ

Энди унинг умиди ортиғи билан узилған эса-да, юрагининг ёниши босилурлиқ эмас эди. Илон чаққан кишидек довдир ва бесаранжом кўзлари билан теваракка бежо-бежо назар ташлар эди. "Ниҳоят отаси ўз муддаосига етди, қизини янги куявга топшириб тинчланди, кеча кечаси у..." дер эди-да, мундан кейинги оғулик ҳақиқатни бир турлик ҳам ўзига сингдира олмас ва буни ўйламасликка тиришиб ва ўзини алаҳситмоққа ўла теварагига бежо-бежо назар ташлар эди.

Энди Марғилон қатнаб юришларга хотима берилгандек ва Марғилон ҳам ундан "тағин мендан нима илинжинг бор?" деб сўрағандек бўлар эди. Ул "Хўжа Маъз"дан чиқиб тўғри уста Алимникига қараб борар эди ва у ердан отини миниб умрликка Марғилон билан видоълашмоқчи эди эса-да, ошна бир кимса унинг кўз ўнгига кўрингандек ва бегона раҳмисиз бир йигитнинг қучогидан қутилиш учун ундан имдод<sup>1</sup> сўрағандек бўлар эди.

Уста Алим эшигига етаёзи. Том бир маъюсият ичидаги бошини қўйи сўлған эди, ўтиб турғучиларни пайқамас, лахша чўғ каби ёниб турған юрак ўти билан сархушдек эди. Қаршидаги Содиқнинг эшигидан чиқғучини ҳам пайқамай қолди ва бир қараб олса ҳам танимаған эди. Отабек уста Алимникига келиб киргач, Содиқнидан чиқғучи Ҳомид унинг орқасидан қараб йўл устида қотиб қолди...

<sup>1</sup> Имдод — кўмак, ёрдам.

Шокирбекнинг кеча эрталаб чиқғанидан бери дараксиз кетишига ташвишланиб ўлтурган уста Алим уни йўлакда кўриши биланоқ сўради:

— Эй-й-й, баракалла сизга, Шокирбек, қаёғларда қолиб кетдингиз! Жуда ҳам ташвишландим-да ўзим... Нега бир кунда бунчалик ўзингизни олдириб қўйдингиз?!

Чиндан ҳам ул ўзини танимаслиқ даражада олдирган, ўлат теккан қишилардек кўзлари ичига чўкиб кеткан эди. Киртайган кўзига куч билан кулги туси берди.

— "Хўжа Маъз"га борған эдим...

— Нима учун?

— Тунашка.

Уста Алим таажжуб ичидаги яна бир қат уни кузатиб чиқди:

— Тунадингиз?..

Отабек айвон пешонасига ўлтуар экан, устани шубҳада қолдирмас учун деди:

— Кўбдан бери бир тунасан, деган хаёлим бор эди.

— Бузрукдан сўрайтурған тилакларингиз бор экан-да, — деди уста Алим ва кулди. Бу вақт иккиси ҳам йўлакда юриб келган оёқ товшиға қарадилар. Қўпол қилиб бошиға салла ўраган, устага ўхшаш рангсизгина бир йигит кириб келар эди. Уста Алим келгучининг истиқболи учун ўрнидан турди: "Эй-й, уста Фарфи, келинг-келинг, бормисиз!" деди. Уста Фарфи салом бериди, уста Алим билан кўришди. Отабек кўришишкага ҳозирланмаган ҳам эди, аммо келгучининг ўзи қўл узатди-да, "саломатмисиз, меҳмон" деб кўришиб олди. Айвонга ўлтургач, фотиҳа ўқулди. Уста Алим келгучини хуш омади қиласиган экан:

— Сиз ҳам келар экансиз-а, уста Фарфи, — деб пичинг отиб қўйди. Соғу саломатлик сўралиб бўлинғандан сўнг уста Фарфи қаршидағи янги қурилган тўқув дўконларига ишорат қилиб деди:

— Ишлар катта-ку, уста. Дўконларни ҳам қуриб юборибсиз.

— Дўконни ўқишига қурғанимизга энди ўн беш кунча бўлиб қолди. Фотиҳа ўқишига келармисиз, деб кутдим, шу чоқғача дарагингиз бўлмади.

— Ўзингизнинг бошингиздан ўткан, уста, — деди, — биравнинг кафилини олғандан сўнг ишни ташлаб чиқиши қийин, жумъанинг шарофатлари билан ошна-оғайнилар-

никига борилмаса бошқа иложи йўқ, ахир ўзингизнинг ҳам бошиңгиздан ўткан-ку.

— Йўқ-йўқ, — деб кулди уста Алим, — мен сизга ўхшаб дўконнинг устида сира тухум босқан эмасман, симкорни<sup>1</sup> кўзим қиймайдир десангиз, мен ишонар эдим.

— Бу гапингиз тўғри, — деди кулиб уста Фарфи, — жўжалари тушкир йилдан-йилга кўпайиб борадирлар, қозонни сувга ташлаған кунимиз жанжал.

Уста Алим дастурхон ёзиш учун ҳужрасига кирганда уста Фарфи Отабекка қаради.

— Сизники қаердан, меҳмон?

— Тошканддан.

— Жуда яхши, қани юқорига чиқинг, меҳмон, — деди. Отабек раҳмат айтиб жойидан қўзғалмади. Уста Фарфи уни яна бир қат кўздан кечириб олгач, чўқкалашини бузиб чордана қуриб олди. Дастурхон ёзилиб, эртанги ноништа учун дамлаб қўйилған чой олинниб келинди. Уста Алим Шокирбекни юқорига чиқишига қистаса ҳам ул кавшини ешмай эскича ўлтура берди. Ундан-бундан сўзлашиб чой ичишка бошладилар. Уста Алим билан уста Фарфининг сўзларидан илгарида бир устакорницида ишлаганиклари, мундан йигирма кунлар бурун уста Алимнинг устакор билан нима учундир уришканлиги ва шундан сўнг ўз уйига дўкон қуриб ўзича ишлай бошлағанлиги онглышилар эди. Уста Фарфи ундан аччиғлашиш сабабини сўраса ҳам ул қаноатландирарлик жавоб бермас, фақат "ёмон одам экан, тўнгуз" билан кифояланар эди. Шу вақт Отабек қўлидағи пиёласини бўшатди-да, уста Алимга деди:

— Энди менга рухсат берасиз, уста. Мен жўнайман.

Уста Алим ажабсиниб унга қаради ва:

— Нега тагин кетмакчи бўлиб қолдингиз? Уч-тўрт кун турмоқчи эмасми эдингиз? — деб сўради.

— Марғилондаги ишларим битиб қолди, ўзим ҳам зерикиб бошладим...

— Бўлмаса чой тугалсин, шундан сўнг сизга рухсат, — деди уста Алим ва бир пиёла чой тўлдириб берди. Отабекнинг изн сўраши билан бўлинниб қолған саволини уста Фарфи давом эттириди:

<sup>1</sup> Симкор — шогирдларга ишбай асосида тўланадиган иш ҳақи.

— Тўғрисини айтингиз-чи, уста, нима учун устакор билан аччиғлашдингиз?

— У сизга аниқ айтмадими?

— Айтмади. Сўрасам, гапни бошқа тарафка чалғитади.

— Имонсиз, айтишка уялған, — деди уста Алим ва кимгadir нафрлатланиб қарагандек бужмайиб қўйди.

— Ҳайтовур сиз билан аччиғлашқан сабабини сўрасам, гапни четка буради.

Уста Алим қўлидаги пиёласини қулт этиб бўшатди-да, устакори билан аччиғлашиш сабабини сўзлаб берди:

— Мен Ҳомиднинг қайним Сайфига ёмон кўз билан қараб юрганини сал-пал сезиб юрар эдим... Уришатурган кунимизнинг эрталабида Сайфини илгарироқ ишха жўнатдим-да, ўзим нимагадир уриниб кечроқ қолиб бордим. Дарбозадан киришим ила ишхона ичидан кимнингдир йиглаб-ёлборган товшини эшишиб ажабсиндим ва ишхона эшигини очиб кирсам, имонсиз Ҳомид қайнимга зўрлик қилиб турган экан. Эшик очилиш билан чўчиб Сайфини бўшатди-да, менга қаради. Мен аччигимдан нима дейишни билмай қолған эдим. Тўнгуз ишхонадан чиқиб бошлиған эди: "Сен билан отангта йигирма йиллаб хизмат қилиб, ниҳоят сендан кўрган яхшилигим шу бўлдими?" дедим. Чурқ этмай чиқиб кетди. Нимагадир, сиз, Карим ва Ортиқбойлар ҳам ишхонага келмаган экансизлар. Тўнгуз вақтдан фойдаланиб Сайфига ёпишқан экан. Мана, орамиздан ўткани шул. Унинг орқасидан мен қам Сайфини олиб чиқиб келдим-да, иккинчи учрашмай уйга дўкон қуриш қаракатига тушдим, — деди. Уста Фарфи ҳам устакорнинг бу қилиғидан нафрлатланган эди:

— Ўбба падарлаънати, ҳали шунақа иш қилди денгчи? Ўзи одам эмас, ҳали бу унинг ҳунарларининг энг пачоги, — деди ва товшини секинлатиб давом этди, — бадбахт, ақуллар ишонмаслиқ даражада бўлған ҳар бир ёмонлиқларни қилас эканки, биз билмас эканмиз.

Отабек уста Алимнинг ҳикоясини илтифот билан эшишкан эди. Шунинг учун ундан сўради:

— Бу қандай Ҳомид, қора чўтур киши эмасми? Мен ҳали уни қўшнингиз уйидан чиқған ҳолда кўрган эдим.

Уста Алим ажабсиниб Отабекка қаради:

— Ӯша-ӯша, сиз уни қаёқдан танийсиз?

— Унинг билан алла қаерда сўзлашканим бор эди.

Уста Фарфи Отабекка кулги аралаш қараб олиб деди:

— Бўлмаса, унинг қўланса сўзларига хўб завқланғандирсиз.

Отабек маънолик қилиб илжайди. Уларнинг сўзи шу ерга етканда рўймолда тугиглик бир нарса кўтаргани ҳолда Сайфи кириб келди, саломдан сўнг уста Фарфи билан кўришди ва Отабекка қараб деди:

— Кеча сизни кута-кута ошларимиз совиб қолди, бек ака.

— Мен бу кунгами, деб ўйлабман, — деди кулиб Отабек.

Сайфи ҳовлиқиб бир нарса дейишкага ҳозирланар эди:

— Бу кун кечаси ҳаммомнинг оғилида биравни ўлдириб кетибдирлар, — деди.

— Кимни? — деб сўради уста Алим.

— Ким эканини билмадим.

Уста Фарфи жавоб берди:

— Келишимда қўрбошилар бошлиқ ўлукни аравага ортар эканлар, ўлдирилган Салим шарбатдорнинг ўғли бечора Комилбек.

— Тавба, — деб қўйди уста Алим ва сўради: — ўлдиргучи ушланганми?

— Ушланиш қаёғда, ўлукнинг ўзини қидира-қидира зўрга ярим кечада топқанлар, — деди уста Фарфи. Отабек бу хабарни совуққина эшитиб ўлтурас эди ва фотиҳа ўқуб туришка ҳозирланар эди.

— Гумондор борми? — деди уста.

— Гумондор-ку йўқ, аммо бечоранинг ўлуми жуда қизиқ кунга тўғри келиши ажиб, — деди уста Фарфи ва давом этди. — Кеча Комилбекнинг Мирзакарим аканинг қизи билан никоҳлари бўлмоқчи экан. Бечора никоҳдан икки соат чамаси илгарироқ ёнига бир ўртогини олиб ҳаммомга борған ва бир онда ҳаммом ичидан йўқолған, ҳатто унинг ёнидағи киши ҳам қаёққа кетканини сезмай қолған. Қизникида ҳамма тажаммулни<sup>1</sup> тайёрлаб, Комилбекнинг отасидан тортиб никоҳ қиласатурган қозию қуззотларгача куявни кутиб ўлтурас эканлар. Бир вақтда ҳалиги биргалашиб ҳаммомга тушкан йигит ҳовлиқиб қизникига келган, куяв кутиб ўлтуранлар куявдан дарак сўрасалар, ул улардан куявни сўраған ва воқиъани айтиб, ҳаммомда

<sup>1</sup> Тажаммул — керакли нарсалар.

кийимларини ҳам қолдириб бир онда йўқолганини хабар берган. Шундан сўнг никоҳ-никоҳда, ош-ошда қолиб кувяни қидириб кетканлар. Ниҳоят ярим кечада ҳаммомнинг таҳоратхонаси ёнидағи бир оғилнинг охуридан қонига бешлашиб ётқани ҳолда топқанлар. Бечора таҳорат учун оғилға кирганда товуш чиқармаслиқ ерига ханжар уриб, охурға тиқиб кеткан эканлар. Жуда қизиқ гап... Ким ўлдирган ва нима учун ўлдирилган, ҳеч ким билмайдир, — деди.

Отабек тамом онглашилмаган бир ҳолатда қолған эди. Бу хабардан қувонишга-да билмас ва хафаланишга ҳам йўл топмас эди. Рақибнинг ўлдирилиши унинг тамом сўниб биткан умидини яна қайтарғандек бўлса ҳам, нима учундир ул бу ишдан ўзига тинчлик ортдира олмаган, аксинча тинчсизлана бошлиған эди. Бу фожъядан ортиқча асалланган уста Алим "вой бечора-бечора" дер эди.

— Бирарта душмани борлиги маълумдир, ахир? — деб сўраб қўйди.

— Албатта бордир, — деди уста Фарфи ва Отабекка қараб қўйди. Бу қаращдан Отабек борлиқ-йўқлиқ ҳолға кирган эди. Уста Фарфи давом этди. — Дунёда қандай одам йўқ, деб ўйлайсиз, кишининг ризқига тупурғанлар, охиратини ўйламаганлар ҳамма ёқда ҳам тўлиб ётибдир, — деди, яна Отабекка қараб олди... Отабек ёрилиш дараҷасига бориб қайтди... Уста Фарфининг бу кейинги қарашини уста Алим пайқаған эди ва уста Фарфининг бу тўғрида бир нарса билди-да, сўзлашкага Отабекдан мулоҳаза қилиб тўхтадими, деб ўйлаган эди:

— Сўзлай берингиз Фарфига, бу киши ўзимизни-кидир, — деди.

— Нимани сўзлай берайин?

— Комилбекнинг душмани тўғрисида билганингизни.

— Мен сизга бир нарса биламан, дедимми? — деди ва кулиб Отабекка қаради: — Бу одамнинг ўсмоқчилашини қаранг-а?

Бу сўз билан Отабек бир оз енгиллашди.

— Менга бир-икки қайта қараб олғанингиз учун билсангиз ҳам сўзлашкага мендан ёдсингингизми, деб уста ўйладилар шекиллик, — деди Отабек.

— Тўғрисини айтсан сиз бу тўғрида бир нарса биласиз, лекин сўзлашкага Шокирбекдан чўчиб турасиз, — деди уста.

— Қуруқ туҳматни қўйинг-чи, — деди уста Фарфи.

— Қуруқ туҳмат эмас, билиб туҳмат, — деди уста ва,  
— Шокирбек сиз ўйлаган кишилардан эмас, асло тап тортмай сўзлай беринг, — деди.

— Астагфируллоҳ — деб кулиб қўйди уста Фарфи ва  
бир оз ўйлаб олғач деди: — Сиз билан менга шу нарсанинг  
нима зарурати бор, уста!

Аввало сўзламайтурган бўлғандан сўнг пук бериш<sup>1</sup>  
керак эмас, тилдан илингандан кейин бизга зарурати  
бўлмаса ҳам билганни айтиш керак, — деди уста Алим.

Айниқса устадан кўра ҳам Отабек сабрсизлана бош-  
лаған эди. Ҳозиргина ўйлаб турган жўнаш масаласи ҳам  
унинг эсидан чиқған, чунки рақибининг қотили ким экан-  
лигини билиб олиш ҳаммадан қам унга қизиқ ва  
аҳамиятлик эди.

Уста Фарфи энди айтмаса бўлмаслигини онглади, шу-  
нинг учун Сайфига ишонмағансумол қаради:

— Жиян, сен ёшсан ҳали, сенинг оғзинга ишонч йўқ, —  
деди ва, — бир оз дўқонингта бориб тур, аччиғинг чиқса ҳам.

Уста Алим ҳам қайнисини туришка ишорат қилди ва  
ўрадан савзи олиб тўғрашга буюрди. Бола кеткач, уста  
Фарфи оҳистагина деди:

— Агар гумоним тўғри бўлса, Комилбекнинг қотили  
Ҳомиддир.

Бу сўз Отабекни ажабсинтиргандек, уста Алимга ҳам  
ғарип эшитилган эди.

— Ҳомид дейсизми?! — деб сўради уста Алим.

— Ҳомид, — деди, яна секингина уста Алимдан сўради, —  
сиз Умарбекни Ҳомидга яқин дўст эканлигини биларсиз,  
албатта?

— Биламан, ҳамма вақт юриш-туриши ўшанинг билан эди.

— Бали, — деди уста Фарфи. — Ўша Умарбек билан  
оралариға яқинда бир совуқлиқ тушди-да, мундан ўн кун-  
ча илгари Ҳомиднинг бир мудҳиш ваҳшати тўғрисида  
Умарбекдан бир сир эшиздим. Ҳомид Комилбекни  
ўлдирганда устида бўлмаган бўлсам ҳам аммо ҳалиги  
эшиткин сирримнинг далолатига қараб албатта Комилбек-  
нинг қотили Ҳомид деган фикрга тушдим... Сиз мундан  
уч йиљча илгари Марғилон келиб Мирзакарим аканинг  
қизига ўйланған Отабек исмлик Тошкандлик бир йигитни

<sup>1</sup> Пук берши — билдириб қўйинш, ошкор қилиш.

ҳалиги қайин ота бўлмиш Мирзакарим ака билан қамалиб, осилишга ҳукм қилингандарида дор остидан қутқарилиш воқиъаларини хотирлайсизми?.. Албатта ёдингизда бўлса керак, ҳов, биз Сарибойнинг дўконида чой ичишиб ўлтурған эдик-ку, ёдингизга тушдими?

— Эсимда бор, эсимда бор, — деди уста Алим ва Отабекдан сўради, — балки сиз танирсиз, Тошкандда машҳур бўлған Юсуфбек ҳожи деганинг ўғли.

— Танийман, — деди Отабек ва ҳикояни бунча узоқдан солғани ва ўз устида гап юргизгани учун тонг ажаб ичидан уста Фарфининг оғзига қараб қотқан эди.

Уста Фарфи ярим-ярим товушда давом этди:

— Ана шу йигитнинг олған хотини жуда ҳам нозанин бир қиз бўлиб, бу қизга бизнинг Ҳомид ҳам харидор экан. Ҳалиги Отабек қизга уйланиб қўйғач, бизнинг Ҳомид тиканга ағнаб, орадан Отабек билан Мирзакарим акани кўтариш фикрига тушкан ва бўлмаган чақимчиликлар билан уларни дор остигача тортишга муваффақ бўлған... (Сўз бу ерга етканда, Отабек билинтирмаслик қилиб бир энтикиб қўйди.) Уста Фарфи давом этиб деди: — Аммо худонинг қақни ноҳақ қилмаслиғи соясида бир мактуб сабаби билан кутмаган жойда дор остидан најотқа чиқғанлар. Булар оқланғач, Ҳомиднинг ўзи қамалатурған бўлиб, аммо қўрбошининг ёрдами орқасида Қўқонға қочиб қутилган ва ул ерда қам тинч ётмай Ўттабой қушбегини порахўрликда айблаб, Мусулмончўлоққа ариза берган, — деди ва сўзини бу ерда тўхтатиб устадан сўради: — Ўзингиз ҳам билсангиз керак, Ҳомид бир кеча йўқолиб уч ойлаб бедарак кеткан ва уни қўрбоши йигитлари қидириб юрган эдилар.

Уста Алим тасдиқ ишорасини бериб:

— Сўзлай берингиз, — деди. Аммо Отабек бу даҳшатлик ҳақиқатни эшитмакда бўлған қулоқларига ишонмас ва ўзини куч орқасида тутиб турар эди.

Уста Фарфи товшини сескинлатиб давом этди:

— Ҳомиднинг Мусулмончўлоққа берган аризасидан сўнг, Отабек билан Ўттабой қушбеги Қўқонға чақириладирлар-да, сўроқдан сўнг яна оқлиққа чиқадирлар.

Аммо Ҳомид уч ойлаб Марғилон келалмай юргач, ниҳоят яна қўрбошининг ёрдами билан келишкага ҳам муваффақ бўладир. Бироқ Ҳомид ҳануз тинч ётолмайдир. Фурсати келиш билан яна бир ёмонлик қилмоққа, қутидорнинг қизини ўзиники этишкага ўйлаб юрадир.

Түнгузнинг бахтига бу фурсат ҳам тўғри келиб, яна ёмонлиққа юз қўядир. Шундоқки, Отабекнинг Тошканддан ҳам уйланганини билиб, унинг тилидан бир талоқ хати ёздирадир-да, Мирзакарим аканикига киргузадир.

Отабек ўзини нечоғлиқ босиб ушлаб келган бўлса ҳам, лекин энди ичидан қайнаб-тошиб кеткан ҳиссиятини босолмади "виждонсиз, тўнгуз!" деди-да, ихтиёрсиз ўрнидан туриб кетди. Уста Алим ҳам ўзини тинч тутолмади, "Бадбахт, кофир!" деб қўйди. Отабекнинг ўзгаришидан уста Фарфи шубҳага тушаёзган бўлсада, лекин уста Алимнинг ҳам унга қўшилиши уни ўйлатиб турмади, Отабек қайтиб ўрнига ўлтурғач, ул давом этди:

— Бу сохта талоқ хати тўғрисида Отабекнинг нима қилғанлиги Ҳомидга ҳам маълум бўлмайдир. Лекин иш Ҳомиднинг ўйлағанича натижаланиб, бир неча вақтдан сўнг Мирзакарим аканинг қизини талоқ қилиниши хабари чиқиб қоладир. Орадан уч-тўрт ойни ўтказиб бизнинг Ҳомид Мирзакарим аканикига совчи киргузадир. Аммо Мирзакарим ака унинг совчиларини қуруқ қайтарадир. Бир неча вақтдан сўнг, Ҳомиднинг сохта талоқ хатиси билан эридан чиқған қиз Комилбекка бериладир ва нима учундир тўйлари бир неча вақтка кечикиб қоладир-да, орадан бирар йилни ўтказиб, ниҳоят кеча уларнинг тўй ва никоҳ кунлари эканки, Комилбекнинг ҳаммомда ўлдирилган хабарини эшлиб турибмиз. Мана мен юқоридаги сабабларга биноан Комилбекни ўлдиргучи аниқ Ҳомид, деб ўйлайман, — деди.

Уста Алим бошини чайқаб:

— Бунда шубҳа йўқ, нах Ҳомиднинг ўзи, — деди ва ўзича: — Эҳ, эссиз мусулмончилик, шунчалик ҳам инсоғизлик бўладими, ўзингнинг бир эмас" иккита хотининг бўлатуриб, тагин бир йигитнинг ҳалолига кўз олайтириш... Яна ўзингнинг бўйинг етмаслигини билатуриб ҳам, икки орада бир гуноҳсизнинг қонини тўкиш — эҳ, шайтон боласи! — деб қўйди.

— Бу бир ит, — деди уста Фарфи, — томдаги луқмани ўзи ҳам еёлмайдир, бошқаға ҳам едирмайдир, нах итнинг ўзи!

Отабек ўз ҳаётидаги фожиъаларнинг манбаъи бўлған бир ҳabisni<sup>1</sup> ниҳоят биринчи мартаба таниб турар эди.

<sup>1</sup> Ҳabis — ярамас, ифлос, нопок.

Бу палид душманга қарши ўзида қўзғалған битмас-туган-мас нафрат ва газаб ҳиссиётини сиррининг фош бўлишидан қўрқиб ичига ютишка мажбур эди. Шундоқ бўлса ҳам ичда қайнаған ҳиссиёт ўз шапрасини унинг юзига очиқ ташлаб турмоқда, кўзи ўт каби ёнар ва юзи юз хил туска киради.

Анчагина орадан сўз кесилиб қолғандан сўнг уста Фарфи деди:

— Сиз билан мен шу чоқғача Ҳомиднинг бундай ишлари бор эканидан хабарсиз юрганимизга ҳайрон қоламан.

— Ҳайрон қолишига ўрин йўқ, — деди уста Алим, — сиз-ку яқинда кириб ишлай бошладингиз. Аммо мен йигирма йиллаб шунинг уйида қолиб сира ҳам Ҳомиднинг ичидагига тушуна олмас эдим ва ҳамиша кўзимга димланган қоронгу ўрадек қўрқунч кўринар эди, — деди ва бир оз тўхтаб олғач, бир нарса топқандек ҳаракат ясади. — Бу гапларнинг бош омили албатта Ҳомид бўлса ҳам, лескин бунда унинг бошқа ёрдамчилари ҳам бор кўринадир, ёдингизда борми, кўпинча чаҳчайған кўзлик бир йигит ишхонамизга уни сўраб борар эди?

— Биламан, бу кунда ҳам билан сермуомала, оти Содиқ бўлиб, сизнинг қўшнингиз эмасми?

— Отанига раҳмат! Ана шу йигит билан унинг онаси бу ишда Ҳомиднинг энг ишончлик ёрдамчилари бўлса керакки, ул икки йилдан бери шу қўшнимниги ҳамиша қатнаб қолған эди. Содиқлар ўз овқатларини ҳам ўтқузолмаган ҳолда фақирликда яшаб йил сайин менга оз-оз ерларидан сотиб тириклик қиласар эдилар. Бир йилча бўлди, бирдан сув олиб қолдилар ва Содиқ уйланиб ҳам қўйди. Мен ҳайтовур бечора йўлини топиб олди-ёв деб юрар эдим. Энди билсан, Содиқни уйлантиргучи ҳам шу Ҳомид экан, — деди ва Отабекдан сўради: — Сиз ҳали Ҳомиднинг қўшнимнидан чиқиб кетканлигини сўзлаб эдингизми? — Отабек тасдиқ ишорасини бергач, негадир бир энтикиб қўйди. Ҳақиқатан уста Алимнинг бу кейинги сўроги уни энтикирарлик эди. Ўткан кунларини заҳар билан булғаб келган бу мудҳиш душманига қайси йўсун билан жавоб қайтариш йўлларини излаб турған чоқда бу савол берилиб, Ҳомид билан бояги учрашишини унга хотирлатқан ва энди ҳам кулиб қарамаган баҳтиға лаънат ўқутқан эди. Ул ўзининг ҳозирги ҳаётини-да улуғ таҳлика остида бўлғанлигини ва бу таҳликанинг ўткандагиларга қарағанда тамоман бошқача бир даҳшатда бўлишини онглар эди.

Уста Алим ошхонаға бориб ош қилиш ҳаракатига тушкан эди. Отабекнинг тўсатдан кетиш ҳаракатига тушиб қолғанини кўриб:

— Бек, шунча ўлтурганинг қаторида яна ярим соатка таҳаммул<sup>1</sup> қилсангиз, ошни сб йўлға тушасиз. Мана савзини ҳам босдим, — деди.

Отабек қайтиб ўлтурмади ва ҳавлининг ўртасидан туриб узр айтди:

— Раҳмат уста, мен бу кун ошигич юриб, эрталаб жўнаб кеткан юкларнинг кетидан стиб олмасам бўлмайдир.

— Ошни ташлаб кетсангиз хафа бўламан, қирқقا чи-даган қирқ бирга ҳам чидай оладир.

— Ўлтуринг-ўлтуринг, меҳмон, — деди уста Фарфи. — Ошка савзи босилди — пиши!

— Мен устанинг ошини биринчи мартаба сб ётқаним йўқ, агар савдогарчилик омон бўлса, ҳар ўн беш кунда бир келиб устанинг жонига ҳам тегаман, — деди Отабек ва боқчага қараб юруй берди.

Уста Алим ошга савзи босиш билан овора эди:

— Мен сизни зўрламайман, лекин йўл устида қорнингиз очиб қолса, ўзингиздан ўпкаланг, — деди.

Отабек майдонда отини супириб эгарлар экан, майдоннинг ғарбидаги хароба уйнинг дэворидан бир бош кўтарилиб мунга қараб турар эди. Мундан унинг хабари бормиди, йўқми, лекин ул бу томонға қарамасдан отини эгарлаш билан машғул эди. Ўл эгарланиб бўлинган отини ҳавлига қараб етаклай бошлиғанда, ҳалиги қараб турған бош ҳам дэвордан қўйига тушиб йўқолди. Ўл отини ҳавлининг ўртасига қантариб қўйиб айвондағи хуржин ва пўстунини олар экан, уста Фарфи билан хайрлашди. Отни Сайфи етаклагани ҳолда уста Алим Отабекни кўчагача узатиб чиқди ва унинг қўлтуғидан олиб отка миндирап экан, ўпкалаш оҳангига деди:

— Ошни ташлаб кетканингизни унумтманг, бек.

Отабек эгарга ўлтуриб олғач сўради:

— Хафа бўлдингизми?

— Нега хафа бўлайин, аммо йўлда очиқиб қолишингиз учун сизга ачинаётибман.

<sup>1</sup> Таҳаммул — сабр, бардош, чидам.

— Тайсер ошни ташлаб кетиб, йулда очлиқдан қийналишимни ўзим ҳам тушиниб турибман, уста, — деди Отабек ва, — бироқ түякашлар билан Андижонда бу кунга учрашиш учун ваъдалашкан эдим, уларга етиб олиб йўл харажатлари учун бир оз оқча бермасам, яъни ўзроҳатимни кўзлаб сизни ошингизни кутиб қолсам, бешкишини кўра-била туриб оч қўйған бўламан.

Уста Алим отнинг жиловидан қўлини олиб сўради:

— Андижон ўткан кезларингизда йўл устидан кириб туришга ваъда берасизми?

— Бўлмаса-чи, — деди Отабек, — шу ўн беш куннинг ичидаги саккиз тепки атласдан лоақал икки кўра йигиб қўйингиз, ёдингиздан чиқармангиз!

— Ёдимда бор, хотиржамъ бўлингиз!

— Хайр, хўш!

— Яхши қол, Сайфи!

Саман йўрга йўлга тушди, човига одатдан ташқари бир-икки қайта келиб тушкан аччиғ қамчи зарби билан бир онда кўздан гойиб бўлиб кетди. Отабекни узоқлатиб уста Алим уйга кирган ҳам эди, Жаннат опанинг эшиги очилди-да, Содиқ от стаклаган ҳолда чиқиб келди. Ул отқа минар экан, эшик ичидаги кўринган Ҳомид — "тезроқ!" — деган амрни берди. Содиқ ҳам Отабек изича отиши ҳайдаб юборди...

Уста Алим Отабекни кузатиб келиб, айвон пешонасига ўлтурасада экан:

— Табиъати жуда қизиқ йигит-да, — деб қўйди.

Уста Фарфи сўради:

— Бу йигит билан қандай ошналигингиз бор?

— Мен сизга узоги йили бир йигитнинг Ҳомиднинг дарбозасида адашиб юрганлигини ва мен билан бирга ҳавлига келиб бир кун ётиб кетканлигини сўзлаб эдим, шекиллик?

— Ҳа, ҳа, ҳали ўша йигит шуми?

— Шу. Шундан бери ҳар бир Марғилон келганида ва Андижон ўтканнида манинг олдимга кирмасдан кетмайдир. Ўзи жуда оғир ва ақллик йигит, бунинг устига қизиқ табиъати ҳам бор, — деди.

— Қизиги қанақа, — деб сўради Фарфи.

— Жуда қизиқ, — деди уста ва кечаги воқиъани сўзлаб чиқди. — Кеча эрталаб шаҳарни бир айланиб келайн деб чиқиб кеткан ва тушлик ошка етиб келиш учун ваъда ҳам берган эди. Мен ваъда вақтига ошни дамлаб ўлтурибман-

ўлтурибман сира келса-чи! Ниҳоят сиздан сал илгарироқ келиб турған эди. Сүрасам: "Хўжа Матъоз"ни тунаб қолдим, дейдир. Кўзи уйқусизлиқдан бир қарич ичига тушиб кетибдир. Жуда ҳам табиъати қизиқ йигит.

— Яхши йигит экан, — деб қўйди уста Фарфи.

Ошни еб бўлганларида у ёқ-бу ёқдан жумъя товши кела бошлиған эди. Шунинг учун чой ичиб ўлтуришка тўғри келмай уста Фарфи уста Алимдан илгарироқ намози жумъага қўзғалди ва эшикдан чиқиши билан ўз уйидан келаётгандек кўринган Ҳомидга учрашди.

— Ҳа, уста Фарфи, баҳай? — деди Ҳомид.

— Уста Алимникига келган эдим.

— Бўлмаса зиёфат қуюқ экан-да!

— Қуюқ, — деди кулиб уста Фарфи, — уста Алим ўз уйига дўкон қурған экан, гилалаб<sup>1</sup> юрмасин деб фотиҳага келган эдим.

— Шундоқми! — деб қўйди Ҳомид. Биргалашиб кета бошлидилар.

— Бўлмаса уста Алим ўз уйига дўкон қурибдир, денг-чи!

— Дўкон қурибдир.

— Арвоҳ пири бермасдан-а?

— Қишида арвоҳ пири қилиб бермоқчи, — деди уста Фарфи. Яна бир неча дақиқага орадан сўз кесилиб қолди.

— Ош қилиб бергандир?

— Албатта.

— Бошқа мечмони ҳам бор эканми? — деб сўраб қўйди Ҳомид. Уста Фарфи Отабекнинг Ҳомид билан учрашганини хотирлаган эди.

— Тошкандлик бир савдогар мечмони ҳам бор экан, — деди. Масжидга яқинлашиб қолған эдилар. Ҳомид яна ниманидир сўрамоқчи бўлса ҳам, уста Фарфи шошиб масжидга бурилди.

#### 14. РАҚИБ ИЗИДАН

Ўн олти-ўн стти кунлик ой оқ булут ичидан қўтосланиб<sup>2</sup> кўринар эди. Ҳамма хуфттан намозига кириб кеткан, кўчалар сув қўйғандек тинч эди. Кўчанинг бу

<sup>1</sup> Гила — гина, хафагарчилик.

<sup>2</sup> Қўтосланиб — ялтираб, жиллаланиб.

тинч пайтидан фойдаланган каби уста Алимнинг эшиги ёнига келиб тўхтаған кимсанинг ким эканлигини билиш учун ой ёруқлиғига қарши тушкан бўғот халал берар эди. Бўғот панасида ва эшик ҳалқасида қадалиб бир мунча вақт ниманидир кутиб турған бу киши ниҳоят авайлабгина эшикнинг ичкариги қисмида турғач, очишидағи эҳтиёт билан эшикни ёпди.

Ой ёруқлиғи уч бурчак равишида йўлакка тушиб турар эди. Бу номаълум кимса оёқ уни билан юриб келди-да, мўралаб айвонға қаради. Айвоннинг тоқчасида шамъ ёниб, Сайфи ўрин ёзиш билан овора эди. Номаълум кимса йўлакнинг қоронғи қисмиға ўзини олиб, кўзини Сайфидан узмай тура бошлади, Сайфи ўрнини тўшаб бўлғандан сўнг айвоннинг пешонасида ёзилиб ётқан дастурхон ва лаганин кўтариб ҳужрага кирди. Йўлакдаги мажҳул кимарса гўё шуни кутиб турғандек оғр учини онда-сонда ташлаб ўзини майдон ичига олди...

Барги тўқилиб қуруқ шохлари билан қолған майдон ичи туманлик ойдин, мажҳул киши юзини ойдинга бериб, хароба уй остида қадалиб турғанлиқдан унинг ким эканлигини таниш осон эди. Бу аламзада, зулмдийда юз энг сўнгги курашка ҳозирланған бир йигит эди...

Отабек хароба уй девори ёнида сўнг чекдаги бир эътибор билан ичкарига қулоқ солмоқда эди. Ичкаридан ўтин ёриб ўчоққа ўт қалаш ҳаракатлари эштилар, гоҳи хотин кишининг товши ҳам келиб қўяр эди. Ул бир-икки қайта оҳиста адимлар билан хароба уйларнинг у боши билан бу бошига бориб келди, яъни ичкарига ошиб тушмак учун қулайроқ ўрин чоғлар эди. Хароба иморатларнинг ўрта бир еридаги раҳнадан ошиб тушиш қулайроқ бўлгани учун шунинг остига шумшайиб ўлтурди. Ўлтуриши ҳамоно қаёқдандир оёқ товши эшиткандек бўлди-да, секингина ўлтурған жойига ерга сингандек қилиб ётиб олди. Оёқ товши тўхтаб нариғи ёқдан уста Алимнинг товши келди. Уста Алимнинг хуфтандан қайтиб келганлигини онглади ва унинг майдонга кириш эҳтимоли бўлғанлиқдан шу кўйи ётаберди.

Вақт жуда секин ҳаракат қиласи эди. Ул ўзининг бир юрак тепишини санағандек ўткузар эди. Кузнинг ёқимсиз шамоли ўпкани қичитиб, йўтални қистатар, ул чалқанча ётқан кўйи оғзини ўрамлаб кўмак куткан каби кўкка кўзини тиккан эди.

Орадан бир-бир ярим соатлар чамаси вақт ўтиб кетди. Теваракдан "жаннат қушлари"нинг биринчи товши қичқирилиб ўтди, шу кезда хароба ҳавли томонидан бир неча оёқ товушлари эшитилди-да, ул ўрнидан туриб қулоқ солишига мажбур бўлди. Бир мунча вақт онглашилмаған сўзлашиш товушлари келиб тургач, даричанинг гийқ этиб очилишидан сўнг бу товушлар яна ҳам узоқлашдилар. Отабек деворға интилди ва секингина юқорига кўтарилди. Бузуқ уйнинг даричасидан нариги қатордаги айвон ва ундаги ўчоқда ёниб турган ўт кўринди. Аммо очиққина бўлиб уй ичидан кишилар товши кслар эди. Ул ўмарилмаслиқ этиб девор устига минди ва осонғина хароба уй ичига ўзини олди. Чунки уй томи ўпирилиб остига босқанлиқдан уйнинг саҳни жуда ҳам юза эди. Авайлаб уч-тўрт адим босди-да, уйнинг бузуқ даричаси ёнига келиб тўхтади ва мўралабқина ҳавли юзига қаради. Қаршидаги уйнинг ҳар икки даричаси ҳам ёпиқ, аммо тирқишлиаридан шамъ ёруқлиги кўринар ва бояғига қарағанда секинроқ бир товушда гўнгир-гўнгир сўзлашиш эшитилар эди. Орадан ўн беш дақиқа чамаси фурсат ўтиб товушлар бир оз юқорилашиб келмакка бошлади. Бу орада уйдан қўлиға лаган ушлаган бир хотин чиқди-да, қозондан лаганга бир нарсани кўтара берди. Отабек гўё шуни кутиб турғандек узоқ бир тин олди ва ўзини четка бурди. Хотин лаган билан уйга кириб кеткак, ичидан тақинған ханжарини қинидан сугуриб олди-да, дамини ойдинга солиб боқди ва ханжарининг учини ёнбошидан орқасига ўтқузиб ушлади, яна уйни кутиб тўхтади. Хотин яна чиқған ва тобоқларға шўрба суза бошлаган эди. Уйга бир-икки қатнаб сузилган шўрбаларни ташиб битиргач, уйнинг эшигини беклади-да, кириб кетди.

Отабек ҳавлининг ўртасига, тут ёғочининг ёнига келиб тўхтаган ва жанубда киши йўқми, деб аланғлар эди. Ул бу тўғрида бир қаноат ҳосил эткач, битта-битта босиб кишилик уйнинг йўлак томондаги даричаси ёнига етди ва ўзини сўнг ческа эҳтиётлаб дарича остиға ўлтурди. Ўлтуриши ҳамоно димогига ичкулик билан шўрба иси келиб урди. Уйдагиларнинг сўзларинигина эмас, ҳатто томоқ чайнашларини ҳам эшитса бўлар эди. Ичкаридан кимдир бирав шап-шап этиб чайнаб дер эди:

— Энди менга берма Содиқ, Мутал полвонға бсравер!

Отабек бу товушнинг кимники бўлғанлигини билган эди.

— Ҳадеб менга бераверасанларми, оралатиб Жаннат опамга ҳам бериб қўй, ха-ха-ха!

— Бизнинг кампирга берсанг қайтармасдан ича берадир!

— Берса ичабераман, қих... ўзим хотин бўлсам ҳам Мутал полвонларнинг ўнини қочираман, қих...

Бу сўздан сўнг уй ичини кучлик бир кулги товши қоплади. Култи босилғач, яна сўз бошланди:

— Энди шуни ичасиз, Ҳомид ака!

— Йўқ, Содиқбой иним, мен жуда ҳам бўлиб қолдим, ўзи ҳам жуда кучлик чиқган экан.

— Ичмасангиз қўймайман, некин...

— Мутал полвонга бер! Сиз олинг-чи шуни!

— Аниқ ичмайсизми? Кумуш опамнинг саломатлигига ҳам ичмайсизми?

Бу сўзни эшилкан Отабек ихтиёrsиз ўрнидан туриб кетди. Жаннат опанинг хи-хи-хи қилиб кулган товши эшилди.

— Ораға нозик бир исмни келтуриб солмасанг худо ҳаққи ичмас эдим. Қани бўлмаса бер-чи, Кумуш опангнинг саломатлиги ҳаммадан ҳам менга керакдир.

— Ха-ха-ха, нозик жойдан ушладимми?

Отабек бу сўзларни эшитар экан, зўрга-зўрга ўзини даричага ҳужум қилишдан босиб қолған эди. Орада бир мунча майда сўзлар сўзлангач, кимнингдир уф-ф-ф, деб юборгани эшилди.

— Тағин нима бўлди, Ҳомид ака?

— Бу кунги гап жуда ҳам мени чўчитиб қўйди-да, Содиқбой!

— Манинг гапимга нима учун ишонмайсиз, ахир! Юз мартаба сизга айтиб ётибман-ку, хумсани дарбозадан чиқардим, тағин қанчагача орқасидан бориб то карвонларга қўшилиб кеткунча кутдим, сўнгра қайтиб келдим, деб. Агар ўша кетиши бўлса, буқун худда Қўқонға бориб еткан.

— Эй, сан билмайсан, ука!

— Некин манга қолса, бу ишда ҳеч бир қўрқатурған гап йўқ, уста билан танишлиғи бўлса, унинг уйига меҳмон бўлғандир, савдогарчилиғи бўлса Марғилонга келгандир, ахир кетиб турғандаги сўзини ўз қулогингиз билан эшилдингиз-ку!

— Бу мулоҳазанг тузик-ку, бироқ мен билан ач-чиғлашған бир кишиникида меҳмон бўлиши бошни қотирадир, тағин сизларнинг ҳавлиларнинг ёнида...

— Агар сиррингиздан уста Алимнинг хабари бўлса, ул вақтда қўрқсангиз ҳам арзийдир. Аммо менга қолса у хумпар (Отабекни айтадир) Марғилонда хотини борлигини ҳам унутиб юборган, деб ўйлайман.

— Манинг бу сирримни сиздан бошқа ҳеч ким билмайдир. Умарбек билан бир оз нари-бери бўлиб қолған эдик, ҳайтовур тагин орани очиб юбордиқ.

— Ўндоқ бўлса тагин нимадан қўрқасиз?

— Мен унинг Тошканд кетишини кўз бўяш учун бўлған ҳийлами, деб қўрқаман.

— Хайр, кетмаган ҳам бўлсун: ул ҳолда ўзингиз айткандек қилиб тўппа-тўғри эртага Салим шарбатдорнинг олдига бораман-да, ўғлини Мирзакарим аканинг илгариги тошкандлик куяви ўлдириди, мен ўз кўзим билан кўрдим, дейман. Ана ундан сўнг хумсанинг ҳолига маймуналар йигласин! Агар ул сиррингизни билган бўлғанда ҳам аллақачон келатурған ишка тушиниб олиб, Марғилондан думини хода қилди, десангиз-чи!

— Қиҳ... Содиқнинг гапи жўялик, — деб қўйди Жаннат опа.

Отабек бу сўз даҳшатидан титраб кеткан эди. Содиқ давом этди:

— Энди ишнинг бўладирғанини ўйлаш керак, сизнинг қўрқоқлигингизни кўриб, мана Мутал полвон ҳам ухлай бошлабдир.

— Ухлаганим й-й-йўқ, ҳез, дорингдан қуй-чи!

— Муталбой ўртоқ, — деди Ҳомид, — биз биравнинг яхшилигини унутатурған киши эмасмиз. Ўртогингиз Содиқбой мен билан биргалашиб камлик кўрмади, аввали худо, қолаберса мен уни уйлантириб қўйдим... Мен бирав билан ошначилиқ қилсам, ҳатто, ундан жонимни ҳам аямай, кўнглини олмоқға тиришаман.

Содиқ:

— Муталбой сизни ўбдан яхши биладир. Ҳомид ака! Сизнинг қандай хизматингиз борлиғига ҳам қонған... Аммо унинг сиздан бир илтимоси бор экан.

Ҳомид:

— Нима илтимосингиз бор, Муталбой?

Мутал (сархуш):

— Битта я-я-я-римтадан уч-тўрт т-т-танга қ-қ-қарзларим бор эди, Ҳомид ака.

Ҳомид:

— Ошналиқ деган уч-тўрт танга билан боғлана олмайдир, Муталбой! Мен сизга ҳали айтиб қўйдим: манинг

ошналигим ошнадан жонни ҳам аямаслиқ билан бўладир. Уч-тўрт танга эмас, муҳтож бўлсангиз ўттуз-қирқ танга ҳам сўрай беринг!

Жаннат опа:

— Илоҳи Ҳомидбой мурод-мақсадига етсин, қих. Ошна-оғайндан дунё аямайдир!

Бир оз вақт танга товши эшитилиб тургач, Ҳомиднинг овози келди:

— Мана, Мутал полвон, ҳозирга оз бўлса ҳам шуни олиб турарсиз, аммо хизмат ҳақингиз ўз йўлига бўладир.

Сархуш:

— Р-раҳмат, Ҳ-ҳомид ака, сиз ж-жонни аямсангиз, м-ман ҳам йўлингизга бошимни тикдим, жамшидинг арвойи!

Содиқ:

— Бизнинг Муталбой ҳам қуруқ йигит эмас!

Ҳомид:

— Дастурхонни йигиштириб олингиз-чи, Жаннат опа!

Лаган-товоқнинг бир-бирисига теккан товши эшитилиб, Отабек ўзини оҳистагина йўлакка олди. Ўзоқ бошида бир-икки дақиқа чамаси товоқ-қошиқ ва оёқ товши эшитилиб тургач, Жаннат опа ҳавлига тушиб келди ва қўлидаги дастурхонни тут остиға қоқиб кетди. Отабек қайтиб келиб дарича остиға ўлтурган ҳам эди, Ҳомиднинг шу сўзини эшитиб қолди.

— Эшикнинг занжирига бир қараб келингиз-чи, имон топкур, Жаннат опа!

Содиқ:

— Қўрқоқсиз-да, Ҳомид ака, эшикни ўзим занжирланман.

Ҳомид:

— Сан ҳали ёшсан, иним Содиқбой, сиз чиқаберингиз, Жаннат опа!

Отабек учун вақт ортиқ танг ва қўрқунч эди. Хароба уйга борай деса, Жаннат опанинг кўриб қолиши аниқ эди. Эшикни очиб чиқиб кетай деса, ўлтуришнинг мақсади ҳали очилмаган бўлиб, бутун машаққати шамолға кетар эди. Жони ҳалқумига тиқилиб теварагига аланслади ва йўлакдан нарироқда уста Алимнинг деворига сүёғлиқ турган занбилга кўзи тушди. Занбилнинг остиға яшириниши жуда ҳам хавфли эди эса-да, аммо ўлтуришнинг мақсадига қонмай кетиш ундан ҳам хатарлик эди. Сир фош бўла қолса, уч душманга баробар ҳужум қилишни бўйнига

олиб қўйди. Уй эшиги очила бошлаганда занбилнинг остига кириб олған эди. Ўзини нечоғлиқ сиқиб гужанак қилған бўлса ҳам, аммо бир қараш билан занбил остида киши борлигини билиш унча қийин эмас эди. Занбил остида ханжарини қисимлаб, гўё сичқонни пойлаған мушукдек ҳужумга ҳозирланиб ётар эди.

Жаннат опа йўлакка томон юриб келди-да, занбил остидагини пайқамай йўлакка бурилди. Ойдиндан эшикнинг занжирлиги аниқ кўриниб турар эди. Шунинг учун эшик ёниға бориб ўлтурмай йўлакнинг ярмидан қайтди. Қайтиши ҳамоно юқоридан учиб ўткан бир-икки мoshак қушнинг чев-чев-чев деган товшини эшишиб кўкка қаради. Шимол-шарқига тўғри отилиб ўқдек учиб борған мoshак қушларға қараганича йўлакдан уй томонига қайрилиб кетканини ўзи ҳам сезмай қолди. Жаннат опа айвонға чиқғанда, Отабек устидаги занбил тўрт энлик юқорига кўтарилиб, тагин секингина уни босиб тушкан эди. Жаннат опа эшикни очиб уйга кирганда, ул оҳистагина занбил остидан чиқди, унинг юрак тепиши ҳали ҳам шиддатлик эди. Дарича ёниға юриб келди-да, ҳамон ҳужумга ҳозирлангандек ичкарига қулоқ солиб турди. Жаннат опанинг "Эшик занжир" деган товшини эшикткач, роҳат тин олди ва дарича ёниға чўнқайди.

Ҳомид:

— Бўйласа, душанба куни кечасига бўлсин!

Содиқ:

— Биз қайси кунга дессангиз ҳам ҳозирмиз!

Мутал:

— Менга қолса, шу топта борсақ дейман!

Ҳомид:

— Яхвиси душанба кун, ундан нарига ўткани ҳам ярамагандек, бсриси ҳам фойдасиз бўладир, чунки бир-икки кун бунга ҳозирлик ҳам керак.

Содиқ:

— Тағин қанақа ҳозирлиги бор?

Ҳомид:

— Олиб чиқғандан сўнг, уни Марғилон ичида олиб туриб бўлмайдир: то ром қилғунча бирарта қишлоқға юборишка тўғри келадир. Олиб чиқишимиз душанба кечасининг қайси пайтига тўғри келишини ҳам ҳозирдан айтиб бўлмайдир. Олиб чиқған замон Марғилондан чиқарилиб юборилмаса, кундуз куни чиқариш тағин хавфлик. Кечаси маълум, Марғилон дарбозалари ёпиқ бўладир. Шунинг

учун бирарта дарбозабонни қўлға олиб қўймогимиз, албатта, керак...

Содик:

— Яхши маслаҳат, қутидорникига қанақа қилиб тушамиз?

Ҳомид:

— Масаланинг бу ёгини ҳам ўйлашимиз керак экан, ҳали!

Содик:

— Энг яххиси дарбозасидан кириш!

Мутал:

— Дарбозасидан кириб бўлмаса, томидан ошиб тушамиз!

Содик:

— Ха-ха-ха, балли, Мутал тўрам!

Мутал:

— Кулишингни бежо қилма, ҳез Абдикарим! Сан ҳали дунёға келиб нимани кўрдинг-ку, санга кулиш тушиб қолди! Бу бош дунёға келиб нималарни кўрмади-а? Бу нақангги қочириқ ишларни энди қилиб турипти, деб ўйлайсанми? Эй-ха-а-а, Мутал аканг нималарни қилмади?! Ха-ха-ха... Мусулмонсан отангнинг арвойи, Ҳомид ака! Бир куни Жонкелдибой ҳасратини қилиб Ҳотам тўранинг ўғлини яхши кўрганлигини, дийдорига тўёлмай бесар бўлғанини арз қилиб қолди-ку, ёнимда Қаландар полвон бор эди, Жонкелдига: — бўлмаса ўн оқта<sup>1</sup> бер бизга, биз Қаландар билан бирга дўндиқчангни муҳайё қилиб берайлик, дедим. Жонкелди ўлиб турған экан қулоқ қоқмай хўб, деди. Биз Қаландар билан тунни ярим қилдиқ-да, Ҳотам тўранинг ҳавлисига келдик. Ишнинг збини жўблаб қарасақ жуда кашал<sup>2</sup>, девор — тош ҳамин!<sup>3</sup> Ошиб тушишнинг сира ўнқови йўқ. Бу ишканни кўрган Қаландарнинг тарбузи қўлтуғидан тушиб "беш оқтани қайтариш уволку?!" деди. Ўзимнинг сал шунақангги кайфим баландроқ эди ханжарчамни қинидан суғуриб олдим-да, тўғри Ҳотам тўранинг дарбозасига бориб чақира бошладим. Бу ишимдан жон-пони чиқиб кеткан Қаландар ёнимға келиб турта бошлади: "Хой, Мутал, санга нима бўлди?" Мен Ҳотам

<sup>1</sup> Оқ таңга (мутал.)

<sup>2</sup> Кашалиш — чатоқ

<sup>3</sup> Ҳамин — ҳаммаси

тўрани чақира бериб "товшингни чиқарма, хотинга ўхшаган йигит" дедим. Қаландар ёнимда туролмади, мени ёлғуз қолдириб ура қочди. Бир вақтда ҳалиги Ҳотам тўра дарбоза орқасига келиб "ким" деди. Мен товшимға шошилишқан тус бериб "Мен, мен, очинг тезроқ!" дедим. Бечора гўл тўра дарбозани очиб юбориши борми, лип этиб ўзимни ичкарига олдим ва Ҳотам тўрани қўлидан ушлаб ҳавлига бошладим. Бечора энди мени таниған, авзогимнинг бузуқлигини ҳам пайқаған эди. Кескирдагига ханжаримни тираб: "Жонингдан умидинг борми, йўқми, ноинсоф!" дедим. Жуда тили шишиб қолган эди хумсанинг — "бов-в-бов-в" деб ғўлдираб жавоб беради... "Бир бечора ўғлингни деб кўкрагини захка бериб ётсин-да, сан тинчкина ўғлингни олиб ёт!.. Қани ўғлинг, ётқан жойини кўрсат!" дедим. Ҳотам тўра дир-дир қалтирас эди, шу кўйи уни айвонга ўзим етаклаб бордим-да, ўғлини кўрсатди. Болани уйқу аралаш тургузуб кийинтира бошлаған эдим, бир томондан онаси додлаб қолди-ку, ханжаримни олиб унга югурдим. "Товшингни ўчир, мочахар... ўғлингни ўлимга олиб бораётқаним йўқ, ниҳояти бир пиёла чой ичади-ку — келади!" дедим. Қисқаси, илгари даҳшат бериб, кейинидан яхши гаплар билан уларни ишонтириб, болани олиб чиқдим ва Жонкелдига топшириб кетдим... Бахтимга ўша куни битта ҳам миршаб йўлиқмади. Эй-й, Содиқча, сан ҳали нимани кўрдинг-ку, нимангга ишондинг, бузоқ бўгузлағандек қилиб бир-иккитани сўйган билан одам бўлдинг, қўйдингми? Гап билан бўлиб занғар кайф ҳам тарқаб кетди, қани, қуйчи бир-иккини!

Ҳомид:

— Сизга қойилман, Мутал полвон, сизнинг шунақанги ишларингизни билиб юрганим учун бу ерга чақиртириб келдим-да!

Мутал:

— Шуни билган бўлсангиз бас, бу ишни менга топшириб қўяберинг!

Ҳомид:

— Содиқ айтгандек дарбозадан киришни хоҳламайман, чунки миршабларнинг осф усти.

Мутал:

— Бўлмаса ҳавлиниңг орқасидан тушамиз!

Ҳомид:

— Орқаси ҳавлидир!

Жаннат опа:

— Қих, ҳалиги оти қурсин... Маликбойнинг майдони-да!  
Ҳомид:

— Жуда яхши экан. Бўлмаса томига шоти етармикин?

Жаннат опа:

— Қих, жуда балан.

Мутал:

— Балан бўлса, зарари йўқ, осони уйнинг тегидан тешамиз, қўямиз!

Ҳомид:

— Қийин бўлмасмикин?

Мутал:

— Ҳаммадан ҳам осони тешиш, мўлжалини яхши олсақ бас.

Ҳомид:

— Бир-икки соатда уни тешиб бўлармиди?

Мутал:

— Ўзи майдонми, ахир?

Жаннат:

— Майдон, қих.

Мутал:

— Яқинида одам йўқми?

Жаннат:

— Йўқ, қих.

Мутал:

— Балли, мўлжалини олиб берсаларинг, эртадан бошлаб қазиганим бўлсин.

Ҳомид, Содиқ:

— Балли, раҳмат полтон!

Мажлиснинг сўзи шу ерга етканда Отабек ўрнидан туриб йўлакка келди. Эшик занжирига қўлини олиб борғани ҳолда ўйланиб тўхтади ва эшикни очмай орқасиға қайтди. Хароба уй орқалиқ уста Алимникига чиқиб айвон ёнида тўхтади, уларнинг хуррак ва пишиллашларига қаноат ҳосил эткач, оёғ учи билан йўлакка ўтди ва эшикни очиб чиқди...

\* \* \*

Ўз оғзидан эшитканимиздек Содиқ уни, Ҳомиднинг таълимотича Қўйон дарбозасидан чиқариб то карвонларга қўшилиб олгунча таъқиб этиб борған эди. Отабек бу таъқибни жуда яхши сезганликдан Содиқ йўлда қолғандан сўнг ҳам яна бир бескат олдинга борған ва иккинчи бекатдан йўлни чаплаб, Тошлоқ дарбозаси орқалиқ яна қайтиб Марғилонга кирган эди.

Уста Фарфининг Ҳомид ва ўзи тўғриларидағи мудҳиш ҳикоясини эшиктач, Марғилонда қолиш ва қайин отаси-нинг уйига бориб онглашиш ўрнига жуда ошиғичлиқ билан Марғилондан жўнаб кеткан бўлиб кўриниши албатта ўринсизга эмас эди. Чунки Комилбек ўлдирилган бир кунда Ҳомиднинг кўз ўнгидаги қолиши, билатуриб, ўз-ўзига қабр қазиши, қабргина эмас номусни барбод бериш ва қотиллик исмини олиб халқ олдида шарманда бўлиш бўлур эди, нучукким биз юқорида Содиқ оғзидан эшикка-нимиздек Ҳомид бу туҳматдан ҳам қайтмас ва ўз туҳматини маҳкама олдида мантиқий равишда исбот ҳам қила олур эди. Мана ул шу мудҳиш, бошка тушмоги аниқ турған ҳалокатнинг дафъи учун Марғилондан ошиғич чиқиб жўнаған эди. Орқасидан қилинған таъқиби пайқаши эса аввало бу унинг бир мулоҳазаси бўлған эди, иккинчи, отини эгарлар экан, десвордан ўзига қараган бош билан бу мулоҳазасини чинга чиқишини билған эди. Учунчи, кўчада уста Алим билан хайрлашар экан, қўшнининг йўлагида кўринган киши кўлагаси яна таъқиб этилишини таъкидлаган эди.

Марғилондан иккинчи боскатка қўниб, чойхонада бир-икки чойдиш чой ичиб узоқ ўйлаған ва Марғилонга қайтиш қуруқ туҳматка қолиш билан фарқсиз эканлигини яна бир қат тушинган эди эса-да, Ҳомидни майдонда музaffer ҳолда қолдириб кетишини ҳеч бир турлиқ юрагига сифдира олмаган, гайри расмий яшириниб бўлса ҳам Марғилонда туришка ва туриб Ҳомиднинг мундан сўнгги режаларини ўрганишка ва шунга қараб кураш бошлашга қарор берган, шом билан аср ораларида Марғилонга кирган эди. Келиб биринчи келишида тушкан саройға жойлашқан ва жойлашиб тинчий олмаган, яъни таъқибини бу кунданоқ бошлашга қарор берган. Ҳомиднинг ёмонлиқ корхонаси уста Алимнинг қўшнисиникида бўлғанлиги учун ҳеч бир тараддуғисиз йўлни тўғрилаб Содиқникуга солған эдик, биз мундан кейинги гапларни юқорида кўриб ўтдик.

Уста Алимнинг эшигини очиб чиқғач, Содиқнинг йўлагига қулоқ солиб ғўнғир-ғўнғир келган товушни эшилди ва сескин-сескин йўлға тушди.

Душман билан бетма-бет учрашмоқ куни белгуланганикдан ўзининг бу кунги кутилмаган муваффақияти тўғрисида ҳеч бир таажжубланмас, фақат душанба кун кечаси билан мияси машғул эди. Душанба кун кечаси бир

эмас, уч душман билан кураш түгрисидағина ўйлар эди. Бу бирга уч масаласи бир оз унинг миясини қотирған; кишилар ёллаш, ҳукumatка билдириш, қутидорни хабардор қилиб қўйиш мулоҳазаларигача келиб еткан бўлса ҳам аммо иззати нафси бу қўрқоқлиққа тамоман зид турар эди. Бора-бора бу мулоҳазасини тамоман кўнглидан чиқариб ташлади; на кишилар ёллайтурган, на ҳукumatka билдиратурган ва на қутидорни хабардор қилатурган бўлди. Чунки рақиб билан дилдорнинг уйи орқасида танҳо олишмоқ, ёр оёғи остида қонлик тупроққа қоришмоқ — унинг учун жуда лаззатлик ва шоирона туйила бошлаган эди. Саройга кирап экан ўзича: — Ширин ўлим, — деб қўйди.

Гарчи кечаги тун "Хўжа Маъз"ни тунаб уйқудан қолған эди, аммо узоқ вақт бу кунги гапларни ўйлаб ётди. Ул ухлаб кетар экан, ўзини тоҳ қонга беланиб ётқан ҳолда, тоҳ Кумушни эркалаб турған ҳолда кўяр эди.

## 15. ДУШАНБА КУН КЕЧАСИ

Бу кунги кеч Отабек билан Ҳомиднинг ҳаёт ва мамот масалаларини ўзининг қора қучогига олған қоронги бир тун эди ва булардан қайси бирларининг сўнг соатлари етканлиги шу қоронги тун каби қоронги эди. Отабек бу икки ҳолдан табиий. бирисини бу соат ўзининг кўз ўнгидаги кўяр ва шунга ҳозирланар эди эса-да, аммо Ҳомиднинг ҳаёли фақат гулгина искар, гул сайрига ошиқинар эди..

Олти қарич кенглиқда узундан-узоқ тор кўча, тор кўча бошида кичкинагина бир эшикча эди. Шом билан хуфтан ўртасида бу кўча бошиға бир йигит келиб тўхтади-да, теварагига киши билмас қилиб разм солди. Кўчада ҳеч ким қолмаган, йўл оёғи босилған эди эса-да, ул узоққина қаршиисидағи дарбоза ичларини, том устларини, дсвор рахналарини кузатди ва қаноат ҳосил этиб тор кўчага оҳиста-оҳиста йўл олди. Тор кўчанинг ярмисига еткач, тўсатдан орқасига қайрилиб қаради... Унинг ҳаракати бир нарсадан шубҳаланиб эмас, аммо орқадан душман таъқиби бўлмадими учун эди. Кичкина эшикча ёнига етканда тагин ҳалигидек орқасига қараб қўйди. Бир оз ўйлаб тўхтағач, эшикнинг ўнг томонидаги деворнинг бузуқ еридан секингина кўтарилиб майдонга мўралади. Эшикнинг қулф ва занжирни бўлмай юзига ёпиқ ҳолда турған бўлса

ҳам ул эшикка тақилемади, машаққатланиб деворга минди. Ой шом еб яхшигина қоронги тушкан бўлса ҳам майдон ичининг дарахтсизлиги учун тиккайган чўб ҳам ажратурлиқ эди. Майдонни кишидан ҳоли билгач, секингина девордан ўзини майдонга олди.

Майдон икки таноб кенгликда бўлиб, жануби қутидор ва қўшнисининг иморатлари орқасидан ва бошқа уч жиҳати ҳам шунга ўхшаш бинолардан иборат эди. Майдонга ёзда нимадир экилган, чуқур-чуқур жўяклар тортилған ва ер ёғмур билан ивиб, бўкиб оёқ кўтариб босишга имкон бермас, ҳар бир оёқ узганда уч чорак лой баробар кўтарилиур эди. Қийнала-қийнала майдоннинг жанубига ўтди. Унинг чап қўли томонида бир уйнинг орқа девори бир бўйра эни кесиб туширилган бўлиб қорайиб кўринар эди. Ул бу кесилган ўринни ўткан кун кечаси келиб кўриб кеткани учун қайтадан қараб турмади эса-да, лекин унинг бу бинога илтифотсиз қарави мумкин эмас эди. Бу теги кесилган бино Кумушнинг ўз уйи бўлиб, бу уй ичида Отабскнинг саодатлик кунларининг ширин хотиралари сақланар ва шу дақиқада ҳам унинг ҳаёт тираги бўлған Кумушбibi ўлтурап эди. Отабек кўзини тўлдириб бинога қаради, гўё бу қаравашда ул дунё малаки билан видоълашар эди. Узоққина биноға қараб олғач, қўйнига қўл солиб бир қоғоз олди, хаёл ичида қоғознинг тахларини тузиклади-да, қайтариб яна қўйнига тиқди. Шундан сўнг биноға яна бир кўз ташлағач, майдоннинг кунботариға юриб, ўн беш адимлаб ҳалиги жойдан йироқлашди. Том шувогига лой олинган зовур шекиллик ўринни кечаги келишида биқиниш учун белгулаб кеткан эди, келиб шунга тушди-да, қўлини чаккасига қўйиб ёни билан ётиб олди. Гарчи ости кесилган бино билан Отабек тушиб ётқан лойхона бир-бирисига рўбарў эди. Аммо иморатларнинг кўлагаси ва кечанинг ўтакча қоронғилиги орқасида лойхонада киши бўлғанлигини пайқаш қийин эди.

\* \* \*

Тун ярим бўлиб, олдинги ухлағанлар энди бир уйқуни олған эдилар. Майдон эшиги очилди. Бири орқасидан бири юриб икки кўлага майдонга кирди. Буни пайқаған Отабек ханжарини қинидан чиқариб қўлиға ушлағач, юзтубан ерга узанди... Икки кўлага сўзсизгина ости кесилган бино ёнига келиб тўхтадилар. Келгучиларнинг бири Содиқ ва

иккинчиси Мутал эди. Тумшугини ерга тираб ётқан мұшукдек бўлиб Отабек уларни кузатар эди.

Тўхтагач, шивирлаб Содиқ сўради:

— Тешилаёзғанмикин?

— Озғина қолғандир, деб ўйлайман, негаки, пахсанинг энидан бир газ чамаси жой очилган!

Мутал товшини баралла қўйиб сўзлар эди, шунинг учун Содиқ деди:

— Товшингни секинроқ чиқарсанг-чи!

Мутал белидан тешасини олар экан жавоб берди:

— Ҳали шундан ҳам қўрқасанми, балки ҳали ашулади ҳам айтиб юборарман!

— Жиннилигингни қўй, Мутал ака. Мен ҳам ёнингда турайми?

— Турасанми, йўқми ихтиёр ўзингда!

Мутал ковакка кириб ковлашкага тутиндига:

— Тешани қаттиғ солма, — деди Содиқ.

— Менга ўргатма, ўзим биламан.

Содиқ Муталнинг эҳтиётсизлигидан қўрқди, шекиллик, бир оз Муталнинг ишига қараб турғач деди:

— Бўлмаса, мен эшик ёнига бориб турай, тешилди дегунча ҳуштак бер.

— Тузик, ҳали Ҳомид куявинг қаёғда қолди?

— Кўчанинг бошида пойлаб ўлтургандир. Ҳуштагингни эшиткач, уни ҳам чақираими?

— Чақир, — деди Мутал ва шитир-шитир кесак тушира берди.

Содиқ эшикдан чиқган ҳам эди, Отабек секингина босини кўтарди-да, Мутал сари шувий<sup>1</sup> бошлади. Мутал эса смирилиб тушкан кесакларни ташқарига суриш билан овора эди... Шу вақт унинг қўлтуғи остидан узатилған қўл ҳиқилдоғидан омбир каби сиқиб олди... Мутал кучлик эди, аммо Отабек ундан ҳам кучлик эди. Сапчиб ҳиқилдоғини ажратиш учун бўлған Муталнинг биринчи ҳаракати бўшка кетди-да, чап биқинига ўткир ханжар гачча ботирилди... Аммо ул ҳамон бўшалишга кучанар эди ва кучлик қўл баттарроқ уни сиқар эди. Уч дақиқалиқ курашдан сўнг Мутал бўшашибди, илгариги кучанишлардан қолди ва бир-икки дафъа тўлғаниб жимгина жон берди.

<sup>1</sup> Шувимоқ — эмаскламоқ.

Отабек эшик томондан кўзини узмагани ҳолда Мутални судраб ўзи буқинган лойхонага олиб борди ва қўрқибқина ҳиқилдоқдан қўлини олди. Муталнинг боши шилқ этиб лойхонаға тушди-да, мангулик уйқуға кетканлиги маълум бўлди... Отабек битта-битта тешилган бино ёнига келиб эшик томонға ҳуштак берди, жавоб ҳуштаги эшитилғач, тешук ичига кириб ўлтурди. Тешукнинг юқорисидан бир оз туйнук очилған бўлгани учун ичкаридан қулоққа сенгилча пишиллаш элитилар эди... Содик яқин еткан эди, кесмадан узогроқда туриб шивирлади:

- Тешдингми, Мутал?
- Тешдим, бери кел.

Содик кесма ёнига келиб энгашди. Энгashiши ҳамоно қўл ҳиқилдоққа тўғри келган эди ва ханжар қорнига ботирилған эди... Содик қўлидаги ханжарини бир-икки қайта солиб кўрса ҳам тегдириш учун кесманинг тубанлиғи халал берди, лекин ўзи тетук эди. Отабек сапчиб кесмадан чиқди ва бор кучи билан Содиқни босиб тушди... Босиб тушиши ҳамоно аллақайси ери ачишкандек сезилди... Сўл қўли Содиқнинг ҳиқилдоғида, ханжарлик қўли Содиқнинг ханжарлик қўлида эди... Бир оз кучини йигиб олғач, ҳиқилдоқни бор кучи билан сиқа бошлади. Содик хириллар, шундай бўлса ҳам қўлидаги ханжарни бўшатмас эди. Эшик томондан Ҳомид ҳам кўриниб қолди... Вақт танг келган эди... Содиқдан кўкрагини қочириб ханжарлик қўлини бўшатди ва Содиқнинг кўкрагига солди. Содиқнинг ханжари бир-икки қайта унинг орқасига кучсиз-кучсиз келиб теккан эди. Ханжарини иккинчи уришда Содик бўшашди ва қўлидан ханжари тушди.

— Ҳомид акангта жуда ҳам меҳрибон экансан, Содиқ! — деди босиб ётқан жойидан Отабек. — Жонингни ҳам унга қурбон қилдинг!

Содиқ инграниб қўйди.

— Ким хириллайдир? — деди яқинлашиб келган Ҳомид.  
— Тезроқ келинг, Ҳомид ака, Отабекни ўлдиридик! — деди шошиб Отабек.

— Аҳ! — деб юриб келди Ҳомид.

Отабек Содиқни қолдириб, Ҳомиднинг ханжарлик қўлидан ушлаб олди:

— Мутал ўлди. Содиқ ҳам ўлим ёқасида. Энди сиз билан иккимизгина қолдиқ!

Ҳомид қўлини бўшатишкага тиришар экан, Отабек салмоққина қилиб деди:

— Ортиқча ошиқмангиз, Ҳомидбой, мен сизнинг ханжарлик қўлингизни бўшатаман ҳозир, аммо шунгача сиз билан икки оғиз сўзим бор!

Ҳомид ҳануз қўлини бўшатишга кучанар эди.

— Кучанмангиз, Ҳомидбой!

— Мард йигит бўлсанг, қўлимни қўй!

— Ошиқма, қўяман, — деди Отабек. Шу чоқда оёғ остида ётқан Содиқ кўтарилиб-кўтарилиб ўзини отмоқда эди. Отабек Содиқдан нарироққа Ҳомидни бошлади. Ҳомид тигизлиқ билан сурилди. Ханжарлик қўли билан туйнукка ишорат қилиб, Отабек сўз бошлади:

— Сиз мендан ҳам яхшироқ биласизки, шу уйда сизни аллақанча машаққатларга солган, чексиз жониворлиқлар ишлаткан ва ҳисобсиз тиллалар тўқдирган, ниҳоят шу дақиқага келтириб тўхтаткан бирав ухлайдир. Агарда сизнинг маним тилимдан ёзиб берган талоқ ҳатингиз дуруст ҳисобланмаса, бу ухлагучи маним ҳалол рафиқам бўлиб, икки йилдан бери мен ҳам унинг кўйида<sup>1</sup> саргардонман. Демак, сиз билан манинг орамизда шу бирав учун кураш борадир. Лекин сиз шу чоққача маним устимдан муваффақият қозониб келдингиз: қора чопончи, деб дор осталариғача олиб бордингиз, Мусулмонқул қўлига топширдингиз, бу ишларингиз фойдасиз чиқғач, исмимдан талоқнома ёзиб икки йиллаб рафиқамдан айириб туришка муваффақ бўлдингиз, бу орада гуноҳсиз бир йигитни ҳам ўлдирдингиз. Ниҳоят ўғрилиқ йўлига тушиб икки йигитнингизни маним қўлимда ҳалок қилдингиз... Энди менга жавоб берингиз-чи: бу ёмонлиқларингизда сиз ҳақлими эдингиз?

— Ҳақли эдим! — деди Ҳомид ва силтаб ханжарлик қўлини бўшатиб чалқанча йиқилди. Ул қўлини бўшаткан чоқдаёқ Отабек ишини тўғрилаган, яъни Ҳомиднинг қорнини шир этдириб ёриб юборган эди. Ҳомид ҳолсизланиб ётар экан, уни беш қадам наридан кузатиб тек тургучи Отабек заҳарханда ичиди "ҳақлими эдинг?" деб сўради. Кучаниб "ҳақли эдим!" деди Ҳомид ва қўлидаги ханжарни Отабекка отди, ханжар Отабекнинг ёнига келиб тушди...

Отабек күшхона ўрнидан эшикка қараб қўзғалған эди, Ҳомиддан беш-олти қадам нарида ётқан Содиқнинг "ҳм-

<sup>1</sup> Кўй — йўл, ишқ, муҳаббат.

м-м" деган товши эшитилди. Отабскнинг кўнгли аллануч-  
калангани ҳолда майдондан чиқди...

## 16. ЎЗНИ ТАНИТИШ

Эртаси кун бутун Марғилон деярлик Маликбойнинг  
майдонида воқиъ бўлган ишка жуда ҳайрон эди:

— Мутал билан Содиқ бўлса шаҳарнинг томтешар  
йигитларидан, улар қутидорникига ўғрилиқ учун борған  
бўлсалар — борғандирлар... Лекин шаҳарнинг катта бойла-  
ридан ҳисобланган Ҳомиднинг иши қизиқ. Хайр,  
Ҳомиднинг ўғрилиқ ҳунари ҳам бор бўлсин, буларни ким  
ўлдирган? Қутидор бўлса эрталаб уйқудан турғач, бу  
ҳангамини билибdir, жуда ажойиб!

\* \* \*

Кун чошкоҳга етканда Отабек сарой дарбозасидан  
чиқди. Ул ўзининг сўл қўлини дока билан ўраб боғлаған  
ва кўкрагига кўтариб ушлаган эди. Кечаки Ҳомид ханжар-  
лик қўлини силтаб тортқанда, ханжар унинг бош бармоғи  
орасини суякка еткунча шипириб кеткан эди. Унинг оёғ  
олишида ҳам бир оз оқсоқланиш сезилар эди.

Саройдан анча узоқлашқан эди, қаршидан ўзига қараб  
келгучи Раҳматни кўрди ва чор-ночор сўрашмоққа тўғри  
келди:

— Ҳа, мулла Раҳмат, саломатмисиз?

Раҳмат ошиқибгина унинг билан кўришиди:

— Қачон келдингиз, бек ака?

— Келганимга бир-икки кун бўлди... Нега хафа  
кўринасиз, мулла Раҳмат?

Раҳмат уфлаб олди:

— Эй-й-й, бек ака, бизнинг бошқа тушканни душма-  
нингизга ҳам кўрсатмасин!

Отабек ажабсиниш туси кўрсатиб сўради:

— Нима бўлди, уй ичингиз билан саломатмисиз?

— Ўзингиз биласиз, бултур падар марҳум бўлған эди-  
лар, бу кун яна бошимизга ўлим тушатурған бўлиб қолди,  
тоғам Ҳомидни аллакимлар чавоғлаб кетибдирлар.

Отабек кўзини олалантирган бўлди:

— Қаерда, кимлар, яраси қўрқунч эмасми?

Раҳмат воқиъхани қаерда бўлғанлигини сўзлаб турмади:

— Яраси ёмон, ҳушсиз ҳолда ҳиқиллаб ётибдир.

Қорнини тикдирмакчи бўлған эдим, жарроҳ бўлмайдир, деди.

— Чавоғлағучини айтмадими?

— Тил бўлса айтади-да, — деди Раҳмат, — ул йиқилиб ётқан жойда яна икки йигитнинг ўлуги бор экан... Шулардан зарб олғанни деб ўйлайман.

— Худо шифо берсин! — деди Отабек. Ажралишдилар.

Отабек уста Алимнинг кўчасига бурилғач, Содиқ эшигидага уч-тўртта бел боғлаган кишиларнинг тобут ясаш билан машғул кўриб тинчсизланиб кетди. Уста Алимнинг йўлагига кирап экан, Жаннат опа билан яна бир хотиннинг йиги товушларини эшилди...

Жанозага таҳорат олиш учун обдаста ёнига ўлтурган уста Алим Тошканд жўнаб кеткан Шокирбекни орадан уч-тўрт кун ўтмай қайтиб келишига ажабсинган эди:

— Келинг-келинг, Шокирбек... Тошканд жўнамаганми здингиз??

Отабек айвоннинг олдига ўлтурас экан кулди:

— Тошкандга бориб келдим...

Уста Алим унинг ҳазилини фаҳмлади-да, таҳорат ола-ола қизиқ воқиъдан сўз очди:

— Марғилондан кетмаган бўлсангиз, ўзингиз ҳам эшикандирсиз, Шокирбек, сиз билан менга таржимаи ҳоллари маълум бўлған Ҳомид билан Содиқни ва тагин Мутал деган яна бир йигитни Мирзакарим аканинг ҳавлиси орқасида ўлдириб кетибдирлар. Ёмонлар ўз жазоларини топибдирлар.

— Эшилдим, — деди Отабек ва тагин кулиб қўйди.

Уста Алим унинг бу кулгисига эътибор қилмаган эди, сўзида давом этиб сўради:

— Сиз булаҳни ким ўлдирган деб ўйлайсиз?

— Сиз-чи? — деди Отабек ва тагин илжайиб қўйди.

— Менга қолса, — деди уста Алим, — ўлдиргучи албатта Мирзакарим аканинг куяви Отабекдир... зап иш қилған-да, мен унга қойилман. Мен унинг Ўтаббой қушбегига қилған муомаласини эшитиб, юрагига бали деган эдим... зап йигит экан-да!

Отабек ўнгтайсизланиб кетди. Уста Алим юз-қўлини артиб Отабекнинг қўлини олиб кўришмакчи бўлған эди, кўзи ўралған докага тушди:

— Қўлингизга нима қилди, Шокирбек?

— Пичоқ кесиб кетди...

— Ёмон кесдими?

— Сал.

Уста Алим Отабекнинг ёнига ўлтурди ва:

— Нега Тошканд жўнамадингиз, бирарта монеъ чиқиб қолдими? — деб сўради.

— Монеъ чиқиб қолди...

— Қандай монеъ? — деди уста.

— Монеъми? — деди Отабек ва кулимсираб: — Мен сизга бир катта гуноҳ қилиб кеткан эдим... Йўлда боратуриб гуноҳимдан ўқиндим-да, сизга тавба қилғали Қўқондан қайтдим... Агар сиз гуноҳимни кечирсангиз, мен шу дақиқада Тошканд жўнайман.

Уста Алим ажабланиб Отабекка қаради:

— Ҳазиллашасиз...

— Ҳазиллашмайман, агар сиз кечиратурган бўлсангиз, гуноҳимни ҳам ҳозир иқрор қиласман.

Уста Алим кулимсираб сўради:

— Қани иқрор қилингиз, бўлмаса.

— Илгари кечиришкага ваъда бериб қўйингиз.

— Менга қолса сизнинг ҳеч гуноҳингиз йўқ... Менга номаълум гуноҳингиз бўлса кечирдим.

— Раҳмат, — деди Отабек ва сўради, — мен ким?

Уста Алим тагин ҳам ҳайрон бўлиб қолғон эди:

— Сизми, сиз Шокирбек!

Отабек уят аралаш кулиб қўйиб деди:

— Ана уста, маним борлиқ гуноҳим сизнинг шу кунгача мени Шокирбек, деб билишингиздагина!

— Бўлмаса, сиз ким?

— Гуноҳимни кечиргансиз-а?

— Кечирганиман.

— Мен сиз билган Шокирбек эмас, тошкандлик Юсуфбек қожининг ўғли ва марғилонлиқ Мирзакарим аканинг куяви — Отабек!

Уста Алим бир оз ўзини кейинга ташлади ва кўзига жиқ ёш чиқарди.

— Сиз-а? — деди. Келиб Отабекни қучоқлади... Бу фавқулодда ҳолга тушуна олмай қолған Сайфи ишини тўхтатиб дўконхонадан қараб туар эди. Уста йиғлаған ҳолда Отабекни қучоқлаб ўпди-да, айвонга кўрпача сола бошлади.

— Нима қилмоқчи бўласиз, уста? — деб Отабек сўради.

— Мен ўзимнинг янги меқмонимни кўрпачага ўтқузмоқчи бўламан, — деди кулиб уста Алим.

— Мен сизнинг кўрпачангизга кўб ўлтурганман, энди менга ортиқча такаллуфингизнинг ҳожати йўқ.

— Тўғри сўзламайсиз, Отабек, бу кунгача маним кўрпачамда ўлтуриб юрган Шокирбек отлиқ бир йигит эди. Энди мен ўзимнинг янги меҳмоним бўлган Отабекни сийламоқчи бўламан... Қани, Отабек, кўрпачага чиқингиз!

Отабек устанинг латифасига кулди-да, кўрпачага чиқиб ўлтурди. Бу вақт Жаннат опанинг "шаҳид ўлган болам" деб йиглаған товши эшитилди-да, Отабек гуноҳкор бир юз билан уста Алимга қаради. Ул эса Отабекнинг бу қарашидаги маънони сезган эди:

— Зап қилгансиз, Отабек, — деди уста,— ёмонларнинг жазоси шундай бўладир... Ёнингизда кишиларингиз бор эдими?

— Йўқ.

Уста Алим Отабекка тушуна олмай қараб турғач, сўради:

— Уч душманга қарши ёлгиз ўзингиз?

— Ёлгиз ўзим. Худо ёмонга жазо бературган бўлса, шундоқ бўлар экан.

Уста Алим тамом ажабда қолған эди:

— Субҳоноллоҳ! Қандай юрагингиз бор экан, Отабек! Қўлингиздан бошқа ерингизда жароҳат йўқми?

— Йўқ. Бўксам устига бир оз ханжар учи тегиб ўткан бўлса ҳам аҳамиятсиз.

— Худоға шукур, Отабек! Сизнинг бу ишингиздан қайин ин отангизнинг хабари бор эдими?

— Йўқ эди. Бу ишни ҳозирғача бир ўзим ва бир тангрι билди. Энди бу сирни билгучиларнинг учунчиси сиз бўлдингиз!

— Астағфируллоҳ! — деб қўйди уста Алим, — рақибиниз Ҳомидни биринчи мартаба уста Фарфи орқалиқ таниғанингизми?

— Биринчи мартаба танишим, — деди уфлаб олиб Отабек, — бунга ҳам сизнинг билан бўлған ошналигим кўмак берганликдан сизга миннатдорлик қилишдан ожиздирман.

— Сизнинг ақллар ишонмаслиқ қаҳрамонлигингизга юрагим қинидан чиқиш даражасига етди, Отабек! Ҳомиднинг бу кейинги режасини қаердан билдингиз?

Отабек кулди.

— Худоға шукурлар бўлсунки, маним тортқан оҳларимни қуруққа юбормай, кутмаган ердан сиррни билдириди. Мен сизга ҳикоямни бошидан сўзлаб берайми ва ё Ҳомид-нинг режасини билишимнингинами?

— Бошидан сўзлангиз, Отабек! — деди ҳовлиқиб уста Алим ва иш тўқиши ила машғул Сайфини савзи тўғрашқа буюрди.

Уста Алимни ҳикоя тингламак учун ҳозирланған күргач, Отабек деди:

— Таҳоратнинг сабаби ёдингиздан күтарилди, шекиллик!

— Күтарилгани йўқ, Отабек, ёмоннинг жанозасидан яхшининг ҳикояси фойдалик кўринадир... Қани, сўздан келлинг!

Отабек ўзининг чин дўстига биринчи мартаба Марғилон келишидан тортиб ҳикоясини сўзлаб кетди. Унинг уч йил ичидан бошидан ўтканлари бир соатлик вақтга чўзилиб, Сайфи ошни сузиб келганда йўлда учрашқан Раҳмат билан ҳикоясини тугатди. Уста Алим Отабекнинг елкасига қоқиб дер эрди: — Сизда чин юрак бор дўстим. Бу юракингиз билан ҳеч вақт дард қолмайсиз, Отабек! Аммо мендан чин исмингизни яшириб келганингиз учун сизни айблай олмайман. Бироқ жумъя кун кечаси Ҳомид изидан маним ҳавлимга кириб-да, менга ўзингизни билдирамай кетканингизга хафа бўламан, худой кўрсатмасин бир фалокат юз берганда нима бўлар эди?

Ошдан сўнг уста Алим шундай фотиҳа ўқуди:

— Душманларингизнинг йўқ бўлганлари чин бўлсин, суйганингиз билан энди масъуд яшанг!

Отабек ташаккур этди. Тағин бир оз чой ичиб сўзлашқандан сўнг, Отабек дафтаридан иккита хат чиқариб деди:

— Сизга оғир келмаса, бир хизмат топширмоқчиман, уста!

— Буюрингиз!

Отабек қўлидағи хатларни узатиб:

— Мен шу соатнинг ичидаги Тошканд жўнашға мажбурман. Шунинг учун сиз бу хатларни қайин отамникуга ўз қўлингиз билан элтиб берасиз.

Уста унинг бу гапига тушуна олмай қолди:

— Нега энди Тошканд жўнасиз, ўзингиз...

— Ўзимга мумкин эмас, чунки... икки томонға ҳам ўнгтайсиз. Мен ҳозир кетишканга мажбурман, балки ўзингиз ҳам онгларсиз.

— Онгладим, — деди уста ва, — гап-сўз босилаёзғач, келмакчимисиз?

— Балки... — деб тўхтади Отабек, — хатларнинг бириси қайин отамға, иккинчиси унга, — деди.

— Хўб.

— Қайин отамға ёзғаним қисқа бўлғани учун сиз унга

мендан эшитканларингизни сўзлаб қондиарсиз. Қутидор билан ишингизни тугатиб қайтишингизда унинг хатини берарсиз, тузикми?

— Маъқул.

— Учрашқанингиз тўғрисида менга маълумот ёёсангиз, тагин миннатдор қиласр эдингиз...

— Бош устига.

Шундан сўнг иккиси қучоқлашиб кўришкач, видоълашдилар.

Отабек эшикдан чиқғанда Содиқни кўмиб келган кишилар қуръон ўқуб тарқалмоқда эдилар.

## 17. ХАЙРИХОҲ ҚОТИЛ

Миршаблар томонидан қўрбоши маҳкамасига сўроққа олиб кетилган қутидор қайтиб йўлакдан кириши билан минг хил ташвишда ўлтургучи Офтоб ойим билан Кумушка қайтиб жон кирган каби бўлди. Кумуш отасининг олдига қанот ёзған каби югуриб, унинг соқолини силар экан сўради:

— Сизга зарап бермадиларми, отажон?

— Йўқ, қизим.

Офтоб ойим эрининг бу сўзини эшитиши билан Хўжа Баҳоваддин йўлиға ўгуриб қўйған етти танга пулини Тўйбекага бериб, даррав эшонникига жўнатди ва шундан сўнг эридан сўради:

— Сизга айб қўя олмадиларми?

— Худойга шукур, оқландим, — деди қутидор. — Чиндан ҳам менда қандай айб бўлсунки, ўзимиз ҳам бу қангами уйқудан туриб пайқаган бўлсақ. Уйимиз остини ёмонлар тешкан бўлсалар ҳам аммо киши сиғмаслиқ бўлғанлиги мени оқлиққа чиқарди. Лекин киши сиғатурган бўлиб тешилганда ҳам мени айблай олмас эдилар, зероки уйимиз остини тешкан муттаҳамлар албатта яхши ният билан тешмаган бўлиб, молимиз ва жонимиз қасдида эканликлари маълум эди. Башарти қотил мен бўлиб кўринганимда ҳам молим ва жоним қўруғида ўғриларни ўлдирганлигим учун яна гуноҳкор бўлмас эдим. Ҳар ҳолда бу фожиҳа бизга зарарсиз бўлиб ўтдиким, бунинг учун ҳақ таолога қанча шукур қилсақ ҳам оздири, — деди ва айвонга чиқиб танчага ўлтурғач, Кумушдан сўради: — ачанг келмадими?

Офтоб ойим жавоб берди:

— Қаттиғ оғириб қолибдир, — ва сўради, — кимлар ўлдириб кетканини била олмадингизми?

Қутидор ажабсиниб хотинига қаради:

— Қизиқ сўз айтасан-а! — деди. — Бу ишка бутун шаҳар ҳайрон. Қилни қирққа ёрадирған донолар ҳам бир нарса тўқуй олмайдирлар... Аммо маним кўнглимга келадиргани шулки, бизнинг молимизга кўз олайтурған ўғрилар беш-олти киши бўлиб, уйни тешаёзған вақтларида оралариға низоъ тушиб, бир-биirlари билан пичоқлашқан бўлсалар керак.

Кумуш отасининг бу кашфига қарши тушди.

— Бу гапингиз тўғри эмас, ота, — деди.

— Нега тўғри эмас?

— Негаки, бир-биравларини ўлдиришиб, бизга зарар бермасдан қуруққина кетмас эдилар.

— Тонг отиб қолғандир, ёки улар ҳам ҳолдан тойғандирлар, — деб жавоб берди қутидср.

— Бу орада Ҳомид нима қилиб юрибдир, ўзига тузиккина бой киши эмасми эди? — деди Офтоб ойим, бу вақт Кумуш сескингина онасиға қараб олған эди.

— Ҳомид тийнати<sup>1</sup> бузуқ бир йигит эди, — деб жавоб берди қутидор. — Эҳтимолки, унинг топқан давлати ўғрилиқ орқасидадир, кишининг давлатига қараб ҳукм юрутиш қийин.

— Худойимдан ўргулайки, — деди Кумуш энтикиб ва даҳшатланиб, — ёмонларнинг жазосини ўзи берган. Ўғрилар тешиб олдимға чиқғанларида мен нима қилар эдим? Оҳ, отажон! Мен ажалимдан беш кун бурун ўлар эдим. Қизингиздан ажралур эдингиз!.. Мени гафлат уйқуси босмаған бўлса нега бир газлик пахсани кесар эмишлар ва бошимдан туйнук очар эмишлар-да, мен ҳеч нарса сезмас эмишман.

Офтоб ойим бошини чайқаб:

— Шуни айт, қизим! — деди.

Қутидор:

— Худонинг қандай ҳикматлари бордирким, шу кечакундузларда бизнинг теварагимизда қонли воқиъалар кўрила бошлади: бу кун никоҳ деганимизда Комилбекни ҳаммомда ўлдириб кетдилар (Кумушшиби юзида бир ен-

<sup>1</sup> Тийнат — хулқ, феъл.

гиллик кўрилди), кеча уйимиз орқасида бир эмас, уч киши ўлдирилдилар. Худо охирини баҳайр қилсин энди...

— Инишооллоқ ишнинг охири хайрликдир, отажон, — деди Кумуш, — чунки бизнинг молимизга кўз олайтириб ёмон ният билан уйимиз орқасини тешкучиларни ер билан яксон этдириши истиқболимизнинг хайрлик фолларидан-дир, отажон!

— Тўғри айтасан, қизим, — деди қутидор.

Кумуш ўзининг қўнгуроқдек товши билан давом этди:

— Бу мақтуллар кимлар бўлса бўлсин, бизнинг уйимиз орқасига яхши ният билан келгучи кишилар эмас ва буларни тупроққа қоришдиргучи ҳам бизга хайрикоҳ бўлған қотил ва ё қотиллардир... Бизга мунча яхшилиқ қилған киши ким бўлса ҳам худо ажрини<sup>2</sup> берсин! — деди.

Қутидор қизининг сўзини кучлаб тушди.

— Бизга ёмон ният билан қараган бўлсалар, худо жазоларини берди. Бизга хайрикоҳ бўлғанларнинг ҳам хайри жазоларини берар, — деди.

Кумушбиби бу қўрқунч уйда ёта олмаслигини билдиргани учун Офтоб ойим Тўйбекадан Кумушнинг буюмларини иккинчи уйга ташита бошлади. Қутидор эса бутун кун меҳмонхонасига келиб-кетиб турған кўнгил сўрағучи ошна, ёр-дўстлари билан овора бўлди.

\* \* \*

Шомдан сўнг қутидор эндиғина меҳмонлардан бўшаб ичкарига кирган ёди, меҳмонхона йиғишириб қолған Тўйбека қутидор ёнига келиб деди:

— Сизни бир киши чақирадир.

— Қанақа киши, танидингми?

— Танимадим.

Қутидор эринибгина ташқариға чиқди-да, меҳмонхонада ўлтурғучи таниш бўлмаған киши билан совуққина кўришиб сўради:

— Хизмат?

Уста Алим қутидорга кулимсираб олғач:

— Рухсатсиз меҳмонхонангизга кирганим учун кечира-сиз, — деди.

<sup>1</sup> Мақтул — ўлдирилған, қатл қилинған.

<sup>2</sup> Ажр — эваз, мукофот, қайтариқ.

— Айби йўқ, мулла, — деди қутидор ва қаршима-қарши ўлтуришдилар.

— Ёмонлар суюқасидан саломат қутилишингиз муборак бўлсин!

— Тангрига қулиқ бўлсин! — деди қутидор. Мечмонхона қоронгиланиб кеткани учун ҳавли супириб тургучи Тўйбекага даричадан туриб буюрди: — Шамъ ёқиб чиқ, Тўйбека!

Шамъ чиқишини куткандек уста Алим бошини қуи солиб ўлтурап эди. Қутидор "нима юмишинг бор менда" дегандек қилиб унга савол назари билан кўз ташлар ва қуръон тингловчи кишидек бўлиб ўлтургучи мажхул кишидан таажжубланар эди. Ниҳоят шамъ келиб тоқчага қўндирилғач, уста Алим муроқабадан<sup>1</sup> бошини кўтариб қутидорга қаради:

— Мендан таажжубландингиз, — деди ва қўйнидан мактубларни чиқариб биттасини қутидорга узатди, — мендан ҳам бу мактуб ажиброқдир, — деб кулди. Қутидор хатнинг унвонига кўз югуртириб чиқғач, уста Алим айткандек таажжуб ичидаги очди... Ўқуб битиргач, ул даҳшат ва таажжуб ичидаги тошдек қотиб қолган эди... Агарда унинг ёнида уста Алим бўлмағанда эди, эҳтимол ул қай вақтларғача серрайиб қолар эди.

— Жон ва оиласиз душмани бўлған бир бадбаҳт энди ўз қилмишининг жазосини кўрди, буродарим Отабек уларнинг тотиқларини хўб боблаб берди, — деди уста Алим ва давом этди: — Шунинг билан сизнинг нажиб<sup>2</sup> оиласиз даҳшатлик фожиға даврларини кечириб, энди масъуд кунлар арафасига етди. Хатни ўқуб сизнинг даҳшатланишингиз эмас қувонишишингиз, душманингизнинг юзтубан қилғани учун ҳақ таолоға шукур айтишишингиз керакдир!

Қутидор ҳушини бошиға йиға ёзди ва уфлаб тин олғач, ҳаяжон ичидаги сўради:

— Мен билан Отабекни қаматдирған ва дор осллариға юборған Ҳомидми?

— Ҳомид.

— Талоқ хати ёзгучи Отабек эмасми?

<sup>1</sup> Муроқаба — мушоҳада қилиш.

<sup>2</sup> Нажиб — улуг.

— Ҳошо ва калло<sup>1</sup>, Отабек мундай гапдан хабарсиз.  
Унинг отидан талоқ хати ёзгучи ҳам шу бадбахт Ҳомид.

Мундан сўнг қутидор туриб ичкарига югурди, ярим йўлданоқ танчада ўлтурғучи Офтоб ойим билан Кумушка қичқириди:

— Сир очилди!

Иккиси ҳам сачраб қутидорга қарадилар-да, бирдан сўрадилар.

— Нима, қандай сир?

Қутидор танчага бориб ўлтурмади-да, айвон пешонасидан туриб, қўлидағи хатни юқори товуш билан ўқуб чиқди:

"Мұхтарам қайин отамизға!"

Сиз билан мени қоронғи зинданларға тушариб, дор осталариғача торткан, бунинг ила ўзининг ваҳшиёна ти-лагига ета олмағандан кейин маним тилимдан соҳта талоқ хати ёзив дарбоза ёнидан ҳайдаттиришқа муваффақ бўлған ва бир гуноҳсизни шаҳид эткан Ҳомид исмлик бир тўнғузни ниҳоят икки йиллик саргардонлигим сўнгидა ёрдамчилари билан тупроққа қоришдиришға муваффақ бўлдим... Сизнинг шонли ҳавлингиз ёнида воқиъ бўлған бу кураш албатта сизни ва уй ичингиз ҳам ёрдўстларингизни анчагина тинчсизликка қўйған бўлса кепрак. На чораки, ёмонларни сизнинг ҳавлингиз орқасида рафиқам қасдида бўлғанлари пайтида учратишға тўғри келди ва мен бу ишқа мажбур қолдим. Бунинг учун албатта мени кечирарсиз умидидаман. Фақат сизнинг тинчсизланишингиз ва мардумнинг юқори-қўйи сўзи бўлмаса сизга бошқа зарар бўлур, деб ўйлай олмайман. Сиздан бу улуғ гуноҳим учун афв сўраб ҳайдалған ўғлингиз — Отабек Юсуфбек ҳожи ўғли".

'Аммо қутидор "ҳайдалған" сўзини ташлаб ўқуди. Мактуб ўқулиб битканда Офтоб ойим, айниқса, Кумуш қутидорнинг бояғи ҳолига тушкан эдилар. Кумушнинг бу дақиқадаги ҳолини қалам билан чизиб кўрсатиш албатта мумкин эмас эди. Ул титрар эди, кўкарап эди, тўлғанар эди... Ҳозирғи энг кучлик ҳиссиётини ҳиссиётнинг аъло ифодачиси бўлған ёш билан тўқар эди.

Қутидор ўз томонидан ҳам изоҳ бериб чиқди:

— Мен билан Отабекни қаматиб дор остиға юборғучи,

<sup>1</sup> Ҳошо ва калло — шаксиз, шубҳасиз.

Отабек тилидан сохта талоқ хати ёзиб бир-биримиздан жудо эткучи, Комилбекни ўлдиргучи, уйимиз орқасини тешиб Кумуш қасдида бўлғучи — ҳаммаси ҳам шу баттол Ҳомид экан... Аммо бадбахтни икки кишиси билан тупроққа қоришдириб кеткучи Отабек экан!..

Офтоб ойим титраган товуш билан:

— Уятсиз Ҳомид, — деди.

Кумушбиби:

— Бечора бегим, — деб қўйди.

Учави ҳам юракни тўхтатиб олиш учун анчагача жим қолдилар.

— Ўзи эсонмикин? — деб сўради охирда Кумуш.

— Хатига қараганда сог, — деди қутидор.

Офтоб ойим сўради:

— Ўзи қаерда эмиш, хатни сизга ким келтурди.

Бу саволдан қутидорнинг эсига меҳмонхонада ўлтурган уста Алим тушкан эди. Ўрнидан иргиб турди-да, хотинига жавоб бермасдан ташқарисига чиқди. Ул уста Алимнинг қаршиисига ўлтурганда, меҳмонхонанинг юқори даричаси остига Офтоб ойим билан Кумуш хат келтиргучининг сўзини эшлиши учун келиб тўхтаған эдилар.

Қутидор узр айтди:

— Келтурган хабарингиз таъсирида сизни унутаёшибман...

— Мен буни пайқадим, — деди уста Алим кулиб, — шу йўсунда маккор Ҳомиднинг иблисона дасисаси<sup>1</sup> бир оиласи тамом ишдан чиқараёзғанким, бу тўғрида айниқса сизга сўзлаш ортиқчадир. Аммо арслон юраклик Отабек ҳам бадбахтни шундог янчиб ташладиким, бу жуда оз кишилар қўлидан келатурган ишдир.

— Ўгриларни ўлдирганда Отабекнинг ёнида неча кишиси бўлған? — деб сўради қутидор.

Уста кулди:

— Отабекнинг танҳо ўзи, — деди.

— Уч кишига танҳо ўзи? — қутидор ишонмаган эди.

— Азаматнинг ёлгиз ўзи, — деб уста Алим илгариги сўзини қайталади.

— Астагфируллоҳ... Нега менга бу тўғрида хабар бермаган?

<sup>1</sup> Дасиса — макр, ҳийла, найранг.

— Сизга хабар бериб ўлтуришни йигитлик отига эб билмай, ҳатто менга ҳам бир нарса сездирамаган. Мен ҳали бу нүқсони учун айбласам: "Мен ўзимнинг ашаддий душманим билан танҳо курашиб ё жон бермакка ва ё жон олмоққа қарор берган эдим. Шунинг учун ҳеч кимга ҳам билдирамадим" дейдир.

Қутидор бир томондан даҳшатка тушса, иккинчи жиҳатдан Отабекнинг дав юрагига ҳайрон қолар эди.

— Ўзига жароҳат олмағанми? — деб сўради қутидор.

— Бўксаси билан қўлидан яраланған бўлса ҳам зарарсиздир. Уста Алим қутидорнинг баъзи бир зътиrozларига қарши Отабекнинг қутидор томонидан қувланғанидан тортиб, шундан бери Маргилонга етти-саккиз мартаба келиб кетканини, ҳар бир келишида ўзининг уйига келиб тушканини ва қалин ўртоқ бўлиб олганларини, шундоқ бўлса ҳам Отабекнинг ўзидан чин исмими яшириб юрганини, жумъа куни уста Фарғидан биринчи мартаба ўз рақибини танишини, ниҳоят бу кунгина унга чин исмими очқанини сўзлаб чиқди.

— Талоқ хати-ку сохта экан, — деди қутидор, — нега бизнигiga бир келгани билан қайтиб келмади экан?

— Чунки унинг сўзига қарағанда, сиз уни оғирроқ тариқа билан дарбозангиз ёнидан жўнатқан экансиз, — деб изоҳлади уста. — Тошканндан уйланишида сизнинг билфесъл бош қўшишингизни фақат қизингизни ундан чиқариб олиш учун қурилған бир ҳийла экан деб ўйлаб, қайтиб эшикингизга оёқ босмаған, ҳатто хотинини қозига чақириш тўғрисида фикри бўлса ҳам, сиз билан учрашидан қочиб бу фикридан ҳам қайтқан, яъни сизнинг қизингиз бўлғани учун сўйган хотинидан ҳам кечмакка қарор берган.

Қутидор ҳали ҳам Отабекнинг руҳига тушуна олмаған эди:

— Мендан ўзи хафа бўлған бўлса, ораға киши қўйса ҳам бўлар эди.

— Шундоғ қилса ҳам бўлар эди, — деди кулиб уста Алим, — мен ҳали ундан шундай деб сўрасам, "Ўзимга ишонмаган киши, киши сўзига киармиди, деб ўйладим" дейдир. Куювингизнинг қизиқ табиъатини шундан ҳам яхши билиб олсангиз бўладирким, шу чоққача ота-оналари ҳам бу фожиъадан хабарсиз эканлар.

— Қизиқ йигит, — деди қутидор, — мендан ҳам катта нодонлиқ ўткан.

— Ҳаммаси ҳам тақдирнинг иши, амак, бу орада сиз билан маним ҳеч бир ихтиёримиз йўқ.

— Албатта йўқ, — деди қутидор ва сўради, — ўзи сизни кидами?

— Бу кун пешинда Тошканд жўнаб кетди.

Қутидор тушина олмаған эди:

— Нега-нега? — деб сўради.

— Нега... сабабини мен ҳам яхши тушина олмадим.

— Қайтиб келадирган вақтими айткандин?

— Бу тўғрини сўраған эдим, муҳмалроқ жавоб берди, — деди уста ва ёнини ковлаб хатни олди. — Бу хат каримангизга бўлса керак, энди менга рухсат, — деди ва фотиҳа ўқуб ўрнидан қўзғалди.

— Мен сизга дастурхон ёздиришни ҳам унутқанман, қўзғалмандигиз!

— Раҳмат, амак, ҳозирга мени кечириб турасиз, аммо бапиржа каттароқ зиёфатни унутмайсиз, — деб кулди уста Алим. Қутидор уни кўчагача кузатиб чиқди.

Кумушбиби дарича орқасидан ҳамма гапни эшишиб олған ва ҳиссиётини юм-юм йиглаб ўткарган эди.

\* \* \*

Офтоб ойим Кумуш билан бошлишиб ичкарига кирап экан сўради:

— Ҳомиднинг ёмонлигини бизга улашдириб юрган пучуқ хотиннинг шумлиги ўз бошига етиб, ўлганларнинг биттаси ўшанинг ўғли экан, билдингми?

— Ўлганидан менга нима фойда, — деди Кумуш.

Офтоб ойим қизига ажабланган эди.

— Фойдасини кўриб турибсан-ку, ахир.

— Фойдаси Тошкандга кетиб қолғаними?

— Кетиб қолған бўлса, тагин бир кун келар.

— Келмайди, — деди ўксис Кумуш, — унинг ҳамма ҳаракати душманидан ўчини олиш учун экан.

— Ким айтди сенга?

— Хат олиб келганинг сўзидан пайқадим.

Офтоб ойим кулди:

— Эринг сени ташлаб кетмас, қўрқма, қизим, — деди, — санинг бошингга тикилган бу балоларни ўзининг ширин жонидан кечиб дафъ қилған Отабек, сени сира ҳам унумас, санга ёзған хатини отангдан олиб ўқуб кўр-чи олдин.

Кумушбиби йигидан қизарған күзини катта очиб сүради:

—Менга хат ёзғанми?

— Ҳалиги киши санға атаб даданғта бир хат берди-ку, билмадингми?

— Билмадим, — дели. Чунки ул уста Алимнинг "муҳмал жавоб берди" сўзини эшиккач, тамоман ўзини унтиб, берилган хатни пайқамай қолған эди.

Икки йилдан бери сратини кўз ўнгидан кеткуза олмаған, Отабекнинг юзини кўралмай, сўзини эшила олмаса ҳам ёзған хатини ўқуб эшитиш Кумуш учун катта қийматка молик эди. Отасининг йўлакдан кириши билан латиф кўкраги кучлик тин олиш ила кўтарилиб ташланди-да, гўё Отабек билан учрашатурғандек юраги ўйна-моққа бошлади. Қутидор келиб танчага ўлтурғач, ўзига "амонатни топширинг" деган каби қараб турған Кумушка хатни узатди:

— Санга хат.

Кумушбиби уялиб-нетиб турмади ва кимдан, деб ҳам сўраб ўлтурмади, даррав тоқчада ёниб турған шамъ ёнига бориб хатни оча бошлади. Шамъ қархисида қизарған шаҳло кўзлари, ёш билан синган жингтила кипраклари, чимирилған тўසдек қора қошлари уни алла қандай бир ҳолга қўйған эдилар. Қоши устига тўзғиб тушкан сочларини тузатиб хатни ўқуди:

*"Ой юзлик рафиқам, қундуз қошлиқ маъшуқам Кумуш хонимга!"*

Шайтон устаси бўлған Ҳомиднинг маним отимдан сизга ёзған талоқ хатиси ила менга қарши ёниб кеткан юракингизнинг нафрат ўти эҳтимол энди ўча тушкан-дир. Соҳита талоқ хатини олған сўнгингизда менга хитоб қилиб ёзған фикрларингиздан эҳтимол энди қайта-ёзғандирсиз... Бу хатни ёзар экан, муҳаббатингиз билан тўлуқ бўлған юраким мудҳиши бир ҳақиқат эҳтимолидан яфроқ каби титрар ва ўзининг тўлиб-тошқан ҳасратларини, фарсларини ифодасидан адашар эди... Сизга очиб сўзлай, гўзал рафиқам: гўё маним бу мактубим сизнинг Комилбек учун ҳасратлик ёшлар тўккан, ўтлик оҳлар тортқан чоғингизда эришар-да унчилған, эскирган бир юракнинг арзини тинглий олмассиз ва ёниб турған юрак ўтингиз билан кўйдирарсиз...

Аммо хатимни ўқумасангиз-да ва марҳумингиз учун тортқан оҳингиз ўтида кўйдирсангиз-да, маним учун

*Фарқисиздир. Нега дейсизми? Чунки сиз маним шаръий рафиқамсиз — яхшилиқ билан-да ва ёмонлиқ билан-да мен буни исбот қилишға ҳозирман!*

Үйингиз орқасида қылған адабсизликларим, хунхўрликларим учун мени кечирингиз... Чунки мен бу ваҳшийликни ишлашда ихтиёрсиз эдим: ҳаётингизнинг, номусингизнинг сақланиши буни тақозо этар эди... Албатта мен ишо наманким, сиз маним бу яхшилиғим учун миннатдорлик қиларсиз. Лекин мен бу миннатдорликка ўзимни сазовор ҳисоблай олмайман.

Мен ўшал кун кечаси душманлардан бирини ўлдирдим-да, сўнг даражада заифландим, иккинчи душмандан енгилишимни ва кўйингизда жон беришими аниқ билib роҳатланиб кетдим... Маним учун кўйингизда ва оёғингиз учидаги жон бериш жуда ширин эди ва кўбдан бери гоям эди. Шунинг учун яқинроғингизда ўлмак учун, ўлар эканман, сўнг дақиқамда яна бир мартаға бўйингизни олиб ўлиш учун душман томонидан ўйингизга очилған туйнукчага кирдим. Кирдим-да, сизни бўйингизни олдим, хафиғ тин олғандаги латиф ухлаган товшингизни эшилдим... Шу вақт субҳоноллоҳ... ўзимда кутулмаган бир куч сезган эдим, иккى эмас, иккى юз душманга муқобала<sup>1</sup> этишка ўзимда қудрат кўрган эдим... Мен ўзимга бағишлиған куч манбаъини жуда яхши онглар эдим, мендаги бу ўзгариш манбаъи ўй ичидаги ухлагучи бир малак эди... Сиз ёдингиз!"

Кумушбиби хатнинг бу ўрнига етканда қизариниб, бир оз ўқушдан тўхтаб олди ва давом этди:

"Шундан сўнг иккинчи душманни туйнукдан чиқмаёқ ишини битирдим. Бизнинг фожиъамиznинг асл омили бўлған Ҳомид эса гўё маним қўлимда мушук каби ўйин бўлған, уни кулиб туриб, ўйнаб туриб тилимлаган эдим..."

Эсингизда борми, мени дор остидан қутқарив, менга янги ҳаёт бағишлиғанингиз? Бу кеча ҳам бу иккинчи ўлимдан қутқарғучи ва иккинчи мартаға менга ҳаёт бағишлиғучи яна сиз бўлдингиз! Шунинг учун миннатдорлик эткучи сиз эмас, мен бўлишға тегишиман!

Сиздан эмас отангиздан бир ўткалашиб бор: соҳита та-лоқ хатимни маним ўз қўлим бўлиб, бўлмағанини ажратма

<sup>1</sup> Муқобала — қарши туриш.

алмаған. Гумонимча бу сохита хат сизга ҳам күрсатылмаган ўшайдир, чунки, айниқса сизнинг кўз ўнгингиздан бу ҳақиқат қутила олмас эди... Ҳар ҳолда тақдирнинг бунчалик ўйинлари турған бир замонда биз нима ҳам қила олур эдик? Бу тўғрида мендан ҳам ўткан жойлари бордирким, сизнинг биринчи мартаба менга ёзган хатингиз маъносидан даҳшатлик суратда ўзимни тағофилға соглан ва хат келтургучини суриштирмасдан жавоб хати бериб юборған эдим. Шунинг ила сизни-да, ўзимни-да Ҳомид қўлида ўйин бўлмоғимизга катта йўл очкан эдим.

Баъзи эҳтимолларга қарши сиз билан кўришмак менга муяссар бўлмади. Умримда биринчи мартаба кўнгил орзу-сига қарши бордим. Чунки манимча орадаги қора тикон супирилган эди. Мундан сўнг ҳамиша менини эдингиз. Мен Тошканда юрарман, аммо кўзим ўнгидан сизнинг ҳайкалингиз! Ажабо, бусиз менга мумкинми?

Завжингиз Отабек".

Кумушбиби хатни ўқуб тугатди-да, юргилаганча уйига кириб кетди. Унинг бу ҳаракатидан қутидор билан Офтоб ойим ажабсинишиб бир-бирларига қарашған эдилар. Кумушбиби қўлида иккинчи бир мактуб кўтарганича уйдан чиқди-да, шамъ снода икки хатни бир-бисрисига солишириб кўрди. Бу хат Ҳомиднинг Отабек тилидан ёзган талоқномаси эди. Бу икки хат биринчи қарашдаёқ икки киши томонидан ёзилғанлиқларини ўз оғизларидан сўзлаб тураган эдилар.

Кумушбиби икки хатни қатор ушлаб отасига кўрсатди:

— Буларга қарангиз, ота! Бизни нечоғлик гафлат босқан экан, — деди.

Қутидор қизининг мақсадига тушиниб икки турлик қўлни даррав пайқаб олди:

— Виждонсиз, иблис, имонсиз, кофир, — деб қўйди.

Кумушбиби Отабекнинг хатини буқлаб чўнчагига солди-да, сохита хатни шамъга тутиб ёндирап экан, отасидан сўради.

— Шу воқиъдан сўнг куввингиз аниқ келганми эди?

— Келган эди, қизим.

— Бечорани нега ҳайдадингиз-да, нега мени, лоақал ойимни бу келишдан хабардор қилмадингиз?

— Мен унинг кслишини бошқа гапка йўйиб, сизларга билдирамаган эдим...

— Қизингизни талоқ қылған бир кишини Тошканд деган жойдан эшикингизга келиши сизга ғарип<sup>1</sup> туулмаганми эди? — деб яна сүради Кумуш.

Қутидор уялиш ва ўқиниш орасида:

— Жаҳолат келса, ақл қочадир, қизим, — деб қўйди.

Офтоб ойим билан қутидор Ҳомиднинг иблисона ишларига "тавба-тавба" деб муқобала қилсалар ҳам, аммо Отабекнинг фавқулодда юракини сўз орасида "барака топкур, умринг узоқ бўлғур" билан қарши олар эдилар. Кумушбиби эса бутунлай бошқа қайгуда эди. Эру хотиннинг сўзлари Отабекнинг Тошкандга кетиб қолиши тўғрисига келиб тақалди-да, Офтоб ойим Кумушдан сўради:

— Сенга келишидан айтканми?

Кумушбиби шилталаш назари билан уларга қаради ва кескин оҳангда жавоб берди.

— Айтмаган!

Эру хотин маънолик қилиб бир-бирларига қаралиб олғач, орада узоққина сукут бошланди. Кумуш қутидорга савол назари билан бир-икки қайта қараб ҳам қўйди.

— Келиб қолса яхши, — деди ниҳоят қутидор, — келмаса, Тошкандга ўзимиз тушамиз-да, — деб хотинига қаради.

Бу сўз Офтоб ойимга ёқмаганлиқдан юзини четка бурди. Аммо Кумуш отасидан рози қолиб, онасиға қаради.

— Қизинг ҳар қайси ерда бўлса ҳам соғ бўлсин, — деди хотинига қутидор. — Эрига топшириб, сен билан маним тинчкнина дуо қилиб ўлтурганимиз маъқул ўхшайдир.

— Энди қизингизнинг бир ками кундаш балоси эдими? — деди сапчиб Офтоб ойим. Қутидор хотинига кулиб қаради:

— Эри яхши бўлса, кундаш балоси нима деган гап?

— Эри минг яхши бўлсин, бари бир кундаш кундашлигини қила берадир. Машойихлар билмасдан "кундаш" демаганлар.

Қутидор қизига қараб кулди ва хотинини юпатди:

— Ҳамма вақтга эмас, қўрқма.

— Менга қолса бир кунни ҳам кўб кўраман, кундаш билан кечирилган кун — кунми?

— Кувиявингнинг шунча қылған жонбозлигини унутдингми?

<sup>1</sup> Ғарип — ажаб, таажжуб.

— Нега унутай, — деди Офтоб ойим. — Келсин. Мана бош усти, болам бир эмас икки. Улдурки,<sup>1</sup> қизимни кундаш устига юборишға тиши-тирногим билан қаршиман.

— Беш-олти кунга ҳам-а?

— Нече кунга?

— Менга қолса битта-иккита болалиқ бўлғунча турсин, деяр эдим. Сан бунга кўнмасанг бир-икки ой туриб келсин, лоақал. Бир йигит қизингни деб икки йиллаб сарсон бўлғанда қизингни икки ойлик кундаш азобидан ҳайф кўриш жуда уят, ахир!

Қутидор "битта-иккита болалиқ" сўзини айтканда Кумуш қизариниб ерга қараған эди. Офтоб ойим эрининг кейинги сўзи билан анчагина бўшаши:

— Бир ойдан ортиқقا мен рози эмасман, шунда ҳам куявимнинг яхшилиги учун, — деди.

— Ана энди ўзингга келдинг, хотин.

— Ўзимга келсан-келмасам шартим ҳалиги, шунда ҳам ўзим бирга бориб келаман.

— Албатта, ўзинг бирга борасан, қудаларинг билан танишмогинг ҳам зарур.

— Қачон юбормоқчи бўласиз энди? — деб сўради Офтоб ойим.

Қутидор бир оз ўйлаб олғач, Кумушка қараб жавоб берди:

— Отабек билан кетма-кет чопишмогимиз ҳам унча маъқул кўринмайдир. Ундан сўнг қиши куни арава сафари ҳам қулагай иш эмас. Шунинг учун орадаги уч ой қишини ўтказиб жўнармиз, — деди. Кумушнинг уч ой муддатни эшиткач, жуда ҳам ҳурпайиб кеткани учун бўлса керак, — балки ўзи ҳам бирар ойларда келиб қолар, — деган сўзнида қўшиб қўйди.

(Иккинчи бўлимнинг сўнгиги)

<sup>1</sup> Улдурки — шундоқчи.

## 1. МУСУЛМОНҚУЛ ИСТИБДОДИГА ХОТИМА

Мусулмонқулнинг аҳоли устига бўлған жабру зулми ҳаддан ташқари кетди. Унинг истибоди ўзга шаҳарларга унча сезилмаса ҳам, аммо марказ — Қўқон одамларини жуда тўйдирди. Унинг ўз кайфича ойда эмас, ҳафтада солиб турған солиқлари фуқаронинг терисини шилса, арзимаган сабаблар билан қора чопон бекларини осдириб, кесдириб туриши хосни (хавосни) ҳам эсанкиратди. Отиғагина хон бўлиб ўлтургучи Худоёр ҳам осдириш, кесдириш ва ёрлақаш ўз ихтиёрида бўлған — Мусулмонқул майдондан олинмаған фурсатда ўзининг қўғирчоқ сифат юраберишини тушинди. Кўбдан бери унга юрагида кек сақлаб келиб, аммо не тариқада најотка чиқишини билмади. Чунки ул суюнадирған Қўқон бекларини "мана" деганлари Мусулмонқул ва кишилари (қипчоқлар) томонидан осилиб кесилганлар, қолғанлари товуш чиҳаришга мажолсиз эдилар. Атроф шаҳар ва қишлоқ беклари ҳам аксар қипчоқлардан, яъни Мусулмонқулнинг ўз одамларидан, улардан бир иш кутиш яна мумкин эмас.

Шаҳар ҳалқининг ҳар бир табақаси деярлик Мусулмонқул даккисини сб келган, магар уламо ҳалқи ундан жуда рози, зероки Мусулмонқулнинг биринчи истинодгоҳи<sup>1</sup> ўзининг қипчоқлари бўлса, иккинчиси уламолар эди. Ул уламо орқалиқ ўз зулмини машруъ бир туска қўйған, ўзи учун зарарлик унсурларни йўқотишда шу уламолардан "улуламирга богийлиқ" деган фатвони олишни унутмаған эди. Уламонинг бу янглиғ истибдодни "богийлиқ" ранги билан бўяб бериши мукофоти учун Қўқон ва Ан-

---

<sup>1</sup> Истинодгоҳ — таянчгоҳ.

дижон каби шаҳарларга маълум мадрасаларни бино қилған ва бу мадрасаларга хизмати билан танилган уламодан мударрислар таъйинлаган эди. Аммо Мусулмонқулга яқинлаша олмаған, яъни унинг хизмат ва марҳаматидан четда қолған "нимча"<sup>1</sup> уламолар ҳам йўқ эмас эдилар.

Азтаҳидил Мусулмонқулнинг оталигидан қутилишни ва мустақил равища ҳукмрон бўлишни орзу эткан Худоёр, ниҳоят қайин отаси билан курашда ўзига биринчи исти nodgoқ қилиб шу кейинги синф уламони олди. Мусулмонқул балосидан қутилгандан сўнг Худоёрнинг уларга қиладирған инъом ва эҳсонлари, берадирған мансаблари-нинг нақддек ваъдаси баракасида бу кейинги табақа — Қўқон муллалари ҳаракатка келдилар.

Мусулмонқул тарафдори уламолар унинг сиёсатини шариъатка қанча мутобиқ<sup>2</sup> кўрсатиб келган бўлсалар, бу кейингилар ҳам ўшанча хилофи шаръий эканлигини истботка киришдилар.

Бошда бу ҳаракат албатта "енг ичида" бўлди ва бу ҳаракатнинг бошида Худоёрнинг ўзи турди. Биринчи галда яширин равища Тошканд, Андикон, Марғилон ва ўзга шаҳарларнинг ишончлик уламо ва бекларига Мусулмонқул истибодидан қутилишда кўмак бериш учун мурожаатномалар йўлланилди. Бу мурожаатномаларда Мусулмонқулнинг номашруъ ишлари, Қўқон одамларига қилған жабру зулмлари саналған, кейинги вақтларда хоннинг ўзи ҳам бу зулмлар қарисида чидаб тура олмаслиқ ҳолга келганилиги сўзланилған, агарда бошқа шаҳар уламо ва ашрофидан кўмак бўлған тақдирда билғеъл Мусулмонқулга қарши кўтарилишка ҳозир турилғанлиги айтилган эди. Иккинчи галда Қўқон сипоҳларининг қипчоқдан бошқа қисмига яширин равища, умуман ановиларга қарши ташвиқот юргизилиб бошланған эди.

Андикон, Марғилон, Наманганд каби шаҳарлардан "хон бу ишни маслаҳат кўрсалар, биз ёрдамга ҳозирмиз" деган қуруқ ваъдалар келиб, аммо Тошканнадаги Юсуфбек ҳожи тўдасидан амалий чораларини ҳам кўрсатилиб ёзилған жавоб мактуби олинған эди.

Мактубда айтилар эди:

"Сиз Хўқанд уламойи киромларининг Мусулмонқули

<sup>1</sup> Нимча — илми чала.

<sup>2</sup> Мутобиқ — мувофиқ, уйғун.

хунхўрлиғидин фарёдга келиб ва шариати мұстафони ораға восита қылғыб ёзған махфий хатларини олдиқ. Биз Тошканд уламо ва ашроғидин дөмла Соліхбек охунд, мулла Юсуфбек ҳожи, саркардалардин Қосым ва Ниёз қүшбегилар, Каримқұл ва Мұхаммадражаб құрбоши ҳам Қамбар шарбатдорлар бир ораға ўлтюришиб воқиған Мұсулмонқулининг зулм ва тааддиси Хўқанд фуқароси ва айни замонда бўлак шаҳар ва қишлоқ, кент аҳолиси устига ҳам бағоят ошиб борғанлиғини музокара ва муколама<sup>1</sup> қилишидиқ. Биз фақирлари ҳам Мұсулмонқули ҳаракати беҳудасини шариятга хилоф, юрт ва эл учун музир,<sup>2</sup> ҳалойиқнинг осойиши ва умр гузаронлиғи<sup>3</sup> важҳига ҳалаидор деб билдиқ. Бул маънига ул тоҷдор амирагмўъминин мувофақат<sup>4</sup> кўрсатсалар ул бепарҳез<sup>5</sup> госиби<sup>6</sup> таҳту салтанатнинг ҳайдалмоғи беҳроқдир<sup>7</sup> ва яна биз Тошканд мардумлари бул тўғрида ҳақиқат томонида собит қадам бўлмоққа тил беришурмиз. Башарти сиз киромлар ул бепарҳез золимнинг мингбошилиқ вазифасидан тард<sup>8</sup> этишка аздилу жон бел боғлаган бўлсаларингиз биз фақирларнинг ақли қосиримизға<sup>9</sup> бир андиша келадир. Андоғки, Тошканд Хўқанд ҳукуматидан юз ўғирган бўлиб ҳуднафсига<sup>10</sup> мұстақиллик эълон қилсан. Бу тақдирда итоатдин бош тўлғаган Тошканд устига албатта Мұсулмонқули золим қўшин тортар. Ушбу қўшин орасига сиз киромлар ўз одамларингизни кўброқ киргузишкага қўшиш қылғыб ва яна жанови тоҷдор ҳам бирга келсинлар. Қўшин Тошкандга еткан баъдида бизлар ташқаридин ва сизлар ичкаридин бўлиб Мұсулмонқулини орадин кўтаргай-

<sup>1</sup> Муколама — суҳбат.

<sup>2</sup> Музир — зарарли.

<sup>3</sup> Гузаронлик — яшаш, ҳаёт кечириш.

<sup>4</sup> Мувофақат — ҳамфирклиқ.

<sup>5</sup> Бепарҳез — андишасиз, юзсиз.

<sup>6</sup> Госиб — босқинчи.

<sup>7</sup> Беҳ — яхши, маъқул.

<sup>8</sup> Тард — олиб ташламоқ, ҳайдамоқ.

<sup>9</sup> Қосир — қисқа.

<sup>10</sup> Ҳуднафсига — ўзига.

миз. Бул маслаҳат фақирларнинг ақли қосирларимизга кўб тафаккурлар баъдида келиб, яна раъий савоб ўзларида бўлғай. Аммо бул тақдирда қон тўкилмасдин муддоа ҳусулга<sup>1</sup> келурму деб ўйлаймиз. Боз маҳфий қолмагайким, Тошканд беги бўлған зот борасида андиша лозим эрмас, зеро ул одам фуқаронинг осойиши йўлида жонбозлиқ қилғучи кишиидир. Бизлар лимаслаҳатан<sup>2</sup> нима десак, ул бўйин тўлғамас. Инишооллоҳ билан андишамиз киромиларга маъқул тушкан тақдирда жаноби тождорнинг ҳам раъяларини олмоқ ва имкони бўлса ул жанобнинг исми шарифларидин бизларга писанднома ёзмоқ маржудир.<sup>3</sup> Токи бизлар ишонч бирлан муддоаға шуруб<sup>4</sup> қиласлиқ".

Бу хат Худоёрнинг қўлиға теккандан кейин, хатда кўрсатилган тадбирни жуда маъқул топди ва тезликда ўз исмидан ташаккур ва писанднома йўллади. Ижобатни олғандан сўнг юқорида мазкур Тошканд ашрофлари бир мажлис қуриб ўлтуришка Нормуҳаммад қушбеги (Тошканд ҳокими) ни ҳам чақирдилар. Мажлисда хондан ва уламодан олинган мурожаатномани ўқуб Нормуҳаммад қушбегига эшитдирдилар. Мажлиска йигилганлардан Юсуфбек ҳожи ва домла Солиҳбек охундлар қушбегининг пир, деб инобат қилған одамлари бўлғанлари учун элнинг осойиши ва мамлакатнинг ободлиги номига бу таклифни, яъни Қўйонға қарши исён эткан бўлиб туришни ул ўз бўйнига олди. Бундан онглашиладирким, Нормуҳаммад қушбеги ҳам ўзининг валинеъмати бўлған Мусулмонқулнинг туткан сиёсатини юрт манфаатига хилоф деб билибдир.

Узоқламай Нормуҳаммад қушбеги Қўйондан бош тоблаб ўз олдига мустақил ҳукумат эълон қилған бўлди ва Юсуфбек ҳожиларнинг ўйлаган тадбирлари айни куткан натижаларни бера бошлади. Итоатдан бош тортқан Тошкандга қарши Мусулмонқулнинг тепа сочи тик туриб, адаб бериш ниятида сафар жабдугини тузди. Тошкандга қарши айниқса газабланган бўлиб кўрингучи Худоёр ҳам бу сафарнинг тадорикини баробар кўришди ва Мусулмонқул

<sup>1</sup> Ҳусул — ҳосил бўлиш, қўлга кириш.

<sup>2</sup> Лимаслаҳатан — маслаҳат юзасидан.

<sup>3</sup> Маржу — умид қилмоқ.

<sup>4</sup> Шуруб — бошлаш, ишга киришиш.

билан бирликда Тошканд устига чиқдилар. Йўл устида ҳам Тошканд билан яширинча сўз олишиб, хатти-ҳаракат чизишиб туришдилар.

Мусулмонқул илгори<sup>1</sup> Чирчиқ бўйига келиб етканда, қушбеги бошлук Тошканд йигитлари ҳам сувнинг бериги юзида ёв кутиб турған эдилар. Туш чогида икки ёв бир-бирларига қарши келишдилар. Қўқонлиқларга дам бермай-ино Тошканд қўшуни миљтиқларга ўт берди. Мусулмонқул кутмаган жойда қўшунидан бир дуркуми ўз устига ҳужум бошлаб ва бир фирқаси Тошканд йигитлари томонига қочиб ўтди. Мусулмонқулнинг ўз йигитлари (қипчоқлар) саросималикда қолиб, Мусулмонқулнинг мудофаасини-да ва қочишни-да билмай қолдилар. Ўз устига чугирчиқдек ёпирилиб келмакда бўлған қўқонлиқ ва тошкандликларга қарши ўзида куч йўқлигини билган Мусулмонқул бир от ва бир қамчи аранг қўшундан чиқиб қочди ва бир қанча йўлғача қувланди. Бошлук орқасидан қочмоқчи бўлған қипчоқ йигитларига муноди<sup>2</sup> нидо қилди:

— Қипчоқ оғайнилар! Бизнинг ҳамма адоватимиз Мусулмонқулға эди! Сиз оғайнилар илгари хон ёнида қандоғ хизматда бўлған бўлсаларингиз, энди ҳам ўша вазифада қолаберасизлар ва лекин Мусулмонқулға тарафдорларингиз бўлса, тинчликча қўшундан чиқиб кетсин!

Қипчоқ йигитлари ҳам бир ерга уюшиб, ўз тарафларидан муноди қўйдилар.

— Биз Мусулмонқулни танимаймиз! Бизнинг бошлугимиз Худоёрхондир!

Шундан сўнг қипчоқ ва ўзбек бирга аралашиб кетди, гёё ҳамма адоват Мусулмонқул билан бирга кеткандек бўлиб, икки ҳалқ бир-бири билан кўришди. Ўн минглаб ҳалқ янгидан Худоёрға итоат изҳор этиб, чин хонлиқ билан уни муборакбод қилишдилар. Тошканд ҳалқи иззатикром остида хонни ва Қўқон сипоҳини шаҳарга тушуриб, ўрдада уч кун зиёфат бердилар. Зиёфат асносида иттифоқнинг фойдалари, тарқоқлиқнинг заарлари сўзланилди. Қушбеги ва Юсуфбек ҳожиларнинг таклифи билан Мусулмонқул ўрнига Ўтаббой қушбеги (Марғилон ҳокими) мингбоши белгуланиб, тўртинчи кун Худоёрхон қўшуни билан Қўқонға қайтди.

<sup>1</sup> Илгор — қўшиннинг олд қисми, авантгард.

<sup>2</sup> Муноди — жарчи.

Киши чиқар олди. Мусулмонқул воқыасидан йигирма кунлар чамаси кейин эди. Мұхаммад Ражаб құрбошининг уйидан икки-уч қайталаб киши келабергандан кейин, Юсуфбек ҳожи иложисиз қолиб боришға мажбур бўлди.

Йигинда Мұхаммадниң қушбеги, Қосим мингбоши, Қамбар шарбатдор, Каримқул понсадлардан тортиб Тошканднинг етуклик ашроф ва аєснидан ўн бешлаб одам бор эди. Меҳмонлар учун мева-чева, қуюқ-суюқ тортилди. Зиёфат тўкун эди. Емак асносида Ниёз қушбеги сўзлаб йигиннинг мақсади билан аҳли мажлисни танишдира борди:

— Оғалар, инилар! Билиндики, оғайнилар бир тан, бир жон бўлсалар қипчоқ қасофатидан қутилиш унча қийин тушмас экан. Мундан бир ой илгари биз қандай ҳолда эдик? Мусулмонқулнинг омонсиз қиличи оғайнининг бўғзида эди. Худо ҳожи акамизнинг умрини узун қилиб, бола-чақасининг эгилигини кўрсатсинки, аввало унинг ақёллик тадбири, ундан кейин оғайнининг бир ёқадан бош чиқариши соясида Мусулмонқул балосидан енгилгина қутилдиқ. Аммо бу қутилиши чин қутилиш деб бўлмайдир. Нега десаларингиз, оқ ит бўлмаса, қора ит товоқ-қошиққа тегмакда. Ҳали биз саҳройи қипчоқ элидан узил-кесил қутилганимиз йўқ. Анови Мусулмонқул бўлмаса, бошқа Алимқулнинг<sup>1</sup> бош кўтариши аниқ, — деди қушбеги ва дастурхондан чўқиниб давом этди. — Нормуҳаммаднинг раъйини деб, ҳамма ихтиёр ўз қўлнимизда бўлғани ҳолда, Ўтаббойни мингбоши белгулаб юбордиқ... Бу ҳам ўзимизнинг энг катта хатоларимиздан. Мен ўша кундан бери ўз-ўзимдан бўғилиб юрийман: Мусулмонқулнинг ити бўлмаса, ўзимиздан мингбоши бўларлиқ одам қуриб қолувдими, дейман. Йўқ, оғалар, темирни қизигида сўқиб қолиш керак! Қачонгача биз шу саҳройи итлар билан сану манга боришиб юрамиз? Яхшиси шулки, бу бош оғриғиларни бир варакай орадан кўтариб тинчишай-

<sup>1</sup> Алимқул (1833 — 1865) Андижон атрофидаги қирғиз-қипчоқ қабилаларидан бирида тутгилган. Кўқон хони Мұхаммад Султон Сайднинг оталиги (мураббийси ва маслақатчиси). Русларга қарши курашган лашкарбошилардан бири. Тошкентнинг Шўртепа мавзитъида бўлган жангда ҳалок бўлиб, Шайхантоҳур қабристонига дағн қилинган.

лик. Биз шу ердаги оғайнилар билан кенгашиб бир гапка түхтаб қўйдиқ. Аммо бу маслаҳатнинг ҳожи акамизга ҳам маъқул тушмогида шубҳа қилмаймиз. Бу ўйнимизга хон ҳам бир нарса демаса керак. Қўқон, Марғilon, Андижон, Ўш ва бошқа ерларнинг оғайнилари ҳам бу гапдан бош тўлғамаслар. Нега десангиз, қипчоқ деган ифлос барчани ҳам жонидан тўйдирди, — деди ва носқовогини қоқа-қоқа бир отимини тилининг тегига ташлади.

Юсуфбек ҳожи ҳалиги гап сўзланғанда қўлидаги пиёсласини чайқатиб оғир бир ҳолат кечирган ва чуқур бир сукутка кеткан эди. Бошқалар бўлса Ниёз қушбегининг сўзидан кейин бир кўздан деярлик ҳожининг юзига тикилган эдилар. Ҳожи миқ этмай ўлтура бергач, Қамбар шарбатдор ўзининг хипча товши билан қушбегининг гапини кучлаб тушди:

— Сўзингиз жуда тўғри қушбеги, — деди, — сиз айткандек, бизга икки йўл бор: қипчоқни қириб йўйиш ва ёки бутунлай қипчоқ қўлида қолиб кетиш.

Юсуфбек ҳожи кўтарилиб Қамбар шарбатдорга қаради ва мажлисни ер остидан кузатиб чиқиб, яна жим қолди.

Каримқул понсад ҳожини туртмак мақсадида:

— Кенгашлик иш тарқашмас, деганлар. Ҳожи акамиз ўйлашиб жавоб берсинлар-чи, ахир, — деб қўйди.

— Билмадим... — деди ниҳоят ҳожи, — сизларнинг муддаонгларга тушинмадимми ёки тушинсан ҳам ўзимга ётишиб келмадими, ҳайронман.

Ниёз қушбеги бошини қашиб олди:

— Нимасига ҳайронсиз, ҳожи!

— Мақсадларингиз Қамбарбекнинг айтканидек қипчоқни кесишми?

Қушбеги иккilanмай жавоб берди:

— Кесиш!

— Сизларни, — деб истеҳзоланиб кулди ҳожи, — бу ишка нима ва ким мажбур қиладир?

Қушбеги ёронлариға қараб олди:

— Саволингиз қизиқ, — деди, — сабаби бизлардан ҳам кўра сизга маълум бўлса керак-ку.

— Дуруст айтасиз, — деди ҳожи бошидағи салласини олиб, — Мусулмонқулни ҳайдамоққа мажбур бўлған эдик — ҳайдадиқ. Барча ёмонлиқ ўшанинг боши билан бирга кеткандек қипчоқ оғайнилар ила totуклашдик, қипчоқларнинг эски адоватлари битди... Бас, бизга тагин нима керак?

Хожининг бу гапи мажлисни бир-бирисига аланғлатиб қўйди. Аммо қушбеги сирни бой бермас учун тиришкандек қилиб кулди:

— Мусулмонқул энди тинч ётар, деб ўйлайсизми?

— Албатта ўйламайман, лекин Мусулмонқул тинчимайдир деб ҳўлу қуруқ қипчоққа тиф тортиш ҳеч бир ақлга сигадирған гап эмас. Ўзингиз қушбеги айтинг-чи, биз бу кунгача ёмонлиқни кимдан кўрдик? Қипчоқ отлиғ халқданми ёки унинг саноғлиқ бўлған бир неча кишилариданми?

— Нафсиlamрни айтканда, биз қипчоқ деганинг ҳар бирисидан ҳам дакки еб келамиз.

— Сўзингизда янгишлиқ бор, қушбеги! Агар сиз нафсиlamрга қарасангиз икки халқни бир-бирисига совуқ кўрсатиб, адоват тухумини сочиб келгучи бир нечагина одам бор... Менга қолса, мамлакатни тинччиш учун шулар тўғрисида ўйлаш керак. Наинки, тўртта муттаҳамни деб бутун бир халққа ҳужум қилиш!

— Сиз айткандек, ёмон тўрттагина эмас, ҳожи! — Саҳрдан келган ҳар бир қипчоқ бизнинг елкамизга минмакчи. Бизнинг товоғимизга тумшуғини тиқмоқчи — бунга қолғанда ишни бир оз снгил ўйлаб турибсиз, ҳожи ака!

Қосим мингбоши:

— Ҳожи акамнинг ҳамма гаплари фақат раҳимдилликдан айтиладир, — деди, — аммо ўйлаш керакки, қипчоқ бу кунгача озғина оғайнининг қонини тўқдими? Анови кун Маражаббек билан ҳисоблашиб кўрсак, Қўқоннинг ўзидан икки йилнинг ичидаги етмиш саккиз бек ўлдирилибдир. Ҳали бу ҳисобка фуқародан ўлдирилган бечоралар кирмайдир.

— Мен бу ҳақиқатлардан тониб турғаним йўқ, мингбoshi. Аммо биз сенга сен, деб жавоб бермасак, бизники ақл ва инсоф доирасидан чиқмаса дейман...

Орадан бирав ҳожининг сўзини бўлди:

— Ақл, инсоф билан иш қила-қила энди жуда тўйдик.

Ҳожи сукут қилди, ўзининг шунчалик гапларини ҳавоға кетиб турғанини, мажлиснинг Ниёз қушбеги руҳида борғанилигини яхши сезди. Мундан бошқа Ниёз қушбегининг бундай бир фикрга келиши учун уни нима мажбур қилған — буни ҳам очиқ онглади. Ниёз қушбегининг барча кинаси Ўтаббойнинг мингбоши белгуланган кунидан бошланғанини, "мен турған ерда, қипчоқ мингбoshi бўлсинми!" деган кек орасида бу фикр фақат унинг

томонидан майдонга чиқарилғанлиги Юсуфбек ҳожининг мулоҳазасидан ўтди. Мажлиснинг бошқа аъзолариға бўлса, иш йўғидан юмиш чиқаришқа талабгор бекорчилар, деб қаради.

Албатта, эл фойдасидан кўра ўз манфаатини олдинга сургучи бу чўталчи бекларга қарши ҳожининг совуққонлиқ сақлай олиши ва асабийлашмаслиги мумкин эмас эди.

— Беклар, — деди, — маним ҳамма мулоҳазам юрт, эл манфаати нуқтасидан туриб айтиладир. Мен ҳеч бир вақт инкор қилаолмайманким, ёлғиз ўз гарази йўлида иш қилғучи палид кишилар қипчоқлар орасида бор бўлғанидек, бизда ҳам йўқ эмас... Балки ановиларда ўнлаб бўлса, бизда юзлаб бор. Ўзи бизнинг кўзимизга итдек совуқ кўринган қипчоқбачча Нормуҳаммаднинг эл учун қилиб турган тўғри хизматини мен ўз умримдаги Тошканд беклари орасида биринчи мартаба кўраман. Буни сиз яхшилар ҳам инкор қила олмассиз. Бас, айб қипчоқда эмас, балки унинг манфаати шахсияси йўлида иш кўргучи бошлиқларида ва қипчоқлар ўйлағандек гуноҳ қора чопонлиларда бўлмай, балки унинг уч-тўртта маънисиз бекларида!.. Буродарлар! Ўрус ўз ичимидан чиқадирған фитнафасодини кутиб, дарбозамиз тегида<sup>1</sup> қўр тўкиб ётибдир. Шундай машҳар каби бир кунда биз чин ёвға берадирган кучимизни ўз қўлимиз билан ўлдирсан, сен фалон деб қирилишсақ ҳолимиз нима бўладир. Бу тўғрида ҳам фикр қилғучимиз борми? Кунимизнинг коғир қўлига қолиши тўғрисида ҳам ўйлаймизми ёки бунга қарши ҳозирлик қўриб қўйғанмизми?!

Хожи ўзини тутолмай кўз ёшисини оқ соқолиға қўйиб давом этти:

— Мана буродарлар! Сиз ўз қипчогингиз учун қабр қазиган фурсатда, сизга иккинчилар тобут чопадир. Биз қипчоққа қилич кўтарганда, ўрус бизга тўп ўқладидир. Сиз дунёда ўзингизнинг ягона душманингиз қилиб қипчоқни кўрсангиз, мен бошқа ёвни ҳар замон ўз яқинимға еткан кўраман! — деди ва рўймоли билан кўз ёшисини артиб ўрнидан турди. — Агарда дунёдан ўтаёзған бир кексангиззинг маслаҳатига қулоқ берсаларингиз бу фикрингиздан қайтинг, буродарлар! Илло Юсуфбекни ўлдига чиқариб, бу

<sup>1</sup> Оқмасжид ёки Олмота ёнида демакчи (*муал*).

шум ишингииздан мени ташқаридан ҳисобланғиз! — деди ва мажлиснинг ўлтуринг, тұхтанг сүзига қулоқ солмай, ўлтуришни ташлаб чиқди.

Ҳожи дарбозадан чиқмаған ҳам эди, Ниёз қушбеги хахолаб кулиб юборди:

— Вой ваҳманг құргир, ҳожи! Бу кун кўкнори ичкан экан, шекиллик! — деди.

Бошлиқдан кулгига рухсат берилгач, бошқалар ҳам кулишиб, орада ола-ғовир бошланди.

— Йўқ, — деди Қамбар шарбатдор, — ҳожи аканинг ёши қайтиб, кўнгли жуда ҳам бўшашиб кетибдир!

— Вой ҳўвари, ҳожи, — деди Ниёз қушбеги, — олдиғағи овни кўрмай, узоқдағи ёвни кўрадир!

— Худда-худда!

Муҳаммад Ражаб қўрбоши бошини чайқаб Ниёз қушбегига қаради:

— Мен сизга айтиб эдим-а, қушбеги, — деди, — ҳожини ҳар нарсага кўндирангиз ҳам, бу гапка кўндиralмасиз, деб.

— Мен уни кела бермай овора қилғанидан ҳам пайқаған эдим.

— Кеча бир оз ҳомсиган<sup>1</sup> эди, — деди Каримқул понсад.

— Иш бузилди-да, — деб қўйди Муҳаммад Ражаб қўрбоши.

— Нега бузиладир? — деб сўради қушбеги.

— Сирримиз очилди, албатта ҳожи тинч ётмайдир.

— Сирримиз ҳали очилған эмас, — деди ишонч билан қушбеги, — агар биз шу ўлтурған оғайнилар бояғи гапда событ қолсақ, сирримизни яна яшириб кетиш мумкин.

— Масалан? — деб сўради Қамбар шарбатдор.

— Ўша сўзимиз — сўз, иттифоқимиз — иттифоқми?

Мажлис тасдиқ ишорасини бериб:

— Албатта-албатта! — дейиши.

— Сўз битта бўладирған бўлса, — деди қушбеги, — ҳожининг иши жуда осон, биз ҳозир сўзни бир жойга еткузамиш-да, биримиз ҳожининг олдиға бориб, маслаҳатингизни мувофиқ қўрдик, биз янглишқан эканмиз, деймиз. Албатта, ҳожи ишонадир-да, ҳеч кимга сўзламай

<sup>1</sup> Ҳомсигон — шубҳалимок.

қўядир. Биз бўлсақ, енг ичида ҳозирлик кўра берамиз, ана холос.

— Мақул гап, тўғри маслаҳат!

Маъқулликка маъқул, — деди қушбеги, — аммо гап бу ердаки, биз аниқ ишқа бел боғлаймизми?

— Боғлаймиз, боғлаймиз!

— Баракалла! — деди қушбеги, — маълум бўладирки, ҳаммамиз ҳам яқдил эканмиз, энди бошқа гапка ўтсақ ҳам бўладир.

— Хонни кўндириб бўлармикин? — деб сўради Қосим мингбоши.

Қушбеги кулди:

— Хон кўнган ҳисоб, — деди.

Бу гап мажлиска унча онглашилмади шекиллик, ажабланиб бир-бирларига қарашибдилар.

— Изоҳ! қушбеги, изоҳ!

Қушбеги изоҳ берди:

— Мен хонни Тошкандан жўнатиш олдида унинг холи вақтини топиб, бу фикримни бир даража арз қилиб ўткан эдим, — деди, — бу фикрим хонга жуда маъқул тушкан бўлса керак, сўзимни ўтибор билан тинглаб турди ва жавобида: "Яхши. Ўйлашиб, тадбирлари билан менга фикрингизни ёзинг, мен ҳам ўйлаб кўрарман" деди. Менга қолса бу тўғрида биздан хабар кутиб хоннинг ўйқуси ҳам келмай ётқандир: бизга фақат ишнинг ўнақайини топиб хондан тасдиқ этдиришгина қолған.

— Хон тайёр экан бўлмаса, — деди кулимсираб Қамбар шарбатдор.

— Тайёр экан, тайёр экан!

Шундан кейин ишнинг ўнақайин тўғрисида музокара ва мубоҳаса бошланди. Ҳар ким бир турлик фикр баён қилиб, узоқ бош оғритдилар ва натижада хонга қийидаги нома ёзилди:

"Тождори мусулмонон, хоқон ибни хоқон шаҳиншоҳи навжувон, тожи сари хушбахтон ҳузури ҳумоюн олийларига арзи ўбудият<sup>1</sup> адҳисидин сўнгра биз фақирул-ҳақиқар садоқатпешаши беназир қулларидан арзи бандалик шулдур-ким, навкарлари доимул авқот<sup>2</sup> ул жанобга қипчоқ ҳа-

<sup>1</sup> Убудият — бандалик, қуллик.

<sup>2</sup> Доимул-авқот — ҳамма вақт.

лойиқи бепархезидин бирар осиби<sup>1</sup> етарму деб ҳаросида-дирмиз.<sup>2</sup> Ва яна ул ҳаромзода саҳройиларнинг рўйи заминдин<sup>3</sup> тарошламай туриб, ул жаноби олийнинг таъмини амниятлари<sup>5</sup> ҳам биз қулларича кўб хавфу ҳатар остида бўлғандек тахмин қилинадир. Шул мулоҳаза ва андишалар баъдида биз Тошканд қулларидин бир нечаларимиз бир ерга жамъ бўшишиб дуру-дароз<sup>6</sup> тафаккур ва таҳайюрлар<sup>7</sup> сўнгфида азбаройи ул шаҳаншоҳининг кўб замонлар бошимизга соябон бўлмоқлари умидида бар тақдир ул тоҷдорнинг хотири дарё муқотирлариға<sup>8</sup> писанд тушиб ижобат оғоз<sup>9</sup> қылсалар, бир маънини хўб ва садоқат мақосидига<sup>10</sup> маҳбуб<sup>11</sup> деб билдиқ. Андоғку, ул ҳалоийиқи ғассобларни<sup>12</sup> ўн беш синни солидин болиг<sup>13</sup> ва етмиш ёшидин қуян ҳар бир эркак зотини билотараҳум<sup>14</sup> қатли ом<sup>15</sup> қулларича сазовордир ва ишо ул муртаддин<sup>16</sup> бадтар жобир<sup>17</sup> ва бехирадлардин<sup>18</sup> жаноби тоҷдорга ҳаррўз балки ҳар соат хавф бордир. Аммо бул тақрирни<sup>19</sup> ўшал музайян қатли ом соати етмагунча ҳар бир бехирад ва боғий бўлмоғи яқин мажҳул одамлардин пўшида<sup>20</sup> тутилмоғи маржудир. Ва лекин ул тоҷдор бир соати саъиди музafferарни муайян айлаб қаламравларидағи<sup>21</sup> барча шаҳар ва кўйлар, қишлоқ ва кентларнинг садоқати зоҳир ва қалби тоҳир<sup>22</sup> қуллариға махфий номалар кўндириб, сакбачаларнинг қатли омиға амри олийларини дариг

1 Осиб — зиён, зарар, кулфат.

2 Ҳарос — қўркув.

3 Рўйи замин — ер юзи.

4 Тарошламоқ — тозаламоқ.

5 Амният — тинчлик, омонлик.

6 Дуру-дароз — узундан-узок.

7 Таҳайюр — ҳайратланиш.

8 Муқотир — қатра, томчи.

9 Оғоз — бошланниш, киришиш, ибтидо.

10 Мақосид — мақсаллар, мудъаолар.

11 Маҳбуб — дўст.

12 Ғассоб — зулмкор, босқинчи.

13 Ўн беш синни солидин болиг — ўн беш ёшдан юқори.

14 Билотараҳум — бераҳм, шафқатсиз.

15 Қатли ом — қиритин.

16 Муртад — диндан қайтган.

17 Жобир — жабр қилувчи, золим.

18 Бехирад — ақлсиз, идроксиз.

19 Тақрир — қарор.

20 Пўшида — яширин, махфий.

21 Қаламрав — мулк, қўл остидағи ерлар.

22 Тоҳир — покиза, пок.

тұтмағайлар.<sup>1</sup> Аммо ҳұқанди фирмавс монанднинг<sup>2</sup> ўзіда ул шақоватпешалар<sup>3</sup> беҳад ва беҳисоб нұфуска молик бұлғанлари важқидин биз Тошканд навкарларининг иъонати<sup>4</sup> бешакку шубҳа вожибdir. Сиз шақаншаохи, ўшал соати музafferарни таъйин айлаб, биз қулларыға хабар юборсалар, бунда лозим бұлған одамимизни қолдириб ва яна ҳар қаюсимиға тегишилик бир юз, иккі юз ва беш юз ийгитимизни олиб, ҳалойиқ күзіда гүё жаноби тождорнинг Мұсулманқулы фалокатидин озодлиқға чиқиб мұстақил соғиби тоғ бұлғанларини муборакбод құлмоқ учун юрган бўлиб, иъонатларига етармиз ва дарбозадин киришимиз он фажъатан ул галаи сакларга<sup>5</sup> ҳужум бошлаб, қатли омга қилич тортармиз. Ва яна маҳфий қолмәғайким, Тошкандинг алҳол беклик мансабида ўлтурғучи қипчоқ Нормұхаммад борасида қандоғ фармон берғайлар, бул маънида ҳам ишоратини дариг тұтмасалар қулларини андишадин озод құлған бўлғайлар. Ушбу болода<sup>6</sup> мазкур маҳзи<sup>7</sup> самараи садоқат ақли қосирларимиз ҳүсули натижасини биз қулларыға ушбу номанинг қосиди<sup>8</sup> қўлидин савоб ва хато, рад ва ижобат, писанд ва нописанд жавобини ирсол<sup>9</sup> құлсалар ва яна ўз фикри босавобларини изофа<sup>10</sup> қилиб, құсур ва хатоларимизни танбеҳ этсалар, биз нақари бежавҳар<sup>11</sup> ва босадоқати бефаросатларни дунё-дунё шоду хуррам қилиб, ул соябони марҳамат ва меҳрибони бошафқатнинг хизматларига камари хизматни берк<sup>12</sup> боғлатқан бўлур эдилар, ҳуваллохул-мустаъин.<sup>13</sup>

<sup>1</sup> Дариг тұтмоқ — аямоқ.

<sup>2</sup> Фирдавс монанд — жаинатсифат.

<sup>3</sup> Шақоватпеша — күлфат келтирувчи.

<sup>4</sup> Иъонат — ёрдам, құмак.

<sup>5</sup> Сак — ит.

<sup>6</sup> Боло — юқори.

<sup>7</sup> Маҳз — холис, соф, тоза; фақат.

<sup>8</sup> Қосид — элчи, хабарчи.

<sup>9</sup> Ирсол — юбориш, етказиш.

<sup>10</sup> Изофа — қўшимча.

<sup>11</sup> Бежавҳар — зоти паст, насабсиз.

<sup>12</sup> Берк — маҳкам, қаттиқ.

<sup>13</sup> Ҳувал-лохул-мустаъин — Оллоҳ құмак берувчидир.

*Садоқатингиз мажлисига жамъ бўлғучи навкарларингиз (имзолар)".*

Бу нома эртаси кун хонга юбориладирған бўлиб, бунга маҳсус киши белгуланди. Мажлиснинг қўрқунчи Юсуфек ҳожидан бўлғани учун унга сохита қарорни эшитдирмак тўғрисиға Муҳаммад Ниёз қушбегининг ўзи бевосита мажлисдан чиқиб кетди. Шунинг ила бу мажлис тарқалди.

## 2. ҚОРОНГИ КУНЛАР

Отабек Марғилондан қайтиб келгандан кейин ўн беш кунлар ўтказиб уста Алимдан бир хат олған эди. Уста Алим хатида қутидорға учрашқанини ҳамма майдачида-ларигача ёзиб келиб айтар эди: "Сиз хиёнатни пайқағунча қайнотангизга қандоғ кина сақлаб келган бўлсангиз, ул ҳам сизга ўшандоғ киналик экан. Мени ва оиласми таҳқири этди деб, бу ҳақоратни умр бўйи унута олмаслигини тушиниб, ўт ичидар юрап экан. Мендан ҳақиқати ҳолни онглаб жуда шошиб қолди, ҳатто ҳуши бошидан учди. Ичкаридан аниқ маълумот бера олмасам ҳам, аммо уларнинг ҳам қайнотангиз ҳолига тушканларини мулоҳаза қилдим. Қайнотангиз сизнинг ўткан ҳолингизнинг оғирлиғини тасавур қилаолмаганидек, душманларингизга берган жавобингизни тақдир этиш учун ҳам сўз тополмас эди. Ҳар ҳолда орангиздағи кинанинг душманингиз билан бирга супирилғанида шубҳа йўқ".

Мактубнинг яна бир ўрнида: "Сизнинг қаерда бўлғанлиғингизни сўраған эди, мен билганимни айтдим. Келармикин деган эди, бунга ҳам ўзингизнинг ўшал муҳмал жавобингизни бердим. Фикримча, қиша бўлмаганда ҳам, кўкламга чиқиб ўзлари Тошканд тушарлар, деб ўйлайман".

Хатнинг охирида: "Сиздан бир кун сўнг Ҳомид ўлди. Ҳайтовору бир оғиз сўзсиз тўнғуз қўпидир. Мен ўлар чогида ҳам сизга бир туҳмат тўқирми, деб қўрққан эдим. Қутидорға ҳеч бир жарима ортмабдирлар. Мақтулларнинг эгалари ҳеч кимни тутиб кўрсатолмаганлари учун маҳкамалар ҳам ишни текширмай қўйдилар. Ўйлашимча, ҳеч ким билмаганда ҳам сирни ўлган Содиқнинг онаси билса керак эди. Аммо унинг ҳам дами ичидар, сўрағанларға худодон кўрдим, деб жавоб берар эмиш. Бул хотиннинг қўлидан ҳар бир иш келадир деб ўйлаб, ўткан кун қайнотангизга айтдим: бегана хотинни уйингизга

йўлатмасинлар ва четдан келган таомни емасинлар деб. Ҳар ҳолда ёмондан хазар лозимдир", деб ёзар эди.

Бу хатдан кейин Марғилондан тиқ эткан хабар бўлмади ва орадан икки ойлаб фурсат ўтиб кетди. Шунинг учун Отабекнинг кунлари қуёш ботиб чиқган сайн бир онглашилмовчилиқга, қоронгулиқга кира бориб, ҳар соат аччиғ ва ё сучуклиги номаълум бир ҳол кечириб бошлади. Баъзи кезларда ул умид қучогига шошиб қолар эди ва иккинчи вақтда ярамас — қора хаёллар билан энтикар эди.

Умидланган кезларда:

— Ой туйнукдан тубанроқда, бу кун бўлмаса эрта — чиммати қўлида, паранжиси устида, сарифми, қорами атлас кўйнаги эгнида дарбозадан кириб келгандек ва ўпкалагандек...

Иккинчи бир вақтда кимнингдир қуийидағи гапини эшитар эди:

— Ул ўзининг душманларини ўлдириш учунгина Марғилонға қатнаб юрган экан, ҳисобини тугатди-да, бедарак кетди, қолди. Тузукроқ жойи чиқса бериб қолайлиқ Кумушни... умри ҳам ўтиб борадир.

Ана шу қора хаёл уни чиндан ёниб турған бир ўт ичига ташлар ва шу чоқ ўзини мувохазага<sup>1</sup> бошлар эди: "Мен нега икки йил сарсон бўлиб юрдим-да, бу сарсонлиқнинг натижасига бориб чиқғанда шундай аҳмоқлиққа тушдим?" дер ва Марғилон йўлини кўзлар эди. Аммо энди унга Марғилон бориш ўнақайи сира келмас: "Мен нега келдим-да, энди нега бораман ва нима деб бораман? — Қизингизни Тошканд олиб тушарсиз деб кеткан эдим... Сиз олиб туша бермаганингиздан кейин ўзим қайтиб келдим деяйми?" Отабек мана шундай чучмал азоблар ичida кейинги кунларини кечира бошлади.

Ой тўлмасдан Марғилон қатнаб турғучи ўғлини энди уч ойлаб қўзғалмай қолиши учун Ўзбек ойим эскича яна қувониб кетди. "Кейинги қилдирған иссиғ-совугим кор қилди шекиллик, биратўласиға Марғилонни тилига олмаёқ қўйди. Энди хотинига исиб, меҳмонхонада ётишни ҳам барҳам берса... ҳар нучукда дуодан қолмайлиқ" деб Зайнабни домланикига қистар эди.

<sup>1</sup> Мувохаза — койиш.

Отабек кейинги вақтларда савдога юришни тарк қилиб қўйғани учун Ҳасанали ишсиз қолған, узун кун уйда бекор зерикканликдан ҳожига айтиб бир мунча дастмоя билан гузардан баққоллиқ дўкони очқан эди. Отабек кўпинча меҳмонхонасидаги кутубхонадан уни-буни ўқуб ўлтурас, ўқушдан зериккан кезларида Ҳасаналининг дўконига чиқар ва гузардан ҳам зериккандан кейин боши оғқан ёқларга, Салор бўйларигача кетар ва тоғи Чуқур қишлоқ томонлариға ҳам тушар эди. Аммо тушкан билан бурунгича ичмас, икки-уч, ортиб кетканда тўрт оёқ<sup>1</sup> ила кифояланар, кўз-ўнглари оз-оз жимирлашкан, турлик хаёллари бир мунча тарқалған ҳолда қайтар ва лекин Ҳасанали ҳам унинг бу кайфини жуда сийрак сеза олур эди.

Ўткан кун Чуқур қишлоққа тушкан эди. Аср вақтларида қайтиб гузарга келди-да, хаёлат билан Ҳасанали дўконига ўлтурди. Отлиқ, яёв ўткинчилар тўрт томонга қатнаб турадирлар, унинг бу кунги кайфи ўтасчароқ кеткан бўлса керак, уларни гира-шира кўзга илгандек қарайдир.

Ҳасанали бир-икки уни кузаткандан кейин сўради:

— Марғилонга нега кетмай юрибсиз?

Бу саводдан унинг кайфи тарқалғандек бўлиб, кўзлари мошдек очилди.

— Ҳавсала йўқ...

— Қайнин отангиз кўнса, кўчингизни олиб келсангиз ҳам маъқул эди қатнаб юргандан...

— Қайдам...

Илгари шундай савол чоғларида ўзининг ёлғон жавобларидан жуда хафаланар, Ҳасаналига ўткан гапларни бирин-бирин айтиб бергуси ва "маним уйланишимга сен сабаб бўлған эдинг, энди уни мендан ажратдилар" деб ундан ўз дардига даво истагуси келар эди. Ҳозир ўзида хафалик, ўнгтайсизлиқ сезмаган бўлса ҳам бошига "ўзим боролмасам-да, Ҳасаналини юборишм ва кезини топиб ўткан гапларни отага ҳикоя қилишим керак эди", деган фикр келди. Бора-бора бу фикр унинг бошига жиддий ўринлашиб олди, шу тўғрида чинлаб ўйлаб кетиб кайфи ҳам тарқалаётди. Дўконни ёпиб, Ҳасанали билан бирга

<sup>1</sup> Оёқ — катта пиёла.

кетди — йўлда, мөҳмонхонада бирга ўлтуриб ош еди, дастурхон устида унинг ўйлагани фақат шу бўлиб қолди. Бироқ бу фикр қарор тусига кириб кета олмади, дақиқа сайнин тарқалиб борған кайфидек турлик монеъларга учрай бошлади:

— Ҳали Марғилонда ишлар қалайкин? Улар яна айнаб қолмаганмикинлар? Марғилондан бир нарса пайқамай туриб, кишини овора қилишга арзирмикин?..

Бу кун қуёш очиқ ҳавода кезиши учун жим-жим товланиб, ер юзига кулиб қаради. Икки кундан бери қуёш бетини қоплаб, турлик ерларга жон суви сепиш ила чарчаган баҳор булутлари бурчак-бурчакка тарқалиб борар эдилар. Уяларидан чиқиши биланоқ чумчуклар чирқиллашиб, мучичалар ку-кулашдилар. Анови ар-ар теракка уя қўйишига ўйлаган бир жуфт карруклар ҳам вижир-вижир қилишиб кенгаш очдилар. Подачининг товшини эшитиб, далага ошиқган онасиға эргашиб қашқа бузоқ ҳам мағраб юборди. Модасига тегишканни учун томдаги капитар ҳам бўқогини чиқариб рақибининг теварагида ягрин бера бошлади... Қисқаси бу кун уйғонишданоқ бутун коинотнинг яхши туш кўриб турғанлиги сезилар эди.

Баҳорнинг бу кунги сихирлик куни Отабекни ҳам қитиқлади. Чойини наридан-бери тутагтиб, Ҳасанали кетидан гузарга чиқди. Ул гузарга чиқғанда Ҳасаналининг қўшниси бўлған Али эринибкина дўкон тахтасини туширмакда эди. Отабекни кўриш билан дўкон очишни тўхтатди:

— Бу кун бўшмисиз, бек ака?

— Бўшман?

— Бўш бўлсангиз, Минг ўрукка<sup>1</sup> — қимизга борар эдик, — деди Али. — Тўла қозоқ бияларини яйлоққа солибдир.

— Дўйконингиз-чи?

Али туширган тахтасини қайтадан жойига қўяберди:

— Дунёнинг иши битар эмишми, бек ака. Хўб десангиз, дўйконни ёпаман.

Отабек ярқираб чиқиб келган қуёшга қаради:

— Ёпинг бўлмаса, — деди.

<sup>1</sup> Минг ўрук — Янги шаҳарнинг бу кунги таҳта бозор ва қўй бозор ўриниларидир (муал.). Ҳозирги Олой бозоридан Юнусободгача бўлган мавзе.

Отабек Ҳасаналининг дўкони воситасида Али билан яқинда танишқан эди. Ул ичи кирсиз, серкулки, очиқгина бир йигит бўлиб, бек билан гўё кўб йиллардан бери бўлған танишларча муомала қиласа эди.

Бекга бу тасодуф жуда қулай келди. Чунки уйдан чиқишиданоқ унинг қасди бу кунни далада ўткизмак эди. Эт олдилар-да, яёвлашиб Минг ўрукка кетдилар.

"Минг ўрук" мавзиты отидан ҳам маълум, бунда минг чоғлиқ ўрук дарахти ўсқан учун бўлиб, Шиблининг сувидан бошлаб то Салор ариғигача қатор-қатор ўруклар эди. Салорнинг нариги ёги нийдек қир, эндигина кўм-кўк ўт гилами униб чиқған эди. Минг ўрукнинг этаги бўлған Салор бўйида уч-тўртта қозоқ ўтовлари тикилган эдилар. Иккиси Салор бўйига стиб, Тўла қозоқнинг келинчагига этни шўрва қилиш учун бердилар.

Али ўтовдан кийиз олиб, Салор бўйига ёзди. Келинчак ёстиқ, кўрпача ташлаб берди, Отабек ҳордиқ чиқариб ясланди.

Қуёш озорсизгина қиздиради эди. Енгилчагина эскан шамол димоғқа турлик ўлан исларини келтуриб ураган эди. Бир неча қалдирғоч Салорнинг оқиши бўйлаб учар ва учкан кўйи "валфажри" ўқур эдилар.<sup>1</sup> Поёнсиз қирнинг юқори-қуйи ўринлари якранг кўкат ва кўз илғамайдирған узоқлиқлари туманлангансумон кўриниш берар эдилар. Қушлар, қуртлар сайраши табиъий бир соҳа хизматини ўтаб кишига ифодаси қийин бўлған бир сезги солар эдилар.

Отабек табиъатнинг шу кўркам ва латиф кўринишига мафтун бўлиб, бир оз ётқандан кейин "ул ҳам бўлса эди", деб ўйлади ва узоқ тин олиб қўйди.

Бу куннинг кўркамлигидан олған таассуротини Али ичига сиғдиролмади:

— Зап яхши кунми! — деди.

Отабек ҳам шу гўзалликни ўзига татитмай турған дардидан шикоятланди:

— Шундай кунларда каму кўстинг бўлмаса...

— Сизнинг ҳам кам-кўстингиз борми? — деб Али кулимсиради.

<sup>1</sup> Авом эътиқодича (муал.). Қуръонда Фажр сураси (фажр — субҳ, тонг ёргулиги) тонг билан қасамёд этаман сўзи билан бошланиб фижр-р-р сўзи билан тугагани учун ҳалқда қалдирғочнинг сайрогини шунга ўхшатиб "валфажри"ни ўқиуди, дейдилар.

— Йўқ, деб ўйлайсизми?

— Ҳаммада бўлғанда ҳам, сизда йўқ деб биламан.

— Масалан?

— Масаланми, — деди кулиб Али, — сизнинг билан отангизнинг обрўси қушбегида ҳам йўқ, давлат тўғрисида бўлса, очиқарлиқ ерда эмассиз... Иккита тўтидек хотинингиз бек акам учун сочини тараф ўлтурадир... тагин қанақа каму кўст?

Кишининг бахтини юзакигина кўриб ҳукм қилгучи Али унга қизиқ кўринди ва кулиб:

— Тўғри айтдингиз! — деди.

Шукур қилиш керак, бек ака, — деди Али ва ўзининг бахтсизлигидан, топқанини рўзгордан ортдиролмай, шу қунгача уйланалмай келишидан ҳасрат қилиб кетди. Отабек унинг ҳасратини диққат билан эшилди, ҳаётнинг зарбаси ҳар кимнинг ўз даражасига қараб ва лекин истисносиз<sup>1</sup> бўлғанлигини тушинди.

— Дунёнинг иши шунаقا экан, мулла Али, — деб уни юпатиб қўйди. Иккиси ҳам бир неча вақт жим қолдилар.

— Марғилонлиқ хотинингиздан болангиз бордир?

— Йўқ...

— Бўлса ҳам турмадими, уйланганингизга анча йил бўлған шекиллик?

— Турмади.

Али Отабекнинг каму кўстини шу боласизлиқдан деб ўйлаған эди:

— Боласизлиқ учун хафа бўлиш керак эмас, ҳали ёшсиз, бек ака!

Отабек жавоб бермади. Корсонда<sup>2</sup> қимиз келди. Бек бир-икки зарангни<sup>3</sup> ичкандан кейин, ясланиб кўкка қараб ётиб олди. Али бор товшини қўйиб ашула қилди:

Қўзларим йўл устида, келмади ёр.

Ушбу кенг дунё қўзимга бўлди тор.

Қай қароқчи олди ёримнинг йўлин,

Мундаги бахтсиз йигит йўл узра зор...

— Қўшилишмайсизми, бек ака?

<sup>1</sup> Истисно — мустасно.

<sup>2</sup> Корсон — ёғочдан ишланган катта товоқ.

<sup>3</sup> Заранг — заранг ёғочидан ўйиб ишланган коса.

— Үзингиз яхши айтасиз, тұхтаманг!  
Али борлық овози ила ҳамма қунарини ишлатиб, ғазал  
тугалгунча ашулани айтиб борди.

— Тузикми, беск ака?

— Яхши ашулачи экансиз!

— Үндөг бүлса, устидан буни ичиб юборинг, — деди  
кулиб, бир заранг қимиз үзатди. Беск қимизни бир сими-  
ришда бўшатди-да, энтикиб узоқ қирға қаради, узоқ қараб  
турди-да, юқоридағи байтни ўқуб оғиз ичидан минғил-  
лади.

Кўзларим йўл устида, келмади ёр,  
Қай қароқчи тўсди ёримнинг йўлини...

— Қўёнга кеткан сипоҳлардан дарак эшитдингизми,  
беск ака?

Отабекнинг хаёли бўлиниб, Алига қаради:

— Эшитмадим.

— Маним акам ҳам кеткан эди... Ой бориб, омон ке-  
лишсунлар-да!

— Акангиз йигитмиди?

— Йўқ, мерган эди. Қўён кетаётқан ўртоқлариға  
қизиқиб, борма деганга кўнмади. Уруш эҳтимоли йўқми,  
шунчаки фотиҳа учун кетишкандирлар-а?

— Ким билсин, — деди бек ва бир оз ўйлаб қолғандан  
кейин, — бўлмас, — деб қўйди.

Корсондаги қимиз тугаб, шўрва ҳам ичилди. Даствур-  
хонни йиғқувчи келинчакка ўғул тилаб дуо қилинғандан  
кейин, қўлига ўттуз чақа сурма пули бердилар ва қирни  
айланиш, бинафша териш учун туриб кетдилар.

### 3. ҚИПЧОҚҚА ҚИРҒИН

Кечки соат тўртларда Қоймос дарбозасидан қайтиб  
шаҳарга кирдилар-да, дарбозадан ўн адим нарида боши  
танидан олинған уч кишининг гавдасига йўлиқдилар. Отабек  
бу ҳолга тушинмади, чунки аҳёнда бир осиладирған  
гуноҳкор Эски намозгоҳдорига элитилар эди. Шунга кўра  
дарбозабонни ҳужрасидан чақириб сўради:

— Булар қандай гуноҳкорлар экан?

Дарбозабон бесни таниб қўл қовиштириди:

— Тақсир, қипчоқлар.

— Гуноҳлари нима экан?

Дарбозабон ётқан гавдаларга қараб олди ва бекнинг яқинига келди:

— Ўзлари биларлар-ку, тақсиримнинг... бегимга айткулуги йўқ...

— Гуноҳлари нима, ахир?

— Ахир қипчоқлар-да, тўрам.

Отабек диккатланди:

— Қипчоқлар эканини билдим, аммо гуноҳлари нима деб сиздан сўраяпман!

Дарбозабон қўл қовиштирганича Отабекка ажабланиб қаради:

— Аниқ хабарлари йўқми, тақсиримнинг? — деб яна сўради.

— Йўқ!

— Вой-боёв тақсир, бу кун эрталабдан бери кўринган қипчоқни сўйиб юрдилар-ку. Гуноҳлари суриштирилмади, тақсир, — деди ва ўлукларнинг ёнига юриб келиб изоқ берди, — мановисини уйидан олиб чиқиб сўйдилар, мановиси маним ёнимда турган дарбозабон эди — раҳматлик. Мановисини танимайман ва лескин ўзи қипчоқ бўлса керак...

Отабек даҳшатланиб ёнидаги Алига қаради, Али эса ётқан жонсиз гавдаларга қараб лабини тишлаб турар эди.

— Кимлар ўлдирди? — деб Отабек даҳшат ичидан дарбозондан сўради.

— Бу ерга келгучилар йигирма чоғлиқ эдилар, ўзимизнинг Тошканд йигитларидан ҳам бор, қўйконлиқлар ҳам кўриндилар. Ўзлари ҳам қипчоқни қидирабериб ҳамма ёқни тозаям ғалвир қилиб юбордилар-да, тақсир... Қўйконга кеткан бекларданми, хонданми, ишқилиб, шунаقا буйруқ кепти-да, тақсир... Бизлар хизматкор одам — нимани билайлик тўрам!

Отабек масалага тушингандек бўлди ва даҳшат ичидан Али билан йўлга тушди. Ўттуз қадам босмай тағин икки ўлукка учрадилар. Ўн адимда яна бир жонсиз гавда...

Энди Али сўрамай чидамади:

— Наузанбилоҳ<sup>1</sup>, бу нима деган гап, бек ака?!

— Сўраманг!

— Йўғ-а, — деди Али, — ахир ҳаммаси ҳам гуноҳкормикин?

<sup>1</sup> Наузанбилоҳ — худо сақласин.

— Гуноҳкор!.. — деб заҳарханда қилди бек, — Мусулмонқулун биларсиз, албатта?

— Нега билмай, икки ой илгари қочигини ҳам кўрдим...

— Билсангиз, — деди бек, — буларнинг ҳаммаси ўшанинг гуноҳига ўлдирилган ўхшайдир!

— Шу ҳам гапми, худоё тавба!

Адим сайин бир ўлукка учрар эдилар. Али санаб келар эди, гузарга етканда саноқ стмишдан ортди. Ҳали бу биргина тўғри кўччанинг ҳисоби бўлиб, кенг Тошкандинг ўзга кўчаларини ҳам ҳисобга олганда фажиъ бир адад ташкил этиши маълум. Гузарнинг ичига кирганда қатор чизилган қирқ ҷоғлиқ ўлукларни кўрдилар...

Кун асрдан оғиб шомга яқин, шунинг учун гузардаги дўконлардан очуғи уч-тўртта, жумладан Ҳасанали ҳам ярим очиқ дўкони олдида ўлтурап эди.

— Соғ келдингизми, бек! Биз бу ерда юз хил васвасага тушиб ташвиш тортдиқ, — деди Ҳасанали.

Отабек бошқа хаёлда эди. Ҳасаналининг сўзини гўё эшитмагандек сўради:

— Бу кун дадам қасерда эди?

— Сиздан кейин ўрдага кеткан эдилар. Бир соатдан кейин шошқаннамо қайтиб келдилар-да, сизни сўрадилар, шундан сўнг қаёққа кетканларини билалмадим.

— Қачондан бошлаб қипчоқни сўйдилар?

— Отангизни келиши биланоқ, — деди Ҳасанали ва энтикиб фожиъани ҳикоя килди. — Эй... бек, раҳмисизлик бунақа бўлар экан... Худда қиёмат бўлди! Бечоралар нима гуноҳ қилдиларикин? Уйида ҳалол касбини қилиб ўлтурғанларгача тутиб сўйдилар... Эй бечоралар, қандай гуноҳлари бор экан?! Йигитлар тутиб келтуриб турадир, жаллод бош кесиб борадир. Бу ногаҳоний қазодан эслари чиқиб кеткан бечоралар йиғлашадирлар... Айниқса бир бўёғчи... худда хум ёнидан тутиб келгандар — қўли бўёқ... Эй худо, мен нима гуноҳ қилдим, деб йиғлайдир... Чидаб бўлмади, дўконни ёпиб қочдим, кўблар ҳам қочдилар... тагин бир...

— Бас, — деди Отабек, Ҳасанали ҳикоядан тўхтади, чунки бекнинг юраги эзилиб оқиш даражасига етиб, Али Отабек билан хайрлашмасданоқ қочкан эди...

Уйга бориб кечки ошни ҳам емади ва отасига ҳам учрашмади, гўё шу йиртқичлар дунёсидан яширинғандек оқ кундаёқ тўшагига ётиб, кўрпасига бурканиб олди.

Унинг бу ҳолига уй ичи тушинганлари учун, нима қилди, деб сўрамадилар ва ёнига ҳам келмадилар...

Юсуфбек ҳожи эрталаб чойни Отабек билан бирга ичиш учун меқмонхонага чиқди. Отабек терсайганча келиб чойға ўлтурди, отасига салом ҳам бермади. Чунки ул ўз отасини қипчоқ қирғинининг бош омилларидан деб қарор қўйган эди. Чой яримлай ёзди. Орадан чурқ эткан сўз чиқмади.

Ниҳоят ўғлига енгиллик бериш ниятида ҳожи тилга келди:

— Ҳафа бўлма, ўғлим.

— Сизларга ўхшаб, — деди истеҳзоланиб, — қувонайми?

Ҳожи ўғлининг қандоғ фикрда ва нима учун терсайганини билди.

— Янглишасан, ўғлим.

— Ражаббекникидаги мажлисда, — деди заҳарханда билан, — бу йиртқичлиқнинг режачиси ким эди?..

Ҳожи энтиқди ва:

— Ражаббекникида бўлган мажлисни сен биласанми?.. — деб сўради.

— Биламан.

— Билсанг, — деди ҳожи, — маним устимга мундоғ туҳмат ортишдан уял, бола!

— Ражаббекникида бу кенгаш бўлмаганмиди?

— Бўлған эди.

— Бўлған бўлса, тагин нега ўзингизни қуруқقا оласиз?

Юсуфбек ҳожи боладан кулгандек қилиб илжайди.

— Баъзи енгил муҳокамаларинг онангницидан қолишмайдир, Отабек, — деди. — Мажлисдан хабаринг бўлған бўлса, ким қайси фикрда қолғанини ҳам биларсан?

— Йўқ.

— Мажлисда нимадан баҳс қилинганини-чи?

— Мажлисда нима музокараси бўлганини ҳам билмайман ва лекин ўша мажлис фақат қипчоқларға қатли ом учун йигилған экан, деб кеча ишондим. Мажлисингиз аъзоларининг сиздан бошқаси нега йигит тўплаб Қўқонга кетдилар ва улар Қўқонға етмаслариданоқ нега бу вақшат бошланди?

— Бу муҳокаманг тўғри. Аммо отангни ҳам шу жони-ворлар орасига қўшиб ўлтуришинг қисқалиғингдир, — деди. Кўзига ёш олди.

— Ўзинг ўйлаб кўр ўғлим, ўз қўлими билан ўзимизникини кесишимиздан мамлакат учун қандай фойда бор? Башарти мен бу ваҳшатка иштирок қилган бўлсан, қайси ақл ва қандай манфаатни кузатиб қўшилишқан бўламан? Агарда маним юрт сўрамоқча ва шу восита билан бойлик ортдирмоқча орзум бўлса, бошқалардан ҳам кўра ўз ўғлимга — сенга маълум бўлмасмиди? Нега ҳар бир нарсага еткан ақлинг шунга қолганда оқсайдир? Нега ёнған юракимга яна сен ҳам заҳар сочасан?!

Титралиб ва тўлқунланиб айтилган бу сўзлар Отабекни ўқинтириди, ўлганнинг устига чиқиб тепиш қабилидан бўлған ўз ҳужумининг ҳақсиз эканига тушинди.

Юсуфбек ҳожи битта-битта ётиги билан мажлис ҳақида баён қилиб, ўзининг қарши тушканини ва уларга уқдира олмагандан кейин, мажлисни ташлаб чиқиб кетканини сўзлаб келиб деди:

— Бирар соатлардан сўнг орқамдан Ниёз қушбеги келиб мендан афу сўради ва мажлиснинг у фикрдан қайтқанини, ўзларининг хатога кетканларини айтди. Мен курсанд бўлиб, бу ишнинг зарарини яна исбот қилиб чиқдим. Ниёз мен билан хайрлашар чогида: "Жон ҳожи ака, энди гап шу ерда қолсин, битта-яримта эшиткунде бўлса, биз ерга қааралиқ бўлмайлиқ, ўлтуришнинг катта илтимоси сиздан — шул", деди. Мен бу иблисона алдовга учиб, бу тўғрида на сенга ва на Нормуҳаммад қушбегига оғиз очмадим ва уларнинг Қўқонға фотиҳа учун қўзғалишларидан ҳам ҳеч бир шубҳаланмадим... Эҳ, шайтонлар!

Ҳожи бир оз тўхтаб давом этди:

— Кеча эрталаб ўрдага борған эдим. Саҳн юзида учтўрт юз мусаллаҳ<sup>1</sup> йигитларни биравни куткан ҳолда кўрдим ва илтифотсиз қушбеги маҳкамасига кирдим. Кирсам, Қўқонға кеткан Қаюм понсад уч-тўртта йигити билан қушбегининг қаршисида турибдир. Қушбеги қўлида бир қоғоз ушлаб, гўё эс-ҳушидан айрилған каби қотиб ўлтурибдир. Мени эшиқдан кўриб, сўзсиз-насиз қўлидаги қоғозни менга чўзди ва бошини тебратиб қўйди. Мен бир нарсага ҳам тушинмаган ҳолда бориб қоғозни олдим... Ўқудим-ўқудим-да, маним ҳам ҳушим бошимдан учиб, қушбеги ҳолига тушдим. Бу қоғоз хоннинг ёрлиги эди ва бунда тахминан шундай гаплар бор эди:

<sup>1</sup> *Musallaҳ* — қуроллаңган.

"Биз Туркистон мамлакатининг хони ўз қаламравимиз ва салтанатимиз учун қипчоқ тойифасини музир деб билдиқ. Бу янглиғ ҳукмимизни ўз қаламравимизда бўлған барча бекларимизга, ҳоким ва қўрбоши ва даҳбошиларимизга билдириб буюрамизким, ушбу фармонимизни олған он дарҳол ўн беш ёшдан то етмиш ёшғача бўлған қипчоқ эр зотини қиличдан кечиргайлар ва ҳеч бир силла раҳмни восита қулмагайлар. Ушбу ҳукмимизни ерига еткузишда сустлик қилған мансабдор бизга итоатдан бош тортқан ҳисобланиб, энг қаттиғ жазомизга маҳкум қилинур. Бу ҳукмимизни ижро эткучи Тошканд ҳокими Нормуҳаммад қушбегига марҳамати шоҳонамиз шудоруким, гарчи сизнинг қипчоқ қавмиға мансубиятингиз бўлса ҳам, Мусулмонқулини ҳайдашда бизга унумиласлиқ ҳайриҳоҳлиқлар ва хизматлар кўрсатдингиз, биноан алайҳи сиз бу жазодан маъфудирсиз<sup>1</sup> ва садоқатингизди боқий қолиб амризни ижро этишингизда шубҳа қиласаймиз!"

— Қушбегига қарадим, ул ҳам маним оғзимга қараб турар эди. "Буйруқни қачон олдингиз?" деб сўрадим. Ул жавоб ўрнига Қаюм понсадга имлади.

— Мен олиб келдим," — деди Қаюм понсад.

— Сиз Қўқондан олиб келдингизми?" — деб сўрадим. Чунки сен айткандек беш-олти кунда Қўқонга бориб-келиш сира ақлға сиғмас эди.

— Биз беклар билан Қўқон йўлида эдик", — деди Қаюм, "— йўл устида хондан ушбу ғерлиқ келиб қолди. Ниёз қушбеги менга йигит қўшиб бу ҳукмномани ижро қилишда бекка ёрдам бермак учун жўнатди".

Бу сўз менга ҳамма шайтанатни очиб берди ва ўзимнинг иблислар томонидан алданғанимни билдим:

— Эртадан бошлаб ҳукмни ижро қилсақ қалай бўларикин?" — деб қушбегига қарадим.

— Мен ҳам шуни ўйлаб туриб эдим..." — деди қушбеги ва Қаюмга қаради.

Қаюмнинг устодлари ишни кейинга силташимизни илгаридан кўриб қўйған эканлар:

— Эртага қўйиб бўлмас." — деди Қаюм..

— Hera?", — дедим.

— Негаки эртагача қипчоқлар қочиб битадирлар".

<sup>1</sup> Маъфу — афв этилган, кечирилган

Мен Қаюмнинг сўзига қулоқ солмадим-да, қушбегидан эртанинг кенгашини сўраган бўлдим. Бу ҳолдан ач-чиғланган Қаюм ёнимга келиб ўлтурди.

" — Овора бўлмангиз, ҳожи ака", — деди.

Унинг бу ҳаракатидан аччиғим қистади:

" — Сизнинг билан маним бу ишқа аралашмоққа ҳаққимиз йўқ!" — дедим.

" — Сизники бўлмаса тўғри, аммо менини бор!" — деди Қаюм.

" — Буйруқ кимнинг отига?" — дедим.

" — Қушбесгининг!"

" — Бас, сиз билан мен фақат у ёрдам сўрағандагина кетман кўтарамиз, бошқа дахлимиз йўқ!" дедим.

Қаюм заҳарханда билан ёнини кавлаб иккинчи бир буйруқ чиқарди ва менга бериб: "Ўқунгиз!" — деди. Ўқудим.

" — Бас, биринчи буйруқни сиз олган экансиз, нега яна қушбегидан фотиҳа кутиб ўлтурибсиз?!" — дедим ўт ичидা.

" — Ҳар нарса бўлғанда ҳам улугимиз, деб сийлаб турған эдим..." — деди Қаюм.

" — Эгасини сийлаган итига сүяқ ташлар, қилмоқчисизда, баракалла!" — дедим. " — Борингиз, устодларингизнинг васиятини бажарингиз!"

" — Хафа бўлмангиз, ҳожи ака!" — деди Қаюм ва қўйлимдан қоғозни олиб қушбегидан сўради: " — Нима дейсиз энди, бес?"

" — Маним кенгашимга кирсангиз, эртадан бошлайлиқ!" — деди Қушбеги.

" — Сира иложи йўқ, қушбеги! Чунки барча шаҳар ва кўйларга ҳам фиқат шу — бу кунга, деб буюрган экан!" — деди Қаюм.

Қушбеги билан мен гўё тоғ остида босириқ бўлған эдик. Бошимизга ҳеч бир гап келмас эди. Қаюм ўрнидан турған ҳолда қушбегидан жавоб кутар эди. Қушбеги қўб фурсат қотиб ўлтурғандан кейин, Қаюмга қўли билан чиқишига ишорат қилиб: " — Билганингизни қиласерингиз", — деди. Қаюм ёнидағи йигитлари билан маҳкамадан чиқди. Унинг чиқиши билан қушбегига дедим:

" — Энди нима қиласмиш?"

" — Нима қиласар эдик?"

" — Ахир қараб қолаберамизми, вақт танг! Қаршиға биз ҳам йигит чиқарайлиқ!"

" — Қўяберингиз, ҳожи!"

" — Бечора гуноҳсизлар кесилаберсингларми?"

" — Кесилаберсинглар!" — деди қушбеги. Мен изтироб ичида унга тушинолмай қолған әдим. Ул йиғи ичида тиңға келди:

" — Мамлакатнинг тинчлиги қипчоқларни кесиш билан ҳосил бўлса — майли, кессинглар! — Юртнинг ободлиги гуноҳсиз қипчоқнинг қизил қонига қараб қолған бўлса — майли, ўлдирсинглар! Агарда најжотимиз қипчоқ тухумини қуритишда бўлса — мени ҳам оссинлар! Бу палидларнинг марҳаматига мен ҳам муҳтоҷ эмасман!"

Ҳозир иноднинг<sup>1</sup> ўрни эмаслигини ҳарчанд уқдирмоқчи бўлдим, кўнмади. Ноилож, ёлғиз ўзим чиқиб қўлимдан келганча қипчоқларни қочиришга ҳаракат қилдим, теваракка кишилар йўлладим. Аммо тўрт юз жаллоднинг қаршиисига чиқған бир кишининг ўҳдаси албатта бир кишича эди. Муттаҳамлар кўб бечоранинг ёстигини қуритишга муваффақ бўлдилар, — деди ҳожи. — Мана, Отабек, ҳақиқат шул, киши тушинмасдан туриб биравга туҳмат тўқимайдир.

Отабек ўзиниг ўринсиз гапидан уялғаннамо ерга қаради ва бир мунча вақт фикрга кетиб ўлтурғандан сўнг сўради:

— Йиртқичларнинг бу қирғиндан қандай муддаолари ҳосил бўларикин?

— Мақсадлари жуда очиқ, — деди ҳожи, — биттаси мингбоши бўлмоқчи, иккинчиси Нормуҳаммаднинг ўриға минмакчи, учунчиси яна бир шаҳарни ўзига қарам қилмоқчи. Ҳон эрса Мусулмонқулга бўлған адоватини қипчоқни қириб аламдан чиқмоқчи. Менга қолса ўртада шундан бошқа ҳеч гап йўқ, ўғлим, — деди ва бир оз тўхтаб олиб давом этди: — Мен кўб умримни шу юртнинг тинчлиги ва фуқаронинг осойиши учун сарф қилиб, ўзимга азобдан бошқа ҳеч бир қаноат ҳосил қилаолмадим. Иттифоқни не эл эканини билмаган, ёлғиз ўз манфаати шахсияси йўлида бир-бирини еб, ичкан мансабпаст, дунёпаст ва шуҳратпаст муттаҳамлар Туркистон тупроғидан йўқолмай туриб, бизнинг одам бўлишимизга ақлим етмай қолди. Биз шу ҳолда кетадирган, бир-биримизнинг тегимизга сув қуядирған бўлсақ яқиндирки, ўрус истибоди ўзининг ифлос оёғи билан Туркистонимизни булғатар ва

<sup>1</sup> Инод — ўжарлик, қийиқлик.

биз бўлсак ўз қўлими билан келгуси наслимизнинг бўйнига ўрус бўйиндиригини кийдирган бўлармиз. Ўз наслини ўз қўли билан коғир қўлига тутқин қилиб топширгучи — биз кўр ва ақлсиз оталарга худонинг лаънати албатта тушар, ўғлим! Боболарнинг муқаддас гавдаси мадфун<sup>1</sup> Туркистонимизни тўнгузхона қилишга ҳозирланған биз итлар яратгучининг қаҳрига албатта йўлиқармиз! Темур Кўрагон каби доҳийларнинг, Мирзо Бобур каби фотиҳларнинг, Форобий, Улуғбек ва Али Сино каби олимларнинг ўсиб-унган ва нашъу намо қилғанлари бир ўлкани ҳалокат чуқурига қараб судрагучи албатта тангрининг қаҳрига сазовордир, ўғлим! Гуноҳсиз бечораларни бўғизлаб, болаларини ятим, хоналарини вайрон қилгучи золимлар — қуртлар ва қушлар, ердан ўсиб чиқган гиёҳлар қарғишига нишонадир, ўғлим!..

#### 4. ОЙ ЭТАК БИЛАН ЁПИЛМАС

Чой тугалган эди. Отабек фотиҳа ўқуб, ўрнидан қўзғалмоқчи бўлди.

— Турма!

Юсуфбек ҳожи тарафидан берилган амирона бу буйруқ Отабекни қайтадан ўлтуриб қолишга мажбур этди ва отасига "нима хизматингиз бор?" дегандек қилиб қаради. Юсуфбек ҳожи бир сўз демасдан салласини олиб тизасига қўйди, бош қашиниб яна саллани кийди. Дадасининг салла олиб, бош қашиниши кейинидан кўпинча ўзини бир тергав остида кўтар эди. Шунинг учун яна бир мартаба дадасига қараб қўйди.

Чини билан ҳам ҳожининг тусидаги бояги ҳасрат ва қайғу аломатлари йўқолиб, уларнинг жойини шарқ оталиғи вазияти олди.

— Марғилонда нима ишлар қилдинг?

Кутимаган бу саволга Отабек нима деб айтишини билмай қолди. Жавоб ўрнига ҳавли томонга қаранди.

— Сендан сўраяпман, Отабек.

— Сизга хабар бергучи нима ишлар қилганимни ҳам айткандир...

— Жўн одамлар қаторида одам ўлдириб юрдим, дегин?

<sup>1</sup> Мадфун — дағн қилинган.

Отабекнинг юзида кулимсираш билинди.

— Жўн одамлар қаторида эмас, — деди, — мажбурлар қаторида, зўрланғанлар қаторида...

Ҳожи ўғлининг киноясига тушинмади:

— Одам ўлдириш учун сени ким зўрлаб мажбур қилди?

— Ҳали билмайсизми?

— Билмайман, — деди ҳожи, — айтишларига қарағанда, сени ҳеч ким мажбур қилмаган.

— Мени зўрлаған ва мажбур қилған эдилар, дада, — деди заҳарханда билан. — Йўқса, сизнинг ўғлингиз бўлған бир йигитнинг шаънига албатта одам ўлдириш уят ва номусдир.

— Ким сени мажбур қилди, ахир?

— Сиз, онам!

— Эсинг ўзингдами, йигит?

— Ўзимда, — деди ўғул, — сиз ўзингизнинг орзуҳавасингиз йўлида мени мажбур қилдингиз ва душманларимга йўлни катта қилиб очиб бердингиз, мен жониворлиқни хоҳ-ноҳоҳ ишлашка мажбур қолдим!

— Шундоғми, — деди ҳожи ўз гуноҳи ўкулига тушкан ҳолда, — ундоғ бўлса, бизни кечир, ўғлим.

— Сизни гуноҳкор қилишга ва гуноҳингизни кечишкага маним ҳаққим йўқ, дада. Лекин гуноҳсиз бўлатуриб, ҳам яна мувоҳаза остига тушканим учун ўзимни мудофаа қилишга мажбурман...

Ҳожи лабини тишлиб, бошини чайқади:

— Хомсут эмган бандамиз, — деди, — хайр, бу айбнинку бизнинг бўйнимизга қўясан, дарҳақиқат қўйишишга ҳаққинг ҳам бордир... Аммо ораларингга ёмонлар оралаған экан, шунча муддатдан бери нега мени хабардор қилмадинг? Ёки бунда ҳам бирақ сени индамасликка мажбур қилдими?

— Ҳеч ким мажбур қилмади, — деди, — аммо мени шу вартага ташлаған дўстларимдан... кўмак сўраш ҳам маъқул кўринмади...

Ҳожи бошини қуи солди. Ўглининг кейинги сўзи жуда унга таъсир қилған эди... Нима қилсинки, Отабек тўғри гапни айтар эди...

— Биз сени Тошкандан уйлантирсан-да, — деди ниҳоят ҳожи, — катта хотинингдан ажратиш фикрида эмас эдик. Агар сен шу хаёл билан биздан сиррингни яшириб келган бўлсанг, катта аҳмоқлиқ қилибсан, болам.

Отабек дадасининг бу кейинги сўзига қарши ҳеч нарса

демади, гүё ҳамма аламини юқоридағи икки жумла билан чиқарып юборғандек жимгина сомиълик<sup>1</sup> даражасига тушди. Аммо натижаны тезроқ әшитиб олиш учун унинг юраги қайнаган ошдек шопирилар эди.

Ҳожи давом этди:

— Кишининг бошиға бир иш тушканда, даррав биравдан кенгаш ва ёрдам сўрайдир. Ҳатто ота-онасидан ҳам сир сақлаған бир йигитни ўз ўғлум бўлиб чиқғани менга қизиқ кўринадир. Қайин отанг менга бир хат ёзибдир, ўқуб-ўқуб мазмунига тушинолмай ҳайрон бўламан. Ой сайин Марғилон бориб турар эди-ку, деб ўйлайман. Хатни икки-уч қайта ўқуб чиқғандан кейин, билсам ҳақиқат шу эмиш... Мирзакаримнинг ёзганиға қарағанда бир мунча янглишилиқ ундан ҳам ўткан кўринадир ва лекин сенинг болалигинг олдида уники ҳолвадир... Яхшики, бу ақлсизлигинги бошқаларнинг бошиға кўринган... Ўзинг айт, агар менга шу касалингни бир оғиз билдирсанг, мен қайин отангга хат ёзмасми эдим, Ҳасаналини юбориб ҳақиқатни очмасмидим ва бу тақдирда одам ўлдириб юришларга қандай ҳожат қолар эди?

Отабекнинг бошиға бу гапларнинг бир ҳарфи бўлсин ўрнашмас ва ўзи куткан натижага бориб етиш учунгина қийналар эди.

— Шунчалик ишларни қилиб, нега охирда қайин отангга йўлиқмай келдинг?

— Шунга мажбур эдим.

— Марғилонга энди қачон борасан?

Отабек ўйланиб қолди. Чунки бу "қачон бориш" масаласини яхшилаб ешмак керак эди ва уни ешмак ҳам қийин эди, узоқ ўйлагандан кейин:

— Маълум эмас, — деди.

Гарчи бекнинг юраги ҳозир бўлса ҳам Марғилонга қараб учишка тайёр эди. Бироқ, унинг юрагидан ҳам кучлик бўлған яна бир нарса бу "бориш" масаласиничувалтириб "маълум эмас" бир ҳолга қўйған эди.

— Қайин отанг келин болани олиб шу ҳафта ичи ўйлға чиқмоқчи экан, — деди ҳожи, — тарихига қарағанда хатнинг ёзилғаниға ўн кунлаб бор, эҳтимолки, эрта-индин келиб қолсалар, тўрдаги уйни бўшатдириб, полос ёзиш керак эди...

<sup>1</sup> Сомиъ — эшитувчи, тингловчи.

Ул бу гапни эшитар экан борлық, йүқлиқ — ишқилиб алла қандоғ қызиқ бир ҳолат кечирди. Иссиг бир нарса баданига тегиб кеткандек ұрканинб қўйди ва "ниҳоят, эндими?" дегандек қилиб энтиқди. Кўз ўнгидан биравнинг сурати ўтиб сархушланди ва тил билан онглатиб бўлмаслиқ бир соғиниш чидамсизлиги ичидаги ивир-живир ҳолатдан гантиб кўз очди. Кўз очди, бироқ ўзига "нима дейсан?" деб қараб тургучи отасига мувофиқ бир жавоб беришни билмади. Юсуфбек ҳожи эса ўғлининг бу сустликка ўхшаб кўринган ҳолини ёмонга йўйди. Марғилон деган шаҳардан катта ўзини кичик олиб қизи ила келаётқан Мирзакарим акага ўғлининг хўрлиқ келтиришидан чўчиди. Шунга биноан Отабекни эпақага олиш учун унга кулки туюлган бир қанча насиҳатларни чизди:

— Ўғлим, — деди, — сийлағанин сийлаш керак, энди сенга қадрсизланган бўлсалар, аммо бизнинг қошимизда уларнинг қадру-қийматлари юқори, қутидор бўлса кўз очиб кўрган қудамиз, хотининг бўлса бош келинимиз. Агар сен мени отам дейдирган бўлсанг, шуларнинг кўнглини олмоққа тириш. Қайин отангдан мени қувлади, деб кўнглинг олинмасин, чунки у бечора ҳам бир шайтоннинг васвасаси билан бу хатога тушкан. Ҳар ҳолда ҳурматларини бажо келтир, Марғилон деган шаҳардан сенинг юзингни, деб келадирлар.

Отасининг бу сўзлари унинг истиқболи учун яхши таъминотлар берар, гўё мажбурият остида ота насиҳатини қулоқға оладирғандек бўйин эгиб ўлтураср эди.

— Агар уларнинг келиш кунларини аниқ билсак, — деди ҳожи, — сен йўлдан қаршилаб кирап эдинг.

Отабек жавоб бермади.

— Ҳар ҳолда ўттаси кун мўлжал, сен чиқмасанг ҳам Ҳасанали чиқсин йўлға.

— Майли, чиқсин, — деди Отабек.

## 5. МАКТУБ

Ҳожи шу жавобдан кейин ўғлидан бир даража қаноатланди ва чойга фотиҳа ўқуб, ўрнидан турар чогида ёнидан бир хат чиқариб узатди:

— Хатнинг ичидан чиқди. Келиндан — сенга бўлса кепрак, — деди.

Отабек мактубни олиб отасининг костишини кутиб қолди. Хат саккиз букланиб, қизил ипак билан бир-икки

еридан чатилған ва Отабекка аталған эди. Отасининг узоқлашини кутар экан, юраги ёмонлаган отек типирчилар эди. Тикилган ипакларни сўқди ва мактубни очиб оч кўзини ишқа қўйди:

"Юсуф савдосида беқарор Зулайҳо исмидан, Мажнун ишқида йиғлаған Лайли отидан — сизга бошимдағи сочларимнинг түжларича беҳад салом. Мендан — ҳадду-ҳисобсиз гуноҳ, сиздан — кечириши. Ўткан ишқа саловат. Чунки шу икки йил ичида кечирған қора кунларни эска олиш маним учун ўша кунларни қайтадан бошдан кечиришилик сингари, ул кунларни сиз унутинг, унумтамг, аммо мен унудим. Шунинг учун сўзимни ўзимнинг охирғи, ҳам чин баҳт ислари ҳидлаган тарихимдан бошлийман.

Сиз — қочқоқсиз, нари-бери тил учидан менга бир нарса ёзғандек бўлиб қочқансиз, икки йил бўйи Марғилон келиб юришларингизни мен ўзимча ешдим, лекин топиб ешдим: сизнинг барча машақатларингиз — душманларингиздан ўч олиш учун бўлғанини онгладим. Йўқса, мени кўрар эдингиз, кўргингиз келмаганда ҳам бошқалар сизни кўрар эдилар, тўяр эдилар... Мен каби баҳтсиз, мен каби ғовғаси кўб сизни зериктириб, жондан тўйдирған бўлса, ажаб эмаски, қоча бошлагансиз... Қочсангиз қочиб кўрингиз, аммо мен бу кундан бошлаб биравларни қувшишқа бел боғладим: отам билан онам рафоқатларида<sup>1</sup> хизматингизга — чўрилиғингизга эрта-индин юраман, сўйганингиз кундашим олдида қадру қийматимнинг нима бўлишини ҳам биламан... Сиз олийжанобсиз: эски қадр-донлиқ ҳурматига кўнгил учун кулиб боқарсиз... Лоақал шугина билан ҳам баҳтсизни масъуда қиласиз. Аммо... сўйганингиз — кенжангизнинг жекиришларидан, қарғанишларидан беҳад қўрқаман, ўзимда йўқ қўрқаман. Шу яқин орадаги унинг билан бўладирған масъуд дақиқаларингизда худо ўйлиға вაъда олингиз — мени оғримасин, рақибам келди деб ўйламасин. Ниҳояти мақсадим икки дўстка бир чўрилик ва шу муносабат билан биравларни кўриб юриш...

Хатим охирда шуни ҳам айтib қўй: ўч қайтиб, мен ҳам кўчадан ҳайдалмасам эди, деган ҳафф ҳамиша кўнглимда. Агар худо ярлақаб эшикингизда ўринлашиб олсам, ўёғини ўзим билар эдим...

<sup>1</sup> Рафоқат — ҳамроҳлик, йўлдошлиқ, эшлиқ.

Эрта-индин күзимга йил кўринур,  
Йўл босишлиқ кўнгилга бир умр кўринур...

З-нчи ҳамал, Марғилон, Кумушингиз ёёдим".

Отабекнинг сўйинчи ичига сиғмаслиқ, ўзини йўқотиб қўйған ҳолда илжаяр эди. Хатни иккинчи қайта ўқуб чиқиб яна сўйина бошлаған эди, кечаги манзаралар унга кўриниш бергандек бўлдилар. Ул сесканди, кўз ўнгидан кечаги мазлум гавдалар бирма-бир ўтиб, ул ошигич ра-вишда хатни буқлади ва улардан яширгандек чўнчагига тиқди, иргиб ўрнидан туриб кетди...

Кўчани бир айланиб келгандан сўнг, бояғи манзаралардан бир оз қутилғандек бўлиб яна мактуб эсига тушди. Меҳмонхонанинг даричасига қия турған ҳолда хатни яна ўқуб чиқди. Лекин бу гал хат ҳам бояғидек сўйинч эмас, кечаги мазлумларга таъзия тутқандек оғир маъно берди: "Аммо... сўйганингиз — жекиришларидан, қарғанишлари-дан беҳад қўрқаман..." Боя нима учун сўйинганига ўз-ўзидан ҳайрон бўлиб бошлади. Чиндан ҳам мактубнинг мунда кўчирилган жумласи, ўйлаб қараганда, ҳеч қандай қувончга йўл қўймаслиқ даражада қора маънолик эди. Бу жумла келасидаги онглашилиб битмаган, лекин бўлиши аниқга ўхшаган ярамас ва тинчсиз бир ҳаётнинг гўё муқаддимаси эди...

Отабек Кумуш айткандек кундаш, яъни Зайнабдан унча қўрқмаса ҳам, аммо дарднинг энг давосизи бўлған онаси тўғрисида юраги титради. Умрининг энг қийматлик кунларини оғулаған, икки йил бўйи давосиз дардга мубтало қилған, ярамас ва ишончсиз йўлларда санқишига сабаб бўлған ўз онаси эмасми? Ва рақибларга, душманларга йўл очиб берган шу онанинг орзузи эмасми?

Бутун шаҳарни алғоқ-далғоқ қилиб кўҳлик қиз қидирған, ниҳоят чиройлиликда танҳо, ақллиликда якто топиб, тўйлар, томошалар, орзу ва ҳаваслар билан ўғлиға "хотин бу бўлибдир!" деган ифтихор ва мағрурият или тақдим қилған суюкли келини устига гўё ўчакишкандек бўлиб келадирған Марғилон парисига нима ва қандай муомала қиласи эди?

Кумуш кундашининг жекиришидангина чўчиған бўлса, Отабек бу чўчишни ўзининг кўлагасида қолдиратурған онаси тўғрисида тамом ақлинни йўқотиб қўйди.

## 6. ЎЗБЕК ОЙИМ — ОФМА, ЗАЙНАБНИНГ ДАРДИ

Юсуфбек ҳожи чала-думбул табиъатлик хотиниинг феъли хуйини яхши билгани учун ўткан воқиъаларни, яъни Отабек сирларини унга очмаслиққа қарор берган бўлса ҳам, аммо марғилонлиқ келин ва қудаларнинг келишларидан хабар беришни лозим топди. Чунки хотини нинг марғилонлиқ келинга бўлған адоватини Отабекдан ҳам яхшироқ билар ва унинг: "Ўғлингиз Марғилондан уйланмади, бир балодан уйланди!" деб қиласидирган шикоятларини ҳамма вақт эшишар, доимо иссиғ-совуқчи домла, хўжаларницида бош оғритиб юришини ҳам билар эди. Шунинг учун ўз тарафидан Ўзбек ойим тушкурни яхши-лаб эбка олмоқ, юз қизарадирган ишларга қарши чораларни кўрмак фикрига тушди.

Чолу кампирнинг ҳар бир ўлтуришларида сўз Ўзбек ойим томонидан бошландими, албатта ноқобил ўгул билан марғилонлиқ "анди" келин устида бўлар ва унинг учун энг аҳамиятлик масала фақат шугина бўлиб кўринар эди.

Бошқа кезларда кампирнинг бу тўғридағи дод-ҳасратини кулгулиқ билан ва кам ҳавсалалик билан эшишса ҳам, аммо бу гал Ўзбек ойимнинг ўша эски ашуласини ортиқча бир тўзимсизлик орасида кутар эди. Кампирнинг дарди гўзада, сичқоннинг кўзи донлик кўзада, деганларидек, бизнинг Ўзбек ойимизнинг ҳам дарди бўзада эди. Сўз уринди, сўздан — сўз чиқди, ниҳоят ҳожининг кутканидек ўгул ҳасрати ҳам бошланди:

— Аҳмоқингиз бир оз эсини йигқан кўринадир, — деди Ўзбек ойим, — ҳайтовур уч ойдан бери Марғилонни эсидан чиқариб қўйди.

Ҳожи кулди:

— Иссиғ-совигинг кор қилғандир...

— Билмадим... Ҳар нучук сув қўйғандек бўлди, қолди.

Илоҳи эм тушкан бўлсин...

— Илоҳи эм тушсин, — деди кулиб ҳожи.

Ўзбек ойим эрининг истеҳзосига тушиниб қолди ва лаби-лабига тегмай бобиллай кетди:

— Нега куласиз? — деб депсинди, — бу кунгача кулибку, ўғлингиздан ажralаёздингиз. Эндиғина сиз ҳам... худоёй тавба қилдим...

— Зўри беҳуда миён шиканад.

— Илоҳи тоҷикингиз қурсин! — деди Ўзбек ойим, — мен тўғрисини айтсан бу гапларнинг ҳаммасига сиз сабаб

бўлмоқдасиз, эр. Яккаш кулиш, яккаш кулги! Ундан кўра ўгул-қиз ўсдиришға уқувим йўқ, деб айтинг!

Ҳожи тагин кулди:

— Ҳа, уқувим йўқ, ойимча!

— Кулинг-е, кулинг! Худо ўлим берсин кулгуга! — деди Ўзбек ойим ва аччиғи билан юзини четка ўғирди.

— Менга қара, хотин, — деди ҳожи жиддий тусда. Ўзбек ойим қаради. — Ўринсиз чирансанг, белинг синадир, дейди тоҷиклар. Шунга ўхшаш ўзинг жойисиз чиранганингдек, мени ҳам ўз ёнингта тортмоқчи бўласан.

— Бўлмаса маним барча ҳаракатларим ўринсиз экан-да?  
— Ўринсиз.

— Нега ўринсиз бўлар экан?

— Сенинг муддаонг, — деди ҳожи, — марғилонлик келинни ўғлингдан ажратиб юбориш ва бу келининг билан қолдириш — шундоғми?

— Албатта шундоғ!

— Мана шу ҳаракатингни ўринсиз чирапниш, дейдирлар. Нега десанг, билфарз<sup>1</sup> ўғлингни олдингта олсанг-да, ундан сўрасанг, "қайси хотининг билан бўлишни хоҳлайсан? Хоҳламаганингни қўй" — деб. Ана шу вақтда ўғлинг нима дер эди? Нима дейишини ўзинг ҳам яхши билсанг керак, хотин!

— Биламан, — деди Ўзбек ойим, — Марғилонликнинг домласи кучлик. Ўглим бечоранинг бошини айлантириб, кўнглини хиппа ўзига боғлаган.

Юсуфбек ҳожи ўзини кулгидан яна тўхтата олмади:

— Яхши, — деди, — сен ҳам-ку уч йилдан бери Тошканддаги ҳамма домла-хўжаларнинг эшигига бирма-бир кириб чиқдинг. Бас, сен ҳам нега ўғлингнинг кўнглини Зайнабка хиппа қилиб боғлай олмадинг?

Ўзбек ойим эрининг бу саволидан ҳайрон бўлиб турмади:

— Марғилонликнинг домласи сиҳирчи ҳинди эди. Мен бўлсам, бу ердан ҳинди домла тополмадим.

Ҳожи энди кулмади. Чунки хотинининг ҳолига ачина бошлиған эди.

— Бундоғ ақлсиз ишларни қўяйлиқ хотин, — деб мулојимона сўзлаб кетди, — бир оз ақлга ён бериб иш

<sup>1</sup> Билфарз — фаразан, айтайлик.

қылған киши ҳеч бир вақт дард қилмайдир. Модомики, иккимизнинг ёлғиз ишончимиз шу ўғлимиз экан ва унинг соғлиқ, шодлиги бизнинг тириклигимизнинг тираги экан, бас, бизга лозими унинг хурсандлиги нима билан бўлса, шуни ахтаришдир. Мен яхши биламанки, сен бу ишларни фақат ўғлингни аяғанингдан қиласан ва сенда шундан бошқа ҳеч бир мақсад йўқ, бу тарафдан қараганда сени ҳам айблаб ўлтуриш осон эмас... Шуни ҳам яхши билғилким, ўғлингнинг ой сайин Марғилонға қатнаб туриши қанча хафа қилса, мени ҳам сендан баттар аччиғимни қистатар, ҳатто баъзи кезларда сўкиб юбориш даражаларигача бориб қайтар эдим. Аммо сенинг жаҳлингни чиқариб кулишим бўлса, фақат "ўлганимдан куламан, юзимни ерга сурман" қабилидан бўлиб, бунга сен тушинмас эдинг. Ниҳоят, сен айткандек жоним ҳиқидогимга етди-да, ўғлингни бу гал Марғилонга борма, деб йўлдан қайтариб қолғучи ҳам мен — ўзим бўлдим...

Ўзбек ойим бошини терватиб сўзни эшитиб келар эди. Бу кейинги сўзни эшиткандан кейин бошини кўксигача еткузиб, "баракалла, раҳмат" дегандек қилиб қўйди.

Ҳожи давом этди:

— Маним бу тўхтатиб юбормай қўйганимдан хабарсизлигинг учун бўлса керак, кўнглинг домла-хўжанинг дуосига кетиб қолди ва мен сенинг сўзингдан кулдим. Чунки ҳақиқатда бунинг сабабчиси ўзим эдим...

Ўзбек ойим эридан ўпкалади:

— Нега ахир мени хабардор қилмайсиз?

— Бу тўғрида менда ҳам айб бор, — деди ҳожи, — сен билан ўзимнинг муддаоларимиз бир, деб ўйлағаним учун Отабекни койиб тўхтатқанимдан сўнг сенга кенгаш солмасданоқ қудаларингта бир хат ёзған ва келин болани Тошкандга олиб келишларини сўраган эдим. Ҳайтовур сўзимни ерда қолдирмаған ўхшайлар, бу кун қудадан битта жавоб хати олдим. Ақлли кишиларнинг садағаси кетсанг ҳам арзийдир: "Шу чоқгача сизларга айтдирмасданоқ зиёратларингизга боришимиз керак эди. Хатингизни ўқуб ниҳоятда хижолат чекдик, айниқса келин болангиз бек ойимга қайси юз билан қарайман, деб юзини юлди. Бу адабсизлигини боргандан сўнг албатта юзига солмаслар, деб ишонамиз" дейдир...

Ўзбек ойим эрига анқайганча қараб турар эди. Ҳақиқатан ҳам ҳожининг усталиги Ўзбек ойимдек думбул табиъатлик хотинларни гангитарлик эди.

Ул хотинининг жавобини кутиб ўлтурмасданоқ, том устига том ёпа борди:

— Қайси уйни бўшатдирсақ экан? — деб сўради ва жавоб кутмасдан, — қудаларингни нима билан кутишни бўлса ўзинг биласан: тuya сўйиб чорлаганинг ҳам келмайдирган кишилар, — деди.

Ўзбек ойимнинг мияси айнадими ёки ўзи айткан сиҳирчи ҳиндининг дуоси асар қилдими, ҳар нучук уч йиллик адоватлар ва кина-кудуратлар барчаси ҳам алла қаёқға қараб учиб кетдилар ва уларнинг ўрнини "икки келинлик бўлиш" масаласи келиб олди. Узоқ, яқин хотинларнинг "Хой, Ўзбек ойимнинг маргилонлиқ келини ҳам келибдир, худда тўтининг боласи, эмиш. Юринглар, бир кўриб келайлик" деган сўzlари эшитилгандек бўлди. Шу чоқғача Зайнабка ялиниб, ялпогланиб кун кўриб келган бўлса, мундам сўнг бир қўша келинни ўзининг оёғлари остида ялиниб юрган ҳолда кўрди.

— Ҳар нима бўлғанда ҳам теги нозик, — деди ойим, — иззати учун шу уйимизни бўшатиб берамизми?

— Ўзинг биласан.

— Биз тўрдаги уйга кўчиб ўтсак ҳам бўладир. Ахир теги нозик...

Уч йиллик кина ва адоват ўрнига ниҳоятда олий марҳамат ва меҳрибончилиқ келиб ўлтурган эди. Уч йиллик эмас, уч дақиқалиқ ўзгаришдан Ўзбек ойимнинг юзи қизармас ва қизаришни ҳам билмас, ҳатто ўғул-қиз ўсдиришни билмагучи Юсуфбек ҳожидан алла қанча юқориларда юрар эди. Юсуфбек ҳожи эса хотинидаги бу кулгулик ўзгариш учун ажабланмади ва кулмади, чунки бу кулки табитъатка молик бўлган хотин билан энди ўттуз беш йиллаб бирга яшар эди.

Ўзбек ойимни шу ҳолга келтиргандан кейин ундан сўраб қўйди:

— Зайнабка ҳам бу хабарни ётиғи билан айтиб қўямизми?

— Сиз билан мен бир ишни мувофиқ кўрганимиздан кейин Зайнабка чикора<sup>1</sup>, — деди Ўзбек ойим. Мундан уч дақиқа илгари саодати учун тиришилган орзулиқ Зайнабнинг оқибати ҳам шу бўлиб қолған эди.

<sup>1</sup> Чикора — йўл бўлсин.

— Гап унда эмас, — деди ҳожи, — умр, муроса деган гаплар бор, айниқса кундашлик иши қийин, коса-косага текканда гиди-гиди гаплар кўпайса, бизга эмас, ўғлингта ҳам татимай қоладир.

— Кақир, дейсизми?

— Кақир.

Ўзбек ойим Зайнаб билан Отабекнинг кутилмаган ра-вишда очилиб сўзлашиб ўлтурғанлари устидан чиқди.

— Ўғул-қизнинг кенгашими?

Отабек кулимсираб Зайнабка қаради, Зайнаб эса тузатиниб ўрнидан турди ва қайнин онасига жой кўрсатиб:

— Шунақаға ўхшайдир, ойи. Ўгул-қизнинг кенгаши худда шу кунга йигилиб қолған экан, — деди ва кулимсираб эрига қаради.

Ўзбек ойим ўлтурмади ва уни-буни суриштириб, ўйлаб турмади:

— Иккаласига бир пардан кўйнаклик ол! Бирини паст, бирини баланд қилма, бу хотининг бўлғанда ул ҳам кўз очиб кўрганинг... Зайнаб, сен мен билан жур-чи, ҳожи отанг чақириятилар, — деди.

Томдан тараша тушкандек қилиб сўзланған юқоридағи гапларга бошда уларнинг иккави ҳам тушинмади. Аммо бир оздан сўнг Отабек айтилган телва-тескари сўзларнинг маъносини онглаб олди, онасининг нима бўлса ҳам Марғилон тарафка оғишқанини ва ўзининг кучлик бир душмандан қутилаёзғанини билиб Зайнабни нима учун чақирилғанини ҳам пайқади. Зайнаб эса бир нарса тушинмаган ҳолда қайнин онаси билан чиқди.

Қайнин она келин қаршисиға келиб ўлтуришкандан кейин, ҳожи Зайнабка қараб олди.

— Болам, Зайнаб, — деди, — биз Марғилондаги опанг кўчини олиб келмакчи бўлдиқ... Сен шунга нима дейсан?

Зайнаб ялт этиб қайнин онасига қаради, чунки Ўзбек ойимнинг бояғи гапи энди унга онглашилған эди. Дўстни душман ёнида кўриб билинар-билинмас қилиб энтиқди.

— Мен нима дер эдим...

— Гап нима дейиш ва нима демасингда эмас, ойим! — деди қожи, — гап шундаки, ул келган чоқда эгачи-сингилдек бўлиб кета оласанми, деб сўрамоқчиман.

— Бўлиб кетармиз...

— Эгачи-сингил бўлиб кетарсиз-а? — деб такрор сўради қайнин ота.

— Билмадим ...

— Нега тағин билмай қолдинг?

Зайнаб бир мунча вақт ўйланиб қолди.

— Қарс икки құлдан чиқадыр, — деди Зайнаб, — мен яхши бұлғаним билан опам ёмон бўлса, қозирги берган ваъдамдан нима фойда бўлсин.

— Жуда тўғри гапирдинг, болам, сендан олған ваъдани ундан ҳам оламиз.

Зайнаб сукут қилди.

— Зайнаб сиз ўйлаған келинлардан эмас, — деди Ўзбек ойим, — худога шукур, ақл-ҳуши бошида.

— Бошқа гапларни кўнглингга келтурма, қизим. Марғилонлиқ келин билан сенинг бизга ҳеч бир фарқларинг йўқ, иккавларинг ҳам боламизнинг қўшоги — боламизсиз!

Зайнаб бошини иргатиб қўйди. Юсуфбек ҳожининг дуосидан сўнг, Зайнаб Отабекнинг олдиға кирди.

Отабек Зайнабнинг юзидағи маъюсликни биринчи кўришдаёқ сезди. Бир оз жимгина қарши-қарши ўлтуришдилар, иккисига ҳам сўз айтиш ўнгтайсиз ва алла нарса монеъдек эди.

— Нега чақирған эканлар? — деб ниҳоят Отабек сўраб юборди.

— Билиб туриб сўрайсизми? — деди Зайнаб кучланиб кулган ҳолда.

— Нимаи билиб туриб?

— Марғилондан келадирган кишинингизни.

Отабек қийин ҳолатда қолди ва оғзиға шу гап келди:

— Мунда маним ихтиёрим йўқ... ҳамма ишни отам қилаётидир.

— Отангиз қылсалар ҳам сизнинг кўнглингиздагича.

— Нима кўнглимдагича?

— Суйганингиз билан биратўласига қўшилиб олиш, албатта, сизнинг кўнглингиздагича...

— Мен уни суюманми?..

— Албатта суюсиз...

Отабек ўзини тинч ушлаган ҳолда:

— Янглишасиз! — деди.

— Ҳеч янглишмайман, — деди Зайнаб, — сиз уйланишдаёқ уни суюб олгансиз, мени бўлса... мен ота-онангизнинг орзулатира, — деди ва кўзига жиқ ёш олди.

Отабек оғир ҳолга туши, бу тўғри сўз уни тамом эсанкиратди ва бу ҳақиқатка қарши бориш, яъни ёлғонлаш яна оғир эди. Шундай бўлса ҳам ёлғонламай чораси бўлмади:

— Бошда... суюб уйланганим сиз айтканча түғри, аммо ҳозир ундоғ эмас, — деди.

— Ишонмайман.

— Нега ишонмайсиз, ишонинг...

Зайнаб бир оз унга қараб турғандан кейин:

— Ишонмаганимнинг сабаби бор, — деди.

Отабек тинчсизланди:

— Сабабини... сўзланг...

— Менга уйланганингизга қанча бўлди?

— Икки...

— Шу икки йилдан бери менга бўлган алоқангиз бир зарра ҳам ўзгарган эмас, — деди Зайнаб, — мени хотин ўрнида кўрмайсиз!

— Бекор гап...

— Бекор гап эмас, жоним, — деди Зайнаб қизишқан ҳолда. — Марғилондан қайтқандан кейинги кунларингизни меҳмонхонада кечириб келишингиздан албатта тона олмасиз. Шу ҳам умид билан бир ёстиқقا бош қўйған эди, деб маним тўғримда ўйлаб қарамаслигингизнинг сабаби ҳам ўзингизга...

Зайнаб сўзини битира олмади, четка қараб кўз ёшиси- ни тўқди. Отабек гўё тоғ остида қолған эди.

— Сиз тамом бошқача тушинибсиз...

— Бўлмаса, бу гапларнинг сабаби нима?

— Сабаби жуда очиқ, — деди Отабек. Лекин нимани сабаб қилиб кўрсатишни ўзи ҳам билмас эди.

— Айтингиз ахир?

— Ўзингиз ҳам биларсиз, деб ўйлайман.

— Мен ҳеч нарса билмайман.

— Биласиз.

— Худо ҳаққи билмайман.

— Билмасангиз... — деди бек, — билмаганингиз яхши.

Сизга ўз оғзим билан иқрор қилишга уяламан...

— Мендан-а, хотинингиздан уяласизми?

— Уялмайинми?

— Уялманг.

— Уялмасам... мизожим заиф...

Зайнаб ишонар-ишонмас унга қаради.

— Тўғри сўзламадингиз...

— Ишонмасангиз ўзингиз билинг, лекин ҳақиқат гап шу, сиздан узоқда юришимнинг сабаби ҳам шунда.

— Ишонганимда ҳам бу ҳол ташқарида ётиб юришингиз учун катта сабаб бўла олмайдир. Чунки мен фақат шунинг

учун сиздан ўтикашамайман, — деди ва кўзини тўлдириб Отабекка қаради. — Менга сизнинг мизожингиз керак эмас... Ўзингиз!.. — деди ва йиглаб ёлборған ҳолда Отабекнинг қучогига ўзини ташлади. Отабек Зайнабнинг шу қадар юрак дарди борлигини биринчи мартаба билар эди. Бечора Зайнаб жонсиз ҳайкални ўпиди қуючлар ва ёлборар эди.

## 7. ҚУДАЛАРНИ КУТИБ ОЛИШ

Кечаги кирган савдогарлардан қудаларнинг бу кун аниқ кириш хабарларини билган эдилар. Нарироқдан кузатиб кириш учун Ҳасанали йўл устига кеткан, Юсуфбек ҳожининг ўзи иш бошида туриб, Ойбодоққа ташқари ҳавлини тозалатар эди. Ичкарида бўлса, Ўзбек ойим қўшни хотинлардан бир нечасини ҳашарга айтиб, ҳаммани жой-жойига қўйдирған, ҳавли юзини ҳам ёғ тушса ялағундек ҳолга келтурган эди. Аммо ўз уйини бўшатдириб, гилам солиб қўйганига энди уч кунлаб бор, қудаларнинг зиёфати учун керак бўлған ҳамма нарсаларни ҳам ҳозирлатқан, улар келиб тушди дегунча, бўғизлатиш учун, деб бир гўонон қўйни оғилнинг устунига қантаттириб қўйған эди. Кумуш билан Зайнабка аталиб олинған хон атласларга кўнгли тўлмай "ҳар нучук-да теги нозик, бу бўлса энди кўб кийди, атласнинг ёнига яна бир хитойи латта олингиз" — деб марғилонлиқнинг кўйнагини бир қўша қилдирған, битта хитойи жужим мурсакни кам кўриб, ёнига ўзининг қийматбаҳо заррин мурсагини ва иккита рўймолга ҳам қониқмай, ўзининг келинлигидан ўролмай қолған қалмоқи саллачасини қўшқан эди.

Зайнаб ҳам унча хафа кўринмас, қайнин онасининг буйруқларини эски ҳолича бажариб юрар ва ҳозирда уйга кириб олиб меҳмонлар келиб тушди дегунча, олдилариға ёзиш учун дастурхон ясатар эди.

Ўзбек ойим ҳашарчи хотиндан бирига тандирга ўт қўйишни буюрди-да, ўзи Зайнабнинг олдиға келди:

- Дастурхонинг битдими, болам? — деб сўради.
- Битди. Ташқарининг асали камга ўхшайдир.
- Кам бўлса, даррав омбордан керагича олиб чиқ, ундан кейин хамирингта ўзинг қара, Ойбодоқнинг қўли тегмас, хамир гуп бериб кетибди, — деди ва даричадан кўтарилиб дастурхонларни кузатди, — дастурхонинг тузик, варақини эсингдан чиқарма, — деди ва ўрга йўлакда кўринган Юсуфбек ҳожини ўзига имлади. — Бери келинг.

Юсуфбек ҳожи бошида оқ тўпписи ва эгнида оқ олача тўни билан устидан белини боғлаған эди. Ўзбек ойим ёнига секин-секин юриб келди:

— Нима гап?

— Даствурхонларимизга бир қараб қўйинг-чи?

Ҳожи парвосизгина қилиб қараған бўлди:

— Ўзингта ёқса бўпти, — деди.

— Қассоб айтканмисиз, тагин улар келгандан сўнг шошиб қолмайлиқ.

— Қассоб тайёр, ҳозир бўғизлатсақ бўлмайдими?

— Йўқ, — деди Ўзбек ойим, — ош эгаси билан ширин.

Ҳа, айткандек, қудангизникига юборған кишингиз келдими?

Асал учун шошиб берған Зайнаб тўхтаб қайнин отаси-нинг оғзиға қаради.

— Бориб келди, — деди ҳожи, — Алимбек даласига кеткан экан, хотин қудалар келишмакчи бўлишибдир.

Зайнаб асалга кетди. Ҳожи Ўзбек ойимнинг ёнига юриб келди ва секин сўради:

— Зайнаб хафа эмасми?

— Нимага хафа бўлар эди.

— Ахир, сўрайман-да.

— Туппа-тузик, — деди Ўзбек ойим, — ташқарингиздан Ойбодоқ қутилаёздими?

— Қутилиб қолди. Маҳалладан ҳам уч-тўртта киши айтдим, ошни кўпроқ қилиш керак.

— Хўб.

Ҳожи ўён-буёнга аланглаб олғандан кейин сўради:

— Ўғлинг қаёғда, кўринмайдими?

— Ташқарида эди-ку.

— Боя шуёққа киргандек бўлған эди.

— Гузар-пузарга чиқғандир, — деди Ўзбек ойим.

Ойбодоқ ташқарини йигиштириб кирди. Ҳожи меҳмонхонага чиқиб кетди. Ўзбек ойимнинг амрича Ойбодоқ, Зайнаб ва ҳашарчи хотинлар кулча ясашга ўлтурдилар.

Кун тушдан оғқанда ҳамма саранжом олинған эди. Ўзбек ойим тўйга борадирған хотинлардек ясанған, эгнига одими хон атлас кўйнак, бошида оқ шоҳи дакана, кўзида сурма эди. Ўзбек ойимнинг: "Келинни хор тутар экан демасинлар, сен ҳам ўзингни тузат", деб айткани учун Зайнаб ҳам тамом ипакларга кўмилиб ясанған, кеча эрга теккан янги келинлар суратига кирган эди.

Зайнабнинг онаси — Моҳира ойим, опаси — Хушрой-биби ва янгаси Ҳанифанисолар ҳам келишдилар. Ўзбек

ойимнинг кўнгил тортар қўшниларидаи Карима отин, Шарофат чевар ва Маҳинабонулар ҳам ясаниб-тусаниб чиқдилар. Ўн чоғлиқ хотин бўлишиб совутмачоқ дастурхонга<sup>1</sup> ўлтуришилар. Ўзбек ойим мажлиска — марғилонлик қуданинг одамгарчиликни билишидан, Отабекни Тошкандан уйлантиришга қарши лом-мим демай, қайтаға ўзи куяви билан бирга келиб, тўйни ўтказишиб кетканидан, Марғилондаги обрўсидан ва давлатидан баҳс қилиб айтар эди:

— Бечоранинг бори-йўғи пешонасидағи боласи шу бизнинг келинимиз. Отабекни ўз боласидан ҳам яхши кўриб, "Ўғлим бўлса шундоғ бўлар эди-да, мендан кейин ҳамма давлатим шуники, илоҳи омон бўлсин", дер экан.

Моҳира ойим алланучкалангани ҳолатда жавоб берар эди:

— Ҳа, айланай қуда, қарс икки қўлдан чиқадир, деганлар... Бузоқ яхши бўлса, икки онани ҳам эмар экан...

Қуёшнинг қиздиришидан чанги чиқиб кеткан ҳавлига сув сепиб турган Ойбодоқ ташқаридағи гулдир-гулдирни эшитди ва чопиб меҳмонлар ўлтурған уйнинг даричаси ёнига келди: "Келишканга ўхшайдирлар", деди. Ўзбек ойим гапириб турган сўзини ярим йўлда қолдириб, ўрнидан турди ва меҳмонлар ҳам унга эргашдилар. Зайнаб бўзарған ҳолатда уйига югуриб кетди. Ўзбек ойим бошлиқ — хотинлар ҳавли юзасига тушдилар. Моҳира ойим қизи Ҳушрўйнинг қулогига нимадир шивирлаб кулиб қўйди. Ўзбек ойим ўрта эшикка бориб етмаган ҳам эди, нариги ёқдан қўшнининг боласи югуриб кириб қолди.

— Сўйинчи беринг, бек буви, кеннойим келдила!

Ўзбек ойим чўнчагига қўлини солиб беш-ўн пул олиб берди. Бола орқасидан Ҳасанали кўринди:

— Қани ойи, кўрманани беринг-чи, мен сизнинг қочқоқ келинингизни тутиб келдим! — деди ва йўлакка қараб: — Тўхтант, тўхтант, илгари мен сўйинчимини ундириб олай.

Йўлакдан Офтоб ойим кўринди. Паранжиси бошида, чашмбанди қўлида эди. Ҳасанали Ўзбек ойим билан танишдиди:

— Бу киши қудачангиз — Офтоб ойим бўладирлар.

Ўзбек ойим Офтоб ойим билан саломлашиб қучоқлаша кетдилар. Ўзбек ойимдан кейин бошқа хотинлар унинг би-

<sup>1</sup> Совутмачоқ дастурхон — наридан-бери тайёрланган, супта дастурхон.

лан кўришиб чиқдилар. Ҳамманинг кўзи алонғ-жалонғ келди. Кумушни актаришар эдилар. Кумуш ҳали ичкарига кирган эмас. Ўзбек ойимнинг икки кўзи йўлакда, Ҳасанали бир йўлакка ва бир Ўзбек ойимга қараб нима учундир кўзини қисиб қўяр эди. Хотинлар билан кўришиб четда турган Офтоб ойим қудаси ёнига келди: "Уялиб турғандир" деб кулди. Ўзбек ойим кулимсираб йўлак томонга:

— Ҳой, пошша келин! — деди, бизлар кутиб қолдиқ-а, уялманг болам! Ҳасаналининг кўрманаси бўлса тайёр!

Ҳасанали йўлакка қараб имлади... Қип-қизарған ҳолда Кумуш кўринди: паранжиси қўлида, қора атлас кўйнак эгнида, зангор латта мурсак устида, оқ шоҳи рўймол бошида эди. Шаҳло кўзлари кулимсирашка яқин ҳолда уятлик эдилар.

Ҳасанали танитди:

— Мана бу киши қайин онангиз — бек ойим бўлладирлар.

Кумуш салом берди ва қўлидағи паранжисини ерга ташлади, югуриб келиб ўзини Ўзбек ойимнинг қучоғига олди. Ўзбек ойим ҳам уни маҳкам сиқиб қучоқлаб олған, юзидан шап-шап ўпиб айланиб, ўргулар ва тикилиб-тиклиб нима учундир йиғлар эди... Кутиб турган хотинлар, Моҳира ойим, Хушрўй ва Ҳанифалар Кумушни кўрган он бир-бирларига қарашиб лабларини тишлашдилар...

Қайин она-келин бир дақиқа чамаси кўришиб қолдилар. Сўнгра Кумуш бошқалар билан бир-бир кўришиб чиқди. Ўзбек ойим ҳар бир хотинни ким бўлғанини унга танитиб борди. Энг кейин орқадан Зайнаб кўринди. Чунки ул уйдан энди чиқиб келган эди. Ўзбек ойим кулиб Кумушка қаради:

— Қани, ўзинг тани-чи, ким экан бу.

Кумуш ҳайрон бўлиб қолмади... Ипаклар ичига ғарқ бўлған Зайнабка қараб олиб, унга томон адим ташлади:

— Зайнаб опам! — деди. Зайнаб ҳам кулимсираган ҳолда Кумушка яқинлашиб келди... Икки кундаш "эсонмисиз, омонмисиз, эсон-омон юрибсизми..." сўзлари билан озорсиз қилиб бир-бирининг слкасига ва қўлтиқ остига қўл юборишидилар. Улар кўришиб турганда йўлакдан Юсуфбек ҳожи кўриниб, қочадирған хотинлар ўзларини четка олдилар. Ҳожи уларнинг олдиға — юзага чиқгач, Офтоб ойим салом бериб рўймоли билан томоғ осталарини ўраб олди. Ҳожи қудачаси билан сўрашиб:

— Баракалла, синглим! Ҳайтовур чарчамай келдингларми, мен сизларни овора қилдимов, — деб узр айтиб кулган ва уялиб борған қудачасига енгиллик берган бўлди.

— Қани, бек отаси, кўрманани беринг-чи! — деди Ўзбек ойим Кумушни имлаб.

Кумуш уялиб зўргагина салом берди ва Юсуфбек ҳожининг яқинига келиб бўйин эгди. Ҳожи қўли билан Кумушнинг елкасига қоқиб сўйди ва Кумушнинг манглайига тегизиб олған ўз қўлини ўпди:

— Бизнинг Марғилонда ҳам шундай келинимиз бор экан-ку, биз билмай юрган эканмиз-да, — деб теварагига қараб кулинди ва қўлини дуоға очди. — Бизни шунчалик сийлаб келибсизлар, бу яхшилиқларингиз биздан қайтмаса, худодан қайтсан. Оллоҳ таоло ёшларға тинч ва баракатлик умр берсин. Илоҳим тақаббул дуо<sup>1</sup>...

Ҳамма дуоға юз сийпащдилар. Сўнгра Юсуфбек ҳожи Кумуш билан Зайнабка қаради:

— Мен сизларнинг кўришиб турғанларингизни кўриб жуда қувондим, — деди, — Мундан сўнг ҳам шу йўсунда бир-бирларингизга эгачи-сингилдек бўлмоқларингизни тилайман, — деди ва Ўзбек ойимга:

— Қани, меҳмонларни ичкарига олинглар, — деб ўзи ташқарига бурилди.

## 8. ЗИМНАН АДОВАТ

Шундан кейин Ўзбек ойим олдинға тушиб, қудаси билан Кумушни уйга бошлади. Уларнинг кетидан бошқа меҳмонлар юрдилар. Ўзбек ойим йўл устидан Ойбодоқقا:

— Тезроқ чойингга қара, бечораларнинг аравада ичаги узулғандир, — деди ва Офтоб ойим билан Кумушка, — мен сизлардан жуда хафаман, — деб қўйди.

Офтоб ойим Кумушка қараниб жавоб берди:

— Айтсангиз, айтмасангиз биз жуда уятлик бўлғанмиз.

Үйнинг даҳлизига кирдилар. Ўзбек ойим уларни тўрга таклиф қилди:

— Қани, юқорига! — деди.

Офтоб ойим тўрга ҳаракат қилса ҳам, Кумуш бошқа

<sup>1</sup> Илоҳим тақаббул дуо — эй худойим, дуоларимизни қабул эт.

меҳмонлардан уялиб тўхтади, Ўзбек ойим уни қистаб тушиди:

— Ийманма, Кумуш отин, бу кун-эрта бизга янги келинсан, учунчи кундан бошлаб сен муғомбирнинг бошингда тегирмон юргизишни ўзим яхши биламан! — деди. Офтоб ойим ва кейиндагилар кулишдилар. Яна ҳали сен маним собунимга кир ювиб кўрганинг йўқ! — деб қўйди. Бу гал Кумуш ҳам кулимсираб олди.

Тўрга Офтоб ойим ва Моҳира қудачалар ўлтурдилар. Офтоб ойимнинг сўлига Кумуш, Кумушнинг ёнига Хушрўй, Моҳира ойимнинг ўнгига Ҳанифа, ундан кейин Карима отин, Шарофат чевар ва Маҳинабонулар қатор чизилишдилар. Энг оёғда Ўзбек ойимнинг ўзи ўлтурди. Карима отин қўл очиб дуо қилғандан кейин, Ўзбек ойим "Хуш келибсиз" қилди. Мундан сўнг ҳамманинг кўзи иттифоқ қилғандек Кумушка тушди. Кумуш уялиб ерга қаради. Бир неча вақт жим қолишиб Моҳира ойим Офтоб ойимдан сўради:

— Марғилондан етиб келгунча ҳам жуда бир ерга еткандирсизлар?

— Унча ҷарчаганимиз йўқ, — деди Офтоб ойим, — ўзи Марғилондан Тошқандгача арава йўли ўн кунлик экан, биз ҷарчамайлиқ, деб секин-секин ўн икки кунда келдик.

— Йўл лойдир? — деб сўради Маҳинабону.

— Лой эмас, — деди Офтоб ойим, — йўл жуда яхши экан — икки ёқда кўм-кўк майса, қирларда лолалар, йўлнинг жуда ҳам томоша вақти экан.

Сўз навбати Ўзбек ойимга келди:

— Келмаганларингизда Отабекни энди сира ҳам юбор-маслиққа қарор қўйган эдим, — деди, — босо худо, ўғлим уч йилдан бери ой сайин Марғилонға ҳатнаб зерикмадингми, энди улар ҳам келсин ахир, деб йўлдан тўхтаткан эдим.

Кумуш Отабек исмини эшиккач, секингина кўтарилиб қўйди. Офтоб ойим Ҳасаналидан ҳамма сирни ўрганиб олған, шунинг учун Ўзбек ойимнинг довдирашига тушиди:

— Юзимизга солмасангиз ҳам жуда уятлик бўлғанмиз, — деди.

Зайнаб дастурхон кўтариб кирди ва меҳмонларга "Хуш келибсиз" айткандан сўнг дастурхонни ёзди. Даҳлиздан — Ойбодоқ қўлидан ясалған барқашларни олар экан, биринки қайта ер остидан Кумушка кўз юборди ва Кумуш-

нинг кўзи ҳам унинг кейинги қарашида тўқнашиб олди. Баркашлар қўйилиб бўлди. Ойбодоқ тўрт чойдиш чойни мис теклиги билан киргизиб берди. Зайнаб чойдишлар ёнига меҳмонларга чой қўйиш учун ўлтурди. Ўзбек ойим чиқиб борган Ойбодоқни тўхтатиб сўради:

— Қассоб келганмикин?

— Боя келган эди. Ойимлардан фотиҳа олиб берсангиз, қўйни чиқариб берар эдим.

Ўзбек ойим қудачасига қаради:

— Фотиҳа берасизми, қуда!

Офтоб ойим Моҳира ойимга қаради:

— Фотиҳа берингиз, ойи!

— Қўй сизга аталған, — деди Моҳира ойим. — Фотиҳа бериш сизнинг ҳаққиниз, биз бўлсақ фотиҳани кўб берганимиз.

Ўзбек ойим ҳам "сиз беринг" дегандек қилиб Офтоб ойимга имлади. Офтоб ойим уялинқираб фотиҳа берди. Ойбодоқ чиқғандан кейин дастурхонга қарадилар ва "олинг-олинг" билан бир-бирларини қисташа бошладилар. Боягидек кўбчиликнинг кўзи Кумушда эди. Айниқса Ўзбек ойим суқланиб унга қарап ва томоққа қистар эди:

— Ол болам, ол! Мен томоқдан уялатурған кишини ёмон кўраман. Ёки эшикдан киришингданоқ сансирай бошлаганим учун хафа бўлдингми?

— Хафа бўлиш эмас, сўйиндим, — деди Кумуш ва дастурхондан чўқинди.

Офтоб ойим:

— Сансирашингиз уч йилдан бери Кумушни болам, деб юрганингизни бизга очиқ онглатади. Айниқса мен бунинг учун сиздан миннатдорман.

Карима отин:

— Киши ўз боласини сансирайдир, бегонани ҳам сансирасин-чи.

Зайнаб:

— Мени ҳам чимилдиқдан чиқишим биланоқ сансираган эдилар...

Ўзбек ойим:

— Мен яқин кўрган кишимни сизсирай олмайман, — деб маҳтангансумон бўлиб олди, — ҳой Кумуш, ол, жиљла қуриса анув варақидан бир-иккита е, юрагинг узилғандир.

Кумуш узр айтди:

— Ҷарчадим шекиллик, — деди, — иштиҳом бўғилғанга ўхшайдир...

Ўзбек ойим кулди:

— Иштиҳонг бўғилған бўлса чарчағанингники эмас — эзингни согинганингники, — деди. Бирдан ҳамма кулиб юбордилар. Зайнаб ҳам кулгуга иштирок қилди... Аммо Кумуш юзини четка ўтирган эди. Эҳтимолки, қайин онасиning заковатига ичидан таҳсин ўқур эди.

Ўзбек ойим Офтоб ва моҳира қудаларни дастурхонга қистади:

— Олинг, қуда, сиз ёшларни қўяберинг, буларни йигит асраса, сиз билан мени томоқ асрайдир.

Яна кулги бошланди. Офтоб ойим ўзини тутолмай куллар эди. Кумуш ҳам очиқ кулиб, кулги орасида Зайнабка қараб олди — Зайнаб ҳам кулар эди...

Кулги босилиб тушкандан кейин, Зайнабнинг янгаси Кумушдан сўради:

— Бегингиз билан кўришмаганингизга қанча бўлди?

Кумуш даҳшатланиб онасиға қаради. Офтоб ойим жавоб берди:

— Уч ой шекилллик.

Хушрўй ўзининг золим кўзини ўйнатди:

— Ҳа, бўлмаса холам айтканлариdek иштиҳонгиз бўғилғани ўшаники.

— Тўғри, тўғри! — дейишиди хотинлар.

— Мен ўзим биламан, — деди Ўзбек ойим, — жўрттага Отабекни уч ой тўхтатиб қўйдим-ку, ахир!

Кумушнинг кўнглидан кечди: "Аниқ биласиз, жўрттага тўхтатдингиз!" Офтоб ойим кулиб жавоб берди:

— Жилла уники бўлмаса керак. Маним ҳам иштиҳом бўғилғандек...

Ўзбек ойимнинг эсига Отабек тушкан эди:

— Ҳой, айткандек, Отабекни кўрдингизми? — деб Офтоб ойимдан сўради.

— Йўқ.

Ўзбек ойим Зайнабка қаради:

— Ташқаридамикин?

— Йўқ эмишлар... — деди Зайнаб.

Ўзбек ойим ажабланди:

— Боя отанг ҳам сўраган эдилар... — деди, — қаёққа кеткан экан ақлсиз... Эрталаб сенга ҳеч нарса демабимиди?

Кумуш Зайнабнинг оғзиға тикилди, Зайнаб ҳам унга қараб олди:

— Эрталаб мендан уст тўнларини сўраган эдилар —

деди, — мен тўини бериб қаёққа боришларини сўраганимда, бир жойда ишим бор, деган эдилар...

Зайнаб зимнан Кумушни чақиб олди. Кумуш лой каби бўшашиб, Офтоб ойим ҳам оғир тортди. Зайнабнинг қариндошлари кулгансумон бир-бирларига қарашиб олдилар. Ўзбек ойим орадан ўткан сирни пайқади: "Бирарта зарур иши чиқғандир", — деди. Шу вақт даричадан Ҳасанали кўринди, қўлида бир меш қимиз кўтарган эди, даричадан туриб меҳмонларни "Хуш келибсиз" қилди<sup>1</sup> ва қимизни узатиб Офтоб ойимга қараб кулди:

— Қимизни куявингиз сизга киргизди.

Офтоб ойимнинг қуши ўзига келиб, Кумушнинг юзига қон югурди. Ановилар бўлса, энди буларнинг ҳолига тушиб бўзрайишдилар.

Қимиз билан енгиллашкан Ўзбек ойим Ҳасаналидан сўради:

— Қачон келди?

— Ҳозир.

— Қаёққа йўқолған экан, аҳмоқ?

Ҳасанали изоҳ берди:

— Кеча ҳожи унга иш буюрган эканлар. Билмадим, кечанима билан овора бўлиб хизматни унуткан ва бу кун эрталаб эсига тушиб меҳмонлар келгунча бориб келарман, деб шунга кеткан экан. Борадирған жойи узогроқда бўлиб, кечиккан ва йўлдан келатуриб бу гуноҳига икки меш қимиз олған... Ҳали қимизни менга бериб: "Кириб айтинг, жуда уятлик бўлдим, кечирсинлар", дейдир,— деди ва кулди.

Карима отин:

— Кечирилмайдир, қимиз ўзи нима деган гап, — деди.

Офтоб ойим меҳмонларга қараб чиқғандан кейин Ҳасаналига кулиб жавоб берди.

— Ўзимиз жуда чўллаб келган эдик, шунинг учун кечирдик.

— Балли-балли! — деди Ҳасан, — мен кечирганингизни чиқиб айтаман.

— Чиқиб айтинг, — деди Офтоб ойим.

— Сиз-чи? — деб сўради Ҳасанали Кумушдан.

Кумуш бақадек қотиб ўлтурган Зайнабка қаради ва уялинқираб жавоб берди:

<sup>1</sup> Хотинлар орасида қулдан қочиш йўқ эди (муал).

— Мен ҳам кечирдим...  
— Сизнинг икки бошдан кечиришингизни ўзим ҳам билар эдим, — деди Ҳасанали, бўғоз-қисир уй ичини кулги босди.

Кулгидан сўнг Ўзбек ойим:

— Нега ўзи кирмади? — деб сўради.

— Қайнин отаси билан сўзлашиб ўлтурибдир...

Ҳасанали кеткандан кейин Ўзбек ойим Ойбодоққа — қимизни мис тогорага бўшатишка буюрди. Қўй сўйилиб тайёр бўлған эди. Ўзбек ойим қудачасининг раъйини сўради:

— Нима буюрасиз?

— Мендан сўраб ўлтурманг, меҳмонлар нимани хоҳласалар биз ҳам ўшанга ёрмиз.

Ўзбек ойим томоқ буюриш учун ҳавлига тушди. Зайнаб мис тогорага ағдарилган қимизни чўмичлаб косаларга қўйиб меҳмонларга тутди.

## 9. ҲОЖИ ЭТАК СИЛККАН

Тўрда қутидор, унинг ёнида маҳалланинг имоми Юнус Муҳаммад охунд, юрт оғаси Пирназар жаллод<sup>1</sup> ва Сотиболди отлиғ яна бир кекса ўлтурап эдилар. Пирназар жаллоднинг ёнида Отабек ва Сотиболди аканинг қаторида Юсуфбек ҳожи эдилар. Оёғда Ҳасанали мешдан қимиз қуяр эди.

Сўз тўртингчи куни бўлиб ўткин қипчоқ қиргини устида кетиб, Юсуфбек ҳожи бу тўғрида сўзлар эди.

— Мен биз халқнинг одам бўлишимиздан тамом умидимни кесиб қўйдим... Эсимни таниганимдан бери амал демай, мансаб демай фақат шу мусулмонлар манфаатини кўзлаб келиб, оёғига ўзини қушбеги, мингбоши олған уч-тўртта манфаатпарастлардан гўё ёш бола каби алдандим... Улуламир бўлған киши ҳам шу манфаатпарастларнинг хароб фикрларига қулоқ бериб, биздек одамлардан бу тўғрида бир оғиз кенгаш сўрашни унуган. Ҳолбуки, Мусулмонқули балосидан уни нажотка чиқаргучиларнинг биттаси биз эдик. Натижада эрса сўзи — сўз, кенгаши — кенгаш бўлғанлар шу уч-тўртта калла бузарлар бўлиб,

<sup>1</sup> Илгариларда жаллодлик қилиб, ҳозирда бу касбни ташлаган. Аммо жаллод лақаби қолган (муал.).

бизга ўхшаганларнинг даражамиз ёш боладек алданиш экан...

Юнус Мұхаммад охунд унинг сўзини бўлди:

— Эй ҳожи, — деди, — ҳамма фасод улуламирда, агар улуламир дуруст одам бўлса, уч-тўртта муттаҳамнинг ёмонлиги ҳеч қаерга бормас ва бунча гуноҳсиз бечоранинг қони ўринисиз тўкилмас эди. Жаноби пайғамбари худо ҳадиси шарифларида айтадирларким, "Бисмиллаҳир-роҳманир-роҳим қола ан-набиу алайҳиссалом: Изо васада ал-амру ило гайри аҳлиҳи фантазир ас-соата, яъни ул сарвари коинот марҳамат құлурларким, агар бир қавмнинг иши ноаҳл одамға топширилған бўлса, бас, ўшал қавмнинг қиёматини яқин бил, яъни ҳалокатига мунтазир бўл", деб. Бас, бизнинг корларимиз ҳам кўб фурсатлардан бери ноаҳл одамларнинг қўлиға қолиб ва ҳар замон ул нобакорлар бизларнинг бошимизга анвоғи кулфатларни соладирлар. Илоҳи кори бадлари ўз бошлари бирлан дафъ бўлгай.

— Саддақта ё расулиллоҳ<sup>1</sup>, — деди ҳожи ва ҳадисни такрорлади.

— "Изо васада ал-амру ило гайри аҳлиҳи фантазир ас-соата" —вой бўлсин биз бадбаҳтларнинг ҳолига, — деди. Бир оз маъюсланиб тўхтади ва домла тарафидан бўлинган сўзини шу гаплар билан тамомлади:

— Шу кунгача бўлмағанларга бўлишмоқчи бўлиб умримнинг ниҳоятига етиб қолдим, — деди. Соқолини тутамлади. — Бу соқол шу эл қайғусида оқарди. Бу кўнгил шу манфаатпастлар таъсирида қорайди. Ешим олтмиш бешка етиб бир вақт бўлсин ибодатимни жаноби ҳаққа бевосита йўналтирганимни ва кўнгил кўзим очилиб қилған саждами хотирлай олмайман. Бу алданишим эрса, ҳақ тарафидан бир танбеҳ, бўлмағанларга бўлишмоқчи бўлғаним учун бир киноядир. Энди мундан кейинги беш кунлик умрим дунё можароларидан этак силкиб тўшағи охират тадорикини қилмоғим учун ганимат кўринадир.

Бу сўз мажлиска бир маъюсият берди. Кўб вақт ҳаммалари сукутда қолдилар. Ҳожининг гапи айниқса Пирназар акага таъсир қилған эди. Ул ўз ҳунари руҳида мулоҳазасини сўзлади:

<sup>1</sup> Саддақта ё расулиллоҳ — тўғри айтдингиз, ё пайғамбар.

— Ёмонларни битта-битта, териб-териб бош кесмасдан элни тинчтиш қийин, — деди.

Бу сўздан кейин мажлис ҳожининг оғзиға қарадилар. Ҳожи кулиб қўйди, бир оздан кейин:

— Тўғри айтдингиз, жаллод, — деди, — бу тақдирда ёнингизда ўлтурған бизнинг ўғулни ҳам кўмакингизга чақира оласиз...

Ҳамма-кулиб юборди. Қутидор ер остидан Отабекка кулимсираб қаради. Отабек дадасининг киноясига тушиниб қип-қизил лавлағидек бўлди. Яхшики, қутидор ва Ҳасаналидан бошқа ҳеч ким бу кинояга тушинас эди.

Пирназар ака жиддийча Отабекка қаради.

— Отабек менга ўҳшаган жаллодкина эмас, амири лашкар бўла оладир. Сиз фотиҳа берсангиз ва Отабек амр берса мен худо ҳаққи ёмоннинг бошини олишдан қайтсан, — деди.

— Бизнинг каттадан-кичигимизнинг, — деди ҳожи, — топқан-тутқанимиз фақат бош олиш... Биз ўйлаймизки, гўё бош олиш билан олам тинчийdir ва биз ўз хоҳлағанимизни қила оламиз. Тузик, жаллод айткандек, ёмоннинг бошини олмоққа мен ҳам қарши эмасман ва лекин бунинг нозик шартлари бор: аввало манфаати шахсиясидан кечиб, фақат эл баҳти учун бош тикканлар жамоаси керак ва бу жамоанинг ўз маслаки йўлида кузаткан маълум бир нишонаси бўлмоғи зарур. Ана шундан кейин ҳалиги нишонага қараб интилишда оёғ остига элашкан чўп-хасларни супира бориш лозим. Мана шундагина тўкилган қонлар ўринлик ва машфуръ, берилган бошлар чин қурбон ҳисобланадирлар. Йўқса, сизнинг бош олишингиз ҳам ановиларнинг қиргинидан фарқлик бўлолмас, — деди ва бир оз тўхтаб олғандан кейин афсусланди, — шу ёшга стиб бу халқ орасида ҳалиги жамоани уч-тўрт нафардан ортиқ учратолмадим, афсус.

Яна бир муンча гаплар ўткандан кейин ҳаммалари масжидга чиқиб пешинни ўқуб кириш учун қўзғалдилар. Отабек ҳам кўбчилик билан бирга қўзғалған эди, Ҳасанали уни тўхтатди:

— Сиз тўхтанғиз, Отабек, — деди. Кишилар ҳавли юзиға тушкандан кейин, — ичкарига бир кириб чиқмасангиз айб бўладир... Бояги ишингизни бўлса зўрга ёлғон-яшиқ билан уларнинг кўнглидан чиқардим.

Отабек ниҳоятда бўшашқан ҳолда қайтиб ўрнига ўлтурди:

— Майли, бўлмаса... — деди.

## 10. ҲАСАНАЛИНИНГ ҲИЙЛАСИ

Киши ортиқча қўрққанда гангид аъзоси ҳаракатсиз ва оғриқ ҳолга тушадирким, албатта буни биз қаттиғ қўрққандан деб биламиш. Дарҳақиқат, бизнинг қаршимизга йўлбарс чиқса, биз қаттиғ қўрқамиз, чунки бизни ўлум кутадир, инсон учун дунёда ўлумдан қўрқунч нарса йўқ. Биноан алайҳи биз бундаги қўрқувни табиъий ҳисоблаймиз. Аммо қизиги шундаким, бизни дунё баҳти кутканда, бизга саодат башорати берилганда нега биз ўлум куткандаги ҳолга тушамиз ва узвий ташкилотимиз (ўрганизмамиз) биринчидаги ҳолатни кечирадир?

Отабек ҳам ҳозир шу кейинги ҳолатка тушкан эди. Эрта биландан бошланған бу ҳолат Ҳасаналининг кейинги сўзи ила тамом бир даҳшат касб этди ва ҳушсизларча ўлтуриб қолди.

Ҳасанали киргандан сўнг қилинадирған муомалани таълим берди:

— Онангиз билан Зайнаб анови можароларингиздан ха-барсиздирлар, буни қайин онангиз билан келинга ҳам уқдириб қўйғанман. Улар билан сўрашиб, сўзлашқанингизда, гўё уч ойдан беригина кўришмаганлардек бўлингиз.

Отабек бўзариб энтиқди:

— Ул-ку осон... — деди.

— Қийини қайси?

— Шу чоқғача тушинмадингизми?

Ҳасанали Отабекнинг юзига узоқ тикилиб қолди...

— Йигит эмасмисиз, эй баракалла.

— Йигитлик билан юракни тўхтатиш...

Ҳасанали ҳам ўйлаб қолди. Дарҳақиқат, Отабекнинг ҳозирги ҳоли нозик эди. Ҳасанали бир неча қайта бош қашиниб ва соқол тутамлаб ўйланди. Ниҳоят ўзича кулинди:

— Тўхтанг бўлмаса, — деди, — мен бир иш қилайки...

— Нима иш қилмоқчисиз?

— Сиз ҳозир сўраманг, аммо шу дақиқадан бошлаб ихтиёрингизни менга топиштиринг.

Отабек кучланиб кулди:

— Нима, ахир? — деб яна сўради.

— Сўраманг, — деди Ҳасанали, — сиз тинчкина таҳоратингизни олиб, намозингизни ўқуй беринг.

Ҳасанали шу сўзни айтиб меҳмонхонадан чиқди. Ота-

бек Ҳасанали тарафидан тасҳир<sup>1</sup> этилгандек туриб таҳорат олди ва меҳмонхонага кириб "таробиҳ" бошлади... Орадан ярим соат чамаси вақт ўткан эди, Ҳасанали ичқаридан чиқиб келди. Отабек эса ҳануз рукуъда<sup>2</sup>, сужуда<sup>3</sup> эди.

— Ўқуб бўлмадингизми? — деб сўради даричадан.

Отабек ёнига салом бермасдан унга қаради. Бу ҳолга Ҳасаналининг кулгуси қистаб келса ҳам, ўзини зўрга тўхтатти:

— Қани, мен билан юринг.

— Қаёққа юраман.

— Ичқарига.

— Тағинми?

Ҳасанали кулди:

— Энди кирсангиз бир мартаба бўладир, — деди. —

Сиз...ҳозир ўрта йўлакдан секингина маним уйимга киравсиз... Хотинлар намоз ўқуб ётибдирлар, сизни ҳеч ким кўрмайдир. Сиз киргандан кейин мен эшикни устингиздан ёпиб оламан-да, бир оздан сўнг олдингизга келиннинг ёлғиз ўзини киргузаман... тузикми?

— Тузик...

— Қани, туринг, тезроқ!

Отабек турди. Учрашишка ҳали анчагина вақт бор, шунинг учун унинг юраги тинчсумон эди. Ўрта йўлакка кирдилар. Олдинда борған Ҳасанали тўхтади ва унинг эшигини кўрсатиб "ўтинг!" деди. Отабек унинг айтканича қилиб ўзини уйга олди. Ҳасанали Отабекни уйга киргузгандан сўнг келиб эшикни қияроқ равишда ёпди ва даричани нариги уйдан қараганда киши кўринмаслик қилиб қийғоч очди. Шундан кейин ул ўзича нимагадир кулимсираб хотинлар олдиға кетди.

Отабек киргузилган Ҳасаналининг уйи Ойбодоқ она тарафидан тозагина йигишдирилиб, ўрта ҳоллик кишиларнинг уйидек асбоб, жиҳозлар билан зийнатланган эди. Деворлар ганчланган, шиплар сирланган, оёғ ости алвон гуллик кийиз билан тўшалган ва тахмонга кирпўш кўрпалар осилған эди. Отабек кафшини даҳлизига ешди-да, уй бўйинча бир-икки қайта юринди ва энтикиб нафас олди. Шу вақт тахмонга осилған кирпўш ўз-ўзидан

<sup>1</sup> Тасҳир — сеҳрланган.

<sup>2</sup> Рукуъ — намозда икки букилиб туриш.

<sup>3</sup> Сужуд — бошни ерга қўйиш.

қимирлагандек бўлди. Бу қимирлашни Отабек пайқамади. Ҳалиги қимирлаган кирпўш бирдан очилиб кетиб Отабек сўчиди... Бирав тахмондан унга қараб қулимсирап эди. Отабек титрар эди... Бир оздан сўнг иккиси ҳам ўзларини бир мунча тўхтатдилар-да, бир-бирларига томон юришиб келдилар ва сўзсизгина қучоқлашдилар... Отабек сунбул ислик соchlардан руҳ олар, Кумуш гўё унинг бағрига сингиб кеткан эди. Бу ҳол бир дақиқа чамаси давом эткандан кейин бир оз ажралишқан кўйи уйнинг оёғига юриб бордилар ва тиза-батиза ўлтурдилар... Бириси ҳам сўзлай олмас, фақат термулишар эдилар. Неча дақиқагача шу ҳолатда бўлдилар. Ниҳоят, Кумуш кулги аралаш кўзига ёш олди.

- Сиз... қочқоқсиз, — деди.
- Сиз...
- Мен?
- Сиз қувлоқсиз.
- Ажаб қиласман, — деди Кумуш ва шапалоги билан эрининг юзига секингина уриб қўйди.
  - Бу ёққа ҳам...
  - У ёққа Зайнаб урсин.
  - Зайнабнинг..., уришка ҳаққи йўқ.
- Кумушнинг кўзида ҳалигача кўрилмаган бир шодлик ўйнади:
  - Тўғри айтасизми?
  - Тўғри айтаман!
  - Мана бўлмаса, — деди Кумуш. Отабекнинг иккинчи юзини ҳам силагандек қилиб қўйди. Яна қулимсирашиб, термулишиб қолдилар...
  - Бираvnинг ғамида куйиб қаридим, — деди Кумуш.
  - Бескор айтасиз... Мени айтсангиз тўғри.
  - Сизнimi? — деди Кумуш. — Сиз энди қирчиллабсиз!<sup>1</sup>
  - Тўғри гапирмадингиз.
  - Тўғри гапирдим.
  - Аммо сиз...
  - Мен?
  - Кейин айтаман...
- Кумуш ўпкалади:

<sup>1</sup> Қирчиллаш — одатда қорға айтиладир. Масалан, қаттиг совуқда ёқган қор қирчиллайдир. Шундан олиб, айни стилган йигитларни қирчиллама йигит, дейдилар (*муал.*).

— Айтинг ҳозир, — деди ва жоду кўзини алла қандай ҳолатка қўйди. Отабек жавоб ўрнида Кумушнинг юзидан ўпди... Кумуш ўзини қутқазиб ўрнидан турди.

— Яхши қолинг энди.

Отабек тушиналмай унга қаради:

— Нима бўлди сизга, қаёққа борасиз?

— Марғилонга...

— Бу кун кеч бўлиб қолди, эртага кетарсиз.

Кумуш кулиб Отабекнинг юзига урди:

— Бизнинг овлоқда кўришканимизни, — деди, — ойим ва Ҳасанали отамдан бошқа ҳеч ким билмайдир, айниқса Зайнабингиз билса яхши эмас.

— Билса нима қиласадир?

— Ҳеч нарса қилмайдир... Яхши эмас-да, — деди, — бир оздан кейин чиқиб ойим билан сўрашинг, кирмаганингиз учун қайнин оналарингиз сўйинишиб ўлаёттиптилар.

Кумуш яна бир кулиб қарагандан кейин уйдан чиқди. Отабек энди тамом ўзини босиб олган, эндиги юрак уриши фақат ҳалиги фаришта томонга ошиқибқина эди. Ўзи ёлгиз қолғандан сўнг нимага бўлса илжайди ва Ҳасаналига илгаригидан ҳам қуюқроқ ўзида муҳаббат сезди. Шудақиқадан бошлаб кечирадирган масъуд кунларини тасаввурдан ожиз ва Зайнаб тўғрисида ўйлаб ҳам қарамас, бошқа гап эсига-да келмас эди. Орадан Кумушнинг уйга кириб олиши фурсат ўткандан кейин, уйдан чиқди ва парвосизча меҳмонлар ўлтурган уйга борди. Унинг келишини ўз уйидан кўрган Зайнаб югурганча Отабек орқасидан меҳмонлар олдига кирди. Уйдагилар Отабекни кўриш ила ўринларидан турганлар, фақат Ўзбек ойим "ҳап" этканча ўлтурап эди. Отабек Офтоб ойим билан кўришди... Офтоб ойим уни қучоқлаб юзидан ўпди ва кўзига ёш олди... Сўнгра кичкина қайнин онаси билан, Зайнабнинг опаси ва бошқалар билан сўрашиб чиқди ва кулимсираган ҳолда Кумушка "эсонмисиз..." деб қўйди. Кумуш ҳам "шукур" деб кулинди. Сўрашиш тамом бўлғандан кейин ўлтуриштилар. Отабек онасининг ёнига, Зайнаб унинг ёнига ўлтурдилар. Кумуш Зайнабнинг бу қилиғифа гижиниб бир-икки қайта ер остидан унга кўз юборди.

Фотиҳа ўқулиб куяв қайнин онаға узр айтди:

— Аввало сизлар келгунча қайтарман, деб эрталаб бир гуноҳ қилдим. Ундан кейин меҳмонхонадан қўзгалолмай иккинчи уятка қолдим...

Офтоб ойим:

— Боламизникини айби йўқ.

Ўзбек ойим:

— Қимиз киргузиб қайнин онангнинг оғзини ҳўлламаганингда нах балога қолиб эдинг, болам.

Кулишдилар. Карима отин:

— Кумушой бўлса, сен эримни яширгансан, деб Зайнабнинг энгка-тэнгкасини чиқарди.

Яна кулгу бир-бирига элашди. Зайнабнинг бояғи ишига Кумушнинг гаши келганини айтилмаса, ҳозир ул ҳам жуда очилған, кулар ва ер остидан Отабекка кўз қирини ташлар, Зайнаб бўлса Кумушни таъқиб этар эди. Мажлиска бир оз жимжитлик киргандан сўнг Отабек ҳам ўз томонидан бир кулгу тўқумоқчи бўлиб, Зайнаб билан Кумушка қараб олди:

— Мен бир ишка ҳайронман, — деди.

— Нимага? — деб сўради Моҳира ойим.

— Нега Зайнаб семизу Кумуш озгин?!

Ўзбек ойим жавобланди:

— Бунинг ҳикматини мендан сўра, болам, — деди, — Кумушнинг ўзингга ўхшаш серфикр кўринадир, Зайнаб бўлса менга ўхшаш қувноқ.

Отабекни ўзига ўхшатқани учун Кумуш қайнин онасидан рози бўлди. Аммо Зайнаб ўзини Отабекдан четка қоққани учун Ўзбек ойимга гижинди.

Ўзбек ойимнинг бу фикрига Карима отин қарши тушди:

— Янглишдингиз, ойи, — деди, — бундаги фарқни Юсуф-Зулайхо қиссаларини ўқуган киши биладир... Уч ой деган фурсат озгина вақт эмас, Кумуш хонимнинг озгани соғинишники!

Карима отин қош қўяман, деб кўз чиқараёди. Яъни Отабек билан Кумушни Юсуф-Зулайхога ўхшатиб, Зайнаб ва қариндошларини ўт ичига ташлаған эди.

— Ўзбек ойимни тўғри, — деди Моҳира ойим, — Зайнаб қувноқ, Кумушниса маним кўзимга ҳам серфикрга ўхшаб кўринадирлар...

— Тўғри-тўғри, — деди Хушрўй.

Кумуш билан Офтоб ойим орадан кечкан сирга тушиниб жим ўлтуар эдилар. Кумуш ер остидан Отабекка ризосизча кўз ташлади.

— Тўхтанглар-чи, — деди Отабек, ҳамма унга қарадилар, — ҳеч қайсиларингиз ҳам тополмадингиз.

— Тополмаған бўлсақ ўзингиз айтинг! — деди Шарофат чевар.

— Ўзларингиз тополмагандан кейин мен айтиб нима қилас?

— Мен топдим, ҳах шайтон! — деди Карима отин, — қизил гулнинг ҳам ўз олдинга, оқ гулнинг ҳам ўз олдига иси бор, демакчи!

Ҳамма бирдан кулишиб:

— Худда-худда! — дейишдилар.

Отабек кулиб ўрнидан турди ва "тополмадингиз, тополмадингиз" деганча уйдан чиқди. Кумуш билан Офтоб ойимнинг кўнгиллари бирдек бўлса ҳам бу кашфдан кейин Зайнаб билан Моҳира ойим анча сенгилашдилар. Бу қийчув орқасидан меҳмонларга қуюқ-суюқ берилди.

## 11. КУМУШНИНГ СЎЗ ЎЮНИ

Шомга яқин меҳмонлар тарқалишдилар. Меҳмонхонада ҳожи, қутидор, Ҳасанали ва Отабек қолған эдилар.

Ичкарида Ўзбек ойим меҳмонларни кузатиб бўлиб, Кумуш билан онасидан ҳўппак<sup>1</sup> олар эди.

— Мен сизлардан жуда хафа бўлған эдим. Сизларни чурук латтага тутиб, тоқчага ташлаш даражасига еткан эдим.  
Наҳотки уч йил бўлсаю — бир йўли ўз билгуларингизча келмасаларингиз. Ўғлим бечора ой ўтмасдан бўзчининг моккиси-дек қатнаб турса... Ахир маним ҳам ўзимга яраша обрўм бор. Тошкандда кимсан, Юсуфбек ҳожи деганинг кўчиман.<sup>2</sup> Худоёрхон ҳам бир кун кечаси келиб бизга меҳмон бўлдилар... Қушбегининг уй ичлари бўлса, бир ишни маним кенгашимсиз қилмайдирлар... Шунча обрў кўрган бир киши келиб-келиб наҳотки ўз қудасидан ва келиннidan мунчалик обруйсизлик кўрса... Шаҳардаги каттадан кичик эртаю кеч қулоқ-миямни ейдирки, ҳой, марғилонлиқ келинингиз келдиларми, нега шундоқ келинингиз бўлатуриб Марғилонга ташлаб кўйибсиз? Мен бўлсам ҳеч сўз тополмаганимдан айтаман: "Келинимнинг онаси касал эмиш... Иккинчи вақтда: — Келиним бечора мунглугу<sup>3</sup>... дейман. Энди кўрсам милтиқнинг ўқидек, пушти гулнинг тўқидек келиним бор экан... Мен бу адабсизга тагин ўзим ўлтурган уйимни бўшатиб берибман-а, — дер эди.

Ўзбек ойимнинг дали-гулилигидан Офтоб ойим ва Кү-

<sup>1</sup> Ҳўппак — гина, ўпка.

<sup>2</sup> Кўч — юқ, хотин (кўчма маънода).

<sup>3</sup> Мунглуг — ожиз, муштипар.

муш унга жуда ўзлашиб олғанлар, унинг сўзига тоҳ кулиб, тоҳ узр айтар эдилар. Ҳозир уйда Отабек бўлмагани учунми, нимадан бўлса ҳам ҳар нучук Зайнаб ўз уйида куймаланишиб ётар ва меҳмонларни Ўзбек ойимнинг танҳо ўзига ташлаған эди.

Тоқчаларга шамълар ёқилиб, вақт хуфтанга яқинлашиб қолғандан сўнг уйга Отабек кирди. Ул киргандан кейин Офтоб ойим билан Ўзбек ойим улар олдида ўлтуришни ёб билмадилар-да, сирлашиш учун бошқа уйга чиқиб кетдилар. Уларнинг чиқиб кетишини кутиб турғандек, қўлига бир чойдиш чой кўтартгани ҳолда Зайнаб кирди ва Отабекдан чой ичиб, ичмасини сўради. Отабек ичмайман, деб жавоб берган эди Кумуш ораға тушди.

— Мен ичаман, ўзингиз ҳам ўлтуринг.

Зайнаб унча қистатмади, ўлтуриб Кумушка чой қуийб бера бошлади. Кумуш уни сўзга солиб сўради:

— Маним бало-қазодек етиб келишим учун хафа бўлғандирсиз?

Зайнаб Отабекка қараб олди:

— Нега хафа бўлай, — деди, — сиз келмаганингизда ҳам ўзлари борар эдилар...

— Бормас эдилар, — деди Кумуш, — мен билан уришиб келган эдилар...

Отабек Кумушка ср остидан кулиб қаради, Кумуш ҳам кулиб жавоб берди.

— Шу киши бирав билан уришадирларми? — деди Зайнаб, — икки йилдан бери менга бир оғиз қаттиғ сўз айтканларини билмайман...

— Тўғри айтасиз, — деди Кумуш, — бу киши эмас, мен уришкан эдим... Бу кишида сира гуноҳ йўқ ва аразимизга бир тўнгуз сабабчи бўлған эди.

— Ким бало экан ул? — деди Зайнаб.

— Бизнинг шаҳарнинг энг ярамаси, — деди Кумуш ва Отабекдан сўради, — сиз эшитдингизми, яқинда ўшани бир беск ўлдирибдир?

Отабек кулимсиради:

— Эшитдим...

— Ўша бескнинг ҳақиға эшиткан кунимдан бери дуо қилиб келаман...

Зайнаб сўради:

— Сизларда қандай душманлиги бор экан?

Отабек "энди нима дейсан" дегандек қилиб Кумушка қаради. Кумуш бўлса парвосиз жавоб берди:

— Ўша тўнгуз уйланмакчи бўлиб маним бир ўртогимга совчи қўйиб юар эди... Мен эрса ўртогимни унга тегишдан айнаткан эдим. Айнатишм ҳалиги тўнгузнинг қулогига стиб мени бу кишига чақибdir. Бу киши бўлса, нега биравни ўртасига тушасан, деб мендан хафа бўлдилар...

“Бу киши” Кумушнинг ёлғон уюшдиришидан кулди, Зайнаб эрса эрини оқлаб тушди:

— Айб сизда экан, — деди, — сиз ҳам нега биравнинг ўртасига тушасиз?

— Айб мендаликка менда, — деди Кумуш ва Отабекка қаради. — Нафсилаамрга қараганда айб бизнинг орамизга чўп бўлиб тушкан холамнинг қизи Зайнабда, шундог эмасми? — деб сўради.

Отабек сачраб Кумушка юз ўғирди:

— Бу ўртаға Зайнабни нимага келтуриб тиқасиз, энди? Кумуш кулди ва эски ҳолини бузмади.

— Сиз ҳовлиқманг, бек, — деди, — тунови кун холамникига борған эдим, холам қизи Зайнабдан шикоят қилиб ҳамма гапни Ҳомид чўчқанинг қулогига еткизгучи ўз қизи Зайнаб гумбаз бўлғанини бирма-бир айтиб берди, билдингизми?

Отабек зўрга-зўрга хахолашдан ўзини тутиб қолди:

— Нима бўлғанда ҳам айб сизда, нега бошда ўзингиз бу ишка аралашдингиз, ахир? — деди.

Зайнаб:

— Ўзингизнинг аралашишингиз чакки-да, — деб қўйди.

Кумуш жиддий тус олди:

— Сиз айткандек Зайнаб гумбазда ҳам айб йўқ, менга қолса ҳамма гуноҳ бек отам билан хон ойимда, — деди.

— Орзу-ҳаваслик жойни қидирмасдан қизларини бир кишига бериб қўя қолсалар — албатта бу савдолар йўқ эди... Наҳотки икки йилдан бери неча бечорани зир қатнатиб овора қилсалар; Тошканд қишлоғи билан Марғилоннинг ораси озғина йўлми, ахир?

Отабек хахолаб юборди:

— Ҳамон айбни ўз бўйнингизга олмайсиз, астагфируллоҳ...

Зайнаб Кумушдан:

— Бек отангиз билан хон ойингиз ким?

— Ҳалиги мен айткан ўртогимнинг ота-оналари... Орзу-ҳавас қидириб бечора қизларини қаритиб қўйдилар.

— Нега сиз тайёр кувядан ўртогингизни айнатдингиз?

— Давлати бўлса ҳам ўзи тери намойиш эди... Киши давлат учун эрга теккандан ерга тексин...

— Албатта, — деди Зайнаб.

Отабек Кумушнинг сўз ўюнига ажабланар ва ҳой шайтон, дегандек унга қарап эди.

Кумуш яна тинчий олмади:

— Бизнинг уришиб қолишимиз учун Карим сандиқчи-нинг ҳам дахли бор, — деди.

Отабек жўрттага сўради:

— Қандай дахли бўлсин. Сизга қолса, бутун шаҳар дахлдор экан-да?

— Шошманг, жоним, — деди Кумуш, — нега ўйламай-нетмай эшигига бош уриб келган бир йигитни қувлаб соладир?

— Астағфируллоҳ... унинг қувланишига ҳам Ҳомид сабаб бўлган. Ҳомиднинг ёмонлигиға эрса сиз сабаб бўлғансиз.

Зайнаб нимадир сўрамоқчи бўлған эди, Кумуш унга йўл бермади.

— У ҳам эмас, бу ҳам эмас, — деди, — ҳаммаси худонинг тақдиди.

Отабек:

— Ана энди тўғри айтдингиз.

Кумуш:

— Икки ўртада дум қидириб қулоқдан ҳам ажралған пучуқ ойимнинг ҳоли ҳам худонинг тақдиди!

Отабек кулди. Зайнаб кейинги сўзларга тушина олмаган, шунга кўра Кумушдан изоҳлар олмоқчи эди. Кумуш унга изоҳлар уюшдиришни хоҳламаганлиқдан сўзни четка чалгитиб юборди:

— Неча ёшқа кирдингиз, Зайнаб опа!

— Ўн тўққузга шекиллик.

— Ҳали сиз бола экансиз, — деди Кумуш.

— Сиз нечага кирдингиз?

— Мени сўраманг, мен энди қариб қолдим...

Зайнаб унга ҳасадланиб қаради ва кучланиб айтди:

— Ҳали ёшқа ўхшайсиз-ку.

— Неча ёшқа кирган деб ўйлайсиз?

Зайнаб Кумушнинг тўлиб етмаган гавдасига ва ўн олти ёшлар чамалик губор тегмаган ҳуснига ҳайрон бўлиб, мулоҳазасини айтишдан қўрқди. Зайнабка қолса эҳтимолки Кумуш ўзидан ҳам ёш чиқар эди.

— Мен қаёқдан билай...

- Йигирмага кирдим.
- Мендан бир ёш катта экансиз.
- Сиздан албатта каттаман, — деди Кумуш.

Кумушнинг "албатта каттаман" деган сўзини Отабек ичидан тасдиқлади, унинг ҳуснадагина эмас, ақлда ва бошқада Зайнабдан неча баробар юқорида эканини ўллади. Орага бир неча дақиқалиқ сўзсизлик кирди. Отабек ер остидан Кумушка нигоҳ ташлар, Зайнаб гиламнинг попуғини чирмаб ниманингdir хаёлини сурар, Кумуш бўлса ҳеч кимга ҳам қарамай мудрагансумон ўлтурап эди. Кумушни бу ҳолда кўриб Отабекнинг юраги ачиdi...

- Йўлда чарчаған кўринасиз, Кумуш.

Зайнаб гиламдан кўзини олди, Кумуш мудрашдан сўчиidi...

- Қайдам...

- Биз кетайлик, сиз тинчиб ухланг, — деди Отабек.

— Майли... Хуфтанни ҳам ўқуй олмайдирған ўхшайман.

— Зарари йўқ, — деди, — ёлғиз қўрқмайсизми... Ёнингизда Зайнаб ётсинми?

— Зайнабниса сиз билан ётсин... Мен ёлғизлиқға ўрганганман...

- Онангизни чақириб берайлик бўлмаса.

- Раҳмат.

- Ёлғиз ётиб қолғанингизни айниқса ойим эшитса...

— Сиз билан Зайнабниса ёлғиз ётиб қолғанимни айтмасангиз ҳеч ким билмайдир... Ўрин ўшами?

Зайнаб нимагадир жуда ҳам қувониб кетди. Шунинг учун бўлса керак, Кумушни ўрин ёзишға қўймай ўзи партўшакни олиб ерга солди. Кумуш мудраган кўйи Зайнабка ташақкур айтиб тўрдаги бурчакка ўлтуриб олди. Отабек бериги бурчакдан туриб уни қўли билан янар ва кулимсираб хўмраяр эди. Кумуш мудраган кўйи, сузилган кўйи илжайиб жавоб берар эди...

Ўринни солиб битиргандан кейин, Зайнаб қаноатланиб уйдан чиқмоқчи бўлған эди, уни Кумуш тўхтатди:

— Зайнабниса, — деди, Зайнаб қаради, — бу кишини ташқарига чиқиб ётишға қўйманг, тузиқми?

- Нимага?

- Нимагаки, дадамнинг кўнглига гап келадир.

— Хўб, — деди Зайнаб ва эшиздингми дегандек қилиб эрига қараб олгандан кейин уйдан чиқди. Унинг кетича Кумуш Отабекка қаттиғ қилиб айтди:

- Қани, сиз ҳам уйингизга!..  
Зайнаб жуда ишонған ҳолда ўз уйига бориб етди.  
— Қиндан айтиб ётибман, эшитасизми?  
Отабек ўзини ғафлатка солиб Кумушнинг ёнига борди:  
— Сиз...  
— Мен?  
— Сиз қувсиз...  
— Мен қув эмасман, — деди кулиб Кумуш, — мен ҳали урушиглиқ ҳолдаман, ярашканим йўқ.  
— Боя нималарни сўзладингиз, сир очиладими, деб жоним бўғозимга келди.  
— Нега сир очилсин? — мен сиз билан ўткан ишлар ҳақида сўзлашмоқчи бўлиб тураг эдим, ўзи жўрттага кириб келди. Мен ҳам сўзимни тўхтатмай жўрттага бошқа йўлда айтиб чиқдим. Нима, бир нарса пайқадими?  
— Пайқамади-ку... Шундоғ бўлса ҳам мен жуда қўрқдим.  
— Ҳали шу юрагингиз билан уч кишини ўлдирдингизми, мен ишонмайман, — деди Кумуш ва Отабекнинг ханжар теккан қўлининг чизигига кўзи тушди. Пичоқ ёмон кесипти... Чумчук сўйдингизми? Қани чиқинг, мен ётаман.  
— Ёта берингиз.  
— Сизнинг олдингизда ешинаими?  
— Уялсангиз мен юзимни ўгириб турай, — деди ва юзини четка бурди.  
— Қараманг бўлмаса, — деди Кумуш ешинар экан, — "бўлғани йўқ, бўлғани йўқ" деган сўзни беш-олти қайта такрорлади ва ўринга кириб олғандан кейин ҳам "бўлғани йўқ, бўлғани йўқ" деб кулар эди.  
Отабек ниҳоятсиз "бўлғани йўқ" дан зерикиб қаради:  
— Алдамчи.  
— Бу алдашлар — алдаш эмас, сиз ҳали қараб туринг, қочқоқ.  
— Аниқ қўрқмайсизми ёлғиз?  
— Нега қўрқай, икки йил ёлғиз ётиб, энди жуда ўргандим... Эҳтимол сиз ёлғизлиқдан қўрқарсиз.  
— Кинояңгиз...  
— Бу киноя эмас, тўғри сўзим, — деди Кумуш, — мен бу ҳолда ёлғиз ҳам эмасман...  
— Бу нима деган сўзингиз тағин?  
— Яъни ҳамроҳим бор, деганим — мендан қўрқманг, деганим...  
Отабек яна тушинмади:

— Ҳамроҳингиз...

— Ҳамроҳимми? — деди Кумуш, — ҳамроҳим биравнинг хаёли, биравнинг фикри. Бас, бундан ҳам яхши рафиқ борми? Баъзи вақтларда бу йўлдош уйқудан ҳам ширин.

Отабек "ҳамроҳ"га тушинди ва ётиб Кумушнинг юзидан ўпди:

— Лекин мен бу сўзингизга ишонмайман.

— Нега ишонмайсиз?

— Негаки, сиз анови... кечаси ҳамроҳсиз эдингиз...

Пиш-пиш ухлар эдингиз...

Кумуш Отабекнинг елкасига қўлини ташлади:

— Ўшал вақтларда ҳамроҳсиз ухлаганим тўғри, — деди, — чунки биравлардан бутунлай умидим кесилган, ҳамроҳим менга ҳамиша умидсизликгина берар, даҳшатимнингина ортдирар эди. Аммо ўша кунларда уйқу менга жуда ширин бир нарса бўлиб қолган, мен уйқудагина биравларни кўрар ва кундузлари ҳам уйқу қидирар эди. Энди бўлса яна йўлдошим хаёл... Тағин нима дейсиз?

— Ҳеч нарса демайман... Лекин сиз икки йил бурунги Кумуш эмассиз.

Кумуш кўрпага бурканиб олди.

— Чиқинг... уйқум келди.

Отабек зўргагина ўрнидан турди... Ул узоғлашқандан кейин Кумуш секингина юзидан кўрпани олди ва мудроқ кўзлари билан Отабекка кулимсираб қаради. Отабек ҳавлидаги оёғ товшини эшлиб, тоқчадаги шамълардан утласини ўчириган эди, даричадан Зайнаб кўринди: "Ҳали ҳам шу ерда экансиз, мен сизни ташқарига чиқгансиз, деб ўйлабман..." деди. Отабек жавоб бермай қолған шамъларни ўчириди. Зайнабнинг "ҳали ҳам шу ерда..." сўзи билан Кумушнинг кўзи уйқудан очилиб кеткан эди... Отабек эшикни ёпиб чиқди.

## 12. КУНДАШ — КУНДАШДИР

Кумуш қайин отаси билан қайин онасиға уч-тўрт куннинг ичидәёқ ўзини кўрсатиб қўйди, ширин ва ақллик муоамалалари билан уларни ўзига мафтун қилди. Юсуфбек ҳожи — "бу одам фарзанди эмас — фаришта" дер, орада Зайнаб бўлмаса "фаришта", деб атамоққа ҳам ҳозир эди. Ўзбек ойим бўлса эски кина ва адватларни қайтиб келмас дунёсига жўнатди. Теваракдан маргилонлиқ келинни кўриш учун келгучи хотинларға муоамалани яна ҳам

юқоририқдан туриб қила бошлади. Ҳар бир — "келинингиз ажабми?" деб Кумушка суқлангучи хотинларға "Маним чин келинім Марғилонда эди-да" дер эди. Гоҳо Ўзбек ойимнинг ўзи ҳам Кумушнинг ҳуснига ва муомаласига ажаблана бошлар, ҳожини овлоғроқда учратиб қолса, "алқазар, ўғлингиздан — уйланган хотинини қаранг" деб қўяр, ҳожи бўлса, "ўзинг билган сиҳирчи ҳинди сенинг ҳам бошингни айлантирибдир..." деб илжайганда, Ўзбек ойим — "рост, бу келиннинг ҳуснидан ҳам бошқа яна тагин бир алоҳида хосияти борга ўхшайдир!" деб кулар эди. Кумуш ўзини кўргали келгучи хотинлардан кўпроқ олқиши олса (албатта ошкора эмас), хотинларнинг жўнаши биланоқ даррав Ўзбек ойим Ойбодоқдан исириқ тутатдириб аввал Кумушка, ундан кейин кўнгли қолмасин, деб Зайнабка солдирар, агар Отабек кўриниб қолса, уни ҳам қуруқ қолдирмас эди.

Эгасини сийлаған итига сүяк ташлар, қабилидан қизлари туфайли билан қутидор ва Офтоб ойимлар ҳам жуда яхши иззат кўрар эдилар. Қутидор келганидан бери бир соат ҳам уйда бскор қолмай, ҳар кун Юсуфбек ҳожининг мухлисларидан бирининг уйида меҳмон ва ҳожининг суҳбатидан мамнун эди. Офтоб ойимни бўлса Ўзбек ойим ўтқизғали жой топмас, қуда сўзи ўрнига — синглим, деб хитоб қилас, ошни ҳам унинг раъйини сўрамасдан буюрмас эди.

Келганларининг ўн бешинчи кунигача шаҳарнинг казо ва казо хотинларини қабул қилиб ўткардилар. Яъни Офтоб ойим Тошканднинг юз боши ойимидан тортиб, понсад боши, қўрбоши то ўрда ойимларигача танишиб олди ва уларнинг ҳар бирларидан кутилмаган даражада иззат, ҳурмат кўрди. Бу ойимларнинг ҳар бирларидан — "албатта бизнигiga меҳмон бўлмасдан кетмайсиз, эгачи" деган таклифлар ҳам ҳисобсиз эди. Ўзбек ойимнинг лозим тошича бу таклифлардан фақат ўн чоглуги ижобат этиладирган бўлиб ва биринчи мартаба Нормуҳаммад қушбигининг хотини Сорабек ойимнигiga, яъни ўрдага борилмоқчи эди.

Ўн олтинчи кун меҳмон осги товсилланиб, Ўзбек ойим Сорабек ойимга ўзларининг боришларидан хабар юборди ва Ҳасаналига аравани қўшмоққа буюрди. Ўрда ойимларининг турмушларини кўрмагани учун Кумушнинг ҳам улар билан бирга боргуси келди ва эрталаб чой устида Зайнабни тилга келтуриб, "Зайнабингиз ҳам борадими" деб

сўраганида, Ўзбек ойим: "Зайнаб бир мартаба бориш бўлса борған" деб жавоб берди.

— Мен-чи?

— Сен ҳам бормайсан.

Кумушнинг маъюсланиб қилған сукутидан кейин, Ўзбек ойим мундог изоҳ бериб чиқди:

— Сен Тошканддаги Юсуфбек ҳожининг келини бўласан, болам! Чорламаган жойга<sup>1</sup> бориш учун сенинг кафшинг кўчада қолған эмас, — деди.

Отабек қаёққадир от миниб кеткан эди. Юсуфбек ҳожи билан қутидор Солиҳбек<sup>2</sup> охунднинг Кўкалдош ҳужрасига меҳмон бўлиб кетканлар. Фақат бу кун уйда қоладирғанлар — Кумуш, Зайнаб ва Ойбодоқ эдилар.

Ўзбек ойим йўлаккача кузатиб чиқган Кумуш билан Зайнабка қараб арава ёнидан кулди:

— Икки кундаш уйни холи топиб тагин юлишманлар! Ойбодоқ, сен кундашлардан хабарсиз қолма!

Офтоб ойим аравага минар экан;

— Худой сақласин, ойи! Шукур, иккаласининг ҳам ақл-ҳуши бошида! — деди.

— Булар кундаш эмас — эгачи-сингил-ку! — деди отнинг жиловидан Ҳасанали.

— Мени ташлаб кетканингиз аламини Зайнабдан олмасам — кимдан олай, — деди кулиб Кумуш ва дарбозанинг ҳалқаси билан ўйнар экан, — а, юлишамизми? — деб Зайнабдан сўради. Зайнаб жавоб бермади.

Ўзбек ойим Ойбодоққа баъзи таълимотларни бергандан кейин келинларга:

— Тушда иссиғсиз қолманлар! — деди. Арава қўзгалди.

Зайнаб илгарироқ, Кумуш кейинроқ ичкарига қайтиб кирдилар. Кундашининг сўёзсиз, нессиз ўз уйига кириб кеткани учун ўйланиб, бир оз ҳавли юзида тўхтади, сўнгра бу ҳам ўз уйига бурилди.

Кундан-кунга Зайнабнинг сусайиб, ўзига бегоналашиб борғанини ул яхши онглар эди. Бу кун бўлса ўйнаб айткан сўзи жавобсиз ҳам қолдирилиб, бу ҳол яна унинг миясини қотирди. Кўнглида бир хирадлик билан бориб да-

<sup>1</sup> Чорлашдан мақсад махсус ҳозирликдан сўнг чорлангучига кийимлар, сарполар тикдириб меҳмонга чақиришидир (муал).

<sup>2</sup> Солиҳбек охунд додхоҳ (1812-1868) — замонасининг катта уламоларидан бўлган. Тошкандни руслардан ҳомоя қилган.

рича ёнига ўлтурди. Зайнабнинг ҳасадини қўзгатмас учун Отабек билан муомалада қилған эҳтиётлари заррача фойда бермаганига ҳайрон, энди қайси йўсунда миросани созлаш йўлларини ўйлар эди. Ўн беш кун ичидәёқ бунча кескинлашкан Зайнабнинг ички адоватининг бир ойда қайси даражаларга бориб стишини ўйлар ва мироса бу ҳолда кеткан тақдирда бу уйда узоқ қола олмасини фаҳмлар эди. Лекин бу уйдан чиқиб кетишни, бир-икки ойлаб Отабекни Зайнаб қўлига топшириб қўйишини яна мувофиқ кўрмас, яъни Кумушда ҳам бир қизғанчиқлиқ ҳисси уйғонған... Фикри шу срга етканда қайси кунидир Отабекнинг Зайнабка бошқачароқ қилиб кулиб қарагани ва Зайнабнинг шу вақтдағи ойдек жозибалик тўла юзи кўрингандек бўлди... Бу кўринишдан сўнг ул сакраб ўрнидан турди-да, тоқчадаги ойнани олди ва ўзига қара-ди...

Маълумки, киши ойнага боққанда нечоғлиқ айбсиз бўлса ҳам ўзини бир камчилиги орқалиқ кўрадир. Шунга ўхшаш бу қарапшда Кумуш ҳам ўз-ўзидан рози қолмади. Шаҳло кўзлар, ўсиқ жинггила кипраклар, қундуз қош ва қора холлар ва бошқа латофатлар ўзига писанд бўлмадилар... Ўзини Зайнабка қараганда сиқиқ, ёш, боласифат кўрди... Ойнани тоқчага қўйиб Зайнабка чинлаб ҳасадланган ҳолда келиб бояги ўрнига ўлтурди. Анчагина ўйлаб ўлтурғандан кейин кўнглига "у мени сўйса бўлди-да" деган гап келди... Ўзининг бу ҳукмига рози қолмади, гўё ўзининг сўйилиши бир неча ойлиққагина ўхшар, Зайнабнинг тўлған ойдек юзи бу сўйилишка шу беш-ён куннинг ичидәёқ хотима бсраторгандек кўринар эди. Шу кўриниш орасида Зайнабни яна ўз кўзидан яхшилаб ўткармакка ва унинг ҳусн кучини синамоққа қарор бериб ўрнидан турди...

Кумуш киргандан Зайнаб дарича ёнида тўппи тикиб ўлтуар эди.

— Ойим айткандек, — деди кулиб Кумуш, — сиз билан юлишқали келдим.

Зайнаб тўпписини қўйиб ўрнидан турди:

— Мен ҳам олдингизга чиқайми, деб турған эдим...

Кумуш истеҳзо билан кулди:

— Тўппи тикиб ўлтурибсиз-ку, маним олдимга чиқармидингиз, баракалла сизга, — деди. Зайнаб бир сабаб кўрсаталмай ўнгтайсиз ҳолда қолди. Дарҳақиқат, унинг бу иши очиқдан-очиқ болаларча кеткан эди. Кумуш уни

үнгтайсиз ҳолдан чиқариш учун тикилган түпнини ердан олиб күрган бўлди.

— Чокни яхши тикар экансиз, кимга?

— Биравга атаганим йўқ, ахир биттаси кияр... Ўлтуринг.

Икки кундаш қаршина-қарши ўлтуришдилар. Кумуш унга тикилиб-тикилиб қарап эди... Зайнаб бояги ўнгтайсизликдан ҳали чиқиб стмаган, қизаринқираб ерга боқсан эди. Бир-икки дақиқани сўзсиз кечирдилар.

— Чиқмаганимни ҳам кўнглингизга олибсиз-да, — деди ниҳоят Зайнаб.

— Нега кўнглимга олай, мен ёш боламанми, — деди, — келганимга ўн беш кун бўлмасдан ўзингизни четка тортиб бошладингиз... Мен сиз билан эгачи-сингил бўлармиз, деб ўйлаган эдим...

— Ҳали нима бўлибмиз... Арзимаган гапни ҳам кўнглингизга олаберсангиз...

— Бу арзимаган гапми? — деди Кумуш, — уйда ҳеч ким йўқлигини билатуриб ўзингизни четка тортасиз... Бу эса юзингни кўришка тоқатим йўқ деганингиз бўладир.

— Қўйинг-чи... Ўзингиз ҳар бир нарсани ҳам кўнглингизга олаберар экансиз... мен унақа эмасман...

Бошланишда анчайин ҳазилга ўхшаб кўринган бу кинахонлиқ кутилмаган жойда жиддий бир тус олиб кетди. Кумуш ўн беш кунлардан бери йигилиб келган аччиғини бир варакай тўкиб солди:

— Мен кўнглимга олсан арзидирганини билиб оламан, — деди.

— Олдингизга чиқмаганим юзингизни кўрмаслик учун бўлғанини сиз қасқдан билдингиз, маним ичимга кириб чиқмагандирсиз-ку, ахир?

Зайнаб ҳам анча қизишиб олди. Кумуш ундан ҳам ошиб тушди:

— Билиш учун ичингизга кириб чиқишим шарт эмас... Баъзи ишларингиз ичингиздагини менга очиқ сўзлайдир.

— Қайси ишларим?

— Сўраманг...

— Билмаган бўлсан билдириб қўйинг, ахир.

— Айтсан яна аччиғингиз қистайдир...

— Тўгри гап бўлса аччиғим сира қистамайдир.

Яқинроқда юмиш қилиб юрган Ойбодоқ эшиитмасин учун секинроқ товушда:

— Қистамаса айттай, — деди Кумуш, — эрингиз маним олдимға кирса, нега ишиңгиз бўлса-бўлмаса кириб ўлтуриб оласиз-да, ёлғиз қолғанимда кирмайсиз?

— Шундоғ деярсиз, деб турған эдим ўзим ҳам, — деди Зайнаб, — киришимни ҳам кўнглингизга олған бўлсангиз, энди мундан сўнг кирмаганим бўлсин.

— Қани, тўғри гапка аччиғингизнинг қистамагани?

— Ахир, эрингиз билан ёлғиз ўлтурғанингизда мундан сўнг кирмайин деяпман-ку.

— Эгриликка олманг, Зайнаб, — деди Кумуш, — мен бу гапни ёнимда эрим бўлганда кирма, деб айтмадим, балки бояғи сўзимнинг исботи учун айтдим...

Бу ўринда иккиси ҳам жим бўлдилар. Ойбодоқ дари-чага келган эди:

— Тушлик ош вақти бўлдими, нима томоқ қилсами-кин?

Кумуш Зайнабка қаради:

— Нима томоқ буюрамиз?

— Сиздан сўрайяпти...

— Зайнабниса яхши кўрган томоқни қилингиз, — деди Кумуш.

— Лагмон қилайми? — деб Ойбодоқ Зайнабка қаради.

— Томоққа иштиҳом йўқ, ўзингиз билганингизча қила-беринг.

Ойбодоқ кетди. Унинг кети билан Зайнаб "тавба" деб қўйди.

— Тавба деманг, Зайнаб... Бу гаплар айниқса сиз билан менга келишмаса ҳам азбаройи мени ёлғиз ташлаб қўйғанингиздан айтдим... Мен сизнинг уйингизга бутун умрга келган эмасман... Атиги уч-тўрт кун қайин ота, қайин оналаримни кўриб кетиш учунгина келганман. Шунчаликка бир-биравимиздан четлашиб, минғайишиб юришимиз кишига оғир келар экан.

Кумушнинг "уч-тўрт куни..." билан Зайнаб ёришиб кеткандек бўлди:

— Вой ўлай, Кумуш опа, — деди Зайнаб бўшашибкан оҳангда, — чиндан ҳам кўнглингизга олибсиз дейман. Кўнглимда тарикдек ёмонлигим бўлса, эртагача етмайин.

"Кетиш" сўзини эшлитиб онд ичиб бошлаган Зайнабка Кумуш ичдан кулиб қўйди ва "Энди ўлсам ҳам кетмай, сен қараб тур!" деб янди.

Шундан кейин орадаги гап-сўз тўхтағандек бўлди. Кумуш тизасини қулоқлаб ниманидир хаёлида, Зайнаб бўлса

қатимини узун тортиб түпписини тикар эди. Аңчагина шу ҳолатда қатим тортқандан сүнг Зайнаб секингина қарши-сидеғи ғайри расмий ёға ёвларча қаради. Ұзоққина қараб турғандан кейин ўзига ҳам сездирмаслик қилиб энтиқди, яна уч-түрт қатим торти...

— Сиз мунчалик құрқасанғыз ҳам бўлар эди...

Кумуш бир оз жавобсиз қолди ва сурилиб деворга суюлди:

— Нимадан ҳам құрқасам бўлар эди?

— Ахир... жек кўрмасанғыз<sup>1</sup> ҳам... дейман-да...

— Мен кимни жек кўрибман?

— Биларсиз ахир, кимни...

— Уят, Зайнаб!

— Сизники ҳам уят!

Яна икки кундаш ҳужумга ҳозирланишқан хўроздардек бир-бирларининг устларига ҳурпайишдилар.

— Нимам уят? — деб сўради Кумуш.

— Мен эрим билан ўлтурганда устимга кирма, дейи-шингиз албатта уят.

— Аввало мен бу сўзни сизнинг ҳалиги қилингизга қарши айтдим. Агар сиз буни чинга ҳисоблаган бўлсанғыз, мен ҳам сиздан чинча сўрайин: сиз эрингиз билан ўлтурганда мен устингизга кирдимми?

Зайнаб бу савоннинг жавобига қолғанда бир оз тутилиқди. Чунки, Отабек Зайнаб ёнида бўлғанда Кумушнинг кирганини хотирлай олмади.

— Сиз кирсанғыз албатта кўкрагингиздан итармас эдим, — деди Зайнаб. — Ўзингиз жек кўрганингиз учун менни ҳам ўзингиздек фаҳмлаб кирмайсиз.

— Кишини бўғасиз, Зайнаб! Гапка темирчилик яхши эмас!

— Гапка темирчиликдан худой сақласин, ота-бобом темирчи ўткан эмас.

— Ким сизга — отанг темирчи деяпти?

— Ахир сўзингизнинг сираси шунга келади-да...

— Тавба, — деб кулди Кумуш, — жек кўрасан, деб бир айтасиз, ўзингдек фаҳмлайсан, деб узиб улайсиз, сен қўрқасанғ ҳам бўлади, деб тағин нина тақасиз... Ман шуни гапка темирчи, деб айтадилар.

<sup>1</sup> Жек кўрмоқ — гайирлик қилмоқ, қизганмоқ

- Рост-да ахир, сиз қўрқмасангиз ҳам...
- Сўзлай беринг.
- Ахир...

Зайнаб ўзининг хатосини онглади ва гапуралмай ғўлдиради. Кумуш эса буни сезиб Зайнабнинг ўз оғзидан иқорор этдириш кўйига тушди.

— Мен тушиндим, — деди, — сен қўрқмасанг ҳам бўлади, эринг сени яхши кўради, демакчисиз.

Зайнаб ишини тўхтатиб бўзрайғанча Кумушка қараб қолди... Бу хатосини ўнглаш учун эсига ҳеч гап келмас эди:

— Ахир... менга ўхшаш сизни ҳам ишондирлиб қўйғандирлар.

— Сизни нимага ишондирғанлар?

— Ахир... Мен сенсиз туролмайман, деб сизга ҳам айткандирлар...

— Ҳеч.

— Сизга айтмаган бўлсалар... менга юз қайталаб айтадирлар... У кишини сизга ҳам шунақалар, деб ўйлабман...

Ўзи асло ишонмаған шунча ёлғон гапларни бояғи довдираш ҳолатида илҳом равишида тўқиб юборди. Унинг бу довдир гаплари ғалаба қозонмоқчи бўлган Кумушни доғдиратти, бояғи ойна ёнида туғилған шубҳаси чинга чиқғандек бўлди ва муҳқокама хусусиятини йўқотди. Зайнаб тўғри айтади, деб ўйлади, агар уни яхши кўрмаганда Тошкандга келишимни кутиб ўлтурармиди?..

Зайнаб бу ёлғонлаш натижасидан қўрқиб, ўнгу терс ишига ёпишди. Кумуш моддий ҳаётидан айрилған жони-вордек бўшашиди. Ойбодоқ она тарафидан икки кундаш ўртасига қўйилған тушлик бир неча вақт совиб ётди. Зайнабнинг қўрқа-писа "олинг, опа"сидан сўнг икки тараф ҳам лагандан чимчиган бўлишдилар-да, бирин-сирин қўлни дастурхон четига артищдилар...

Шундан бирар соат кейин Отабек қайтиб Зайнаб томонидан қарши олинди. Уст тўнини ешиб Зайнабка бергандан сўнг, қайси уйга кириш тўғрисида ҳавли юзасида бир оз тарааддулланиб қолди. Теварагида гилдирлаб юрган Зайнабнинг уйига кирабериш учун Кумушнинг мулоҳазасини қилар, Кумушнинг олдига кирмак учун Зайнабни ўйлар эди. Кумуш уйда кўринмади, шунга кўра "ухлагандир" деб ўйлаб Зайнаб билан кирди. Зайнаб оёғи олти, қўли етти бўлған ҳолда эрини тўрт қават кўрпача устига ўтқузиб, ёнига учта пар ёстиқни уйди. Эрининг маҳсисини артишка кўмаклашиб, елпиб қўймоқ учун изн сўради. Отабек узр

айтиб бунчалик мәхрибончилиқ маңносидан чүчиб қўйди. Отда келган бўлса ҳам куннинг иссиғлиғидан бир пиёла чойга муҳтож эди. Чой сўзи оғзидан чиқмасданоқ Зайнаб ўчоқ бошиға югуриб кетди. Унинг кети билан Кумушнинг уйига қаради. Эшик ва даричалар очиқ бўлсалар ҳам уйда бирав кўринмади.

Кумуш келгандан бери Отабек кун сайин ўзини сиқиқроқ бир доирага кириб борғанигинан сезар эди. Адимини санаб босиш, бир чўқиб саккиз ёққа қарашиб каби эҳтиётларга таълимотсизоқ ўрганиб қолған, бунинг устига бир хил ўнгтрайсизлиги ҳам йўқ эмас эди... Унинг ўткан кунлари, яъни Кумушка Марғилонда қиласидирған муомала ва алоқаси Зайнабка қоронғи, шу қоронғилиқдан фойдаланиб Зайнаб билан муомаласи ўзи тилаганча. Аммо энди ўша ҳолатни давом этдириш мумкин эмас эди. Кумушка кулиб қараса, Зайнабка ҳам шундоғ қилмоққа, унга қандоғ муомала қилса, бунга ҳам шундоғ қилишга мажбур эди. Бироқ бунинг биринчиси юракдан, иккинчиси... Биринчисини тавсиф қилиб кўрсатиш нучукким биз шу ўрингача кўб қоғозларни қоралаб келамиз, ўқуғучини ҳам зериктирмай орқамиздан эргашдиргандек бўламиз, чунки Отабек ва Кумуш ишқларида самимият, яна тўғриси шеърият бор эди. Иккинчи масала устига ўтиб таҳлил қилмоқчи бўлсақ, Отабекда мажбуриятдан бошқа ҳеч гап тополмаймиз, топқан билан ўқуғучига қизиқарлиқ бир нарса чиқмайдир. Қаҳрамонимизнинг ҳозирги "мажбурияти" сабабларини муҳтарам ўқуғучилар яхши ҳис этсалар ҳам яна биз бир даража ўз томонимиздан уларни санаб кўрсатамиз:

Дин адолатка буюрадир ва ота-онанинг ҳурматлари кўндаланг, мажбуриятнинг энг кучлиги ҳам нозиги — мундан бир неча ҳафта илгари Зайнаб аввал мартаба юрак дардини кўз ёшлари ичиди очиб берди. Ҳаммадан ҳам мана шу кейингиси Отабекни сиқиб ташлаган эди. Бу дард айниқса Отабекка уч йилдан бери синашта, ул бу дарднинг аччиғ-чучугини уч йил бўйи тотиб келар ва шунинг учун ҳам бояги оғирлиқни ўз устига олмоққа мажбур эди...

Зайнаб унга икки пиёла чойни ичиргандан сўнг сўради:

— Сизни кеч қайтарсиз, деб ош қолдирмаған эдик, совуғроқ бўлса ҳам озроқ олиб қўйған эдим... есангиз?

Отабек очиқиб келган эди, "майли, беринг" деди. Бояги гап билан ейилмаган лағмон Отабекнинг олдига келди.

Устидаги қиймаси билан лаганинг бузилмағанини кўриб  
Отабек сўради:

— Ўзларинг емадингларми?

— Едик. Кумуш опам ҳам шу ерда эдилар... Лагмонни унча хушламас эканлар шекиллик, яхши емадилар... У киши смаганларидан кейин мен ҳам сб ўлтургали ийман-дим...

— Емаган бўлсангиз, сиз ҳам олишинг, — деди бек.

Зайнаб эридан ийманмай биргалашди. Хўрак ораси Отабек Зайнабдан сўраб, Кумушнинг ухлаб ётқанини билди. Томоқдан кейин Отабек ҳам бир оз ухлаб олиш учун ётди. Кўзи уйқуга борғач, фақат шуни кутиб ўлтурган Зайнаб қўлида елпугичи билан ёстиқ ёнига келди. Эри жуда ухлаб кеткандан сўнг елпий бошлади... Елпир экан, Зайнабнинг кўзи Кумушнинг уйида эди...

Зайнаб ўзининг бу тасодуфий муваффақиятини кундаш назаридан ўткузиб олмоқчи ва бояги даъвосини бир дара-жа амалда ҳам кўрсатмакчи эди.

Зайнаб шу ҳолда узоқ фурсат эрини слиди ва натижада маълум кўрукни одатдан ташқари бир муваффақият ичида кундаш назаридан ўтказди: нима юмиш биландир уйдан чиқган Кумуш Отабекнинг ёстиғи ёнида қўлига елпугич ушлаган Зайнабка кўз қирини ташлаб ўтди.

Бирар соатдан кейин Отабек уйғонди. Зайнаб ҳам кундаш юрагини ун қилғучи ел тегирмонини тўхтатмоқча мажбур бўлди.

Отабек уйга кирганда ёстиқ бетини тартибсиз соч ўримлари билан чулғатиб Кумуш ухлар эди. Отабек бир неча дақиқа унинг уйқулиқ ҳолатига термулиб қолди ва унга роҳатсизлик бермас учун секингина орқасига қайтди. Уй эшигидан чиқар чогида яна бир қараб олди... Энди уйқулиқ кўз очилған эди.

— Тинч ухлай беринг, мен кетаман.

Кумуш кўз юмиш ўрнига ёстиқдан бошини узди ва ерга тушкан рўймолини ўраб, ўлтурди. Унинг кўзи уйқудан қолған кишиларнинг кўзидек қизарған эди. Отабек қайтиб кирди.

— Нега қўзгалдингиз, ухланг, — деди. Кумуш жавоб бермади, қовоғи солиг эди. — Кўзингиз қизариб кетипти, ухлай олмадингизми?

— Тобим йўқ...

— Худой сақласин, — деди бек ва Кумуш ёнига ўлтурди, — қаерингиз огрийдир?

— Билмайман, — деди. Күзи тоқчадаги алланарсаларда зди.

Отабек бу терс жавобни ҳазил фақылаб қулди ва Кумушнинг манглайига қўлини тегизди:

— Нега билмайсиз?

— Қўлингизни олинг.

— Нега олай?

— Мендан ҳазар лозим...

— Сиздан ҳазар қилмайман...

Кумушнинг кўзида бир турлик гилтилаш бор эди:

— Зайнабдан-чи? — деб сўради.

Отабек дафъатан жавоб бералмай ҳавли томонга қараб қўйди:

— Буни... мендан ҳам сиз яхши биласиз.

Отабекнинг аланглаб жавоб бериши Зайнабнинг бояги даъвосини чинга чиқарғандек бўлиб, Кумуш жуда ҳам тўнини тескари кийди ва юзини четка бурди:

— Ялҳақликни<sup>1</sup> қўйинг.

Отабек бу ҳолга тушинолмай, Кумушнинг кўзига жиқ тўлған ёш яна уни шошириб қўйди. Шундօг ҳам бўлса кулимсираб:

— Уйқудан сўл ёнингиз билан турибсиз, — деди.

— Чунки маним ўнг ёним билан турғузадирган кишим йўқ...

— Адоват шунинг учунми, ҳали? — деди бек ва кулиб юборди.

Кумуш кўз ёшисини артди:

— Ҳа, шунинг учун.

— Шунинг учун бўлса арзимайди...

Кумуш кўтарилиб кетди:

— Икки юзламалигингиз ва тил тегида тил сақлағанингиз ҳам арзимайдими?

— Тушинмай ётибман...

— Албатта тушинмайсиз ва тушинишни ҳам тиламайсиз.

Ул Кумушдан мундай терс гапларни умрида биринчи мартаба эшитар эди. Бир онда неча хил эҳтимолларни ўйлаб чиқди:

— Зайнаб сизга бир нарса дедими?

— Деди, "Сёnsiz туролмайман" деб айткан сўзларингизни ҳам деди.

<sup>1</sup> Ялҳақлик — икки юзламалик.

Унга нима бўлса ҳам икки кундаш ўртасидан анча гаплар ўткани бир даража маълум бўлиб, Зайнабнинг ёлғон-яшиқ гаплар билан Кумуш юрагига ўт ёққанини пайқади. Аммо бояги ярим жиддий вазиятини бузмай сўради.

— Зайнабнинг сўзига сиз ишондингиз?

— Ишонмайдирган гапми?

— Яхши, мен унга шундай деб айткан ҳам бўлайнин, лекин шунда ҳам сизнинг хафаланишингиз менга қизиқ туюладир. Айниқса сиздан бу гап...

Кумуш индамади. Отабек унинг орқа сочидан тутиб секингина ерга босди:

— Қани гапуринг-чи менга, орангиздан бир гап ўтдими, — деб сўради.

— Ҳа, ўтди, — деди Кумуш ва четка қараб қулимсиради.

— Ўн беш кун бўлмасдан?

— Мендан бошқа хотин бўлса Зайнабнингиз билан биринчи кунданоқ аразлашар эди...

— Худо хайрингизни берсин...

— Кесатманг.

— Кесатмасам гапуринг.

Кумушнинг рақобат ўти бир оз ўча тушкан эди, учтўрт кунлик можародан яхшигина ҳасрат очилди. Отабек ҳасратни ярим жиддий тинглаб борди. Зайнабнинг кейинги сўзи ва сўнгтиш елпитиш фожиъалари ҳам ҳасрат қолипига бирма-бир кириб чиқди. Ҳасрат тугалгандан сўнг Отабекнинг юзидаги бояги ярим жиддийлик кетиб, унинг ўрнини ўйчанлиқ олди. Ул шу ҳолатда анчагина сўзсиз қолди ва охирда ўзидан натижা кутиб ўлтурғучи Кумушка қараб кулиб қўйди.

— Нега куласиз?

— Чунки йигламоққа арзимайдир.

Кумушнинг қошлари чимирилди:

— Зайнабнингизнинг бу қилигига мен чидалмайман.

— Чидаш ва чидамасни ҳозирча бир тарафка қўйиб турайлиқ, — деди Отабек, — аммо ҳаммадан илгари сиздан сўрайман: менга ишончингиз борми?

— Бор, ҳам йўқ, — деди Кумуш ва қулимсираб бир оз ўйланиб олди, — Зайнабнинг ҳалигидек гаплари кишини шубҳага солар экан...

— Аммо сизни шубҳадан чиқаратурған ҳужжатларингиз албатта йўқ эмас эди.

Кумуш уялганинамо юзини четка бурди, Отабек товши-  
ни секинлатиб давом этди:

— Ўткан кун сиздан "Тошканда қоласизми, йўқми?",  
деб сўраганим ҳам фақат шунга ўхшаш гаплар билан сиз  
хафаланманг, деб айтилган эди. Агарда сиз сиқилар экан-  
сиз, ҳали ҳам Тошканда қолмаслигиниз менга маъқул  
кўринадир. Чунки мен сизни шунинг сингари озор чеки-  
шингизни хоҳламайман.

— Сиз қувламасангиз мен Марғилонга бормайман.  
Отабек кулди.

— Агар сиз шунга ўхшаш арзимаган гаплар учун ма-  
ним устимга ҳужум қиласберсангиз албатта қувлайман.

Кумуш бир хил ўпкалаган боқища:

— Сизга ишонсан бўладими? — деб сўради.

— Юрагингиздан сўранг.

— Юрагим... Юрагим ишонма, дейди.

— Бўлмаса бу юрак сўзи эмас.

— Албатта юрак сўзи.

— Юрагингизнинг ишонма, дейишкага бирар важи бордир?

— Бор.

— Бўлса айтинг.

— Юрагим: қувланишга ким сазовор, деб сиздан  
сўрайди... Сиз ҳам ўз юрагингиздан олиб жавоб беринг.

Отабек мақсадга тушинди, дафъатан жавоб беришка  
ҳайрон бўлиб қолди. Дарҳақиқат Кумуш энг нозик жойдан  
ушлаган эди.

Кумуш Отабекдан жавоб-кутиб ўлтурмай яна деди:

— Бошқалар юрагини синаб кўришкага қудратим етмаса  
ҳам маним юрагим икки нарсани ўз ичига сиғдира олмай-  
дир...

— Сенинг юрагинг икки нарсани ўз ичига сиғдирадир,  
демакчисиз.

— Демакчи эмасман, — деди Кумуш, — чунки бу ҳеч  
бир вақт бўладирган гап эмас...

Кумуш ҳамон юқорида айтилган бир маънонигина ифо-  
да қилмоқчи бўлар эди. Аммо Отабек Кумушнинг  
тўйсindan ўзгариб кеткан характер қатъиятига ва бир кун-  
даёқ бунчалик масофани ўткан кескинликка жуда тааж-  
жубда, қаршисидағининг суратида эмас сийратида<sup>1</sup> қизиқ  
бир ўзгариш кўрар эди.

<sup>1</sup> Сийрат — ички ҳолат.

— Мақсадингизга яхши тушинаман, — деди охирда, — ҳар жиҳатдан қаралғанда ҳам сиз бу түгрида ҳақлisisiz. Аммо ўшангача... балки буни ўзингиз ҳис этарсиз, деб ўйлайман...

Кумуш индамай қўйди. Эҳтимолки ул кейинги масала түгрисида эрининг фикрини билиб қўймоқчи эди...

### 13. ЭСОН БЎЛСАҚ КЎРИШАРМИЗ

Тошкандга келишнинг йигирманчи кунидан қутидор Марғилонға қайтиш фикрига тушди. Ҳожи ва Отабеклар яна бир неча ҳафта қолишга қистасалар ҳам бўлмай узр айтди: "Уй ёлғиз, фақат Тўйбека билан Ойша она; ҳоллари нима кечти, нима қўйди маълум эмас. Бошқа тарафдан ўзимнинг савдо ишларим ҳам ўлда-жўлда, шунчалик меҳмон бўлдиқ. Бас, қилған иззат ва икромларнинг учун раҳмат" деди. Ҳожининг: "Энди келин болани юбормаймиз-да", деб кулишига — "Маним болам эмас — сизники, у ер ҳам, бу ер ҳам ўзининг уйи, жанобингиз нимани мувофиқ кўрсалар, менга ҳам маъқули ўша", деди. Ҳожи бир мунча гап айлантириб — "Ўртадан анови гаплар ўтмаган бўлса эди, албатта бу ерда олиб қолмас, зероки, сизнинг бағрингизни бўш қўйиш инсофдан бўлмас эди. Агар сизга оғир тушмаса юртдаги гап-сўз босилгунча бирар йил Тошканда турсин, сўнгра Марғилон борсин, дер эдим", — деди. Қутидорға ҳам бу мулоҳаза жуда маъқул тушиб — "Бу мулоҳазалари беандоза тўғри, албатта мунда бирар йил туриши лозим ва лобид!" деб жавоб берди.

Кумушнинг Тошканда қолишига отаси шундай ёvosh қаради, бу тўгрида Офтоб ойимнинг фикр ва ризолиги билан ҳисоблашиш эмас, ҳатто уни кўнглига ҳам келтуриб кўрмади. Ҳолбуки Марғилондан чиқишида Офтоб ойимнинг "Кумушни Тошканда қолдирмаймиз!" деб қўйған биринчи шартига қайта-қайта қўл қўйгучи шу қутидор эди. Сўзни чўзмоққа ҳожат йўқ: эрларимизнинг Офтоб ойимларга қараши ҳамиша шундан бошқа эмас.

Қайтиш хабари Офтоб ойим қулогига стишкандан кейин унинг аввалги учрашиши қизи билан эди. Чунки эрига қарағанда ҳам кўброқ ихтиёрни қизида бўлғанини яхши билар эди.

Шу хабарни Ҳасаналидан эшитиши ила тўғри Кумушнинг ёнига кирди:

— Кумуш, — деди кулимсираб, — қайтар эмишмиз, да-данг айтпилиар.

Кумуш қўлида нимадир тикиб ўлтурған эди. Кўзини ишдан олмади:

— Қайтсаларингиз хайр-хўш.

Бечора она қизининг лоуболи<sup>1</sup> бу гапидан бўшашиб кетди ва не зайдада ўлтуриб олганини билмади:

— Нима дейсан?

Кумуш илжайиб онасиға қараб қўйди, яна ишини тика берди:

— Кетсаларингиз хайр-хўш.

— Сен-чи?

— Мен қоламан.

Офтоб ойим тушинолмай қизига бир неча вақт тикилиб турди. Кумуш унга қарамай нина санчар эди.

— Ҳазилингни қўй.

— Ҳазилим эмас чиним.

— Уят эмасми?

Кумуш кулди:

— Нега уят бўлсин?

— Қўй-чи!

— Қолсам ўз эримники, — деди Кумуш, — бегона эмаски уят бўлса...

Офтоб ойим ўт ичида қолғандек тобланди:

— Бирав қол, демаса ҳам қолаберасанми?

Кумуш ишини ёнига қўйиб энди онасиға қаради:

— Аввало бу ерда қолишимга сиздан бошқа ҳеч бир қарши киши йўқ. Зайнаб сизнинг ёнингизга ўтса ҳам, бироқ унинг хоҳишини менга аҳамияти йўқ.

— Эсинг ўзингдами, бола?

— Ўзимда, — деди кулиб, — мен сизнинг қизингиз Кумуш... Ҳозир Тошкандда, ўз эримнида ўлтурибман...

— Эрим, деб туққан онангдан кечасанми, юзсиз?

— Йўқ, кечмайман, фақат бир неча вақт соғинибқина юраман.

Офтоб ойим қизининг бу гапини эшитиб йиглаб юборди:

— Онангнинг ўша соғинишқа тоқати йўқ, — деди, — мен сени кундашлик уйга ишонмайман...

<sup>1</sup> Лоуболи — бепарво, бегам.

- Кундашим битта бўлса, дўстларим саккизта.  
Офтоб ойим кўз ёшисини артди:  
— Кундаш билан ҳазил ўйнама, қизим.  
Кумуш гўё Зайнаб устига ҳужум ясайтурғандек ҳурпайди:
- Ул кундаш бўлғанда, мен кундаш эмасми?
  - Минг қилғанда ҳам, — деди онаси, — сен чин кундаш бўлолмайсан.
  - Нимага?
  - Нимагаки эринг сен тарафда, чин кундашлик ва чин душманлик Зайнаб тарафда.
- Кумуш кулимсираб онасининг қулоғига шивирлади:
- Бу тўғрида хотиржамъ бўлинг.
  - Нима учун хотиржамъ бўлай?
  - Агар Зайнаб менга кундашлик қиласерса, куявингиз унинг жавобини бермакчи... Шунинг учун ҳам маним бу ерда қолишим маъқул.
  - Жавобини берса, қайтиб келишилик қочмас...
  - Мен кетсам, — деди Кумуш, — ҳеч қачон Зайнабка жавоб бермайдир.
  - Нега бермайдир?
  - Шунинг учунки қудачангиз келинсиз қоламан деб ораға тушадир, аммо мен шу ерда бўлсан, албатта тилига калтак келадир.
- Офтоб ойим ҳамон оёғ узатмади, қизига ялиниб кўрди:
- Ёш жонинг бор, қизим, — деди, — биравга ёмонлик соғинма, мен билан бирга кет, нима қилишса ўзлук — ўзи қилишин... Зайнаб ҳам умид билан бир ёстиққа бош қўйған.
  - Сиз тушинмай ётибсиз, — деди Кумуш ва эшиқдан оёқ товшини сезиб гапни шу ерда тўхтатди. Ўзбек ойим сўзланиб кирди:
  - Нега мунча шошмоқ, ёв қувладими, ақалли бир ой бўлсин.. Марғилон деган юртдан от-отлаб, тuya қўмлаб<sup>1</sup> кел эмиш-да, бир ойгина турмай кет эмиш! — Офтоб ойим билан Кумуш унинг ҳурматига ўриниларидан турдилар. Ўзбек ойим ўлтура-ўлтура сўради. — Ҳали эшийтдингларми?
  - Эшийтдик, — деди Офтоб ойим, — биз ҳам шунинг можаросида эдик.

<sup>1</sup> Қўм — туюнинг эгари.

— Ахир шу ҳам гапми, худда аллакимларга ўхшаб.

Офтоб ойим узр айтди:

— Уйимиз ёлғиз, шунчалик сизларни озор чекдиридик...  
Бегона кишиникида ҳам йигирма күн турайлиқ-чи... Худда ўз уйимиздек яйраб-яшнадиқ, шарофатларингиз соясида кўб кишилар билан танишдиқ, иззат-икромларингиз тарьифидан ожизмиз... Энди навбат сизларнинг ҳам бизнинг шаҳарларга боришларингизга келди.

— Бекор гап, — деди Ўзбек ойим, — ҳали қудаларимизни муддаодагидек сийлай олганимиз йўқ, шу ҳолда жўнатсақ бизнинг шаънимизга яхши эмас... Мен қудамнинг олдига чиқаман, бизга номус келтирмакчи бўлса эртага жўнайберсин.

Офтоб ойим такрор узр айтди:

— Бизни уялтироқчи бўлсангиз майли, чиқинг, агар курсандлигимизга қарасангиз, қўйинг. Кумушингиз ҳам; шунча турғанимиз бас, энди Зайнабни олиб ойимнинг ўзлари бизникуга борсиллар, дейди...

Кетиши орасига Кумуш ҳам келтурилиб сиқилғач Ўзбек ойимнинг ҳалиги одамгарчиликлари кейинги навбатка қолди.

— Ҳали Кумуш ҳам кетмакчими?

Кумуш кулимсираб онасиға қаради. Офтоб ойим узр айтди:

— Шукур, сизнинг олдингизда Зайнабниса бор. Маним бўлса қанот қўйригим шу Кумуш. Айниқса, Кумушингизга жавоб бермасангиз бўлмас, ойи.

Ўзбек ойим Кумушка хўмрайиб олди:

— Йўқ-йўқ Офтоббону, — деди, — сизларга жавоб берсан-да, Кумушка йўқ.

— Шу галча жавоб берасиз, мен сиздан сўрайман.

— Сўзингиз ерда қоладир, був Офтоб, бир оз андиша ҳам лозим, — деди ва Кумушка юзини ўтириди, — уят эмасми, келин? Кеча келдинг сурилиб, бу кун кеткин бурилиб.

— Менда ихтиёр йўқ, ойижон, — деди Кумуш, — сизлар нимани маъқул кўрсаларингиз менга барибир.

Ўзбек ойим боши билан келининга ризолиқ билдириб "баракалла" деб қўйди. Офтоб ойим қизиға ўқрайинқираб ер тегидан қаради:

— Албатта Кумуш нима ҳам десин? — деди, Кумушнинг ҳам ҳалигидек қололмаслиги фақат мени кўзи қиймагани учун... бўлмаса албатта кетмас эди.

Ўзбек ойим бир гапдан тоймай: "Кетиши уят, Отабек уч йил қатнаганда қизингиз бир йилгина Тошканда турса

нима қипти..." каби сўзларни ўзгаришсиз бир мақомда айтилиб турғандан кейин Офтоб ойим бошқа йўл тутмоқчи бўлиб, Кумушни уйдан чиқиб туришка буюрди. Кумуш чиқғандан сўнг:

— Қизини менга қолдиришга аяди деманг, ойи, — деб қўйди, — мунда бошқа мулоҳазалар ҳам йўқ эмас...

— Айтинг.

— Айтсан шуки, — деди бечора она, — Кумушингизнинг феъли хийи ўзимга маълум: эрка ўскан, лавзи тез, кундашликка чидайдирган сиёқи йўқ, ҳар кун Зайнабингиз билан гиди-биди қиласериб сизни қийнаб қўярмикин дейман... Бир куни келганда онаси қургур бир оғиз айтмаган эди, деб мендан ранжирмикинсиз дейман... Тана бузоқнинг турқи туқғаниға тамға деганларидек, албатта менга равшан... аразчи десангиз ҳам шу, ичи қоралиқ десангиз ҳам шунда...

Шунча тўқумадан Ўзбек ойимнинг юзида ҳеч бир ўзгариш сезилмади:

— Албатта унақа гап ҳар кимда ҳам бўлади, — деди, — шукур, мен билан ҳожи отангиз тирик бўлсақ, ундоғ гапларга йўл қўймаймиз. Зайнаб бўлса худонинг яратқан маҳлуқи; уриш ва араз деган гапни билмайдир.

— Зайнабингизнинг феъли албатта сизга маълум экан, аммо мен Кумушни сизга яхши, деб айтальмайман.

— Ўз боласини ёмонлагучини, — деди кулиб Ўзбек ойим, — мен ўз умримда биринчи мартаба қўрдим... Ундан кўра боламни сенга ишонмайман, деб айтинг.

— Нега ишонмайман, фақат қозонимдағини сизга сузуб қўйдим...

— Нима бўлғанда ҳам Кумушка жавоб йўқ.

— Хўб қолсин, — деди Офтоб ойим, жони куйиб асабийлашкан эди, — Кумушдан ҳар на ёмонлиқ қўрсангиз мендан ўпка қилманг.

— Қизингизга ёмонлиқни ўзингиз ўргатиб кетмасангиз сиздан ўпкам йўқ.

Икки қуда ҳавли юзасига тушканда Кумуш саҳн бўйлаб юриниб турар эди. Улар Зайнабнинг уйига тўғри кирдилар. Зайнаб уларни қаршилаб ўтқазди ва ачиниш оҳангига Офтоб ойимга деди:

— Қайтар эмишсизлар, деб эшитдим. Бирар ой ҳам турмас экансизлар-да.

— Анча турдик, айланай, був Зайнаб, — деди Офтоб ойим, — энди навбат сизларнинг боришиларингизга қолди.

Учунчи сўзни Ўзбек ойим олди:

— Шунча айтдим — бўлмади, ёв қувлаптими билмадим.  
Опоқ ойинингта қолса, Кумуш опантни ҳам бирга олиб кетмакчи.

Зайнаб бир турлук ҳолга тушди. Кучлангандек қилиб:

— Улар нега кетсинлар! — деди.

Офтоб ойим қудасига қараб қўйди:

— Кетмаса бўлмайдир, був Зайнаб. Бир чеккаси сизнинг эс-қушингиз жойида, маним Кумуш опангиздан бошқа ҳеч кимим йўқ, қолса-ку майли, бироқ мени Кумушсиз ўлди, денг. Шунга қолганда қайин онангиз бир оз тушинмай туриптилар.

Зайнаб ер остидан қайин онасига кўз юборди. Ўзбек ойим ҳануз тиришиб ётқан қудасига қарши қизиши:

— Қўйинг-чи, — деди, — беш-олти кун қизасиз турған киши бир нарса бўлптими?!

— Сиз тушинмаяпсиз ойи... ҳали тагин дадаси биладилар.

— Мен сенга айтай Зайнаб, — деди Ўзбек ойим ва энди қудасининг гапига қулоқ солмай қўйди, — опоқ ойингнинг ҳамма мулоҳазаси сенданга ўхшайди. Зайнаб сиқилмасмикин, икки ўргага совуқчилик ораламасмикин, деб қўрқади. Мен: Зайнаб сиз ўйлаған келинлардан эмас, тегу тахтлик, аслзода, Кумушни сийламағанда ҳам бизни сийлайди, — десам ҳам унамайди...

— Мени худо уриптими, — деди Зайнаб.

\* Офтоб ойим қудасининг кейинги гапидан анча сиқилди. Гўё ўзи Кумушни қолдиришга тарафдор бўлса ҳам, фақат Зайнабнинг кундашлик қилишидан қўрқиб турғандек кўрсатилган эди.

— Янглишяпсиз, ойи.

— Янглишсам, янглишмасам Кумуш бу уйдан силжимайдир.

Офтоб ойим бўғилиб, фойдасиз тортишиб ўлтуришни тарқ қилди. Энди бу тўғрида эрига мурожаат қилмоқчи эди...

Маргилонгача аравани Ҳасанали минадирган бўлди. Чунки Маргилондан арава миниб келгучи ёлланилған киши бўлиб, Тошкандга келишнинг эртаси куни ҳисобини олған эди. Қудаларнинг қайтиши чинга айлангандан кейин, йўл тараддуди бошланди. Ўзбек ойим бўғирсоқ қовиртириш, талқон туйдириш, тўқоч ёпдириш билан машгул бўлди.

Офтоб ойим эридан ҳам қўлини ювиб қўлтуғига урган эди. — "Ҳожи афанди бирар йил турсин, деб айтди. Энди бир йилни ўзимизга кўрмасак бўлмас. Икки сёғимизни бир этукка тиқишимиз уятка ўхшайдир" дейиши ва сўзга қулоқ ҳам солмай — "меҳмонхонада ҳожи бор, сен билан йўлакда эзилишиб ўлтуролмайман, номус!" деб бурилиб кетиши бечорани жуда ҳам эсанкиратиб ташлади. Охирада Отабекка ҳам мурожаат қилиб кўрди. Ундан ҳам асли мақсадни ҳосил қилолмай, фақат уларникидан жўяликроқ узр эшилди. Отабек қайнин онасининг фикрига қисман қўшилиб — "Нима бўлса ҳам беш-ён кун оғирлиқни манним учун ўз устингизга оласиз. Агар мен сизнинг талабингизни маъқул қиласидирган бўлсам, айниқса қизингизнинг кўнглига шубҳа келадир... Сизга айткулуги йўқ, бу тўғрига маним аралашмоғим яхши бўлмас. Кундаш адовати борасидаги фикрларингиз тўғри ва лекин иш у даражаларга етмас, деб ўйлайман... Жуда бўлмағанда Кумушнинг ўзини олдингизга жўнатарман, хотиржамъ бўлинг!" — деди.

Офтоб ойим шу йўсун ҳар тарафдан ҳам умидсизланиб, менгравсиб қолди. Кумушни кўрган сайин алланучка юраги ачир, жудолиқ кунларини асло тасаввур қилолмас эди. Кумуш бўлса, онасининг қозирги ҳолига ачинғандек, унга яқинлашмай, четлаб юрар ва иккинчи тарафдан Зайнабнинг бир ярим қарич осилиб кеткан қовоқ-дудогига истеҳзоланиб томоша қилар эди.

Йўл қозирликлари битиб, Ўзбек ойимнинг Ойша кампирга аatab тикдирган саруполари ҳам битди. Бу кун меҳмонларнинг энг сўнгти кечалари эди. Ўзбек ойим ярим кечаларгача қудачаси билан сўзлашиб ўлтурди.

Сўнгра Офтоб ойим билан Кумушни ёлғиз қолдириб ўз уйига ётқали чиқди. Она-бала бу кечани бирга кечирмакчи эдилар. Офтоб ойим қудасининг кетидан қизига ҳайфсиниб<sup>1</sup> қўйди.

— Онангни фироқ ўтида ёндиришдан уялмадинг, қизим.

— Нега ёнар экансиз...

— Нега ёнмайин ахир, дунёға келиб сендан бошқа овинчоғим бўлмаса... Агар қўлимидан келса ачиб ва ёниб турган юрагимни сенга очиб кўрсатар эдим... Кошки эди бир шаҳаргинада бўлсанг.

<sup>1</sup> Ҳайфсинмоқ — ачинмоқ, афсусланмоқ

Кумуш онасининг юрагидаги ўтни ҳозир синамасдан ҳам ҳис эткан, чунки йигирма йил ўз қучогида ўсдириган онадан ажралиш унинг ўзига ҳам оғир түюлиб бошлиған эди.

— Беш-олти ой... ҳеч нарса бўлмас, ойи. Эсон бўлсақ тагин кўришармиз.

Офтоб ойим кўз ёшисини дув тўкиб юборди. Начоғлик ўзини қаттиг ушлаган Кумуш ҳам сиррини яшира олмади... Она-бала бир неча вақт йиги ичида бўғилдилар.

— Қолишға-қолдинг, — деди охирда она, — аммо қайин ота ва қайин оналарингга хизмат қил, яхшилиқни қўлингдан берма, айниқса, кундашингта ёмонлиқ согинма, яхшилиқдир, ёмонлиқдир ҳар нимаики ўzlари қилсинлар, зинҳор сен аралашма.

— Маним нима ишим бор...

— Албатта ишинг бўлмас... Шундог бўлса ҳам мен кечаги сўзингдан чўчиб қолдим... Кундашингнинг кўриниши баёвға ўхшаса ҳам, аммо ўзи писмиқ экан... Бундай одамдан албатта ҳазар керак. Агар ораларингға совуқчилиқ тушадирган бўлса, сен ўчакишиб юрма, яхшиси қайин отангга узрингни айтиб, бу уйдан кетиш ҳаракатини қил. Мен бу тўғрида эринг билан ҳам сўзлашиб қўйдим, тузикми?

— Тузик.

— Худойға шукур, қўлингда хатинг бор, ўлганнинг устуга чиқиб тепкандек хат-хабарсиз қўйма. Ҳар бир ўн беш кунда хат ёзиб эрингта бер.

— Албатта, сиз ҳам унутманг.

Бир оз жим қолдилар... Офтоб ойим энтикиб оғир нафас олди ва маъюсона Кумушка қаради. Кумуш ўринсизча онасиға қараб илжайди. Бу ўринсиз ишдан Офтоб ойим аччиғланди:

— Маним ҳолим сенга кулгими, қизим?

— Йўқ, — деб яна кулимсиради Кумуш, — бир-икки кундан бери сиз айтадирган...

— Нима мен айтадирган?

— Ахир... — деб қизаринди Кумуш, — кўнглим айнار эди, деб айттар эдингиз-ку...

Офтоб ойимнинг ҳам юзида бир кулимсираш кўрилди.

— Тўғрими?

— Билмадим... — деди, ерга қараб қизарди, — ўткан кундан бери кўнглим айнагандек бўлади... Айниқса палов исидан кўнглим кетади... Аччиғ нарсалар егим келади...

— Муборак бўлсин, — деди Офтоб ойим, кулди. Кумуш ижирғаниб ўзича алла нарса сўзланди. Офтоб ойим энггашиб Кумушнинг қулогига шивирлади, — бу сирни эрингдан бошқа ҳеч кимга билдирма, қайин онанг ҳам енгил хотин, айниқса кундашинг сеза кўрмасин.

Кумуш маъқул ишорасини берди. Она-бола бир ўрин ёзib ётдилар. Кўб вақткача Офтоб ойимнинг ивир-шивири набира тўғрисида бўлиб қолди. Кўзига уйқу келмай — "шуни ҳам кўпар кун бўлармикин?" дер эди.

Саҳар пайтида туриб чой ичдилар. Субҳ намозини ўқуб, арава қўшилди. Аравага чиқадирған майдада-чуйда ташилиб битди. От жиловида Ҳасанали, арава ёнида қутидор ва ҳожи сўзлашиб турар эдилар. Отабек арава орқасига нарвонча чиқариб қўйди. Хотин-халаж ҳамма йўлакка йиғилиб Офтоб ойим бирин-бирин кузаткучи хотинлар билан кўришиб чиқди. Энг сўнг Кумушни бағрига босиб йиғлаб юборди. Кумуш ҳам ўзини тутиб туролмади. Бошқалар ҳам йиғидан насибасиз қолмадилар.

— Худойга топширдим, Кумуш, қазом етиб кўралмай ўлсам, мендан рози бўл!

— Сиз ҳам ойи!

Қутидор ҳам кўчадан йўлакка кириб қизининг манглайидан ўпди:

— Қўришкунча, қизим...

— Хайр отажон.

Йўлакка Юсуфбек ҳожи юзланиб умумий дуоға қўл кўтарилди. Дуодан сўнг Отабек тўриқ йўргани чиқариб қутидорға тутти. Офтоб ойим яна бир қайта қизи билан қучоғлашғач, Отабекнинг кўмаги билан йиғлаған кўйи нарвончадан аравага минди ва соябон орқалиқ олдинга ўтди. Қутидор Юсуфбек ҳожи билан саломлашиб қучоғлашғандан кейин Отабекнинг қўлтиғлаши билан отқа минди. Отабек ҳам аравага — Офтоб ойим ёнига чиқиб ўлтурғач, умумий "оллоҳ акбар!" дан сўнг Ҳасанали отни йўлга солди.

Кумуш дарбоза ёнига чиқған эди:

— Хайр онажон! Маним учун бувимни қучоғлаб қўйинг. Ўртоқларимга салом айтинг!

— Худойга топширдим, Кумуш, яхши қолинг, қуда!

— Яхши боринг, був Офтоб!

— Яхши қолинг, був Зайнаб!

— Яхши боринг, опоқ ойи!

Арава кўчадан бурилғунча — "яхши қолинг, яхши бо-

ринг, салом айтинг" сүзлари такрорланиб турди. Арава катта күчадан бурилиб кўздан йўқолғач, энг кейинда қолиб йиглаған кўйи Кумуш ичкарига кирди. Отабек бир неча бекаткача меҳмонларни кузатиб бориб, сўнгра қайтмоқчи эди.

## 14. ХУШРЎЙБИБИ ВА ЗАЙНАБ

Хушрўйбиби Зайнабнинг эгачисидир. Моҳирабонудан икки ўгул ва икки қиз дунёга келиб, тўнғучи Азимбек, ундан кейингиси Хушрўй (ёшлигида Хушрўй ўрнига Хушра дер эдилар), учунчиси Каримбек ва тўртгинчиси бизнинг Зайнаб эди. Зайнаб эгачиси Хушрўйдан етти ёш чамаси кичик эди. Гарчи бу икки эгачи-сингил бир қориндан талашиб тушкан бўлсалар ҳам, сажия — характерда таниб бўлмаслиқ даражада бир-бирларидан фарқлик эдилар. Сажиядагина эмас, сурат ва сиймо важида ҳам катта ўзгаликлари бор эди.

Хўшрўй узун бўйлик, қотмароқ ва зарча танлик эди. Зайнаб қисқа бўй, гўштдор ва оқ танлик эди. Хўшрўйнинг ҳаракати сингил ва лавзи тез эди, Зайнаб лоппос ва ўнта сўзга аранг битта жавоб қайтарадирған эди. Хушрўйнинг кўзи ўйнаб, ҳар секунтда ўн ёққа аланғлар эди. Синглиси бўлса бирав билан бетма-бет келиб сўзлашқанида ҳам кўзини ҳамиша бир нуқтадан узмас эди. Хушрўйга болалиқ чоғидаёқ уй ичи ва қўни-қўшни "шаддод" деб исм берганлар, чунки ул кимдан бўлса-бўлсин айтканини қилдирмай қўймас, агар бирарта иш унинг тиласигига тескари кетса шовқин-суронни худда бошига кийиб олар эди. Шунинг учун Хушрўйнинг раъйини билмасдан қозон осилмас, унга ёқмаған гапка оғиз очилмас, ул бор жойда қадам ҳам саналиб босилур эди.

Зайнаб эгачисининг аксича ўз яқинларидан "писмиқ" деб исм олған, онаси бўлса аччиғи чиқғанда "мингаймас ўлгур" деб уни қарғар эди. Айниқса қуйида зикр қила-дирған ҳолимиз бу икки опа-сингилнинг характердаги фарқларини очиб кўрсатиш учун етадир:

Моҳира ойим ҳар бир ҳайитдан бирар ойлар илгари эрига айтиб болалариға кийимлик олдирап эди. Олдиրған кийимлик Хушрўйга ёқмаса даррав ярамаганини айтиб алмашдириб беришкага дадасини мажбур этар ва кўнглидағини ҳосил қилиб тинчир эди. Аммо Зайнаб бўлса ўзига келган кийимликка қарши бошда бир нарса демас,

кыйимлик бичилиб ва тикилиб ҳам арафа кунлари келиб еткандан кейин ҳурпайиб ҳеч ким билан сўзлашмай қўяр эди. Моҳира ойим қизининг бирарта ишдан норозилигини пайқаб "Мингаймас, писмиқ ўлгур, тагин нима жин урди сени?" деб сўраганида, Зайнаб қовоқ-дудогини солиб бир оғиз ҳам жавоб бермас эди. Ниҳоят эртага ҳайит деган куни Зайнабнинг ҳурпайиши йиги билан алмашар ва йиги ораси мақсад очилса ҳам кўпинча натижасиз қолар эди. Бирар жойга меҳмондорчилик учун борадирған бўлсалар, Хушрўй ҳаммадан илгари эълон этар эди: "Мен ҳам бораман!" Албатта уни қолдириб кетиш учун энди ҳеч кимда ҳад йўқ. Иккинчи вақт: "Мен бормайман!" Бу тақдирда уни бир қадам силжитилсинг-чи! Аммо Зайнаб онаси билан янгаси Ҳанифа бир жойга отланадирған бўлсалар, "бораман, бормайман" демас, улар ҳам йигламаган болага сут берилемас қабилидан индашмасдан меҳмондорчиликка кетар эдилар. Кечқурун қайтиб келсалар бир бурчакда Зайнаб йиглаб ўлтурипти:

— Нега йиглайсан?

— Нега мени бирга олиб кетмадингиз...

Зайнабнинг шу феъли балогатка етиб, эрга теккандан кейин ҳам ўзгармади.

Отабекнинг Зайнабка бўлған муносабатини ўқуғучига албатта сўзлагулуги йўқ. Эри унга ойлаб, йиллаб қарамай қўйганида ҳам ул иҳ деб товуш чиқармади. Отабекнинг бу ҳолига қарши чиқғучи ва Зайнабни йўл-йўруққа солғучи яна фақат Ўзбек ойим эдик, бунинг сабаби ҳам иззатлик ўқуғучимизга бир даража маълум бўлса керак. Сут билан кирган жон билан чиқар деганлариdek, Ўзбек ойимнинг ўшал вақтлардағи ташвиқотлари ҳам унинг тарафидан фақат "келинлик" мажбурияти остида қабул қилинار, масалан, қайин она — "фalonчи домлага бориб мундоғ қил, Зайнаб" деб буюрмагунча ўриндан қўзгалмас ва шунинг билан бирга эрининг ташлаб қўйиши тўғрисида онаси, эгачиси ва бошқа яқинлариға чурқ этиб оғиз очмас эди. Зайнабнинг бу ҳолига ҳукман — "эринг қараш ва қарамаслиғи унинг учун фарқсиз эди" деб айтиш албатта тўғри бўлмайдир. Чунки кундашининг Тошканѓа келиш хабарини эшиткан Зайнабни биз юқорида Отабек қучогига ташланган ҳолда кўриб эдик. Хулоса, Зайнабнинг болалиқ вақти билан ҳозирги ҳолини чақишириб қарасақ кўрамиз: ёш Зайнаб бир ой илгари тикилиб қўйилған кийимнинг ўзига ёқмағанини фақат арафа куни айтиб йиглайдир, бу

кунги Зайнаб ўзининг муҳаббатини эрига фақат кундаши келиб етар олдида эълон қиласидир.

Биз юқорида ёш Хушрўй билан ўқуғучини бир дара-жада танишдирған эдик. Энди унинг оила ҳаёти билан ҳам танишдиришкан мажбурмиз:

Хушрўйнинг эрга тегиши ҳам ўзига ўхшаш фавқулодда бўлған эди. Масалан, аксарият қизларимиз ота-она кимни мувофиқ кўрса, шунга тегишка мажбурдирлар. Лекин Хушрўйники мундог бўлмади. Хушрўй ўн саккиз ёшка еткандан кейин унга совчилар кела бошлайдирлар.<sup>1</sup> Табиъий Хушрўйнинг феълини яхши билган ота-она унинг раъйини олмасдан туриб бир иш қилмоқдан қўрқадирлар. Олим понсадбошига маъқул бўлған неча йигитлар, Моҳира ойимға ёқсан қанча тегу тахтлик хонадонлар Хушрўй томонидан рад қилина борадир. "Фалончининг ўғлими?" деб сўрайдир Хушрўй ва онасидан жавоб кутмай: "Худой кўттарсин эрни. Ўшанга текканимдан кўра, қаро ерга текканим яхши!" дейдир. Бир неча вақт шу йўсун Хушрўйнинг раъйига қараб эр-хотин зерикадирлар-да, ўзларича бир жойга қудалашмоқчи бўладирлар. Уларнинг андишасини билган Хушрўй бошда бунга қарши бир нарса демайдир. Аммо узил-кесил фотиҳа ўқуб, қудалашиш учун уйларига келган совчи ва қуда хотинларнинг олдилариға келиб бетларига айтадир: "Ҳали мен эрсираб қолганим ўйқ, фотиҳа ўқуб ташвиш чекмай уйларингта жўнай бeringлар". Моҳира ойим бу юзсизликдан ер ёрилса ерга киргундек бўладир. Совчилар эрса мундог уятсиз қиздан алҳазар ўқушиб жўнайдирлар. Албатта ота-онанинг бунга қарши чоралари қарғиш ва ранжишдан нарига ўтолмайдир. Оғаси Азимбекнинг Хушрўй устига кўтарган мушти ҳам "нега мени урасиз, мен фалонлик қилдимми?" деган ҳақлик сўз билан дармонсизланадир.

Шу воқиъдан сўнг совчилар оёғи узиладир. Хушрўй учун ҳеч ким оғиз солмай қўядир. Чунки бояги совчилар бу фавқулодда муомалани кўринган биравга достон қилиб ўқуидирлар. Моҳира ойим таънага тил очадир: "Энди дунёдан эрсиз ўтасан, қизим! Лекин Хушрўй ҳануз пинаги-

<sup>1</sup> Ўруслар Туркистонини босқунча қизлар 18-20 ёшка тўлмасдан эрга тега олмас эдилар. Ҳатто камбагаллар қизи 25 гача ҳам эр кутар эдилар. Бунинг сабаблари: ўз ора уруш ва қирилишлар билан эрлар хотинларга қараганда оз эдилар ва ул замоннинг хотин-қизлари ҳозиргидек азобда эмас, эркинроқ яшаб, яхши учир эдилар (муал).

ни бузмайдыр: "Эр қуриб кеткан эмасдир, хоҳласам эртагаң әрға тега оламан", — дейдир.

Үртадан бир неча вақт ўтиб Азимбекнинг ўртоқларидан бўлған Нусратбек отлиғ бир бекникидан хотин устига совчилар келадир. Моҳира ойим эридан фикр сўраш ўрнига қизига арз қиласдир ва Хушрўй мунга қолганда қулоқ қоқмайдир. Бу розилиқни эшишиб отаси ва оғаси жуда сўйинишадирлар. Зеро Нусратбек беклар ичидан обрўликроқ кишининг ўғли ва ҳозирги тутиб турған иши ҳам анча донғлик бўладир. Шунинг учун унинг хотинлиқ бўлиш камчилиги ҳам эътиборга олинмайдир. Фотиҳанинг иккинчи ҳафтаси тўй-никоҳлари бўлиб, Хушрўйнинг Нусратбек билан чодирда қилған биринчи муомаласидан тил бириткириб эрга теккани хотинларга маълум бўладир.

Хушрўй чодирдан чиқмасданоқ чой ташиб, хизмат қилиб юрган кундашига кесатуқ билан ҳужум бошлайдир. Иккинчи ва учунчи кунларда тўппа-тўғри кундаш устига сапчийдир. Ҳафта, ўн кун ўтмасдан эрини ўз томонига оғишириб кундаши ёнига киргизмаёқ қўядир. Иккинчи ва учунчи ҳафталарда ўчқобошини ўз қўлига олиб кундашини иккита ёш боласи билан томоқ важидан ҳам сиқа бошлайдир. Нусратбек бўлса кўчага чиқғанда беклик даъвосини қилиб, уйига кирганда Хушрўйбекка мутеъ. Бечора катта хотин Хушрўйнинг доимий ҳужумига маҳкум қолиб, эридан лоақал иккита гўдаклари юзи учун бўлсин марҳамат кўрмай азобланадир. Иккинчи ойлардан бошлаб Хушрўй кундашини бўғиб уриш одатини чиқарадир ва ўрим-ўрим кундаш сочини алафдек юлиб олишдан тортинмайдир.

Тамом жонидан тўйған бечора кундаш учунчи ойға чидаб боролмай эридан талоқ сўрайдир. Ноилож Нусратбек ҳам унга жавоб беришка мажбур бўладир. Аламзада бечора икки гўдакни эрига ташлаб кетмакчи бўлғанида Хушрўйдан очиқчасига шу гапни эшигадир: "Итдан бўлған қурбонлиққа ярамас! Болаларингдан умидингни узган бўлсанг, итбаччала-рингни бу уйда қолдир!" Хушрўйнинг оғзидан чиқған бу таҳдид бечора онанинг юрагини ўюшдирадир. Дарҳақиқат Хушрўйнинг бу ишдан ҳам тоймаслигини аниқ билиб, йиглай-йиглай болаларини ўзи билан бирга олиб кетадир.

Хушрўй уч ой ичидан томир ёйиб қолған бир ойлани илдизи билан юлқиб ташлаб тинчийдир. Мундан бошқа Нусратбек каби бир одамни ҳам ўз ишоратига қаратадир.

Энди етти-саккиз йил бор, ул ўз кайфича яшаб келадир. Ҳар нарсадан ҳам мамнун, бироқ... Шунча муддатдан

бери она бўлолмаганидан хафа, ҳамма қайғу ҳасрати ана шу тугмаслиқда. Мундан икки йилча бурун эри Нусратбек: "Олти йилдан бери тугмайсан, кўрсатмаган товупинг қолмади. Энди нима қиласиз?" деб кулган эди, Хушрўй эрининг мақсади нима эканини пайқаб: "Боласиз киши дунёда туролмайдирган бўлса, бир оз заҳарни бошлаб сизга бераман, ундан кейин ўзим ейман!" деди. Шундан кейин Нусратбек мундоғ гапни иккинчи гапирмай қўйди. Дарҳақиқат Хушрўйнинг бу сўзини ҳазил деб бўлmas эди.

## 15. ЭСИНИ КИРГИЗДИ

"Кундашлик уйда кунда жанжал" деганлар. Албатта буни айткучи киши ўйламасдан ва билмасдан айтмагандир. Жилла, ҳар куни жанжал бўлмағанда ҳам ҳафтада, ўн кунда бир тўполон чиқмаса албатта кундашни кундаш, деб бўлmas. Нега десангиз, бизнинг баъзи бир кундашсиз, чиқитсиз оиласарда ҳам икки, уч кунда товоқ-қошиқ синиб, тогора янгиланганини ҳар қайсими биламиш, бас, энди кундашлик оиласаримизга келгандачи, албатта юқоридағи — "кундашлик уйда кунда жанжал" мақолини тўғриға, чинга чиқармасдан чора йўқ.

Мен — ёзгучи, "Ўткан кунлар" ҳикояларини отам марҳумдан неча қайталаб эшитсан ҳам зерикмас эдим, фақат бир жойигина мени зериктирап эди. Бу кун мен шу "Ўткан кунлар"ни қаламга олғанимда ҳам ўша ўзимни зериктирган фаслини ташлаб ўтишка мажбур бўлдим. Дарҳақиқат ўз орамизда кундаш жанжалини ким билмасин? Арзимаган гап устида дунё бузган кундаш тўполонлари кимнинг қулогига ёқсин? Ўқуучининг қимматлик вақтини аяғанимдек, қаламни ҳам бу гиди-бидидан озод қилишини мувофиқ кўрдим. Мени кечирсинглар.

Зайнаб хафалиги ошқан кезларда қариндош-уруғлариникуга юриб чигилини ешар эди. Уч-тўрт ойнинг ичидаги мартаба эгачиси Хушрўйницида ҳам меҳмон бўлиб кетди. Аммо ҳозиргиси учунчи мартаба келиши эди.

— Нучук худо ярлақади! — деб Хушрўй синглиснин қаршилади. Сунбула<sup>1</sup> ойининг мўътадил ҳавосига қарамасдан Зайнаб маржон-маржон терлаган эди.

<sup>1</sup> Сунбула — 22 август-21 сентябрь.

— Нега мунча ўзингни олдириб қўйдинг, Зайнаб! Уйингдан тинчмисан, эринг эсон-омон юриптими?

— Қуриб кетсин, — деди Зайнаб ва кўзига ёш олди. Хушрўй ачиниш ўрнига кулди.

— Кел, айвонға чиқ, — деди, — ойимникида эдингми?

— Йўқ.

— Уйингдан келдингми?

— Ҳа.

Хушрўй синглисини ўтқазиб чўрисига чой буюрди. Фотиҳадан кейин "поччам эсон, омонмилар?" деб сўрагучи синглисига:

— Поччанг ўлсин! — деди аччигланиб Хушрўй, Нажмиддинбек деганинг даласига кеткан эди. Тўрт кундан бери дову дараксиз, ўлдими, қолдими билмайман.

Зайнаб уч-тўрт ойнинг ичидаги киши танимаслиқ ҳолга тушкан эди. Илгариги тўлалигининг ярмисини йўқотқанидек тусига қаримсиқлик кирган, кўз ҳаракатида ҳам бир бесаранжомлиқ зоҳир ва буларнинг устига ҳар қачон унда кўрилган "огирлиқ" ўрнига асабийликка яқин бир вазият ўлтурғандек эди. Зайнаб эгачисининг ҳалиги гапига ризосизлиқ билдириди:

— Ношукур экансиз, опа, — деди, — поччамдан нолишингиз яхши эмас, сизнинг ҳам бошингизга маним кунимни солса нима қиласа эдингиз?

— Мен ҳам Зайнаб бўлсан, албатта солар эди, — деб кулди Хушрўй, — менга қолса ҳар ким ўз нафсига яхшилиқ ёки ёмонлиқни ўзи ҳозирладири...

— Тавба дeng, опа.

— Мен шу чоқгача, — деди Хушрўй, — бандасига бош эгишни ва бандаси олдида тавба қилишни ор билдим ва шу орланишим орқасида ҳар кимнинг устида юрдим...

— Катта гапирманг.

— Катта гапирсам ва гапирмасам, — деди Хушрўй, — маним феълим ҳар кимга маълум ва ҳаммадан ҳам сенга очиқ... Қўйчи бу гапларни, ўзинг тинчмисан?

— Тинчлигим қурсин...

— Айтсанг, айтмасанг, — деди опаси, — албатта тинчлигинг қуриған.

— Қуритған қурсин...

— Сенинг тинчлигингни ҳеч ким қуритған эмас, Зайнаб! Ҳамма жабрни ўзинг-ўзингга қилаяпсан!

— Ҳамиша шу гапни айтиб қолғансиз, — деб ўпкалади Зайнаб, — дунёда ким ўзига жабрни хоҳлайдир?

- Сен ва сенга ўхшаганлар.
- Худо урар...
- Айтсанг, айтмасанг худо уриб қўйипти.
- Шундай кунларга мен қолай дедимми?
- Дегансан!

Зайнаб опасининг истеъзолик юзига қаради ва унинг нима демакчи бўлганига тушинолмади:

- Деган бўлсам айтинг...
- Сен маним қандай қилиб эрга текканимни биласанми?
- Биламан...

— Билсанг билганингча тур, — деди Хушрўй, — энди келайлик сенинг эрга тегишингга: албатта тона олмассан, сенинг эр қилишда тариқча ихтиёринг ва ризолигинг йўқ эди, эҳтимолки ихтиёр нима, орзу нима ўзинг ҳам пайқамас эдинг. Балки ихтиёр ва орзуларинг ҳам бўлғандир — бироқ уни ҳеч ким майдонда кўрмас эди. Шунинг учун тизгининг ойинг билан дадангнинг қўлида, бошқача айтканда уларнинг туяга ортқан юки, кимга сотса, қаерга жўнатса ихтиёrsиз эдинг... Ёдинга борми, никоҳ куним мен кулиб, чақчақлаб аравага миндим, сен бўлсанг, уйдан йиғлаб чиқдинг ва эрингникига йиғлаб бординг... Яхши, эринг сенга ёқди, аммо эринг фақат сенга ёққан билан иш битмаслигини яна хотирингта келтирмадинг. Эринг сени ташлаб қўйди, сен чурқ этмадинг, истиқболинг тўғрисида ўйламадинг... Фақат ғалвир сувдан кўтарилигандан сўнгтина, сен ўзингни ҳар тарафка ташлай бошлидинг... Лекин энди бир минг тоблансанг ҳам натижа ўзингнинг феълингча — битта: сенинг учун ҳар кун бир ўлим ёки ўша уйдан бошингни олиб чиқиш.

Хушрўйнинг раҳмисиз муҳокамасидан оқған бу ҳақиқатлар Зайнабни йиғлатди.

- Мен шундай бўлар, деб ўйламаган эдим...
- Сен ўйлашни билармидинг? — деб қулди Хушрўй.
- Бирав ўлай деса, сиз куласиз!
- Мен йиғлашни билмайман! Кишилар йиғлаганда, маним кулгим қистайдир.
- Маним ўрнимда бўлсангиз, сиз ҳам йигидан бош кўтармас эдингиз...
- Сенинг ерингда бўлсам биласанми нима қилар эдим, Зайнаб, — деди Хушрўй, — дунёсини ост-уст қилар эдим, бир томчи ёшимни юз томчи заҳар билан қўшиб ташлар эдим.

Зайнаб кейинги гап билан эгачисининг юзига күтарилиб қаради ва Хушрўйнинг юзида золимона бир истеҳзо кўрди.

— Яхши, — деди Зайнаб бир хил синиқ товушда, — ҳамма дўстларингиз сизга душман бўлсин, уч йилдан бери сизнинг сўзингизни айтиб ёнингизда келган қайн онангиз ҳам душманингиз ёнига ўтсин: ҳатто сизни тұқган ота-онангиз ҳам "сабр қил, болам!" деб қуруқ сўз айтиб ўлтурсынлар... Бас, шу ҳолатда сиз йигламай нима қиласр эдингиз?

Хушрўй пинагини бузмай яна кулди:

— Душман ўзи нима деган сўз — деди, — мен сенга боя ҳам айтдим: кишининг дунёда дўсти йўқ, магар нафсига ўзи дўст; кишининг дунёда душмани йўқ, магар нафсига ўзи душман! Масалан сен ўзинг: отангта, онангта дўстим, деб ишондинг, аммо улардан нима яхшилиқ кўрдинг? Бу кун уларнинг "сабр қил, болам!" деб берган кенгашлари сенинг ярангта малҳам бўларми? Албатта бўлмас. Бошдаёқ эринг сенга қарамай қўйди. Аммо сен қайн онангнинг ваъдасига ва тагин алла нарсаларига ишондинг... Ўзинг ўйла, болани она туғадир, лекин унга муҳаббатни ҳам она туғиб берадими? Албатта бу мумкин эмас. Сен бечора шунга ҳам ишондинг. Энди гап нима? Отанг сенга сабр едирадир, қайн онанг бўлса кундашинг дуосида... сен бўлсанг йиги қучогида...

— Сиздан ўзимни чақидргали келган эмасман! — деди йиғлаған кўйи Зайнаб, — ўз уйимда ҳам тегмай чақадирган газандаларим бор... Сиз ҳам маним куйган жонимга ўт ёқмангда, агар қўлингиздан келса, бу ўртанған синглингизни тинчтиинг.

— Сен ҳеч тинчий олмайсан...

— Ҳар нарсага ақлингиз етади... Лоақал бу баҳтсиз синглингиз учун биргина бош оғритсангиз-чи... Устимга шу бало келгандан бери эшигингизга неча қайта келиб қуруқ қайтдим, эндигина сиз ҳам...

Хушрўй бир оз Зайнабнинг юзига қараб турғандан кейин:

— Маним кенгашимга юрасанми? — деб сўради.

— Жўялик бўлса нега юрмай.

— Юрсанг, — деди Хушрўй, — чиқ эрингдан.

Зайнаб ўқраб юборди:

— Ўзим ҳам шундог деярсиз, деб турған эдим.

Хушрўй:

— Негаки сенинг дардингнинг давоси, менга қолса фақат шу.

— Қандай қилиб чиқай, ахир...

— Эрдан чиқғанлар қандай қилса, сен ҳам шундай қиласан!

Зайнаб жавоб бермади. Чўри хотин ўртаға дастурхон ёзиб чой келтириди, Хушрўй хизматчини ўчоқбоши юмишларига буюриб чойни ўзи қўйди.

— Дастурхонга қара, Зайнаб!

— Иштиҳом бўғилди...

— Маним айтканимни қилсанг иштиҳонг ҳам очиладир.

— Эрим... эримни кўзим қандай қийсин.

— Жавоб сўрасанг, — деди кулиб Хушрўй, — сени талоқ қилиш учун эрингнинг кўзи қиядими?

— Билмайман...

— Албатта яхши биласан, қияди! Аммо сен аҳмоқсан, кўрпангта қараб оёқ узатишни, қарс икки қўлдан чиқишини билмайсан!

— Этагингни қоқиб кетабер, дейсизми?

— Чунки шундан бошқа чоранг йўқ!

— Сен ҳасратда ўл, кундашинг яйраб-яшнасин, шуми мақсадингиз?

— Ҳозир ҳасратда эмасмисан, кундашинг яйрамайдими?

— Тузик, — деди Зайнаб, — лекин ҳар қадамда унинг ҳузурини бузаман, бир чўқитиб ўн қаратаман.

Хушрўй кулди:

— Бундан нима чиқади:

— Ишқилиб келгиндини тинчитмайман.

— Сен тинчитмасанг, — деди Хушрўй, — бошқалар сени тинчтар...

— У нима деганингиз?

— Яъни роҳатини бузаверсанг, эринг сени қўяр?..

Зайнаб бу ҳақиқат олдида ўйланиб қолди. Хушрўй ўзининг ваҳший кўзлари билан синглисига қараб кулимсирап эди. Бу кулимсираш ораси "қўлингдан нима келади?" дегандек бўлар эди. Зайнабнинг туси шу чоқгача кўрилмаган равиша ўзгариб кетди. Негадир тинмай оқиб турган кўз ёшиси ҳам қуриди ва товшида ҳам ҳануз эшитилмаган кескин бир оҳанг бор эди:

— Эсимни киритдингиз, опа, — деди, — раҳмат сизга.

— Раҳматингни менга айтма, — деди Хушрўй, — ишонсанг юрагингта айтарсан...

## 16. ОЙ-КУНИ ЯҚИН ЭДИ

Кумушнинг ой-куни яқин эди. Набирагик бўладирган Ўзбек ойимнинг иши бошидан ошқан, Кумушнинг ойи туғмасданоқ ул бешик ясатиш билан машғул эди. Дояча ким, ақиқага нечта қўй керак, нечанчи кунда тўй ўтказиладир, нечта эркак, нечта хотин айтиладир ва кимлар? Мана шунингдек масалалар билан Ўзбек ойимнинг мияси жуда шишкин эди. Кумушда кўрилган баъзи низонларга биноан набирасининг ўгул бўлишида шубҳа қилмас — "ўгул тұғасан, Кумуш, мен ҳам Отабекни сенга ўхашаң енгил кўтарган эдим", дер эди. Кумушни хизматдан бўшатилиб баъзи ўчоқбоши юмишларини Зайнаб идорасига топширилғанига энди бир ойлаб бор.

Ўзбек ойим набира масаласида қанча курсанд бўлса, Отабек шунчалик хафа, чунки Кумушни кўрган сайин уста Алим фожиъасини хотирлар эди. Юсуфбек ҳожи маълум алданишдан сўнг юрт ишидан қўйл ювған, кўб вақтини меҳмонхонада "Қуръон" ва "Далойил"<sup>1</sup> ўқуб кечирав, кундаш ораси бузилиб, ўртадан сўз чиқганини гоҳо эшилса, иккала келинни ўз олдиға чақиртириб, уларни қатор ўтқазар эди. Аввало Кумушдан ўпка қилиб: "Ойим, ҳар нима сиз каттасиз, Зайнаб ёш, каттадан-кичикка шафқат лозим, мундоғ яхши эмас!" ва Зайнабка қараб: "Болам Зайнаб отин! Сиздан ҳали ёшлик гурури кетмаган, лекин маним болам бўлғанлигинги зизни сиз ҳам унутманг!" дер ва шунинг сингари юмшоқ гаплардан кейин иккисини дуо қилиб бир-бирисига салом бердирап "ана, шундоғ бўлсин, опоқ қизларим!" деб кетишка рухсат берар эди. Улар кеткандан кейин албатта Ўзбек ойим эри ёнига кирав, ҳожи бўлса хотинига сизсираб: "Сиз икки келин ушлани билмабсиз, Зайнабка жабр қилган кўринасиз, айниқса Зайнабнинг кўнглига қарашингиз керак, Отабекка ҳам насиқатингиз лозим!" дер эди. Ўзбек ойим шундай кезларда Кумушнинг ёнини олиб — "Зайнабни худой кўтарсан, айб ўзида..." деб бошласа, ҳожи унинг оғзини аранг тўхтатур: "Секин-секин, уят! Қайнин она деганинг адл туриши лозим. Зайнаб сиз билан маним орзу-ҳавасимиз эмасмиди?"

<sup>1</sup> Далойил — диний китобнинг номи.

Аммо набира масаласидаги Ўзбек ойимнинг баъзи бир қуюшқондан ташқари ҳаракатларини ҳам босқучи яна ҳожи эди: "Зайнаб бор, Зайнабни унутдингизми. Ўз келингиз Зайнабни!"

Мундан ўн беш кунча илгари Кумуш онасига бир хат ёзған эдиким, аҳамиятига кўра биз бу ўринда кўчирамиш:

"Онахон, куявингизнинг ёзғанларидан ташқари мен сизга шу билан олтинчи хат ёздим. Аммо сиздан учта ва дадамдан иккита хат олдим. Айниқса дадамнинг кейинги хатидаги қора хабар билан дори дунё<sup>1</sup> кўзимга торайди. Ўлим ҳақ, аммо бечора бувим жон берар экан, ёнида туриб дуосини олиб қолмағаним учун кўб ҳасрат чекдим. Айниқса мусофиричилигим ёмон асар қилди. Кўз ёшларим билан юзимни ювдим. Бу кун бешинчи кундан бери раҳматлик бувим арвоҳига атаб қуръон бошлидим, хатим қилиб бағишлайман. Худо ғариқи раҳмат қиласин, сизга сабр берсин. Энди мусофирир қизингизнинг баҳтига сиз ўлманг, омин.

Баъда маълум бўлсинки, алҳамдуиллоҳ куявингиз ва қудаларингиз саломатдирлар ва уларнинг сояларида мен қизингиз ҳам ўйнаб-кулиб юрибман. Сизни ва отамни жуда соғиндим, агарда оғир оёқ бўлмасам эди, қиши бўлишиға қарамасдан Марғилонға жўнар эдим. Қудангиз — қайин онамнинг сўзига қарағанда, келаси ойға кўзим ёрир эмиси. Қудангиз мени на ерга ва на кўкка ишонадир, ўн беш кундан бери қўлимни совуқ сувга ҳам урдирмай қўйди. Ўзи гўёки тўйга ҳозирланғандек бешик ясад, сарпа тикиб юрийдир... Маним бўлса нима учундир юрагимда бир қўрқув бор... Ўткан хатларимда кундашим билан миросамиз келишмай турганини кулгулук тарзида ёзған эдим. Нафси ламирда эрса, орамиз жуда бузилған, мен ҳам ўшал вақтларда чин кундашлиқ тўнини кийған эдим. Зайнабнинг битмас хусумати эса ғолибо<sup>2</sup> маним икки қатлиғим ошкор бўлған кундан бошлианди. Сизнинг бошингиздан кундашлиқ савдоси ўтмаган бўлса ҳам тушинсангиз керак: биз икав агар қўйиб берсалар гўё бир-биримизни еб-ичмакчи эдик... У кунлардаги ҳолимдан ўзимга энди ҳисоб беришкага ҳам уяламан... Яхшики, бизнинг можаролардан

<sup>1</sup> Дори дунё — дунё тириклиги, ташвиши.

<sup>2</sup> Ғолибо — асосан.

қайин отам жуда сийрак хабардор бўлди. Шундօғ ҳам бўлса бу жанжаллар гоҳо унинг қулоғиға етиб қолар ва биз икки ёв унинг олдиға чақирилиб насиҳатини эшишар ва лекин яна ёмонлиғимиздан қолмас эдик. Сиз ранжи-сангиз ҳам айтай: қайин отамни ўз дадамдан ҳам яхши кўраман. Бу яхши кўришим куявингизнинг дадаси бўлғани учун эмас, балки унинг нур ичига чўмилғандек бўлиб кўринган сиймосини, ойим деб хитоб қилғандаги мулойим, беозор ва муассир<sup>1</sup> сўзини яхши кўраман. Ул насиҳат учун оғиз очса вужудим эриб кеткандек ва бир турлук ухлаб ҳузурланғандек. Қисқаси, Зайнаб билан жанжалла-шишининг ўзи бир ҳузур ва жанжалдан бўшалғач, қайин отамнинг қаршисиға ўлтуриб насиҳат эшишиш ундан ҳам яхши ҳузур... Сиз маним телба сўзларимдан ач-чиғланманг. Агар бу гапимнинг тўғрилиғини билмакчи бўлсангиз, Тошканд келингиз-да, қайин отамнинг на-сиҳатини ўз қулоғингиз билан эшигинг-да, ундан кейин сўзимга қиймат беринг.

Шу йўсун Зайнаб билан уятсизча кўб олишидиқ, бу ит-мушукликдан биз зерикмасак-да, куявингизнинг жони-дан тўйдираёздиқ. Мундан бир мунча илгари ул биз икки кундашининг юзимизга: "Агар шу ҳолда давом этаберсалар-ринг икавларингга ҳам баробар жавоб бериб қутиласман!" деди. Унинг бу таҳдиidi иккимизга эмас, балки биттамиз-гагина хос эди. Мен бу таҳдиiddан албатта қўрқмадим, аммо "Зайнаб тушиниб қолмаса яхши эди" деб қўрқдим. Дарвоқиъ натижা мен қўрқанча бўлди. Зайнаб бу таҳдиiddан сўнг онасининг уйига аразлаганнамо кетиб қолди. Улардан ҳам яхшифина дакки еган бўлса керак, бир неча кундан сўнг ёвошқина бўлиб қайтиб келди. Энди шу воқиъага икки ой чамаси вақт ўтди ва лекин орамиздан жанжал чиқмади. Мен жўрттага баъзи гапларни теска-риликка олиб кўрсам ҳам ул чурқ этмайдир. Унинг бу ҳоли эрса маним учун яхши эмас, ул яна кўб вақт биз-нинг орамизда тикан бўлмоқчи...

Келаси оидан жуда юрагим уюшадир... Кечалари кўкка қараб келаси ой шу кунларда ёруғ дунёда борманми, ўйқманми дейман... Ойша бувим марҳум бўлмағанда шу ой ичи ўзингиз Тошкандга етиб келар эдингиз. Аза ҳамма

<sup>1</sup> Муассир — таъсирили.

вақт топилади десангиз, қизингизнинг кўнгли учун ҳали ҳам келганингиз яхши. Дадамга маним арзимни айтсангиз албатта қайтармас. Мендан дадамга беҳад салом. Келаси ойдан қўрқаман... Кўришалмасак мендан рози бўлинг, дадам ва бошқа ёру дўстлар ҳам. Кумуш ёздим. Тошканд 1269-нчи йил, 1 қавс<sup>1</sup> ойида".

Кумуш ўз хатида ёзганидек, дарҳақиқат, Зайнаб шу кейинги кунларда ёвошка тортқан, ўн оғизга бир оғиз сўз қайтармас, тинчкина, мулойимгина, яъни мундан бир йил бурунгича эди. Қайнин она тарафидан — "Опангнинг кўзи ёрир вақти етди, ўчоқбоши ишларингни энди ўз қўлингга ол!" деб қилинган таклифни мамнуният билан қабул этиб, ҳатто Ойбодоқ онани ҳам ўчоқбоши юмишидан ҳалос эта-ёзған, унга фақат ҳавли супуриш, уй йигиш ва шунга ўхшашиб майдагина қолдирган эди. Зайнабдаги бу ўзгариш фақат ҳалиги тараф билангина қолмай, эри тўғрисида ҳам шундог эди. Отабек ўз ёнига кирса — кирдингми демас ва кирмаса — кирмадинг демас эди. Эрининг баъзи бир самимияти қоронгуроқ муомалаларига қарши Зайнаб ҳам муҳмалрак қилиб кулиб қўяр эди.

\* \* \*

Ой туғиб, мўлжал яқин етди. Марғилондан ҳам Офтоб ойимнинг йўлга чиқиши хабари келди. Лекин Кумушда маълум оғриқ бошланган эди. Оғриқнинг биринчи куни Кумуш ҳеч кимга сездирмай юрди. Аммо иккинчи кун буни бошлаб Отабек, ундан кейин Ўзбек ойим сезди. Отабек маълум хавф остида бу сирдан кишига оғиз очиш учун ўзида мажол топмаса ҳам, Ўзбек ойим даррав Ҳасаналини мундан олти ой илгари белгуланиб қўйилған доя хотинга югуртириди.

Доя келгандан сўнг ичкари ҳавли эркак зотидан тозаланди. Кумушни ўқтин-ўқтин оғриқ ушламакда, доя хотин ва Ўзбек ойим унга ўзлари билган удимлар билан ёрдамлашмоқда эдилар. Кечка томон дард жуда кучайиб кетди, ўқтин-ўқтин дам-бадамга алишинди.

Ташқарида Отабек йўқ эди. Ҳасанали дарбоза билан меҳмонхона орасида қўлини-қўлига ишқаб юриниб турар

<sup>1</sup> Қавс — 22 ноябрь-21 декабрь.

ва қайта-қайта ахтахонаға кириб түрик йўрганинг у ер, бу ерини супирар эди. Ҳожи бўлса хурсанд ва хафалиги номаълум бир қиёфатда "Далойил" ўқур, ҳар беш дақиқада ичкари томонга қулоқ солиб тўхтар, гоҳо дари-чадан Ҳасаналини чақириб "тинчликми" деб сўрар эди.

Улар масжиддан шомни ўқуб киргач, ичкаридан Ойбодоқ кечлиқ олиб чиқди. Ундан на Ҳасанали ва на ҳожи оғиз очиб ҳол сўрамадилар. Таом устида Отабекнинг йўқлиғи ҳам ҳис этилмади. Сўзлашмасданғина лагандан бир мунча чўқиган бўлдилар-да, қўл артишдилар...

— Хуфтан айтилдими? — деб сўради ҳожи.

— Эшиитмадим... Чиқа берсак ҳам бўлар... — деди Ҳасанали.

Шу вақт ичкаридан хотинларнинг фавқулодда қий-чув товушлари эшитилиб, иккисининг ҳам қулоқлари тиккайди ва қўрқа-писа бир-бирларига қарашдилар. Қий-чув орасидан заиф йиги товши ҳам келиб қўйди... Иккиси бир мунча кулимсираб олдилар, лекин шундоғ бўлса ҳам яна чурқ этиб оғиз очмадилар. Орадан кўб фурсат ўтмади, ичкаридан Ойбодоқ югуриб чиқди ва даричадан туриб "сўйинчи!" деди. Ҳожи ёнчигини кавлай бериб "алҳамдулилоҳ" деб қўйди. Ҳасанали ҳам илжайиб ёнчиқ кавлашка тутиндига:

— Ўғулми, ҳолва<sup>1</sup> — деб сўради хотинидан.

— Ўғул!

— Баракалла.

Ҳожи кулимсираб қўлидағи уч-тўртта оқ танга билан битта тиллани Ойбодоқقا узатди — "Тангаларни ўзинг ол, тиллани доячага бер!" деди. Ҳасанали сўйинчисини топширғандан сўнг дуоға қўл очди: "Оллоҳ таоло умри билан берган бўлсин!" Шундан кейин хотиржамъ бўлған ҳолда хуфтанга кетдилар.

Отабек меҳмонхонага яқинлашиши билан чақалоқ йигисини эшитиб ихтиёrsиз ичкари ҳавлиға томон бурилди ва йўлакда онасига йўлиқди. Қоронгу бўлса ҳам Ўзбек ойимнинг тусидаги шодлиқ белгулари очиқ кўриниб турар эди:

— Ўғул муборак бўлсун, болам!

— Ўзи тетикми?

<sup>1</sup> Тошканда "қиз тұғды" ўрнига "ҳолва тұғды" дейдирлар (муал.).

- Тетик!
- Олдиға кирайми?
- Йўқ, — деди Ўзбек ойим, — чиллалик уйга кечаси кўчадан келиб кириш яхши эмас... Ичкари кирсанг тўғри Зайнабнинг олдиға бор. Даданг шундами?

— Ўзи?..

Ўзи яхши, хотиржамъ бўл, — деди Ўзбек ойим, орқасига қайтди. Отабек кетига бурилиб ташқари йўлакдан киргучи дадаси билан Ҳасанали шапрасини олди ва ўйланиб тўхтади. Айниқса ҳозирги пайтда дадаси билан тўқнашиш унинг учун бир оз ўнгтайсизроқ туюлган эди. Шу йўсун бир мунча вақт йўлакда туриб, сўнgra ичкарига томон юрди. Зайнабнинг уйига ўтар экан, бир неча қайта Кумуш ётқан уй тарафка қараб олди.

— Ўгул муборак бўлсин!

Зайнаб эрини шу сўз билан кулиб қаршилади, Отабек ҳам кулимсираб "қутлуг бўлсин!" деб қўйди. Ўлтургандан кейин Зайнаб ўзича кулинди:

— Ҳалиги... — деди. "Ҳалиги" дан кейин айтадирган жумласини унугтиб қўйдими ёки ўйлаб қолдими, нима бўлса ҳам айталмади. Отабек унинг оғзини кулимсираган ҳолда бир оз кутиб "хўш, ҳалиги?.." деб сўради.

— Ҳалиги...

— Ўёғи?

— Оти қурсин... ҳа, айткандек, ошингизни ейсизми?

— Ейман.

— Совиб қолмаған бўлса — шу.

Отабек эртадан бери ҳеч нарса емаб эди.

— Қандоғ бўлса ҳам, — деди.

Ҳозир Зайнабнинг чеҳраси очиқдек кўринса ҳам, аммо бу очиқ чеҳранинг замирада уни жиддийроқ машғул қилған яна бир гап бордек, яни кўринишдан шошқанлик ва ё шунинг сингари бир ҳол унинг шу очиқ чеҳраси остига яширинғандек эди. Зайнабнинг ўн беш дақиқалик муомаласида Отабек юқориги каби "эсдан чиқариш" ҳолатига бир неча қайта учради ва охирда сўрамоққа мажбур бўлди:

— Нега ҳолингиз паришон?

Зайнаб кулди:

— Нега паришон бўлсин?

— Маним кўзимга паришон кўринасиз.

— Тўғри, — деди Зайнаб, — қўрқдим...

— Нимадан қўрқдингиз?

- Түғишдан...
- Қийналдими?
- Қийналиш ҳам гапми, — деди Зайнаб, — ўз кўзингиз билан кўрмаганингиз учун ишонмайсиз.
- Ойим мундог демаган эди-ку?
- Сиздан яширганлар.

Отабекнинг юраги жуда уюшиб кетди. Ҳатто кундашини паришони хотир қилган бу гап Отабекка қандоғ таъсир қилиши кўб тафсилга муҳтож эмас. Бу тўғрида Зайнабка яна савол ташлаб тафсилот олишдан қўрқди, ҳам узоқ ўлтуролмади. Чойини наридан-бери ичиб, ўрунини тўшатиб ётди. Зайнаб шамъни ўчирди. Ҳали ётмоққа вақт эрта эди — Зайнаб Кумушлик уйга — хотинлар олдига чиқиб кетди.

Отабек ухлаш учун ётқан бўлса ҳам ҳалиги гап уни кўз юмдирмай қўйди, ўнг, сўл, чалқанча ётиб боқар эди. Лекин Зайнабнинг — "қийналиш ҳам гапми?" жумласи қулоғи остидан кетмас эди... Кумушнинг уйидан кети узилмай келиб турған хотинларнинг гўнгир-гўнгирни ҳам унинг уйқусига халал берар ва ора-чора гўдакнинг йиглаған товши ҳам эштилар эди. Бу маъсум товушқа қарши унда бир хил яқинлиқ — оталиқ ҳисси қўзғалғандек бўлса ҳам, аммо бошқа қора хаёллар ичидан тез йўқолур эди. Шу йўсун ивир-живир, аччиғ ва сучук ҳолат ичидан ухлаб кетди. Бир-икки кун миёнасидаги кечинмалар турлиқ ранг билан унинг уйқулиқ димоғида акслана бошладилар... Сўчиб уйғонди... ёнида Кумуш... Зайнаб йўқ эди. Уйқулиқ кўзи билан нариги уйга қулоқ солди, ҳануз бояғи товушни эшитди ва ўнг ёнини босиб кўрпага бурканди, мундан кейин тинч ухлаб кетди...

Туш кўрап эди: "Чаманда гуллар очилған эмиш... Бу гулшан унинг ўзиники эмиш... Ул ранго-ранг чечаклардан кўзини ололмас эмиш. Теваракка келган ёвдан хавф бор эмиш... Ханжарини ушлаб ёвга қарши чиқған эмиш... Ёв қочқан эмиш... Ёв орасида онаси ҳам бор, отаси ҳам кўринар эмиш... Қайтиб чамангага кирса бир сигир гулни босиб, янчиб ўтлаб юрган эмиш... Бу ҳолдан ўзини унуган ва қўлидағи ханжари билан сигирга юргирган эмиш... Сигир эмас — сариқ сочлик албасти эмиш... Дармонсизланган ва ханжари қўлидан тушкан эмиш... Дунёни қоронгулиқ босқан эмиш..." Сўчиб уйғонди ва ўз ёнида ухлаб ётқан Зайнабни кўрди. Ҳалиги босиринқирашдан юраги гуп-гуп утар ва вужудини тер босқан эди. Секин-

гина ўнг ёнига ағдарилиб ҳавли томонға қараб ётди. Унинг ағдарилиши билан Зайнабнинг кўзи оҳистагина очилиб яна ёпилди.

Вақт саҳарга яқин, теваракдаги хўроздар кетма-кет қичқирап эдилар. Яқин орадаги обжувоз пойкўпининг зарби ерни силкитиб-силкитиб тўлқин берар эди. Нариги уйда ёниб ётқан шамъ нури дарича тирқишидан милт-милт кўзга илинур, аммо шип эткан товуш эшитилмас эди. Ул қайтиб ухлаёлмади. Кумушнинг кечаги қийналиши тўғрисида хаёлланиб кетди. Субҳазони айтилиб, сеқин-секин тонг ёриб борди, маҳалла масжидидан ҳам аzon товши келгач, ул таҳорат олмоқ учун қўзғалди.

Кумушнинг ёнига кириш қулай бўлсин, деб ноништани Зайнабнинг уйида қилди. Ўзбек ойим тарафидан кириш учун рухсат берилган эди. Чойдан кейин дояча Кумуш ёнидан бир оз вақтга чиқиб турди. Тўрга Кумуш ётқизилган, унинг оёғ томонида Ўзбек ойим чақалоқни кўтариб ўлтурган эди. Отабек кирганда ўзининг синиқган юзи, ичкарига ботинқираган кўзи билан Кумуш илжайиб унга қаради. Отабек тутилинқираб, "муборак бўлсин!" деди. Кумуш жавоб ўрнига уялиб юзини кўрпага яшириди.

Ўзбек ойим:

— Берганга қуллиқ бўлсин, ўлтур, — деди.

Отабек Кумушнинг бош томонига ўлтурди. Ўзбек ойим фотиха ўқуди. Сўнгра чақалоқни Отабекка яқинлашдириб, — тойчогимнинг кўрманасини чиқар, дадаси,—деди. Отабек қизарип болага қаради, Кумуш юзини яна кўрпага яшириб олди.

— Ўзингиз тузикмисиз?

— Шукур...

— Қийналибсиз, деб эшийтдим...

— Туғмоқ ҳазилми, сенга, — деди Ўзбек ойим, Кумуш Отабекни ўзига имлади ва қулогифа шивирлади — "сизнинг гуноҳингизга..."

— Хўрак қилдингизми?

Ўзбек ойим:

— Кечадан бери ичига иссиг киргани йўқ. Зайнабка айтай сутлик атала қилиб берсин, — деди.

— Албатта, — деди Отабек ва онасига бир тилла сўйинчи бергандан сўнг хотиржамълик билан уйдан чиқди.

Тушликдан кейин Отабек меҳмонхонада китоб мутола қилур, даҳлизда Ҳасанали узилган от асбобларини улаб тикиар, ҳожи масjidгами, бошқагами кеткан эди. Шу вақтда ичкаридан Ойбодоқ чиқиб Отабек ёнига келди:

— Бек, сиз уйга кириб чиқар эмишсиз, — деди.

Отабек китобни белгулук қилиб ёпди:

— Тинчликми?

— Тинчлик... даррав киринг-чи!

Отабек Ойбодоқ билан кетма-кет ичкарига кирди. Зайнаб ранги ўчкан ҳолда Кумушнинг уйидан чиқиб келар эди.

— Нима гап? — деб ундан сўради Отабек.

— Билмадим, — деди, — опам кўнгиллари айнаб қусяптилар...

Отабек эшик ёнига келгандан сўнг уйдан бир неча хотин паранжи ёпиниб чиқдилар-да, ул уйга кирди. Ўзбек ойим жом ушлаган, Кумуш жомга ўқиб қусар эди.

— Нима бўлди?

Кумуш жавоб бералмади.

— Билмадим... боятдан бери тўхтовсиз қусяпти, — деди Ўзбек ойим. Қусиб чарчаған Кумуш ҳолсизланиб бошини ёстиққа ташлади. Ўқиб ёшланған кўзлари билан эрига қараб олди.

— Ёқмайдирған хўрак бергансиз.

— Ёқмайдирған ҳеч нарса егани йўқ, — деди онаси, ўша аталадан бошқа хўрак қилмади. Ундан ҳам ярим косагина ичди. Қолғани ана тоқчада...

Ўзбек ойимнинг гапи тутгасдан Кумуш яна жомга интилди. Отабек унинг бошини тутди.

— Табиб айтдирайми?

— Айтдир. Маним ҳам кўнглимга шу келиб турган эди.

Отабек Кумушнинг қусуғи биткунча турди-да, сўнгра югуриб ташқарига чиқди. Ҳасанали ҳануз бояги ишда эди.

— Ота, сиз югуриб табибга боринг-чи!

Ҳасанали ишини ташлади:

— Нима гап?

— Келинингиз боядан бери қусар эмиш.

Ҳасанали табибга югурди. Отабек қайтиб уйга кирди. Чақалоқни Зайнаб кўтарган, Кумуш ҳамон қусмоқда... Кумуш ҳолсизланиб ўзини ёстиққа олди. Қовоқ остлари кўкарган, ёнига келган Отабекка ҳам қарамоққа мажолсиз эди.

— Тузикмисиз?

— Кўнглим...

Отабекнинг ҳамма бадани титраб кетди, шундоғ бўлса ҳам ўзини қаттиғ ушлади:-

- Қатиқ ичириб кўрдингизми? — деди онасиға.
- Йўқ.
- Қатиқ буюринг!

Ойбодоқ қатиқ келтургунча Кумуш яна жомга интилди. Бир-икки ўқиб қусқандан кейин, Отабекнинг қўлидағи сув билан оғзини чайди ва пиёладаги қатиқдан бир-икки ҳўплаб, ўзини ёстиққа ташлади. Ҳарорати кучлиқ, юрак уриши фавқулодда тез эди. Отабек унинг манглайини қўли билан босиб ушлаган эди, бир оз тинчигандек бўлди. Ўзбек ойим бурчакда бола кўтариб ўлтурган Зайнабдан чақалоқни олиб, уни жомни тўкиб келишка буюрди. Отабекни манглайида турган қўли қизиб кетиб, иккинчи қўлини алмашдиришга мажбур бўлди. Манглайида со-вуқлиқ ҳис этиб Кумуш кўзини очди.

- Кўнглингиз босилдими?

Кумуш жавоб ўрнида ёстиқдан қўзғалди. Жом йўқ эди. Отабек шошиб токчадаги хитойи норин товоқни олди. Кумуш қусди. Бу гал қусуқ бояги қатиқ аралаш кўкимтил ва саргимтил нарсалар эди. Оғзини чайғандан кейин Отабек қатиқни таклиф қилған эди, ичмади ва ўзини ёстиққа отди...

Табиб келди, хабарини эшитиб, Отабек жонланғандек бўлди. Уй эшигига жом кўтариб келган Зайнаб кейинига қайтди. Ўзбек ойим ҳам чақалоқни кўтариб уйдан чиқди. Отабек табибининг ҳурматига туришни унутиб Кумушнинг манглайини босқанча ўлтурар эди. Табиб Отабекдан воқиъани сўраб билгандан сўнг Кумушнинг томирини кўриб лабини тишлаб қолди ва товоқдаги қусуқни ҳидлаб қаради:

- Бу кун нима ҳўрак қилған экан?
- Атала.
- Ўша таомдан бир оз қолгани бормикин?
- Бор! — деди Отабек ва боя онаси кўрсаткан жойдан косани олиб табиб қўлиға берди. Табиб косадан бармогига бир оз элашдириб ялади ва даррав туфлаб ташлади.

- Заҳар ичибити!

Отабек сапчиб кетди, тузи қўрқунч ҳолга кирган эди...

- Бекор гап!

Табиб Отабекнинг ҳозирги ҳолатидан даҳшатка келди...

- Мен ҳозир дағъи учун дору юбораман, — деди ва қўзғалди.

Отабек ҳам унинг билан биргалашиб ўрнидан турди:

— Зақарни ким беради?

Нима дейишкә ҳам ҳайрон табиб:

— Мен... мен... ўзингиз ўйлаб кўринг-чи... Мен даррав дору юборай, даррав ичиринг, тузикми? — деди.

— Билдим, билдим! — деди бечора Отабек. — Зайнаб, Зайнаб, Зайнаб... Жалаб! Юборинг, юборинг, даррав юборинг!

Табиб кетди, Отабек телбаларча югуриб Кумушнинг бошига келди, юзини очиб манглайнини босди ва ўпди... Кумуш кўзини очиб куч билан сўл қўлини эрининг елкасига ташлади... Қўлида чақалоқ билан Ўзбек ойим кирди.

— Зайнабни чақир, Зайнабни!

Ўзбек ойим табиб сўзидан хабардор эди:

— Зайнаб! Зайнаб!

Зайнаб югуриб уйга кирди. Туси мурдадек оқарған эди. Отабек Кумушни қўйиб ердаги аталани олди:

— Ич муни, ич жалаб!

Зайнаб орқага тисланди... Отабек косани унга отди... Зайнабнинг кийими атала билан беланди. Шунинг устига даҳлиздан Юсуфек ҳожи кўринди:

— Кет жалаб, кет! Талоқсан, талоқ!

“Талоқ” сўзини эшиткан Кумушнинг кўзи ярқ этиб очилиб, яна юмилди... Ҳожи воқиъани табибдан эшиткан, шунинг учун ҳозирги фожиға саҳнасидан ажабланиб турмади.

— Чиқ, Зайнаб, чиқ! — деди ул ҳам, — лаънат сендек хотинга!

Зайнаб четланиб уйдан чиқди... Ҳожи Кумушнинг бошига келиб ўлтурди. Отабек ва онаси оёғ устида эдилар, Кумушнинг кўзи юмиқ, соchlари юзи устида паришон эди. Ҳожи ўз қўли билан соchlарни тузатиб Кумушнинг кўкимтил товланган юзини кўрди ва манглайнини босди...

— Ойим... Ойим!.. — деди ҳожи. Кумуш кўзини очиб бесаранжом унга назар ташлади ва таниб... қўзгалмоқчи бўлди.

— Қўзгалманг, ойим... қўзгалманг!

Кумушнинг кўз ёшиси чаккасидан оқиб тушди... Ҳожи ҳам ўзини тўхтатолмай, Кумушнинг ёшини артиб, бошини силади:

— Худо шифо берар, болам!

Кумуш жомга қўзгалди, Отабек келиб қўлтиқлади,

жожи ҳам унинг бошини тутди... Бу гал қусуқ қонға айланган эди, бурнидан ҳам бир неча томчи қон оқди... Қусуб ётгач, кўзи ярқиллаб очилиб кетди ва теварагига бетоқат қаранди:

— Ойи... дада... — сўнгра, — бегим, — деб ингради... Эрининг юзини юзига қўйди, уялгансумон кўзини юмди...

\* \* \*

Эртаси кун дафн маросими бўлди. Жанозага Тошкандинг ҳар бир маҳалласидан деярлик кишилар иштирок қилди. Фақат мақтуланинг энг яқинлариғина бу тантанага етиб келалмадилар.

Бечора она, бечора ота!..

Учунчи кун улар ҳам келиб етдилар... Уларнинг ҳозирги ҳолини тасвир мумкинми?!

Еттинчи кун хатми қуръон қилиниб ҳалқга ош берилди ва шу муносабат билан чақалоққа "Ёдгорбек" деб исм қўйилди.

Кумушнинг яқинлариғина эмас, балки фожиъадан хабардор бўлған шаҳарнинг катта-кичиги Зайнабка бериладирган жазони эрта-кеч кутмакда эдилар. Бироқ фожиъанинг ўнинчи кунларида Зайнабнинг жинни бўлиб, очиқ кўйи кўчада юрган хабари ва оғаси томонидан ушланиб кишангага солинган можароси эшитилди. Зайнабнинг жунуни қозилар ва табиблар тарафидан ҳам тасдиқ этилгач, унинг устидаги жазо кўтарилди. Дарҳақиқат ақлдан ёзиб кўчаларда очиқ кезиш ва кишангага тушишнинг ўзи ҳам Зайнаб учун кичкина жазо ҳисобланмас эди.

Фожиъанинг йигирманчи кунида яна хатми қуръон қилиниб, бутун юртка ош берилгандан сўнг, бечора болу паридан<sup>1</sup> айрилғанлар Марғилонға қайтиш ҳаракатига тушдилар. Ёдгорбек ҳам Офтоб ойимнинг қучогида кетмакчи, унинг олиб кетилишига қарши ҳеч ким йўқ эди.

Энг кейинги видоълашиш куни етди. Отабек, қутидор ва Офтоб ойим (...) қабристонининг икки туп қуриған чинор ёғочи орасига турғузилған янги хиштин сағана қаршисида тўхтадилар. Сагананинг ўнг бошидағи тошдан ўйиб ясалған лавҳа кўзга чақилиб туради:

<sup>1</sup> Болу пар — қанот.



لايلاخا илла-оллоху Мұхаммаду-расул-лүллөх  
 Ҳазиҳил марқадул мұнавварагу ліл мазлуматил  
 мәшиұдати ал-магфурати.

Кумушбibi бинти Миракарим Маргипоний тарихи таваллуди 1248,  
 вафоти 1269 йил ҳижрий, жумод-ул-аввал.

Бұ лавҳа бир ылғынрадан ҳусн санамига әлгордир.  
 Бунда мадғун күндапш балосининг намоён бир құрбонидир.

Аё чарх, этдинг ортуқ жабр буніәд,  
 Құзім ёшлиг, тилемда қолди фарәд.  
 Ҳастиим лолазоридин аюрднинг,  
 Еқиб жоним, кулим күкка совурдинг.

Бечора она чидалмади, қабрни қучоглаб уввос тортди.  
 Отабек ҳам қабр сұнға тиз чўкиб, кўз ёшиси билан тупроқни лой қила берди... Қутидор лавҳа қаршиисида эди.

Лавҳани ўқуб чиқғандан кейин ул ҳам пиқ-пиқ йиглаб юборди. Ярим соат чамаси шул ҳолда қолдилар. Қуръон ўқушга ҳеч кимда мажол йўқ эди. Қаршидаги бинога Юсуфбек ҳожи тарафидан қўйилған қори буларнинг ҳолига тушинди. Секин-секин қориҳонадан чиқиб келди ва нарида ўлтуриб қуръон ўқуди. Офтоб ойимнинг ноласи босилса ҳам, лекин кўз ёшиси тийилмади. Бир улгина эмас, ановлар ҳам шу ҳолда эдилар. Фотиҳа тортилғандан сўнг қутидор ва Офтоб ойим қорига пул бердилар. Қори кеткандан кейин ҳар қайсилари ўзлари и босиб алоҳида-алоҳида қуръон ўқуб багишладилар, сўнгра оҳиста-оҳиста йўл олиб қабр билан видоълашдилар. Гўё Кумуш "мендан рози бўлинг!.." деб онасига хитоб қилар, Офтоб ойим орқасига қарай-қарай йиглаб келар эди...

Отабек уларни уйга қўйиб, яна қабр ёнига келди ва туни билан шунда қолди. Эрта билан Ҳасанали аравани қўшиб тайёрлаган, майда-чуйда аравага ташилар эди. Энг кейинда Офтоб ойим Кумушнинг кийимлари билан Ёдгорбекни кўтариб чиқди, кейинроқ Юсуфбек ҳожи билан қутидор кўриндилар. Қутидор видоълашиб аравага чиқғанда кўча тарафдан Отабек кела берди, келиб отнинг жиловини ушлади ва от устига минган Ҳасаналига — "тушинг отдан!" деди. Ҳасанали отдан тушди. Отабек иргиб отқа минди ва қутидордан сўради:

— Отни ҳайдайми?

Қутидор билан ҳожи тушинишолмай бир-бирларига қарашдилар. Йўлакда турган Ўзбек ойим дарбозадан мўралаб қўйди. Қутидор индамагани учун Отабек ўзича отни ҳайдаб юборди.

— Хайр!

— Хўш!

Марғилонга жўнайдирган Ҳасанали гангид кўчанинг ўртасидан ҳожига қаради. Ҳожи йўлакдаги ойимга ер остидан кўз қирини ташлади... Отабек ортига қарамасдан аравани ҳайдар эди...

## 17. ХОТИМА

Бир йилдан сўнг Отабек уста Алим билан бирга Тошканд келди. Ҳожи ва Ўзбек ойим оғиз очиб ундан ранжий олмадилар. Ул меҳмонлар каби эди. На отаси ва на онаси билан очилиб сўзлашмади. Уста Алим билан бир ҳафта чамаси Тошкандда туриб энг сўнгги кеч ёлғиз кўйи Кумуш қабри ёнида бўлди. Кеча ойдин, қабристон тиб-тинч, узогроқдан қуръон товши эшишилар эди. Икки туб чинор бутоқларида қўниб ўлтурган уч-тўртта бойқушлар, қабр ёнига тизланган Отабек ва юқори, қўйи дўмбайган қабрлар бу тиловатка сомись каби эдилар. Қуръон оятлари қабристон ичига оғир оҳангда оқар эди. Қабр ёнига тиз чўккан йигитнинг кўз ёшлари ҳам қуръон оятларига қўшилиб оқар эди. Бирар соатдан кейин тиловат тўхталди. Отабек ҳолсизланиб оёғ узра турди ва орқасидағи ярим яланғоч кўлагани кўриб бир неча қадам қабр томонға тисланди... Кўлага ялингансумон унга яқин юриб келди...

— Ким бу?

— Мен Кумуш!..

Отабек товуш эгасини таниди. Бу мажнунна Зайнаб эди.

— Кет мундан!

— Мен Кумуш! — деди яна Зайнаб, аммо кетмай иложи қолмади. Зероки дунёдағи энг яқин кишиси унга "кет!" амрини берган эди. Зайнаб орқасиға қарай-қарай Отабек-

дан узоқлашди. Отабек қайтиб унга қарамади, қабр ёнига тиз чўкди...

Эртаси кун Ўзбек ойим йиглай-йиглай Ёдгорбек учун тикдирган кийимларини ўғлиға топшириди. Отабек уста Алим билан бирга Марғилонга жўнади. Бундан сўнг Отабек Тошкандга қайтиб келмади, бир неча қайта Ўзбек ойимнинг ўзи Марғилон бориб келди.

1277-нчи йилнинг куз кезларида бўлса керак, Юсуфбек ҳожи Қаноатшодан<sup>1</sup> бир хат олди. Қаноатшо Авлиё отадан ёзар эди.

"Ўғлингиз Отабек яна бир киши билан бизнинг қўшунда эди. Олмота устидаги ўрус билан тўқунишмамизда биринчи сафимизни шу икки йигит олди ва қаҳрамонона урушиб шаҳид бўлди. Мен ўз қўлим билан иккисини дафн этдим..."

Юсуфбек ҳожи хатми қуръон қилиб юртка ош берди, Ўзбек ойим қора кийиб таъзия очди.

Битди.

<sup>1</sup> Қаноатшо — Ҳозирги Тожикистоннинг Қоратегинидан. Кўён хонларининг бир нечасида амири лашкар лавозимида, шунингдек Туркистон вилоятининг ҳокими бўлган. Русларга қарши курашганлардан. Бухорога элчи бўлиб боргандা амир Музafferхон томонидан 1862 йилда қатл этилади.

## ЁЗГУЧИДАН

Кейинги Маргилон боришимда яқын ўртоқлардан Ёдгорбек түғрисини суриштириб билдім: Ёдгорбек ушбу астронинг ўн түккүз ва йигирманчи очлиқ йиллари миёнасида вафот қилиб, ундан иккі үғул қолибдір. Үғулларидан биттаси бу кунда Маргилоннинг мастьул ишчиларидан бўлиб, иккінчиси Фарғона босмачилари орасида экан. Бу кунда ному нишонсиз, ўлук-тириги маълум эмас, дейдилар.

# МЕХРОБДАН ЧАЁН

Худоёжникъ ва музикантъи ҳаётидан  
тавнишии ўзинок



## РЎМОННИНГ МАВЗУЪИ ТЎФРИСИДА

Туркистон феодалларининг кейинги вакили бўлған Худоёрнинг ўз хоҳиши йўлида дечқон оммаси ва майда ҳунарманд — косиб синфини қурбон қилиши; мамлакат хотин-қизларини истаганча тасарруф этиши, бўнга қарши келгучилар тиласа ким бўлмасин, раҳмсиз жазо бериши рўмоннинг мавзуиъидир. Худоёрнинг бу йўлдаги биринчи истинодгоҳи бўлған уламолар, уларнинг ички-ташқи аҳволи, ахлоқи, мадраса ва оила ҳаёти, уламода инсоний ҳис битканлиги ва қолғани ҳам хабосат<sup>1</sup> пардаси остида сезилмас даражага етканлиги мундарижа сифдирган қадар баён қилинадир. Булар рўмоннинг номарғуб — манфий қаҳрамонлари. Иккинчи тарафда мазкур қора кучларга қарши "тубан" синф — камбағаллар, уларнинг хонлиқ тузилишига, қора куч — уламо алайҳига чиқиши. Меҳнаткаш камбағалларнинг ахлоқи, сажияси, оиласи, турмиши ва бир-бирига алоқаси, самимияти.

Албатта, мен бу сўнгги марғуб қаҳрамонларни ўзбек тарихининг ҳазми кўтарган қадар ўз ҳолица олишқа тиришдим. Уларнинг хон ва уламога қарши исёни· табиъий — шаръийдир. Чунки, шундан ортиғи соҳта бўлиши устига китобнинг қадрини ҳам тушурар эди. Шу икки синф курашини тасвир қилиш воситасида хон ҳарами, хотинлари, қирқ қизлар, тарихий ва этнографий лавҳалар, ўзбек ҳаёти, қизиқчилиги, танқидчилиги, ўзбек хотин-қизлари орасидағи истесъод, шоиралар, азкиячиллик ва бошқа яна кўб нуқталарни қамраб олинди.

Рўмонда яна бундан бошқа бир кўб жиҳатлар бор. Уларни бу ерда санаб ўлтуриш ҳожат эмас, улар муҳтарам ўқуғучининг назаридан қочиб қутилмас.

Абдулла Қодирий (Жулқунбой)  
Тошканд, 1928-нчи йил, 5 февраль

<sup>1</sup> Хабосат — нопоклик.

— Агар Фарҳоднинг Ширин, бўлса Мажнунларнинг Лайлоси  
Насиб ўлмиш менга гулшан аро гулларнинг — Раъноси,  
(Мирзо)

Агар ор этса Лайли ҳақлидир Қайснинг жунунидин  
Не бахт Раъно харидоринг талаб аҳлининг — Мирзоси.  
(Раъно)

## 1. РАЪНОНИНГ ЭГАСИ

**С**олиҳ маҳдум бу кун одатдан ташқари ешилиб кетди, масжиддан чиқиб тӯғри қассобнинг олдига борди, бир тангалик гўшт, саккиз пуллик пиёз олиб ҳавлисига келди. Мактабда ҳусниҳат машқ қилиб ўлтургучи болалар ичидан иккитасини гулзорни супуриб, сув сепишса буюрди ва ўзи гўшти кўтариб ичкарига кирди.

Нигор ойим ҳозиргина қизларни озод қўюб, кўкрак боласини багрига олған эди. Раъно ҳавли юзида иккита уласининг ўртасига тушиб, уларнинг лой ўюнига иштирок этар, ер супуриб ётқан соч ўрумларининг турпоққа белаш-канидан хабарсиз эди.

Гўшт кўтариб йўлакдан кирган Солиҳ маҳдумнинг кўзи Раъононинг шу ҳолига тушди:

— Балли Раъно, ана жиннилик! — деди маҳдум, атлас кўйлак сенга ҳайф, сенга бўздан бошқаси албатта ҳайф!

Раъно ўрнидан турди, дадасидан уялиб лойлиқ қўлларини орқасига яширди.

— Уят эмасми, юв қўлингни, юв! Укаларингни бола десам, сен улардан ҳам ошиб тушасан!

Раъно югуриб ариққа кетди, Нигор ойим ўлтурган жойидан "Раъононинг ақли тушсин" деб кулиб қўйди. Солиҳ маҳдум ҳануз Раънодан койиб келар эди:

— Ишинг бўлмаса китоб ўқи, ҳусниҳат ол, сен кулолнинг қизи эмассанки...

Солиҳ маҳдум гўшти Нигор ойимнинг ёнига қўюб ўзи зина билан айвонга чиқди.

Маҳдум томонидан Раъононинг тергалиши Нигор ойимни унча машғул этмади. Аммо ҳозир унинг кўнглига келган масала эрининг чиқим важига фавқулодда ешилиб кетиши эди. Тӯғри, Нигор ойимнинг ошхонасиға шунингдек бир неча чораклаб гўшtlар кўб келар эди, фақат эри томонидан эмас. Солиҳ маҳдумнинг жўмардлиги кўпинча йигир-

ма пайса<sup>1</sup> этдан нариға ошмас, шунда ҳам болалардан мұмайроқ "озодлиқ" келиб қолса ёки "панжшанбалик" күткандан ортиғроқ тушса.

Шүннинг учун Нигор ойим бу жұмардлық ҳақини эрига бералмади:

— Гүштни күброқ олибсизми... Аңвар буюрганмиди?— деб сүради.

— Иүқ,— деди маҳдум салласини қозиққа ила-ила,— бир манти қилайлиқ,— дедим,— манти еганимизга күб бўлди, валлоҳи аълам...

Раъно ювиниб келди, дадасига уят аралаш бир қараб олдида, Нигор ойимнинг ёниға ўлтурди ва онасининг бағрида эмисб ётқан чақалоқнинг кичкина мимит қўлларини суюб ўпди.

Солиқ маҳдум ешиниб келиб она-боланинг устида тўхтади.

— Сен мундан кейин кичкина бўлмайсан қизим, Раъно,— деди маҳдум насиҳатомуз,— шу укаларинг билан қилиб ўлтурган ишингни киши кўрса нима дейди. Иншо-оллоҳ ўй эгаси бўлишга яқинлашиб қолдинг. Энди тоштарозуни ҳам шунга қараб қўйишинг керак, қизим.

Раъно қизариниб онасига қаради, яна мимит қўлни ўпишка машғул бўлди.

— Раънони эгасига топширмағунингизча,— деди Нигор ойим, — қуюлмайдирғанға ўхшайдир.

Бу сўздан Раъно уялиб, бошини чақалоқнинг бағрига тиқиб олди. Солиқ маҳдум кулимсиган кўйи даҳлизга юруб борди ва оёғини кафшига узатди.

— Тур, ётма Раъно!— деди даҳлиздан, гүштни онагта тўғраб бер, пиёзни арт! Аңвар аканг ҳам келиб қолар, таом асрга тайёр бўлсин!

Раъно дадасини узоғлатиб, бошини кўтарди, онасига ўпка аралаш кулиб қаради. Унинг бу қарашидан онасининг бояғи сўзига қарши ризосизлиқ онглашилмас, балки шодлиқ маънолари ўқулур эди. Дарҳақиқат, эру хотин ораларида ўткан икки калима сўз шу оила гулшанида ўскан Раънонинг истиқболини очиқ белгилар эди. Нигор ойим "Раънони эгасига топширмағунингизча..." деб гарчи бир мунча қўполроқ таъбир билан бўлса ҳам "Раънонинг эгаси" борлигини сўзлар, Раъно эрса "эгаси"нинг ким эканligини яхши билгани ва уни қанот қоқиб қарши олгани

<sup>1</sup> Пайса – таҳминан 50 грамм.

учун жоду кўзида ризосизлиқ эмас суур мәннолари ўйнатар эди.

Дадасининг — "Анвар аканг ҳам келиб қолар, таоминг асрга тайёр бўлсин!" жумласи Раънога яна очиқ, яна равшан таъминот берар эди...

## 2. АМИР УМАРХОННИНГ КАНИЗИ

Солиҳ маҳдум 1230—1290-нчи ҳижрий йилларда "Ҳўқанди фирдавсмонанд"да яшаған бир муаллим ва имом, ўз замонасининг истилоҳи<sup>1</sup> билан айтканда "мактабдор домла"дир. Солиҳ маҳдум синфи жиҳатдан уламо оиласига мансуб бўлиб, бобоси Олимхон<sup>2</sup> ва Умархон<sup>3</sup> даврларида муфтилик, қозилиқ мансабларида хизмат қилған, отаси эрса Қўқоннинг Мадали (Муҳаммадали) хон<sup>4</sup> мадрасасида неча йиллар мударрис бўлғандир. Қисқаси маҳдумнинг ота-боболари хонлар қошида мумтоз ва ҳалқ назаридаги "шарафлик ва муҳтарам" мавқиъни ушлаб келганлар. Бироқ бу мумтоз силсила бизнинг маҳдумгача етиб келалмай, Мадалихоннинг қатли билан бирга кесилган, бунинг можароси эрса қўйидагичадир:

Туркистон хонлиги тарихидан хабардор кишиларга маълумдирким, Амир Умархон охир умрида ўз саройидаги ёш канизлардан бирига муҳаббат қўядир. Каниз ёш бўлғанлиги ва балоғатка етмаганлиги учун уни никоҳига ололмай вақт кутадир. Шу кутиб юриш йилларida Умархон муродига еталмай вафот қиласидир, таҳтка ўғли Мадалихон минадир. Орадан бир неча йиллар ўтиб бояғи каниз қиз балоғатка эришадир ва бир ҳуснига ўн ҳусн қўшулиб отанинг боласи бўлған Мадалихонни ҳам ўзига ошиқ қиласидир. Ўз саройида ўскан бу қизни ёш хон ҳамиша кўз ўнгига юритса ҳам бироқ... тарихнинг бизга хабар беришига қарағанда Мадалихон шу қизнинг дардидаги неча йиллар ёнадир. Чунки уламолар бу гўзални Мадалига она

<sup>1</sup> Истилоҳ — атама.

<sup>2</sup> Олимхон Норбутабий ўғли (1775—1811) 1798—1811 йилларда Қўқон хони бўлган.

<sup>3</sup> Умархон (1785—1822) Олимхоннинг укаси. 1811—1822 йилларда Қўқон хони бўлган.

<sup>4</sup> Мадалихон (Муҳаммадалихон) Умархон ўғли (1806—1842) 1822—1842 йилларда Қўқон хони бўлган.

мақомида ҳисоблаб, нима учундир хоннинг орзусига кўндаланг келадирлар:

"Отангиз, агарчанди канизни ўз никоҳларига олмаган бўлсалар ҳам ва лекин балоғатка эришкак оларман деб ният қилғанлар. Бинобарин бу каниз сизга она мақомида, шариъат рухсат бермайдир!" дейдирлар.

Мадалихон бу фатводан кейин дардини ичига ютишга мажбур бўлиб, аммо иккинчи тарафдан ўзининг орзусига қарши борган уламони секин-секин "илмий" ишлардан олиб улар ўрнига янгилашни қўя бошладидир. Ўз орзусига замин ҳозирлағач, бир неча йилни ўтказиб, яна уламога шу тўғрида фатво сўраб мурожаат қиласидир. Табиый, яқиндағина оғзи ошқа еткан янги уламолар ўз валийи неъматлари бўлган Мадалихонга хиёнат қилмайдирлар-да:

"Ба назди мужтаҳидини киром асли зътибор ақди шаръийдир<sup>1</sup>. Отангиз марҳум — никоҳланаман деб айткан бўлсалар ҳам никоҳландим, деб айтмаганлар. Бас, амиралмўъминин мазкуруни худ нафсларига<sup>2</sup> ақди шаръий<sup>3</sup> қилсалар жоиз ва дурустдир. Валлоҳи аълам биссавоб<sup>4</sup> деб фатвономани "бинни муфти марҳум", "бинни мударрис марҳум", "бинни Ҳўқандий марҳум!"— муҳри баҳайбатлари билан қалашибир берадирлар еа Мадалихон тўй ва томошалар билан мурод-мақсадига етадир...

Кимларнинг воситаси биландир мазкура гўзал канизнинг таърифи Бухоро амири — амир Баҳодир — (Ботур)<sup>4</sup> хонга етиб ул ҳам илгаридан ҳалиги канизга ғойибона ошиқ бўлған эди. Аммо қайси йўл билан бўлса ҳам шу канизни қўлга киргизиш фикрида бош оғритиб, нос чакиб юрган Баҳодирхон қулогиға бу хабари жонсўз етиб думоғидан дуд чиқадир ва дарҳол Бухоронинг забардаст уламо, муфти, аълам, ҳоказо ва ало-ҳозалқиёс пешволарини ўз ҳузурига чорлаб, дарғазаб воқиъани сўзлайдир ва улардан дарҳол бир "фатвойи баҳайбат"ни талаб қилғанида уламои киром ҳам дарон ботаҳорат-бетаҳорат, масалани эшитар-эшитмас фатво ёзадирларким:

"Бир жамоа мўъминларга амир бўлған зотнинг вазифаи

<sup>1</sup> Ба назди мужтаҳидини киром асли зътибор ақди шаръийдир — ҳурматта лойиқ дин алломаларининг назарича асосий зътибор шариат қонунларига қаратилиши керак.

<sup>2</sup> Худ нафсига — ўз нафсига.

<sup>3</sup> Ақди шаръий — шаръий никоҳ.

<sup>4</sup> Амир Баҳодир (Ботур) — Насруллохон (1826—1860 йилларда хонлик қилган) назарига айтилувчи лаҳаб.

шаръийиси шулдирким, исломда устивор турғай, ақкоми исломни<sup>1</sup> камокон<sup>2</sup> ижро қылғай. Ҳар бир амириким арқони исломдан<sup>3</sup> заррача юз ўгурса ул кимарса жамоаи ислом устига амир эмас шарирдир<sup>4</sup>. Наузанбилақим Фарғона ва Туркистом мамлакатининг алҳол<sup>5</sup> амири бўлған Муҳаммадалихон волидининг<sup>6</sup> манкуҳаси,<sup>7</sup> яъни волидаи айни ва ризоъисини<sup>8</sup> ўз ақдига олибдир, наузанбилаҳи, наузанбилаҳи. Оят ва аҳодиси шарифа ва ба чаҳори мазҳаб<sup>9</sup> ва ба назди мужтаҳидини киром ва уламои зул-эҳтиром<sup>10</sup> муттафақун<sup>11</sup> алайҳи кофирдир. Казолика<sup>12</sup> ўшандоғ муртаднинг қатли аввало дигар<sup>13</sup> ислом амирларига ва баъдаз<sup>14</sup> барча мўъминларга фарзи айндиндир!».

Дарвоқиъ "холисона" бу фатвога амир Баҳодирхон "бетарафона" қиймат бериб, "дин йўлида холис бир жиҳоди акбар"<sup>15</sup> деб жамиъи қўшунлари билан Фарғона устига юриш қиласидир. Амири Баҳодирнинг бу "холисона" жиҳоди Туркистон хонлиги томонидан қандай муқоваматларга<sup>16</sup> учради ва икки тарафдан қанча бошлар кесилди, албатта бу тўғрида бизнинг ишимиз йўқдир.Faқат бу можародан бизга кераклик нуқта шундаким, натижада Мадалихон шикаст топди, ҳам амири Баҳодир томонидан қатл қилинди.

1 Аҳкоми ислом — ислом ҳукмлари, қонунлари.

2 Камокон — бекаму кўст.

3 Арқони ислом — ислом руқиҳлари, асослари.

4 Шарир — ёмонлик қўйувчи, заараркунанда.

5 Алҳол — ҳозирги, бугунги.

6 Волид — ота.

7 Манкуҳа — никоҳли хотин.

8 Волидаи айни ва ризоъи — ўз ва эмизган онасини олибдир... (муал).

9 Ба чаҳори мазҳаб — суннийлик йўналишидаги шаръиатнинг ҳанафия, маликия, шофиъия, ҳанбалия мазҳаблари.

10 Зул-эҳтиром — эҳтиром эгаси.

11 Муттафақун — келишилган.

12 Казолика — шуннинг учун.

13 Дигар — бошқа, ўзга.

14 Баъдаз — кейин, сўнг.

15 Жиҳоди акбар — улуг юриш, уруш.

16 Муқовамат — қаршилик.

ди. Мадалихонга фатво ёзиб берган Қўқон уламоларидан бир нечалари ҳад урулдилар<sup>1</sup> ва бир нечалари қочиб қутулдилар. Амири Баҳодирхон бўлса Фаргона ҳукуматига ўз кишисини қўйди, фатҳу нусрат<sup>2</sup> билан канизни олиб Бухораға қайтди.

Мақсадға келсак Мадалихонга фатво ёзиб беришда иштирок қилған ва Баҳодир томонидан ҳад урулған уламоларнинг бири шу бизнинг Солиҳ маҳдумнинг отаси эди. Ҳад урулғандан сўнг кўб яшолмади, ўлди ья шунинг билан бу оиланинг бурунги имтиёз ва шарафи ҳам битди. Чунки мундан сўнг Туркистон тахтига ўлтурган хонларнинг ҳаммалари деярлик Бухоро амирининг ҳимоясида каби эдилар. Ва Мадалихоннинг фатвосига иштирок қилған уламолар ҳамиша эътиборсиз, мардуд<sup>3</sup> бўлиб қолдилар.

### 3. МАҲДУМНИНГ ЎЙЛАНИШИ ВА МАКТАБДОРЛИГИ

Солиҳ маҳдум отасининг вафотида йигирма ёшлиқ талаба эди. Отаси марҳум бўлғандан сўнг ўзидан бир неча ёш каттароқ оғаси Марғилонга имом бўлиб оиласи билан кўчиб кетди. Солиҳ маҳдум онаси ва ўн олти ёшлиқ Наъима исмлиқ синглиси билан Қўқонда қолди. Бирар жойдан келим бўлмаганлиқдан бу оила кўб танглика тушиб охирда Солиҳ маҳдум таҳсилни тарк этишкан, қорин тўйдирарлиқ бир касб излашкан мажбур бўлди.

Албатта Солиҳ маҳдум оғироқ касбни ухда қилолмас, имоматка бўлса соқоли чиқмаганлиқдан яролмас эди. Кўб озор чекиб ниҳоят қориндош-уруг ва маҳалла кишиларининг кенгашлари билан ўз уйига мактаб очди, маҳалладан беш-үнта бола йигди ва енг шимариб мактабдорлиққа бошлади.

Бир неча йил мактаб ривожга минмади, яъни болалар ўн беш-йигирмадан нарига ўтмай, "панжшанбалик" аранг ит азоби рўзғорға етиб турар эди. Маҳдум ва оиласининг шундан бошқа даромад манбаълари бўлмагани учун ҳар ҳолда, яна шунга қаноат қилмоққа мажбур эдилар.

Ўғул йигирмага, қиз ўн бешка етдими — оналарнинг дарди келин ва куяв савдоси бўлиб қоладир. Шунга

1 Ҳад урмоқ — ҳуқуқсизлантироқ.

2 Фатҳу нусрат — галаба.

3 Мардуд бўлмоқ — ҳайдалмоқ, қувилмоқ.

ўхшаш махдумнинг онаси Моҳлар ойимнинг касали гүё "дард устига чипқон" эди: махдумнинг ёши йигирмадан ошти, Наъима ҳам ўн саккизга тўлди, яъни келин ҳам керак, куяв ҳам. Наъима тўғрисидан ташвиш йўқ, ҳусн, одоб, юмиш, ҳаммасидан кўнгил тўқ, бек бўлмаса — бекзода, мударрис бўлмаса — мукаррир<sup>1</sup>.

Аммо махдум масаласи бир оз мушкилроқ эди: топиш тутиш маълум, отасидан қолғани фақат ички-ташқи ҳавли, мундан бошқа ҳеч гап. Бас, Моҳлар ойим ўз тириклигига махдумнинг "бошини икки" қилмаса, ўзидан сўнг унинг уйлана олиши амримаҳол. Шуни кўзда тутиб Моҳлар ойим махдумнинг уйланишига мазкура Наъимани восита қилмоқчи бўлди. Яъни Наъимани узатиб эвазига узатилган жойдан келин олмоқчи эди. Қарши қуда бўлмоқ учун қизлиқ ва ўғуллиқ ҳавлини учратиш ва бунинг устига "наслу наسابда текислик", олинадирған келиннинг силлиқина бўлиши — ана шундай мушкилотлар орқасида икки йил чамаси Наъиманинг умри сарғайиб ўтди. Юрт эмасми, дегандек юртчиликда юрак оғриғига даво топилмай қолмас. Шунга ўхшаш Моҳлар ойимнинг яраси ҳам ниҳоят учунчи йилда давосини топди:

Хон ўрдасининг мутаваффо<sup>2</sup> мирзоларидан биттасининг мадрасада ўқуб юрган ўғли бор эди ва уйида чақич чайнаб ўлтурган ўн олти ёшлиқ қизаси ҳам бор эди. Бу оила Моҳлар ойимнинг таклифини маъалмамнуният<sup>3</sup> қабул этди. Чунки "ўхшатмай учратмас" дегандек нариги тараф ҳам Моҳлар ойимнинг биттаси эди. Совчилар Наъимани ёқтириб, Моҳлар ойимнинг таклифини қабул қилиб кетдилар. Моҳлар ойим марҳум мирзонинг уйига қиз кўргали бориб ул ҳам "қизи жажжигина экан" деб келди. Куявлар кўрулиб улар ҳам зарарсиз топилдилар. Шарту шароит сўзлашилди: икки орада қалин-палин деган гаплар йўқ, ҳар ким ўз улушига тушкан ош-сувни қиладир, келинни ўраб-чирмаб оладир, вассалом.

"Ҳай этти, ҳуй этти, икки коски тўй этти" деганларидек ҳар икки тўй ҳам бир ҳафта ичидаги ўтти, Наъимахоним ўёққа кетиб, Нигорхоним буёққа келди. Шундай қилиб Солиҳ махдум хотинлик бўлди.

<sup>1</sup> Мукаррир — ассистент.

<sup>2</sup> Мутаваффо — вафот этган, раҳматли.

<sup>3</sup> Маъалмамнуният — мамнуният билан.

Солиҳ маҳдумнинг мактаб иши ҳам учунчи йилдан бошлаб бир оз жонланған, болалар ҳам ўттуз-қирққа еткан эдилар.

Солиҳ маҳдум ўттуз ёшларга борғанда мактабдорлиги ҳам яхшигина шуҳрат топадир, шогирдлар сони бир юзга етадир. Меҳмонхона торлиқ қылғанлиқдан мактаб учун маҳсус бино ёладир, имло, иншо ва ҳусниҳат машқи учун алоҳида хона айирадир. Маҳдум ёлғиз шунинг билангина қаноатланмай хотини Нигорхонимни ҳам ишқа соладир, яъни унинг саводини тузутиб "отин биби" қиласидир. Иккимич гузарнинг қизлари Нигорхонимнинг сабогига йигила-дирлар. Қисқаси, маҳдум мактабдорлиқда яхши шуҳрат қозонғанидек, уй-рўзгорини, юриш-туриш, кийим-солим ва бошқа тарафларини ҳам тузатиб оладир.

Қирқ ёшларида маҳаллага имом бўладир ва мактабини яна ҳам кенгайтириб шу даҳанинг ҳар бир табақаси ичидаги "устоз мулла Солиҳ маҳдум" бўлиб таниладир. Масалан, ўзида савод чиқарған косиб, саводгар, муллабачча (мадраса талабаси) ва шунингдек янги бўғимларга устоzlик унвонини оладир. Ҳатто кейинги вақтларда унинг шогирдларидан хон ўрдасигача бориб кирганлари бордирким, маҳдумнинг бу муваффақиятини бошқа бобларимизда ўқурсиз.

#### 4. МАҲДУМНИНГ БАЪЗИ ХИСЛАТЛАРИ

Юқоридан ўқугучига бир даража онглашилган бўлса керакки, яқин йигирма йиллардан бери маҳдумнинг келими шаҳар ёки қишлоқ сўраб турған бир бекча бўлмаса-да, ундан қўйироқ, ҳар ҳолда шаҳар мадрасасида дарстўлник қилиб, вақфни ўз қабзига<sup>1</sup> олған бир мударриснинг туши-мидан албатта кўб. Келимнинг шу йўсун яхши бўлишига қарамасдан унинг табиъатида ҳарчанд тиришилса ҳам мактаб бўлмайдирган хусусиятлар бор: ҳасисликка ўхшаган ҳолат, тамаъгирилик каби одат, ичқоралиқ сингари ҳаракат ва амсоли...

Ёш чоғида отаси ўлиб, қаттиғилиқда ўсади, унинг баъзи ярашмаган ҳаракатлари балки ўша қаттиғилиқнинг руҳка сингиб қолған ёмон таъсиридир. Ҳар ҳолда бизнинг мундаги вазифамиз маҳдумни таҳлил қилиш эмас, балки унинг шахсига хиёнат ва бўйтон қилишдан сақланиб, яъни

<sup>1</sup> Қабз — тутам; чангал; қўл ости.

ортдирмай ва камитмай ўқуғучиға бутун тақдим эта билішдір.

Ойни этак билан яшириб бўлмайдир. Маҳдумнинг хасисликка ўхшаш ҳолатлари албатта бор эди. Маҳдум топибтутмаган йилларда бу ишни йўқлиқдан қиласидир, десак-да кейинги вақтларда ҳам шу одатини тарк этмагани учун табиъатида бир мунча хасислик бор экан, деймиз.

Кўйлак-иштонининг аксар етти-саккиз жойидан ямоғи бўладир. Етти қишдан бери гуппи — чопон янгилагани маълум эмас, фақат қиши келиб кеткан сайн алак гуппининг енги ўзгарибкина турадир ва астари йил сайн янгидан-янги ямоқлар билан бойийдир, шу гуппи бутун умрида биргина мартаба ва шунда ҳам маҳдумдан берухсат аммо, Нигоройимнинг зўри билан тогорага тушиб чўмилди. Бу кунда бўлса тўрт йил бурунғи гусли<sup>1</sup>, етти йиллик тузи, турлик-турлик ямоғи билан саккизинчи қиши маҳдум поччасига содиқона хизмат қилиш учун бўғжома ичидагизига куч йигиб ётадир. Маҳалла кишилари маҳдумнинг бу чопониға "молтопар" деб исм берганлар, гуппи кийилиб чиқилган кун маҳдумга сезидирмай "молтопар савдодан қайтибди... ҳали бақувват, ишқилиб ямоққа чарчамасанг яна ўн йилингми, Мамарайим!" деб кулишадирлар.

Қисқаси: беш-олти қайта бошлатилиб қўнжи бир қаричга келган айбаки<sup>2</sup> маҳси, чарми уст-устига уюлиб ердан уч энлик чамаси кўтарилиган икки чорак вазнлик кафш, ёши маҳалла кишиларининг кўбларига маълум бўлмаган, ҳарчанд эҳтиёт қилинса ҳам неча жойидан попилтириғи осилған оқ-бўз салла маҳалла кишиларининг эрмакларидандир. Булардан бошқа ҳайит кунлари ва тўйлардагина кийиладирган бир банорас тўни, совуқ қаттиғроқ бўлғандаги ичидан киядирган адрес гупписи ҳам бор. Маҳалла кишилари банорас тўнни "зарурат" деб атаған бўлсалар ҳам, адрес гуппига ҳали ном қўйгунча йўқлар, чунки бунинг дунёса келганига фақат тўрт-беш йилгина бўлғандир.

Кези келгандаги маҳдумнинг ёзлиқ кийимларини ҳам бир сидира айтиб кетайлик: йўллуқ, қизил қалами бўздан яхтак, оқ бўздан жиҳак ёқалиқ кенг кўйлак (чунки тор

<sup>1</sup> Гусл — ювинниш.

<sup>2</sup> Айбаки — мол терисидан ишланган сифати паст чарм.

бўлса йиртиладир) ва лозим (яъни иштон) ҳамда сарпой-чан кийишкага сағри<sup>1</sup> кафш, аммо салла қишин - ёзин битта.

## 5. ОИЛА ВА КИШИЛАР БИЛАН МУОМАЛА

Махдум оиласини ҳам кийим-кечак вожидан ўзи каби тутар эди. Кийим-кечакдагина эмас, ҳатто озиқ-овқат тўғриларида ҳам унинг анчагина келишимсиз қилиқларига йўлиқилар эди. Масалан, бир ой тўлмасдан кир ювишга руҳсат бермас, агар Ниғор ойимнинг бир ойсиз кир ювғанини кўриб қолса — "кийимни тоғорада чурутасан!" деб ғовға солар эди. Икки ҳафтасиз паловни кўрмаслар (озодлиқ ошлари албатта мундан мустасно), кўб овқатлари убра, тупла, мастава, қўғурма шўрба бўлар эди.

Ниғор ойимнинг қозони йўқча, елча гўштни фақат палов шарофати билангина кўрар эди. Лекин махдум баъзи нарсалар билан ошхонани яхшигина мўлиқдирар, масалан: шалғам, қовоқ, лавлаги. Бу тўғрида хотини ҳарчанд рад қиласа ҳам қоплаб шалғам, йигирма-ўттузлаб қовоқ харид қилишини қўймас — "шалғам — Биби Фотимай Зуҳранинг дуолари баракати, қовоқ бўлса ҳазрати Юнуснинг мўъжизалари" деб баҳоси арzon ва лекин хосияти кўб бўлған бу маблағлар<sup>2</sup> билан ошхонани тўлдира берар эди. Ҳар ҳафта бир-икки мартаға қовоқ сомса ёплирмай қолмас, аммо — "Сғни кам сол, қовоқнинг таъмини бузадир!" деб таъкидлашни ҳам унутмас эди. Уйда нон ёпилмаганидек бозордан ҳам сотиб олинмас, чунки, панжшанбалик нон стиб, ортиб ётар, ҳатто баъзи вақтларда бозорға ҳам чиқар эди.

Махдумнинг ўқуғучи болалар билан муомаласи жуда яхши эди. Савоини билмаган ёки шўхлиқ қилған болаларни ҳар қанча сўқиб, койиса, дўқ уриб, давара қиласа ҳам урмас, бу жиҳат билан бутун Қўқон болаларининг муҳаббатларини ўзига жалб эткан эди. Аммо "озодлик" масаласида болалардан ҳеч кимни ҳам аф этмас, бой боласига "озодлик" лозим бўлған бўлса, албатта ундиришка, камбағал боласидан мумкин қадар узиб олишга ҳаракат қиласа, болалар Ҳафтияқ, Қуръон, Сўфи Оллоёр

<sup>1</sup> Сағри — от терисининг дум томони қисмидин тайёланган чарм.

<sup>2</sup> Маблағ — бойлик.

ва шунга ўхшаш китоб бошласалар озодлиқ мажбурий, мактабдан маъзун<sup>1</sup> бўлғанларнинг зиёфат қилиб маҳдумга сарупо беришлари қондада бор бўлса ҳам, лекин аксар болалар бу тўғрида домлани — "ана-мана" билан алдаб кетарлар, сахийроқ оталар бу маросимни адо этиб "устоз"ни рози қилмасалар, аммо кўбчилик маҳдумни ранжитар эдилар. Панжшанбалик бўлса мактабнинг асос ҳаққи ва булардан бошқа "Қулёға қўймоқ — Аммага бўғирсоқ — Ёсинға юпқа"<sup>2</sup> деган гаплар ҳам бўлар эди. Болалар ҳар йили бир марта "бўрё пули" ва ойига бир неча бора "супурги пули" ҳам тўлаб турад эдилар.

Маҳдум мумкин қадар болаларни ўз мактабига жалб қилишга тиришар, айниқса бой ва бек болаларни ўз қўлиға олиш учун ҳар бир чорани кўрар эди. Масалан, бой ва аъёндан бирининг ўғли бошқа мактабда ўқуб юрган бўлса уни болалар воситаси билан ўз мактабига чақирав, нима ўқуғанини, нималар билганини сўрап, бола савоғидан яхши жавоб бералмаса "сиизда айб йўқ, ўғлим устозингиз бир оз шундайроқ одам... хўб, хўб, бизнинг мактабларга ҳам келиб юринг! Мен ўзим сизни жуда дўст тутаман-да!" дер эди. Табиъий, боланинг шу кундан бошлаб ўз домласидан кўнгли совур, тез кунда маҳдумнинг мактабига келиб кирав эди. Баъзи вақт чет мактаб болалари билан шундай муомалани кўчаларда ҳам қилар ва ўғли бўлған бой ва ашрофларга ҳам жуда сертакалтуф, хоксорона салом бериб танимаса ҳам улар билан сўрашар, нечта ўғли борлигини ва уларнинг ўқуб-ўқумаганлиқларини, ўқушга ихлосларини текшириб, ўзининг таълимида қўлланған енгил усулларини ҳам бир мунча тиқиллатиб ўтар эди. Табиъий, маҳдумнинг бундай ҳаракатлари кўпинча фойдасиз бўлмас, мактабига янгидан-янги шогирдлар тўпланиб турад эдилар.

Ўз қаторидағи мактабдор домлаларни асло кўралмас, уларга қарши юрагида умрлик кек сақлар эди. Баъзи мажлисларда йўсуни келиб қолса — "ҳа, мулла фалончи-ми, кўб болаларнинг умрини зойиъ қиляпти, деб эшитаман... шогирдларидан бир нечаси шикоят қилишиб менга келишкан эдилар... Қандай қилай, шогирдларим ўзимдан этиб ортсалар ҳам умрлари зойиъ бўлмасин, дедим" дер ва эшикучиларга сездирмай рақибини чимчилар; кези

<sup>1</sup> Маъзун — рухсаси, изн олган.

<sup>2</sup> Қулёғ, Амма, Ёсин — Қуръондаги суралар номи.

келди дегунча иккинчи мактабдор түгрисида шу йўсун замзама сўзлар эди.

Махдум бўйчан, олагўшт, сийрак мўй, оқ тан, истараси иссиғ бир домла эди. Ёши эллидан ошқан, соч ва соқолида бир мунча оқлар кўринар эди. Киши билан сўзлашканда, айниқса, бир нарсадан таажжуланганда сийрак ва лекин тўгри, бақувват ўскан соқолини тутамлаб ўнг кўзини бир оз қисиб қарап, одат қилғандан бўлса керак гап орасида "ҳабба" деган сўзни кўпроқ ишлатар эди. Домланинг бу "ҳабба"си нима маънода қўлланилар, ўзидан бошқа ҳеч ким билмаганидек, ундан бу тўгрида изоҳ ҳам сўрамаган эдилар. Ҳар ҳолда "ҳабба — ҳабали" ёки "ҳа, баракалла" бўлса керак. Чунки ул бир нарсадан хурсанд ва рози бўлғанда аксар "ҳабба" деб юборадир.

Шу ергача бир неча саҳифаларни маҳдумнинг таърифи билан тўлдирдиқ, эҳтимолки домланинг гийбатини ҳам қилдиқ ва қиласмиз. Лекин шунисидан хотиржамъизки, йўқни-йўндиримадиқ, маҳдумнинг шаънида бор гапларниги на ёзиқ ва ёзармиз. Маҳдумнинг ҳамма нуқсонини ювиб кетарлик бир жумладан сўнг яна ўз ишимизда бўламиз:— нима бўлғанда ҳам маҳдум ўз замонасининг энг олдинги домлаларидан, Қўқон аксариятининг саводхон бўлишлариға сабабчи устозлардан, ҳатто улуғ хизматларга киши стишдириб бергучи нодир муаллимлардан эди.

## 6. НИГОРХОНИМ

Нигорхоним бошда эрдан ёлчимади. Аввало эрининг фақирлиги, бойигандан сўнг бўлса унинг зарбулмасал бўларлиқ хасислиги бечорани кўб йиглатди. "Хотин кишининг боши, уй ичининг оғир тоши" эмиш... Ҳозир ўзи қирқ ёшқа кирган бўлса, йигирма беш йилдан бери шу мумсук эр билан тириклик қилиб келадир. Бу кун ўн етти ёшлиқ Раъно каби қизга, саккиз ёшлиқ Маҳмуд (Раъно билан Маҳмуд орасида икки бола нобуд бўлған), олти ёшлиқ Мансур ва бешикдаги Масъудларга она бўлди.

Нигорхоним Қўқоннинг кўб хотинларига қараганда сабрлик ва қаноатлик экан. Дунёда ўз ўғлининг хасислигига чидалмаган она бўладими, ҳолбуки маҳдумнинг онаси — Моҳлар ойим ўғлининг бу қадар ихна<sup>1</sup> ва сиқиқлигига

<sup>1</sup> Ихна — сиртқи кўринишига эътибор бермовчи.

тоқат қилолмай норозилиқ юзасидан Марғилондағи ўғлининг ёниға күчіб кетіб ўша ерда вафот этди. Нигорхоним эрса тишни-тишка қўйди, эримдан яйраб-яшнамаған бўлсам, қизимдан ва олдимға қўйған ўгулларимдан ёлчирман, деб умидланди. Дарҳақиқат, сабрлик бу хоним ҳозирданоқ шу ўз олдига қўйған болаларининг бири ва тўнгучи бўлған Раъносининг туфайлидан бир қадар рўшнолиқ кўриб бошлади ва ойнинг ўн беши қоронги бўлса, ўн беши ёрг эканига ишонди.

Бир ямоқчи ёки мардикорчи ўз хотинини урадир, сўқадир, тепкилайдир. Бу ҳол уларда аксар фақирик авжига минган кезларда воқиъ бўладир. Агар ямоқчи кекирарлик даражада томоқни бопта қилса, иши ўнгидан келиб истиқболи бир мунча таъминлангандек бўлса, дарҳол вазият ишонмаслиқ равишда ўзгариб кетадир: гапсўз жойида, хотинни уриш ўрниға орқасини силаш, сўкиш ўрниға ялиниш ва арзи муҳаббат. Хотин ҳам кечаги калтак зарбини унуткан, кина ўрниға садоқат; гўё айтарсиз-ким, Юсуф Зулайхоларми деб.

Юқори табақа оиласларга кириб қарасақ, мунда тамоман бошқача манзара кўрамиз: қорин тўқ, бирар нарсага эҳтиёж йўқ, истиқбол таъмин ва лекин бояғи фожиъа буларда кучлирак, шунинг каби бу фожиъалар мувакқатий<sup>1</sup> ҳам эмас, сабабини топиш ҳам қийин. Яхши, ямоқчи-ку ярамас тузулишка қарши бўлған кескини кўзи тиниб хотинидан олған эди. Аммо кейингиларнинг турмуш шароитлари яхши, ҳамма нарса ўз орзуларича, бас, шу ҳолда уларнинг уй можаролари ва бола-чақани ит каби сиқишлиари нимадан?..

Шунга ўхшаш бизнинг маҳдумнинг ҳам тоғаси бирни икки қилиш, бешни ўн қилиш эди. Яхши кечиниш учун турмас, аммо кўпайтириш учун яшар эди. Нигорхонимни урмас ва лекин ургандан беш баттар қилиб сиқар эди. Икки юз тиллодан кўб оқчаси (бу оқчаларни ҳусули<sup>2</sup> тўғрисида кейин сўз бўлур) ва саводлик бўлған болалар зиёфатидан кийган икки сандиқча сарпоси бор эди. Олтундан сарф қилмағанида ҳам лоақал шу кийимликлардан на хотинини ва на болаларини фойдалантирап ва на ўзини иҳналиктан қутқарар эди. Буни ҳам қўйиб турайлиқ, Ни-

<sup>1</sup> Мувакқат — вақтинча.

<sup>2</sup> Ҳусул — ҳосил бўлиш.

гор ойим йигирма-үттүз қизни ўқутиб улардан тушкан "озодлиқ" ва "панжшанбалик" пулларга ҳам эга бўлолмас, ҳар кун деярлик муҳтарааб маҳдум поччага ҳисобини батамом топшурит туришқа мажбур эди. Маҳдум бунинг эвазига ҳар йил бозорнинг энг дагал бўзидан бир пар кўйлак, лозим олиб бсрар, янги гуппи билан ёзлиқ мурсакни бўлса Нигор ойим беш-олти йилсиз кўрмас эди.

Нигор ойим қисқа бўйлиқ, писта пўчоқ тарғил кўзлиқ, зарча танлиқ, юзидағи онда-сонда чечак ўрунлари бўлмағанда ҳусндор бир хотин эди. Ўз болалари билангина эмас ҳатто шогирдлари бўлган қизлар билан ҳам жуда юмшоқ муоамала қиласар, ортиқча аччиғланған кезларда "бетинг қурсин" деб қошини чимириб олар эди. Эрига ўхаша "озодлиқ" учун болаларни сиқмас, билъякс "бўшлиғи" учун ўзи маҳдум томонидан сиқилар эди. Оз ва маънолиқ қилиб сўзлар, хотинлар билан муомаласини бошқа отинбилилардек юқоридан туриб қилмас, соддacha суҳбатлашар эди. Хотинлар маҳдум домланинг баъзи қилиқларидан кулишсалар ҳам Нигор ойимнинг орқасидан гийбат сўзламаслар, олдида қандай ҳурматласалар кейинидан ҳам ўшанча эҳтиромлаб, унинг маҳдумдек зиқна кишининг қўлига қарам бўлганига ачиниб "пешана-дея айланай, қолу бало"... дейишар эдилар.

## 7. РАҲНО

Исл билан жисм аксар бир-бирисига мувофиқ тушмайдир. Меним ёш вақтим, айниқса, гўзаллик қидирған мағрур чоғларим эди. Оиламиздами, бошқа ердами баҳарҳол хотиримда яхши қолмаған, Лола отлиг бир қизнинг чеварлиги тўғрисида сўз бўлди. Мажлис аҳли менга яқин, яъни улар олдида ҳусндан баҳс очиш уят бўладирған кишилар эдилар. Шунинг учун менга Лоланинг чеварлигидан кўра муҳимроқ бўлган "ҳусн"и масаласида изоҳот сўрашнинг имкони бўлмади. Лекин Лола исмининг остида бир малакни кўрган — "Лоланинг исмига ўхаш ҳусни ҳам бор" деб ўйлаган эдим. Шу кундан бошлаб Лолани кўриш ҳажрига тушдим. Бўйи еткан қизларни кўра олиш бу кунларда ҳам амри маҳол бўлганидек, мундан ўн йиллар илгарида яна мушкулроқ эди. Неча вақт "ҳижрон ўтида ёниб" кўча пойлаб, ниҳоят Лолани сув олиш учун кўза ушлаб кўчага чиққан ҳолатда учратдим. Бурнидаги булоқисидан бошқа (агар булоқи ҳуснга қўшилса) "Лола"ликка арзийдирған ҳеч гап йўқ эди.

Яқиндағи бир боладан сув олгучининг ким эканини сүраған здим:

— Лола опам,— деди.

Боланинг талаффузи менга "Мола опам" бўлиб эшитилди. Бир неча кунлар бу қизнинг отини "Лола" деб қўйғанлари учун аччиғланиб юрдим. Чунки, афу этасиз, ўша кезларда аччиғланишга ҳаққим бор зди...

Аммо Раъононинг исми — жисмига ёхуд ҳуснига жуда мувофиқ тушкан зди. Мен рассом эмасман. Агар менда шу санъат бўлғанда зди, сўз билан билжираб ўлтурмас, шу ўрунда сизга Раъононинг расмини тортиб кўрсатар қўяр, фақат менга Раъно гулининг сувигина кўпроқ керак бўлар зди.

Солиҳ маҳдум хасис, таъмагир, ҳар ҳолда сажииси зътибори билан уни яхшилар қаторига қўйиб бўлмайдир. Ва лекин табиъат хасис эмас, тикандан гул, аридан бол яратаберадир. Шунга ўхашаш тиканлик ёғочдан хуш ислик, латиф кўрунишлик Раъно яратилған зди.

Бизнинг ўзбекларда, айниқса Қўқонга маҳсус бир тус, сариққа мойил бир тус бор. Лекин бу тусни кесдириб сариқ деб бўлмайдир. Чунки биз оғриқ кишининг тусини сариқ деймиз. Зарча, заъфар тулслари ҳам бунга дағаллиқ қиласидирлар. Таъбиримиз қўпол тушмаса бу гузал қиз, оч раъно гулининг тусида ёки оқ сариқ тусда яратилған зди. Аъзода ўскан тукларга ҳам ҳалиги туснинг таъсири бўладир. Раъононинг сочи гунгурт-қора, яъни қуёшсиз жойларда қора кўринса ҳам қуёшда бир оз сарғиш бўлиб кўринар зди. Шунга ўхашаш Раъононинг қўзида ҳам бунинг асари кўруладир: мудавварга<sup>1</sup> мойилроқ жоду кўзи кишига қаттиқ қараганда қоралиқдан бошқача яна бир турлук нур сочар зди. Кипраклари остида нафис бир сурма доираси бор зди. Қоши туташ каби кўринса ҳам кўндаланг ётқан икки қилич орасини нафис бир қуюлиб кўтарилиш ажратиб туар зди. Бурни ҳеч бир мунаққидга<sup>2</sup> беришмаслик мутаносиб, ҳар замон уялиш табассумига ҳозир турган нафис иринларининг юқориги қисмida сезилар-сезилмас туклар кўкарған зди. Юзи чўзиқ ҳам эмас, ой кулча ҳам деб бўлмас, кишига кулиб қараганда қизил олма осталарида иккита замма равишлик шакл ҳосил бўлар, гўё бизга чин раъно гули очилған ҳолатда кўринар зди. Соchlари жуда

<sup>1</sup> Мудаввар—тўгарак.

<sup>2</sup> Мунаққид—танқидчи.

қуюқ, саноқсиз кокиллар Раъононинг орқа, ўнгини тутиб ётар, қадди узунлиқ билан қисқалиқнинг ўртаси, дўндуқ бармоқларининг жимжилогида хина гуллари, ҳар ҳолда бу қиз ёлғиз Қўқоннингтина эмас, умуман Фарғонанинг куйларга қўшулиб маҳталадирган гўзалларидан эди.

Раъно Нигор ойимнинг тўнгучи, бу йил ўн етти ёшни тўлдурадир. Саводни отасидан ўқуб, ўн тўрт ёшида ибтидоий мактаб прўграмида бўлған барча дарсларни битирган, масалан: диний қисмдан — "Ҳафтияк", "Қуръон", "Чаҳор китоб", "Сўфи Оллоёр", "Маслаки муттақин", адабистдан — Навоийнинг барча асарлари, девони Фузулий маъса<sup>1</sup> Лайли Мажнун; Амирий, Фазлий ва шулардек чигатой-ўзбек катта шоиrlарининг асарлари; форсийдан — Хожа Ҳофиз Шерозий ва Мирзо Бедил, ҳусниҳат, иншо ва бошқалар. Бу кунларда бўлса бир томондан қизларга сабоқ бериб онасига кўмаклашса, иккинчи тарафдан отасида кофия (араб нақв ва сарфи) ҳамда Шайхи Саъдийнинг "Гулистон"идан дарс оладир ва шунинг қаторида ўзи яхши кўрган чигатой-ўзбек шоиrlарининг бадиҳа асарларидан алоҳида бир мажмуға тузуб юруйдир. Баъзан "овлогроқ жойларда" ўзича манзумалар тўқуса ҳам, бироқ буларнинг иси ўзидан четка чиқмайдир. Агар тўқуган шеър ёки манзумаси ўзига маъқулдек тушса фақат бир кишигагина кўрсатиб оладир. Ва ул киши ҳам бу сирни четка чиқармайдирган ишончлик ўз кишиси.

Қисқаси биз юқорида Раъононинг шеърий бир ҳуснини кўрганимиздек уни фазл ва заковатда ҳам ўткан хон замонлари асрининг нодир учрайдирган якто фозила қизларидан санаймиз ва санашга ҳам ўзимизда мажбурият ҳис этамиз.

Раъно қанча жиддий бўлса ҳам унда болалик табиъати бутун кўйи сақланадир: укаларининг ўюнига комил ҳуқуқли бир аъзо тариқасида иштирок этадир, онасининг кўзини чалғитиб ўқуғучи қизлар билан жанжаллашиб оладир, қизлар сабоқларини билмасалар аразлаб, уларни ўқутмай ташлаб кеткан чоғлари, арзимаган гапдан тез мутаассир бўлған кезлари кўб бўладир. Раъно ўзининг мундай ҳаракатларига қарши онасидан яхши-ёмон мукофот олмаса ҳам, кўпинча отасидан танбиҳ эшитадир. Койиш эшиткани учунгина эмас уй-рўзгор тўғриларида онасини сиқиб ушлаганидан ва фоҳиш танглигидан<sup>2</sup> ранжиб

<sup>1</sup> Маъса—билан.

<sup>2</sup> Фоҳииш танглиги — ортиқча сиқув.

отасини унча хушламайдир. Отасидан аччиғланған кезларда онасига жиддий қилиб: "ҳамма айб ўзингизда, отамдан кўра тузукроқ эрни топиб тегсангиз мунчалик қийналишиб юрмас эдик" деб бўғилган Ниғор ойимни кулдурадир.

Қаттиг ранжиган бир кун отаси — Солиҳ маҳдумга бағишлаб қизиқ бир ҳажв ёзған ва "ўз кишисига" кўрсатиб уни кулдирган эдиким, биз кулгулик учун бу ўрунга бир неча мисраъини кўчурдик:

Ёглар тўқилса ерга ётиб ялар тақсири,  
Бўлса бозорда пастлик сотиб олар тақсири,  
Меним учун бир зирак, Раънбонуға жевак,  
Деса ойим — "Не керак?!" юмма талар тақсири.  
"Қулоқ тешиш фазл эмас, пулни топиш қазл эмас,  
Жевак тақиши фарз эмас!" гавто солар тақсири.

Муҳтарам ўқуғучини қаҳрамонларимизнинг бир қисми билан танишдириши шу ерда тўхтатамиз. Уларнинг ички ва ташқи табиъатлари яхши ешилмаған бўлса ҳикоямизнинг давомида яна ҳам очилиб ва қенгайиб борар, деб ортиқча тафсилга киришмадик.

## 8. БИР ЎРДАЛИҚ

Маҳдумнинг ҳавлиси уч қабат эди. Кўчадан биринчи қабатда меҳмонхона, мактабхона ва машҳона эди. Иккинчи қабат мурабба<sup>2</sup>, ярим таноб чамаси боқча, бунда шафтолу, олма, анжир каби мевалик дараҳтлар ва бир неча кекса сўри токлар қулп уриб ўсқан эдилар. Маҳдумнинг болалар кучидан яхши фойдаланғани учун бўлса керак, боқчанинг ҳар бир қариши бўш қолмаған, унда ҳар турлук кўкатлардан бор эди. Ўртадаги сўрининг ости бир ярим газ кўтарилиб ишланган суфа, суванинг уч тарафига ёз гуллари экилган,райҳон ва бошқа чечаклар атрофка ўз атриётларини онгқитиб ётар эдилар. Биринчи қабатдан киргач боқчанинг суфасига ҳамда ичкарига юруладирган йўлкалар бор эди.

Ҳозир мезон<sup>3</sup> ойининг иккинчи ҳафталари, боқчанинг мевалари етилинқираған, айниқса сўридаги қора ҳусайнини

<sup>1</sup> Жевак—қизларнинг бу кунда истиъмолдан қолган кўкрак зийнати (муал.).

<sup>2</sup> Мурабба—тўрт бурчак, квадрат.

<sup>3</sup> Мезон—22 сентябрь-21 октябрь.

узумлардан гүё боллар томиб ётар эди. Йўлкаларга сув сепилған, суфага гилам солинмаса ҳам гуллик кийиз тўшалиб, уч тарафига кўрпачалар ёзилған эди.

Махдум этни уйга бериб чиқғандан кейин икки соат чамаси ҳуснihatдаги болалар билан шугулланди, орадан "абжад" сўзини дуруст ёзиб чиқарган бир боланинг қўлини боғлаб уйига юборди. Бола уйидан "кўл ешар" олиб келгандан сўнг ҳаммага жавоб бериб бу кунги вазифасини тамомлади.

Махдум машқонадан чиқиб ичкари киришка адим узған ҳолатда дарбозадан сипоҳи кийимда бир киши кирди ва махдумга табассум билан салом бериб яқинга юриб келди. Ўрданинг девонхона хизматчилари кийимида бўлған бу кишини махдум ўз умрида биринчи мартаба кўрап эди. Жавоб саломдан кейин кўришдилар. Махдум тараддувланиб, мақсад сўрашдан ўнгғайсизланиб меҳмонни меҳмонхонага бошлади. Меҳмон ҳам такаллуфланмай домланинг орқасидан меҳмонхонага кирди, ўлтуришдилар, сўнг фотиҳа ўқулди. Ўрдалиқ табассум ичидан махдумга қарагандан сўнг йигиштириниб олди.

— Хато қилмасам жаноблари мирзо Анварнинг устозлари бўлсалар керак?

— Фақир...

— Уй иchlари билан хўб саломатмилар?

— Алҳамдуллиллоҳ.

Махдумга кутулмаган равишда меҳрибон муомала қилғучи бу ўрдалиқ қирқ ёшлар чамасида, узун бўйлиқ, қора узун соқоллиқ, симоби салласининг пешини туширган қорача туслик бир йигит эди.

— Каминалари ҳам,—деди ўрдалиқ,— мирзо Анвар билан бирга девонхонада ишлайман. Балки қулоқлариға чатилған бўлса керак, исмим Султонали мирзо...

— Хўб, хўб,—деди кулиб махдум,— Анвардан эшитканим бор эди, жанобларининг тавсифларини эшитканман. Начук худо ёрлақади? Фақирхонаға ташрифлари билан бисёр кушнуд бўлдим.

— Адабсизлик бўлса ҳам, —деди мирзо Султонали,— муборакхоналарига бостириб келдим. Бунга ҳам буродарим мирзо Анварнинг муҳаббати мажбур қилди.

Султоналининг бу кейинги сўзи мақсадни бир даражага домлага онглата ёзди. Кайфланиш, ҳузурланиш махдумнинг юзида ўрунлашқан эди. Кўзини қисинқираб Султоналига қаради.

—Хўб, хўб,—деди махдум,— мулла Муҳаммад Ражаб

марҳумнинг ўрнига бош мунший таъйин қилиндими, қўлим тегиб бу тўғрида Анвар билан сўзлашолмадим?

— Ҳозир таъйин қилингунча йўқ, эрта-индин таъйин қилинар, деб турамиз.

— Кўб яхши, номзадлар бордир?

— Бор,—деди Султонали, бир неча номзадлар ҳазрати хонга манзур қилинганлар, жумладан шоир Мадҳий, мулла Шаҳодат муфти ва бошқа яна бир нечалар. Масмуъингиз<sup>1</sup> бўлса керак, гарчи ўзи ризолиқ бермаса ҳам бир неча мирзолар шогирдингиз мирзо Анварнинг ҳам номзадини холис ариза билан жанобга манзур қилған эдик. Умид худодан, ёрлиғ мирзо Анварга қойим<sup>2</sup> бўлур, деб турамиз.

Маҳдум соқолини тутамлаб шипка қаради. Гўё Султоналининг кейинги икки жумласига қайси йўсун муқобала қилишдан ожиз эди.

— Бир неча яхшиларнинг Анварга бўлған ҳусни таважжухларини эшиткан эдим,— деди маҳдум миннатдор оҳангда,— аммо фақирга шуниси мушкулроқ кўринадирким, башарти Анвар бош муншийлик вазифасига ёрлиғ олғундек бўлса, бу лавозимотни адо қила олурми, каминанинг назаримда бош муншийлик алалхусус ул жанобнинг ҳузурларида беҳад улуғ ва мушкул кўринадир?

Султонали енгилча кулиб қўйди:

— Бош муншийлик лавозимоти борасидаги фикрингиз дарҳақиқат тўғри,— деди,— аммо мирзо Анварнинг уҳда қила олиши муҳаққақдир<sup>3</sup>. Зоро, Анварнинг бу борадаги истеъододи жанобларидан кўра каминага маълумдир, бу тўғридан хотиржамъ бўлсинлар.

— Дарвоқиъ, Анварга кўб меҳнатим сингтан,— деди маҳдум маҳтангансумон, бир қариш ёшидан бошлаб каминанинг таълимида ўсти, ўз қўлимда тарбия топқан неча юз, балки минглаб шогирдларим ичida кўб таважжуҳим<sup>4</sup> шу болага бўлди. Ушбу сабабдан ҳам мунчалик мустаъид<sup>5</sup> бўлган бўлса ажаб эмас, деб ўйлайман... Ва лекин ҳологи<sup>6</sup> сўзим шунинг учундирким, фазли ва истеъододи кофий<sup>7</sup> бўл-

<sup>1</sup> Масмуъ—эшитилган.

<sup>2</sup> Қойим—қарор.

<sup>3</sup> Муҳаққақ—ҳақиқат.

<sup>4</sup> Таважжуҳ—эътибор.

<sup>5</sup> Мустаъид—қобилияти, истеъододи.

<sup>6</sup> Ҳологи—ҳалиги.

<sup>7</sup> Кофий—етарли.

са ҳам ёшлиқ, кам тажрибәтк құлмасмын, деб мұлоғаза құлтурман.

— Бұстони маърифат ва гулшани ҳақиқат, — деди Султонати, — Имоми Аъзам раҳматуллохи алайхі<sup>1</sup> ўн икки ёшларыда дарсгүлік құлтиб өз қоқазо күтуби мұтабаррака таълифотига ҳам ибтидо құлған<sup>2</sup> әканларким, бу қаромат жанобларидан пўшида эмасдир. Бас, индалъуқало<sup>3</sup> ёшлиқнинг ҳеч бир нуқс ва аҳамияти йўқ, аммо фазлу заковат лозимдир. Масалан, каминангиз таҳсилда "Ақоид" ғача<sup>4</sup> бордим ва қарийб ўн йилдан бери миrzолиқ құлтурман. Ўз ҳунаримда яхши тажриба ҳам ортдирдим, шунинг билан бирга нафси замрни иқрор этишка мажбурманким шогирдингиз миrzо Анвардан кўб даража қўйидаман: таҳрирда<sup>5</sup>, тақрир<sup>6</sup> ва фароизда<sup>7</sup> Анварингизнинг ёрдамига муҳтожман. Ҳолбуки ёшим ундан баробар катта, мен ўқуған дарсларни әҳтимол Анвар ўқумаган... Анварнинг заковатига ёлғиз мен эмас ҳатто марҳум мунший мулла Муҳаммад Ражабнинг ўзи ҳам таҳсин қилар, ажойиб ўғлон деб қўяр эди. Меним миrzо Анварни бу ўрунға саъи қилишим<sup>8</sup> бўлса бир гараз юзасидан эмас, холисонадир. Агар гаразға ҳисобланса, масалан: "Бирарта ноаҳлнинг қўл остида ишлагандан, аҳлиниң жагида тишланган маъқул" сўзига биноандир. Лекин миrzо Анвар нима учундир биз бир неча миrzоларнинг раъйимизга қарши тушиб, биздан ранжиб юруйдир. Ҳатто жанобга бир ариза киргизиб, меним номзадим янгилиш кўрсатилибдир, мен бу вазифани

1 *Имоми Аъзам* (такаллуси, мелодий — 699 — 767) — исми Абу Ҳанифа Нұғайы ибни Собит. Исломдаги қанағия мазҳабининг асосчиси.

2 *Күпүбі мұтабаррака таълифотига ҳам ибтидо құлған* — табаррук китоблар ёзишга ҳам бошлаган әканлар.

3 *Индалъуқало* — оқыллар назидаси.

4 *Илгариги таҳсилда толибининг масалан: "Овомил", "Кофия", "Шарҳи мулло Жомий", "Мұхтасар" юкорироқ даражада "Ақоид" (Оллоҳнинг борлигини тасдиқловчи илм), сўнтида эса "Тафсир" илмларини ўқиганлигига қараб илм даражаси белгиланган.*

5 *Таҳрир* — ёзиш.

6 *Тақрир* — матинини мазмунини тушунтириш.

7 *Фароиз* — мусулмончиллик қондайларини ўрганиш илми.

8 *Саъи қилиши* — ундаш, даъват этиши.

үхда қилолмайман, деб узр баён қилмоқчи эмиш. Унинг бу йўсун иноди нима учун, билалмадик... фақир, оғайнилар тарафидан гарчи адабсизлик бўлса ҳам ҳузурларига илтимос учун келдим. Аввало мирзо Анварга оталиқлари, сонян устозлиқлари бор. Сиз жаноб тарғиб қилсангиз ва кенгаш берсангиз қабул қилас, деб ўйладиқ.

— Ҳабба! — деди маҳдум хурсандлик билан, — бу тўғрида яхши сўзлашмаган эдик, сўзлашармиз, иншооллоҳ кўнар.

— Саломат бўлингиз, тақсир.

Маҳдум соқолини ушлаб кўзини қисди:

— Боя пешин асносида, — деди, — қавмлар каминадан истифкор<sup>1</sup> қилишдиларким, "ўғлингиз Анвар мунший таъйинланар эмиш, ушбу ахбор тўғрими?" деб... Мазмуни шаҳарга ҳам машҳур бўлған экан-да?

— Балки, — деди кулиб Султонали ва бир оздан кейин оҳиста сир йўсунида қилиб сўзлади, — ўрда ичидан бир нечаларимиз устоз мулла Муҳаммад Ниёз домлага<sup>2</sup> ва ҳарамдан Оғача ойимга<sup>3</sup> Анвар тўғрисида илтимос қилишдиқ. Шунинг учун мирзо Анварнинг бош мунший таъйин қилинишига шубҳа қилмаймиз. Фақат уни кўндирилса бас.

— Ва лекин, — деди маҳдум ниҳоятда очилған қисёфатда, — бу тадбирларингиз беандоза маъқул бўлибдири, яъни масалан, жанобга домла шоговул ва малика хонимларни восита қилишларингиз.

— Биз ҳам шундай ўйлаймиз. Энди умид худодан, натижা ҳам орзумизча бўлғай.

— Иншооллоҳ.

— Демак, мирзо Анварни кўндириш вазифаси одобсизлиқ бўлса ҳам сизга қолди-да, тақсир? — деб Султонали такрор сўради.

— Хотиржамъ, — деди, маҳдум қаноат билан, — албатта ноинсофни кўндирамсамиз керак.

Шундан сўнг Султонали ўзининг бу ерга келганини Анварга билдирамасликни таъкидлаб ўрнидан турди. Маҳдумнинг азтаҳидил "моҳазаримиз"<sup>4</sup> бор эди" деб қисташига қарши узр айтиб хайрлашди. Маҳдум аксар ўз уйига

<sup>1</sup> Истифкор—сўрамоқ.

<sup>2</sup> Ҳудоёрининг шоговулбошиси—илмия вазири, "Тарихи Шаҳруҳий" нинг муаллифи, шоир (*муалъ*).

<sup>3</sup> Ҳудоёрининг суюкли хотуни (*муалъ*).

<sup>4</sup> Моҳазар—таом.

келгүчі кишиларға қылмайдырган фавқулодда бир такал-луф билан уни дарбозагача узатыб чиқди.

## 9. ҮПКА ВА ҲАЗИЛ

Истиқболнинг ширин хаёлларига кўмилган ҳолда маҳдум аср намози учун таҳорат олар эди. Таҳоратда тартиби-ни риоя қилиш суннат,<sup>1</sup> аммо маҳдум тарки суннат қилмоқда. Ҳатто ўқуладырган дуоларни ҳам ўрунсиз ишлатмакда эди. Маҳдум шу йўсун бетартиб таҳоратланиб ичкарига кирди. Нигор ойим ошхонада мантиларни қасқонға териб қозонға уяр, Раъно бўлса айвонда кичкина укалари орасида ўлтурар эди.

Дадаси йўлакдан кўриниш билан Раъно Масъудни кўтариб турди. Ва қозиқдаги салла, чопонни олиб айвон муюшига келди. Болалар ҳам дадалари олдида адабланишдилар.

— Анвар аканг келмади, суфа ёлгиз, — деди маҳдум, чопон, саллани кия-кия, — асрга бориб келгунимча, сен суфага чиқиб тур-чи, Раъно.

— Хўб.

Отаси чиқиб кеткач, Раъно қўлида укаси билан ташқарига йўл солди. Унинг кетидан Маҳмуд ва Мансурлар ҳам чопишидилар.

— Раънапа, Раънапа! — деб Мансур йиги аралаш ўзидан чопиб ўтмакчи бўлган Маҳмуднинг устидан Раъно опасига арз қилди. Раъно боқчанинг суфасига ета ёзган эди. Мансурнинг йиги шовқуни яна ҳам кучайиб рақобат ўти ёниб кеткач, Раъно тўхтаб Маҳмудни койишкага мажбур бўлди:

— Маҳмуд, Маҳмуд, эси йўқ Маҳмуд!

Маҳмуд тўхтади, аммо Мансурдан олдинга ўткан эди, Мансур бу мағлубиятка чидалмай асабийланиб, ерга ўлтуриб олди ва дунёни бузуб фарёд қўпорди. Раъно келиб Мансурни турғизди ва кийимига ўлтурган чангларни қоқти:

— Йиглама, опаси, йиглама, — деди, — ҳали дадаси Маҳмудни дум-дум! Қараб тур-чи, сен Маҳмуд, отанг келганда айтмасамми?!

Мансур "Раънапа"сининг ҳимоясидан сўнг унинг стагида суфага қараб юрди. Аммо Маҳмуд анча эзилган эди:

<sup>1</sup> Суннат—одат.

— Дадам йима<sup>1</sup> қиласы? — деб сүради турған жойидан.

— Келсин-чи, ҳали... Тунови кунги чивиқ әсингдан чиқдими?

Маҳмуд жавоб бералмади. Унинг күзизде аччиғ аралаш қўрқув бор эди. Раъно кичкина укаси бағрида суфага чиқиб ўлтурди. Мансур "Раънапа"сининг елкасига суюниб, йўл устида серрайиб қолған Маҳмудга голибона бир турда истеҳзо қиласы эди. Маҳмуд бу ҳолга ортиқ чида буролмади. Ўзининг енгилишига сабабчи бўлған Раънодан ўч олмоқ мақсадида:

— Муллатанинг хотини, муллатанинг хотини... эй, эй, эй!  
Раъно кулди:

— Қараб тур, қараб тур, сен адабсиз, — деди ва  
Маҳмудга ҳужум қиладирғандек қўзғалиб қўйди.

— Билдим, билдим: муллатанинг хотини, муллатанинг хотини! — деди Маҳмуд ва ичкарига қараб қочти.

Раъно кулимсираб Мансурга қаради:

— Шундайми, мен муллатанинг хотиними-а? — деб сўради. Мансур жавоб ўрнига йўлакка қаради ва сўюнчи ичига сиғмаган ҳолда суфанинг зинасига югурди ва қичқирди:

— Муллата, муллата телли, телли!

Раъно ҳам йўлакка қараб қизариниб кетди ва олдиға тушиб тартибсизланган сочини орқасига ташлаб тузатинди. Йўлакда кўринган ёш йигит ("муллата") суфанинг йўли бўйинча келмақда эди. Қора чивиқ беқасамдан ҳарир тўн кийган мавзун қад Анвар биринчи қарашдаёқ кўзга дўндиқ ва кўркам кўриниша эди. Қора сурмалик кўзи Раънода экан, ўзига югуриб келгучи Мансурга йўл устида чўнқайиб қучогини очти. Мансурнинг юзидан ўпкач кўтариб суфага юрди. Анварни қаршиламоқ учун бўлса керак Раъно ҳам ўрнидан туриб суфанинг зинасига яқинлашди. Ва табассум аралаш — "Хорманг" деди.

— Соғ бўлинг.

Анвар суфага чиқиб Мансурни ерга қўйди. Кафшини еша-еша Раъно томонга энгташиб, ўзига талпиниб турған Масъуднинг юзидан ўпти ва уни Раънодан олди. Масъуд Анварнинг қўлига ўткач сапчиб гувранди ва қийқириб товланди. Раъно икки қўлини узатиб "ксл менга, кел" деди. Масъуд буралиб Анварнинг бағрига сиқилди. Кулишдилар.

<sup>1</sup> Йима—нима (муал.).

Анвар болани ўпид сўйди. Раъно Маъсудни янди: "Сен қараб тур, бижи бола" деди. Анвар болани кўтарганча кўрпачага ўлтурди. Чап тиззасига Мансур ёпишди ва унинг ёнига Раъно қўшилди... Шу йўсун икки орада бир мунча вақт Маъсудни сўйишдилар: Анвар болани Раъноға бергандан кейин симоби шоҳи салласини олиб ёстиққа ташлади ва рўймоли билан қоп-қора бўлиб чиқа бошлаган муртини тузатди. Раъно қаршида тик турар эди.

— Тинчликми?

— Бетинчлик, — деди кулиб Раъно.

— Айни муддао экан бўлмаса... Ҳа, айткандек, — деди Анвар ўлтурган суфасига ишорат қилиб, — бу кун жой катта солинган?

— Меҳмон келар эмиш.

— Ёлғонинг қурсин, Раъно, — деди Анвар кулимсиб, — қандай меҳмон?

— Мен қаёдан билай, қандай меҳмон... фотиҳага кишилар келар эмиш, деб эшитдим.

— Фотиҳаси қанақа?

— Билмасам қанақа?

Анвар ўлланниб яна кулимсиди:

— Сенинг фотиҳанг бўлмасин?

— Меним қандай фотиҳам бўлсин, мен ҳали тирикман.

— Тескарига бурма, Раъно, балки сени эрга бермакчидирлар?

Раъно қизариб турди-да, яна гапни кулгуликка олди:

— Мени кимга берар эмишлар?

— Сеними? — деди кулиб Анвар, — сени хондан бошқа ким олсин?

Раъно қўлидағи укасига қараған ҳолда:

— Сиз шунга маслаҳат берсангиз... мени қандоғ қиласай, — деди ва Мансурни чақирди, — тур Мансур, кетамиз.

Раънода аччиғланиш намойиши бор эди. Анвар Раънодаги бу ўзгаришдан ўнгтайсизлиққа тушди:

— Раъно, — деди. Раъно зинадан тушиб бошлаган ҳолда тўхтади, — чинини сўзла, меҳмон келиши аниқми?

— Меҳмон келиши аниқ, ҳам келди, — деди Раъно жиддий.

Анвар ажабланди:

— Меҳмон келди?

— Келди.

Анвар теваракка қаранди:

— Қани меҳмон?

Раъно қўли билан Анварнинг ўзига ишорат қилди:

— Ана меҳмон,—деди.

Анвар кулди:

— Мен меҳмонми?

Раъно жиддий равиш билан:

— Албатта, сиз бизга меҳмонсиз.

Анвар яна кулди. Бироқ унинг бу сўнгти кулишида кучланиш бор эди:

— Мен сизга меҳмонми?

Раъно кулимсиб ер остидан Анварга қаради ва қўлидаги хархаша қилиб бошлиған болани овитиш учун тебранди.

— Билмасам...

Раънонинг юзидан бояги жиддият йўқолғандек эди. Анвар ҳам маънолиқ ҳазилни ташлаб чин ҳазилга ўтди:

— Меҳмоннинг қорни оч, Раъно,—деди,— албатта қадрлик меҳмон учун тансиқроқ таом пиширгандирсиз, деб ўйлайман. Бу кунги таомингиз исмини лутфан марҳамат қиласангиз эди.

— Меҳмоннинг вазифаси,—деди Раъно жавобан,—иззати билан ўлтуриш ва олдиға қўйған нарсани маҳтаб-маҳтаб ейишдир...

— Тўғри айтасиз, отин биби,—деди Анвар,—бироқ бу кунги меҳмондорчилигингиж ҳам кечагидек убра билан бўлса маҳтаб-маҳтаб қўлингизга қайтариб беришим ҳам аниқдир.

Раъно бутун товшини қўйиб кулиб юборди:

— Бу кун қўғурма шўрбаға,—деди Раъно кулги ичиди,— қаттиғ нон тўғраб ейсиз, жаз ўрниға шалғам чайнайсиз.

— Офарин,— деди Анвар,— бу кунги меҳмондорчилигингиждан қариб мамнун бўладирғанга ўхшайман. Агар мумкин бўлса шуни ҳам билсамки, бу кунги шалғам шўрба катта отин бибининг қўлларидан тановул қилинадирми ёки кичик отин бибининг?

— Меҳмон учун бунинг фарқи йўқдир...

— Бир оз янгишасиз Раънобону,—деди Анвар,—чунки қўлдан-қўлнинг катта фарқи бор.

— Фарқи бўлса... бу кун кичик отин бибининг қўлларидан шалғам шўрба тановул қиласиз.

— Бу ҳолда афу этасиз, Раънобону... Башарти кичик отин бибининг қўлларидан тановул қиладирған бўлсақ шалғам шўрба эмас, бизнинг учун қуш шўrbадир.

Бунга қарши Раъно нимадир айтмоқчи бўлған эди,

ташқаридан осғ товшини сезди, Анварга бир кулиб қарди-да, Мансурни етаклаб ичкарига чопди.

## 10. ХАЙРИХОҲ БИР ОДАМ

Раъно ичкарига қайрилмасдан боқчаға маҳдум кирди ва ташқарини чақирди:

— Марҳамат Шаҳидбек, марҳамат!

Раъно ичкарига кириши билан домланинг орқасидан ҳарсиллаган, гурсиллаган элли ёшлар чамалиқ семиз бир киши кўринди. Кўк салласи манглайнинг усти билан ўралиб, ўсиқ қоши қовоғига ётқан бу бекнинг белидаги кумуш камари бениҳот ўсиб тушкан қорнини юқорига кўтариб туриш вазифасини адо қиласр эди.

Эшик остида Шаҳидбек билан маҳдум ораларида онглашилмаслиқ юз берди:

— Сиз юринг!

— Сиз юринг!

— Мен рози!

— Адабсизлик бўлади-да, хррр...

Ортиқча такаллуфни Шаҳидбекнинг ўзи қабул қиласа ҳам гўшти қабул қилмас эди. Такаллуфланиб ўлтурса борған сайин ўзига беҳузурлик ортар эди. Шунинг учун маҳдумнинг олдига тушиб жўнади ва йўл устида "Мирзо Анвар ҳам келган экан, хррр..." деб қўйди.

Анвар уларни қарши олди, суфага чиқдилар. Шаҳидбек Анвар билан энтика-энтика кўришкач, жой кўрсатилмасданоқ суфанинг тўрига ўлтуриб олди. Чунки зинадан чиқишида анча эзилган, такаллуфгача кутишка тоқати қолмаган эди. Фотиҳадан сўнг ўлтурган срида уст тўнини сходи, белидан камарини олиб ёнига қўйди, салласини чиқариб ёстиқнинг устига ташлади ва рўймоли билан манглайидаги терларини артиб ўзини слпиди:

— Хўб саломатмисиз, мирзо, хррр?

— Шукур, ўзларидан сўрасақ?

— Алҳамдулиллоҳ.

Сўнгра маҳдум Анвардан ҳол сўради:

— Бир оз кечикдингизми, Анвар?

— Зарурроқ ишлар бор эди.

— Сармунший қазо қилиб,— деди Шаҳидбек,— ҳамма оғиртиқ сизнинг устингизга тушкан бўлса керак, мирзо, хррр?

— Шундай,— деди Анвар,— лекин баъзи вақт вилоятларга ошигич юбориладирған нома ва фармонлар чиқиб

қоладир. Шундай кезларда ҳатто тунаб ишлашка ҳам түгри келадир.

Шаҳидбек қайта бошдан манглайига терилиб қолған терларини артди:

— Иложи йўқ, иложи йўқ...

Анвар ер тегидан маҳдумга кўз қирини ташлағач, ўрнидан туруб тўнини ешди ва зинага бориб кафшини кия бошлиған эди, маҳдум буюрди:

— Ичкарига кириб, хабар олинг, таом тайёр бўлган бўлса, олиб чиқсангиз ҳам маъқул.

— Хўб.

Анвар ичкарига кетди. Унинг орқасидан кузатиб турган Шаҳидбек маҳдумга қаради:

— Мирзонинг тарбиянгизга келганига кўб бўлган чиқар?

— Қариyb ўн тўрт йил.

— Ўз фарзандлариdek бўлиб қолған-да?

— Ундан ҳам афзал.

— Ожизалари ҳам стиб қолған бўлса керак?

— Иншооллоҳ.

— Худо ёш берсин,— деди Шаҳидбек,— мирзони ўзларига домод<sup>1</sup> қилсалар ҳам бўлар экан, хррр...

— Ушбу мулоҳазамиз ҳам йўқ эмас,— деди маҳдум.— Модомики болани ёшлиғидан ўз фарзандимиздек парвариш қилдиқ, эндиликда ўзимизга домод ҳам бўлсин, деб ожизамизни сўратгучи кўб олий наасаб хонадонлардан қатъи назар қилиб келамиз...

— Баракалла,— деди Шаҳидбек,— асли инсоф шудир... Иккиланчи, домодлиқ учун наасабдан илгари илму адаб, фазлу камол лозимдирким, бу ҳам ўзларидан маҳфий эмас, хррр...

— Ҳабба,—деди маҳдум кўзини қисиб,— биз ҳам шу гапларни мулоҳаза қилиб қолдиқ.

Шаҳидбек маҳдуминг маҳалла аҳларидан бўлиб, Худоёрхон закотчиларининг биридир. Мундан илгари Шаҳидбекнинг маҳдум билан унча яқинлиги йўқ ва ҳатто ўзган йилларда маҳалла кишиларидан баъзиларини маҳдумнинг имоматига қарши қўзгатиб юрган эди. Домла билан дўстлашиб тарихи эрса икки-уч кундан беридир. Чунки шу кунларда Анварнинг сармунший бўлиш эҳти-

<sup>1</sup> Домод— күёв.

моли шаҳарнинг катта-кичиклари орасида сўзлашилиб қолди. Шу эҳтимол натижасида маҳдумнинг дўст ва душманлари ўйлашга мажбур бўлдилар. Жумладан, бизнинг Шаҳидбек закотчимиз ҳам шу бир неча куннинг орасида қарийб бир чорак этини йўқотасди. Чунки закотчилар қисман бош мунший қўл остидағи молия бесклариidlар. Агарда Шаҳидбек маҳдум билан алоқасини тузатмаған ҳолатда Анвар мунший таъйинланиб қолса, бирар "фожиъа" бўлиш эҳтимоли бор эди. Шаҳидбек фикрича, гўё маҳдум Анварга: "Фалонбек фалон вақтда менга мундай адovat қўлған эди. Энди фурсат келганда сен уни закотчиликдан бескор қил", деб буюрар, Анвар ҳам устозининг сўзини с尔да қолдирмай сармунший бўлған кунидаёқ Шаҳидбекни хизматдан бўшатдирап эди...

Шаҳидбек Анварнинг сармунший бўлишини, табиъий, коҳламас эди. Аммо Анварга қарши бир иш қилиш кучига ҳам молик эмас эди. Гарчи, ҳозирда Анварнинг сармунший белгиланиши бир эҳтимол бўлса ҳам, Шаҳидбек ҳар эҳтимолга қарши чора кўриб қўймоқчи бўлди. Мундан уч-тўрт кун илгари маҳдумга яқинлашиш андишасида аввало унга иқтидо қилиб намоз ўқуди (илгари маҳдумнинг орқасида намоз ўқумас эди). Ҳуфтан намозидан кейин ҳалқага кириб маҳдумнинг тиловатига сомеъ бўлди. Иккинчи кун эрталабки намоздан сўнг маҳдумга салом берди ва ундан аҳвол сўраб: ... "Эшишиб жуда курсанд бўлдим, ҳар начук сармуншийнинг ўз кишиларимиздан бўлгани яхши, бу тўғрида ўрдалиқ оғайниларга илтимос ҳам қилиб қўйдим" деди. Маҳдум ўз ишида қанча пишиқ бўлса ҳам, лекин дўст билан душманни ажратолмас, яна тўғриси — неча йиллик адovатларни икки оғиз ширин сўз ёки беш пул манфаат эвазига унутиб юборгучи эди. Бунда ҳам шундай бўлди: "Баччаталоқ адovатни ташлаб шайтонга ҳай берибdir. Анварнинг сармунший бўлишига сўюнибdir, шайтони зўр бўлса ҳам инсофи чакки эмас", деб Шаҳидбекка дўстона муомала қилди ва Анварнинг иши тўғрисида билганини сўзлади; ҳали аср намозига чиққанда яна Шаҳидбек билан учрашиб сўзлашди ва Анвар "аҳмоқ"нинг бу ишка норизолигидан шикоятланди. Шаҳидбек бир оз ўйлагандан кейин: "Мен ўзим мирзо Анвар билан бир сўзлашай бўлмаса..." деди. Чунки башарти Анвар бош мунший бўлиб қолса ва бунда ўзининг

<sup>1</sup> Иқтидо — тақлид қилиш, эргашиш.

ҳам иштироки бўлса албатта... ҳа-декя. Шу мулоҳазада Шаҳидбекнинг кўзи аллақанча жойларни кўриб олди.

— Мирзонинг уйда бўлиш вақтини айтсангиз, ўзим олдига кирап эдим, — деди.

Анвар "бекор гап, анчайин бўлмагур гап", деб маҳдумнинг бу тўғридағи саволларига аҳамиятсизгина қилиб жавоб берар ва шунинг учун маҳдум ҳам бу кунгача масалага ишончсиз қараб келар эди. Алҳол эрса бу гап бутун Қўқон ҳалқи оғзида сўзланиб қолди ва бунинг устига Султонали мирзо маҳдумдан жиддий илтимос ҳам қилиб кетди. Шу сабабларга биноан маҳдумнинг назарида Анварни кўндириш масаласи жиддийлашкан ва Шаҳидбекнинг ҳалиги сўзидан кейин ўз ёнига кўмакчилар, кенгашчилар олиш лузумини ҳам ҳис эткан эди. Шу мулоҳаза билан Шаҳидбекнинг ҳалиги таклифини маълмамнуният қабул қилди:

— Ҳабба... алҳол Анвар уйга келган бўлса керак; лозим топсангиз мен билан бирга марҳамат қилингиз, — деди.

Шаҳидбек Анвар билан сўзлашканли ва уни кўндиргали келгандек кўринса ҳам аслида гаразсиз одам эмасdir.

## 11. МАҲДУМНИНГ ТАҲДИДИ

Анвар ўртаға дастурхон ҷизиб, икки лаган манти чиқариб қўйди, уч киши қамти ўлтуриб, манти тановул қилишдилар. Таом асноси Шаҳидбек секин-секин мақсадга ёндашиб келди.

— Ҳалқ оғзида дув-дув гап, — деди манти чайнаб, — гўё сиз марҳум сармунший ўрнига насл<sup>1</sup> қилинар эмишсиз, деб... Бу ҳақиқат гапни ёки овозами, яхши пайқолмадиқ. Бу сўзнинг ҳақиқатини ҳозир ўзингиздан эшитамиз-ку ва лекин сизга хайриҳо бўлған тақсирим ва мендек кишиларни бу шояни<sup>2</sup> бенниҳоятда курсанд қилди, хррр... Дарҳақиқат, бу мартабага ниҳоятда лаёқатингиз бор эканини ўрда арбобларидан ҳам эшитамиш...

Шаҳидбек сўзни шу жойга келтириб маҳдумга қаради. Маҳдум соқолидаги ҳамир ушоғини олиб, меҳмонни лаганга тарғиб қилди.

<sup>1</sup> Насб — тайинлаш.

<sup>2</sup> Шояниа — ёйилган, тарқалган ҳабар.

— Кеча ва ўткан кунларда, — деди маҳдум лагандан олған мантисини қўлида ушлаган кўйи, — бу шойиъаларга мен ҳам ишонмағандек эдим. Аммо бу кунги довруқ мени ҳам таажжубка қўйди. Воқиъан Анвар сармуншийликка мансуб қилинса не гаройиблиги бор? Алҳамдуиллоҳ, фазли кофий, ақли солим,<sup>1</sup> истеъодод бўлса боз инчинин...<sup>2</sup>

Анвар қўли лаганда экан, кулимсиб қўйди. Шаҳидбек кеч ҳарорати ва манти иссиқлиги таъсирида яна ўбдан терлаган эди. Рўймоли билан манглай ва бўйин терларини артар экан, Анварга қаради:

— Хўш, мирзо Анвар?

Шундай гаплар бор, — деди Анвар, маҳдумга кўз қирини юбориб, — аммо бу гаплар меним хоҳишim ва рағбатим хорижида бўлмоқда. Шунинг учун бу шойиъаларга аҳамият беришкага арзимайдир.

Шаҳидбек маҳдум билан кўз урушдириб олди.

— Яъни сиз сармуншийликни хоҳламайсиз? — деб сўради.

— Албатта.

— Сабаб?

— Сабаби шулки, — деди Анвар, — мен бунингдек масъул, айниқса, тантаналик вазифаларга ҳаваскор эмасман.

— Албатта, шундай-ку, — деди Шаҳидбек, — аммо киши, алалхусус<sup>3</sup> сизга ўхшаш йигитлар ҳамиша бир ўрунда ўлтуриб қолмайдирлар. Тажриба, истеъодлари ўскан саъин, юқорироқ мартабаларга мина борадирлар. Шунингдек сизни ҳам юқори мартабага кўтармакчига ўхшайдирлар-ким, хррр... буни сизнинг ҳаваскорлиғингиз эмас, фазлингиз тақозо қилиб, бунда сиз асосан ҳар қанча қарши бўлсангиз ҳам, хррр... лаёқатингиз яна сизни бу хизматни қабул қилишга мажбур этадир.

— Кишилар муболага қылғандек менда истеъодод йўқ, — деди Анвар, ерга қараған ҳолда. — Ундан кейин ўрдага кечагина борган менга ўхшаш ёшларнинг "бosh мирзо бўламан" деб умидланишлари айни бир кулгидир. Яъни, демакчиманки, бу вазифа тамаъида ўн, йигирма ва балки

<sup>1</sup> Ақлисолим — соглом ақл.

<sup>2</sup> Инчинин (инчунин) — шунингдек.

<sup>3</sup> Алалхусус — хусусан.

үттүз йиллаб күзини түрт қилиб келгән муншийлар, муфти ва шоирлар бор. Уларнинг ёнида менга ўхшаш бир ёш тажрибасизнинг ҳам тамаъланиши қулги эмасми? Айниңса, ўрдадаги урфи-одатларни ва тажрибаларни ўз кўзидан ва бошидан кечириб турған кишилар томонидан бу шойиъани дуруст деб ишонилишига таажжуб қила-ман...

Шаҳидбек қўлини артар экан кулди:

- Шу ишончсизлигингиzinинг ўзи ҳам бир болалиқ.
- Болалиқ, болалиқ, — деб қўйди маҳдум.

Манти тановул қилиниб битди. Маҳдум лаганлар теги-ни ичиб-ялади. Фотиҳадан сўнг лаган ва дастурхонларни ичкарига элтмакчи бўлган Анварни Шаҳидбек тўхтатди:

— Лаганларни қўйиб туринг-чи, мирзо, илгари ҳалиги масалани сшайлик.

Анвар қўлидаги дастурхон ва лаганни суфа лабига қўйиб ўлтурди. Маҳдум гулдурос билан кекириб, устидан "алҳамдулиллоҳ" ҳам деб олди.

— Хўш, мирзо Анвар?

— Гап боягича, бек ака, — деди Анвар, — бу масала аҳамият беришка арзимайдир.

Шаҳидбек маҳдумга қаради. Маҳдум Анварни жеркти:

— Арзийдирми, йўқми, ахир, сўзга қулоқ бер-да, Анвар болам.

— Хўб, марҳамат қилсинлар.

— Эшитишимизга қараганда, — деди қўлини ўйнатиб Шаҳидбек, — жанобға манзур қилинғанлар орасида сизнинг номзадингиз бор экан.

Анвар кулимсиди:

— Бор деб эшитдим.

— Ўрдадаги ишончлик кишиларнинг сўзларига қараган-

да ёрлиг сизнинг отингизга бўлар эмиш.

— "Бўлди" билан "бўлар эмиш" орасида катта фарқ бор.

— Хўб, — деди ўзини еллип Шаҳидбек, — биз бу иккисини бир ёққа қўяйлиқ-да, икки орадан "башарти бўлса" феълини олайлиқ, хе-хе-хе... Башарти ёрлиг сизнинг ис-мингизга бўлиб қолса, сиз шунда нима қиласиз?

Анвар кулиб маҳдумга кўз қирини ташлади.

— Сиз бу "башарти бўлса"га ҳам ишонманг, бек ака.

Маҳдум хўмрайиб Анварга қараб қўйди. Шаҳидбек яна сўради:

— Ахир, шу эҳтимолга қарши жавоб беринг-да, хррр.

— Мен истесьфо ва узр аризаси берар эдим...

— Ҳамоқат!<sup>1</sup> — деди маҳдум ва тескари қараб олди.

Шаҳидбек таассуф қилған каби бошини чайқади:

— Бу сўзингиз билан бояги гапингизга қарши бордингиз. Боя "мендан бошқа бўладирғанлар ҳам бор, мен бу ишка умидланмасам ҳам бўладир", дегандек қилған эдингиз, ҳозир эрса бошқа нарсани айтасиз, хррр.

— Куфрони неъмат, нон тепкулик, — деди маҳдум. Анвар яна кулимсиди, аммо жиддий тус олған эди:

— Хайр, кишилар ўйлағандек, меним мирзобошилиққа истеъодод ва лаёқатим ҳам бўлсин, агар ёрлиғ берсалар, бу вазифани қабул ҳам қилайин, — деди, — аммо анови — йигирма-үттуз йилдан бери шу мансабнинг қайғусида келган кишилар тинч ётадир, деб ўйлайсизми, ҳар замон оёғимдан чалмайдирлар, деб ишонасизми? Мана шу андишада тубан ва аҳамиятсиз бўлса ҳам, ҳозирғи хизматимни аъло кўраман ва шу мулоҳаза билан тақсирим айтканлариdek, куфрони неъмат қилмоқчи бўламан.

Шаҳидбек маҳдумга қаради, маҳдум Анварга қарши чиқди:

— Сен ўз ишингни билиб қилсанг, вазифангда сустлик кўрсатмасанг, — деди, — сенга бутун олам душман бўлғанда ҳам бир мўйингни ҳам қилолмас. Чунки ҳақ ҳамиша ғолибdir, ҳақсизлик эрса мағлуб. Туҳмат ва бўҳтон хавфида маъракадан<sup>2</sup> юз ўғуриш — йигитларнинг иши бўлмас. Чунончи, ушбунинг мисоли туркыйда ҳам бор: "Чумчуқдан қўрқиб, тариқ экмаган" деб қўрқоқ кишиларни масхара қиладирлар. Шунга ўхшаш сен ҳам чумчуқдан қўрқиб, тариқ экмагучилар хилидан бўлсанг... мен янгишиб юрган эканман-да, болам!

— Ҳақиқат... — деб кулди Анвар ва бир оз ўйланиб тўхталди. — Ҳақнинг ҳақсизлиққа ғолиб келганини оғизда эшитсан ҳам, шу чоққача амалда кўралмадим, — деди, — масалан, мендан ҳам ўзингизга равшанроқдирким, мирзалардан Сайдхон, мулла Сиддиқ ва Мўминжонларнинг бошиға қандай фалокатларни солмадилар, ҳолбуки ҳақиқатда улар хон ўйлағанча хиёнатчи кишилар эмас,

<sup>1</sup> Ҳамоқат — аҳмоқли.

<sup>2</sup> Маърака — жанг майдони.

фақат бу учавининг ёмонлиқлари бир неча адоватлик мирзоларнинг тўқума туқмат ва бўйтонлари эди.<sup>1</sup> Айниқса ўзим бир неча йилдан бери ўрдада ишлаб, шунингдек ўз ора фисқу фасодларни ҳар кун учратмакдаман ва шунинг учун булғанч бир муҳитда мундай талашлиқ вазифани ўз устимга олишдан ҳазар қиласман.

— Сенинг мисолинг, — деди маҳдум, — нодиран воқиъдир... Агар шундай ҳодисаларни ўйлаб турсанг, ўрдада эмас, ҳатто кўчада ҳам юришинг маҳолдир. Бахтинг бунчалик кулган экан, жабонат<sup>2</sup> билан давлат қушини қўлдан учуриш куфрони неъмат, болам!

— Ҳа, тақсир, — деди Шаҳидбек, — айни ҳикмат сўзлайсиз... Укам мирзо Анвар, бахт деган нарса йигитка бутун умрда фақат бир мартаба қарайдир, ххрр, агар шунда маҳкам тутиб қолсангиз, хўб, бўлмаса ҳамиша отнинг кейинги оёғисиз-да.

— Тилак ва ташвиқотларингиз холисона бўлгани учун ташаккур айтаман, — деди Анвар, — яна шу ҳолда мени маъзур кўрасиз...

Маҳдум яна қизиши, ўнг кўзини қисиб, бир ёқлама Анварга қаради. Чунки ул жуда аччиғи чиққан кезларда кишига шу хилда қарап эди.

— Мен ким, Анвар?

<sup>1</sup> Бир вақт Худоёр, "одил подшоҳ" бўлмоқ ниятида мазкур уч мирзони маҳфий равишда вилоятларга жўнатиб, уларга: "Золим бекларим, по-раҳӯр қози ва бошқа амалдорларим бўлса, менга билиб берингиз, мен уларнинг жазоларини бераман", деб буюрадир. Сайдикон, мулла Сиддиқ, ва Мўминжон — бу учави вилоят, туманларда неча вақт маҳфий кезиб, бек, қози, умуман, мансабдорларни текшириб чиқадирлар. Уларнинг тўғри баҳо беришлари натижасида маъмурлардан қариб тўқсон фоиз золим ва пораҳӯр кўрсатиладирлар. Хон бу ҳолга ҳайрон бўлиб, ўрдадан бир неча кишиларга сирни очадир. Бу кишилар бояги уч мирзонинг рақибларидан бўлиб, хонга итво қиласадирларким: "Мирзолар ўзларига пора бергучиларни яхши кўрсатиб, бермагучиларни ёмон кўрсатадирлар. Иўқса, сизнинг овони адолатингизда шунчалик ёмонлар бўладими? Бу кўрнамаклар нафс сўзига кириб, жанобингизнинг аксар содиқ қулларингизни сиздан юз ўғуришларига ва салтанатингизга раҳна солишига сабабчи бўлмаснилар", деб. "Одил подшоҳ" бу итвога лаққа учиб мазкур уч мирзонинг қулоқ-бурунларини кесиб, ўзларини ўрдадан ҳайдашка ва улар кўрсаткан ўн фоиз яхши кишиларни ҳам ишдан олишга буюрадир. Анвар эса юқорида шу воқиъага ишорат қиласмадидар.

<sup>2</sup> Жабонат — юраксизлик, қўрқоқлик.

— Сиз... Сиз устозим...

— Бас, устозингнинг, — деди маҳдум, — шу кунгача қайси таълимидан заар ва қайси кенгашидан зоеглиг тортдинг?

— Нафдан бошқа ҳеч. Лекин ўз умримда бир густоҳлик<sup>1</sup> қилмоқчиман.

Маҳдум яна аччиғланиб, бир-икки тамшанди:

— Бошқа нарсага густоғлик қилсанг қил, илло ҳозирғи инодинг айни ҳамоқат! — деди қўлини пахсалаб, — агар мен сенга устоз ва ота бўлсам, бу ишқа қулоқ қоқма, илло ўзинг бил, тузукми?!

Анвар индамади, чунки маҳдум кейинги жумла билан маълум бир таҳдидгача бориб еткан эди.

— Қизишманг, қизишманг, — деди Шаҳидбек, — мирзо Анвар сиз ўйлаган йигитлардан эмас. Албатта, мирзо Анвар айткандек хррр... ўрдада ўшандай гаплар йўқ эмас ва лекин мен азмойиши<sup>2</sup> бўлсам, хррр, шуни айтиб қўяйки, ўрдадаги каттадан-кичик мирзо Анварга ҳурмат билан қарайдир. Чумолини оғритмаган кишига ким ҳам адоват қилсин, хррр...

— Ҳабба! — деди маҳдум, — энди нима қолди; орада гўдаклик хавфидан бошқа ҳеч гап йўқ... Ойига қирқ тилло вазифа, анвоъи ҳадая шоҳона, яна — элдан кўриладирган обрў, ҳурмат, ҳай, ҳай, ҳай...

Маҳдумнинг кейинги жумласи Анварни кулимситди. Кучланиб жиддиятини сақлаған ҳолда:

— Ҳозирча мени мунший қилиб ёртиғ берганлари йўқ, — деди, — шунинг учун бу тўғрида сўзлашиш менга қолса ҳали эртароқ кўринадир.

— Мен ҳам буни билиб турибман, болам Анвар, — деди маҳдум. — Башарти бу мартабани худойи таоло сенга насиб қилса, ҳалигидек болалиқ ақлинг билан нобуд қилиб қўймагил, деб сўзлайман. Эшитишимга қараганда, жанобга бир ариза ёзиб, узр баён қилмоқчи эмишсан...

— Ким айтди?

— Ким айтканини қўябер, аммо бояғи ҳаракатларинг бу кори баддан ҳам қайтмаслигинга бизни ишонтирадир. Дарҳақиқат, ушбу хабар тўғрими?

<sup>1</sup> Густоҳ — адабсиз, андишасиз; эркин, эрка.

<sup>2</sup> Азмойиши — мушоҳада, ўйлаш.

— Сизга арз қылған киши балки билиб сўзлагандир...  
Башарти сиз бу фикримни маъқул топмасангиз... албатта мажбурман.

— Ҳабба, — деди маҳдум тамом очилған қисфатда, — гўдаклик лозим эмас, жабонат кўб мазмум<sup>1</sup> суфат, "Осиласанг ҳам баланд дорға осил" мақоли кўб пурҳикмат сўз.

Маҳдум шу гапни айтиш ораси қонсъ<sup>2</sup> ва мағрур Шаҳидбекка қараб олди. Чунки ул бу мағруриятка икки жиҳатдан ҳақли эди; "башарти сиз маъқул кўрмасангиз..." деб Анвар ўз ризолигини маҳдумнинг ёлғиз шахси билан билдириди, ҳам шу жумла билан устозидан бошқаларнинг ўз раъйига қарши бора олмаслиқларини онглатди.

Яхшигина тушурилган манти ва одатдан ташқари энтикиб, ҳаллослаб кўб сўзлаш натижасида Шаҳидбек чарчаб, ёстиққа суюниб қолған эди. Шунинг учун ул икки орадаги онглашишни ёнбошлиған кўйи табрик этди:

— Балли, мирзо, балли, гап шундай бўлсин, ххрр...

Бир-икки пиёла чой ичишкандан сўнг, маҳдум билан Шаҳидбек фотиҳа ўқуб, шом намозига қўзғалишдилар. Анвар Шаҳидбекни ўрта эшиккача кузатиб борди. Шаҳидбек Анвар билан хайрлашар экан:

— Иншооллоҳ ёрлиғ оларсиз, деб ўйлайман... Бир неча закотчилар тўғрисида сиз билан кенгашадирган гаплар ҳам бор. Ўз фарзандимиздек йигитсиз, сизнинг мирзобоши таъйинланишингиз бизга айни муддао, — деди.

— Ёвда бўлса, тезаги тегар эмиш. Анвар ўз болангиз-да.

Анвар уларнинг сўзига қарши мажҳул бир вазият сақлаған ҳолда бош қимирилатиб суфага қайтди.

## 12. БАХМАЛБОФДА ФАҚИР БИР ОИЛА

Анвар 1267<sup>3</sup>-нчи хижрия миёналарида Қўқоннинг Бахмалбоф маҳалласида<sup>4</sup> фақир бир оиласи дунёға келди. Оналар туққан болаларини сизга "тилаб-тилаб олган фалоним" деб, оталар "худой берган ўғулча" деб тақдим этадирлар. Аммо бизнинг Анвар бўлса онасининг "тилаб-

<sup>1</sup> Мазмум — айб, ёмон.

<sup>2</sup> Қонсъ — рози.

<sup>3</sup> Милодий ҳисоб билан 1850-51 йиллар.

<sup>4</sup> Бахмалбоф маҳалла — духоба тўқуйдурғанлар маҳалласи (муал.).

тилаб олғани" эмас ва отаси ҳам уни "үгүлчага" ҳисобламаған зди. Отасининг касби бўёқчилиқ, ҳамиша ярим белидан нил сувига чўмилиб ёткан бир камбағал ва бир қарич, икки қарич болалардан бештасига дада зди. Шу беш боланинг ёнига иззатсиз, ҳурматсиз олтинчи "меҳмон" бўлиб, бизнинг Анвар қўшилди. Яъни Анвар тилаб олинган бола эмас, дадаси билан онасининг тилакларига қарши, фақат уларнинг баҳтисизлик ва қашшоқлиқларига хизмат қилғучи бўлиб туғилди. Бола тилаб олинса, сўйинч-қувонч, ногорачи-сурнайчи ва шунга ўхшаш чўзма-чалпак, ис-чарог маросимлари нуқсонсиз ижро этиладир. Аммо Анварнинг дунёга келиши мундай маросим, тантаналар ва орзу-ҳаваслар билан бус-бурун алоқасиз зди. Масалан, онси ўз ёнига доя чақириб тақаллуфланмади, тўнгуч қизи Нодиранинг кўмагида туғди; болаларини қўни-қўшнига сўйинчи учун чиқармади. Чунки қўшниларнинг "қайси ҳолингга туғдинг?" ёки "ўзи ўлгур ит мизожми?" деб таъна қилишларидан чўчиди.

Шу ҳолда етти-саккиз кунлаб Анварнинг дунёға "ташрифи" сир бўлиб кечти. Анвар оҳорлиқ янги йўргак кўрмаганидек, оғаларидан бирининг эски бешигига тўққузинчи кун беланди эмас, тиқилди.

Анварнинг "чилласи чароғ қўрмаган" бўлса ҳеч боки йўқдир, бироқ йигирма кунлаб бешикда исмсиз ётиши қизикдир, чунки янги "қадрлик меҳмон"га от қўйиш на отасининг эсига ва на онасининг хотирига келган зди. Орадан йигирма кун ўтса-ку, болага исм қўймасалар, деб ота-онани айблаш оғир. Балки Салим буёқчининг тирикликтан қўли бўшамағандир. Анорбибининг бўлса олти боланинг хархашасидан қулоги тинчимай мияси суюлгандир, ҳар ҳолда бу "қадрлик" боланинг оти муҳтарам маҳалла имоми тарафидан қўйилмаганидек, ота-она томонларидан ҳам насиб бўлмади. Исл қўйиш вазифасини йигирма иккинчи кунларда ўн икки ёшлиқ Нодира адо қилди.

Нодира ўз яқинларидаги маҳдумлардан бирининг боланини яхши кийими, айниқса, ёқимлиқ эшитилган "Анвар" исмига суқланиб, ҳавасланиб юрар зди. Ўйлаб-нетиб турмади-да, янги чақалоқ укасининг отини ҳам "Анвар" деб атади ва бешикда чалқанча ётиб, нурсиз қора кўзлари билан дадасининг фақир ҳаётига "разм қўйған" бу чақалоқнинг теварагидан айланиб, "Анваржон, Анваржон!" деб хитоб қила бошлади. Шуни ҳам айтиб қўйиш керакки, Анварнинг дунёға келишини бирдан-бир табрик этиб

сўйинган шу Нодира эди. Сўнгроқ яна унга оналиқ мартабасида қолгучи, ҳатто шу кунгача Анварнинг энг меҳрибон кишиси бўлиб келгучи яна шу Нодирадир.

Шу йўсун Салим бўёқчининг мавридсиз лайлаклари ичида бемаҳал ғуррак бўлиб Анвар ҳам яшай бошлади. Болалари кўпайган сайин Салим аканинг иши ҳам кейинга кетканидек, кундан-кун эҳтиёждан-эҳтиёжга ўтиб борар эди. Анвар уч ёшқа кирганда, беш йиллардан бери Салим акага ёпишиб олған бобосир касали унинг ёқасидан олиб йиқитишига муваффақ бўлди. Яъни Салим ака қонсираб, дармонсизланиб ётиб қолди. Муолажага пул керак, мундан ҳам илгари оиланинг умумий касали бўлған озиқقا ҳам шу нарса керак. Салим бўёқчи сармоясидаги нил, туз ва шунга ўхшаш дастмояларни сотиб муолажа қилдирған бўлди. Дард анча улгайған эди. Бу чиқимлар фойда ўрниға зарар келтирдилар. Дўкон дастгоҳини сотиб рўзғор қилди. Булар ҳам биткандан кейин бу оиланинг оғир кунлари бошланди. Очлиқ, яланғочлиқ, айниқса касал боқиш.

Шу қиши айниқса қаттиғ келган эди. Совуқдан сақла-ниш учун уларнинг ҳозирликлари йўқ. Ўпкасига совуқ тегдириб Салим аканинг тўртинчи боласи ўлди. Кўкламга чиқар-чиқмас Салим бўёқчининг ўзи ҳам дунё билан ви-доълашди. Бунинг устига Анвар, яна икки оғасиға қиза-миқ тошиб бир бола мунда ҳам ўлиб берди. Шу йўсун олти ой ичиде Анербиби эридан ва икки боласидан айр-лилиб, тўрт гўдак орасида тирик бева бўлиб қолди. Но-диранинг бўйи чўзилиб қолған, ҳар начук бир жойини топиб кетар, аммо учта ёш боланинг иши қийин эди. Эридан болаларнинг тарбиясига ярарлиқ ҳеч гап қолмаган, бир-иккита хум, уч-тўртта мўнди ва шунга ўхшаш резров, бошқа бир бало ҳам йўқ. Анербиби меҳнат билан яшаб, етти-саккизни тўғиб, ёши ҳам қирқларга бориб, тусиға ажин кириб, кексаймаса ҳам қаримсиқ бўлиб қолған, шу-нинг учун бирартага тегиб олиши тўғрисида ўйлаш ҳам беҳуда.

Анербиига ўхшаш тул хотинларнинг қиладирған иш-лари ҳар кимга ҳам маълум: маҳаллада дастурхончилик, бойлар эшигига оқсошлиқ, ҳунармандроқ бўлса — кинначилик ва ҳоказо. Анербиби шу ҳунарларнинг ҳаммасига ҳам қобилият эълон қилиб, болаларини боқиши фикрига тушди. Ва бу орада қизи — Нодирани бир бўзчи боласига узатиб, юкини ҳам бир оз енгиллатди.

## 13. ТАНИЙСАНМИ, ШУ ЖАЖКИ ҚИЗНИ?

Фалакми кажрафтор, турмишми бемаза, ҳар ҳолда Анварларниг толеъи яна пастлик қилди. Бир кун Анонбиби биравникида юмиш қила туриб түсіндән оғриб қолди, бир соатнинг ичида тилидан ҳам айрилди. Занбилга солиб ўз уйига келтириб ташладилар. Болаларнинг фигони фалакка чиқди. Куюви табибга югурди. Натижада юрак фалажига йўлиққани маълум бўлиб, шу кун кечаси ҳатто уч гўдаги тўғрисида бир оғиз васият қилолмай вафот этди. Мозорға элтдилар. Тобут олдида икки оғаси билан олти ёшлиқ Анвар ҳам йиглаб борди.

Ўн бир ёшлиқ Темир, тўқуз ёшлиқ Қобил ва Анварларни тарбия қилиш оғирлиги Нодиранинг устига тушди. Марҳума онасининг ёдгорлари бўлған бу уч болани бегоналар қўлида хор қилиб қўйишни Нодира истамаса ҳам, эрининг фақирлиги бунга монеъ эди. Таъзия кунлари ўткандан кейин ўғуллиққа деб сўраганларга икки болани бериб юборди ва Анварни ўзи билан олиб, онасининг қақир-қуқурларини бир арвага ортиб эрининг уйига келди.

Нодира онаси ўрнига Анварнинг бошини силади, ювиб-таради ва Анварнинг истиқболи учун қайғирди. Отаси ва ўз эрининг касбларига яхши баҳо бермагани учун Анварни бошқа киши қилмоқ фикрига тушти. Уни ўқутмоқчи, ҳатто мадрасаларга юбормоқчи ва шу йўсун муллалиқ даражасига еткузиб, отасининг уйига чароғчи қилмоқчи эди. Анварни ўзлари турған маҳалладан бир гузар нари бўлған Солиҳ маҳдумнинг мактабига берди. Анвар "так-та"дан ўқуш бошлади, зеҳнининг тиниқлигидан бўлса кепрак, ўн бир ёшида саводи чиқаёзди. Бироқ ўқишида қанча баҳтли бўлса, пешанада ўшанча баҳтсиз эди. Шундогки, Нодира икки болалиқ бўлған эди. Эри: "Укангга едириб-кйидирайми ёки ўз болаларингними? Укангни кишига шогирд бериб юбор", деб Нодирани қисташга турди. Бечора Нодира оғир ҳолда Анварни кишига шогирд бериб, ўқушини зоеъ қилишга кўзи қиймайдир, эрига муқобала учун ҳеч бир мантиқ тополмайдир. Чунки эрининг ҳоли ўзига маълум. Шу йўсун яна бир йил ўтиб, Анвар тўғрисида эри билан аччиғ-тизиқ бўлған бир кун паранжисини ёпиниб кўчага чиқди ва тўғри Солиҳ маҳдумнинг уйига борди. Шу вақтларда Солиҳ маҳдумнинг онаси Марғилонга кетмаган эди.

Нодира Моҳлар ойимға йиглаб ҳасрат қилди. Ҳамма

саргузаштларини бирма-бир сўзлади. Шу бола учун эридан чеккан изоларини чизиб:

— Улуғ даргоҳларингизга шу ятим боланинг умри зоеъ бўлмасмикин, ўқуши жуванмарг қилинмасмикин, деб келдим. Бир парча нонларингизни аямай, ятим бошини силасаларингиз, деб келдим, — деди.

“Қуш тилини қуш биладир” деганлариdek, Нодиранинг самимий арзи бандачилиги Моҳлар ойим билан Ниғор келиннинг юракларини эзди ва шу онда Моҳлар ойим мактабхонадаги болалар ичидан Анварни чақиртириб олди. Анвар келишкан, дўндиқ бола эди.

— Домласи маҳтайдирган ўзимнинг заҳнлик болам-ку, — деди Моҳлар ойим Анварни кўриш билан ва Нодирага таскин берди.

— Хўб, қизим, хўб, поччаси боқмаса боқмасин, мен ўзим боқаман, ўқутиб катта мулла қиласман.

Анвар поччасининг кейинги кунлардаги дағал муомалалари сабабини ўйлаб, хафаланиб юрар эди. Моҳлар ойимнинг ҳалиги сўзи билан масалага тушунди ва ятимона бошини қуи солди. Бу ҳолдан опаси таъсиrlаниб, кўзига ёш олди.

— Йигламанг, жувон, — деди Моҳлар ойим, — йўқлиқ қурсин — йўқлиқ. Поччаси камбағал бўлса, унда ҳам гуноҳ йўқ, ҳамма гап тақдирни азалдан. Яхши: бу кунданоқ бола сизникига бормайдир, ўз ёнимда ўғлим бўлиб ётадир. Отинг нима, катта йигит?

— Анвар...

— Оҳ, отинг ҳам ўзингга ўхшаш чиройлик экан... Манови дўндиқ қизни танийсанми?

Шу ўртада ўйнаб юрган олти ёшлар чамалиқ Раъно югуриб келиб, Моҳлар ойимнинг бағрига кирди. Анвар ўзидан ҳам дўндиқроқ Раънога қараб кулди:

— Раънохон, — деди.

Моҳлар ойим Раънони бағридан чиқариб буюрди:

— Бор, Анвар акангта салом қил!

Раъно келинларча Анварга салом қилди ва жазб қилингандек Анварнинг яқинига бориб тўхтади.

— Кўриш, Анвар! — деди ойим.

Анвар Раънони бағрига олиб қучоқлади. Шу ҳолда Моҳлар ойим кулимсidi.

— Агар ўлмасам, шу дўндиқ қизимни бериб, Анварни ўзимга куяв қиласман.

Анвар уялиб бағридағини бўшатиб юборди. Хотинлар

кулишдилар. Шу йўсун Нодира Моҳлар ойимдан жуда курсанд бўлгани ҳолда уйига қайтиб кетди.

Ўз уйида бир нонхўр ортиши маҳдумга, албатта ёқмас эди. Бироқ, онасининг раъйини қайтаришдан ҳам ожиз эди. Шундоғ ҳам бўлса, "томоги-ку, енгил, кийими оғирроқ. Кийимини опасининг устига қўймабсизда" — деди. Моҳлар ойим: "Кийими бир гап бўлар. Кишилар масжид, мадраса солғанда, биз бир ятим боқсақ, арзимайдими? Сенга оғирлиқ қилса, ўз бисотимдан кийинтиарман, болам" — деди.

Анвар ўн икки ёшида учунчи оилани кўрди. Лекин бу охирғиси Анвар учун ҳар жиҳатдан ҳам қулай бўлди: ўқушини давом этдирав, қорни панҷшанбалик нонлар билан тўқ, уст-боши ямоқ бўлса ҳам, яланғоч эмас эди. Бу учунчи оиласа кўчишда Анварни энг курсанд қилған нарса мактабдаги болаларнинг озор беришларидан қутилиши ва домланинг асранди ўғли мақомини олиши бўлди. Болалар уни эҳтиром қилмасалар ҳам, унга бурунгича ёмон муомала қилишдан ҳайиқиб қолдилар. Анварга бу уйда ортиқча юмиш ҳам йўқ, чунки ҳар қанча уй хизматлари мактаб болаларидан ортмас, ўқушдан бўшаған вақтини Раъонни ўйнатиб кечирав эди.

Ўн уч ёшида мактаб прўграммасини битириб, ёш бўлса ҳам ҳалфалик, яъни домлага кўмакчилик қила бошлади. Ва ҳар кун болалар озод бўлгандан кейин маҳдум унга кофиядан<sup>1</sup> дарс берар ва "Гулистан"и Саъдийдан бир неча банд ўқутиб, маъноси билан ёдлатар эди.

Ўн беш ёшида мактабни ёлгиз ўзи идора қилиш дара-жасига етканидек, яхшигина форсийхон ва бир даража араб тилига ошно бўлди. Маҳдум мундан бир неча вақт илгарилар Анварни мадрасага узатиш тўғрисида сўзланиб юрса ҳам, ҳозир бу гапни оғзиға олмай қўйди. Чунки мактаб ишида ялқовланиб Анварга суюниб қолди ва мадраса масаласини унутдириш мақсадида, араб, форс наҳвсарфидан<sup>2</sup> ўзи дарс беришка тиришди.

Маҳдум Анварга шу жиҳат билан иноқ эди. Аммо Моҳлар ойимнинг Анвар билан муомаласи холис ва самимий бўлиб, ул Анварга ўз боласидек меҳрибон ва ҳар

<sup>1</sup> Кофия — араб тили грамматикаси.

<sup>2</sup> Наҳе — синтаксис, сарф — морфология.

вақт: "Күнглингни бузма, Анвар йигит; күрасанми шу жажжи қизни? Албатта сенга бердираман!" дер эди. Лекин Моҳлар ойим ваъдасига ёталмади. Махдумдан аразлаб Марғилон кетишкага мажбур бўлди. Бироқ, кетар чоғида ҳам Анварни унутмади. Нигор келинни ўз ёнига чақириб: "Куявлик учун Анвардан яхшироқ йигитни тополмассиз, Раъноға худойим умр бериб бўйи етса, албатта Анварга бердиргин", — деди.

#### 14. ЧИН ЎРТОҚ

Анвар ёшлиғида бўшангина бир бола эди. Ўз тенги болалар билан оз алоқа қиласар, уларга кам аралашар ва ортиқча ўйнаб-кулмас, ҳамиша унинг кўзида бир мунг ётар эди. Бу ҳолат балки оила баҳтсизлигидан, ота-она багрида яйрамаганлиқдан туғилғандир, десак, унинг икки оғаси мундай эмас эдилар. Бир онадан неча хил бола туғилар, деганларидек, Анварнинг яратилиши оғаларига нусбатан бошқача эди. Махдумнинг уйида тура бошлағач, Анварда бир оз ўзгариш кўрилди. Шунда ҳам болалар билан алоқасини эскича юрутиб, фақат Раъно ёнидагина ўйин-кулки боласига алишинар, Раънони етаклаб боқчага, кўчадаги катта сув бўйларига чиқиб ҳамроҳини боқчадаги гулларнинг исми, учиб юрган қушларнинг навъи, катта оқар сувлар ва айниқса Раъно каби ёш қизчалар учун бу сувларга йиқилиш хавфи ва шунингдек, бошқа масалалар билан уни танишидирар, кўчада ўлик кўтарғанларни кўрса, бирарта боланинг отаси ёки онаси ўлганлигини сўзлаб, бунинг орқасидан: "Меним ҳам онам ўлганда ўшандоқ қилиб кўтарған эдилар... Мен ҳам шу боладек мозорга йиглаб борған эдим", деб қўяр эди. Раъно ҳам Анварнинг сўзига диққат билан қулоқ солар ва кўпинча ҳисобсиз саволлар ила уни кўмиб ташлар, лекин Анвар зерикмас, ҳар бир сўроққа жавоб бериб, Раънони қаноатландиришга тиришар эди.

Анвар ёш бўлса ҳам жиддий ва кичкина мияси муҳокамага қобил, бошқа кишилар устига тушкан баҳтсизликдан ҳам мутаассур бўлгучи эди.

Бола чоғиданоқ энг яхши кўрган нарсаси гулзор ва ундаги гуллар эди. Махдумнинг оиласига келиб тура бошлағандан сўнг боқчанинг гулзор қисмини ўз идораси остига олди. Гулларни сугориш, ўтларни юлиб, тозалаш вазифаларини ўзи бажарди. Гуллардан ҳеч кимга уздир-

мас, бир боланинг узи олганини кўрса ўзи хафа бўлғанидек, болани ҳам хафа қилас эди. Болаларнинг дараги билан ҳар кимнинг уйда бўлған янги гуллардан кўчат ва уруф олиб, йилдан-йилга гулзорни бойитди. Ёз кунлари келса, болаларни капалак ва олтин қўнғуз тутиб келишкага буюрар; қийнамай, озор бермай заҳасиз капалак тутиб келганларга сабогини ўқутиб қўйиш билан мукофот берар, капалак ва олтин қўнғузларни гулзорда учурраб юборар, агар улар гулларга қўниб қолсалар, ўзида йўқ сўюнар эди. Шунинг учун аксар ёз кунлари маҳдумнинг боқчаси оқ, нимранг, ола, зангор, мalla, ложувард ва бошқа тус капалакларнинг ялт-юлт учишлари билан алоҳида бир кўринишкага кирад, Анварнинг ўқушдан бўшаған кезлари гуллар ичидаги шу капалаклар орасида кечар эди.

Анвар ҳар ким учун ҳам сўйимлик ва хушмуомаласи барчаға баробар эди. Аммо, айниқса хуш кўрган кишиларидан биринчиси Раъно ва иккинчиси мактабдаги шогирдлардан сабоқдош шериги Насим исмлик бола эди. Насим билан Анвар жуда яқин дўст, бир-бирини онглағучи сирдош ўртоқ эдилар. Гарчи Насимнинг отаси Қўқоннингғина эмас, бутун хонлиқнинг танилган кишиларидан ва бу икки боланинг синфий айирмалиқлари ер билан кўкча, лекин ёш дўстлар бунинг фарқига етмаслар, Насим "хоннинг мирзобошисининг ўғлимани", деб ҳаволанмаганидек, Анвар ҳам "Салим бўёқчининг ятими, Солиҳ маҳдумнинг асрандисиман" деб андиша қилмас эди. Бу икки бола бир жойда суҳбатка киришсалар, четдаги бир киши Анварни йиртиқ бўз кийимлар ичидаги ва Насимни шоҳи-адраслар билан гарқ ҳолда кўриб, албатта "бу гадойбачча билан бекбаччанинг ўзаро нима муносабатлари бор?" деб таажжублана, лекин дўстлар ҳали бунинг айирмасини идрок қилмаслар эди.

Аксар жумъя кунлари маҳдумдан изн олиб, Анвар шу ўртоғининг уйига борар, кечкача Насим билан "суҳбатлашиб" қайтиб келар эди. Анвар шу муносабат билан Насимнинг отаси Муҳаммад Ражаб пойгачининг илтифотига ноил ҳам бўлди. Насим ўртоги Анварнинг ятимлигини отасига билдириб мажбур қилган бўлса керак, бир неча ҳайит мавсумларида Муҳаммад Ражаббек Анварга кийимлар ҳам берди. Бу илтифот икки дўстнинг алоқаларини бир-бирларига яна ҳаттироқ боғлади, айниқса, маҳдумнинг димогини чоғ қилди. Зоро, Анварнинг Муҳаммад

Ражаб каби бир кишининг ўғли билан дўстлашиши бир камолат бўлганидек, дўстлиқнинг ҳатто сарполар кийишкacha бориб этиши маҳдумнинг назарида яна айни фазилат эди... Шу сарпо кийиш воқиъасидан сўнг маҳдум Анварга бошқача қараб қолди ва ичидан "сен одам бўладирған кўринасан", деб қўйди.

Бахтка қарши, бу дўстлиқ алоқаси узоқ давом эталмади. Бир кун орадаги дўстлиқ риштасини ўлим яғмогари келиб узди. Насим ўн беш ёшлар чамасида чечак касали билан оғриди ва ўша кезларда давосиз ҳисобланган бу касалдан ўнглалмай вафот қилди. Муҳаммад Ражаббек ва оиласи учун бу мусибат, албатта, оғир эди. Бироқ, улардан ҳам Анвар учун оғир бир ҳасрат бўлди. Ҳатто, кўз ёшини марҳумнинг ота-онасидан ҳам кўброқ Анвар тўқди десак, муболага қилмаган бўлурмиз. Уч кун мактаб ва маҳдумни унугтиб, Муҳаммад Ражаббек ҳавлисида туриб қолди. Ҳар оқшом Насимнинг қабри устида бир соатлаб йиғлаб ўлтурди. Бу ёшнинг самимий чин дўстлиги ва ўртоғига садоқати ҳар кимни таажжубка қўйди.

Анварнинг биринчи мартаба марҳум дўстига аatab ёзған марсияси мотамлик ота-онани яна бўзлатқан эдиким, биз марсиядан бир неча мисраъини қўйида кўрсатамиз:

Очилмай сўлса ҳар гул гунчаси пиру жувон<sup>1</sup> йиглар.  
Эмас пиру жувон, балки ҳамма аҳли жаҳон йиглар.

Ажал яғмогари боти зако<sup>2</sup> ичра узуб занжир,  
Раҳмсиз эssa маъсум лолаларни, чун ҳазон йиглар.

Насимим кетди оламдин мени қайгу аро ташлаб,  
Кўзимдан оқса хун қеч бир ажаб йўқ, чунки қон йиглар.

Жаҳонда эрди танҳо мен ятимга ҳамнишин, дилдор,  
Гарифликнинг диёрида адашкан нотавон йиглар...

Мулла Муҳаммад Ражаббек пойгачи ўғлининг содиқ дўстига шу кундан эътиборан бошқача қараб қолди. Бир жиҳатдан маъсумият, иккинчидан кўриниб турган истеъод Муҳаммад Ражаббекни Анварга илтифот этишка мажбур қилди. Гарчи Анварнинг юқоридағи марсияси болалиқ

<sup>1</sup> Пиру жувон — кексаю ёш.

<sup>2</sup> Боги зако — ақл боги.

хархасасидан иборат эди эрсада, яна унинг истиқболидан хабар олиш учун яхши мезонлиқ вазифасини ҳам ўтар эди.

Мулла Мұхұммад Ражаббек аввало ўз илтифотини Анварнинг марсиясидан бир байтини Насимнинг қабр тошиға олиш билан бошлади. Сүнгра Анварнинг "дунёда мен ятим ўргонингта танқо сирдон ва дилдор (күнгіл күттарғучи) эдинг. Бу күн мен сендең дүстден айрилиб, яна ғурбат диёрида нотавон йиғлайман!" деб афсус ва надомат қилишиға қарши, яъни Анварнинг ятимлик ва гариглигига йўл қолдирмаслиқ учун мулла Мұхаммад Ражаббек ўғлининг содиқ дўстига ўз оталигини кўрсатмакчи бўлди.

Анвар уч ҳафтагача хатми қуръон кечлари Мұхаммад Ражаббек уйига келиб турар эди. Охириги хатми қуръон кечи Мұхаммад Ражаббек Анвардан аҳвол сўради:

- Домлангиз саломатми?
- Шукур.
- Ўқушингиз яхшими?
- Бирмунча.
- Домланинг уйида турасиз?
- Тақсир.
- Сиқиљмайсизми?
- Йўқ.
- Илми ҳисоб ўқуганингиз борми?
- Йўқ, тақсир.
- Домлангиз илми ҳисобни билурмикин?
- Билмаслар деб ўйлайман.
- Агар мен бир домла таъйин қилсан, ҳисоб ўқуйсизми?
- Устозим рухсат берсалар, албатта ўқуйман.
- Ҳўб... бўлмаса эрта кечка домлангиз шу ерга келиб, менга учрашсин.
- Ҳўб, тақсир.

Эртаси куни маҳдум келди, Мұхаммад Ражаббек маҳдум билан сўзлашиб, Анварни ўрда хизматига олиш фикрида бўлғанлигини, бунинг учун арабча, форсийчадан яна ҳам чуқурроқ маълумот олиши лозимлигини ва ҳисоб ўрганиши кераклигини айтди. Маҳдум Мұхаммад Ражаббекнинг Анварга мунчалик марҳамати учун бир оз шошиб қолса ҳам, лекин бу меҳрибончилиқ сабабига яхши тушунганлиги жиҳатдан аввало бекнинг ятимпарварлигини, сўнгра Анварнинг зако ва истеъодидини маҳтади. Анварни одам қилиш йўлида чеккан ўз машаққатларини ҳам ши-

коят йўсунида сўзлаб чиқғач, бу кунларда эҳтимоми том<sup>1</sup> бирлан Анварга форс ва арабийдан дарс бериб турғанини ва алҳол ҳам Анвар форсийча тазкира ва таҳрирлар ёза олишини баён қилиб, исча хил узрлар ичидаги ўзининг илми ҳисобдан баҳрасизлигини билдириди, яъни Анварнинг илми ҳисоб ўрганиши учун бошқа муаллим керак бўлур, деди. Муҳаммад Ражаббек бу тўғриға ўзи домла топмоқчи бўлиб маҳдумга рухсат берди.

## 15. МАҲДУМНИНГ БАХТИ

Шу кундан бошлаб Анварнинг ҳаётида янги саҳифа очиладир. Яъни маҳдум Анварга илгаригича — истиқболи қоронғу бир ятим, деб қарамай, балки Анвар каби ўз ўғли бўлмағанига ўкуна бошлайдир. Дарҳақиқат, унинг ўкунишига арзидирган чигил масалалар ҳам туғуладирким, масалан: Анвар ўрда хизматига кириб қолса, ойига беш тилло, ўн тилло нақдина даромад қилиб турса, бу маблағлар...

Шундай истиқболдағи бу "маблағлар" масаласи маҳдумнинг ичини ари бўлиб талаидир. "Ўн ёшидан бери ўқутиб, сдириб, кийдириб келаман; албатта, даромад маним ҳаққим бўлур", деб ўйласа ҳам, бу ҳукмидан ўзи унча рози бўлинқирамайдир. Ҳар ҳолда масала чигил...

Моҳлар ойимнинг Раъонони Анварга бериш тўғрисидаги "аҳамиятсиз" сўзлари ўша вақтларда маҳдумнинг энсасини қотирған бўлса, ҳозир шу ҳақда чинлаб ўйладигина эмас, балки "ҳалигидек Анварнинг бахти очилиб кетса, нима маломати бор. Ятимлик айб эмас, инсон учун фазлу камол лозим, кулиб турған бахт ҳожат, наслу насабнинг ҳеч аҳамияти йўқ. Раъононинг хуснига ҳар ким таҳсин қилур: Анвар албатта йўқ демас... Бу борада мол ва жонни бир қилишдан бошқа маслаҳат йўқ" деган қарорга дафъатан келиб қолди. Мундан бирар ойлар илгари Ниғор ойимға: "Анвар балоғатга етадэди. Сен билан Раъонога шаръян номаҳрам, ундан қочишларинг лозим", деган бўлса ҳам, бу буйруқ ҳозирғача амалга ошмаган эди ва бундан кейин ҳам амалга ошмайдирған бўлди. Зоро, маҳдумнинг фикрича Анварга оғир туюлиш эҳтимоли бор эди...

Анвар Муҳаммад Ражаб пойғачи тарафидан белгилан-

<sup>1</sup> Эҳтимоми том — бутун диққат билан.

ган бир муфтида ҳисоб, иншо (таҳрир) қоидаларини ўргана бошлади. Махдум ҳам жон отиб араб ва форсийдан таълимни кучайтириди. Анвар бир йил ичида ҳисобни ўрганди. Ва бошқа дарсларида ҳам яхши муваффақият қозонди, ҳам шу кўкламдан эътиборан ҳар кун ўрдага бориб, Муҳаммад Ражаб мунший қўл остидағи мирзолар ёнида дафтардорлиқ, номанавислик усулларини тажриба қила бошлади. Бир йил чамаси маошсиз тажриба кўрди. Шунда ҳам ҳафта сайн Муҳаммад Ражаббек ўз киссасидан уч-тўрт танга чой пули бериб турагар эди. Анвар шу арзимаган уч-тўрт тангани ҳам маҳдумнинг қўлига келтириб берар ва ҳафта сайн ўзига устозининг умидини каттароқ боғлатиб борар эди.

Анвар бир йиллик тажрибада ўрдадаги дафтардорлиқ, форсийча ва туркча номанавислик<sup>1</sup> ҳунарларини тамоман деярлик ўрганиб тажрибалик мирзолар қаторига кирди. Сармуншийнинг оғзидан чиққан маънони тартибка солиб нома, ёрлиғ ёки бошқача бир тазкирани таҳрир қила олар, мирзолар жумлани ғалат ифода қилиб, сармуншийдан аксар танбеҳ эшиктканларида, Анвар бундай танбсҳка жуда сийрак учрар эди.

Иккинчи йилдан бошлаб етти тилло моҳона<sup>2</sup> билан маошлиқ мирзолар қаторига ўтди. Моҳонадан ташқари солиқлардан ҳам дарҳонлиқ<sup>3</sup> қозози олди. Солиқлардан дарҳонлиқ маҳдумнинг рўзгорига катта енгилилк эди. Чунки сўнгги йилларда хонлиқ томонидан ҳалқ устига тушкан ва тушиб турған солиқлар беҳад ва тўлаб бўлмаслиқ эдиким, бу ҳақда келаси бобларимизда сўз бўлур. Шу хурсандлик баробарида биринчи ойнинг етти тиллоси яхлит ҳолда маҳдумнинг қўлига тегиши гўё тўй устига тўй эди. Домланинг етти тиллони олғандаги ҳолини тасвир қилиш, албатта қийинидир; кўзлари гилайлашқан, афтида қизиқ ўзгариш кўрилиб, оғзининг танопи узоқ саёҳатни иктиёр қилған — "ҳабба... ҳосилинг дуруст, Анвар болам, лекин пулга эҳтиёт бўл, бўтам!" деган эди. Етти тиллонинг қўлдан чиқиш хабари Нигор ойимнинг қулогига етишкакч, Анвардан ранжиди: "Ҳамма пулингни

<sup>1</sup> Дафтар ва номалар ҳар икки тилда юритилар эди (муал.).

<sup>2</sup> Моҳона — ойлик

<sup>3</sup> Дарҳон — озод этиш.

домлангға чакки берибсан, Анвар; уст-бошингни, күрпа ёстигингни ортиб қолса Раъно укангнинг устини тузатишинг керак эди. Домланг туфлаб тугищдан бошқани кошкни билса!" — деди.

Махдум етти тилло "нақдина"ни олиб қанча шодланған бўлса, ўшанчалик ташвишқа ҳам тушди. Унинг фикрича, замона ёмон, бузуқилар бениҳоят; мумкинки, Анварни ўзидан айнатиб оғзи ошқа етканда, бошини тошқа тегдирсалар... Раъони Анварга никоҳлаб бошини боғлаб қўйами, деб ўйлади. Бироқ, Раъно ҳали ўн бир ёшда эди. Иккинчи кун Анвар ишдан қайтиб келгач, махдум уни боқчага олиб кирди. Боқчадан кунгай ҳам кўкрак бир ўрунни кўрсатди:

— Ана шу ерга сенга атаб бир уй, бир айвон, ошхона ва ахтахонаси билан иморат солсам дейман... Ҳабба, Анвар, — деб сўради. Анвар кулди:

— Иморатка элли тиллодан кам пул етмайдир. Маним бўлса бир пулим йўқ. Бўладиргани ҳам фотиҳа бергунингизча албатта сизники ва ойимларники, — деди.

— Ҳабба... ҳимматингга! — деб юборди махдум, — албатта-ку, шундай ва лекин ўша ниятларингдан кейин бояғидек алоҳида пул йигсанг дейман-да... Албатта, бу гап уч-тўрт йилсиз эмас-да.

Шу вақт Раъно нарида бола кўтариб турар эди. Махдум Раъони ўз ёниға чақириб, унга ҳам ҳалиги ўрунни кўрсатти:

— Ҳабба... мана шу ерга Анвар акангта уй солиб берашиб, Раъно. Бу сенга қалай ўҳшайдир, қизим?

Раъно отасининг сўзига тушинмади:

— Анвар акамнинг ётадирған меҳмонхонаси бор-ку, — деди.

— Хе-хе-хе, боласан, қизим, боласан, — деб кулди махдум, — Анвар аканг токай меҳмонхонада ётади дейсан. Ахир бир кун уйланади, бамисоли сен бўлсанг эрга тегасан... Ахир уй керак-да, қизим.

Бу сўздан Анвар қизариб кетди. Раъно Анварга қараб олди ва дадасига аччиғ қилған каби бурулиб ичкарига жўнади. Махдум Анварга усталиқ билан бир маънони онглатиб, таъминот берганидек, бузуқиларнинг васвасасига қарши дам ҳам солған эди... Бу дам солиши Анварга ҳам таъсирсиз қолмади. Шу кунгача Раъононинг ёш, маъсум ҳуснига умидсиз қарайдирған бўлса, бундан кейин унга умид ва истиқболнинг ширин хаёллари билан термуладирған бўлди...

Махдум ўзининг чеккан ташвишида ҳақли бўлиб чиқди. Анварнинг теварагида "холис" маслаҳатгўлар ҳам кўринишиб қолдилар. Айниқса бу "холис"лардан бири поччаси эди. Поччаси етти тилло дарагини эшитиб энтикли. Эрининг тазиёки остида Нодира ҳам кенгашка турди.

— Поччанг, бизнинг ҳавлиға келиб турсин, ўзим уйлантириб қўяман, дейди.

Анвар бошқаларнинг кенгашига қулоқ солмағанидек, опасининг сўзига ҳам илтифот қилмади. Махдум жавоб бермагунча бу уйдан кетмаслигини билдириб, фақат поччасига ёрдам бериб туриш ваъдаси билан опасини тинчтиди.

Анвар иккинчи ой маошидан уч тиллони ўзида қолдирив, уйга кийим-кечак олиш учун изн сўраған эди, махдум "шу иш чакки-да, болам. Хайр, бундан сўнг шу номаъқулчилик бўлмасин!" деб аранг кўнди. Анвар Ниғор ойим, Раъно ва ўзига кийимликлар сотиб олди. Ниғор ойим шолпар, Раъно атлас кийдилар.

Ниғор ойим Анварнинг пинжига кириб олиб, ўз йўлига сола бошлади. Маошининг ҳаммасини махдумга бермасликка, шунга ўхшаш кам-кўстларга ҳам яратиб туришга ундар эди. Анварнинг андишасини рад қилиб: "Ҳар қанча берсанг ҳам дадаси ола берадир. Лекин берганингни сен билан бизга миси ҳам юқмас. Шундай бўлғандан кейин, ишни ўйлаб қилиш керак", дер эди. Чунки Ниғор ойим эрининг Анварга қаттиғ ботина олмаслигини сезар эди. Шундай бўлса ҳам Анвар етти-саккиз ойғача топқанини махдумга бериб, дуосини олиб турди. Лекин махдум шунчалик даромад билан ҳам эски табиъатини бир зарра ўзгартмас, ҳамон эски тос, эски ҳаммом: ҳар кун суюқ ош, худо ёрлақаган кун озодликнинг палови, шунда ҳам Анвар кеч келиб совиган ошни ер, уйда иссиғ нон ёпилмас, ҳамиша панжшанба кун йигилған нон суви қочиб, тарақлаб келаси панжшанбагача кафолатни ўз устига олар эди. Бора-бора Анвар ҳам бу ҳолдан сиқилиб, Ниғор ойимнинг кенгашича иш қилмоққа мажбур бўлди. Олтин бериб қуруқ дуо ва миннатдорчилик олишдан, дуосиз еб-ичишни аъло кўрди. Уйга гўшт ва бошқа масаллиғ олиб бериб, хоҳлаган таомини буюриб турди; ўзи яхши кийинганидек, Ниғор ойим, Раъноларни ҳам яхши кийинтирди. Нодира опасига, жиянларига кийимлар олиб берди; икки тиллони Марғилонда оғриб ёткан Моҳлар ойимга совға-салом қилиб юборди.

Бу ўзгариш маҳдумни довдиратиб қўйди ва қўрқа-писа "бу ой ҳарожатлабсизми, болам?" деб сўраған эди, "кам-кўстларни тузатиб олдик" деган жавобни берди. Иккинчи ойда, қўрпа-ёстиқларни тузатиб, маҳдумнинг кўзи тўрт бўла бергач, икки тиллолиқ "холис" дуо ҳам олиб қўйди. Лекин маҳдум бу ҳолдан анча шошқан эди. Бирар шайтон йўлдан оздирдими, деб астагфируллоғ ўқур эди. Анварнинг эскича очиқ юз билан муомала қилиб фақат "нақдина" важҳидангина дам бўлиб қолиши, топқанини "бемаза" овқатларга, кийим-кечак ва бошқа "бехуда молояъни"ларга<sup>1</sup> сарф қилиши маҳдумни кўб тангликка солған эди.

— Бўтам Анвар, — деди бир кун маҳдум, — дунё деган кўб ноёб нарса; кишининг бир куни бўлса йиглаб-сихтаб ўтиб кета берадир, илло, зар қадрига етиш керак... менда бўлса ўзингда турғандек гап, болам.

Бундай "муассир" насиҳатлар ҳам Анварга кор қилмади. Чунки Ниғор ойим ва Раънолар билан бу тўғрида қатъий битишиб қўйган эди. Шу билан бирга маҳдумнинг ойлиқ вазифасини икки тиллодан ҳам камайтирмади. Инсон ҳар нарсага қобил... бора-бора маҳдум шунга ҳам қаноат қиласидирған бўлиб, ҳисоб-китобни эсидан чиқарди. Бироқ, ой сайнин икки тиллони олғанда "қолғани" тўғрисида бир оз юраги ачишиб қўяр эди.

## 16. ХОННИНГ ИЛТИФОТИ

Девонда расмий мирзо бўлишининг учунчи йилида Анвар жуда катта эътибор қозонган эди. Айниқса, туркий таҳрирда мирзоларнинг ҳар бирисидан устун: чиройлик услуби, осон таркиб<sup>2</sup> ва ифодаси бор эди. Буни мирзолардан бошлаб сарой шоирлари, сарой муфтилари, бош мунший Муҳаммад Ражаббек, ҳатто хоннинг ўзи ҳам эътироф қиласар эдилар.

Худоёр муҳр босиш асноси ёзилған ёрлиғ ва номаларни ўқутиб эшитар, муншиларнинг эшитилмаган араб ва форс сўзлари орқалиқ тўқуған ярим туркий жумлаларига аксар вақт тушунмас: "Эналаринг арапқа текканма?" деб мирзо,

<sup>1</sup> Молояъни — қийматсиз нарса.

<sup>2</sup> Таркиб — жумла тузиш.

муфтиларни койир эди<sup>1</sup>. Аммо, Анварнинг ёзған ҳар бир жумласини мусиқий каби роҳатланиб, тушуниб тинглар ва "шу бала бариларингдан ҳам ўқуғанрақ чиқар!" деб, бошқа мирзоларнинг юрагига ўт ёқар эди.

Муҳаммад Ражаб мунший кейинги кунларда мухим тазкиралар таҳририни Анварга топширадирган бўлди. Ўзи бирар жойга кетадирган бўлса, девон идорасини Анвар қарамогига қолдирар, ҳар бир тўғрида ҳам бошқалардан кўра Анварга ишонар эди. Зоро, Анвар ҳар бир ишни тўғри ва холис адо қилар, вазифасидан ташқари ишларга киришмас, оладирган маошибдан ортиқча тамаъга тушмас эди. Бу ўрунда Анварнинг бир хусусиятини атайноқ ёзиб ўтишкан бурчлими: ўрус истибоддид идораси ёнидаги мусулмон қозихоналари ва улардаги мирзоларни ҳар ким хотирлайдир. Ўша мирзоларнинг унар-унмаска "қалам учи" сўрашлари, кичкина ишни улгайтиб мазана<sup>2</sup> чиқариш ҳаракатлари ҳам бизга маълумдир.

Шу қозихона мирзолари, баайни ҳикоямизнинг мавзуъи бўлған Худоёр саройи муншийларининг кичкина нусхалари эдилар. Конға ёзиладирган арзи-додлар сарой мирзоларидан ташқаридан таҳрир қилинган бўлса, аксар вақт ишка ошмас эди. Яъни четда ёзилган ариза қабул қилинса ҳам ариза эгаси қалам учини бегона қилғани учун аризани конға ва сармуншийга кўрсатмай, йиртиб ташлар эдилар. Ариза эгаси натижа сўраса, "аризангизни саводсиз киши ёзған экан; жаноб илтифотсиз қолдирдилар" деб саводлик кишидан бошқа ариза ёздириб беришкан маслаҳат кўрсатар эдилар. Ариза бергучи иккинчи мартаба ҳаражатланиб, сарой мирзоларининг ўзларидан ёздиришга мажбур бўлар

<sup>1</sup> Худоёр қипчоқлар ичидаги ўскани учун тили ўзбекчадир. Эналарнинг сўзидағи "нг" ҳарфини "нг" равишида қалин сўзлайдир. Бу кунги фарғона ўзбекларида ҳам (айниқса қишлоқиларда) юмшоқ "нг" ўрнида қалин "нг" ишлатиш кўб эшитиладир. Ҳозирги ислоҳ қилинган ҳарфимизда бу қалин "нг" нинг маҳсус шакли йўқдир. Езганда (н-г) ҳарфларидан бир товуш ясалса ҳам бироқ қўрганда ҳар ким буни ўз маҳражидан чиқаролмас. Янглиш ўқур. Бу қалин "нг" ўзбекча бир неча сўздагина ишлатилмай кўб (этилтаб) сўзда истеъмол қилингани учун манимча алоҳида бир шакл қабул қилиш эҳтиёжи ҳис этиладир. Масалан машҳурлари: занг, панг, ланг, ларанг, қаланг-қасанг, данг, тўнгуз, шанги, тўнгиламоқ, тўнг, тўнгуч ва ангиз, тинг бошқалар... Эски "нинг" "нг" равишида ислоҳ қилинган. Бу йўғон "нг" ҳам "г" ҳарфининг устига уч нуқта қўюлиб ғаълосамиккин...

<sup>2</sup> Мазана — ширинкома.

эди. Мундан бошқа, бир-бирлари устидан хонга шикоят қилиш, ўз аро битмас адоват ҳам давом этиб, аксар бир-бирларининг тегига сув ҳам қўйиб турар эдилар. Яна аксарият мирзолар хоннинг хуфиялик хизматини ҳам адо қилиб, шахсий адоват ёки хонга яхши кўруниш учун фуқародан нечаларнинг гуноҳсиз қонига чўмилиб, мудҳиш фожиъларга ҳам сабабчи бўлар эдилар. Шунинг учун халқ айниқса, камбағаллар сарой мирзолариға нафрат билан қарар, улар ёнига яқинлашишдан қўрқар, иложсизликдан икки букулиб салом берар эди.

Лекин Анвар тамаъни, шайтанатни, адоватни айниқса, хуфияликни билмас, девонда ўзига топширилган вазифанигина адо қиласар, алалхусус мазлумлар додномасини хонга эшилдиришкан ва яхши натижалантиришкан тиришар эди. Ул ўзининг шу тўгрилиги соясида ҳамиша анови мирзоларнинг ишига билоқасд<sup>1</sup> халал бериб, чиришини<sup>2</sup> бузуб турар, ҳам шу ва бошқача сабаблардан уларнинг адоватига яхшигина ҳадаф<sup>3</sup> ҳам бўлған эди. Бироқ, Анварнинг ҳомийси — Мұҳаммад Ражаббек катта эътибор ва нуфузга молик, ҳам хонга инобатлик, шунинг учун мирзолар Анварга қарши ҳеч нарса қилолмас эйлар. Мирзолар орасида Анварга тиши-тирноги билан қарши бўлған Шаҳодат муфти каби кекса мирзолар яшаганларидек унинг истеъод ва закосига холис мафтун бўлған Султонали каби мирзолар ҳам бор эдилар.

Шу йўсун тажриба йилидан ташқари беш сана саройда ишлаб келар эдиким, мундан ўн беш кунлар мүқаддам сармунший Мұҳаммад Ражаб пойгачи бир ҳафтагина оғриб, вафот этди. Анвар ўзига самимий мсҳрибон бўлған бир кишидан айрилди. Неча йиллардан бери Мұҳаммад Ражаббекнинг ўлумини ёки бошқача бир фалокатини кутиб, ундан сўнг бош муншийликка ўзини чоғлаб юрган Шаҳодат муфти хизмат билан қишлоққа чиқиб кетканлиги учун, муваққат равишда бош муншийлик вазифасини Анвар адо қила бошлади. Ва шу бир неча кун ичизда Анварнинг бош мунший бўлиш шойињаси юриб қолдиким, ҳозирга бу тўгрида бир мулоҳаза айтиш қийиндир. Чунки бу мансабга интилгучи казо ва казолар, шоир ва фузалолар кўбдир.

<sup>1</sup> Билоқасд — қасдсиз, ният қилимай.

<sup>2</sup> Чириш — битаетган ишни бузиш.

<sup>3</sup> Ҳадаф — нишон.

## 17. АНВАРНИНГ АНДИШАСИ

Анвар Шаҳидбек билан маҳдумнинг сўзларига қарши мажхул бир вазиятда бош қимирлатиб суфага қайтди. Уларнинг чиқиб кетишларини кутиб турғандек ички эшикдан Раъно кўринди. Ҳар замон титраб, учиб кетишша ҳозир турған бошидағи сариф атлас парчасини (рўймолни) бир қўли билан босиб ушлаган эди. Анвар Раъони шу ҳолда кўриб, суфа ёнидаги очилган гуллар устида тўхтади. Раъно келар экан, ўпкалик кўз билан Анварга кулимсиб қарап эди. Келиб суфа лабида турған бўш лаганларга тақида.

— Бу кунги меҳмондорчилигимиздан рози бўлган ўхшайсиз, Анвар aka, — деди қайрилиб Раъно.

— Жуда рози бўлдим, — деди Анвар ва Раъонинг ёнига келди, — айниқса, сенинг қўлинг билан тугилган мантилардан жуда мамнун бўлдим, Раъно.

Раъно лаганлардан қўлини олиб, тирсаги билан суфага сунди:

— Маним қўлим билан тугилган мантиларни қаёқдан билдингиз?

— Қаёқдан билдингиз? — деб Анвар кулди, қўлида бир дона қашқар гули бор эди, — айниқса, сенинг қўлинг нимага теккан бўлса, мен ўшани даррав сезаман.

— Мен туккан мантилар қандай экан?

— Танимайди дейсанми?

— Танимайсиз.

— Чоклари диққат билан чимтилган, тўрт бурчаги иккига қовиширилган, дўндиқ... танимайди, деб ўйлайсанми? Мен нуқул сен туккан мантиларни танлаб едим...

— Мазалик эканми?

— Мазалик нима деган сўз, — деди Анвар, — мана шу қашқарнинг қизил гули ёдингдами, биз бу гулни келтириб ўтқузған йилимиз пушти ранглик бўлиб очилган эди. Иккни йил ўтмай қизил туска кирди. Биласанми бу нимадан?

Раъно Анварнинг жиддий қилиб берган бу саволига тушунмади:

— Офтоб қизартирғандир.

— Янглишасан, Раъно, — деди Анвар, — мен бу гулнинг қизариш сиррини ҳам биламан, бунинг қизаришига ҳам сен сабаб, сенинг қип-қизил лабинг...

— Ҳазилни қўйинг, — деди шу гулдек қизарған Раъно,

— Шаҳид семиз нима учун келган экан, сизни мирзобоши қилмоқчилар шекиллик?

— Бу гапни қўй, Раъно; ишонмасанг ойнага қара, сенинг лабинг билан шу қизил гул ранги орасида фарқ борми, мана қара?..

Анвар томонидан лабига тегизилган гулдан Раъно ўзини олиб қочди:

— Ҳазил ўлсин... Сизни мирзобоши қилмоқчиларми?

— Мени ҳар бало қилмоқчилар... Лекин бўлмаган сўз.

— Нега бўлмаган сўз, шаҳарга овоза бўлған эмиш-ку?

Анвар орқаси билан сакраб суфа лабига оёғ солинтириб ўлтурди. Раъно боягича унинг ёнида сұфага сүянди.

— Овоза ҳақиқат эмасдир.

— Шамол бўлмаса, теракнинг боши қимирламас эмиш.

Балки сизни мирзобоши таъйин қилурлар.

— Мени мирзобоши, таъйин қилсалар яхшими, Раъно?

— Яхшими, ёмонми, мен қайдан билай?

— Ёмон, Раъно.

— Нега ёмон?

— Ифлос иш. Агар бошқа касб топсам, ўрдани бутунлай ташлаб кетар эдим.

— Ифлос иш?.. Сизнинг бек поччангиз ҳам шу хизматни қилар эди-ку?

— Мен бек почча бўлолмайман, Раъно. Ўрдадаги тўкулиб турған гуноҳсиз қонлар, доим теваракдан эшитилиб турған оҳу зорлар маним юрагимни эзадир, тинчлиғимни оладир. Яна мен мирзобоши бўлиб қолсам бу оҳу зорларнинг, тўкилган маъсум қонларнинг ичидаги билфсь<sup>1</sup> сузарман. Бу вақт маним азобим бевосита бўлур. Балки бунда иштирок ҳам қиларман. Чунки хонға яхши кўруниш учун кўб ишларни унинг истагича кўрсатиш, зулм пичогини қайраб бериш, шу мансабда узоқ яшамоғимнинг асос шартидир. Лекин мен бундай виждонсизлик учун яратилмаған ўхшайман. Мадҳу сано, олқиши ва дуо замирига яширинган зулмдан фарёд, ҳақсизликдан дод маънолариға малҳам бўлиш, албатта маним қўлимдан келмас. Чунки "соябони марҳамат" виждан кенгашига қулоқ согуучи "аҳмоқ"лардан эмасдир. Дадангнинг феъли сенга маълум, Раъно. Дунёда "манфаат"дан бошқани кўрмайдир. Маним нима учун бу мансабдан қочқанлиғимнинг фарқига бормай, "куфрони неъмат қиласан, ойига фалон тилло" деб

<sup>1</sup> Билфесь — амалда.

дафъатан қўрқоқлнгимга ҳукм чиқарадир. Дадангта бояги узрларни кўрсатиш тошнинг қулогига аzon айтиш билан бир бўлгани учун сукут қилдим. Агар орада бир киши бўлмаса эди, гарчи, бош мирзолиқ ҳозир бир хаёл эрсада, ўшанда ҳам шу овозага бўйин сунмас эдим, Раъно.

Раъно Анварнинг кўзига тўғри тикилиб, сўзни тинглади. Унинг тусида Анварга ачиниш вазияти бор эди:

— Яхши ният билан мирзолиқни қабул қилсангиз, — деди, — аҳолидан ёрдам қўлингизни йигмасангиз, шу ҳолда барча гуноҳ сизнинг бўйнингиздан соқит бўладир, Анвар ака.

— Тўғри, — деди Анвар, — лескин гап бунда эмас, Раъно, мен шундай бўлишини тилар эдим. Бошқалар мен тилаганча қилмайдилар, биноан алайҳи, масъулият маним бўйнимдан соқит бўлди, деб тинчланиш мумкин эмасдир. Сен тамоман бошқача тушунган бир масала, сенинг ҳаракатинг ва истагинг аксича натижаланиб турса, руҳан эзиласан, вижданан азобланасан. Мана, асли мушкилот шу нуқтададир. Йўқса гардандан соқит қилиб қўйиш ҳар нарсадан ҳам қулай вазифа, аммо маънавий мағлубият оғир масала, Раъно.

Раъно Анварнинг мақсадига тушунди шскиллик, бир неча вақт жим қолди ва қаршисидағи йигитнинг ўйчан юзига бир-икки қараб олди.

- Демак, мирзобошилиқни қабул қилмайсиз?
- Агар топширсалар, қабул қиламан.
- Шунчалик мушкилот ичидা?
- Чунки отанг буни мендан талаб қиладир.
- Отамнинг қандай бийлиги бор?

Маъсум бу саводдан сўнг Анвар энтикиб қўйди ва Раъони бир фурсат кўздан кечириб турди:

- Жуда катта бийлиги бор, — деб яна энтикиди.

Раъно қайтиб сўрамади. Гўё ул ҳам бундаги бийликка тушунган эди. Секингина лаганларга қўлини юбориб, Анварга бўштоброқ қаради:

- Чой ичасизми?
- Кейинроқ ичаман.

Раъно лаганларни кўтариб жўнади. Атлас қўйлак ичидаги тўлқинланиб кўринган унинг латиф гавдаси алҳол Анварнинг кўз ҳадафи эди.

- Мен хуфтанга чиқмайман, Раъно!

Раъно ярим йўлда тўхтаб, кулимсираган ҳолда Анварга қаради:

- Чиқарман! — деди. .

## 18. ЖИЛОВХОНАДА БИР ЖАНЖАЛ

Аср намози учун масжид жиловхонасига энди уч киши йигилған эди. Жиловхонанинг тўрида ўлтурган қора тўнлик, ўттуз ёшлар чамасида рангсиз ва ёшлиғига қарамасдан қуясқ соқолини баҳайбат ўстуриб, бир бурдагина юзига от тўрба осқан каби бир киши эди. Унинг ёнида бўз яхтак богичини осилтириб, хандалакдек бўқоғи билан ўнг томогини зийнатлаган ўрта яшар яна бир "ҳусни Юсуф" кўринар эди. Унинг қаторида ошловдек чўзуқ юзлик, оқ бўз кўйлаги сурдан тўрт эллик кўтарилиб, бўз салласи гардани аралаш ўралган учунчи нозанин ўлтуар эди.

Булардан биринчи муҳтарам шу масжиднинг ёш имом ва хатиби Абдураҳмон домла жаноблари бўлиб, иккинчиси маҳалланинг ширин сўз гийбатчиларидан Самад бўқоқ, учунчиси масжиднинг муаззини Шукур сўфи эди. Самад бўқоқ билан Шукур сўфи имом афандининг мулойимона, ҳам битта-битта айни мақомига чертиб ва қатор териб борган сўзига сомиъ эдилар:

— Ўрда ичида шунчалик оқил ва донолар тўлиб ётқан бир фурсатда, таҳсил кўрмаган, нодон бир гўдакка бундай улуғ бир вазифа, валлоҳи аълам топширилмас деб ўйлайман. Бу вазифани уҳда қилмоқ учун кўб гап керак. Аввало ақли салим, сониян, таҳсили том лозим, ваҳоланки, сиз айткан йигит ўткан саналар Солиҳ махдумда савод ўқуб, биздан ҳижжа<sup>1</sup> ўрганиб юрар эди. Баҳарҳол бу хабарга ақл бовар қилмайдир...

— Ҳа-а, тақсир, — деди Самад бўқоқ ва Шукур сўфини тирсаги билан туртти, — бу бала киму, ўрдаға миразбошилиқ ким. Замонанинг зайли минан, бояғидек Мамаражаб миразбошининг ярдамида ўрдаға киришиб қоған-да-а-а... баяғидек оппоққина бўлса Мамаражаб ўз ёнига оған-да-а-а...

Имом бўқоқнинг сўзини тинглаган ҳолда, икки кўзини ерга қаратқан эди.

— Юртнинг сўзига қараб айтаяппан-да, — деди Шукур сўфи, енгилтан оҳангда, — ҳарчи бир неча кундан бери катта-кичикнинг оғзида шу гап.

— Кўбчиликнинг оғзини тикиб бўлардима-а-а, сўфа-а-а. Самад бўқоқнинг бу сўнгғи гийқиллашида томоғи ос-

<sup>1</sup> Ҳижжа — собоқ.

тидағи йўғон томирлари туртиб чиқди. Имом ҳамон икки кўзи ерда бўлғани ҳолда кичкина бошини қимирилатди:

— ўрдадан бирар киши масхара учун хабар тарқатқандир.

— Ҳа-а, тақсир.

Шу ҳолда жиловхонаға тўртинчи киши кириб келди. Буниси жиккак, қирқ билан эллийнинг ораси, елкаси туртиб чиқған Сафар бўзчи исмлик эди. Имомга салом бериб, сўфининг ёнига ўлтурди ва сўзга бир оз қулоқ солғач, тушунар-тушумас баҳска аралашиб қолди.

— Иншоолло, шу йигит миrzабоши бўлар, — деди Сафар бўзчи сұхбатнинг руҳини билмаган ҳолда, — ўзи ажаб зукко йигит, фуқаропарвар бола: бўғани маъқул, а, лабай, тақсир?

Имом ерга қараған ҳолда бошини қимирилатиб қўйди. Самад бўқоқ хўмрайиб Сафар бўзчига қаради:

— Э, акиллай берасанда, Сафар, — деди бўқоқ, — биз нима деяпбиз-ку сен нима деяпсан.

— Хўш, нима деяпсанлар?

— Овоза гап деяпмиза, миrzабошилиққа катта милла керак деяпмиз-а.

— У милла эмас эканми?

— Милла бўлса ҳам, хашаки миллалардан-да.

— Ашунга қоганда чалғибсан, Самад, — деди Сафар бўзчи, — хат битишка келганда қўявур, камбағалга қайишқанини кўрсанг, ҳа, бўлди дейсан.

— Занталағинг кимга қайиша қопти?

— Ҳаммага, ҳаммага, — деди Сафар, — мени ўзимга ҳам ёрдам қилди-да, яшагуринг.

— Ҳа-а, хўш?

— Бултур ана шу кезда, — деди Сафар энгашинқираб, — бозорға саккизта бўз олиб тушкан эдим. Бирарта мушкил ёъво қилдими, закотчининг томоги тақилладими, ҳарчи фалакат, қўлтугимдаги бўзни ёппа одди, қўйди; "отанг яхши, онанг яхши, косибман, савдагар бўлсан уйим куйсин"... Асти қўйса-чи... Бир йиллик закотинг деб кўтарди, кетти. Қўлингдан нима келади, Самад. Ҳафалигим ошиб, уйга қуруқ қайтдим. Майдада чуйда кутуб ўлтурган бола-чақанинг қути учти. Мол кетти — жон кетти, ишка ҳам қўлим бормайди. Энди бўлар иш бўлған десанг юрак ачиди, дастмоя ҳам галтакка чиқадиган. Арза-парза биттирсамми дейман. Кўчада унга-бунга кенгаш солсам, арзанг маъқул дейишди. Шу яқинда, ўзи

ўрдада турадиган бир арзачи бор эмиш. Кеткан устига кеткан деб дўкон теги яримта бўз бор экан, қўлтуғимга тиқиб олдим. Ана шу тобларда сўроғлаб арзачи мирзаникига борсам, ҳозир ўрдадан келиб, энди тўнини ешиб турған экан. Еш, навқирон йигит, "салом, алик", "ҳорма", "бор бўл". "Шундай, шундай гап; бир парча арза биттирсам, деб келган эдим". Ўрдалиққа гап уқдириш қиёматдан кейин, тақсир. Лекин бу йигитда гаврлик<sup>1</sup> сиёки йўқ, Шукур сўфи. Гапка қониб олиб, қулоқ қоқмай "хўб". Арзанинг бир ерига закотчининг оти тушар экан, неча қайта сўраса ҳам билмадим, ундан кейин афти башарасини уқдириб эдим, тусмоллаб биттасининг отини ёзи, чоғи. "Энди кета беринг, арзани ўзим топшираман" дейди. Жавобини ҳам икки кундан кейин ўзидан олар эмишман...

— Манави осонлиқни қаранг, тақсир. Дуо қилиб қалам учисига бўзни бердим, олмайди. "Ёпрай, осынди-ёв, қургур" деб қўрқдим. "Арза ўрунласа яна хизмат қилармиз, мирзабоши". Яна йўқ, "тоза фалакат бости" деб турсам, "арзага ҳақ олмайман: бўзингни олиб кетавур" — дегани экан. Барака топқурни қаранг, тақсир. А, шундақа одам ҳам бўладими, Самад оға. "Олтин олмасонг, дуо ол" деб қўлимни очтим. Ҳа, энди буни қўявлуринг. Эртаси кечқурун гула тўғрилаб ўлтурсан эшикни бирав тақиллади. "Ҳа, келавуринг". Дўконхонага бўз қўлтуғлаған бир киши кирди.

- Сафарбой сизми?
- Ҳа, биз.
- Арза берганмидингиз?
- Берган эдим.
- Отангизнинг оти нима?
- Маматбой.

Қўлтуғидаги бўзни олдимға ташлади. Худда кечаги бўзларим: таппа-тақ саккизта.

- Бўзларингизни олдингиз-а?
- Ҳа, олдим.
- Хайр.
- Ҳўш.

Бу яхшилиқ арздан ҳам бурун мирзабошидан бўлди, деб ўйладим. Балаларнинг кенгаши билан икки бўзни

<sup>1</sup> Гавр, габр — оташпараст, исломни танимаслик.

күтариб шом пайтида мирзанинг уйига бордим. Чақирдим, чиқди. Миннатдорчиллик билан икки бўзни узатдим; асти олса-чи. "Яхтака бўзим бор, кетавуринг", дейди. "Сотиб, пулини берайми", десам "пулим ҳам кўб" дейди. Ақалли биттасини ҳам олмади. Яна дуо қилиб бўз билан қайтдим. Фаришта ҳам шунчалик бўлар, деб ўйлаб қолдим, Шукур сўфи! А, шундай йигит мирзабоши бўлмай ким бўлсин, Самадбой! Кўбни дуоси кўл деганлар; ишонмасанглар, ана тақсиримдан сўранглар!

Ҳикояни эшитиш асноси имомда бир ғижиниш вазияти бор эди. Ҳикоя биткач, заҳарханда билан Самад бўқоққа қаради, дами кесилаёзган Самад бўқоқ бундан руҳланди.

— Ёлғонни ҳам ямламай ютадиган бўлибсан-да, Сафар, — деди бўқоқ.

Сафар бўзчи тўсундан ўзгариб кетди. Ранги ўчинқиради:  
— Азбаройи худо, қасамми?

— Иккита бўзни икки қўллаб оборсанг, — деди Самад бўқоқ, — қайси аҳмоқ олмай қайтарар экан-а? Ёлғонни сал киши ишонадиган қилиб гапириш керак, Сафар-а-а!

— Азбаройи худо, олмади! — деди Сафар ва асабийланниб ўрнидан туриб кетди, — шу каъбатуллонинг ичидаги ўлтуриб ёлғон гапирган одам мусурмон эмас, кишининг қасамига ишонмаган ҳам етти маҳзабда мўъмин эмс!

Сафар аканинг азтахидил аччиғланғанини сезган имом ораға тушти:

— Бундай яхшилиқни ҳар ким ҳам қила оладир, Сафар aka, — деди, — шунинг учун мирзабоининг сизга қилған яхшилиғига мен ишондим. Аммо бизнинг баҳсимиз унинг бева-бечора қилған яхшилиги тўғрисида бўлмай, бу одам ўрдадаги мирзоларга бошлиқ бўла оладирми, яъни ўшандоғ катта ишнинг уҳдасидан чиқадирми, устидадир.

— Баракалла, тақсир, — деди Сафар бўзчи турған еридан, — менга қолса, иншоолло, уҳдасидан чиқади!

Имом Сафар бўзчиға тушуна олмай, бир оз тикилиб турғандан кейин сўради:

— Унинг уҳда қилишини сиз қаёқдан биласиз?  
— Худой билдирса, биламан-да, тақсир?  
— Хўш?  
— Ахир, кўбчиликнинг дуоси кўл-да, тақсир!  
— Кўбчиликнинг дуоси кўл бўлса яхши, — деди имом, — аммо бу хизматка унинг илми кофийми?  
— Ковфий, тақсир, ковфий!  
— Ахир, сиз кофийлигини қаёқдан биласиз?

— Ахир... ковфий эмаслигини сиз ҳам қаёқдан биласиз, тақсир.

— Кофий эмаслигини мен шундан биламанки, — деди имом аччигини ичига ютқан ҳолда, — бундай мансабга минадирган киши Бухоройи шарифда таҳсил кўрмаганда ҳам лоақал Хўқанд мадрасаларида ўқуған бўлиши керак, аммо сизнинг мирзабошингиз саводхонлиқдан бошқани билмайдир.

— Билмаганини сиз қаёқдан биласиз тақсир?

— Чунки мен уни ўз қўлимда ўқутсанман... бир ятим бола эди.

— Худонинг бериши, тақсир, — деди Сафар ўйлаб-нетиб турмай, — жанобингиз Бухоройи шарифда неча йил ўқуб, ниҳояти маҳаллага имом бўлдингиз... Худой бермаса шундай, тақсир. Ул бўлса мадраса кўрмасдан мирзаларнинг мирзаси бўлмоқчи; худой берса шундай, тақсир.

Сафар бўзчининг бу сўзидан имомнинг қонсиз ранги яна қонсизланған, оламинчоқ кўзи алланучка ҳолатка кирган эди.

— Аблаҳ одам экансан! — деди.

— Сиз ҳам аҳмоқ мулла экансиз! — деди Сафар бўзчи.

Ином газаби билан ўрнидан туриб Сафар бўзчиға хезланған эди, уни Самад бўқоқ ушлаб қолди.

— Падар лаънат, адабсиз! — деди Самад, — домлаға шундай сўзни айтасанми-я-а-а?

Сафар бўзчи турған ўрнидан силжимади:

— Чўёзма кекиртагингни, бўқоқ, — деди, — қани қўйиб бер-чи тақсирингни, ёқалашсин-чи мен минан! Андишанинг отини қўрқоқ қўйдингми?!

Шукур сўфи ўрнида бақа бўлиб қолған, имом бўлса гўё ҳужум қўлмоқчидек Самад бўқоқни итарар эди. Самад бўқоқ гийбатдан бошқа ишка ярамагани учун, имомнинг ёрдамиға етиш чамаси йўқ эди.

— Шу адабсизлигинг билан, — деди Самад насиҳатомуз, — яна домланинг орқасида намоз ўқуйсанми, Сафар, а!

— Ўқумасам қутиламанми сенлардан!

— Ўқумасанг бор, жўна!!!

— Ҳе... — деб сўкинди Сафар бўзчи ва жиловхонадан чиқиб жўнади. Унинг орқасича "падар лаънат жоҳил" деди имом ва илгариги ўрнига борди. Бир неча вақт учавлари ҳам сўзсиз ўлтурдилар.

— Бир ит-да, тақсир, хафа бўлманг-а-а!

Имом жавоб бермади. Яна бир неча киши келиб қўшилғач, Шукур сўфи мезанага чиқиб аzon айтди. Асрни ўқуш учун масжидга кирдилар.

## 19. ИФЛОС БИР МОЗИЙ

Имомнинг табъи жуда сустланди. Шом ва хуфтан ас-  
ноларида ҳам ҳеч ким билан сўзлашмади. Сафар  
бўзчининг "Бухоройи шарифда неча йил ўқуб келиб,  
ниҳояти маҳаллага имом бўлдингиз. Худой бермаса шун-  
дай бўлади, тақсир" деган сўзи заҳарли ханжар каби  
унинг юрагида янгидан-янги жароҳат очар эди.

Дарҳақиқат, Сафарнинг бу сўзи имомнинг эски жа-  
роҳатини мудҳиш тузлаб ташлади. Бу жароҳат шу кунгача  
иҷдангина фасодланиб юрган бўлса, бу кун Сафар бўзчи  
каби бир "бемаъни" бу ярани раҳмсиз суратда ёриб юбор-  
ди. Самад бўқоқ ва Шукур сўфи каби bemazalar олдида  
имомнинг обрўсини тўкли. Бу бир ёқдан. Иккинчи тараф-  
дан Сафарнинг "ул бўлса, мадраса кўрмасдан мирзолар-  
нинг мирзоси бўлмоқчи..." жумласи яна дард устига  
чиқон. Яъни имомнинг ҳасад ўти тўрт томондан пуфлан-  
ди, гўё ул икки олов ўртасида қолғандек бўлди.

Анварнинг бош муншийликка ярамадирғанлигини, илм-  
сиз, фазлсизлигини нега бунча исбот қилишға тиришди?  
Сафар бўзчи каби бир "аблаҳ" билан баҳслашиб, ўзига  
нега бунча хафалик ортдирди? Гарчи, Анварга холис  
қиймат бермакчи бўлғанида ҳам буни Сафар каби илмсиз,  
нодон бир кишига тушундирмоқ учун қандай ҳожат бор  
эди? Бунинг сабабини сўзлашдан илгари имом афандининг  
ўткан тарихига бир оз кўз ташлаб олишға мажбурмиз.  
Чунки бусиз ўқуғучимизни таъмин қилиш мумкин эмасdir.

Ҳозирги имомимиз — мулла Абдураҳмон мундан йигир-  
ма йиллар муқаддам, қисқагина, аҳамиятсизгина "Раҳмон"  
исми билан аталар эди. Абдураҳмоннинг отаси уламо  
наслидан, аммо бу шараф нима сабаб биландир, унинг  
отасига насиб бўлмаган, бироқ Абдураҳмоннинг амаклари  
ота касбини ушлаб таҳсил кўрган жойлари Бухорода катта  
мударрислардан саналар эдилар. Абдураҳмон ёш бола  
экан, отаси ўлиб, онаси ва ота томонлари тарбиясида  
қолди. Ўн беш ёшларгача Солиҳ маҳдум мактабида савод  
ўқуғач, мударрис амакларидан Бухоройи шарифка келиб  
таҳсил қилишға даъват хати олди. Хатда Абдураҳмоннинг  
бобо касблари уламолиқ эканини, шунинг учун бошқа

касбларга уруниб умр зоең қилиш абаслиги<sup>1</sup>, ўз тарбияларида таҳсил кўриш лузуми сўзланар эди. Бу даъват Абдураҳмоннинг онасиға ва бошқа яқинлариға жуда маъқул тушиб, уни Бухорога жўнатиш қарорига келдилар. Абдураҳмон ҳам истиқболдаги мударрис, муфтилик ширинахёллари ичидаги Бухорога сафар қилди.

Катта амак Бухоронинг "Хўжа Порсо" мадрасасининг мударриси бўлиб, Абдураҳмон шу кишининг тарбиясига келган эди. Абдураҳмон силлиққина бола, мадраса мулла-баччалари албатта шундай силлиқ болага ўч... Шунга биноан домла мударрис гарчи мадрасадан ҳужра бериш мумкин бўлса ҳам мазкур ишончсизлиқ мажбуриятида Абдураҳмонни ўз меҳмонхонасиға жойлаштириди. Шу ҳолда Абдураҳмон таҳсил бошлади.

Домла мударрис "замона бузуқлигини" назарга олгани учун Абдураҳмонни ҳалиги тўғрисидан жуда қаттиғ назорат қиласр эди. Бироқ, домлаларнинг бундай бузуқлиққа қарши бора олишлари мумкини эди? Уларнинг ўзлари шу "маҳрам" балосига гирифттор, яъни бузуқлиққа манбаъ бўла туриб ҳам яна "замона бузуқлиги"дан шикоят қилишлари ўша вақтлардағи "мадраса мантиқи"га ҳеч бир баҳссиз сиға олур эдиким, бу тўғрида менга осила кўрмангиз. Кишининг боласини бузиш ҳар бир салласи муazzам, илми "фавқалодда", ўзи "варасатул-анбиё"<sup>2</sup> саналған зотлар назарида ва виждонида маъфу, аммо ўз ўғлига бошқалар ўшандог ҳайвонликни қиладирган бўлса: "Замона бузуқ, эҳтиёт шарт!"

Шу йўсун домла мударрис буродарзодасини яхши эҳтиёт билан, ҳатто шомдан кейин дарбозага қулф солиб тарбия қиласр, мадрасадаги оти ёмонға йиртилган хоҳ ёш, хоҳ кекса умуман, талабалар мажлисига яқинлашдирмас эди.

Киши аввало моҳхов ёки пес бўлмасин: бўлдими, бетдан бўлмаса елкадан, қўлдан сув очмаса — оёқдан, ҳар ҳолда оқаберадир. Шунга ўхашаш жамият ҳам бир касал билан оғридими, унинг ҳар бир табақа ёки синфиға, яна тўғриси, фардига<sup>3</sup> шу касал сироят<sup>4</sup> қилмай қолмайдир.

<sup>1</sup> Абас — бефойда, беҳуда.

<sup>2</sup> Варасатул-анбиё — пайгамбарлар авлоди.

<sup>3</sup> Фард — шахс, кимса, киши.

<sup>4</sup> Сироят — таъсир.

Домла мудларрис буродарзодасини мадраса муллабаччала-ридан ҳар қанча әхтиєт қылса ҳам, яна амният<sup>1</sup> остида әмас эди. Мадрасадан ташқарида ҳам Абдураҳмонни күз остиға олғучи "муллабаччалар" йүқ әмас эдилар, масала четларнинг күз олайтиришиға етканда, табиый, домла мударриснинг қўлидан ҳеч иш келмай қолди.

Домла назоратни эскича давом этдириб, хотиржамъ юрганда бир неча жувонбоз савдогарлар Абдураҳмон билан алоқа қилиб қўйган эдилар. Домла мударрис эрта-кеч Абдураҳмонни күз ўнгидан юбормас, хуфтандан кейин дарбозага қулф солар, Абдураҳмонни меҳмонхонада ётқузиб, сўнгра ўзи ичкирига ухлагали кирап; зиёфатка бориладирган бўлса, ўзи билан бирга олиб юрар эди. Яна шу ҳолда Абдураҳмонни қандай қилиб буза олсинлар? Таассуф, бузган эдилар. Баччабозлиққа маҳсус ҳунар ва найранглар ижод қилган омилкор савдогарлардан бир нечаси "Абдураҳмонча"ни йўлдан оздирған эдилар.

Домла мударрис хотиржамъ ичкирига ухлагали киргандан кейин меҳмонхонанинг кўча томон даричасига кичкина бир кесак тиқ этиб тегар, гўё ешиниб ётқан Абдураҳмонча бу ишорадан сўнг туриб кийинар ва секингина даричани очар эшик очилгач кўчадан бир ўрим арқон тўп этиб меҳмонхонага ташланар эди. Абдураҳмонча арқоннинг бир учини меҳмонхонанинг дарчасига боғлаб, иккинчи учига ўзи осилиб кўчага тушар, арқонни бўй старлик қилиб яширгач, нарида кутиб ўлтурған "одам ўғриси" билан бирга базм ўрнига жўнар эди. У ерда бўлса беш-ўн "ошиқлар" Абдураҳмончани келиши он билиттифоқ "Бухоро амрлиги"га кўтариб, амру фармонига итоат қилурлар:

"Мулла Абдураҳмонжон, жаноби олий, гарам, аз сарашон гардам, балонгни олай!"<sup>2</sup> каби мадҳу саноларга кўмилган "Абдураҳмонча" ҳар бир ишни ўз тилагича юритар: май учун соқий бўлар, заифона кўйлак, лозим ва бошиға кокил кийиб ўн олти ёшар қиз суратига кирап; чойга лабини тегизиб "табаррук" қилар; дутор, танбурга йўргалаб ўюнчи бўлар; бошидағи кокил билан "ошиқлар"ни раҳмисиз қамчилаб ситамгар ва золимга айланар, энг охирда... Қисқаси бу бобдаги бор чорамиз учун ҳам ярарлиқ ҳолға келган ёки келтирилган эди.

<sup>1</sup> Амният — тинчлик, хотиржамлик

<sup>2</sup> Гарам, аз сарашон гардам, балонгни олии — айтланай, бошингча жоним физо, дардингини олай

Уч йилгача шу йўсун "ошиқлар" кўнглини овлаб келиб, бир кун сир очилиб қолди. Домла мударрис бу номуска чидалмай Абдураҳмонни ўз уйидан қувлади. Абдураҳмон тавба қилиб, домла мударрисдан лоақал мадрасада туришни сўради. Восита-васонит билан изн ҳосил қилиб, мадрасада истиқомат қила бошлади. Энди ишрат навбати мадраса жигар сўхталарага...<sup>1</sup> Икки йил чамаси мадраса афроди<sup>2</sup> орасида чандир каби саккиз тарафдан тишланиб юргандан кейин соқол-мурти чиқиб ҳусн сармояси заволга юз тутди ва кундан-кун "бозор қасодланиб" харидор озайди. Абдураҳмон уч йил бўйи савдогарлар орасида "ахлоқ тузаткан" бўлса, яна икки йил мадрасада туриб шу тузалган ахлоқни "камолатка" эриштирди. Шунинг учун анвоъи эркалилкка, неча хил муқайифотка, ранг-баранг "иззат, ҳурматка" ўрганган кўнгли бу харидорсизлик балосига туз сепкан ярадек ачир эди. Кўбни кўрган бу кичик бош баъзи уят найрангларга ҳам уриниб кўрар, масалан "вақтсиз чиққан" соқол-муртларини мўйчинак билан териб, ҳар кун ўн қайта ойнага қарап, янги харидор топиш мақсадида кун сайин бозор-растада, кўй-гузарлар сайрига чиқар эди...

Маълумдирким, дўндиқчалар аввало оқчаси кўб, бел оғриги кўрмаган бойларга насиб бўлурлар. Улар зерикеб ташлағач, ўрта хол "ташна"лар домига тушарлар. Соқол-мурт чиқиб давангилтиқдан<sup>3</sup> хабар келгач, учунчи табақа, яъни бўйни йўғон, гўлабурлар истифодасига кечарлар. Шунга ўхшаш бизнинг Абдураҳмон ҳам мўйчинак ушлаган даврида шу учунчи табақа — чойхонанишин, тавкарғир<sup>4</sup> ва бобойи банглар орасидан ўзига замин топди. Унинг бу учунчи давридаги аҳволини ёзишга қалам маъзурдир. Шу йўсун бу кейинги табақа орасида ҳам уч йил чамаси иш кўргач, ажойиб бир дунёдийда, мисли озшалоқ, ҳамма шароитлари билан мадрасалик бир безори ва чапан ҳолда баччалик даври билан видоълашди. Чунки, башара нонга чумоли ёпишқандек соқол-мурт билан тўлиб, мўйчинакка сўз берарлик бўлмади.

<sup>1</sup> Жигар сўхта — ошиқи бекарор

<sup>2</sup> Афрод — шахслар, кишилар, кимсалар.

<sup>3</sup> Давангиллик — ўсмирлик даври.

<sup>4</sup> Тавкарғир — қиморда ютуқдан чўтал оловччи.

## 20. ҲУШЁРЛИҚ

Ҳозир Абдураҳмон ўзининг яқин мозийсида усти ширнига беланган от тезакдан бошқа бир нарса кўрмаганидек, истиқболида ҳам эпақалиқ бир ҳол тасаввур қилолмас эди. Бир неча ойлар ниҳоятда руҳсиз, кайфсиз ва дарсига ҳам ҳавсаласиз давом этиб юрди. Гёё бу кунларда бениҳоят ичкулукдан сўнг бош оғриғи даврини кечириб кутилмаганда жонланиб кетди. Яъни "Ақоид"нинг шарҳига яхши тушуниш учун беш бармогини оғзиға тиққандек енг шимарди.

Юқоридаги руҳ тушиш даврида ул мозийсидағи каби эркалиқ, амру фармон ва шуҳрат учун қайғирған, кўб бош оғритиб эндиғи шуҳратни мўйчинак истеъмоли орқалию эмас, балки ақоид, шарҳ ва ҳавоший<sup>1</sup> воситасида топмоқчи бўлған, яъни фарди гоясиға диний олимлиқ либосини кийдириш фикрига келган эди<sup>2</sup>. Беш йил "гоя" учун қаттиғ берилиб, рутубатлик ҳужрада захлаб, саломатлиги учун умр бўйи аримайдирған ориғлиқ, рангизилик ортдириб йигирма саккиз ёшида "хатми кутуб"<sup>3</sup> қилишга муваффақ бўлди. Беш йиллиқ ўзгаришдан сўнг домла мударрис Абдураҳмоннинг эски гуноҳларини кечирған эди. Ўз ёнидан бир мунча сарф этиб, Абдураҳмон учун хатм тўйи қилиб берди.

Мулла Абдураҳмон Қўйкон сафарига ҳозирланар эди. Кўнгли Қўйконда ўзини кутиб турған уламолиқ шуҳратига; муфтилик, қози ва аъламлик мансабига ошиқинар эди. Унинг фикрича, Қўйкондағи қариндош-уруглар ҳам ёш олимнинг истиқболига ҳозирлик кўргандек эдилар.

Шу йўсун ошиқлар ёр васлига ошиққандек мулла Абдураҳмон ҳам ўз шаҳрига елиб-югуриб етди. Ул ўйлаганча истиқболга бутун Қўйкон кўчиб чиқмаса ҳам, қариндош-уругдан уч-тўрт киши, маҳалла кексаларидан иккита савобталаб чол дарбоза ёнидан кутиб олдилар. Бу соддача

<sup>1</sup> Ҳавоший—ҳошиялар, бирон китобнинг шарҳига берилган шарҳ.

<sup>2</sup> Фард гояси—Оллоҳнинг бирлигини англаш гоясидир. Юқоридаги жумлада мана шу гояни, яъни Оллоҳнинг яккаю ягоналиги гоясини диний илмлар билан исботлаши назарда тутилади.

<sup>3</sup> Хатми кутуб—китобларни ўқиб тутагиши.

истиқбол қилиниш Абдураҳмоининг Бухорода туриб қилған ширин хаёлиға биринчи зарба эди. Уйига бориб тушти. Бир неча кунгача фотиҳаҳонлик, ҳордиқ чиқариш маросимлари давом этди. Лекин бундан ҳам қаноатлана олмади, билъакс, жини отланди. Чунки зиёрат қилғучиларнинг аксариси мертуқ-сертуқ қавму қариндошлар, узоқ-яқин кўз таниш мадраса талабалари ва бир неча маҳалла имомлари бўлиб, ул куткан асосий моялар<sup>1</sup>, яъни мударрис, пешволар, муфти-уламолар ва бек-бекзодалар, бообрў ашроф ва боёнлар зиёратчилар орасида ақалли кўз оғриги учун ҳам кўринмадилар. Бу иккинчи зарба эди.

Зиёрат қилишга "қўли тегмаган" баъзилар узр мақомида ўз уйларига "максус зиёфат" билан чақиравлар, деб кутди. Бахтка қарши, бу умид ҳам бўш чиқди. Бир неча қариндошларнинг титраб-қахшаб қилған зиёфатлари билан "уйдан уйга ўтиб неъматлар ичида сузиб юриш" хаёли ҳам "бир хаёл" бўлиб қолди. Бу учунчи зарба эди.

Бир ой ўтмай қавму қариндошларнинг-да зиёфатлари ниҳоятига етиб, бева онасининг туппасига қаноат этишка мажбур бўлиб қолди. Бухорода ўйлағанча бирар мадрасанинг мударрислиги ёки бу топилмағанда мукаррирлигигигина эмас, ҳатто нариги маҳалланинг имоматини олиш ҳам қийин келди. Ўзидан икки маҳалла нарида бўлған ҳозирги масжид имоматига таъйин қилмоқчи бўлған эдилар, бунга ҳам мониш чиқди; мулла Абдураҳмон алҳол суннатни бажо келтирмаган, яъни, уйланмай, тарки суннат қилған кишининг имоматида нуқс бор, дейишиб, маҳалладаги баъзи тақводорлар эътиroz қилдилар. Шундан кейин бир неча ёр-дўстлар, тўй чиқимини ўзаро устларига олишиб, уни уйландириш фикрига туштилар. Бухородаги "хаёллар" зеру забар<sup>2</sup> бўлған ҳолда, мулла Абдураҳмон уйланиш шарти билан ҳалиги маҳалла имоматига ўтди. Ҳозир шунчалик паст ишқа ҳам бўйин эгиш зурурати бор эди...

Мулла Абдураҳмоннинг совчилари ибтадаан<sup>3</sup> Солиҳ маҳдумнинг қизи—Раъно учун бордилар. Чунки Раънонинг ҳусни бу даҳада машҳур, ундан кейин Абдураҳмоннинг ўзи Солиҳ маҳдумда савод ўқуб юрган фурсатда ёш Раъ-

<sup>1</sup> Моя—аслзода, асл одамлар.

<sup>2</sup> Зеру забар—остин-устин, вайрон.

<sup>3</sup> Ибтадаан—бошлаб, дастлаб.

нони күрган, учунчидан—ёш олим кекса домланинг қизига уйланса яна бир ҳусн бўлар эди. Айниқса, мулла Абдураҳмон ҳануз Раъонинг эрга берилмаганлиги хабарини эшиткач, бу тасодифни истиқболининг хайрлик фоллари сирасига киритди. Раъно бу ўн йил ичida яна етилган бўлса керак, деб тўйни кутмаёқ унинг хаёлий сиймосини қучоқлай бошлади. Мактабдор домлаларга қараганда ўз илм ва мартабасини аллақанча юқори қўйғанлиқдан, Солиҳ маҳдумнинг қулоқ қоқмай домод қилишига ишонар ва бу кунми, эртами, Раъони чиндан дар оғуш этиш учун ошиқар эди. Лекин тақдир бунда ҳам уни алдади. Совчилар Нигор ойимдан бўлмаған узрни олиб келдилар: "Қизлари ҳали ёш эмиш, энди ўн икки ёшқа кирган эмиш..."

Мулла Абдураҳмон хотинлар сўзига ишонмай Солиҳ маҳдумнинг ўз олдиға маҳалладан бир-иккита кексани совчи қилиб юборди. Бу совчилар ҳам яна аччиғроқ жавоб билан келдилар. "Солиҳ маҳдум қизини ўрдада мирзолик қиласидирған Анвар исмлик бир йигитка фотиҳа ўқуб қўйған экан. Фотиҳа қиласидирған, албатта сизга берар экан, кўб афсус чекти".

Бу жавобдан кейин Абдураҳмоннинг дами ичига тушиб, ўз тақдирiga лаънат ўқуди. Аммо кўнглида Раъони оладирған Анвар исмлик йигитка қарши бир кек туғилди. Бу жавоб чиндан тўғрими, найранги йўқми, деб ўрдада хизмат қиласидирған Анвар отлиқ мирзони сўраштириди. Тўғрилигини билиш устига ҳатто бу Анварни кимлигини ҳам хотирлади: ўзи Бухорога кетар олдида Солиҳ маҳдумнинг мактабида ўқуб юрган ўша ятим бола эмиш. Уч-тўрт йиллардан бери ўрдада мирзолик қилиб, неча тилло моҳона олар эмиш... Бу сўраштириб билишдан кейин Абдураҳмоннинг ичи яна ёниб кетди; Бухорода хатми кутуб қилиб келган бир "олим", ақалли бир маҳалла имоматига хархашасиз ўтальмасин-да, унинг ҳаром тукига арзимаган бир бесавод ятим ва баднажот исқирит ўрдадан фалон тилло вазифадор бўлсин ва шу турфайлда Раъно каби бир қизни ҳам ўзиники қилсин: бу айниқса киши чидарлик гап эмас эди...

Мулла Абдураҳмон бутун камолатини ишка қўйиб, имомат ва хатибликка шурув<sup>1</sup> қилди. Ҳар кун қавмлариға

<sup>1</sup> Шурув—бошлаш, ишга киришиш.

амри маъруф, наҳий анилмункар<sup>1</sup> айтиб, хусусан, ҳар ҳафта жумъа куни амри маъруфни кенгроқ доирада юритиб, кўбларнинг кўнглини эритишк мувваффақ ҳам бўлди. Изҳори фазл ниятида қилинган бу кўз бўяш кўбларнинг диққатини ўзига жалб этиб, ҳатто унинг амри маъруфини тинглаш учун жумъа кунлари чет маҳаллалардан оғиб, кишилар кела бошладилар. Бу мувваффақиятдан чатна-ёзган мулла Абдураҳмон кучангандан кучанар, айниқса орада хонга тегишлик ҳукуматдор беклардан кўриниб қолса, жаннат ва жаҳаннам устидаги масалани дарҳол хонга итоат, бекларга ҳурмат билан айрибошлаб олар эди. Ҳаммабоп бўлишга қарағанда, айниқса, хонбоп бўлишга тиришар эди. Унинг бу жонбозлиги бошқа тўғриларда бирар амалий натижага эришмаса ҳам, фақат бир важида ниҳоятда яхши самара берди. Унинг "дарёни фазли"га мафтун бўлған савдоғарлардан бири қиз қариндошини бериб ўзига куяв қилди. Яхши оиласа куяв бўлғанидек, шаҳардаги бошқа давлатмандлар билан ҳам алоқа боғлади ва уларнинг зиёфатлари воситасида баъзи мадрасаларнинг мударрислари, мукаррирлари билан ҳам танишди, қисқаси, бир оз бурни кўтарилаётди. Фақат энди ўрдаға яқинлаша олса... Аммо ҳануз бу мұяссар эмас-да.

Имомнинг кўнгли Анвар қаршисиға озғина кирлик эканини ўқуғучи юқоридан онглади. Унинг кўнглидаги шу озғина кир Анварнинг кўтарилишидан тинчсиз эди.

—Нодон Анвар ўрдадан қувланиш ерида сармуншийлик маснадига минмакчи.

Холис муҳокама кўпинча муҳокама бўлиб қоладир. Аммо гаразлиқ Фикр аксар сўзлагучини шарманда қиласадир. Шунга ўхшаш, мулла Абдураҳмон ҳам муҳокамасига озғина гараз аралаштириб, Сафар бўзчининг аччиғ ҳақоратига ҳадаф бўлди.

Шундай, ул Анварга кекли эди. Шунинг билан бирга Анварга қарши амалда бир иш қилиш кучидан ҳам маҳрум эди. Балки сиз "энди имом афанди уйланиб олибдир, Раънога эҳтиёжи қолмабдир, бас, шу ҳолда кек сақлашга қандай мантиқ бор?" дерсиз. Бу жуда содла муҳокама. Аслида бу кек Раъно билан бошланған бўлса ҳам, ҳозирда доирани бошқача ушлаган. Масалан дейсиз-

<sup>1</sup> Наҳий анилмункар—ёмонликдан қайтариш.

ми? Масалаи, Сафар бўзчи жуда билиб сўзлади: "Сиз шунча йил Бухорода ўқуб келиб, ниҳояти маҳаллага бир имом бўлдингиз, ул бўлса..."

Битишка маҳкум бўлған кекни мана шу "неча йил Бухорода ўқуб келганлиқ ёки Бухороға бормаса ҳам кимсан фалоний бўлғанлиқ" сақлаб турар эди. Агар сиз содда бўлсангиз, масалага Сафар бўзчи каби қараб "худой берса шундай" дерсиз, яна гапга тушумассиз. Абдураҳмон каби кишиларнинг табиъатига тушуниш албатта қийин ва тушумаган маъқул.

## 21. ЁРЛИФ БЕРИШ МАРОСИМИ

Ёрлигнинг кимнинг исмига ёзилғанлигини эрталабданоқ ўрдада ҳар ким сезиб қолди. Девонда эски одатича ўз ишини қилиб ўлтургучи Анварнинг ёнига дам-бадам мирзо ва гайри сарой ходимлари келиб, оҳистагина уни табрик этиб кетар эдилар. Анвар табрикларга илтифотсиз, оддий вазиятда, хонга эшитдирилиши зарур, атроф ҳокимларидан бу кун келган нома ва аризаларнинг муҳимини аҳамиятсизидан ажратиб, худайчига топшириш учун тайёрлар, баъзиларини биринчи хонада олдига давот-қалам қўйиб дафтар устида ўлтурган мирзо, муфтиларга ҳавола қиласар эди.

Сармунший хонасида Анвардан бошқа яна икки нома-навис бор эди. Бу иккиси қоғозга михлангандек гап-сўзсиз савағич қаламни қирр-қирр қоғоз устидан юритиб турар эдилар. Бу қовоқ-тумшуғи осилиб кетканларнинг биттаси Шаҳодат муфти бўлиб, номзади хонга манзур қилинғанлардан эди. Иккincinnиси шоир "Мадҳий"нинг сармунший бўлишини орзу қилған Калоншоҳ отлиғ яна бир пешқадам мирзо эди.

Биринчи хонадаги ўн бешка яқин мирзолар ҳам турлиси турли вазиятда: Султонали мирзога ўхшаганлар ер остидан ёнидағисига кулиб муомала қиласар ва баъзилар Шаҳодат муфти каби тўнни тескари кийиб олған кўринар эди. Анвар ёнидағиларнинг бу ўзгаришларидан сиқилғансумон ҳар бир аризани кўриб чиқиши ораси уларга қараб олар эди. Қаршисидаги иккиси гўё мум тишлиған каби сўзсиз эдилар.

—Бу кундан мени мазоҳ қилиб бошладилар,—деди ниҳоят Анвар,—гўё мен сармунший бўлар эмишман...

Шаҳодат муфти савағич қаламини давотка бир-икки тиқиб олғач, кўзи қоғозда экан, жавоб берди:

—Бўлсангиз ажаб эмас...

—Йўқ,—деди Анвар ариза буқлаб,—сиз қишлоқда бўлғанингиз сабабдан келгунингизча ишлар тўхтаб қолмасин деб вазифамдан ташқари ишларга уриндим. Эртадан бу вазифани ўзингиз олингиз, тақсир, мен бу мазоҳларга чидай олмайман.

Шаҳодат муфти қарийб бутун кўкрагини ёпқан баҳайбат мошгуруч соқолини қалам билан таради:

—Мазоҳ бўлмаса керак,—деди билинтирмайгина энти-киб,—алқол ёшсиз, муҳофазангиз бутун, зерикиш сизнинг учун айб бўлади... Биз энди бу ишни кўб қилиб зерикканмиз...

—Албатта,—деди муфтининг ёнидағи Калоншоҳ мирзо кўзини қоғоздан олмаған ҳолда,—мазоҳларга қулоқ солиш керак эмас.

Анвар табрикларни бир қадар ҳақиқатка яқин кўрап эди. Аммо уларга "мазоҳ" деб таъбир қилиши, ўзини маълум ўнгтайсизлиқдан қутқариш ва уларга ҳам енгиллик бериш учун эди. Бироқ Калоншоҳ мирзонинг кейинги сўзи яна уни эзив, очиқдан-очиқ бўлған бу адвокатка қарши қандай муқобала қилишдан ожиз келди. Шу ҳолда биринчи хонанинг даҳлизидан худайчи кўринди ва турған жойидан Анварни чақириди:

—Мирзо Анвар!

Анвар, худайчи учун ажратқан аризаларни қўлиға олиб ўрнидан турди:

—Аризалар тайёр... Ҳузурингизга чиқармоқчи бўлиб турған эдим<sup>1</sup>.

Худайчи бошини чайқади:

—Аризаларни ҳозирча қўйиб турингиз,—деб ерга ишорат қилди,—ўзингиз мен билан бирга келингиз.

—Қаёққа, тақсир?

—Ҳузури муборакка.

Мирзолар бир-бирларига қарашиб олдилар. Шаҳодат муфти бўзрайиб ҳамроҳига қаради. Анвар эса қўлида аризалари билан ҳайрат ичида эди. Даҳлизда уни кутиб турған худайчи яна танбеч қилди:

—Мен сизга айтаман, Анвар.

<sup>1</sup> Ариза ва бошқа гаплар хонга фақат худайчи томонидан тақдим қилинадир (муал).

Анвар, қўлидағини ўз жойига қўйиб худайчи орқасидан чиқди.

Хон тахтда эди. Ўнг тараф курсида Абдураҳмон офтобачи<sup>1</sup> ва сўлда шоир мулла Ниёз домла қўл боғлаб ўлтурап эдилар. Биринчи хонадан Худоёр ҳузурига кирадирган эшикнинг икки ёнида ойболта кўтарган икки жаллод сурат каби қотқанлар, улар қаторида хон улуглари—аъён ва сарой беклари чизилишиб ўлтурғанлар эди.

Худайчи "ҳузури муборакка" кириб таъзим қилди...

—Чақирдингма?—деди хон.

—Тақсир.

—Изн берамиз.

Худайчи қуллиқ қилған кўйи орқаси билан юриб, биринчи хонанинг даҳлизига келди ва даҳлизда кутиб турған Анварни "Ҳузури муборак" сари йўлға солди.

Анвар "хузури муборак"нинг эшигига тўхтаб, таъзим адо қилди ва унинг ёнидагиларга ҳам ярим таъзим ишорасини берди.

—Ишларинг яқшима, мирза?—деб сўради хон.

—Дуолари баракасида, қиблагоҳ,—деди Анвар.

Хон мулла Ниёз домлага қаради:

—Бу жигит бизнинг мирзалар орасида ўбдан кўринади,—деди.

Домла Ниёз ўрнидан қўзғалиб олди.

—Файзи шаҳаншоҳий.

—Мен бу жигитни мирзабаши қилмақчи бўлдим,—деди хон ва тизаси тегидан бир қоғоз олиб, домла Ниёзга узатти,—ўқунғ, домла.

Домла Ниёз ўрнидан туриб, қоғозни олиб ўпди, Абдураҳмон офтобачи ва унга эргашиб биринчи хонадаги аъёнлар баробар ўрунларидан туришдилар.

Домла Ниёз турған кўйи ёрлиғни ўқуди:

"Ба исми субҳонаҳу. Амруллоҳи фаризатун ва амруно вобиж<sup>2</sup>. Бизким Фарғона мамлакатининг хоқони султон ибни султон, аъни Сайд Худоёрхон сўзимиз: Жулуси солисамизнинг<sup>3</sup> учунчи санаси мутобиқи<sup>4</sup> 1287-нчи ҳиж-

<sup>1</sup> *Машҳур офтобачи*—Мусулмонқулнинг ўғли (*муал*).

<sup>2</sup> *Оллоҳнинг амри фарзидир, бизнинг амримиз вожибdir.*

<sup>3</sup> *Жулуси солиса*—учунчи марта ўлтуриш (*tahxtga*).

<sup>4</sup> *Мутобиқ*—мувоғиқ, уйгун.

рия<sup>1</sup> моҳи сафарнинг 25-нчиси<sup>2</sup>, ушбу ёрлигимизни бердик хўқандлик мирзо Анварғаким, мазкур мулло мирзо Анвар бинни Салимбой шаръи шариф узра устивор туруб, амримизга инқиёд<sup>3</sup> этиб девонбеги унвон дигар садри муншийлик умури<sup>4</sup> вазойифаларимизни кама янбаги<sup>5</sup> адо қилғай деб. Адойи ҳадама<sup>6</sup> асноси биз амири вазифа мутлақальинон<sup>7</sup> дорус-салтананинг<sup>8</sup> ҳаққи шаръийсига ҳиёнат қилишдин ижтиоб<sup>9</sup> адолатимиз ойинасини даноат<sup>10</sup> губороти бирлан ҳалалдор айлашдин парҳез, арзи доди фуқаромиз суръати истимоид<sup>11</sup> иҳмол<sup>12</sup> ва сустлик кўрсатмай интишори<sup>13</sup> адолатимиз кўшишида субҳи шом машғул ва мабзул<sup>14</sup>, дикқат ва эътибори том қилғай деб ва яна мазкур исмига ёрлиғ мактуб бўлмиш итоатига афроди<sup>15</sup> девонхонамиз маъмурлар<sup>16</sup> деб, муҳри шоҳонамиз бирлан таъкид ва тақрир<sup>17</sup> этдик".

Домла Ниёз ёрлигни тугатиб, қоғозни манглайига кўтарди ва икки қўллаб Худоёрға узатди.

Худоёр ёрлигни олиб қаршида бош букиб турған Анварга ишорат қилди. Анвар югуриб келиб, ёрлигни олиб ўпти ва уни салласига санчиб, орқаси билан юриб, илгариги ўрнига бориб тўхтади.

1 Мелодий ҳисоб билан 1872 йил.

2 *Моҳи сафар*—сафар ойи, қамария йил ҳисобида иккинчи ой номи.

3 *Инқиёд*—бўйсунниш.

4 *Умур*—ишлар.

5 *Кама янбаги*—талаф даражасида, кўнгилдагидек.

6 *Адойи ҳадама*—хизматларни бажариш.

7 *Мутлақальинон*—ўз-ўзига мустақил.

8 *Дорус-салтана*—мамлакат.

9 *Ижтиоб*—четланиш.

10 *Даноат*—паскашлиқ, тубаишлиқ.

11 *Истимоӣ*—эшитиш, қулоқ солиш, тинглаш.

12 *Иҳмол*—эътиборсилиқ.

13 *Интишор*—ёйилиш, тарқалиш.

14 *Мабзул*—багишламоқ.

15 *Афрод*—одамлар, кишилар.

16 *Маъмур*—амр қилинган.

17 *Тақрир*—қарор.

Домла Ниёз Анвар тарафидан дуога қўл очти:

—Давлати шаҳаншоҳи рўз-барўз афзун, душманони амир-ал-мўъминини сарнигун бошад. Оллоҳи таоло сояи зиллаллаҳиро, аз сари раиятон кам накунад...

Худовандо, бигардоний балоро,  
Зи оғатқо, нигаҳ дорий ту моро.  
Ба ҳаққи ҳарду гисёй Мұҳаммад,  
Забун гардон забардастони моро<sup>1</sup>

Дуо асноси айниқса биринчи хонадаги аъённинг йиги ва риққат оҳанглик "омин, омин" садолари "ҳузури муборак"ни титратди. Дуодан кейин худайчи икки тўн келтириб, кимхобни домла Ниёзга ва қора баҳмалдан тикилган мирзобошилиқ хильятини Анварга кийдирди. Кимхобни кийиб олғач, мулла Ниёз "саховатда Ҳотамитойдан, адолатда Нӯширавони одилдан" ортиғроқ ул жанобнинг ҳаққига яна янги дуо ва санолар тўқуди, гўё "амиралмўъминин"ни кўмди ва ўзи ҳам қайнади. Бундан сўнг маросим итномига<sup>3</sup> стиб, Анвар секин-секин орқаси билан юриб биринчи хонага ва ундаги аъённинг табрикларига кўмилиб, даҳлизга чиқди.

Анвар девонхона саҳнига етканда ичкаридаги каттадан кичик мирзо, муншийлар янги бошлиқларини муборакбод қилғали ўрунларидан қўзғалдилар. Ҳозир баъзиларининг устида бояги "онглашилмовчилиқлар" гўё бўлмагандек, ҳатто мулла Шаҳодат муфти ҳам ҳеч нарсани кўрмагандек, ўз умрида биринчи мартаба Анварнинг ҳурматига ўрнидан турди.

—Муборак, муборак! Боракалло, мирзо Анвар!—деди.

Баъзи муншийлардаги ярим соатлик бу ўзгаришдан тажжуб қилинмасинким, бунинг сабаби оддий ва очиқдир. Сармунший—демак, агарчи соқоли қўксини тутқан Шаҳодат муфти кабиларнинг бўлса ҳам хўжасидир. Шу соатдан бошлаб уларнинг тақдиди шу бир кишининг қўлидадир.

Анвар самимий ва риё аралаш табриклардан анча ўнгтайсизланган эди. Бошидаги ёрлиғни қўлиға олиб, ўз-

<sup>1</sup> Шаҳаншоҳнинг давлати кун сайин кўпайиб, амиралмўъмининнинг душманлари йўқ бўлсин. Оллоҳи таоло худо соясини фуҳаро бошидан кам қилмасин.

<sup>2</sup> Эй худо, сен балоларни қайтаргучидирсан, Офатлардан бизни сақлагучидирсан.

Мұҳаммаднинг икки кокили ҳурматига, Бизга голиб келгучиларни забун қил (муал.).

<sup>3</sup> Итмолом—тамомлаш, туталлаш.

ўзидан таажжубланғаннамо атрофидаги мирзоларға қара-ди:

—Жанобнинг амрлари билан,—деди Анвар уларга хито-бан,—энг оғир ва жавобгарлик бир хизматни ўз устимга олишқа мажбур бўлдим. Бу мажбуриятим ўзимга зътимод қилғанимдан эмас, балки сизнингдек оталарим, оғаларимга такягоҳ деб ишонғанимдандир. Ўйлайманким, бундай маж-буриятда қолған бир уканғизни албатта ерга қаратмассизлар ва ундан марҳаматларингизни аямассизлар... Мен сизлар-нинг сояларингизда тарбияландим, менга ўз шогирдларин-гиздек муомалада бўлиб келдингизлар. Бу кун мен расман сизларга бошлиқ бўлиш мажбуриятида қолған эканман, яна ҳеч аҳамияти йўқдир. Мақсад: мундан кейин ҳам менга кечаги Анвар каби такаллуфсиз муомалада бўлишларингиз ва ҳурматлар билан мени ранжитмасликларингиздир. Чунки содда муомала яқинлиқ ва меҳрибонлиқ белгусидир.

—Бу кунгача биз сизни марҳум мулла Муҳаммад Ра-жаббекнинг шогирди бўлғанлиғингиз учун эҳтиром қилма-диқ,—деди жавобан Султонали мирзо,—балки сизнинг ис-теъдодингизни ҳурмат қилдиқ. Мундан сўнг ҳам бош ми-рзолигингизни эмас, мирзо Анварлиғингизни эҳтиrim қилармиз.

Мулла Шаҳодат муфти ср остидан Султоналига хўмрайиб қаради ва нос отиб ўз жойига бориб ўлтурди.

—Сиз ҳамиша мени муболағангиз билан уялтирасиз, мулла Султонали ака,—деди Анвар.—Агар менга ҳурмат лозим бўлса, муболаға билан эмас, яна такрор айтаман, бир қариндошингиз қаторида такаллуфсиз муомала қилиш билан бўлсин.

Фотиҳадан сўнг ҳар ким ўз ишига ўлтурди. Анвар ҳам баҳмал тўнни еша бошлаган эди, ёнига Султонали мирзо келди:

—Агвар, сиз уйга борсангиз яхши эди.

—Нима учун?

—Ёрлиғ олганингизни хабар қилиш учун шаҳарга ҳозир жарчи чиқар. Уйингизга сизни муборакбод қилғали кишилар келса...

—Аввало меним уйим йўқ. Ундан кейин мени мубо-ракбод қиласидирган танишларим ҳам йўқ,—деди Анвар қўл силтаб,—бундан хотиржамъ бўлингиз.

—Ёшлиқ қиласиз, Анвар.

Анвар жавоб бериш ўрнига кулимсираб қўйди ва жойига ўлтуриб, аризалар кўра бошлади.

## 22. АДРАС ТҮН ВА ИССИФ НОН "ФОЖИЙАСИ"

Ерлиг олишнинг иккинчи соатларида бутун шаҳарга бу хабар тарқалиб кетди. Ўрда жарчиси бозор ва уруниш жойларда тўхтаб:

—Айюҳаннос! Билмаган билсин—эшитмаган эшитсан:

Вақтики, ажал паймонаси тўлди,  
Мунший мулла Мұхаммад Ражаббек ўлди!

Фазл богида очилган бир гул,  
Яъни гул шохига қўнган булбул.

Ба номи мулла мирзо Анвар,  
Камолига мусалламдир<sup>1</sup> аксар.

Хузури муборакдан олиб ёрлиг,  
Майдони қаламкашлиқда қилур сухандонлиг.

Ҳар кимсанингким баҳти кулса,  
Шохига жону дил ила хизмат қилса.

Лутфу шоҳонага сазовор бўлгай,  
Атрофи зару зевар ила тўлгай!..

маизумаси билан жар солиб юрар эди.

Кечаги хабарларга қулги ва мазоҳ тариқасида қараған шаҳар уламо ва ашрофлари бу кунги ҳақиқат олдидা ҳар замон ёқа ушлаб: "Тавба, бу қандай бемазалик? Бир беному нишонга бунча илтифот!" дер эдилар. Шаҳарнинг аксарият қисми бўлған камбагал-косиблар бу масала устида бир хилдороқ фикр қилиб "ким бўлса ҳам ўзи инсофлик бўлсин, нима дединг-а, Мамарайим?" каби содда жумла билан ўз орзуларининг нимада эканини гавдалантирас, аммо Анварга иши тушиб, унинг шафқатини кўрган Сафар бўзчи кабилар бу хабардан жуда ҳам хурсанд: "Қилмишидан топти бу йигит, бўғани жуда маъқул" деб, янги мирзобошининг таърифини қиласар эдилар.

Махдум бу хабарни илгаридан кутиб турган бўлса ҳам яна шошиб қолди. Сўйинчига келган йигитни тўхтатиб, қўйиб, дарҳол икки болани меҳмонхонани супуриб жой

<sup>1</sup> Мусаллам—тан бермоқ, қойил бўлмоқ.

солишка буюрди ва бошқа болаларни ёппа озод қўйиб юборди. Алпанғ-талпанғ ичкарига кириб, ўқугучи қизлар ичидағи Нигор ойимни ўз ёнига чақирди:

—Ҳай,—деди,—Анварингдан киши келди, сандигингни оч-чи!

Нигор ойим маҳдумнинг шошиб айткан бу сўзига тушунмади.

—Анвардан нима учун киши келади, сандиқни нега очай?

—Ҳай, аҳмақсан,—деди маҳдум энтикиб,—Анвар ёрлиғ олған, сўйинчига йигит келди; сандиқни очиб, шунга бир нарса бериб юборайлиқ, дейман, тез бўл!

Нигор ойим ҳам шошилинқиради, уйга кириб, сандиқнинг калидини тополмай тўрт томонни излар, маҳдум даҳлиздан туриб уни койир эди. Калид топила бермагач, маҳдумнинг тоқати тугади, чиқиб қизлар ичидан Раънони чақирди.

—Топдим, топдим!—деди Нигор ойим.

Маҳдум уйга қайтиб кирди. Нигор ойим сандиқни очиб сўради:

—Қандай тўндан олай?

—Бўздан ол, бўздан.

Шу вақт Раъно ҳам уйга кирди. Маҳдум қизига қараб кулди:

—Бахтинг-да, қизим,—деди,—Анвар аканг сармунший бўлибдир.

Раъно кулимсираб четка қаради:

—Мени нега чақирған эдингиз?

—Сандиқнинг калидини биласанми, деб чақирған эдим, калид топилди.

Нигор ойим бир бўз тўнни олиб, эрига кўрсатти:

—Шуниси бўладими?

—Ҳа бўлади, ташла.

Нигор ойим бўз тўнни текшириб қаради:

—Ўрдадан келган кишига шу тўнни бериб бўлармикин?

Раъно ҳам бўз тўнга ўтироz қилди:

—Бериб бўлмайди, уят.

Маҳдум ўйлаб қолди:

—Бўлмаса,—деди иккиланиб,—жўнроқ адрасдан олчи,—Нигор ойим бир адрас тўн олиб маҳдумнинг қўлига берди. Маҳдум тўнни ёруққа солиб кўрди:

—Йўқ, адрас ҳайф, Раъно,—деди тўнни таҳига солиб,—ҳалиги бўзни беравур.

—Бўз тўн бергандан, бермаган яхши,—деди аччиғланиб Раъно,—арзимаган. нарса учун Анвар акамни уялтирасизми?

Раънонинг ёнига Нигор ойим ҳам қўшулди:

—Киши уялгулиқ бўлмасин, Раъно.

—Ҳайф-да, ҳайф,—деди маҳдум, адрес тўнни салмоғлаб кўриб. Бояғи шошилиш ҳолати ҳозир йўқ, аммо юзида ачиниш вазияти бор эди.—Увол-да, увол, қизим, ипаги жуда қуюқ экан.

—Ипаги қуюқ бўлса, ҳеч нарса қилмас,—деди асабий-ланниб Раъно.—Кишининг иззати-нафси ундан ҳам қуюқ.

—Хайр, хайр,—деди маҳдум, адрес тўн билан видоълашқандек.—Сен қизларингни озод қўй, Нигор, дастурхон тайёрлаб, чой қайнат. Фотиҳага одамлар келса керак. Сен Раъно, соchlарингни ювиб сал одамшаванда бўлиб юрсанг бўлмайдими, қизим?

Маҳдум шу сўзни айтиб чиқди. Раъно маҳдумнинг орқасидан нима учундир кулиб юборди. Нигор ойим югуриб эрининг орқасидан чиқди:

—Ҳай, Раъно!—деди ҳавлида кетиб борған маҳдумга,—нонларимизнинг суви қочқан, ҳамир қилишга вақт оз, бозордан иссиф нон олдирасизми?

Бу гап маҳдумга адрес тўннинг алами устидан туз сепкан таъсирини берди.

Ҳавли ўртасида бош қашиниб қолди ва кўзини қисиб, хотинига қаради:

—Жуда қаттиғми?—деб сўради.

—Жуда қаттиғ, ҳатто ушатишқа ҳам қўлнинг кучи етmas.

Жавоб яна фалокатлироқ эди. "Хўб, нон олдирман" дейишка ҳам маҳдумнинг мажоли қолмаган ҳолда бошини қўйи солиб, жавобсиз ташқарига жўнади. Меҳмонхона саҳнида кутиб ўлтурган йигитка ўз қўли билан адрес тўнни кийдирди. Йигит дарбозадан чиққунча ҳам маҳдумнинг кўзи "ҳайф кеткан" адрес тўнда, ҳатто ундан Анварнинг келаёткан хабарини сўрашни ҳам унуктан эди. Ҳавли супурғучи бола сув сепмай чангитиб юборгани учун уни "аблаҳ, кучук!" деб койиди. Меҳмонхонада кўрпача ёзиб турган боланинг ёнига кириб, кўмаклашди ва боланинг уқувсизлиғидан ранжиб, буни ҳам бирмунча ачитиб олди.

—Сеи чопиб гузарга чиқ,—деди болага, жой солиниб бўлғандан кейин.—Катта толнинг тегида Совур новвойнинг дўкони бор. "Маҳдум домлаға йигирма дона нон керак экан. Нархи қанчадан?" деб даррав сўраб кел. "Маҳдум домлаға" дегин, "арzon қилиб айтар эмишсиз, пули

нақд эмиш" дегин... "Янги мирзобошининг ўрдадан меҳмонлари келар экан" дегин... Югур!

Болани нарх билишка жўнатиб, ҳавлига чиқди. Ҳавлидаги бола сувни кўб сепиб, ерни лой қилиб юборған эди, яна койиди ва дарбоза олди—кўчага ҳам сув септириб, ичкари кирди.

—Қизларни озод қўйибсан, яхши,—деди маҳдум Нигор ойимға.—Биз-ку шу хабарни кутиб турған эдик. Шундай бўлғандан кейин, нон-понингни тўғрилаб турмайсанми; ун бўлса-ку бор, аблаҳ, қани менга уч-тўртга нонингдан олиб кўрсат-чи.

Раъно онасининг сўзи билан қутидан беш-олти дона нон олиб, дадасининг қўлиға берди. Дарҳақиқат, бир-бира га ўҳшамаган нонлар тарашадек қотиб қолған эдилар. Маҳдум уруниб кўриб биттасини ҳам синдиришга кучи етмади. Раъно, юзини четка ўгуриб, кулиб турар эди. Маҳдум урина-урина ниҳоят ўзи ҳам кулди.

—Зор қолгуринг жуда ҳам қотипти-да, кун ҳам иссиқда, Раъно?

Бу сўздан Раъно баттарроқ кулиб юборди. Нигор ойим ҳам кулимсиди:

—Ахир, ўзингиз кечагина мен хамир қилай десам койи-дингиз, —деди Нигор ойим.—Биз-ку майли, куни бўйи ишлаб келган Анварга жабр. Шунчалик рўзғор қилиб, лоақал юмшоғроқ нон едирмасак... Киши жуда ҳам уялади.

—Мен иссиқ нонга бола юбордим,—деди маҳдум қаттиғ нонларни Раънога бериб.—Анварга жабр бўладир, деб ўйласанг мундан кейин ўзига лойиқ, оз-оз нон ёпиб тур. Сен билан мен бўлсақ қаттиғ нонни ҳам ея берамиз: жаззаси чойга бўктириш-да.

Маҳдум айтмаса ҳам Нигор ойим Анвар билан Раънога яширинчи юмшоқ нон ёпиб берар, фақат бу кун ўша нондан бир-иккита қолған эди. Маҳдум энди нон сотиб олишни бўйнига олиб, ташқариға чиқди. Нарх билиб келган болага йигирма пул бериб, орқаси куймаганини олиш шарти билан нонга юборди.

Анварнинг "танишсизлиқ ва уйсизлиқ" фикрининг ак-сича фотиҳаҳонлар ҳам кўриниб қолдилар, иккинчи, учунчи дуркум фотиҳаҳонлар келгандан сўнг, маҳдум Анвар олдиға киши юбориб, уни чақиртириб келиш카 мажбур бўлди.

Шу кун кечкача шаҳарнинг ҳамма табақаларидан ҳам фотиҳаҳонлар келиб турдилар. Ҳатто Анварнинг нодон-

лигидан кулиб ёқа ушлаган уламолар, бой ва ашрофлар муборакбодчиларнинг аксариятини ташкил этар эдилар. Чунки бу кейинги табақа замонасозлиқ, мувосо<sup>1</sup> ва тадбир орқасида яшагучидирлар. Анвар ўзини табрик қилғучи уламо ва ашрофлар юзидан очиқ равишда риҷ, шайтанат ва тамаъ ўқур, камбағаллардан содда самимият кўрар эди.

## 23. КИТОБ СЎЗИ

Асрдан бир оз илгарироқ эди. Махдум дарбоза ёнида муборакбодчи мударрислардан бирини икки букланиб таъзим қилған ҳолда узатар эди. Ҳазрати мударрис хайрлашқан жойида яна тўхтаб томоқ қириб олди.

—Ҳай, мулла Солиҳ, яна бир гапни саҳв қилибман, —деди ҳазрати мударрис. Солиҳ маҳдум югуриб ҳазратнинг ёнига келди.—Мирзога айтишни эп кўрмадим; масалан, ривоят ва ҳоказо масалаларга ҳожат тушса, биздан бегона қилмасин... Жанобингиз шуни ҳам таъйинлаб қўясиз.

—Хўб, тақсир, хўб.

—Фаромуш қилмассиз, албатта?

—Хотиржамъ тақсир.

Маҳдум уламо, амалдор ва ғайрилардан шунинг каби сипоришиларни тўрт-беш соатдан бери қабул қила-қила жуда мияси суюлган эди. Ҳозирги илтимосни ҳам ўшалар қаторида бўйнига олиб, ҳазрат мударрисни жўнатди.

Нари-бери бўз салласини бошига чулғаб, сарпойчан кафшини шап-шуб босиб, дарбозадан ичкарига кириб бормоқда бўлған Сафар бўзчини маҳдум тўхтатди:

—Хўш, хўш, ука,—деди Сафар бўзчиға.—Йўл бўлсин сизга?

Чунки маҳдум муборакбодчи камбағаллар ўёқга турсин, ҳатто уламо ва бойлардан ҳам ҳозир зериккан эди. Бу зерикишга иккинчи мартаба нон олдиришнинг ҳам алоқаси бор эди. Сафар бўзчи остона ёнидан маҳдумга қийшайиб қаради:

—Лаббай, тақсир?—деди.

—Йўл бўлсин сизга?

—Мирза Анвар инимга худо мартаба ато қилған эмиш деб эшийтдим,—деди Сафар бўзчи,—пиirimни зиёрат қилай, деб келяппан.

<sup>1</sup> Мувосо—муроса қилиш, келишиш.

—Келганингиз маъқул, илло ўзи ҳозир жуда чарчаб қолғанда, четдан дуо қилиб турсангиз ҳам кифоя, ука.

Сафар бўзчи бошини қашиб, яна маҳдумнинг афтига қараб қўйди:

—Зиёрат қилиб чиқа бераман, тақсир. Бошқа гап йўқ, тақсир.

Маҳдум Сафар бўзчининг илгарисига ўтти:

—Майлику, ука, ранжитасиз-да.

—Садагаси кетай мирзанинг,—деди Сафар бўзчи маҳдумнинг қаторига бориб,—барака топқурнинг ўзи ранжийдирган йигит эмас, хоккор-да, тақсир, кўрсангиз биларсиз-ку, мен минан жуда қадрдон-да, тақсир.

Маҳдум асабийлашиброқ Сафар бўзчининг бетига қарди. Сафар бўзчи ҳам маҳдумга бир оз тикилиб тургач, илжайди.

—Кўрсангиз биларсиз, мен минан жуда қадрдон-да, тақсир,—деди яна ва маҳдумга илтифот қилмай, ичкарига юруй берди. Бир неча марта ба келиб Анварнинг меҳмонхонасига ўрганиб қолған, шунга биноан бу тўғрида маҳдумнинг ёрдамига муҳтож ҳам эмас эди.

Анвар меҳмонхонада Шаҳидбек ва яна бир саркарданамо билан сўзлашиб ўлтурап эди. Сафар бўзчини даҳлизда кўриб ўрнидан турди. Иккиси неча йиллик қадрдонлар каби самимий кўришилар. Сафар бўзчи кўзида ёши билан Анварни табрик қилди. Анвар унга ўз ёнидан жой кўрсатиб ўлтуришилар. Сафар бўзчининг фотиҳасига анови икки бек аранг қўйтириб қўйдилар.

—Закотчидан тинчмисиз?—деб Анвар кулди.

—Худойға шукур, давлатингизда, мирзам.

—Бозорлар яхшими?

—Бир навъи... ҳарчи тириклик тебраниб турари, ука.

Сафар бўзчининг бояғи ҳаракатидан аччиғланниб ташқарида қолған маҳдумнинг кимни ҳам бўлса ичкарига таклиф қилған товши эшитилди. Сафар билан Анварнинг сўзлари бўлинишкага мажбур бўлди.

Мулла Абдураҳмон Анвар билан ёнма-ён ўлтурғучи "дўсти" Сафар бўзчини меҳмонхонанинг даҳлизига киришидаёқ кўриб қолди ва сариқ туси бўзариб кеткан ҳолда ичкарига қадам узди. Сафар бўзчининг ҳурмати учун лоақал қимир этмаган беклар ҳам мулла Абдураҳмоннинг истиқболига қўзғалишилар. Маҳдум мулла Абдураҳмон билан Анварни бир-бирларига танишдириди.

—Балки хотирларсиз, мирзо Анвар,—деди маҳдум,—сиз маним қўлимға келган йилларингизда мулла Абдураҳмон акангиз ҳам бизнинг мактабда ўқур эдилар.

—Хотиримда. Ҳуб саломатмилар, тақсир?

—Алҳамдулилоҳ,—деди Абдураҳмон ва ер остидан Сафар бўзчига қараб қўйди,—марталабари муборак бўлсин.

—Қутлуғ, тақсир, қани, марҳамат қиласинлар.

Ўлтуришдилар, фотиҳадан сўнг яна бир даража аҳвол сўрашилди. Ҳозирги тасодуф жуда қизиқ тушкан эди. Мулла Абдураҳмон бу учрашишдан ниҳоятда ўнг-гайсизланған. Анварни табрик этиш учун оғиз очишига қодир эмас ва ҳар замон қаршисидаги "бемаъни"га қараб қўяр эди. Шу ҳолда бир неча фурсат сўзсиз ўлтуришкандан кейин, Анвар кўбчиликни дастурхонга тақлиф қилди ва Шаҳидбек мулла Абдураҳмонни сўзга тортиди.

—Нима лавозимотдалар, тақсирим?

—Имоматда, —деди Абдураҳмон ва ер тегидан Анварга кўз юбориб олди,—Бухордан келганимиздан бери имоматдамиз... Мадрасада ҳам бирмунча мукаррилигимиз бор...

—Кўб яхши экан; имоматлари қайси маҳаллада?

—Бизнинг маҳаллада,—деди сўзга аралашиб Сафар бўзчи,—тақсиримнинг илмлари жуда дарё, ўzlари Бухора хатим китоб қилғанлар.

Шаҳидбек гўё кўнгил учун яна:

—Кўб яхши экан,—деди.

—Мулла Абдураҳмоннинг илми дарҳақиқат яхши бўлған деб эшитаман,—деди маҳдум.

Сафар бўзчи мулла Абдураҳмоннинг тилагига қарши яна сўзлаб кетди:

—Яхшилиқа келганда—яхши, бироқ тақсиримнинг толеълари бир оз пастлик қилиб туради. Бўлмаса мударрислик, муфтилик, мирзолик—буларнинг барисига ҳам тақсирим етук... Фақат толеъ паст-да, бек бобо. Мана энди мирзам оталиқ қилиб, ўрдадан бирар иш топиб берсалар, тақсиримга ҳам офтов тегса ажаб эмас. Ўзлари ҳам бир ҳафтадан бери мирзамнинг ҳақлариға дуода эдилар...а, тақсир, шундай эмасми?

Мулла Абдураҳмон Сафар бўзчининг қаршисида ҳозир ҳар бир разолатка ҳам бўйин эгар эди. Манглайидағи терини артиб бесаранжом аҳли мажлиска қараб чиқди ва гулдирагансумон:

—Шундай,—деб юборди.

Махдум Сафар бўзчини мулла Абдураҳмон тарафидан воситачиллик учун жўрттага келган, деб ўлади.

—Мулла Абдураҳмон ўзимизники,—деди махдум,—ал-батта мирзо Анвар қўлидан келган ёрдамини аямас.

—Албатта, мунший тариқасида ўрдага олинса ҳам бўлади,—деди утта<sup>1</sup> бек.

Анвар ваъда бериб қўйишни эп билмаганликдан, сўзсиз ўлтурап эди. Мулла Абдураҳмон ҳар замон манглай тери-ни артиб олар эди. Сафар бўзчи тунови кунги адабсиз-ликни тақсиримнинг кўнглидан чиқардим, деб мулла Аб-дураҳмоннинг кўзини учратишка ва озгина бўлса ҳам тақсиримдан миннатдорчилик олишга тиришар эди. Бир мунча вақт шу кўйи сўзсиз ўлтуришкандан кейин беклар фотиҳа ўқуб қўзғалмоқчи бўлдилар. Сафар бўзчининг яна оғзини очиб юборищдан қўрқиб, ҳатто қимир этмай ўлтурган имом ҳам бекларнинг фотиҳасига қўшулишиб ўрнидан турди. Сафар бўзчи ҳам мирзонинг ҳақига дуо қилиб имомга эргашти. Чунки имом билан биргалашиб кетиш орзуси, шу баҳонада тунови кунги паст-баланд гапларни мулла Абдураҳмоннинг кўнглидан чиқариш ни-яти бор эди.

Анвар билан хайрлашиб, тўрт киши баробар кўчага чиқдилар. Ўттуз қадам чамаси бирга бориб, Шаҳидбек ўз ҳавлисига бурулди. Яна бир оз борғандан сўнг иккинчи бек ҳам бошқа кўчага кириб кетди. Мулла Абдураҳмон ҳам Сафарбой "дўсти" билан бирга юришни хоҳламади шекиллик тез-тез адим ташлаб ҳамроҳлик алоқасини уз-моқчи бўлди. Бунга қарши Сафар aka уч ҳатлаб бир босиб, Абдураҳмоннинг ёнидан чиқди. Бу ҳолдан яна имомнинг феъли айнаб, йўл устида бирдан тўхтади ва Сафарнинг афтига бир турли мушук қараши қилди:

—Нега тўхтадингиз, боравуринг.

Сафар бўзчи Абдураҳмоннинг тўхтағанидан хабарсиз икки-уч адим нарига ўткан эди:

—Биргалашиб борамиз-да, тақсир.

—Мен сиз билан юришни хоҳламайман, жўнанг, жўнанг!

Сафар бўзчи тушунолмай бир оз қараб қолди:

—Нега, тақсир?

<sup>1</sup> Утта—нариги, анови.

—Нега дейди-я, аҳмақ одам...

—Ўзларингизни айтишларингизга қарағанда, мусулмон киши учун кина сақлаш бир рўймолни ювиб қурутқанча экан,—деди Сафар бўзчи,—бизлар бўлсақ тўрт кундан бери шайтонни апичлаб юруймиз... Шуниси ҳам кифоя-да, тақсир.

—Астағфирулло,—деди имом,—сиз ўша куни маним устимга уч кунлик гап қилдингизми?

—Шайтоннинг ишида, тақсир,—деди Сафар,—ахир, яна маним айтканим бўлди-ку, мен бунга бир нарса деяпманми? Недир, кинани қўяйлиқ деяпман-да.

Мулла Абдураҳмон истиғфор айтиб йўлға тушти. Сафар бўзчи ҳам мулоимғина унинг ёнида қўл қовуштириб жўнади.

—Хўш, кинани ташлаған бўлсангиз,—деди йўлакай имом,—нега боя уларнинг олдида оғзингизға келганини ўтладингиз?

—Яхшилиқдан бошқа ҳеч гап айтмадим. Фақат илмингизни маҳтадим.

—Бошқа гап айтмадингизми?

—Нима дедим, ахир? Шунчалик илмлари бўлса ҳам толеълари озғина пастлик қилиб турадир, дедим. Бу тўғри гап эмасми, тақсир?

—Мен сизга мирзодан хизмат сўраб беринг, деб ваколат берган эмас эдим-ку.

—Ваколат-ку, йўқ... Ахир, токай илмингизни хор қилиб масжидда ётасиз... Ахир, биравни ука, биравни aka деб сиз ҳам тузукроқ ишка қатишинг-да, тақсир.

—Астағфирулло... Балки менга подшоҳлиқдан ҳам шу имомат яхшидир.

—Бэ-э-э, гўрими, тақсир,—деди Сафар бўзчи,—у гапни қўйинг, нафси ламр гап яхши. Шаҳардаги бирарта мударрис домлани ўшандақа мирзабоши кўтарсалар йўқ дерми?.. Вой-боёв, тақсир, сизга ҳам ўрдадаги бир мирзаликни берса, деб, "сизнинг ҳаққингизга тақсирим дуода бўлдилар", дедим-да. Маним холислигимни шундан ҳам пайқасангиз бўлар эди, ука.

—Астағфирулло,—деди яна имом,—дарҳақиқат, мен уни шундай, деб дуо қилғанмидим... Ёлғоннинг нима кераги бор?

—Тақсирим бўлсангиз ҳам ҳали ёшсиз-да,—деб кулди Сафар.—Башарти ростини сўзлаб "сизнинг мирзабоши бўлишингизни тақсирим кўралмаган эдилар" десам, хур-

санд бўлармидингиз, вах-хах-хах, хех-хех-хех... Йўқ, тақсир, ўзингиз ҳам Бухорода ўқуған бўлсангиз керак: китоблар икки жойда ёлғон айтишни маъқул деган эканлар; биттаси—эру хотиннинг орасида, иккинчиси—икки мўъминни битириш учун. Буни худо раҳмати домлам ўқуб берар эдилар. Шу гап қулогимда қолған экан, мен дуруғ<sup>1</sup> айткан бўлсам китоб сўзига амал қилдим-да, икки мўъминни битишириш учун сўзладим-да.

Мулла Абдураҳмон яна оғиз очолмади. Чунки Сафар бўзчи "китоб сўзи" билан уни енгиг қўйди. Маҳаллага келиб стдилар. Сафар бўзчи кинани тамоман кўнглидан ювиб ташлаған эди. Шомни мулла Абдураҳмон орқасида ўқуш учун масжидга кирди. Жиловхонадаги намоз кутиб ўлтурган қавмлар ичидан Самад бўқоқ, Шукур сўфилар ҳам кўринар эдилар. Сафарнинг имом билан бирга масжидга киришидан таажжубланган Самад бўқоқ уни туртиб сўради:

—Ярашдингларми?

—Кина деган рўймолни ювиб қуриктунча,—деди Сафар бўзчи,—янги мирзабошининг уйидан домла билан бирга фотиҳа ўқуб ксламиз. Ҳали эшитдингми, ўша маним мирзам ёрлиғ опти-я.

Самад бўқоқ индамай четка бурулиб кетди. Шукур сўфи шом намози учун такбир тушура бошлади.

## 24. ШОИРНИНГ СИРРИ

Ўн беш куннинг ичидаги маҳдумнинг меҳмонхонаси расмий бир маҳкамага айланаёзди. Ўрдаға ариза билан му- рожаат қиладирган ҳар ким, ҳатто расмий кишилар ҳам аввал маслаҳат сўраш учун Анварнинг ёнига келар эдилар. Кундузлари ўрда девонини бошқариш, эрталаб ва кечқурун ўз уйида хусусий кишиларни қабул қилиш, албатта, Анвар учун оғир эди. Аммо бу оғирлиқ бурундан сармунший бўлған кишининг устидаги қонуний вазифаси ҳисобланиб келганликдан кишиларни уйда қабул қилишга Анвар мажбур эди. Бу хусусда камбағалларнинг берадирган заҳматлари Анварга унча оғир тушмаса ҳам, беклар, уламо ва бойларники аксар чучмал ва машаққатли бўлар эди. Чунки камбағалнинг кенгаш сўраб келиши жуда

<sup>1</sup> Дуруғ—ёлғон.

муҳим ишлар устида, масалан: бир бекнинг қилған зулми устидан шикоят, жуда камбағал бўлғани учун солиқлардан дархонлиқ сўраш ва ҳоказо... Кейингилар эса, масалан: бир мударрис иккинчи мударрис устидан шикоят қилиб, бу тўғрида домла Ниёз Мұхаммад шоғовулбошининг қулогига андаккина тингиллатиб қўйишни сўпар; бир закотчи иккинчи бир закотчининг хиёнатидан "холисона" шикоят қилас, бир савдогар ўзининг жуда фақириғидан ҳасратланиб, закотдан озод қилинишини сўпар; агар закотдан қутқазиб юборса, Анварнинг "кўнглини тўлатиш"ка ҳозирлигини ҳам билдирап эди. Анвар бу кейинги илтиносчилардан гоҳ аччиғланиб, гоҳ қулар, ҳар ҳолда бир неча дақиқалиқ ваъдалар билан уларни жўнатқунча эси кетар эди.

Бу сўнгиларнинг ташрифлари Анварга қанча беҳузурлик берса, маҳдумга ўшанча магрурият ва лаззат бағишилар, ҳатто Анвар ўрдада бўлған кезларда ҳам уларни меҳмонхонага қабул қилиб, Анвар келгунча унга қанча сифоришлар ва аксар сифоришчиларнинг ўзларини тўплаб турар эди. Юқорида Сафар бўзчи билан воқиъ бўлғанидек, маҳдум арза ва кенгашка келгучи косиб ва тўни эскилар или чиқиша олмас, ўлгунча уларни ёмон кўриб, "мирзо бу кун келмайди, сиз билан гаплашишка фурсати йўқ, бемаъни бўлманг" каби гаплар билан камбағалларни эшикдан қайтаришға тиришар эди. Анварнинг бирарта камбағал билан "эзилишиб" ўлтурганини кўрса, ичидан аччиғланиб "куллушайъин яржиъу ило аслиҳи... паст ҳамиша пастлигини қиладир... Сут билан кирган—жон билан чиқар, мақоли кўб тўғри сўз" деб ўйлар ва энсаси қотиб, четка кетар эди.

Маҳдум шу кунгача Анвар билан Раъноларнинг тўйларини қилишфа шошмасдан келар эди. Аммо бунда бир қанча сабаблар бўлиб, жумладан—Анварнинг Раънога қаттиғ боғланғанини яхши сезганлиги ва шунинг орқасида Анвардан "хотиржамъ"лиги эди. Шошмаслиқнинг иккинчи, ҳам кучлик сабаби мумкин қадар тўйни узоққа чўзиб, шу воситада Анварни соғиши... чунки тўй қилиниб Раъно Анварга берилса, бу даромаднинг қатъиян кесилиш эҳтимоли бор эди.

Анвар бош муншийлик даражасини олғандан кейин маҳдум илгариги "сиёsat"ни яна давом этдириш ва этдири маслик тўғрисида иккияниб қолди. Зеро, Анвар ҳозир бутун шаҳарга донғ тортқан, шаҳарнинг уламоси, ашрофи,

бек ва бесбаччаси Анварни танийдир; Анварга мазкур олий табақаларнинг ҳар қайсиси ҳам ўз қизини бериб, қуяв қилишга тайёр. Бас, шу ҳолда яна маҳдум эски тадбир билан амал қиласа мумкинми?

Маҳдум ноилож сармунший бўлишни йигирманчи кунларида Нигор ойим билан кенгашиб, мирзо Султоналига мурожаат қилиш мажбуриятида қолди. Токи мирзо Султонали Анварнинг ризолигини олиб берсин.

Анвар кечқурун ўрдадан қайтишға ҳозирланар эди. Хон аъёнларга рухсат бериб ҳарамга кирган, ўрданинг кундузлик ходимлари тарқалишиб, фақат кеча бсклари, хон соқчилари—доимий ходимлар қолған эдилар. Энг кейинга қолиб Анвар билан Султонали мирзо ҳам ўрдадан чиқдилар. Уларниг орқасидан ўрда дарбозаси ёпилди.

Султонали мирзо Анварнинг ташқи аҳволи билан яхши таниш бўлса ҳам унинг ички сиррига воқиф эмас, чунки Анвар хусусий ҳаёти, айниқса, Раънога алоқасидан ҳеч кимга оғиз очмас эди. Анварнинг маҳдум ҳавлисида туришини жойсизликдан ва ёшлиқдан шунда ўсиб ўргангандан, деб юрган Султонали мирзо бу кун эрталаб ўз уйига келган маҳдумнинг сўзидан кейин бир оз ҳақиқатка тушунгандек бўлди. Айниқса маҳдумнинг ҳеч бир муқаддимасиз "Ожизамиз билан мирзо Анварнинг тўйларини қилмоқ ниятимиз бор эди. Шу тўғрида жанобингиз мирзо Анвардан тўйға урунишимиз учун бир калима жавоб олиб берсангиз" деб, тўғридан-тўғри фақат тўй вақтини белгилашни сўраши Султонали мирзога яна бошқа сирларни онглатқан эди.

Иккиси йўл бўйлаб сўзлашиб борар эдилар:

—Маним сўзимга кирсангиз албатта бир от олингиз,—деди Султонали мирзо,—айниқса, сизга энди пиёда юриш келишмайдир.

Анвар боягича яна кулди.

—От минишнинг нима ҳожати бор, модомики, тайёр оёғ отимиз бўлғанда...

—Маъқул-ку, мундан сўнг яхши эмас-да.

—Ҳозир яхши эмас экан,—деди Анвар,—мен бу хизматимдан тушкандан сўнг пиёда юриш яхши бўладими?

—Нега тушар экансиз... Кўб йиллар шу вазифала қоласиз.

Анвар кулиб қўйди:

—Лекин, манимча, бир йил ҳам қололмасман... Агар оғам бўлсангиз, худодан сўрангки, бўйнимга бирав бўхтон ортилмай, азл қилинайин.

—Бўлмаган васвасаларга тушасиз, Анвар.

—Шаҳодат муфтингизнинг афтига сира қарайсизми, шоирингизнинг пичингларини пайқайсизми? Агар шу жоноворлар мендан сармуншийликни тинчлик билан олсалар, ўзимни жуда ҳам бахтлик кишилардан санар эдим... Шунчалик зўр харидорлари турған бир замонда бу вазифани менга келиб тўхтағанига ҳануз ақлим бовар қилмайдир... Бу воқиға ё мени ўта баҳтиёриққа ёки фожиъ бир фалокатка олиб борар. Сиз айтканча васвасамга, ёхуд бошқа бир бадбинлигимга биноан кейинги эҳтимол...

—На Шаҳодат муфти ва на шоирнинг қўлидан бир пуллик иш келса мендан домангир бўла берингиз,—деди Султонали,—сизнинг сармунший бўлишингиз ҳар ҳолда бир ҳақиқат эди. Негаки, кўб йиллардан бери хиёнат, эъво билан кун кечириб етти ёшлиқ гўдакнинг ҳам назарида икки пуллик обрўси қолмаган муфтининг сиррини ёлгиз менгина эмас, бутун шаҳар, ҳатто хоннинг ўзи ҳам биладир. Бас, бу жиҳатдан унинг ёрлиг ололмаслиги аниқ эди. Домла Бурҳон маҳдумнинг бўлса, шоғовул домла билан оралари бузуқ; агар хон ёрлигни унинг исмига буюрганда ҳам шоғовул домла ёзмас эди. Мундан бошқа домла Бурҳоннинг лоқайдлиги, девонхонани ост-уст қилиши бўладирган савдо... Шоир "Мадҳий"нинг бўлса яна аҳволи маълум: хонни маҳташ, ўзига ёқмағанин ҳажв қилиш, хотинбозлиқ, баччабозлиқ билан овора бир бетаъйин. Мундан ташқари, "Мадҳий"нинг ёрлиғ ололмаслигига яна бир сабаб бор эдиким, бу сирни ўрдадан фақат биз бир неча кишилартина билар эдик...

—Хўш?

—Буни сўраманг-да, кулманг.

—Хўш, хўш?

Султонали мирзо кулди ва товшини секинлатиб деди:

—Шоир ҳарамдаги канизларнинг бири билан алоқа боғлаған экан...

—Хўш, ундан сўнг?

—Бу ҳолни сезган иккинчи бир каниз хонни бу алоқадан хабардор қиладир. Хон канизни ҳарамдан ҳайдаганидек, шоирни ҳам ҳузурига чорлаб, ўбдан оғизбўғзига, ҳатто энасининг ўсма-сурмасигача қолдирмайдир... Шоир аранг тавба қилиб қутиладир.

Анвар кулди:

—Шунинг учун унга ёрлиғ берилмади, дейсиз?

—Албатта. Шоирнинг эси бўлса бўйини бошоққа узатмай, саройдан ҳайдалмаганига ҳам шукур қилса бўлар

эди. Бинобарин, сизнинг хаёлларингиз тамоман ўрунсиз. Яхши, ҳозир кўнмасангиз ҳам пиёда юриб зерикканингиздан кейин от минишка мажбур бўларсиз. Шунинг учун буни қўйиб турайлиқ-да, отдан ҳам зарурроқ масалага ўтайлик, масалан, бошингизни икки қилиш учун, албатта вақт еткандир, деб ўйлайман?

—Қаёқдаги гапларни топасиз, Султонали ака.

—Ҳазили йўқ. Уйланиш сизга ҳам фарз, ҳам қарз. Бунга қолғанда, албатта бир узр кўрсаталмассиз.

Анвар кулимсиб қўйди:

—Уйланиши ҳам бекор бўлишгача тўхтатиб турсақ, дейман.

—Ана гап,—деди Султонали,—балки умр бўйи шу вазифада қолиб кетарсиз. Шу ҳолда бутун умр хотинсиз юриш, хах-хах...

—Ким бу вазифада умр бўйи қолған бўлсин.

—Қолғанлар кўб. Масалан, Муҳаммад Ражаббек марҳум; Муҳаммадалихон замонидан бери девон билан олишиб келар эди. Мен сизга жиддий айтаман: шаҳардан кимнинг қизини ёқтирангиз ҳам биз олиб беришка ҳаракат қиласиз.

—Раҳмат...

—Чиндан сўzlайман, Анвар.

Анвар ярим жиддий Султоналига қаради ва унинг ўзидан жавоб кутканини сезиб:

—Хўб, мен бу тўғрида домла билан кенгашиб, сизга жавоб берайин,—деди.

—Бу кун эрталаб домла бизникига келган эди,—деди Султонали жиддий турда,—домланинг сўз даромадига қарағанда, сизни ўзига куяв қилиш фикри борға ўхшайди. Сизнинг ризолигингиз биланми, йўқми, бунисини билалмадим...

Анвар қизаринди. Жавоб бериш ўрнига "натижа?" дегандек қилиб унга савол назари билан қаради.

—Домланинг гапига қарағанда, бошқа тарафлар биткан кўринди,—деди Султонали давом этиб,—фақат ул маним воситамда тўйни бошлаш учун сиздан изн олғали келган экан. Мен бу тўғрига сиздан жавоб олиб бермакчи бўлдим.

Анвар кулди. Аммо бу қулиш унинг бояғи кулгуларидан тамоман бошқа, яъни баҳтиёриқ кулгуси эди.

—Яхши,—деди Анвар ва ўн қадам чамаси сўzsиз борди.—Яхши, мен эртагача ўйлашиб, сизга жавобини бераман.

—Маъқул, агар бу кун домлаға учрашсам, жавобни эртага оламан деяйми?

—Албатта.

—Хайр, худонинг паноҳига, Анвар.

—Хўш, Султонали ака.

Иккиси ажралишдилар.

## 25. ҲАЁТ ШАМЬИ

Неча йиллар Анварнинг кўнглини машғул эткан бир муаммо ниҳоят орзуға мувофиқ ҳал қилингандек, яъни шубҳа ичидა қизарған муҳаббат гунчаси висол ҳабари билан очилаёзгандек ва қуруқ томоша билан кечкан унинг ой, йиллари, бу кун Раъно гулини искаш башоратига ноил бўлғандек эди. Дарҳақиқат, бунча йиллардан бери маҳдумнинг эшигида қолиши, опаси Нодиранинг: "Мен сени онамнинг уйига чароғчи бўларсан, деб сўйингган эдим. Ўз истиқболинг учун қайғирмай, бир кишини семиртириб юришинг ақлли йигитларнинг иши эмас, Анвар" каби таъналарига бўйин эгиши ва ҳатто шу ўйдан силжимаслик фикрида ўзи тиламаган вазифаларга ҳам уриниши яна шу башоратни олиш учун эмасмиди?

Истиқбол сўзини ҳар ким ҳар турлик тушунадир. Анвар ўз истиқболини ёлғиз муҳаббат орқалиқ кўтар эди. Ота-онасининг чарогини ёқиш учун аввало ўзига бир шамъи ҳаёт топмоқчи ва ўзи шамъсиз туриб ота-онаға чароғ ёқишини асло тасаввур қилолмас, яъни истиқбол Анварнинг фарди ҳаётида<sup>1</sup> ёлғиз муҳаббат эди.

Йигитлар ўз истиқболлари қайғусида янги бино, янги рўзгор тузийдирлар ва ҳатто дунёда хаёлий ҳам бўлмаган рафиқалари учун кийим тикдирадирлар... Анвар эрса аввало Раъно каби бир рафиқага эга бўлмоқчи ва шу воситада бошқа масалаларга қарамоқчи эди.

Анвар Султонали мирзога бояғи ваъдани бериб, бу ҳабар билан юраги шопиринған ҳолда уйга келди. Меҳмонхонада ўзини кутиб ўлтурғанлар билан нари-бери ишни битириб, ичкари кирди. Унинг бу кириши ҳар кундагидек киши билмас, тасодуфий эмас, Раъонони кўришдан бошқа яна маълум бир маънони Раънодан ўқуш учун эди.

Раъно айвоннинг устунинг суюниб китоб ўқур, Ниғор ойим ўчоқ бошида овқат пишириш билан машғул эди.

<sup>1</sup> Фарди ҳаёт—шахсий ҳаёт.

Раъно ўзига қараб келгучи Анварга ер остидан кулимсиб олғач, бир оз кўриниб турған оёқ учларини сариф атлас кўйлаги билан яшири, атлас кўйлакни яхшигина туртиб турған сирлик кўкраги устига ён ўрим сочларини олиб ташлади. Анвар яқинлашғач, секингина китобдан кўзини олиб, "ҳорманг" деди, китобка юз ўғирди. Анвар келди ва унинг қўлидағи китобка қаради.

—Умар Хайём,—деди ва Раъононинг қаршисига, ҳавлига оёғ солинтириб ўлтурди.—Қани, ўқу-чи, эшитайлик.

Раъно китобни секингина ёпиб, Анварга узатди:

—Сиз ўқунг, мен эшитай.

—Ўзинг ўқи, баҳилсан-да.

—Мен тўғри ўқуй олмасам, тунови кунгидек куласиз...

—Жўрттага хато ўқуб, ўзинг кулдирдинг... ўқи, Раъно.

Раъно китобни ерга қўйди:

—Мен ўқуб зерикдим...

—Маним учун ўқуб бер, деяпман.

Раъно йўлакка ишорат қилди:

—Дадам келиб қолади.

—Қаёқдан бу қадар уятчан бўлиб қолдинг?

Раъно табассум билан жавоб берди ва унда бир оз қизариниш белгиси бор эди. Анвар бу ҳолдан бир нарса сезгандек, сўзни бошқаға бурди:

—Кун иссиқми, терлабсан, Раъно?

Раъно бурни устидаги билинар-билинмас марварид резаларини рўймоли билан артди.

—Терлашим иссиқдан эмас,—деди кулимсираб Раъно,— бошқа нарсадан...

—Нимадан, қани,

Раъно бир оз эски кулавич ва мунаққидлик ҳолатига кирди:

—Сиз беклашканингиздан бери... сизни кўрсам уялдирған бўлиб қолибман. Терлашим ҳам сиздан уялғанимга...

—Кесатуқ ҳунаринг жиснинг чиқдими, деб турған эдим. Ҳар начук ёдингда экан. Тағин, хўш?

—Хон жанобнинг муншийлар муншийси бўлған бир йигитнинг салобати борлигини ким инкор этсин. Албатта, бу тўғрида канизингизга ҳақ берарсиз деб ўйлайман.

—Хўб, ҳақ бердик,—деди кулиб Анвар ва ўрнидан турди.—Башарти, канизимиз уялмасалар, бизнинг ҳам бир амримиз бор: амр қилсақ уялмасмикинлар?

—Амрингизга маҳжуби инқиёд<sup>1</sup> этишка канизингиз ҳозир.

—Канизларнинг ўз хўжалари билан ўлтуриб муомала қилишлари мумкинми? Амрга инқиёд этишдан илгари шу тўғрида жавоб берсангиз...

Раъно иргиб ўрнидан турди, гўё канизлардек, икки қўли ёнида ва боши кўксиде афу сўради:

—Инсон муштақ аз нисёнаст...<sup>2</sup> Канизи бетамиз ҳамиша афу атога лойиқдир, чунки зархарид<sup>3</sup> хўжасига содиқдир.

Анвар, очиқ ва ўюн-кулгини бир дақиқа ҳам қўйиб туролмаган парининг санъаткор шу вазиятига кулимсира-ган кўйи анча қараб турди, ҳам ўзининг хўжалиқ рўлини бузмай:

—Мен суфада бўламан, фурсат топиб ёнимга чиқ, сенга айтадирған махфий бир сўзим бор,—деди.

Раъно канизлар каби бош букиб "ҳозирман" ишорасини берди ва табассумга мойил жоду кўзлари билан Анварга оҳиста бош кўтариб қаради... Анвар ўзини завқ ҳам кулгидан тўхтатолмагани ҳолда ташқарига бурулиб жўнади. Ўчоқ бошида машғул Нигор ойим ҳам қизининг кейинги ҳаракатидан кулиб, Анварга қаради. Лекин, Раъно билан Анварнинг доимий шунингдек ўюнларига тушуниб қолғани учун бу тўғрида гап айлантирмади:

—Ошим пишиб қолди, Анвар,—деди ўчоқ бошидан кулимсиб,—суфада бўласизми?

—Бўламан.

—Отангиз аср намозидан чиқиб, бир жойга бориб келаман, деган эдилар. Сизнинг ошингишни сузиб чиқара берайми?

—Майли.

—Ташқариде болалар кўринса айтиб юборингиз-чи!

—Хўб.

Анвар маҳдумнинг қаёққа бориб келишини ўйлаған ҳолда ташқарига чиқди.

Шомдан бир оз эртароқ эди. Енгилча бир шамол суфа атрофидаги гулларни эринибкина қимиirlатар ва бу қимиirlatiшдан райҳонларининг ўткур иси ўқтин-ўқтин

<sup>1</sup> Маҳжуби инқиёд—яширинча бўйсуниш.

<sup>2</sup> Инсон муштақ аз нисёнаст...—фаромушхотирлик айрим пайтларда инсон учун хос хусусиятдир.

<sup>3</sup> Зархарид—қул.

димогқа келиб уринар эди. Ўн икки-ўн уч кунлик ой кўкнинг шарқи-жануби қисмидан туссизгина бўлиб кўтарилиб келмақда, қусш ботқан сайнг унинг чеҳраси ҳар замон очилиб бормоқда эди. Шаҳар подаси қайтиб, теваракдан сигир ва бузоқларнинг ма-а-а-му-у-у-лари, қўзичноқ ва қўйларнинг ба-а-а-бу-у-у-лари эшитилиб турар эди.

Анвар суфада ўрда юмишларидан баъзисини таҳрир қилиш билан машгул экан, ичкаридан Раъно чиқиб келди. Гўё Анвар Раънонинг келишидан хабарсизча ўз ишига қаттиғ берилган эди. Раъно оҳистагина Анварнинг ёнига келиб, суфага суюнди, икки қўли билан иягини кўтариб, оралиқдан Анварнинг таҳририга қаради. Анвар ҳам муло-йимгина кулимсиб Раънога кўз қирини ташлаб олғач, гўё илтифотсиз яна қаламини қоралаб, қоғоз устига бир-икки калима ёзди. Аммо учунчи калимага ўтканда қалами қўлида ўйланиб қолди ва боягидек ёнидагига кулимсиб қаради. Раънонинг ҳам кўзи унга тўқнашиб бир оз бир-бирларига кулимсираган ҳолда тикилишдилар...

—Нега тўхтадингиз, ёза беринг.  
—Сенинг қылған ишинг доим шундай, Раъно.  
—Масалан?  
—Масалан... Ҳамиша иш чоғида келиб, фикрни бўласан.

—Мен орага сўз аралаштиридимми?... Ёза беринг, мен шундай қараб тураман.

Анвар Раънога ўнгланиб ўлтурди:  
—Фойдаси йўқ, энди фикрни ўғирладинг.  
—Мен фикр ўғриси эмасман... Қани ёзинг.  
Анвар қўлидаги ёзилған қоғозни қўйиб, иккинчи оқ қоғоз олди:

—Энди бошқа нарса ёзаман?  
—Майли ёзинг.  
—Сен ҳам жавоб ёзсанг, хўбми?  
—Хўб.  
—Тунови кундагидек жавоб тополмасанг нима қилай?  
Раъно суфага оёғ солинтириб ўлтуриб олди.  
—Юзимга бир шапалоқ уринг, лекин сажъ қофияси осон бўлиш шарти билан.  
—Маъқул,—деб кулди Анвар ва Раънога қараган ҳолда ўйланди. Бу ўйланишдан Раъно қошларини чимириб эътиroz этди:  
—Кўб ўйламанг.

Анвар жавоб бериш ўрнига қаламини қоралаб ёзди:

Агар Фарҳоднинг Ширин, бўлса Мажнунларнинг Лайлоси,  
Насиб ўлмиш менга гулланинг "Раъно"си.

Анварнинг қаламидан қоғозға тушиб борған сўзларни таъқиб эткан Раъно, қоғоздан кўзини олиб қизарди ва бош чайқаб тескарига қаради.

—Қани жавоб, Раъно?

Раъно шу кўйи бир оз Анварга қарамай турди ва қайрилиб унинг қўлидан қалам-қоғозни олди ва:

—Уят қилмайсизми?—деб сўради.

—Маним ёзганимни сен уят қилмасанг, мен ҳам сенинг ёзганингни уят қилмайман. Лекин шарт шуки, маним икки йўлимга айни жавоб бўлсин.

Раъно яна бир оз ўйланиб, Анвардан яширинчи ёзди:

Агар ор этса Лайли ҳақлидир Қайснинг жунунидин,  
Не баҳт, Раъно харидоринг талаб аҳлининг "Мирзо"си.

Раъно ёзувни Анварнинг олдига ташлаб, қизарған ва қулимираган ҳолатда чопиб гуллар ёнига кетди. Анвар жавобни ўқуб завқланди:

—Офарин, Раъно, лекин биравнинг устида ортиқчароқ муболага қилибсан.

Раъно гуллар ёнидан Анварга жиддий қаради:

—Сиз ҳам муболага қилған эдингиз.

—Маники муболага эмас,—деди Анвар,—масалан, сен ҳозир гуллар ёнидасан, ҳам чиндан-да, гулларнинг раъносисан... Мана, мен яна ёза бошладим; жавобга ҳозирлан, Раъно.

Раъно югуриб Анварнинг ёнига келди ва унинг қаламидан томған сўзларни ўқуб борди:

Ҳамиша ҳавфда кўнглим бу муҳаббат интихосидин,  
Мени ҳам этмаса мажнун дебон Раънонинг савдоси.

Раъно кейинги мисраъни ўқуб ўйланиб қолди. Анвар ҳозирги Раънонинг ўйчан кўзига анчагина тикилиб турғач, қулимиди:

—Жавоби қийин келдими, Раъно?

—Қаламни беринг,—деди Раъно ўпкалаган қиёфатда қўл узатиб,—ўйлағали ҳам фурсат бермайсиз.

Ёзди:

Мұхаббат жомидин нұш айлаган<sup>1</sup> ақли зако бўлмиш,  
Фунуни тибда мажнундир кишининг куйса сафроси.

—Енгдинг, Раъно, енгдинг,—деди Анвар,—лекин ке-  
йинги мисраъда бир хато қилдинг...

—Масалан?

—Тибнинг айтишича, сафро эмас, қон куйса, киши  
жинни бўладир...

—Қоннинг бузулишига аввало сафронинг куиши ке-  
рак, сафро куймай туриб қон бузулмайдир... Хўш, яна  
ёзасизми ёки енгилдингизми?

—Енгилдим...

—Енгилган бўлсангиз, ютуғимни беринг.

Анвар юзини тутиб берди. Раъно бўшқина унинг юзига  
урив қўйди.

—Агар шу гал ҳам енгсам,—деди Анвар ачиниб,—мен  
сени уриб ўлтурмас эдим...

—Нима қиласар эдингиз?

—Энди фойдаси йўқ.

—Айтинг-да, агар менга ҳам маъқул бўлса, урганим  
ҳисоб эмас, бўшқина урдим-ку.

—Лекин сен уни қилолмайсан...

—Нега қилолмайман, қани айтинг-чи.

—Қилолмайсан...—деб кулди ва бир оз айтишка куч-  
ланиб турди.—Мен... мен сенниг юзингга қўлим билан  
эмас, оғзим билан урар эдим...

Раъно қизариб ерга қаради. Юзга оғиз билан уришни  
ул ўз умрида биринчи мартаба эшитканлиги учун қиза-  
ришқа ва ерга қарашга ҳақли ҳам эди. Ўзининг ёзған  
муҳаббатка оид шеърлари ва Анварга берган ҳалигидек  
жавоблари билан чин бир маҳбуба ва маъшуқа бўлиб  
кўринса ҳам, лекин кейинги гапларга ҳануз ошна эмас ва  
юзга оғиз билан уришлардан тамом бетона эди. Бу гап  
Анварнинг ҳам биринчи жасорати бўлиб, иккиси-да шу  
“янгилик”нинг ўнгайсизлигида қолдилар.

Гумбази қилигун қандилида<sup>2</sup> шамъи кофурийлар<sup>3</sup>  
ёқила бошлиған эди. Ой ҳам бир оз нурланиб, турмушка  
янги қадам босқан бу икки ёшнинг ҳозирги ҳолларидан  
кулимсигандек кўринар эди. Бояғидан бир мунча кучая-  
тушкан шамол гулни гулга қовиштириб, гўё бу икки ёшга:

<sup>1</sup> Нұш айламоқ—ичмоқ.

<sup>2</sup> Гумбази қилигун қандил—осмон, кўк.

<sup>3</sup> Шамъи кофурий—юлдуз.

"Сиз ҳам мана шу гуллар каби қовишиңг" дегандек бўлар эди. Ўнгайсизлиқда қолған Раъно хижолат аралаш Анварга кулимсиб бош кўтарди.

—Мен сизнинг "амрингизга" мувофиқ чиқған эдим.

—Амримга мувофиқми?—деди Анвар ва Раъононинг кўзига тўгри қараб илжайди:—Шомдан кейин.

—Нима шомдан кейин?

—"Амримга" мувофиқ чиқишинг.

—Хозир-чи?

—Хозир мумкин эмас.

Раъно ўпка билан Анварга қаради ва туриб ичкарига жўнади.

## 26. НЕГА ЕРГА ҚАРАЙСАН, РАЪНО?

Кучлик шамол кўтарилиб, боқчадаги ҳар нарсани тўрт тарафка бука бошлади. Кўча чанглари кўкка кўтарилиб, ой ва юлдузлар нурини хирароқ бир ҳолға қўйдилар. Чигирткалар чириллаши, кеча ҳашаротларининг нағмаси кучлик шамол товши билан кесилди. Суфа устидаги сўри ҳар замон тўрт томонга чайқалиб, ўз остида ўлтургучиларнинг бетларини тоғҳ кўрсатиб, тоғҳ яшириб, улар билан ўйнашқандек теваракка ҳусайнини гужумларини бир-икки бора узиб ташлади.

Анвар ўзидан нарироққа тушкан бир шингил узумни олиб еди ва бир-икки гужумни ҳамроҳига узатти:

—Ма, Раъно...

—Мен емайман.

—Мен ҳам сенга егин демайман.

Раъно ўз ёнидағи гужумларни йигиб, Анварга берди.

—Мана узум есангиз... Менда нима юмишингиз бор?

—Баракалла... Тўкилган узумларни йигиб бер-чи менга.

Раъно яна бир нечта гужумларни териб узатти.

—Қани, юмишингиз?

—Сенда нима юмишим бўлсин, Раъно. Ҳар кунги ўзинг билган гап... сўзлашиб ўлтурамиз; узум тўкилса, менга териб бсрарсан, деб чақирган эдим.

—Дадам ҳуфтандан қайтиб қолади. Гапингиз бўлмаса, мен кетаман.

—Ҳуфттан ҳали ўқулған эмас, аzon ҳозир айтилди. Башарти дадамиз ҳуфтани ўқумай келиб қолса, бунинг ҳийласи осон: даррав анави гулнинг тегига яширинамиз.

—Башарти дадам бизни қидириб гулнинг тегидан топса, нима қиласиз?

—Нима қиласар эдик? Сен уйингта кетасан, мен бўлсан мөҳмонхонага.

—Икавингиз гулнинг тегида нима қилиб ўлтурган эдингиз, деб сўраса, нима жавоб берамиш?

—Ўзимиз ўлтурган эдик, деймиз.

—Нима учун деса-чи?

—Қизингиз ўялғани учун, деймиз.

Раъно кулиб ўрнидан турди ва суфадаги кўзи илгаған гужумларни териб Анварга берди:

—Хайр, юмишингиз бўлмаса мен кетдим, шамолдан қулогим битти.

—Гапим бор, гапим,—деди Анвар,—кел, айтаман.

Раъно қайтиб келди.

—Айтинг.

—Ўлтур.

Раъно Анварнинг қаршисига ўлтурди. Ўлтуриши билан кучлик шамол юриб бошидағи рўймолни учурди ва олиб бориб Анварнинг бетига ёпти.

—Ха-ха-ха, шамол сиздан ўчимни олди. Қани, гапуринг.

Анвар рўймолни қисимиға олди.

—Ҳозир гапираман, лекин шартим бор.

—Айтинг шартингизни.

—Аччиғланмайсан.

—Хўб...

—Уялмайсан.

Раъно масалаға тушунгандек ўйланиб қолди.

—Рўймолимни беринг.

—Рўймолинг учиб кетди... Шартимга кўндингми?

Раъно жавоб бермади. Анвар Раънонинг олачалпоқ кўлага ичида хаёлий бўлиб кўринган юзига қаради. Унинг ҳаёс ичида олийлиқ касб эткан жоду кўзи Анварнинг ҳозирги мақсадига тушунганиликни ифода қиласар эди. Бирмунча вақт шу кўйи сўзсиз қолдилар. Шамол дам кўтарилиб, дам босилар эди. Шамол асноси гуллар ҳам келинлар каби ҳар томонга эгилишиб салом беришиб олар эдилар.

Анвар ўзини суфанинг қоронги қисмиға олди. Раънога айтмакчи бўлған сўзи эҳтимол унинг ўзига ҳам ўнгфайсизлиқ берар эди.

—Тугилгандан сўнг ўсиш, ўскандан сўнг икав-икав бўлиб яшаш бор,—деди Анвар ва бир оз тўхталиб олди.—

Жуфтлик ёлгиз кишилар орасидағина эмас, ер юзидаги қар бир махлуқда ҳам бор... Масалан, тоғлардаги оқулар, ўрмонлардаги тұтилар, чамандаги булбуллар ҳам ёлгиз эмас, жуфай яшайдырлар... Сенингча қандай, мен уни билмайман, аммо жуфтланишнинг, манимча энг муқим бир шарти борким, ул ҳам қар икки тарафнинг муҳаббат занжири билан бир-бирларига қаттығ болганишларидир... Биз икав ёшлиқдан бирга яшаб келамиз, орамизда махфий сирларимз йүқ ва бизнинг ўз аро сирларимизга воқиғ бўлган чет кишилар ҳам йўқ. Шунга биноан сен билан маним ҳар бир тўғрида ҳам очиқ сўзлашмагимизга ҳеч бир монеълиқ бўлмас, деб ўйлайман... Агар янгилишмасам, иккимизнинг бир-биримизга муомалаларимиз самимий ва юракларимизнинг тепиши ҳамоҳангидир. Ёки янгилиш сўзладимми, Раъно?

Раъонинг ерга қараган кўзи секингина Анварга кўтарилиб, яна ерга оғди. Анвар унга бир оз қараб турғач, сўзида давом этди:

—Сен эшитдингми, йўқми, билмадим, улар иккимизни жуфтлашдирмакчи бўлиб, бу кун мендан киши орқалиқ тўй вақтини белгилашни сўратсан здилар, мен эртага жавоб бермакчи бўлдим... Сени бу ерда тутишим ҳам сен билан кенгашиб, эртага шунинг жавобини уларга айтишдир... Нега ерга қарайсан, Раъно?

Раъно бошини кўтариб кулимсиди ва юзини четка ўғирди...

—Сен уял, уялма, улар бизни жуфтлашдираплар. Марҳума Моҳларбибининг фотиҳаси ерда қолмас. Агар сен шундай юра берайлик, десанг, мен ҳам уларга сенинг жавобингни айтаман...Гапир, Раъно.

—Юра берайлик,—деди Раъно юзини четка ўғирган ҳолда,—уларга нима оғирлиги бор?

Раъонинг бу сўзи Анварнинг устидаги юкни кўтариб ташлағандек бўлди.

—Иккимиздан бошқага албатта оғирлиги йўқ... Лекин сен айтканча, қачонғача юра берайлик? Уларга бир муҳлат кўрсатишмиз керак, Раъно.

—Қаригунимизча...

—Қаригунимизча, деб муҳлат сўрайми?

—Ўлгунимизча...

Анвар кулди ва сурулиб Раъонинг ёниға келди. Гўё уни ўзига қаратмоқчи бўлғандек, елкасига қўл юборди...

—Менга қара, тўғри жавоб бер, Раъно.

Раъно қулоги остига теккан иссиғлиқдан чўчиб юзини ўнглаган эди, тасодуфган лаби ҳалиги иссиғлиққа учрашди... Иложсиз каби лабини иккинчи ҳароратлик лабдан ажратолмай, бир неча сония кутиб қолди. Кучлик шамол қўзғалған эди. Шамол, гўё кўмаклашкан каби орқадан эсиб, Раъонни Анвар томонга майл этдирав эди. Терак орқасида қолган ой ҳам кучлик елнинг кўмагида терак бошидан буларга мўралаб олди. Икки ёшнинг ҳозирги ҳолини яқиндан томоша қилмоқчи бўлған туссиз бир юлдуз кўк саҳнининг ерга яқинроқ қисмига учиб тушди...

—Жавоб бер, Раъно.

—Бу ҳолда мен жавоб бералмайман...

—Жавоб бермасанг, мен ҳам сени бўшатмайман.

—Дадам келиб қолади...

—Дадангдан бу кун жавоб олдим.

Раъно Анварнинг ияги остига сўл чаккасини қўйиб четка қаради.

—Сиз хоҳлаған вақтда бўлсин.

—Менга қолса эртага...

—Майли...

Анвар ияги остидағи мулоҳимлашқан қизнинг юзидан ўпти ва унинг тўзғиган соchlарини тўғрилаб, ҳаётбахш кокилларнинг муаттар бўйини узоқ ҳидлади.

—Чин сўзла, мен сенинг раъйинг билан уларга жавоб айтмакчиман, Раъно.

—Кўкламга...

—Чинингми?

—Чиним.

—Хўб бўлгай. Мен эртага, тўйимиз кўкламга бўлсин деб жавоб айтаман... Ерлар кўк гиламлар билан бежалганди, ҳар тарафни бинафша чечаклари босқанда, қушлар уя қайғусини чекканда биз ҳам тўй қиласмиз; чимилдиқда баҳт созини тинглаб, истиқбол куйини қўйлармиз... Шундайми, Раъно?

—Шундай...

—Ундан сўнг маним оғушимда шунинг сингари даданг келиб қолишидан қўрқиб, кини қўлиға тушкан қуш боласидек типирчиламассан. Шу ҳуснинг, шу малоҳатинг ва шу латофатинг билан тамом менини бўларсан, шундайми?

Раъно жавоб бермай, Анварнинг оғушидан ўзини қутқариб ўрнидан турди. Суфанинг зинасига бориб кафшини кийди ва Анварнинг қувлашидан қўрқиб, сапчиниб ерга тушти...

—Жавоб айтиб кет, Раъно.

—Ха, шундай,—деди Раъно, гул ёнида рўймолини тўғрилаб.—Энди сизнинг олдингизга чиқмайман.

—Нега чиқмайсан?

—Негаки жуда ёмон киши бўлибсиз. Мен аямга айтаман.

Анвар кулди.

—Нимани айтасан?

—Ҳаммасини айтаман.

Шу вақт ўрта эшикдан кириб келган маҳдум уларнинг сўзини бўлди, ичкарига кетиб борган Раъонони тўхтатиб, "Анвар акангга чой бердингми, қизим?" деб сўради.

## 27. ЗУЛМ ЎЧОГИ

Худоёрхонға 1283-нчи йилда<sup>1</sup> учунчи мартаба таҳтка чиқиши насиб бўлди. Унинг охирғи салтанати хонлиқ истибодонинг аччиғ зулм ва таъаддиларининг жонсўз қора саҳифаларини ташкил этадир. 1283-нчи ҳижрийдан 1292-нчигача бўлган саккиз йил, Худоёрнинг эркин нафас олиб, Фарғона устида ўзи тилаганча қамчи ўйнатқан ва зулм тигини камбағаллар қони билан сарбаст бўяған сўнгги давридир. Мамлакатни обод қилиш баҳонаси билан 1284-нчи йилда Қўқон косибларини ҳақсиз—муфт<sup>2</sup> ишлатиб янги раста, карвон сарой, пахтасарой ва коппонлар бино қилиди. 1285-нчи йилда Қўқоннинг Ўрганч мавзесъига машҳур Оқсаройни солдирди, узоқ жойдан ариғ қазитиб келиб, Оқсарой атрофини сугортириди. Иссиг кунларда салқинлаш, малика хонимлар билан ишрат қуриш учун "Боги Эрам" ясадти. Онаси Ҳоким ойимнинг васиятига мувофиқ, 1286-нчи йилда "Ҳоким ойим мадрасаси" деб машҳур мадрасани, яна шу йилда Амир Умархон тарафидан асоси қўйилған маълум янги ўрдани ҳам теварагида боғ ва гулзорлари билан ишлатиб битирди<sup>3</sup>.

1286—87-нчи йилларда "Улуг наҳр" ва "Хон ариғ" деб машҳур ариғни қазитди. 1287-нчи йилда ўз номидаги

<sup>1</sup> Мелодий қисоби билан 1864—65 йиллар.

<sup>2</sup> Муфт—текин, бепул.

<sup>3</sup> Эски ўрда Шаҳруҳ хонининг ўли Абдукаримхон тарафидан 1145 ҳижрия чиёналарида бино қилинган, Худоёрнинг орзулагига жаҳоб бералмайдирган ҳолга келиб эскирган эди (муал).

"Мадрасас олий"ни ва "Дахмай шоҳон"ни, 1288-нчи йилда Қўқоннинг эски қаландархонасини бузиб, янгидан таъмир, ҳам ўлган огаси Султонимуродхон исмига мадраса бино қилдирди. Ва ушбу йил ўғли Үрмонхоннинг хатнаси учун бир юз йигирма кун ош берил, тўрт ойлиқ тўй эълон қилди. Шундогки, ҳар кун икки юз қозон ош дамланар, саккиз юз танур нон ёпилар, икки юзлаб улоқ берилар, мамлакатдан тўйға келгучи аъёнга ҳар кун минглаб тўн кийдирилар эди.

Бу қадар саҳоват, бунчалик дабдаба, албатта, ҳазинадаги олтинлар кучи билан бўлғандир, деб баъзиларнинг кўнглига келар. Ҳонлар ва подшоҳлар ҳазинасидаги олтинлар манбаъи ҳам фуқаронинг билак кучидир. Лекин Худоёрнинг саҳоват-пешалиги ва маъмуриятпарварлиги меҳнаткашнинг ҳазинага олтин суратида йигилған кучидан эмас, бевосита билак кучидан, кўз ёшидан эди. Чунки Муҳаммадалихон давридан бошланған (1240) ўзаро таҳт талаши, ўзбек-қипчоқ жанжали ва бошқа тўполонлар ҳазинани ялаб-юлқан, Худоёр 1283-нчи йил таҳтка ўлтуришида эшиги очиқ—бўш ҳазина-гагина эга бўлған эди.

Бу "маъмурият даври" саналған беш-олти йиллар Фарғона фуқароларининг омҳузинлари<sup>1</sup>, қора кунлари бўлған эди. Худоёрнинг Сирдарёдан сув чиқариш можаросини мисол учун олайлиқ:

Ҳоннинг раъи сув чиқаришга тўхтади. Ҳазинанинг бўшлигини, ўйланған ишнинг ниҳоятда улуғлигини андиша қилмади. Қаламравидаги барча шаҳар ва қишлоқларга саркорлар, чўғоллар тарқатди. Улар ҳалқдан солиқ йигишқа, ёрдам тўплашқа буюрилған эдилар. Бу ихтиёрий равишдаги ҳозирликдан сўнг, "мамлакатимдаги ҳар бир хонадон битта кетман ва битта мардикор берсин!" деб истисносиз умумий бир фармон ҳам бўлди. Қамчиси кўкда тобланиб, ҳанжари заҳар сочқан "хон ҳазратнинг буйругига" ким қарши бора олсин. Ҳар бир оила, гарчи, рўзгор бошлугини бўлса ҳам, битта кетман билан хон таъйин қилған жойга йўллай бошлади. Бойлар битта мардикор ёллаб бериш устига от ёки арава ҳам топишқа мажбур эдилар.

Эни олти, бўйи (чуқурлиги) беш газдан ўн беш газгача қазиладирған аргининг узунлиги ўттуз чақирим ва шу ўттуз чақиримлиқ арг қазилиб битканда, Наманған ва

<sup>1</sup> Омҳузн—умумий хафалик.

Андижон туманларидан икки минг ботмонғача ср сугорилар эди. Шу йўсун ариғ қазила бошланди. Лекин ишчи кўб, озиқ-овқат йўқ эди. Бойлар киши ёллаб, қутулғанлар, ўттуз чақиримлиқ ариғ хатига бола-чақасини оч ташлаб, кетман кўтариб келган нуқул меҳнаткаш, косиб ва дехқонлар чизилғанлар эди. Ўз ёнларидан сарф қилиш учун оқчалари, ҳукумат тарафидан бериладирган овқатнинг салмоғи йўқ эди. Иссиг қуёш остида, гиёҳсиз чўл бағрида кетман одатдагидан кўброқ ем талаб қиласидир. Ариғ қазувчиларнинг овқатдан силлалари қуриб, илниклари пучайган, сердан ўн қадоқ тупроқ олиб иргитишқа эмас, ҳатто кетманнинг ўзини кўтаришқа ҳам дармонсиз эдилар. Хон тарафидан улар устига ишбоши қилиб белгиланган саркорлар, очлиқ ялқовлигини чинга ҳисоблаб, қулоқ эшитмаган сўкишлар билан бечораларни таҳқир этар, сулайиб ийқилмагунча кетмани ташлатмас эдилар. Ҳар ўн беш-йигирма кунда ариғ бошиға келиб тургучи хон, саркорларнинг сиъояти<sup>1</sup> билан ҳар бора бир-икки меҳнаткашни ялқовлиқда, ўзига итоатсизликда айблаб, кўбчилик кўз ўнгидаги бўғизлатар ва ҳар гал келиб кетишида шунинг сингари мазлумлар қони билан янги "Хон ариғ"ни намлаб турар, бу зулмни ўз кўзлари билан кўриб турған бечоралар очлиққа, дармонсизликка қарамай жон аччиғида ишқа ёпишар эдилар.

Шу йўсун зулм зарби остида ниҳоятда улуг иш бир йилга ҳам қолмай итмомига сткан, минг чақиримлар бўйлаб Сирнинг сирлик суви кумуш каби оқсан, гиёҳ унмаган чўллар меҳнаткашлар қони баробарига ям-яшил кўкарған эди. Шу мисолдан онглашилған бўлса керакким, хоннинг маъмуриятпарварлиги, яъни унинг мадрасалар, боғлар, қасрлар, сарой-расталар ва дахмалар бино қилиши, тўрт ойлаб тўй бериши хазинада асрлардан бери йигилиб ёткан олтинларни сарф қилиб эмас, тўғридан-тўғри фуқарони муфт, мажбурий ишлатиш ўйли билан эди.

Хоннинг гарчи зулм билан бўлса ҳам солған мадрасаларига, қаздирған ариғларига таҳсин қилғучи, "золим бўлса ҳам маъмуриятпарвар экан" дегучи баъзи биравлар орамизда топилиб қолур. Шунинг учун хонни "маъмурлиятпарвар" қилған омиллар устида тўхталиб оламиз:

Хон икки мартаба тахтдан ҳайдалиб, анчагина тажриба

<sup>1</sup> Сиъоят—чақимчилик.

ортдирған, учунчи марта таҳтка ўлтуриши маданиятлик ўрус истибодининг Тошкандни олиб Хўжандга ҳам қўл узатқан саналарига тўғри келган эди. Бу кунги шароит тажрибалик хонни бошқача сиёсат ушлашкан мажбур этар эди. Ниҳоятда қаттиғ қўллиқ бўлиш, юқори табақа ҳисобланған уламони, ашрофни ўзига қаратиш лозим ва таҳтиға аждаҳо каби оғиз очиб келмакда бўлған ўрусларга қарши ўз маданиятини қуриб, жавоб бериши керак эди. Шунинг учун меҳнаткашни раҳмисиз ишлатиб мадрасалар бино қилмоқда, ариглар чиқармоқда, сарой ва расталар, қаландархона ва ўрдалар ёпмоқда эди. Абдукаримхондан бери ўнлаб хонларга яраб келган ўрдани бузиб, янги ўрда бино қилиши ўз кайфига қараганда ҳам ўрусларга жонлилиқ кўрсатиш, ялтирасин шаъну шавкат билан Фарғонани ўз қўлида сақлаб қолиш учун эди.

Ўчадирған чарог ёниб ўчадир, мақоли каби Туркистон хонларида сийрак кўрилган бу маъмуриятпарварлик бизга қолса шу омиллардан туғилған ва бунда самимий ҳеч нарса йўқ эди.

## 28. ҲАРАМ

Янги ўрда юқорида ёзғанимиздек, ҳақиқатан шу-куҳлик, хушманзара бино қилинған эдиким, унинг ҳозирги харобасидан ҳам кўрса бўлур.

Ўрда қўргонининг ташқари айланаси (тўрт томони) ажойиб гулзорлар, анвоъи мевалик дарахтлар билан зийнатланган. Бу боғни маҳтаб Худоёрнинг ўз шоири Мулла Ниёз Муҳаммад:

“Ясаб қасре саодат даврида бого жаҳон оро,  
Муаттар бўлди гулзоридин олам гунбази ҳазро<sup>1</sup>.<sup>1</sup>

Шаҳи волоки берди зеб бого ичра раёҳиндин,  
Ўшал кун тутди ер саҳнини бўйи анбари соро<sup>2</sup>.

<sup>1</sup> Ҳазро—кўк яшил.

<sup>2</sup> Соро—тоза, соф.

Ясарда тархини тарроҳлар<sup>1</sup> андог сакиз гулшан,  
Бу гулшан ҳар биридин топдилар юз минг чаман оро.

Ки ҳар ашжор<sup>2</sup> асмормини<sup>3</sup> таъмида шакар мазмар<sup>4</sup>.  
Очарга шаккар оғзин муддалиққа нақад оро.

Хиёбон расталардин бөг топди зеби оройиши,<sup>5</sup>  
Гулистонига бергандек чаман оро гули ҳұмро<sup>6</sup>.

Жаҳон богида ҳарна неъматидир бунда ул мавжуд,<sup>7</sup>  
Насиб эткай сенға юз үйлігача ҳақ эй жаҳондоро...<sup>8</sup>

дейдир ва Худоёрға бу боғда юз үйллаб роҳатланмоқ учун  
дую қыладир.

Домла Ниәз Мұхаммад айткандеск, гулшаннинг уч та-  
рафи хиёбон, расталар ва бунда эртадан-кечкача халқ  
қайнашиб туар эди. Үрда богининг эшигида доим қоро-  
вуллар қараб турғанлиқдан, үрдага алоқаси бўлмаған ки-  
шилар боққа киralмаслар, фақат ҳафтада бир кун, хон-  
нинг кўнтил очиши соатларида, баъзи мустасно зотлар учун  
боғнинг йўли очиқ бўлур эди. Боққа кирилгандан кейин,  
тўғридан янги ўрданинг дарбозаси, муҳташам музаяқакор  
тоқ ва равоқлар кўзни қамашдирар, киши гўё ўзини хон  
ҳузурида, истибодод салобати остида сезар ва мутантан<sup>7</sup> ва  
музайян<sup>8</sup> қасрдан руҳ олиш ўрнига, билъакс, бир даҳшат  
ва хавф ҳис эта бошлар эди. Ўрданинг хиштин, кунгира-  
дор қўргонлари ости билан жазойири қилич тақинған мах-  
сус муҳофиз йигитлар айланиб, бегона кишини қўргон  
яқинига йўлатмаслар, айниқса, ўрданинг юқори қисмидан  
қўйилған ҳарам дарбозасига яқинлашиш учун, ҳатто  
ўрданинг ўз ходимларига ҳам рухсат йўқ эди. Ҳарам  
дарбозасидан юргучилар ёлғиз хоннинг ўғли—шаҳзода,  
хоннинг хотин қариндошлари, канизлар, доя хотинлар,

1 Тарроҳ—лойиҳачи.

2 Ашжор—дараҳт.

3 Асмормини—мевалар.

4 Мазмар—замери, ичи.

5 Ҳұмро—қизил.

6 Жаҳондоро—жаҳонни эгалловчи ҳукмдор.

7 Мутантан—тантанавор.

8 Музайян—зийнатланған, бесатылған.

яна баъзи "максус" юмишларга хон томонидан белгиланган заифаларгина эдилар. Бу дарбозадан хоннинг ўзи ҳам юрмас, чунки унинг ҳарамига кирадирган йўли ўз маҳкамаси ва шаҳнишин орқалиқ эди.

1287-нчи йилнинг сунбула ойи, яъни эрта кузнинг кўклам ҳавосига яқин турған салқинча бир куни. Кечки соат бешларда ўрда ичидаги қайнааб турған ҳаёт бир оз тинчидан тушти, дарбоза ёnlаридағи қоровуллар ичкарига киши киритмай қўйдилар. Ўрда хизматчилари, масалан, беклар, мирзолар, ясовуллар ва шулар сингари "сайид"<sup>1</sup> ходимлари бирин-сирин чиқиб тарқала бошладилар. Биринчи дарбозанинг икки биқинида турғучи қоровул йигитлар ўрданинг улуғ даражалик бекларини таъзим билан узатар, мансаби қўйироқ ясовуллар билан мутояба қилишиб қолар эдилар. Саркардалардан баъзиси дарбоза ташқарисида хизматчи тарафидан қантарилиб турған отининг ёнига келиб, отни қараб чиқар, яхши боқмагани, ёки тоза супурмағани учун сайисни<sup>2</sup> койиб олар ва сўкуниш ораси сайис кўмагида отига миниб жўнаб кетар эди.

Дарбозабонлар ўрдада зарур юмиши борлигини сўзлаб, илтижо қилғучи ҳар қандай кишини ҳам ҳозир ичкарига йўлатмаслар ва асабийланиб койиб қайтарарлар эди.

—Бу ўзи қандай одам, қулогига ун босқанму!—деб жескириниб турған биринчи дарбозабон узоқдаги кимгадир қараб қолди, кўзи ўша тарафда экан бояги сўзини такрорлади,—боравуринг, оғизни очманг, шери Яздон<sup>3</sup> келгандаги ҳам ичкари киритмаймуз!

Илтижо қилғучи умидсиз дарбозадан йироқлашди. Унинг кетича дарбоза ёнида банорас паранжилик бир хотин пайдо бўлиб, ичкарига парвосиз кира берди. "Шери Яздон"ни ҳам киритмайдирган дарбозабонлар хотинни бошдан-оёғ кузатиб, индашмай қараб қола бердилар. Хотин ичкари кириб тўғрига қараб юрди, асл ўрданинг улуғ муҳташам дарбозасига яқинлашқандан кейин ўнгдаги айрийулға бурилди.

Хотин ҳарам дарбозасини чоғлаб борар эди. Қўргон остидағи соқчилар хотинға ёвош-ёвош қараб олиш билан

<sup>1</sup> Сайид—амир демоқчи.

<sup>2</sup> Сайис—отбоқар.

<sup>3</sup> Шери Яздон—ҳалифа Алига берилган иисбат.

кифояланар ва уни таниғандан парвозсизча ўз ёнларидан кечирап эдилар.

Хотин ҳарам дарбозаси ёниға етиб, останага қадам босқан чоғида бўсағадаги йигит "виш" этдириб қиличини қинидан сугурди.

—Тўхтанғ!

Хотин тўхтади ва йигитка қараб бетидаги чашмбандини қия оти. Йигитнинг жиддияти кулимсирашкага мубаддал<sup>1</sup> бўлиб, ҳаводаги қиличини қайтариб гилофиға солди. Хотин юзини очқан кўйи ичкарига юрди. Ўттуз беш ёшларда кўринган бу гўзал хотин ҳарам ходимларидан Гулшанбону эди.

Гулшанбону Худоёрнинг иккинчи даврида ўз хусни билан бир неча мартаба хоннинг илтифотига сазовор бўлған ҳарам канизларидан эди. Худоёр тахтни ташлаб Бухороға қочишга мажбур бўлғандан кейин, оғасини ғайри шаръий ишларда, жумладан, хотинбозлиқда айблаб, тахтка мингган Маллахон ўз даъвосига мувофиқ Худоёр ҳарамидаги юзлаб хотинларни ўз йигитлари орасида хотинлиққа тақсим қилиб юборди. Шу жумладан, Гулшанбону ҳам Маллахон тарафидан Худоёрға қарши урушда қаҳрамонлик кўрсаткан бир йигитка инъом қилиниб, шундан бери ўша йигитнинг никоҳида хотин эди. Худоёр учунчи мартаба тахтка мингандан кейин, Гулшан хоннинг ёниға келиб, эски "қадрдонлиқ" номига ҳарамдан бир хизмат сўрағанида, "марҳаматлик" хон Гулшаннинг арзини ерда қолдирмай, ҳарам ходимларининг жуда озларига насиб бўлладирған улуғ бир мартаба ато қилдиким, биз Гулшангага топцирлған вазифанинг нимадан иборатлигин қўйида кўрармиз.

Гулшан дарбозадан ичкари киргандан кейин, паранжи остида босилиб тартибсизланган соchlарини тузатди, чанг ўлтурган нилий ранг товор кўйлагининг этакларини қоқти, қўлидаги ёқут ва зумурад кўзлик олтин узукларини тўғрилаб тақти ва шундан сўнг зиналардан юқорига қараб чиқа бошлади. Йигирманчи зинадан кейин узун—ўрданинг эни қадар бир йўлак бошланиб, унинг ўнг-сўлини ўн чоғлиқ буҳори чакма эшиклар зийнатлаган эдилар. Бу эшиклар ҳарамдаги алоҳида ҳавлилар ва улар даромадини<sup>2</sup> кўрсатар эдилар.

<sup>1</sup> Мубаддал—алмашинган.

<sup>2</sup> Даромад—йўлак.

Гулшан узун йўлакка чиқиб, ўнгдаги биринчи эшикни итарди. Ичкари тарафдан кекса бир ходима—эшик очар хола кўриниб, Гулшанга салом берди ва "хуш келдилар" деди. Гулшанни ичкари киритиб, эшикни беклади. Бу, ҳарамнинг кичкинагина сув ҳавлиси эди. Ўртадаги мис ҳовузда кўм-кўк сув мавж уриб, бир неча канизлар ҳовуздан сув олмоқда эдилар. Ҳавлининг шимолидаги ходималар турадирған кичкина бир уйдан бошқа мунда бино йўқ, фақат жанубда ҳалигидек бир эшик бор эди. Сув ҳавлисидаги бу ҳовуз ҳарамнинг бутун эҳтиёжини ўтар, уни ҳафтада бир неча мартаба маҳсус соатларда мешкоблар томонидан тўлдириб турилар эди.

Гулшан паранжисини қўлига олиб, эшик томонға юрди. Эшик ёниға келиб, секин-секин ҳалқани чертди. Эшик ичкаридан очилиб, бунда ҳам эшик очар хола кўринди. Лекин буниси ёшқина бир каниз эди. Гулшандан паранжи, ҷашмбандни олиб, "хуш келдилар" деди. Бу ҳарамнинг биринчи ҳавлиси эди. Ҳавлининг тўрт томони нақшинкор, ойнабанд, гул чакилган даричалик, ҳаммаси бир хил бичиқда танобий (зол) уйлар, ҳар бир уйга маҳсус даҳлизлар ва бир-бирига ямашдириб солинган хоналарни шу даҳлизлар бир-биридан ажратиб турар эди. У қадар кенг бўлмаган саҳн остига хишт тўшалган, ҳавли юзида тўрт-бешта қизил шолдан кўйлак ва бошлариға сариф шолан рўймол ўраб, оёқлариға бедонадан кафш маҳси кийган ёш канизлар сочилған ҳолда вазифалари орқасидан юрар эдилар. Гулшан улар билан оҳиста сўрашди ва канизларнинг биридан ярим товуш ичидаги сўради:

—Он ҳазратим?

—Шаҳнишиндалар,—деди каниз, товшини четка чиқармаслиққа тиришиб.

Шаҳнишин—хоннинг хос ҳужраси, хон овқатланадирған, ухлайдирған ҳам хотинларни қабул қиласидирған уй бўлиб, сув ҳавлисининг қатори билан то тахт ўрнатилған маҳкамагача қатор уч хона танобий уйлардан иборат эди. Бу уйлар шаҳнишинликка мувофиқ бошқа бинолардан баланд қилиб солинган эдилар. Ҳавлисининг шарқий томони маҳкамага қаратиб солинган бинолар орқаси, жануби хос ойимлар—яъни хонимлар, танобийси, гарби—қисман танобий ва қисман ошхона ва ҳарам ҳазинаси биноларини ва бошқа ҳавлиларга чиқиши учун даромадларни ташкил этар эди.

Гулшан, "шаҳнишиндалар" жавобидан сўнг, тараффудлангандек бўлди. Бир оз иккиланиб турғандан кейин, яна

бир қайта сочини, рўймолини, кийимини тузатиб олди ва шаҳнишин томонга бурулди.

—Ойхоним чақирадирлар.

Гулшан уч-тўрт қадам босқан эди, тўрдаги танобийдан чиқиб келган канизнинг ҳалиги сўзи билан тўхтади ва сўзсиз каниз томонга бурулди. Гулшан кирганда даҳлизнинг тўрида уч нафар каниз санама<sup>1</sup> тикиб ўлтурас эдилар. Улар билан саломлашди. Ул саломлашқан аснода ичкари танобийдан олти ёшлар чамалиқ, оқ туслик қора кўзлик кўркамгина бир бола сариф атлас кўйлагини ҳилпиратиб чиқиб келди.

—Ассалому алайкум... Соғмилар, шаҳзодам,—деди Гулшан қўлини кўкрагига қўйиб, болага букилинқираған ҳолатда.

Шаҳзода жавобсиз кулимсираб, Гулшанга бир оз қараб турди-да, ичкарига кириб кетди.

Гулшан кафшандозда оёғини ешиб, гиламга чиқди. Даҳлиз ўн бир ёғочлиқ катта мунаққаш уйдан иборат бўлиб, тахмонида атлас ва адрес кўрпа, кўрпачалар уюлған, тоқчалари анвоғи хитойи ва қашқар чиннилари, Бухоро мис ва кумуш идишлари билан зийнатланган эди. Гулшан кафшини еша бошлиғач юқоридағи санама тикувчилар ҳам ўрунларидан турған эдилар, келиб кўришдилар. Улар кўришиб бўлғанда, бояги каниз ичкаридан чиқди.

—Кирсинлар,—деди Гулшанга.

## 29. ОФАЧА ОЙИМ

Гулшан эшикка юриб келиб, рўймол—лачагини тузатти ва ичкарига қадам бости. Эшик ичкарисида қўл қовиштириб ўлтурган каниз ўрнидан туриб букилди.

—Сафо келдилар<sup>2</sup>

Асл гиламлар, баҳмал кўрпачалар, олтин ва кумуш асбоблар билан зийнатланган танобий уйнинг орқа ва ўнги деярлик кўзни қамашдирарлиқ шукуҳларга гарқ бўлған эди. Танобийнинг ҳавли томонига қурулған учта кичкина теразаларнинг ойналари ҳам бундаги асл ашёларнинг турлиқ навъи қабилидан ҳар кўзи ҳар рангда жилваланар ва уларнинг акси зиёси билан шипга осилған олтин қандил алвон тусда товланар эди. Танобийнинг тўрида, ипак жойнамоз устида қиблага қараб ўлтурган ойим тизасига яс-

<sup>1</sup> Санама—ироқи.

<sup>2</sup> Сафо келдилар—хуш келдилар.

ланган шаҳзодани эркалаб, ёнига қайрилди. Эшикдан кириб, қўл қовишириб тўхтаган Гулшан икки букилиб салом берди.

—Келинг, Гулшан,—деди ойим,—ўлтуринг, ваалайкум ассалом.

Гулшан таъзим билан биринчи даричанинг юқорисига бориб ўлтурди ва дуога қўл кўтарди.

—Ойи хонимнинг бахт ва обрўлари зиёда, шаҳзодамнинг умрлари узун бўлсин.

Эшик ёнида тик турған каниз duo асноси ўлтуриб фотиҳа ўқушди. Фотиҳадан сўнг яна ўринидан туриб қадалди. Ойим ҳамон шаҳзодани эркалаб жойнамоз устида ўлтурар эди.

Жияклик атлас кўйлак, Бухоро кундалидан<sup>1</sup> желатка ва бошига санама рўймол ўраган ўттуз беш ёшлар чамалиқ бу хоним—Хоннинг мұттамад<sup>2</sup> хотини Оғача ойим ва шаҳзода эса хоннинг суюклик ўғли—Ўрмонбек эди. Оғача ойимнинг хитой хонимлариникига ўхшаш қора бодом кўзи ва умуман сиймоси Туркистон қизи эмаслигини айтиб турар, бироқ тилида бегоналиқ сезилмас эди. Оғача ойимнинг асли исми Масъуда хоним, аммо "Оғача ойим" деб машҳур бўлиши унинг қашқар қизи бўлғанлиғидандир. Ўйғурлар биздаги "хоним, бекач" дейиш ўринда "оғача" дейдирлар. Масъуда Ўш атрофида турғун бўлған ўйғурлардан Ибодуллахўжа деганинг қизи, Худоёр ўзининг иккинчи давлатида бунга уйланган эди.

Худоёр таҳтни ташлаб Бухороға кетишка мажбур бўлғандан кейин кўб хотинлари унга вафосизлиқ билан эр қилиб кетканлари ҳолда, шу Оғача ойим эрининг ҳорлиқ ва муҳтоҷлик кунларига шерик бўлиб юрган ва шу вафодорлиги жиҳатидан хоннинг эътиимодини қозонған эди. Иккинчидан, Оғача ойим Худоёрнинг ҳарам хотинлари ичиди ақллик, тадбирлик ва шу сояда ҳарамнинг барча хонимлари ва юзлаб канизлари бунинг идорасига топширилган эдилар. Юзлаб кундашлар орасидаги жанжаллар оғачанинг ислоҳига<sup>3</sup> келиб тўхтар, ҳарамдан ҳар кимса бунинг сўзига қулоқ солишга мажбур, ҳатто хоннинг ўзи

<sup>1</sup> Кундал—зар ишлар билан тўқилған қимматбаҳо мато.

<sup>2</sup> Мұттамад—ишончли, эътиимодли.

<sup>3</sup> Ислоҳ—тузатиш, тўғрилаш.

ҳам хотинлар орасидағи онглашилмовчилиқларни Оғача-нинг ислоҳига ҳавола қылғучи эди. Янги кийим бериш вақти етканда, кимга қандай кийимлик лозим, ким қандай нарсага муҳтож—бу масала ҳам Оғача ойим тарафидан ҳал қилиниб, ҳазиначига буюрилар ва ҳозирланилған кийимліклар унинг томонидан тақсим қилинар эди. Бундан бошқа, кундалык ошхона овқати ҳам Оғачанинг белгилаши билан пиширилар, ойим ва каниз, доя ва чеварларнинг ҳаммомга боришлари, бекларнинг түйига чиқишлиари ва шунга ўхаш лозим-омадалар ҳам бу ойимнинг күрсатишига мувофиқ эди. Баъзан Оғача ойим мамлакат ишларига ҳам оралашиб олар, гоҳо ўз фикрига хонни унатиб ҳам қўяр эди. Худоёрнинг хотинларидан кичик Шоҳ ойим<sup>1</sup> вафот этиб, ундан бир бола—Ўрмонбек ятим қолған эди. Худоёр Ўрмонбекни жуда яхши кўрар ва ўзига валиаҳд белгилаган эди. Кичик Шоҳ ойим ўлгандан кейин Ўрмонбекни ҳарамда ётимодлик бўлған Оғача ойимга топшириди. Шундан бери ул Ўрмонбекни ўз боласидек тарбия қилиб келар ва бу сабабдан ҳам хоннинг назарида унинг қадри жуда юқори кўтарилиған эди.

Оғача ойим ҳануз Гулшанга илтифотсиз, Ўрмонбек билан сўзлашмакда эди:

—Жуда шўх бўлибсан, ўғлим. Мен сени отахонингга чақиб бир урдирай.

—Будана берсангиз шўхлиқ қилмайман.

—Буданаларингни ўлдириб битирдинг-ку, золим, буданаларни яна қайдан олайлиқ.

—Мен ўлдирмадим, ўzlари ўлиб бутдилар.

—Зийракни нега урдинг?

—Зийрак менга будана топмади.

Оғача ойим эшик ёнида тик турған канизға қаради:

—Кел, Мисқол,—деди ва Ўрмонбекнинг орқасини силади.—Сен ғуманг билан ўйнаб кир, буданани эртага топдирамиз.

Каниз Ўрмонбекни етаклаб чиқа бошлади.

—Олдимға ҳеч ким кирмасин,—деди Оғача ойим.— Эшикни ёпиб чиқ.

Улар чиқғач, Оғача ойим Гулшанни ўз яқинига чақириб, жойнамоздан кўрпачага сурилиб ўлтурди, так-

<sup>1</sup> Шунгун бегининг қизи (муал.).

пор—“яқинроқ келинг, Гулшан”, деб таклиф қилди. Оғача ойимнинг бирар муҳим сўзи борлигини сезган Гулшанбону қўл қовишириб, ойимнинг яқинига бориб тиз чўкти.

—Шаҳардан нима хабарлар топдингиз, Гулшанбону?

—Шаҳар хабарлари ойи хонимдан махфий эмасдир.

—Ўзингиз тинч турасизми, уй ичингиз соғмилар?

—Шукур... Онҳазратим ва ойи хонимнинг сояи давлатларида.

—Ишларингиз қандай?—деди кулимсираб Оғача ойим.—Бизга кундашлар топиб бўладими?

Бу саволдан Гулшан бошини қўйи солди, Оғача ойим кулимсиганча Гулшандан жавоб кутиб турар эди.

—Сиз бизга кундаш изласангиз ҳам,—деди Оғача ойим,—албатта, ўз ихтиёргизича эмас, сайдининг амлари билан; шунинг учун бу тўғрида мен сизни айблай олмайман.

Бу сўз билан Гулшан бир оз хижолатдан чиққандек бўлди.

—Албатта, ойи хоним...

—Сўзимни срда қолдирмаслиғингизға ишонганим важидан,—деди Оғача жиддий тус олиб,—сиз билан бу тўғрида махфий бир-икки оғиз гаплашмакчи эдим.

—Канизингизнинг боши устига, ойи хоним.

Оғача ойим доворга суюлған ёстиқни тирсаги остига тортиб таяқ қилди.

—Мен бу гапимни ўткан кун Ботирбоши холага ҳам айтиб қўйдим. Лескин сайдининг қулоқларига еткурмаслик шартдир. Бу тўғрида холадан ҳам сиз эҳтиётлироқсиз, деб ишонаман. Чунки сизнинг мен билан эски қадрдонлигингиз бор.

—Чўрингиз сўз улашдиришни ёмсон кўрадир, ойи хоним.

—Албатта, шундай бўлмоғи лозим,—деди Оғача ойим,:—ўзгалардан ҳам сизга айтқулуғи йўқ, Гулшан. Сайдининг никоҳларида биз ўнлаб кундашмиз<sup>1</sup>... Агар канизларни ҳам қўшиб ҳисобланса, кундашларнинг саноги бир юздан ортадир. Ботирбоши хола, яна бир нечалар ва атрофдаги бескларимизнинг таважжуҳлари соясида<sup>2</sup> сайдиди.

<sup>1</sup> Шарипатда тўрттадан ортиқча хотин олиш йўқсир. Худоёрнинг расмий никоҳидаги хотини тўрттадан ошмас, яъни, инти хотин ола; ирган бўлса, тўртички хотинини канизликка кечириб, ўрнига янгисини қўйиб турар эди. Оғача канизликка кечирилганларни ҳам бунда қўшиб ҳисоблайдир (муал.).

<sup>2</sup> Атроф ҳокимлари куномад тариқасида чиройлик қизларни хонга юбориб турғучи эдилар.. (муал.).

нинг ҳарамлари учтўрт йилнинг ичидаги бунчалик чўриларга эга бўлди... Янги ва кенг ўрдага келиб яйрашмармиз деган эдик, баракатларингизда кундан-кун баттарроқ сиқилишиб борамиз. Ҳатто ичкари ҳавлиларда бир уйга саккиз, тўқуз каниз жойлашишга тўғри келиб қолди. Бу ҳол давом этса, бирар йиллар ичидаги яна бир янги ўрда солишқа тўғри келадир. Бу, албатта, мумкин эмас. Ундан сўнг сайиднинг ҳамма диққатларини ҳарамга тортилса, мамлакат иши халалдор бўлишида ва бунинг уволини бизлар кўтаришимизда шубҳа йўқ. Мана шу андешаларга бориб, сиз билан кенгашмакчи эдим... Бу андешам Ботирбоши холага ҳам маъқул тушиб, ваъда берди. Сиз ҳам шу гапларни яхши ўйлаб, ўз фикрингизни менга сўзланг-чи, Гулшанбону.

Гулшан оғача ойимнинг мақсадига тушунмагандек бироз ўйланиб турди:

—Муддаоларига чўрингиз тушунмадим, ойи хоним.

—Тушунмаган бўлсангиз,—деди Оғача,—мундан сўнг ҳарамга хотин ва каниз келтирилмасин, дейман.

Гулшан бошини қуий солди. Чамаси, Оғача ойимнинг таклифи унга ёқмагансумон эди. Дарҳақиқат, оқиздаги ошни олдириш ҳар ким учун ҳам бир хил эмасдир.

—Биз каминаларда нима гап, айланай ойи хоним... Биз, ҳарна қылсақ, онҳазратимнинг буйруқлари билан қиласмиз... Биз онҳазратнинг отқан ўқларимиз.

Оғача ойим Гулшаннинг кўзига анча тикилиб қолди. Лекин Гулшан кўзини ундан қочириб срга боқди.

—Албатта, биз сайиднинг отқан ўқларимиз,—деди Оғача ойим қизишқаннамо.—Лекин, хўжам буюрди, деб ишнинг ўнг-терсига қарамай югура бериш аҳмоқлиқдир. Агар сиз билан мен онҳазратнинг холис қуллари бўлсақ, сайиднинг давлатларига рапха солмайлиқ, дўсти нодонлиқ қиласмайлиқ. Мана бу—холис қуллик даъвосида бўлған бизнинг қўллимиздан келадир... Зоҳиран, сайидга хиёнат кўринса-да, ҳақиқатда холис дўстлиқ, деб сизга бу таклифни қилдим. Сайидни кунчилайди<sup>1</sup>, деб бошингизга келтира кўрмангки, ҳозир ҳам мен онҳазратнинг бир

<sup>1</sup> Кунчи—рашқ қилиш, қизганиш.

юзинчи хотини бўламан. Юз хотиннинг биттаси бўла туриб, кундашлик қилиш ўзи телбаликдир. Лекин, орада бир гараз<sup>1</sup> бўлса, ул ҳам сизга айтканимдек, холис қуллиқ—чин давлатхоҳлиқдир<sup>2</sup>, тушундингизми Гулшан.

Гулшан “биз сайиднинг отқан ўқларимиз” деб Оғача ойимни аччиғландирған эди. Ўз хатосига тушунган Гулшан узр айтди.

—Мен сизга бу гапни бошқа мақсадда айтдим, ойи хоним. Биз, дедим... албатта, биз...

—Агар сиз бунда ноилож бўлсангиз, мендан йўл сўранг.

—Пир бўлиб қўлимдан тутсангиз, онҳазратимнинг ўғурларида бошим фидо бўлсин.

—Гап шундай бўлса, иккимизнинг бу ишка кўмаклашувимиз ёки сукут қилишимиз давлатхоҳлик, эмас, душманликдир,—деди Оғача ойим.—Маним сизга кенгашим—бундан сўнг устингиздаги хизматка бир оз ўйлашиб қадам босишидир.

—Мени итобга<sup>3</sup> тутсалар?..

—Бунинг тадбири осон,—деди Оғача.—Аввал шуки, сайиднинг қўзларига оз кўрининг, кўринган чоғингизда сулук чўри тополмадим, деб узр айтинг. Сизни, тополмабсан деб қийин-қистоқча олмаслар, жазога тортмаслар. Мұхтожликдан қўрқсангиз мен бор, мен сизга қўлимдан келган ёрдамни қиласман. Маъқулми, Гулшанбону?!

Кейинги жумла билан Гулшаннинг чеҳраси очилиб кетди.

—Хўб, айланай ойи хоним.

—Аҳсан!

Даҳлизда санама тикиб ўлтурган канизлардан бири—хазинадор югуриб кирди.

—Лаббай.

—Опанга икки тилло бер, устига мунсак ёп!

Аҳсан икки қўлини қўкрагига қўйиб, таъзим қилғандан сўнг, чиқиб кетди.

—Шундай одатингизча маним олдимға келиб туравуринг, керагингиз бўлса тортиномай айтинг.

<sup>1</sup> Гараз—мақсад, ният, муддао.

<sup>2</sup> Давлатхоҳ—хайриҳоҳ; дўст.

<sup>3</sup> Итоб—таъна.

Гулшан бош букиб құллық қилди. Эшик очилиб, құйыда адрес мүнсаги билан Аҳсан кирди ва Гулшаннинг устида тұхтади. Гулшан ўрнидан туриб ойимга бош зәди. Шу ҳолда Аҳсан мүнсакни унинг устига ёпиб, құлиға икки тиллони ҳам узатди. Гулшан устида мүнсаги билан оқистағина ўлтурдид. Аҳсан ҳам турған жойига чүккалади. Гулшан дуоға құл күтарди. Аҳсан омин, деди. Дуодан сұнг Гулшан ва хазинадор—Аҳсан оқиста-оқиста орқалари билан юриб, Оғача ойимнинг ҳузуридан чиқдилар.

### 30. ХОНИМ ОЙИМЛАР

Гулшан зәнида мүнсаги билан даҳлизга чиқиб, ундаги канизлар томонидан "илтифотта лойиқ күрилгани" учун табрик қилинди. Кафшандозда кийинар экан, күзи түғридағи шаҳнишинда эди. Канизлар билан хүшлашиб ҳавлиға тушди.

Юқорида сүзланғанидек, бу ҳавлида хоннинг суюкли хотинлари ўзларига хос доя, чевар, канизлар ва қуллари билан туар әдилар.

Оғача ойимнинг қаторидағи иккінчи танобий хоннинг суюкли хотини Розия ойимға қарар эди. Розия ойим гарчи ўткан йиллардағына хонға никохланған бўлса ҳам, ўзининг хаёлий ҳусни билан "сайид"нинг илтифотини жалб этиб, ҳарамда биринчи мавқуға мингган хонимдир. Хизматига тўрт каниз ва икки қул ҳадя қилинған бу ойим асли кошғарлиқ бўлған Охундженбой деганинг кизидир. Розия хоним қызылқ чоғида Кўқон бойларидан Жонбобо отлиғ бир кишига тегиб, бир бола туққандан кейин эри ўладир. Бундан сұнг кўқонлиқ Миён Фазл Ваҳҳоб ҳазратка эрга чиқадир. Гулшанбонуга ўхаш хуфиялар "сайид"нинг қулогиға еткірган бўлсалар керак, бир кун хон, тўсіндан арава юбориб, Розия хонимни "мехмонға" чақиради...

Хоннинг ҳукмига қарши Миён Фазл Ваҳҳоб нима ҳам қила олсин. Розия хоним хон ҳарамида бир кеча қўниб, эртаси уйига қайтадир. Ул уйига қайтиб келганда Миён Фазл Ваҳҳоб Розия хонимнинг қўлиға талоқ хати топшириб, етти арава мол билан ўрдаға жўнатадир... Миён Фазл Ваҳҳоб бу ишни қўрқанидан қилғанми ёки хонға аччиғ тариқасидами, ҳар ҳолда буниси ҳатто Розия ойимнинг ўзига ҳам қоронғидир<sup>1</sup>.

<sup>1</sup> Ҳарам тўғрисидаги маълумотимизнинг аксариси бу кунда ҳам ҳёт бўлған шу Розия ойимдан олинди. Ҳоёр тўқсон ёшларға еткан бу кампип ўзининг кучтлик хотираси билан бизга қийматлик маълумотлар берди. Ҳануз сақланниб келган беъзи хусусиятлари билан бизни таажжубка солди. Мұхтарама Розия ойимға ва икки орада воситачи бўлиб устимға миннат қўйған кўқонлиқ дўстим Босит Қодирийға ташаккур ва раҳматлар айтишқа бурчлиман (муал).

Гулшан Розия ойимнинг даромадига етканда икки нафар каниз даҳлиздан чиқиб, бўсағанинг икки томонида қўл боғлаб ва бош букиб тўхтадилар. Шу ҳолда ичкаридан гўё юзи сут билан сугорилғандек оқ, қуралай кўзи ойсиз ва булатлиқ кечасидан ҳам қорароқ, қадди сарв каби мавзун, қора сочи тақимини ўпкан, уст-боши ипак ва олтиналар билан гарқ бир хоним хиромон чиқиб келди. Бошидағи ҳисобсиз кокилларини санама тикилган оқ ҳарир рўймол билан озорсизгина боғлаған, ёқа ва этакларига нафис жияк бириттирган хонатлас кўйлак, бухоро кундалидан қирғоқларига олтин уқа (қўр) тутулған енгиз желатка кийиб, ёқут кўзлик олтин тұгмаларни бўшқина солған, ҳуснда мисли оз бу нозанин хоннинг суюкли хотини—мазкура Розия хоним эди. Розия хоним орқасидан саккиз-тўққуз ёшлар чамалиқ, кўз ва тишидан бошқа аъзосида оқи йўқ бир бола кўриниб, хонимни таъқиб этди. Бу ёш югурдак қулча хонимнинг ҳар бир майда хизматларига тайёр каби оёғ олар эди<sup>1</sup>.

Розия хонимга қарши келгучи Гулшан букилиб салом қилди. Розия хоним ишорат билан жавоб бергач, "Эсонмисиз" деди ва унинг жавобини ҳам кутмай шаҳнишин томонга қараб йўл солди.

Гулшан Розия ойимнинг қуйисидағи даҳлизга юzlаниб, ундан канизлардан Қурбон ойимнинг соғлигини сўраб

<sup>1</sup> Куллар аксар тожик ва ҳабашдан бўлиб етти ёшдан ўн икки ёшгача эдилар ва ҳарамда бундан юқори ёшдаги қуллар сақланмас, қул ўн икки ёшга етканда, ҳарамдан чиқарилиб, ўрдадаги биравр хизматка белгиланар эди, дейдир Розия ойим. Эрлиги олинган (бичилган) қуллар Худоёрнинг онаси Ҳоким ойим—Жорқин ойимчага (1285 ичч. йилда вафот) фақат иккни нафар бўлиб: (Эшмат саркор, Тошмат саркор; ҳар иккави ҳабаш) булар ҳам хондан ташқари ҳарамга киralмас эканлар. Ҳар кун эрталаб хон онасига салом бергалини кирганда ҳалиғиги икки нафар қул ҳам хоннинг орқасида кириб. Ҳоким ойимга салом бергандан сўнг яна хон билан бирга чиқишиб кетар эканлар (бу иккиси Шералихондан қолган, Ҳоким ойимга яқин, қадрлон қуллар бўлганга ўхшайдир).

Розия ойимнинг айтишига қараганда, шу икки қулдан бошқаларнинг эрлиги йўқотилмаган экан. Бундан онглашиладирким, Худоёр ҳарами тўғрисида ёзгучи ўрусларнинг қул (евнух) ларни каниз ва хонимлар билан аралаш юрган ҳолда кўрсатишлари муболагадир.

Розия ойим яна тафсилга киришиб: "Хон биринчи мартаба таҳтдан ҳайдалишида ўзига қарашилиқ ёш қуллардан бир нечасини Жиззахка элтиб ўқутди ва сўнгти даврида уларни баъзи мансабларга қўйди. Улар: Шоғулом жарчибони, Жамил Файзулло ва Муллача хазиначилар. Давлат удайчи, Давлат саркор ва Шопсанд қўрошилар, дейдир. Бу қуллар ҳам ҳарамга киralмаганларидек. Эрликлари ҳам жойида экан (муал).

үтди. Құрбон ойим танобийсидан сүнг ҳавлиниң күн ботишиға мойил бино Шодмон ойимға қарашилиқ ва шу билан ҳарамнинг биринчи ҳавлисидаги ойимлар ҳисоби битадир<sup>1</sup>.

Гулшан ҳавлиниң күн ботиши—ошхона ва бошқа рүзғор үйлари ёни билан бориб бир эшик орқали бизга маълум узун йўлакка чиқди. Йўлакда сув ҳавлисидан чиқиб келган бир каниз Гулшанни кўриши он қўлидағи сувлик кашкулни ерга қўйиб югурди:

—Эсонмисиз? Мунсак муборак, аямлар соғми?

Гулшан қўйл учи билан кўриши:

—Ўзинг ўйнаб қулиб юрубсанми? Мунисхон пошша ойим саломатмилар? Биби пошша ойим ёзилиб кетдиларми?

—Шукур, шукур, бизнинг ҳавлига кириңг.

---

Розия ойимнинг айтишига қараганда, Худоёр ўзининг уч карра ҳонлиқ даврида шу хотиниарга уйланган: 1). Қозоқ тўра—Розия ойим бунинг отасини аниқ айтамайдир. Лекин, ўзи қирғизлардан эди, дейдир. Фикримизча, Мусулмонқулиниң қизи шу бўлсамикин?.. Ҳизматида тўрт канизни бўлган; 2). Анбарчик тўра—Ўратепада юзбеги бўлған Худоёрбек волламининг қизи; 3). Катта пошшо ойим—қўқонлиқ Ҳўжа Калон тўранинг қизи, Насрилдин бекнинг онаси, ҳизматида етти каниз, тўрт қул; 4). Қўқонлиқ ойим—Қўқонлиң Сармозор даҳасидан, кимининг қизи эканини Розия ойим билмайдир. Ҳон биринчи мартаба таҳтдан қувлангач, эрга тегиб кеткан; 5). Қурбон ойим—гумалардан, Ўрмонбекнинг ҳазиначиси, ҳизматида икки қул, уч каниз. 6). Гулзода бекач—гумалардан, ҳизматида тўрт каниз. Шаҳзодаҳон исмлиқ бир қизи бўлиб, 1919 йилда Ўшда ўлган; 7). Ширин бекач—гумалардан, ҳизматида уч каниз, икки қул. Тўра пошша исмлиқ бир қизи бўлиб, қўқонлиқ Кароматхон тўрага берилган; 8). Исфаралик ойим—исфаралик Ҳабиб эшоннинг қизи. Бундан Моҳзодаҳон исмлиқ бир қиз туғулиб, қўқонлиқ Сафоҳон тўранинг ўғли Исохонга берилган (Моҳзода алжол тирик эмиш). Худоёр иккинчи ҳонлиқ даврида исфаралик ойимни гарликда айблаб, баҳона билан ўрладан ҳайдаб юборган.

Гума — жория, ҳизматкор.

Худоёрининг иккинчи ҳонлиқ даврида олган хотинлари: 9). Мунисхон пошшо—қўқонлиқ Гозихон тўранинг қизи, ҳизматида саккиз каниз, тўрт қул. Бундан Сайид Умарбек тўранинг қизи, Фансурулло-бекнинг онаси; 10). Пошибону ойим—Қўқонда машҳур Баҳодирхон тўранинг синглиси, Муҳаммад Аминбек билан Чорсолаҳон пошшонинг онаси, ҳизматида тўқуз каниз, беш қул.; 11). Масъудаҳон (Огача ойим) Ибодуллаҳўжа қизи, Фансурулло-бекнинг онаси; 12). Кишибиби (Қизойим)—Худоёрининг тогаси Гадойбой дотқонинг қизи. Бу аслда Шомуродхоннинг хотини бўлиб, Шомурод ўтгандан кейин Ҳоким ойим Бухорода ўғли Худоёрга Кишибибини ни-коҳлаб берган, ҳизматида беш чўри, уч қул; 13). Кичик Шоҳойим —

—Киарман,—деди Гулшан ва устидаги мунсакни еша берди.—Сен маним келганимни уларга айтма. Мен ўзим бир оздан кейин чиқарман.

Каниз орқасига бурилиши билан йўлакнинг юқори эшиклиридан бири тарақ-туруқ очилиб, ичкаридан икки ёш, оёғ ялан каниз қувлашиб чиқдилар. Гулшанни мунсак билан овора кўрган қизлар шу тарафка қараб югурдилар.

—Гулшанжон, Гулшанжон! Эсонмисиз, омонмисиз? Сарпа қутлуғ!

Шўх канизларнинг бири Гулшаннинг олдидан ва иккинчиси ёнидан ўрмалаб, бирининг оғзидан иккинчиси "Гулшанжон, эсонмисиз!" ни олиб эсанкиратдилар.

---

Шутгун ҳокимининг қизи, Ўрмонбекнинг онаси, боланинг чилласи чиқмай ўлган; 14). Тўхтапошшо (Чиндовуллиқ ойим) — Наманган тумани Чиндовул қишлоғининг хўжа қизларидан, хизматида тўрт каниз, уч қул; 15). Катта Шоҳойим — Дорбоз ҳокимининг қизи, хизматида етти чўри, катта Шоҳойимдан Сайд Фансурулло исмлик ўгул тугулиб, беш ёшида экан, Марғилонда Пўладхон ўлдириган; 16). Гуландом бекач — гумалардан, бундан Офтобхон исмлик қиз тугулиб, Худоёр вақтида, ўн уч ёшида ўлган; 17). Моҳбегим бекач — гумалардан. Биняминбекнинг онаси, хизматида уч қул, уч чўри; 18). Гулқиз бекач — гумалардан; 19). Асал бекач — гумалардан. Учунчи хонлиқ даврида; 20). Қоратегинлик ойим — Қоратегин ҳокимининг қизи, хизматида етти чўри; 21). Бибишоҳо экавотлиқ ойим — Наманган юкорисида Экавот қишлоғининг катта эзиони Ҳўжам пошиш тўранинг қизи, хизматида уч чўри, икки қул бўлган; бу ойимдан Сайд Фансурулло исмлик ўгул тугулиб, уч ёшида Пўладхон ўлдириган; 22). Розия ойим — (шу маълумотларни бергувчи) Розия ойимдан Сайд Умарбек отлиқ ўгул бўлса ҳам уч ёшида ўлган; 23). Қамбар пошиш — Ҳўжакалон тўранинг кичик қизи, Катта пошиш ойим ўлгандан кейин болдиз олган, хизматида уч каниз; 24). Ойнисахон пошиш — Турсун оталиқнинг қизи; 25). Туҳфаниса ойим — Олтиариг қозисининг қизи; бу қизга уйлангандан ўттуз етти кун кейин Худоёр ўрусларга сигиниб Тошканд келган; 26). Ҳамроҳ биби ойим — қўқонлиқ Нурматбой деганинг қизи; 27). Сайданисо (чимёнлиқ ойим) қирғизлардан бирининг қизи; 28). Шодмон ойим — гумалардан; хонга суюкли эмиш, хизматида уч чўри, уч қул; 29). Гулбону бекач — гумалардан; хизматида бир чўри, бундан Озодаҳон исмлик қиз тугулиб; 30). Руҳафзо бекач; 31). Сайқал бекач; 32). Санавбар бекач; 33). Аргувони бекач; 34). Ниғор бекач; 35). Рузвон бекач. Бу олтоби ҳам гумалардан эмиш. Бу ерда ёзилгацлар Худоёрнинг тугал хотинлари ҳисоби бўлмас, деб ўйтайман. Чунки Розия ойимнинг хотиридан баъзиси кўтарилган бўлиши мумкинdir. Биз Розия ойимнинг ёнида эканмиз, ўртоқ Босит:

—Хон неча хотин олган эди, ойи? — деб ҳазил тариқасида тақрор савол берди. Розия ойим меңдан иймантан қиёфада:

—Хон курсин, унинг олган хотинларининг ҳисоб-китоби йўқ, болам, — деди ва манимча жуда тўғри сўзни айтди (*муал*).

—Бўлди, бўлди! Шўх байтал ўлгурлар!—деди Гулшан,—ойимлар эшилса нима деган гап бўлади?

Қизлар Гулшаннинг сўзига қулоқ солмай, келган тарафларига қараб уни судрадилар.

—Тўқ байтал! Гулшанжон! Тўқ байтал!

Гулшан аччиғланса ҳам яна уларнинг сўз ва ҳаракатидан кулишка мажбур эди.

—Қуриб кеткүрлар... Шунинг учун ҳам сенларнинг олдингта киргим келмайди-да!

Сўзга илтифотсиз, ўюн билан борған канизлардан бири Гулшаннинг қўлидағи мунсакни титкилаб ўзига тортди:

—Қайси гўрдан олдинг, менга берсанг-чи шуни!

—Ол, ол!—деди Гулшан мунсакни бўшатиб,—ўлимлик қиласран!

—Албатта тобутимга ёпарлар!

Йўлакнинг бошидағи эшикка етдилар ва учиси бирдан сиқилишиб, ичкарига кирдилар.

### 31. ҚИРҚ ҚИЗЛАР

Гулшанлар кирган ҳавли "Қирқ қизлар" деб аталар эди. Бунда хоннинг кўнгил очишига хизмат қилғучи "Қирқ қизлар" туар эдилар. Бу ҳавли ундаги ўюнчи, созанда ва навозанда канизларнинг сонидан олиб "қирқ қизлар" аталған эди.

Худоёрнинг ҳарам канизлари сони бир юз эллий беш нафар бўлиб, булардан ўн тўрт нафар оқ саройда, саккиз нафар шаҳнишинда, яъни хоннинг ётиш туришига маҳсус, саккиз нафар Үрмонбекка қарагучи, ўн нафар доялар ҳузурида, йигирма беш нафар шу "қирқ қизлар"да ва қолғанлари ҳар қайси хоним ойимларнинг хизматида эдилар.

Ҳавли юзида тўп (копток) ўйнағучи "қирқ қизлар"дан етти-саккизи Гулшан олдига югурдилар.

—Эсонмисиз!

—Елиб югуриб ҳорманг!

—Эрингиз ўлмадими!

—Шаҳар йигитлари омонми!...

Бу қизлар ҳалигилардан қолишмайдирған шўх эдилар. Гулшан ҳам энди жиддият сақлаб турмади:

—Зерикмай ўлтурибсанларми? Ичларингда туғиб қўйғанларинг йўқми? Ўйнаш қилиб тутилмадингларми?

Бу ҳавли тўртта кичик ва битта зўр танобий уйдан,

ҳам "қирқ қизлар"ға махсус ошхона ва бошқалардан ташкил топиб, қизлар кичик уйларга жойлашқан әдилар. Уларнинг ясанига келганда, юқоридағи канизларда кўрилгандек—қизил шол кўйлак, сариф гуллик қизил шол рўймол, шуваматос ёки адрес желатка эди. Ҳозирги тўп ўюнига иштирок этувчи қизларнинг ҳаммаси деярлик ялан оёғ бўлиб, юмишдаги ва ошхонада ош пиширгучи қизлар дуранглик бедона кафшлар кийган әдилар. Аксарият, йигирмадан ошқан қизлар, ичларида ўн олти, ўн етти ёшлиқлари ҳам кўринар эди. Бу қизлар мамлакатнинг ҳар тарафидағи беклардан хонга ҳадя тариқасида юборилғанлар, шунинг учун улар терма дўндиқлар әдилар. Чўри исми билан ҳарамга келган кунлари ҳар бирлари ҳам хоннинг "илтифоти"га бир-икки мартабагина "лойик" кўрилиб, сўнgra "қирқ қизлар" ичига ҳавола қилинған әдилар. Улар ҳануз ҳам шаҳарнинг машҳур хотинлари бўлған Нусрат ҳофиз, Ботирбоши хола, Тилло ҳофиз, Тожи ҳофиз, Мисқол ҳофиз, Хон оғача, Мисоқ оғача, Улуғ ўюнчи, Шоҳбачча, Ражабхон, Тош ҳофиз ва ҳатто марғилонлиқ Зебихонлардан ўюнга, созга, ашулага таълим олиб келарлар ва шунинг учун ҳар бирлари ўз ҳунарларида яхши санъаткор бўлған әдилар. Жумъа куни етканда бу ҳавлидаги катта танобий тартибка солинар, "қирқ қизлар" янги кийимлар кийиб упа-эликлар қўярлар, турли зийнатлар тақиб, ажойиб суратда базмга ҳозирланарлар эди. Жумъа намозидан кейин хон баъзан ёнида Розия ва Оғача ойимлар билан бу ҳавлига ўтар ва катта танобийнинг тўрига қўйулған махсус курсига ўлтуриб, "қирқ қизлар" базмини кўрар эди...

Шу йўсун қизлар Гулшанни ҳавли ўртасидағи тўп ўюнига судрадилар. Гулшан ўюнга иштирок этишда тиҳирлиқ қилиб кўрган эди, қизлар зўр келдилар. Ноилож ул ҳам ўйнамоққа мажбур бўлди. Бир чеккада ўлтуриб ешинди. Шу қизлардек ялан оёғ, бош ялан бўлди. Товор кўйлагини аяб липпа урди, енгини тирсаги юқори-сигача шимарди ва ички кийимини ҳам болдириғача кўтарди.

Қизлар ўзлари ясаған катта ипак коптокни Гулшанга бердилар:

—Марра беш-ўн; ҳар ўнда бир айланиш; агар тўпни маррага еткармай қочирсангиз, ҳар биримизни апичиб, ҳавлини бир айлантириб чиқасиз!—дейишиди қизлар.

Гулшан шартни эшишиб ўйланиб турди.

—Агар мэррага еткарсам?  
—Биз апичиб айлантирамиз!

—Қочинглар бўлмаса!—деди Гулшан ўртага тушиб,—  
тўпка тегсанглар, менга ҳадук берсанглар ҳисоб эмас!

Қизлар унинг шартига кўниб ҳавлиниңг теварагига  
тарқалишдилар. Гулшан ўйинни бошлади. Тўп чиқагон  
эди. Гулшан биринчи ўнни муваффақият билан тамомла-  
ди. Ўн иккинчи урушда биринчи ўн учун айланган эди,  
Гулшаннинг узун соchlари атрофка тарқалиб, ҳатто  
кўкраги ҳам ларзага келди... Қизлар қийқиришиб кулди-  
лар. Иккинчи ўннинг айланиси ҳам шу йўсун кулги  
берди. Лекин учунчи ўннинг ерга саккизинчи урулишида  
копток қочти. Гулшан коптокни ҳарчанд қувлаб юқори  
чиқаришга урунса ҳам бўлмади, ерда думалаб қолди.  
Қизлар қийқириқ ичиди чапак уриб юбордилар ва Гул-  
шанни ўраб олдилар. Гулшан чиқиб қочишга хезланса ҳам  
бўлмади, ул кутмаганда бир қиз орқадан келиб сакраб  
минди...

—Хих, эшагим!

Қизлар кулишар эдилар. Икки қиз Гулшаннинг олд  
ўрум сочидан ушлаб етаклади. Бу томошага ҳатто уйдаги  
ва ошхонадаги қизлар ҳам қизиқсиндилар. Биринчи қизни  
ҳавли айлантириб чиққан эди, иккинчиси минди... Шу  
йўсун бечора Гулшан ўнлаб қизни ўз устига миндириб,  
орқаси яғир бўлаёзи. Яна ўюн бошланди...

Шомга яқин ош тайёр бўлиб, қизлар ўз қўшоқлари  
билан уйларига кирдилар. Гулшан ҳам бир қўшоқ қиз-  
ларга қўшулиб, ўртадаги уйга кирди. Қизларнинг ўзидек  
уйнинг полос ва жиҳозлари ҳам бесаранжом эди. Унда бир  
рўймол, бунда бир маҳси, нарида яна бир нарса... Хул-  
ласи, ўй ивиришиб ётар эди.

Гулшан бу ҳолдан ранжиб қизларни урушти:

—Сенларга ҳеч сон кирмади... Қачон кўрсам, уйларинг  
лўлининг хуржун солган елкаси!

—Лўлининг хуржун солган елкаси бўлса,—деди Нозик  
отлиғ бир қиз,—ўзинг йигиштириб бер, Гулшан опа!

—Менми, менга нима?

—Менга ҳам нима?

—Сенинг турадирган уйинг,—деди Гулшан,—йигиш-  
тирсанг, кўнглинг равшан бўлади.

—Уй йигиштирилмаса ҳам кўнглим равшан,—деди  
Нозик ва ёнидағи Туҳфага қараб кулди.—Туҳфа, сенинг  
ҳам кўнглимг равшанми?

Түхфа оғзини катта очиб, Гулшаннинг олдига келди:

—Мана, ўз кўзинг билан қара, опа: кўнглим чилчироғ ёққандек равshan, кўрдингми?

—Кўрдим, кўрдим?—деди Гулшан, юзини четка ўгуриб.—Кўнглинг равшанлиги устига яна бир нарса ҳам тилабдир...

—Нима тилабдир, эрми?—деди учунчи ёқдан Қумри.—Кўнгилдагини топар экансан, опа! Меникига ҳам қара-чи, нима тилар экан?

—Сеники ҳам эр, —деб кулди Гулшан. —Буларга бир сўзни айт-да, қоч! Ош келди. Нозик, дастурхонингни ёз!

Нозик дастурхон ёзди. Ўртага икки хитой лаганда палов қўйилиб, Гулшан билан етти қиз ошқа ўлтурдилар. Кенгаш-пенгаш бўлмади. Хуфтандан кейин уйлардаги қизлар бирин-сирин катта танобийга йигила бошладилар. Иккичилдирма қизитилди ва дутор, танбур, гижжак, чанг каби асбоблар созланди. Қизлар ўзаро базмга ҳозирланар эдилар ва ҳар кеч ҳам базм билан кўнгил ёзар эдилар. Дарҳақиқат, әркаклар дунёсидан алоқаси кесилган мазлума, оила ҳаётидан маҳрум бечоралар шундан бошқа нима билан ҳам овинсин? Уларнинг овинчоғи—кундузлари ўюн, кечалари базм ва тунлари уйқу ҳам туш эди.

Қизларга маҳсус назокат билан соз чалинар эди. Созга йўлбошчилиқ қилған чилдирма ярим товушда гумбирлар, қўнгуроқлари шинғирлар эди. Катта қандиддаги чилчароғ нури остида ҳарам қизларининг ҳусни ял-ёнар, ўртада ўйнагучининг маммалари мақом билан силкинар ва "Қирқ қизлар"даги кундалик базмга одат қилған бошқа ҳавли канизлари билан танобий борған сайин тўла борар эди.

Ўюнчи қуллиқ қилиб, саҳнадан чиқди. Унинг ўрнига Нозик қўзғалди. Нозик саҳнаға чиқиши билан чилдирма ҳам бошқа куйга ўтди:

—Бак-баканг, бак-баканг...

Чилдирмага созлар замлангандан кейин, икки ўртадан узуқ ва шўх бир куй туғилди. Нозик ўртада хиромон бир тарафка ўткан эди, қизларнинг баъзисидан соз каби шўх ва нафис оҳанг эшитилди:

Очилганда лолалар, териб юргай болалар.  
Айтингиз-чи, холалар, ўткан дўндиқ созмидир?  
Ўткан дўндиқ созмидир?

Термулганим билмаса, писандига илмаса,  
Раҳми асло келмаса, менга қилған нозмидир?  
Чеккан жабрим озмидир?

Нозик ўйнар, қизларнинг ашуласига аъзо ҳаракати билан тасдиқ ишорасини берар ва бунда нафис бир санъат кўрсатар эди.

Багрим ўтда ёнади, ёрим мендан тонади,  
Қулни йўққа санади, мендан ё аразмидир?  
Мендан ё аразмидир?  
Ёрим юзи гул эрур, зулфлари сунбул эрур,  
Лақза кўрган қул эрур, ёки бул пардозмидир?  
Ёки бул пардозмидир?  
Хуммор кўзинг ўйнатиб, ошиқни арzon сотиб,  
Исён лойига ботиб, жабру ситам бозмидир?  
Жабру ситам бозмидир?  
Тирнамагил сен ярам, йиглатма кўб, қил карам,  
Турган ўрнингдир ҳарам, яъни шоҳим базмидир!  
Яъни шоҳим базмидир!  
Ою йиллар йиглаган, багрин ҳар дам тиглаган,  
Ҳасратидан биглаган<sup>1</sup>, баҳтсиз бир қиз Назмидир!  
Баҳтсиз бир қиз Назмидир!

Кейинги байтлар оғир бир фожиъани тасвир қилдилар: ойлар, йиллар йиглаган, ҳасратидан ҳушсиз йиқилған баҳтсиз бир қизнинг жонсуз фарёдини гавдалантириб кўрсатдилар. Бу ўрунда шўх куй лобарфина қилиб бир ҳасратка таржимонлиқ этди. Юқоридан бошлаб ўйноқи руҳда куйлаб келган қизлар ва доим нозу карашмада бўлған ўртадаги ўюнчи ҳам бундаги оғир маънони ўзича олишқа тиришдилар...

Ою йиллар йиглаган, багрин ҳар дам тиглаган,  
Ҳасратидан биглаган баҳтсиз бир қиз Назмидир!

Бу "баҳтсиз бир қиз" базмдаги қизларнинг ҳар қаюсига маълум эди. Фақат бу мажлисда унинг фарёди иштирок этса ҳам, ўзи иштирок этмас, беҳисоб фарёдлар, фигонлар, ҳасратлар билан чарчаған бу қиз ҳозир тупроқ остида тинчиб ухлар эди. Унинг таржимаи ҳолини "қирқ қизлар"дан ҳар ким билганидек, ҳатто уни қўмсағ тиглагуучилар ҳали ҳам топилар эдилар. Дарҳақиқат, озодликдан маҳрум этилган мазлума қизларга неча асарлар

<sup>1</sup> Биглаган—бигиллаган, ҳушсиз йиқилған (муал.).

қолдириб кеткан бир шоирани ким билмасин, күбчиликнинг айталмаган ҳасратини куйларга солиб берган шоирани ким унутсин? Ошиқидан айрилған бир маъшуқа, номусига тўқунилған бир мазлуманинг фарёди кимларнинг юрагига кириб ўлтурмасин?

Шундай... Мундан бир йиллар илгари шу "қирқ қизлар" ичida Назми исмлик бир қиз ўлган эди. Бу шу қизнинг тўқуған байтларидан бири эди. Қизларнинг сўзига қарағанда, Назми Қўқон қишлоқларининг биридан, чиройлик қиз экан. Назми холасининг ўғли билан севишкан, ҳатто тўй кунлари ҳам яқинлашқан экан. Отаси жуда камбагал деҳқон бўлиб, Худоёрнинг неча йиллик солиқларини тўламаган экан. Худоёр чўғоллари (золим табиъатлик, раҳмсиз солиқ йигувчилар) қишлоққа чиқиб, Назмининг отасини сиққанлар, урганлар... Қизидан бошқа мол тополмай, уч йиллик солиқ бадалига Назмини тутиб, Худоёрға тортиқ қилғанлар. Ҳонга Назмининг ҳусни ёққан, уни доя хотинларга қўшиб ҳаммомга юборған. Худоёр бир-икки кеч бечоранинг номусига тегиб, сўнгра "қирқ қизлар"га қўшқан... Назми шунда икки йил чамаси куйлаб, йиғлаб юрган, "қирқ қизлар"га кўб янгиликлар берган ва охирда ўзи сил бўлиб ўлган...

Назмининг охирги икки байтидан сўнг базм битди. Ҳар ким ўз жойига тарқади.

## 32. НОЗИК

Гулшан бояги етти қизлар ёнида ухламоқчи эди. Нозик билан Туҳфа ўрун ёзар эдилар. Қумри Гулшанга шўхлиқ қиласиди.

—Сен аҳмоқсан, Гулшан опа!—дер эди Қумри.—Эрингни ёлғиз ташлаб биз "бўйдоқлар" ичida нима маъно топасан?

—Алжимай ўл!—деди Гулшан.—Сенлардан, албатта, маъно топмайман... Сенларнинг ўйлаганларинг фақат...

—Бўлмаса сен нимани ўйлайсан?

—Мен тириклик тўғрисида ўйлайман. Сенлар тўқлиққа шўхлиқ қиласанлар. Бир вақт мен ҳам хоним ойимларга чўри эдим. Бироқ сенлардек...

Ҳамма қизларнинг қулоқ-кўзи Гулшаннинг оғзида эди. Ўрунни ёзib битирған Туҳфа сўради:

—Сен ўйламасмидинг?

Гулшан бир оз жавобсиз, кулимсираб турди.

—Ўласам ҳам сенларча ҳар кимнинг олдида валдира-

мас эдим... Бу ўзи шайтоннинг иши. Намоз ўқусанг, рўза тутсанг, хаёлингта бу нарса ҳеч келмас. Мана биттаси Зарифа, сенлардек уят сўзга оғиз очмайдир.

—Ва-ха-ха-ха!—деб кулиб юборди Қумри.—Айт-чи ўзинг, Зарифа, сен кеча қандай туш кўрдинг?

—Қуриб кет,—деди Зарифа юзини четка ўгуриб.—Кишини кўрган туши билан айбламакчи...

Қизлар бирин-бирин келиб ўрунлари устига ўлтурдилар. Ўрун қатор ва бир-бирига тақаштириб солинган эди. Гулшан ўзи учун четроқдаги ўрунни танлади.

—Кўйлак ешар!—деди Қумри турған кўйи ва кўйлагини ешиб ташлади.—Иштон солар!

Қизлардан тўрттаси Нозикни таъқиб этдилар ва шартшурт бир-бирининг яланғоч этига уришиб шартак олишдилар. Қип-яланғач қизлар билан кулги бошланди.

—Сенларнинг ёнингда ётқан киши гуноҳкор бўлади,—деди Гулшан бошини кўрпага буркаб.—Агар билсанглар, ҳар қайсинг иккита, учта боланинг онаси бўладиган ёшдасанлар.

—Тўғри айтасиз, айланай Гулшан, —деди Қумри яланғоч ўзини шамъга солиб. —Менга яна бир қараб кўринг-чи, балки беш боланинг онаси бўлсам ҳам арзир.

Ҳамма кулишиб юборди. Кўрпани бир оз очиб қараған Гулшан ҳам бу ҳолдан ичи қотиб кулди.

—Шамъни ўчир.

Қумри тоқчадаги шамъни ўчирди. Уй қоронғиланди. Энди "нари ёт, бери ёт" билан бир-бирларини итариб, суриб кўрпани тўрт томонга тортишиб жанжаллаша бошладилар.

—Ухлатасанларми, йўқми?—деди Гулшан жекириниб.

—Жим, жим,—деди ярим товуш билан Қумри.—Гулшан бизнинг уйга ухлағали келган экан.

—Уйида эри ухлатмаған бечорани.

—Мен шунинг учун ҳам эрга тегмайман-да,—деди Қумри.—Эр деганинг оти ўчсин, кишини ухлатмайди.

—Ухла, бечора, ухла,—деди Туҳфа,—"Қирқ қизлар"дан саранжомингни олиб кет.

Яна кулги кўтарилди. Гулшан ҳарчанд ўзини ушласа ҳам яна қизларнинг кулгисига тортилди.

—Гап-сўзда ҳам бир маъни бўлиши керак,—деди Гулшан,—бўшдан-бўшка ҳиринг-ҳиринг, бундан кўра тинч ухлаган яхши.

—Маъни ўзи нима, Гулшан опа?

—Маънининг маънисини сўрама, Туҳфа,—деди Қумри,—Гулшан опам жавоб берсин, бизнинг шу "қирқ қизлар"да қамалиб ётқанимизда ҳам маъни бормикин?

—Уни қўявур,—деди қизлардан яна бири,—Гулшан опам эрини ёлгиз ташлаб, биз маънисизларнинг ичидаги яна бир маънисиз бўлиб ётипти; шунда ҳам бир маъни бормикин?

—Товушларинг ўчсин.

—Бор, бор,—деди аллаким.—Бизга ҳамроҳ топиб келади.

—Бизга ҳамроҳ топиб келганида ҳам маъни борми?

—Нега маъни бўлмасин, бизга ўхшаш маънисиз кўпаяди.

Яна кулги кўтарилди. Қизларнинг "маъни"дан бошланған "пайрав"ларининг кейинги жумласи Гулшанга ҳам таъсир қилиб ҳиринглади.

—Қирилиб кет ҳаммаларинг... Энди маънисизни кўпайтирмайман, тинч ухлаларинг.

—Баракалла, —деди Нозик. —Ана энди сизга ҳам маъни кирипти. ·

—Бекор айтибсан, Нозик, Гулшан опамга маъни кирганига кўб бўлган.

—Масалан, қачон кирган?

—Анчадан бери... Эрга текканингизга қанча йил бўлди, Гулшан опа?

Қизлар яна шаққиллашиб кулдилар.

—Бемаза гапни қўйинглар, ухлайлиқ.

—Ухлашни бир оз қўйиб тур, Гулшан опа, —деди Нозик. —Мен сенга мазалик бир ҳикоя айтсанмий?

—Ҳикоянг қурсин...

—Ўзи мазалик гап. Эшиитмасанг, бари бир ухлатмайман.

Гулшан минғиллаб ўрнида ағдарилди.

—Айт, лекин чўзма.

—Чўзмайман. Сенлар ҳам жим ёт, овсинлар!

Бир-бирини қитиглаб, ҳиринглашкан қизлар Нозикнинг сўзига қулоқ солмадилар.

—Туҳфа, Қумри!—деб ҳайқирди Нозик.—Тинчимасанглар бўгаман, майлими?

Нозикнинг таҳдидига қулоқ солувчи яна бўлмади. Ноzik иргиб ўрнидан турған эди, қизлар кўрпага яшириндилар.

—Оғзингә аямай ураман, Наврүз!

Күрпә ичида қизларнинг пиқиллаши эшитилса ҳам,  
бояги тўполон биткандек бўлди.

—Уйғоқмисан, Гулшан опа?

—Гапуравер.

Қизларга яна бир мартаба танбеҳ ясағандан кейин Но-  
зик ўз ўрнига келиб ўлтурди.

—Бир кун эрталаб биз ҳаммомдан келар эдик,—деб  
ҳикоя бошлади Нозик,—бизга йўл устидан бир йигит  
ҳамроҳ бўлди...

—Эски дард,—деди аллаким, қизлар пиқиллашиб юбор-  
дилар.

—Эски гап бўлса, кишини эшиtkали қўймайсанларми?..  
Мен Гулшан опамга сўзлаб бермакчиман, сенлар эшитма-  
санглар, ухлаларинг ё бўлмаса, сўзни сўзга қовиштиларинг!

—Сўзлай бер, биз тинч ётамиз,—деди Туҳфа,—Наврўз,  
Қумри, Ҳамроҳ, жим ёт-да, ахир!

—Шундай, Гулшан опа, йўлдан бизга бир йигит  
ҳамроҳ бўлди. Ўзи қандай йигит деб сўра: сурма  
қўйғандек оҳу кўзи бор, қизил олмадек таранг юзи бор,  
энди чиқиб келган кўк майса мўйлаби, Розия хонимни-  
дан ҳам нафисроқ қалам қости... Устига кийган бекасам  
тўни ўзига шундай ярашқанки, биз қизлар ихтиёrsиз унга  
қарашдиқ, а, шундайми, Туҳфа?

Туҳфа тасдиқ қилди, Гулшандан уйғоқлиқ жавобини  
олиб, Нозик давом этди:

—Ёш, уятchan йигитка ўхшади. Йигирма чоғлиқ қиз-  
нинг ўзига тикилганидан уялиб, ерга қаради... Бизни  
ҳаммомга олиб боргучи Насиба хола билан Ҳанифа доя  
эдилар. Улар бизни йигитка айланишкан ҳолда кўриб, тез  
юришқа қистадилар. Биз йигитка қарай-қарай noctor қадам  
босар эдик. Йигитча бўлса биздан қолишмай бирга келар  
эди. Биз ўрда дарбозасига етаёзган эдик мен қайрилиб  
орқамга қарадим. Ёш йигит ҳамон ўн қадам нарида келар  
эди... Шайтон васваса қилиб кўнглимга бир гап келди.  
Секин-секин сурилиб, қизлардан кейин қола бордим. Энг  
орқага чиқғач, бошимдағи рўймолни олиб, паранжи ичи-  
дан ерга ташлаб юбордим... Дарбозага яқинлашқан эдик,  
дарбозани очиб дарбозабонлар четлашдилар. Рўймолим ер-  
га тушдими, йўқми—билмас эдим, лекин дарбозадан  
ташқарида тушиб қолишини тилар эдим... Иш кутканча  
чиқмади, деб афсус қилдим, чунки дарбозадан ўн адим  
ичкарига кирган эдик, дарбоза ёпилмасдан яна орқамга

қайрилдим. Ўзимдан беш қадам нарида тушкан рўймолимни бояғи йигит энгашиб ердан олар эди. Мен бурулиб йўлимга кета бердим...

—Опа, рўймолингиз тушти!

Юрагим орзиқиб тўхтадим. Йигитча рўймолимни келтирди, тусида бир оз кулимсиш бор эди.

—Сизникидир?—деб сўради.

—Меники,—деб қўлидан олдим, раҳмат айтиш ҳам эсимдан чиқсан. Дўндиқ йигит бошқа сўз айтмади. Рўймолни менга бериб ўрданинг улуғ дарбозасига қараб кетди. Мен бўшашибанча қизлар орқасидан ҳарамга судралдим. Мен йигитни бир адим наридан кўрдим, товшини ҳам эшилдим, қўли ҳам қўлимга тегди шекиллик. Ухламайсанми, опа?

—Уйғоқман,—деди Гулшан.—Хўш ундан сўнг нима бўлди?

—Нима бўлғанини ҳозир сўзлаб бераман... Юрагим ўйнаған ҳолда "Қирқ қизлар"га кирдим, "опа, рўймолингиз тушти, сизникими?" жумласи қулогим остидан кетмайди ва суврати кўз ўнгимга келган сайин, юрагим орзиқади. У ёқни ўйлайман, бу ёқни ўйлайман, ўйимнинг бошига еталмайман, аммо юрагимга бир парча олов ташланған, ёнаберадир. Ичимдаги шу ўт билан гўё мен маст бўлғанман, бошим шишкан, кўзим тинган, юрганимни турғанимни билмайман. Нега кўрдим, нега қарадим? Нега рўймолимни ташладим, нега олиб берди, нега ўрдаға киради? Бу ўзи жин, мени жинни қилмокчи... Оҳ, яна бир кўрсам эди! Ҳаммом борғанларнинг ҳар биридан сўрайман: "Йўлдағи йигитни сен кўрдингми?" "Кўрдим"... "Кўрган бўлсаларинг сенларнинг ҳам юракларинг ёнадими, яна кўргинг келадими?" "Йўқ". Шундан сўнг унинг жин бўлғанлиғига ишониб қоламан: мен жинга тегишим, жин мени чалди, дейман. "Бизнинг ўрдада шундай йигит борми?" "Йўқ". "Сенлар ҳам унинг орқамиздан ўрдага эргашиб кирганини кўрдингларми?" "Йўқ". Демак, мени жин чалған... Туҳфа бўлса: "Сен пари йигитка ошиқ бўлғансан", деб кулади. Мен унинг сўзига ишонаман. "Балки пари йигиттир, ул ҳам мени яхши кўргандир", дейман. Шундан кейин мен кута бошладим. Агар яхши кўрган бўлса, мени ўз юртига олиб кетар, деб ўйладим. Эрта кутдим, кеч кутдим, пари йигитдан дарак йўқ. Ўн беш кундан сўнг яна ҳаммомга бориш чоги етди. Мен сўйиндим, балки бу кун парилар юртига кетарман, деб

үйладим. Шу орзуда ҳаммадан илгари мен отландим. Бордиқ. Ҳаммомдан чиқиб пари йигит билан учрашкан жойға яқынлашқан здик, юрагим ўйнай бошлади. Учрашилганда қиладирған ишоратларни ўйлаб қўйған эдим. Агар четдан туриб ўзига имласа, қизлардан ажralиб қолмоқчи эдим. Маълум жойға етдик... Пари йигит йўқ. У ёқ-бу ёқса, тор кўча ичларига қарадим, яна йўқ. Баданимга совуқ тер чиқди, қизлардан ажralиб, йўлда тўхтаб қолғанимни ҳам билмайман. Бир вақт Насиба холанинг чақирған товши билан кўзим очилди ва не зайдада қизларға етиб олғанимни билмадим. Ўрда дарбозасига еткунча неча қайта орқамға қарадим,—деди Нозик ва узоқ тин олиб, бир оз тўхтади.—Шундай, мен пари йигитка ошиқман. Уч ойдан бери ошиқман, Гулшан опа.

—Пари йигитка ошиқмисан, хе-хе-хе.

—Нега куласан, Гулшан опа?.. Ишонмасанг, Туҳфадан сўра.

—Ошиқлигингта кулмайман,—деди Гулшан яна кулиб. — Сен айткан йигит пари эмас.

Нозик ўрнидан сапчиб турди.

—Ким бўлмаса?

—Одам!

—Одам? Сен уни кўрганмисан?

—Кўрганман... Ўзи бизнинг ўрдада... Ҳозир пойгачининг ўрнига ким ўлтурған, биласанми?

—Биламан, мирзо Анвар отлиғ киши.

—Сен ошиқ бўлған "пари йигит" шу...

Туҳфа бирдан хахолаб юборди. Бу кулгидан уйқуға борған қизлардан баъзиси сўчиб кетди.

—Мирзо Анварга ошиқ бўлған экансан, Нозик.

Нозик ҳамон қотиб турар эди...

—Шу қадар ёш йигит мирзобоши бўлғанми, Гулшан опа?

—Бўлған.

—Бўлса ҳам арзийди,—деди Нозик,—ўзи уйланганмискин?

—Мен қаёқдан билай, уйланганми, эмасми?.. Уйланмаган бўлганда ҳам сени олмас.

Нозик бир неча вақт жим қолди...

—Албатта мени олмас,—деди Нозик, унинг товшида шу чоққача эшитилмаган бир синиқлиқ оҳангি бор эди.— Албатта, сен айтканча, мени олмас. Менга ит теккан, мен...

Гулшан жавоб бермади. Бир оздан сүнг қатордан пишиллаган товушлар эшитилди ва бу пишиллашни ора-чора пик-пик йиглаған товуш бузар эди.

### 33. ЯНГИ "ХҮНАР"

Ичкаридан чиқиб келган маҳдум миrzобошини кутиб ўлтурғучилар ичида мулла Абдураҳмонни ҳам кўриб қолди.

—Бахайр, мулла Абдураҳмон, бахайр... Ваалайкум асалом.

Солиҳ маҳдум мулла Абдураҳмон билан кўришди ва уни кишилардан айириб меҳмонхонага олиб кирди.

—Хўш, ҳабба... Хўб саломатмисиз?

—Алҳамдуллаҳ... ўзларининг сиҳҳатлари?

—Парвардигорга минг қатра... Хўш, қадамлариға ҳасанот?

—Мен тунови қунги марҳаматлари юзасидан...—деди мулла Абдураҳмон,—башарти миrzо Анвар жаноблари мувофиқ кўрсалар, муншийликка кирсамми, деган ниятда...

—Кўб яхши, кўб яхши,—деди маҳдум,—не гаройиблиғи бор, илмингиз кофий, фақат иншо... иншодаги нуқсонингизга албатта Анвар устозлик қиласар, қараб турмас... Ҳусниҳат важида сизга таълим ҳожат бўлмаса кепрак.

—Таҳрир ва иншода ҳам устозга муҳтожлик оз,—деди бир оз нафси олинган қиёфада,—миrzо Анвар каби бўлмасамиз ҳам ундан берироқ, тақсир...

—Яна яхши, яна яхши. Аммо, лекин девонхонадаги барча миrzо, муфтиларга қараганда Анварнинг таҳрири фасиҳроқ<sup>1</sup> эмиш. Бу, албатта, таълим хосияти... Кам-кўст ўрганилса, бешак манфаати бўлур. Хўб... Миrzо Анварга ўзлари тасодиф келмакчиларми ёки мен восита бўлсан дурустми?

—Билмадим... Ўзлари восита бўлсалар ҳам маъқулми, деб ўйлайман?

—Воситалик ҳам дуруст, зоро, хотиржамъ сўзлашар-

<sup>1</sup> Фосиҳ—чиroyли.

миз, соний сизнинг камолатингиздан мирзобошини қано-атландириш зарурати ҳам бор,—деди маҳдум ва бир оз ўйлаб тўхтади.—Ҳабба, девонхона қавоидича<sup>1</sup>, янги мирзо малака ҳосил қилғунча вазифа емас экан. Бизнинг Анвар ҳам ибтидо вазифасиз хизмат қилған эди.

—Моҳонада аҳамият оз, зеро, машшатимиз имомат орқасида таъмин, тақсир.

—Ҳабба, бу тарафдан ҳам ташвиш оз экан. Иншода чобакдаст<sup>2</sup> бўлиб олсангиз, вазифа важҳи осон... Файраз, боби олийга алоқа, калон ва калонзодалар билан робита ҳам кишига кўб манфаат берадир. Бу жиҳати сизга кўб ганимат,—деди маҳдум ва товшини секинлатди.—Имомат билан бир жойга етиб бўлмайдир... Аммо бу андишангиз бениҳоят маъқул. Сиз ўзимизнинг фарзандимизсиз; зеро ўз болаларимизнинг ўрда билан алоқадор бўлишлари бизга айни манфаат. Хотиржамъ, мулла Абдураҳмон, мен Анварга сизнинг важҳингизни тушунтиурман. Албатта ўз ёнига олур.

Абдураҳмон маҳдумга раҳмат айтди ва кетиш учун қўзғалди.

—Қай вақт хабар олсан бўлур экан? Албатта, жавоб ўзларидан бўлса керак?

—Ҳабба, эртага баъдаз бомдод,—деди маҳдум.—Нега қўзғалдингиз, чой, нон, моҳазар...

—Раҳмат, тақсир.

Маҳдум мулла Абдураҳмонни ҳавлигача кузатиб чиқди ва хайрлашиб, Анварни кутиб ўлтурганлар ёнига келди. Ҳар кимдан аҳвол ва кутиш учун сабаб сўради. Тўни янгироқларнинг болалари қаерда ўқушини, башарти, шу даҳадан бўлсалар, нима учун болаларини бошқа мактабка берганликларини текшириди. Айниқса кутиб ўлтургучилар ичидаги ямоқ тўйлик, қўли қадоқ бир деҳқон маҳдумнинг диққатини ўзига жалб эткан эди.

—Хўй-ӯш, ким, ҳали сиз ҳишлиқдан келган кўринасиз,—деди маҳдум,—қани, айтинг-чи, касал ни-ма?

Деҳқон маҳдумнинг ҳурматига ўрнидан туриб, қўл қовишитирди:

<sup>1</sup> Қавоид—қоидалар, тартиблар.

<sup>2</sup> Чобакдаст—чаққон, эпчи.

—Үн уч таноп ернің бор эди, тақсир... Чамаси янғиши бүған-да, ўттуз уч танопқа ҳақ соганлар. Мен шунға арза ёздираім, деб...

—Хіммм,—деди маҳдум,—қишлоғингизда оқсоқол йүкми?

—Бұған минаң, тақсир...қулоқ соладиган әмас.

Маҳдум яна бир мартаба деҳқонни бошдан-оёқ күздан кечирди.

—Ариза ёздаришқа чақа керак бўлади, ука. Чақангиз бўлмаса, оворагарчиликка арзимайди, иним...

Деҳқон белини тимискилаб, гўё чақасини кўрсатадирғандек ҳаракатланди.

—Чақасиз арзага келиб жинни бўлғанимизма, тақсир.

Маҳдум деҳқоннинг чақаси борлигига қаноат қилса ҳам, Анвардан хотиржамъ әмас эди. Чунки "зарношунос" Анварнинг шу деҳқонға ўхаш камбағаллар ишини битириб бериб, улардан "чақа" олмаслигини билар эди. Ҳатто шу тўғрида Анварга "бу ишиңгиз зарношунослиқ, болам" деб насиҳатлар қилса ҳам бир натижа чиқмаган, шунга биноан "заршунос" маҳдум яқиндан бери қизиқ бир ҳунар ижод қилған эди. Маҳдум кўпинча кишилар Анварга учрашиб тарқалғунча, йўлакда ўлтуриб олар эди. Анварга йўлиқиб чиқсан ҳар бир кишини тўхтатиб, натижани биллар, ариза ёздирған ёки бошқача бир кенгаш олған бўлса, ҳақ берган, бермаганлигини сўрар, Анвар берилган ҳақни олмай қайтарған чиқса, дарҳол—"сиз чақани оз бергансизда, мўлроқ берсангиз, албатта олар эди. Ҳуб, майли, борини менга ташлаб кетинг, ўзим уни кўндираман", деб ариза ёздирғучининг бор ақласини қоқмалаб қолар эди. Ҳатто баъзи вақт икки оғиз сўз билан қайтиб чиқсан кишидан ҳам бир нарса ундиришка тиришар, "мишиқ офтобга текин чиқмайдир, сиздан ақча сўрашқа ийманган-да, менга бир нарса ташлаб кетсангиз, ўзим унга бериб қўярман. Ўзингизга беришкага уялибди, деб айтарман. Ҳабба, яна ишиңгиз тушишига яхши-да," дер эди.

Шу йўсун маҳдум бир неча ҳафтадан бери бу "ҳунар"ни ўзига касб қилиб олған, Анвар ариза ва кенгашдан бир пул ишламаган кунларда, ул неча тангаларни йўлакда ўлтуриб топар эди. Кишиларни жўнатиб хотиржамъ бўлғач, жарақ-жарақ ақча билан ичкарига кириб кетар, ичкарида бу кунги "даромад"ни санаб, бир пулни беш пулдан, тангани чақадан ажратиб, "ҳе, гап билгунча иш бил, бачча талоқ", деб ўзича кулар эди. Албатта, бу

ҳунарни уй ичидагилардан яширап, айниқса, Анвардан "бәхәд" андиша қиласа зди.

Махдум аср намозига кеткан пайтда Анвар ўрдадан қайтиб келди. Махдум шошиб ва асрни чала ўқуб келса ҳам, яна бахтлик одамлардан анчаси ишни битириб тарқаған эдилар. Махдум аттанг ўқуб мәҳмөнхона даричасидан қайтди, аср азонини кеч айткан сүфидан ранжири. Ичкарида яна бир неча киши күрингани учун эски одатича, гүё биравни күткандек, йүлакка келиб турди. Бир оздан кейин мәҳмөнхонадан бир мулланамо чиқиб келди. Махдум чиқувчини ёқтирмағандек ер остидан күзини ғилайлатиб қарағач, бирдан вазиятини ўзгартди:

—Ассалому алайкум, келган эканлар, тақсирим!

—Ваалайкум ассалом! Хұб саломатмисиз, Солиқ махдум? Мирзо Анварда андак юмишимиз бўлур экан... Яшагуриңгиз, кўб зийрак бола: кичкина ариза ёздириб олдим... Хұб саломатмисиз, махдум?

Махдумнинг оғзидан ҳар турлук такаллуфлар чиқса ҳам унинг нима учун ариза ёздирганини сўрамади. Чунки бу одам шу ўртанинг эшонларидан бўлиб, гадойдан хайр кутиш маъносиз зди. Мундан бошқа, эшонни сўзга тутса, "келаси даромад"нинг ҳам қўлдан кетиш эҳтимоли бор, шунга биноан махдум сўзни мухтасар қилмоқчи бўлди:

—Кўб яхши, кўб яхши, келиб турсинлар, тақсирим!

—Келамиз, келамиз... Мирзо Анварга фотиҳа ҳам лозим. Ўзингиз бир зиёфат қилиб чақирай ҳам демайсиз, махдум... Мен мирзога айтдим: бу хизматингиз билан қутулмайсиз, бир зиёфат қилиб чақирасиз, дедим. Мирзо кўб сахий табиъат кўринади. Қачон келсангиз зиёфатимиз тайёр, эшон почча, дейди. Болаларнинг тўйини қиласа эмишсиз, деб эшилдим. Мирзодан сўрасам, кулгулик билан тўғри жавоб бермади. Кори хайрни тўхтатмаған яхши... Хўш, тўй қачон, махдум?

Махдум бу дуру дароз "бемаънилик"дан анча тоқатсизланған, ичкаридан киши чиқиб кетмасин, деб кўзи бе-саранжом зди.

—Тўйни кўклиамга бошласақ, деб турибмиз!

—Фурсатни узоққа олибсиз-да. Хайр, ҳар нарса вақти соатига етиб бўладир. Тўйларингиз ҳам кичкина бўлмас деб ўйлайман. Тўрт даҳянинг казолари ҳам тўйға айтилсалар керак, ҳарам хонимларини ҳам бир кун кутарсиз... Зеро, куяв болангиз кичкина одам эмас. Бирар минг тўн

кетиши бу ерда турған гап. Албатта, түйға келгандарнинг құллари қуруқ бўлмас.... Ҳарам хонимлари бўлса юз тил-лолиқ сарпосиз келмаслар, қизингизга чўри ҳадя қылсалар ҳам ажаб эмас. Албатта даромадга яраша буромад, деган гап бор...

Махдум, меҳмонхонадан юриб келган оёқ товшини эшитиб, ёмонлаган отек типирчилади. Эшон бўлса ҳамон булбул каби сайраб борар эди:

—Тўйдан қўрқиши керак эмас. Кори хайрникини оллоҳ таолонинг ўзи еткирап экан. Сизнинг тўйингиз-ку, албатта, бошқаларницидан кўб катта бўладир. Яна шундай бўлса ҳам таваккал билан қулочни кенг ёза бериш керак. Худо хоҳласа, тўй кунларингиз ўзим келиб туарман. Тўй кўрмаган киши учун, албатта, одам кутиш қийин. Лекин менга ўхаш одамдан иккитаси бир кунда беш минг кишини кута оладир.

Меҳмонхонадан чиқиб келган бир хотин киши эди, уларнинг ёнидан шовиллағанча ўтиб кетди. Махдум ола-зарак гоҳ эшонга, гоҳ хотинга қараб қолди.

—Аёллар бўлса ичкаридан хотиржамъ бўлишсин... Бизнинг аёллар тўйда хотин кутиб жуда омилкор бўлишиб қолған. Тўйдан бирар ҳафта илгари хабар берилса, албатта, бош усти, аёлларни юборамиз... Ҳаёлингиз паришон кўринади, махдум, бирар аъзонигизда алам борми, мулла Солиҳ?

Ҳақиқатан ҳам махдум ҳозир жуда бесаранжом бўлған эди. Чунки меҳмонхонадан иккинчи оёғ товши юриб келар эди.

—Йўқ, баҳузур.

—Шундай, тўйда одам кутишдан хотиржамъ бўласиз. Тўйдан илгари ҳалиги зиёфатни унумтанг-чи, мулла Солиҳ. Шу баҳонада мирзо Анвар билан ҳам бир суҳбатлашайлик...

Бояги деҳқон йўлакдаги икки "ҳурматлик" зотка таъзим қилиб, дарбозага ўтди. Бетоқат махдум эшоннинг сўзига қулоқ солмай:

—Сиз тўхтаб туринг-чи, ука,—деди.

Декқон нарида тўхтади. Эшон яна сўзида давом этди:

—Агар фурсатингиз бўлса, мен шу ҳафта ичи бўш эдим, мирзо Анвар ҳар қачон ҳам тайёр экан. Такаллуфнинг унча ҳам ҳожати йўқ. Мантими, сомсами, ишқилиб, оғизга ёқадирғанроқ таом бўлса кифоя... Вақтини белгилаб, мактаб болаларидан бирини бизнинг уйга юборсангиз бас.

—Хўб, тақсир.

—Бўлмаса, гап шундай бўлсин. Ўзингиз ҳам бизни йўқлаб уйга борсангиз, қадамингиз кира тилайдими? Хайр, мулла, Солиҳ, кўргунча худойнинг паноҳига.

—Хайр, тақсир, хайр.

Махдум эшонни ҳатто дарбозагача кузатиб чиқишга ҳам энсаси қотиб, деҳқон ёнида тўхтади:

—Нима гап, ариза ёздиридингизми, ука?

—Йўқ, тақсир,—деди деҳқон,—тақсирим шу қовозни питиб бердилар, танопчиға кўрсатадуған қовоз экан.

—Кўб яхши,—деди махдум,—қалам учи бердигизми?

—Йўқ. Чақа берсам олмади, тақсирим.

—Озгина бер...

Махдум "озгина бергансиз" демакчи эди, бироқ "озгина бер" билан тилини тишлиб, дами ичига кетишкага мажбур бўлди. Чунки ҳозир меҳмонхона томондан Анвар келиб чиққан ва махдумга салом берган эди...

—Ваалайк... Мен, шундай, масжиддан,—деди махдум шошқан ҳолатда ва ўз оғзиға қараб турган деҳқонға ишорат қилди,—ишингиз биткан бўлса боравуринг.

### 34. ХАЙРУЛ-УМУРИ АВСАТУҲО

Деҳқон "озгина бер" деб тилангучига нима беришини билмаган ҳолда йўлакдан чиқиб кетди. Махдум терлаган, довдираган йўсунда Анвар билан ичкарига юрди. Бир оз сўйсиз борғандан кейин секин Анварнинг афтига қараб қўйди.

—Фози эшон ҳузурингизда экан,—деди махдум,—ўзи кўб бемаъни одам... Зиёфат-миёфат деб яқин бир соат вақтимни олди. Ўзи кўб таммось одам. Сизга ҳам зиёфатдан дам урган бўлса керак?

Анвар илжайиб бош иргатди. Махдум Фози эшондан койиб давом этди:

—Тамаъ ўзи кўб мазмум<sup>1</sup> суфат... Чунончи, азза ман қанаъ, залла ман тамаъ<sup>2</sup>... Отаси марҳум ҳам беҳад, тамаъкор эди. Ит еганини қусиб, ўғли ундан ҳам расвороқ

<sup>1</sup> Мазмум—ёмон; хато.

<sup>2</sup> Қаноатли азиз, тамаъли киши хордир (муал.).

чиқибдир. Бұ авлоднинг каттадан-кичиги бир-биридан баттар... Муфт' ариза ёзирибсан, кета бер. Яна бу ўртада зиёфат ба чи маъни?!

Анвар маҳдумнинг сўзига кулиб, орқада борар эди. Маҳдум ичкарига томон сўзланиб кирап эди:

—Такаллуф лозим эмас эмиш: мантими, сомсами—ҳар начук оғизга ёқадирған таом бўлса кифоя эмиш. Кабоб бўлса емасмидингиз, эшон?! Тўйға ўзи бош бўлиб турар эмиш, одам кутишни бениҳоят билар эмиш. Эй... ман сандек таммоъни тўйбоши қилиб телба бўлдимми? Уйидан тоқ келиб, жуфт кетмакчи-да, бу таммовъ.

Маҳдум шу сўз билан ичкарига кириб, ҳавли саҳнида чақалоқ кўтариб турған Раъно ёнидан айвонга ўтди. Маҳдумнинг орқасида кирган Анвар Раънонинг олдида тўхтаб, ундан чақалоқни олди. Отасининг юзида аччиғланиш сезган Раъно Анварга "нима гап?" деган каби им қилған эди, Анвар кўз қисиб, арзимаганлик ишорасини берди.

Маҳдум айвонга чиқиб ўлтуар чогида яна бир "астағфирулло" деб қўйди. Чунки кайфи жуда ҳам бузулған эди. Илгари масжиддан кеч қайтиш билан бузулған авзо, Фози эшоннинг "пастлиги" ила жуда ҳам авжига чиқсан эди. Бу кунги кутилган "даромад" сартопо<sup>2</sup> фалокатка учраб, маҳдумнинг кўнглини ғаш қилған, айниқса деҳқоннинг ҳам текинга қутулиши ва ўзининг Анвар олдида шарманда бўлаёзиши... Буларнинг ҳаммасига шу "паст", "таммовъ" сабабчи ва шунинг учун ҳам маҳдум Фози эшон тўғрисида ҳар бир сўзни айтишдан торгиниб турмади.

Анвар ҳавли юзида чақалоқни восита қилиб, Раъно билан сўзлашар эди. Маҳдум кечки ош пишириш билан машғул Нигор ойимдан таомнинг тайёр бўлиш вақтини сўраб, Анварни ўз ёнига чақирди.

—Қани, бу ёқقا, Анвар!—леди маҳдум.—Таомни шу ерда тановул қиласақ ҳам бўлур... Сен, Раъно, укаларингта қара-чи: Мансур ташқарида кўрингандек эди; дарбозани ҳам занжирлаб кир, қизим!

Раъно ташқариға чиқиб кетди. Анвар қўлида чақалоқ билан айвон муюшига келиб ўлтурди. Чақалоқ Анвар қўлидан иргиб ҳар тарафка талпинар ва турлик товушлар чиқарип қичқирап эди. Маҳдум чақалоқнинг ҳаракатига қизиқсинди:

<sup>1</sup> Муфт—текин.

<sup>2</sup> Сартопо—бошдан-оёқ.

—Мам-мам, мам-мам-мам,—деди қўлини чақалоққа уйнатиб,—ду-ду-дув, ду-ду-дув... ҳай баччаталоқ, ҳай баччаталоқ!.. Беҳад шўх бўлибти-да, беҳад, ду-ду-дув!

Чақалоқ маҳдумга талпинар, кичкина қўлларини гоҳ очиб, гоҳ юмар эди.

—Кел, йигит, кел! Алҳол хом-да, хом; қизамиқ чиқиб ўтса эди. Ду-ду-дув!

Раъно укаларини бошлаб кирди. Маҳдум чақалоқни қўйиб, болаларни койиб кетди:

—Ҳай бемаънилар! Чақирмаса, уйга киришни билмайсанлар! Кийимни қара, кийимни! Турпоққа ағнадингми, эшшак! Қоқ, қоқ, ешиб қоқ! Аттанг-а, эсиз кийим... Буларни энди нима қилса бўлади, Анвар?

Анвар маҳдумдан қўрқиб турган болаларнинг аҳволига қараб, кулимсиди:

—Эси кириб қолар.

—Қиёматдами? Буларнинг татигини бермасам... ҳе, кўзларинг қурсин! Раъно, сен аканга кўрпача солиб, укангни ол, онангга айт, ош дам еган бўлса, сузсин!

Раъно айвонга кўрпача ёзиб, Анвардан чақалоқни олди ва онасининг ёнига кетди.

—Анвар, қани кўрпачага чиқинг! Қўлларингни ювиб кел, эшшаклар!

Болалар югуришиб ариққа кетдилар. Анвар ҳам қўл ювиш учун болалар орқасидан борди. Ариқнинг суви жуда лойқа эди. Анвар болаларни ариқдан қайтариб, обдастадаги тиниқ сувдан уларнинг қулига қўйиб, ювнтириди. Навбат ўзига етканда айвонда туриб, маҳдум бақирди:

—Раъно, акангнинг қўлига сув қуй!

Анвар Раъононинг келиб сув қўйишига қарамай, ўзи ювина берди. Раъно етиб келгунча қўлини ювиб олди. Маҳдум қизидан аччиғланди:

—Жуда суст қадамсан-а, Раъно. Сени талқон еб сувга юборган киши қайтиб келгунингча, тиқилиб ўлади!

Маҳдумнинг ташбиҳидан Анвар ва Раъно кулишдилар. Сўзни жойида ишлаткани учун бўлса керак, маҳдумнинг ўзи ҳам кулимсиради:

—Тўғри-да, мирзо Анвар, қўли суст косибдан оёги чаққон гадой яхши эмиш!

Улар яна кулишдилар. Маҳдум завқланди. Анвар кўрпачага чиққандан кейин Раъно ўртага дастурхон солди. Нигор ойим сопол лаганда палов келтириб, ҳаммалари бирга ошқа ўлтурдилар. Ош ўхшалган эди. Биринчи ошамдаёқ маҳдум Нигор ойимни тақдир этти:

—Бу кунги ошнинг дуруст, Нигор... Бироқ гўштни кўб солибсан.

Нигор ойим кулимсиб Анварга қаради:

—Гўшт кўб бўлса ош ўхшаладир.

—Хайрул-умури авсатуҳо, Нигор<sup>1</sup>.

—Бу сўзнинг ошқа гўштни кўб-оз солиш билан нима алоқаси бор?

Раъно онасининг бу сўзи билан пиқ этиб кулди. Анвар юзидаги кулгини яшириш учун четка қаради.

—Ҳадиснинг ҳукми ом<sup>2</sup>, Нигор,—деди маҳдум.—Бундаги умур—умурид-дунё<sup>3</sup>, умурид-дунё иборат аз ҳаракати аҳли мўъмин. Инчинин<sup>4</sup>, бу ҳадиснинг амалиёти охират учун ҳам ҳукми жорийдир<sup>5</sup>... Масалан, шабу рўз савм<sup>6</sup> ва салот<sup>7</sup> мўмин кишини жисман нотавон ва нафақаи аҳли аёлдан ожиз қиласидир. Бас, бу ҳолда ибодатнинг касрати, яъни тоатда ифрот<sup>8</sup> ҳам хайрул-умурга қўшилмас, зеро, фарз ва суннат банда учун кофий эрди. Маънийи кофий чист, ай авсат<sup>9</sup>... Бинобарин, бу ҳадиси шариф рўзгорот борасида дастур тутилса, яна айни ҳикмат ва савоб. Масалан, ошқа йигирма пайса гўшт солмоқчисан; аммо "авсат" қилмоқ ниятида, мазкурдан ўн пайсани ажратиб қолдинг... Бас, ҳикматни томоша қил; эртаси кун ошинг яна жазлик, яъни "авсат" билан икки кунлик эҳтиёждан қутилиб, савобга ҳам даҳлдор бўлдинг. Ҳикмати дигар<sup>10</sup>: дунё важҳинг<sup>11</sup> яхши эрди. Таомни яхши мазалик еб, нафсинг яхши ошқа ҳў<sup>12</sup> қилди. Вақти

1 Ҳар ишининг ўртаси яхшидир, ёки: ишда эътидол яхши (*муал*).

2 Пайгамбарнинг буйруги ҳаммага тегишлик.

3 Умурид-дунё—дунё ишлари.

4 Иншинин—(инчунин)—шунингдек.

5 Ҳукми жорий—ярайдиган ҳукм.

6 Савм—рўза.

7 Салот—намоз.

8 Ифрот—ҳаддан ошиш.

9 Етарли деганинг маъноси нима, бу демак ўртачаликдир.

10 Ҳикмати дигар—бошқа бир ҳикмат.

11 Дунё важҳи—бойлик.

12 Ҳў—одат.

келиб, афтодаҳол бўлдинг, кунинг гўштсиз таомга қолди: аммо нафси амморангни<sup>1</sup> сержаз ошқа ҳў қилдирганинг важҳидан гўштсиз ош оғзингта ёқмайдир, бу—бир азият; сониян: лазиз ошқа ҳў қилған нафсинг тақозаси билан анвоъи ҳабосатларга ва мазмум кирдорларга<sup>2</sup> иртико<sup>3</sup> қилмогинг хавфи ҳам бордир; бу нимадан келди? Албатта "авsat"ка риоясизлигиндан.

Махдумнинг "амири маъруфи" Ниғор ойимга қаратиб сўзланса ҳам, ҳақиқатда умумий, яъни, бир ўқ билан бир неча қушни урмоқчи эди. Бироқ, қаршига қараб отилган бу ўқдан маҳдумнинг ўзи ҳам амин эмас, агар лаган теварагидаги ўлтургучилардан бири туриб, бошқаларидан қатти назар, фақат бу кунги хайрул-умурингизни мисолга олайлиқ: "Йўлакдаги "умурид-дунёнгиз" ўзингиз айткан "авsat"ка кирадими?" деб сўраса, билмадикки, маҳдум ни-ма деб жавоб берар эди. Мадраса кўрган Солиҳ маҳдум, балки бу саводдан ҳам шошиб қолмас. Китобнинг "нафақа" баҳсидан варақ очиб, "нафақаи аҳли аёл" учун бўлған "ҳаракат"нинг фарзлигидан ва бундаги ҳисобсиз савоблардан дам уриб, "нафақа" билан иши йўқ баъзиларни "ерга қаратса" ҳам мумкин эди... Лекин ўқ еганлардан ҳеч бириси маҳдумга қарши чиқмаганларидек, унинг сўзини тасдиқ этиш белгисини ҳам кўрсатмадилар. Эҳтимолки, улар муқобалага ожиз эдилар ёки қарши чиқишига орада бошқача бир сабаб бор эди. Фақат бир-би-рисига қарши ўлтурган икки ёш маънолиқ кўз уриштириб кулимсидилар.

Маҳдум амири маъруфдан кейин ошқа қаради, кўб вақт сўзсиз фақат ошдан бош кўтармади. Маҳдумнинг даъвосича, ҳар бир ишда ҳам "авsat" мезондир. Лекин ош олишда бу "мезон" унтилди. Бошқалар ора-чора бир гўшт қўшиб олғанда, маҳдум бир ошамни ҳам гўштсиз юбормаслиққа тиришиб борди, яъни "авsat"дан ўтиб "аъло"да иш кўрди...

Ошни яримлатқанда, маҳдум лагандан бош кўтариб, Анварни тузукроқ олишига тақлиф қилди, болаларни ошни тўкиб ейишда айблаб, Раъонни чипхўрлиги учун койиди:

<sup>1</sup> *Нафси аммор*—доим ёмонликка буюриб турувчи нафс.

<sup>2</sup> *Кирдор*—одат, қилиқ, иш.

<sup>3</sup> *Иртико*—ҳаракат.

—Чипхўрсан-да, қизим... Шу ҳам ош ейиши?

—Меники адно<sup>1</sup>,—деди Раъно.

Бу сўз Анвар ва Нигор ойимларни товуш чиқариб кулишка мажбур этди.

—Сенга бир сўз тегмасин, қизим,—деди кулиб маҳдум.—Ошни суст еган киши, ишда ҳам суст бўладир.

—Бўлмаса, ошни "аъло" ейиш керак экан-да...

—Оғзинг куймаса аълоси ҳам дуруст.

Яна кулишдилар.

—Ҳай, воқиъян,—деди маҳдум, кулги ораси тўхтаб.—Мирзобошидан бир илтимосимиз бор экан, ёдимдан чиқаёзган экан... Ким ҳали... ҳабба, боя мулла Абдураҳмон келган эди. Ўшал ваъдамизга мувофиқ сиз билан учрашмакчи экан. Чоғи ул ҳам мирзолиқча киришмакчи. Ҳўб, мен мирзо Анвар билан гаплашиб қўярман, ўз ёнига олса керак, дедим. Ўзи яхши мулла бўлған кўринади, закки табъ<sup>2</sup> йигит...

Анвар бир оз ўйлаб турди.

—Ким у мулла Абдураҳмон, хотирлай олмадим?

—Ўзимизнинг мулла Абдураҳмон-чи, ахир... Ёрлиғ олған кунингиз фотиҳага келган ёш имом.

Анвар яна бош чайқади:

—Ҳеч бир эсимда йўқ.

—Ҳўб,—деди маҳдум ўнг кўзини қисиб.—Ўшал кун фотиҳага келган бўзчи муҳлисингизни хотирлайсизми?

—Хотирлайман.

—Ҳабба, энди ўшал бўзчининг устига кирган ёш муллани ҳам хотирлаб қаранг.

—Хотиримга келди... Ўзи ёшлиғида бизнинг мактабда ўқуган?

—Ҳабба,—деди маҳдум ва баҳска Нигор ойимни ҳам тортиди,—уни сен ҳам биласан.

—Мен қаёқдан билай?

—Ўзи Бухорода ўқуб келган, Раънога бир неча қайта совчилар юбориб юрган одам.

Нигор ойим боши билан "танидим" ишорасини бериб, Анварга секин кўз қирини юборди. Раъно "совчи" сўзи билан энсаси қотқандек сочиқни олиб қўлини артди. Маҳдум кейинги сўзини ўйлаб айтдими, йўқми—ҳар начук

<sup>1</sup> Адно—паст; озгина.

<sup>2</sup> Закки табъ—озода табнат.

Анварда ғаюрлик каби бир ҳис уйғониб, ўзидан жавоб күткүчى маҳдумга илтифотсиз, Раънодан сочиқни сўради.

—Нега қўл артасиз, Анвар. Кун бўйи оч юриб, еган ошингиз шуми?

Анвар Нигор ойимга раҳмат айтиб, тўйганини сўзлади ва қўл артар экан, чақалоққа гап қотди:

—Анвар билан Раънонинг тупроғи бир жойдан олинған,—деди маҳдум ош ошалаб, чунки ҳануз уники "авсат"ка етмаган эди,—иккиси ҳам кам таом.

Маҳдумнинг бу сўзи юқоридағи гуноҳини ювғандек бўлди. Улар бир-бирларига қаравиб, илжайишдилар. Нигор ойим ҳам оғирлиқдан чиқди.

—Шундай, Анвар... Шу йигитни ўз ёнингизға олсангиз, қалай бўлар экан?

—Ҳозирча мирзоға эҳтиёжимиз йўқ.

Мирзоға эҳтиёжингиз бўлмаса ҳам, яна шундай кишиларни олғанингиз маъқул, деб ўйлайман. Зеро бундайлар ўзингизга синамол, яна ўз тарбиянгизда етишсалар бошқалардан сизга хайриҳороқ, инчинин, хизматингизга азтаҳидил камарбаста бўлурлар. Бу ҳам бир маслаҳат-да, болам Анвар.

—Ўлашиб кўрармиз.

—Ўлашкан албатта яхши ва лекин мен буни кўб вақтлў ўлашкан албатта қилур эрдим. Билохир<sup>1</sup>, амниятингиз учун бу тадоирни кўб пухта идрок қилдим. Зеро, Султонали мирзодек ҳамкуфларингиз<sup>2</sup> кўпайса хайриятингиз, деган мулоҳаза фикримга келди.

—Балки тўғридир...

Анварнинг кўзи дастурхонда эди. Бу тўғрида қатъиятсиз муҳмал жавоблар беришидан недир туйингган Раъно Анвардан кўз олмай турар эди. Нигор ойим Мансурга қолған ошни едириб қўйиш билан ора-чора гапка ҳам қулоқ солғандек бўлар эди.

Маҳдум кекириб, сочиқ сўради.

—Бу андишанинг ҳақлигига шак йўқ, Анвар,—деди ва дастурхондаги доңларни териб, оғзиға ташлади.—Менга таслим бўлиб ибтадаан шу мула Абдураҳмонни ўз ёнингизға олинг. Ул бир неча ойгача муфт хизмат қилишга ҳам рози.

<sup>1</sup> Билохир—ниҳоят.

<sup>2</sup> Ҳамкуф—сафдош, дўст.

—Масала унинг муфт ёки ҳақли хизмат қилишида эмас.

—Яъни, масалан?

—Мен янги мирзо бошлаб борсам, у ердагиларга оғир келмасмикин, деб ўйлайман.

—Ул мажжонан<sup>1</sup> хизмат қилади, бас, мирзоларингизга нима оғирлиқ?

—Яна ҳар ҳолда, бир-икки ойдан кейин бўлса ҳам уларга рақобатчи ортадир... Айниқса бизнинг Шаҳодат муфти кабиларнинг феъли сизга ҳам маълум.

—Шаҳодат муфти ўзи қандай ит!—деди маҳдум.—Андишамиз ҳам бамисоли шундай итлар қаршисига ўз кишингизни тиккайтариш эмасми? Ёшлигиниз бор, болам, ёки янги мирзо олища биравнинг рухсатига ҳожат борми?

—Йўқ.

—Ана, холос. Аз карнайчи як куф. Мен эрта унга айтай, ҳузурингизга бораверсин.

—Бориши қочмас... Илгари мен у ердаги баъзилар билан кенгашайин-чи.

—Хўб, уларнинг юзи учун кенгашкан маъқул: аммо, баҳарҳол олмоқ керак.

Маҳдум фотиҳа ўқуб, шом намозига қўзғалди. Ташқи йўлакка етканда, ёдига Фози эшоннинг бемаънилиги келиб тушти, шу қаторда тўй, тўйға иштирок этадирган казолар, хоним ойимлар, ҳаммадан ҳам муҳим ва қизиги ёмғур каби ёғиладирган тўёна ва уларнинг саранжоми... Сўфи такбир тушурад экан, маҳдумнинг кўнглидан "Раънога чўри қўша кўрмасинлар-да, тишилик ҳайвоннинг бўлғанидан бўлмагани яхши" деган андиша кечти...

### 35. ХОН КЎНГИЛ ОЧМОҚЧИ

Қавс ойи<sup>2</sup> кирган бўлса ҳам, ҳаво мўътадил, кун жумъя эди. Ўрда боғига сув сепилиб, супурилган, ўртадаги шаҳсуфага лолагул гилам ёзилиб, хоннинг ўлтуриши учун баҳмал кўрпача устидан арслон териси ташланған эди. Ҳозир шаҳсуфа хон ва аъёндан холи, аммо шаҳсуфа қаршисидаги нимсуфалар вазирлар, саркардалар, қозикалон,

<sup>1</sup> Мажжонан—текинга.

<sup>2</sup> Қавс—22 ноябрь-21 декабрь.

шайхулислом, қози-қуззот, раис ва шаҳарнииг зўр уламолари—мударрислар, аҳли тариқат эшонлар, ўрда ходимлари ва энг пастарини қўрбоши ва даҳбошилар билан лиқ тўлған эди. Уламо қисмида умуман банорас тўн, оқ салобатлик салла, вазир ва саркардаларда кимхоб ва баҳмал тўнлар, бошларида баъзан салла ва баъзан ўсиқ баррадан тикилган телпаклар ҳиллирар эди.

Хон бу кун жумъя намозигача кўнгил очмоқчи ва бундаги йигилғанлар шу кўнгил очиш соатида иштирок эткувчи хоннинг кўнгил тортарлари, яъни мамлакат аъёнлари эдилар. Хон ҳали ички ўрдадан чиқмаған, ҳамма раъият "жаноби олий"ни кутиб муҳташам дарбозага кўз тикканлар эди. Шаҳсуфадан бир оз нарида, атрофи бордон билан ўроғлиқ бир капа пайдо бўлган ва бу капа ичидаги неча киши суҳбат қуриб ўлтуар эдилар. Бир неча дақиқа куткандан сўнг, муҳташам дарбозада Дарвеш удайчи кўриниб, қархисидағи раъиятка ўрундан туриш ишоратини берди. Бирдан ҳамма шув этиб қўзғалди. Дарвеш удайчи дарбоза ёнига ўтиб, рукуъга<sup>1</sup> борди. Ичкаридан кимхоб тўн билан йўғон қорнини ўраган, оқ шоҳи салласини манглайиғача туширган Худоёр кўринди. Хон кўриниши билан барча раъият ҳам удайчи каби рукуъга кетдилар. Худоёр орқасидан ёш Ўрмонбек қизил баҳмалдан тикилган сипоҳи кийим билан отасини таъқиб этар эди. Бунинг орқасидан қизил мовутдан шаҳзода каби кийиниб, силоҳ<sup>2</sup> тақинган ва ҳар қаторға тўрт нафардан терилган ўн олти-ўн етти яшар, ёш ва хушрой сипоҳлар (маҳрамлар) чиқдилар. Хон шаҳсуфага қараб келди. Ўнинчи қатордан сўнг ёш сипоҳлар туркуми узулиб, яхши интизомлик қирқ нафар навжувон шаҳзода орқасида хонни таъқиб этар эдилар. Шу ҳолда нимсуфаларнинг биридан чалғулар товши келди. Созлар нафис ва оҳангдор қилиб "Сарбозча" куйини чалдилар. Куй созда қайтариб олингач, хон орқасидағи ёш сипоҳларнинг бир қисмидан шу куйнинг ашуласи эшитилди:

Шаҳаншоҳим, шаҳаншоҳим, баҳтингиз кулсин!  
Давлатингиз, шавкатингиз душманлар кўрсин!

<sup>1</sup> Рукуъ—бош эгиш.

<sup>2</sup> Силоҳ—қурол-аслаҳа.

Қалқон ушлаб, ханжар таққан ёвлар майдонга!  
Номуссизлар, вафосиалиқ қылдингму хонга!

Бизнинг айткан назримиз бор Шоҳимардонга!  
Аҳдин бузиб динин сотқан бўялгай қонга!

Шаҳаншоҳим, шаҳаншоҳим, баҳтингиз кулсин!  
Давлатингиз, шавкатингиз душманлар кўрсин!

Хон суфанинг зинасига етиб, юқори минди. Шаҳзода ҳам отасини таъқиб этди. Ёш сипоҳлар хон ва Ўрмонбекни зинада қолдирив, тўғрига ўтдилар, суфадан айланиб бориб, хоннинг муҳофазатига, яъни Худоёр ўлтурадирган арслон терисининг орқасиға саф торта бошладилар. Хон бориб арслон терисига ўлтурди. Ўрмонбекни ўзининг ўнг томонига олди. Раъият ҳамон рукуъда... Ёш сипоҳлар суфанинг уч тарафини қуршаб олған эдилар. Хон жойлашғач, рукуъдагиларга тиккайиш ишоратини берди. Барча бош кўтариб, қўл қовишириди. Соз ҳам тўхтади. Суфанинг зинасида удайчи ҳозир бўлиб, қўлини кўтарди, раъият ҳам унинг билан баробар дуоға қўл очдилар.

—Душманлар хароб, мунофиқлар бетоб ўлсин... Онҳазратимнинг давлатларига худо тавфиқу адолат берсин!

Дуодан сўнг барча юз сийпади. Хон удайчига бир нарса деб ишорат қилди.

—Мингбоши, қушбеги, домла шоғовул, жаноб шайхулислом, оталиқ ва амсоли ҳазратка ул жаноб ўз ҳузурларидан жой меҳрибончилиқ қиласидирлар!

Удайчи санаған кишилар бирин-бирин шаҳсуфага чиқиб хонга салом ва таъзимдан кейин атрофлаб тура бошладилар. Суфага ўн чоғлик аркон<sup>1</sup> чиққандан сўнг, хон удайчига яна бир нарса деб қўйди.

—Фарогат ато қиласидилар!

Сипоҳлардан бошқа барча тик турғанлар шув этиб ўлтурдилар. У ер-бу ердан йўталган товуш эшитилди.

Удайчи хонга арз қилди:

—Онҳазратимнинг давлатларига худо тавфиқу адолат берсин... Қулларидан бири валиненъматимга икки калима арзим бор, дейдир!

<sup>1</sup> Аркон—давлат арбоблари.

Хон келсин, ишоратини қилди. Барчанинг қўзи бояги бордонлиқ уйга тушти. Бордон ичидан узун бўйлиқ, қора соқоллик, устидаmallат тўн, симоби бўз салласининг пашини бир қарич осилтирган бир киши чиқди; тамкин, виқор билан битта-битта юриб келиб, зина ёнида хонга қарши тўхтади... Хондан тортиб ҳаммага табассум туси кирган эди. Киши хонга қарши турған ҳолда салласини тузатди, соқол-муртини силади, тўнини қоқиб, олдини ўради, сўнгра хотиржамъ рукуъга борди. Бирдан хон ва раият кулиб юбордилар. Бу киши Худоёрнинг энг яхши кўрган қизиги Зокир-гов эди.

Зокир-гов бошини рукуъдан кўтариб, гўё жаноза ўқуған кишидек, икки елкасига салом берди. Яна гурр этиб кулиб юбордилар. Зинанинг иккинчи бошида турған Дарвеш удайчи Зокир-говга танбиҳ берди:

—Кимнинг ҳузурида турғанлиғингизни унутманг!

Зокир-гов қўли қовуштирилган ҳолда, гавдасини қимирлатмай ёнидағи удайчига қаради:

—Ўзим ҳам билиб турибман, бу ерда аҳмоқ бор, деб ўйлайсанми?

—Хўш?

—Хонимга арзим бор!

Яна гурр эткан кулги боғни тутиб кетди<sup>1</sup>.

Удайчи:

—Арзинг бўлса, додрас<sup>2</sup> ҳузуридасан, гапур!

—Арзимни ўйлаб туриппан-да, ўлагали ҳам қўймайсанми?—деди Зокир-гов.—Ёки мен ҳам сўзимдан янглишиб Жаббор жиннидек осилиб кетайми?

—Арзга келиб турғанингта бир ош пишар вақт бўлди!

—Мен ҳам арзимни миямда пишириб олаётубман-да; пишмаган ош ич оғритадими-а, тақсиirlар?

—Арзингни ўйлда ўйлаб келмабсан-да!

—Эй, девонами бу ўзи!—деди Зокир-гов.—Ўйлаш учун бундан бошқа касал йўқми?

—Йўлда нимани ўладинг?

<sup>1</sup> Бундаги кулгига сабаб "хонимга" сўзидир. Чунки бизда "хоним" деб хотин кишига айтиладир (муал).

<sup>2</sup> Додрас—олампаноҳ, хон.

—Хон құзурига бораётибман, деб ўлимни ўйладим, ятим қоладирған болаларимни, мен ўлгандан сүнг эрга тегадирған янгангизни ўйладим! (Кулғи.)

—Жанобни ва шу қадар раъиятни маътал<sup>1</sup> қўйма!

—Хе-хе-хе!—деб кулди Зокир-гов.—Сизлар ҳар кун минглаб кишини урда тегида маътал қўйғанларингизда, мен бир нафас маътал қўйсам, хе-хе-хе!.. Тақсир, сизга арз!

Хон, "айт" деган каби бош иргатди.

—Тақсиримга биринчи арз шуки,—деди Зокир-гов,— ёнимда турған шу бақа афтни мендан нари қилсангиз, зеро, бунингизнинг дагдагаси сизницидан ҳам ўтадиган кўринади! (Кулғи.)

Худоёр удайчига, суфага чиқ, ишоратини қилди. Зокир-гов қўлини дуога очти:

—Онҳазратимнинг даватлари кам, ўзларида ғам, кўзларида нам, душманларида дам, қадларида ҳам бўлмасин... Шаҳзодамнинг бошларида баҳт, остларида тахт ўйнаб, ёш умрларига ажали бевақт етмасин... Шоҳи баҳтиёрнинг хизматларига бел боғлаған оқ салла, кўк салла, тўни малла оталаримизнинг диллари ҳам ҳамеша соқолларидек оқ бўлсин, омин! Соний, арзи бандалигимиз шулки, биз, дарбадари девона, ақлу ҳушдин бегона, ҳалқ тилида афсона, элкезар ғарифона қулларингиз дарду алам ютар эрдик, қаламравингизнинг бир четидан ўтар эрдик. Дедиларким, бу диёрнинг хоқони, Искандари сони, зару зевар кони, элнинг ошу нони, яъни саховатда Ҳотам, қаҳри келса мотам... гурабо<sup>2</sup> ёридир ва яна сизлардек бозори касод дарбадарлар, энаси кўчада туққан беспадарларга ҳам эҳсони жорийдир, деб биз аҳли тамаъ бечора, нафс илгидаги<sup>3</sup> овора ғариблар ҳар қайсимиз беш пайса, ўн пайса тамаъ хапидан ютиб, даргоҳингизга юзландик, токи эски-туски ҳунарларимизни арз қилсақ, жанобингизни беш пул, ўн пул қарз қилсақ, деб... (Кулғи.)

—Қўйп, ҳунарингизни кўрсатинг!—деди хон.

<sup>1</sup> Маътал—кутмоқ.

<sup>2</sup> Гурабо—ғариблар.

<sup>3</sup> Илгиз—қўл.

## 36. ҚИЗИҚЛАР

Зокир-гов хонға қуллик қилди ва икки-үч қадам бордан томонға юриб, бутун товши билан чақириди:

—Бақромбой! Ҳов, Баҳромбой!!!

Бордон ичидан бир оёғида кафш, иккинчиси кафшсиз олди очиқ кир яхтагидан бадани күринган, бир қўли билан елкасини қашиб, иккинчиси билан иштонбогини ушлаган, бош ялан бир йигит чиқди.

—Эшак ҳанграйдима!—деди Баҳром ва ўёқ-буёққа алонғлаб олгандан кейин, яхтагининг чокини ахтарди.— Сингли талоқ битни қочирдим-да! (*Кулғи.*)

—Баҳром деяпман, менга қара!

—Э-эй, Зокир ака, сен чақиридинғма... Ҳа, нима гап?

—Хонни кўндиридим!

—Кўндиридинғма?.. Мен ҳам айтдим-ку, хон ўзи лақма эмиш, деб. (*Кулғи.*)

—Улар қани?

—Уларингма? Уларинг ичкарида ятиptи.

—Нима қилиб ятиptи.

—Қўй десам бўлмади, бир пой кафшимни икави ҳузур қили-и-иб еб ятиptи! (*Қаттиғ кулғи.*)

Зокир-гов аччиғланди.

—Сенларга ҳеч бир ақл кирмади-да... Энди хоннинг олдига бир пой кафш билан чиқсанми?

Баҳром ўйланиб бошини қашиди.

—Чиқсан чиқавураман-да. Хоннинг ҳам менга ўхшаған бир одам-да, ака! (*Кулғи.*)

—Кир, кир, падарлаънат, дар-рав уларингни олиб чиқ!

Баҳром елкасини қашиб, кафшлик оёғи билан кафшсиз оёғини "тап-чиp, тап-чиp" ерга босиб ичкарига кириб кетди. Бир оздан сўнг икки ҳамроҳини бошлаб чиқди. Чиқсанлардан бири пак-пакана, юм-юмалоқ, лўп-лўнда бир маҳлуқ эди. Унинг гавдаси бу қадар "келишкан" бўлиши устига, башараси ҳам шунга монанд тушкан, томоғининг остида чўгури қовундек бўқоқ ғовлаб ётар эди. Унинг гавдаси мисоли бир гупчак бўлса, шу гупчакнинг юқорисига катта бир сув қовоқни бош бўлсин, деб ўрнатқан эдилар. Ва бу ялтири қовоқнинг бетида кўз бўлиб, қуёшда қовжираған иккита гўлун туршак, оғиз ерида бир кафш, бурун ўрида юқорига қараб ўрмалаган баҳайбат бир қурбақа ва қулоқ мақомида сув қовоқнинг икки бағрига тирадан икки ошлов турар эди. Қош ва

бошдағи соч түғрисида оғиз очиб бўлмас, аммо беш-ўн тук, яъни соқол-мурт гира-шира кўзга чалинар эди. Сеп-кил ва чечак доги бу бетни "музояқакор" қилиб кўрсатканидек оёғидаги чориқ, устидаги қисқа, эски алак чопон, белидаги беш-ўн айлантириб боғланган бўз белбоқ, бошининг учдан бир қисмигагина қўниб ўлтурган тор пилта тўппи бир "ҳусн"га яна бир юз "ҳусн" қўшиб арз қиласади. Бу маҳлуқ доимий ўрдада турадирған хоннинг кун-далик қизиги мулла Бахтиёр эди. Иккинчиси мулла Бахтиёр билан ўчакишкандек, жуда узун бўйлиқ, ғилай кўзлик, ажина қошиқдек юзлик, қотма, ўзининг бўйидан ҳам узунроқ тўн ва бошига қаландар кулоҳи кийиб, ялан оёғ, ўрта яшар Давлат исмлик яна бир қизиқ эди.

Зокир-гов буларни қарши олди.

—Э, ҳаромзодалар,—деди Зокир-гов қўлинни пахса-лаб,—андак нафсларингни тийсанглар, хотинларинг талоқ бўладими?! Бунинг бир пой кафши қани?

Баҳром маъюс бўйин солиб турди, Бахтиёр билан Давлат лабинни артиб, бир-бирига қарашиди:

—Айт!

—Сен айт.

—Нима деб айтаман?

—Еганимиз йўқ, деб айт...

Бахтиёр икки қўли билан белбогига такя қилиб, қаддини ростлади ва бошини бир оз орқасига мойил тутиб, қаққайди:

—Билиб сўзла, aka, биз еганимиз йўқ!

Зокир-гов индамасдангина Бахтиёрнинг ёнига ўтди ва озорсиз қилиб унинг намойишкор кўриниб турған бўқоги-ни салмоқлади:

—Кафшнинг ўқчаси тиқилиб қолипти-ку, иним!—деди Зокир-гов, кучлик кулги кўтарилди. Сўнгра вазиятини ўзгартириб, уларга уқдириди:—Биз ҳозир хоннинг ҳузурига борамиз, эшитасанларми... Учавинг ҳам адаблик, мутаво-зий<sup>1</sup> бўлиб кўрин. Хонга учрашканларингда, икки букулиб қуллиқ қил, ундан кейин хонни дуо қиласанлар. Тузукми? Қани, келаберларинг орқамдан!

Тўртгави, бири орқасидан бири чизилишиб, шаҳсуфа ёнига бордилар. Зокир-гов зина ёнида тўхтаған эди, орқадагилар бир-бирига туртинишиб, бири у ёқقا, бири

<sup>1</sup> Мутавозиъ—кибрсиз, одобли, таъзимли.

бу ёққа, учунчиси хонға орқа ўғирған ҳолда тұхталиш-дилар. Бу ҳолдан хабарсиз Зокир-гов уларни хонға тақдим этди:

—Қулбаччаларингиз ... саломга келдилар. (*Кулғи.*)

Зокир-гов уларнинг ҳолидан хабар топиб, шошди ва ошиқиб, уларнинг бетини хонға қаратди.

—Хай, беспадлар, ҳай, беадаблар... тұғрингда ўлтурған кишига баробар құллиқ қил.

Учави баробар құллиқ құлдилар, күлгі бошланды. Чунки уларнинг ҳар бири бошқа кишига құллиқ қилиб, хон четда қолған зди.

Зокир-гов хонға узр айтиб, уларни койиди:

—Кимга құллиқ құлдинглар?!

—Тұғримизда ўлтурғанга.

—Лұнда бўл, лўнда; учавинг ҳам!.. Дуо қил, дуо!

Учави дуога қўл очти, қўл очқанча бир неча вақт қарашиб турди, сўнгра тирсаги билан бир-бирини туртиша бошлади. "Сен қил, сен..." (*Кулғи кўтарилди*). Улардан дам чиқа бермагач, Зокир-говнинг ўзи қўл очти:

—Омин де, ҳўкузлар!—деди. Улар "омин, омин" деб турдилар.—Шояд дуо қабул бўлса... Оллоҳ таолонинг мулла Бахтиёр ва Давлат каби закки бандаларига бизнинг эҳтиёжимиз йўқ. Шунинг учун дуо қиласизки, бу учавининг жонини тезроқ олсин ва бандаларини бу фалокатдан қутқарсин, омин!

Учави ҳам фотиҳага юз сийпашкан здилар, яна атрофни гуррр эткан күлгі бости. Фотиҳадан сўнг Зокир-гов уларни йўлға солди:

—Тилак қил, тилак; бақрайиб турасанларми? Учави яна бир-бирини туртишиб, ўз ора бир нарса сўзлашиб олдилар. Давлат нимадир айтиб, суфага ўлтурғанларга ишорат қилди... Орадан Баҳром тилакка оғиз очти:

—Салла—калла, шопу шалопни кўриб, ўзимиз ҳам жуда қўрқанға ўхшаймиз... Манови Давлат бўлса—"Бу ўлтурғанларнинг қаммаси ҳам одамхўр", деяпти. (*Кулғи.*) Энди тилагимиз шуки, бизларга жавоб берсалар, жойимизга тинчкина кетсак... (*Кулғи.*) Илоҳи мана шу ўлтурғанларга худойим инсоф берсин... (*Кулғи.*) Юрагимиз жудаям чиқиб кетаяпти! (*Кулғи.*)

—Хай, тилакларинг билан бориб ёт!—деди Зокир-гов ёнига уриб.—Қочиб қол, еб қўяди!!

Орадан "дод" деган товуш чиқди, учави ҳам уч томонга қочар экан, Бахтиёр Давлатнинг оёғига чалиниб йиқилди.

(Қаттиғ күлгі.) Баҳром билан Давлат олпонғ-толпонғ бордонға кириб кетдилар... Зокир-ғов Бахтиёрни тутиб қолди.

— Құй, ака, құй!—деб йиглади Бахтиёр,—бекорға ўлиб кетмай, бала-чақам бор?

— Емайди сени!

— Ейди, ака, ейди! Манови бекингнинг күзига қара...вой-воя-а-а, қўювор! (*Кулги*.)

— Мен сенларга аччиғ айтим-а, падар лаънат!

— Менда ўчинг борға ўхшайди, ака! Анови домланг нах одамхўрнинг ўзи, кийимингни ҳам ешдириб ўлтурмайди... Уягини сўрасанг, хонингта ҳам ишонмай қолдим! (*Кулги*.)

Бахтиёр силтаниб Зокир-ғовнинг қўлидан чиқди ва гилдирагандек бордонға қараб қочти. Зокир-ғов ҳам уни қувлағанча бордонға кирди.

Бир оздан сўнг тузукроқ кийимда, бошиға салла ўраб, оёғида сағри кафш билан қўлида жойнамоз каби бир нарсани кўтариб бордондан Давлат чиқди. Хонга таъзим қилғандан сўнг, жойнамозни ерга ёзди. Хонга яна таъзим қилиб: "Шайхулислом Валихон тўра<sup>1</sup> шу ерга марҳамат қилар эканлар!"—деди. Хон мулла Ниёз домланинг ёнида ўлтурган шайхулислом Валихон тўрага қаради. Аҳволга тушунмаган шайхулислом "Нима гап?" дегандек қилиб, жойнамоз ёнидағи Давлатка кўз қирини ташлади. Давлат "Ҳеч гап" деган ишорани бериб, бордонға қайтиб кетди. Демак, ҳозир шайхулислом Валихон тўрага муқаллид бўлмоқчи эдилар. Буни пайқаган ҳалқ секин-секин, бир-биси билан имлашиб, кулимсишдилар ва барчанинг кўзи бордон уйда бўлди. Бир вақт бордон эшигидан банорас тўн кийиб, ўнг қўлиға асо ушлаган ва сўл қўлида адрес рўймолға тугиклик китоб кўтарган, шайхулислом Валихон тўра (Зокир-ғов) кўринди. Шайхулислом каби қадди бир оз букик ва қадам қўйиши ҳам Валихон тўрадек икки тарафка мойил эди. Барчанинг кўзи ва дикқати ҳар икки шайхулисломда бўлди. Хон ёнидағи ҳақиқий шайхулислом эса қип-қизарған ва ҳар он "тавба" деб қўяр эди.

"Шайхулислом" йўл устида тўхтади ва ерда тушиб ётқан бир нарсани асосининг учи билан текшириб кўрди ва уни туртиб четка чиқарғач, йўлида давом этди.

<sup>1</sup> Бу киши асли чустлик бўлиб, шайхулислом ва янги солинган Ҳоким ойим мадрасасининг бош мударриси (*муал*).

Күбчилик чидалмади, гур этиб кулиб юборди. Валихон тўранинг ўзи ҳам тавба аралаш кулиб қўйди. Чунки Зо-кир-гов ҳеч бир нуқсонсиз муқаллид бўлмоқда эди. Жой-намоз ёнига етди, асосини шайхулислом асоси ёнига ти-ради, кафшини ешиб, жойнамозга чиқди. Ўлтуриб китобни тизасига қўйди ва пичир-пичир дуо ўқуб юзини сийпади.

"Шайхулислом" уёқ-буёқни қарагандан кейин чақирди:

—Мирзо Ҳамдам-ҳай, мирзо Ҳамдам-ҳай!

Кулги кўтарилди, айниқса, шайхулислом ёнида ўлтурган домлалар қаттиғ қулдилар.

—Мирзо Ҳамдам-ҳай...

Бордондан Баҳром чиқди, ул ҳам муллаёна кийинган эди.

—Лаббай!

Баҳром "шайхулислом" қаршисиға келиб, салом берди. "Шайхулислом" жавоб бериб, жойнамоз ёнига ешкан кафшига қаради.

—Ҳай, шу кафшимни бир пок қилинг, мирзо Ҳамдам.—"Мирзо Ҳамдам" тавозиъ билан чўнтағидан рўймолини олиб, кафшни арта бошлади ва шу вақтда бордон ичидан, ул ҳам муллаёна кийимда мулла Баҳтиёр чиқиб келди; "шайхулислом" қаршисиға келиб, салом берди.

—Ваалайкум ассалом!—деди "шайхулислом" ва келгу-чининг апти-бошиға қараб олди.—Шинед, бачча, шинед!

Баҳтиёр ўлтурди.

—Хўш, писар, чи гап?

—Тақсир... сизга...арзим бор эди... Подшоҳимиз янги мадраса бино қифанлар, деб илм талабида қишлоқдан тушкан эдим; бир ҳужра берсангиз, деб сизга арзга...

—Хўб, хўб... Шумо гужойи!<sup>1</sup>

—Тақсир, Олтиариқдан...

—Аттанг, аттанг,—деди "шайхулислом",—барвақтроқ келмабсиз-да, бачча, акун<sup>2</sup> ҳамма ҳужраларга жой йўқ, муллабаччалар жойлашиб қолган.

—Муллаларнинг арасиға қўйсангиз ҳам бўлавуради менга,—деди тавозиъланиб Баҳтиёр.—Биз қишлоқ одами... сиқилишсақ ҳам ётавурамиз, тақсир!

—Хўб, хўб... Акун ҳужраларимиз муллабаччалар ми-

<sup>1</sup> Шумо гужойи—сиз қаерликсиз.

<sup>2</sup> Акун—(акнун)—энди.

нан беҳад тўлган, ҳолонки бир тариқ ҳам сиғмайди, биз дуруғ сўзламаймиз, бошидон...<sup>1</sup>

Ҳақиқий шайхулислом масалага тушуниб тер чиқара бошлади. Бахтиёр (муллабачча) маъюс фотиҳа ўқуб "шайхулислом" ҳузуридан кетди. "Мирзо Ҳамдам" кафшни туфлаб, тозалаб бўлғандан кейин "шайхулислом"нинг қаршисиға ўлтурди. Нариги ёқдан "шайхулислом" рӯбарўсига Давлат келиб тўхтади.

—Ассалому алайкум, тўра почча!—деди Давлат ва кафшини ешиб келиб, "шайхулислом" билан қўл олишиб кўришиди.—Хўб саломат, оғият ҳастедми<sup>2</sup>, тақсир?

—Худоро шукур, худоро шукур.

Давлат рухсат, фалон кутмай "шайхулислом"нинг ёнига ўлтуриб олди.

—Ба жаноб арз...

—Бисёр хўб, арз кунед<sup>3</sup>.

—Очиқ гав: бизга бир ҳужра берсалар, деб келдик-да, тўра почча!

—Хўб... Гужойи?

—Тақсир, чустий, ба жаноби шумо ҳамشاҳрий<sup>4</sup>.

—Яъни писари ки?

—Писари усто Муҳаммад собунгар.

—Хўб, хўб,—деди "шайхулислом" ва "мирзо Ҳамдам"га буюрди,—ба ҳамин одам як ҳужра додан гир<sup>5</sup>!

Давлат дуо қилиб "шайхулислом" ҳузуридан кетди. Қўйконлиқ муллабачча рўлида Бахтиёр келди. Унга яна: "Биз дуруғ сўзламаймиз, мадрасамизга бир тариқ ҳам сиғмайди", деган жавоб бериб жўнатилди. Давлат яна чустлик бир толиби илм бўлиб келган эди, "мирзо Ҳамдам" орқалиқ "додан гир!" буйруги берилди. Қаттиғ кулги кўтарилиди. Хон ва домла Ниёзнинг кўзларига ёшлар чиқди. Аммо шайхулислом дам-бадам манглай терини артиб олар эди. Зокир-гов хонга қуллиқ қилиб, шогирдлари ёнига борди. Хон ва раъият янги қизиқлиқни кутиб қолдилар.

<sup>1</sup> *Бошидон*—ўргуляй.

<sup>2</sup> *Оғият ҳастедми*—тинчмисиз.

<sup>3</sup> Жуда ҳам яхши, арзингизни айтинг.

<sup>4</sup> Чустликман, сиз жанобларига ҳамшаҳарман.

<sup>5</sup> Шу одамга бир ҳужра бергин.

## 37. БИРИКИШ

Далъ ойи<sup>1</sup>, қаттиғ қиши. Девоннинг ҳар икки хонасига бир нечадан сандал қўйилган эди. Ҳар бир сандалга тўрттадан мирзо жойлашиб, дафттар таҳрири, ёрлиғ иншоси билан машғул эдилар.

Хон қузурига чақирилган Анвар ярим соат чамаси кечикиб чиқди. Анвар ўз хонасига келиб кирганда, четдаги танчада Шаҳодат муфти бошлиқ мулла Абдураҳмон ва Калоншоҳ мирзолар нима тўғрисидадир, оҳиста-оҳиста сўзлашиб ўлтуарар эдилар. Эшикда Анвар кўриниши билан уларнинг суҳбати кесилди ва ҳар ким ўз қўлидағи ишка қаради.

—Эҳи, эҳи,—деб йўталинди Шаҳодат муфти,—нима фармон бор, мирзо Анвар?

—Ҳеч гап,—деди Анвар ўз танчасига жойлашиб.—Ўш, Андикон ҳокимларига нома буюрилди... Сиз, мулла Абдураҳмон ака, қўлингиздагини неча нусха тайёрладингиз?

Мулла Абдураҳмон ёнидаги қоғозларни санади:

—Уч нусха.

—Яна бир нусха ёсангиз бас. Закотчи исменин қўймагандирсиз?

—Қўймадим.

—Жуда яхши, ўзим қўярман. Қўлингиздагини тезроқ ёзиб битирсангиз, яна бир иш бор,—деди Анвар ва Шаҳодат муфтига юз ўгири.—Тақсир, сиздан бир илтинос; кечаги Абдушукур понсадга маҳзарни<sup>2</sup> ўзингиз ёзиб бермасангиз бўлмайдирган кўринади. Боя менга яна учрашди; гулдир-гулдир қиласи, маҳсадига ҳеч бир тушуналмадим. Чамаси, унинг даъво кониятини сиз яхшироқ билар экансиз?

—Қўйинг шу бош оғригини,—деди муфти,—неча бора менга иши тушиб, бирар мартаба ҳақ берганини хотирла-майман.

—Ҳақ олиб беришкан мен кафил.

—Эй-ҳа, мен ололмағанини сиз олармидингиз?

—Ололмасам, сизга ўз ёнимдан тўлай, тақсир; иш қилиб, шунинг даъвосидан мени қутқаринг-чи.

<sup>1</sup> Далъ ойи—22 январь-21 февраль.

<sup>2</sup> Маҳзар—ариза.

Шаҳодат муфти индамади. Анвар қоғоз олиб, бир нарса ёза бошлади. Шаҳодат муфти оқистагина ёнидаги Абдураҳмонни туртиб қўйди ва Анварга ишорат қилиб, "ана аҳвол" дегандек илжайди. Яъни унинг ҳаракати "кўрдингми мирзобошини, қўлидан маҳзар ёзиш ҳам келмайди" мазмунида эди. Мулла Абдураҳмон оқиста бош кўтариб кулимсиди. Бу гапдан хабардор бўлиб ўлтурган Калоншоҳ мирзо қўлинин оғзига карнай қилиб Анварга тўғрилади, яъни, жиртак чалди. Шу ҳолда эшикдан Султонали мирзо кириб, Калоншоҳга тикилиб қолди...

—Маймунилик муборак!

Иш билан машгул Анвар қоғоздан бошини кўтариб, эшикдаги Султонали мирзога ҳаради:

—Нима гап?

—Ҳеч гап,—деб кулди Султонали, аммо кўзида ғазаб ўти ёнар эди.—Мен бояғи қоғозға кирган эдим.

Анвар ёнидаги қоғозлар ичидан бир ариза ажратди:

—Жавоб мен айтканча бўлсин.

—Хўб.

Султонали қоғозни олиб чиқар экан, яна уларга қараб қўйди. Уларнинг учави жиддий равишда ишка берилган, қоғоздан бош кўтармас эдилар. Султонали чиқиб кетди. Бир оздан кейин Шаҳодат муфти секин бош кўтариб Анварга ҳаради. Анвар ўз ишига қаттиғ боғланған эди. Шаҳодат муфти Калоншоҳ билан кўз тўқнаштириб, "яҳши бўлмади", деган каби бош чайқади. Калоншоҳ аҳамиятсиз кўз қисди. Одатдагидан ҳам ранги ўчкан Абдураҳмон буларнинг ҳозирги им-ишоратига иштирок этмай, ўз ишига қараған эди.

Солиҳ маҳдумнинг ўша сўзи билан Абдураҳмон ишка олинған эди. Уч ойдан бери Анвар қошида—ўз ҳузурида мўрзолиқ қилиб келар ва иккинчи ойдан беш тиллолиқ моҳонага ҳам ёзилған эди. Бир ойлар чамаси Анварга садоқат билан, унинг қаноти остиға киргандек ишлади. Бу орада Шаҳодат муфти ва Калоншоҳ мирзо кабилар билан сирдон бўлмаса ҳам танишди, яқинлашди. Бошда Шаҳодат муфтилар уни ётсенишиб унинг ёнида ҳар турлик гийбатларни қилишдан чўчиidlар. Чунки мулла Абдураҳмоннинг Анвар кишиси бўлиши тахмин қилинған эди. Иккинчи ойдан моҳонага ёзилиши ҳам уларнинг ўз андишаларида янгишмаганиклиларини кўрсатди. Бироқ Абдураҳмоннинг баъзи ҳаракатлари, масалан мирзо Анварнинг арабча, форсийча лафзлардан холи, содда таҳририни нус-

халарга күчирар экан—"аттаому было милхи" (түзсиз ош), деб кулиб қўйиши муфтиларни ўйлатиб қўяр, бу таънани чин кўнгилдан чиқанига шубҳаланишни да, шубҳаланмасни да, билмас эдилар. Шундай фурсатларда "аламзада" муфтилар ҳам бирар латифа сўзлашка тутунар, аксар, латифа мазмунини бир тарафка буриб юритар эдилар. Баъзан Шаҳодат муфти ишдан чарчаган каби оҳ тортиб, ўзича "ямутул-асаду фил габоби жуъян ва лаҳмут-тайри ютраҳу лил-килоб"<sup>1</sup>, деса, иккинчи ёқдан Калоншоҳ мирзо шу мақолнинг давомини сўзлаб "ва хинзиру яному фил-фирош ва улул-уқули яному алат-туроб"<sup>2</sup>, дер эди. Мулла Абдураҳмон уларнинг кинояси мазмунига тушунибми ёки тушунмасданми—ҳар ҳолда бир илжайиб қўяр эди.

Шу йўсун иккинчи ойда бу икки муфти мулла Абдураҳмонни синаб вақт кечирдалар. Абдураҳмон ҳам ўзининг аксар сўз ва ҳаракатлари билан уларни шубҳадан чиқара борди, ниҳоят икки муфти учунчи ёш "олим"ни ҳам гарчи бир "нодон" тарафидан келтирилган бўлса ҳам "заршунос" деб билдилар ва учунчи ойдан уни ҳам ўз ёнларига олиб сирдон бўлишдилар. Бояғидек, "қозихона маҳзарлари" уларга дастмоя бўлди. Анвар ўзи вақт тополмай, бирар нарсани муфтиларга ҳавола қиласидирган бўлса, "мирзобошининг тиши ўтмади" деб кулишдилар. Мулла Абдураҳмон ҳам валинеъмати бўлған Анварнинг риоясини унугтаёзди. Чунки мазкур икки муфтининг таъсирлари кучлик бўлиши устига, ўзи ҳам уларга мойил, ҳатто бу камси-тишлардан лаззат олғучи эди...

Анвар икки муфтининг гийбатларини яхши билса ҳам, Абдураҳмоннинг бу гийбатда иштироки борлигини сезмас эди. Фақат яқиндан бери Султонали мирзо Абдураҳмоннинг бунда иштироки борлигига воқиф бўлди. Ҳатто шу тўғрида Анварга баъзи сўзларни ҳам айтди. "Мулла Абдураҳмондан нон емаймиз, сизга қарши қаттиғ қутурган икки итимиз бор эди, энди учунчисини ўзингиз келтирганга ўхшайсиз..."

Кечка томон мирзолар тарқалишдилар. Бироқ, бизнинг муфтилар ҳануз қўзғалмас эдилар. Анвар эса ҳаммадан

<sup>1</sup> Арслон чангальзорда очлиқдан жон берадир, аммо итни қуш гўшти билан боқадирлар (*муал*).

<sup>2</sup> Тўнгуз ҳузур қилиб тўшакда ухлайдир, оқиллар тупроқда ётадирлар (*муал*).

кейин чиққучи эди. Икки муфтининг қўзгалмаслиқлариға ўзи сабабчи бўлғанлигини яхши билган Султонали мирзо Анвар билан хайрлашиб чиқди. Шундан бир оз сўнг муфтилар ҳам кетишка чоғландилар.

Ҳаво совуқ, тўрут эллик чамаси қор ёғиб, кўча бетини ёпқан эди. Қўқоннинг ўзига маҳсус изгириқ бу қор билан яхши қуролланиб, кишининг қулоқ-тумшугини заҳар каби ялаб ўтар эди. Кишилар телпакни бостириб кийган ёки саллани қулоқ ва манглай аралаш ўраб, бўз гуппини тумшуққача кўтарган эдилар. Кўча бўйлаб ҳар ким чопар, бир нарсадан қуруқ қоладирғандек югурап эди. Бу кунги совуқ билан қор ҳар кимга ҳам гарчлиқ кафш инъом қилған, бой ва беклар оёғидаги бедона, сағри қала кафшлар билан камбағал косиблар кийган утика<sup>1</sup>, айбаки кафшларнинг ўзаро фарқи қолмаған ва ҳатто баъзилар оёғидаги ёғоч кафшлар ҳам ажойиб нағманавозлиқ қилар эдилар.

### 38. ФАРИБ КЎНГЛИ

Анвар бошқалар каби югурмаса ҳам елиб келар эди. Хишткўпрукка етканда, катта сув ёнидағи ҳужра эшигидаги қўсқи<sup>2</sup> пўстунга ўралиб турған қоровул унинг олдиға тушиб салом берди:

—Совуққа қотқан кўринасиз, тақсир... Гулханимиз бор.

Анвар тумшуғини тўнидан чиқариб илжайди ва тутун чиқиб турған эшикка бурилди, қоровул олдинда келиб, эшикни очиб берди, Анвар ичкарига кирди. Тутун билан қоп-қорайған, пасткина қоронғи ҳужранинг ўртасида гулхан ёниб, алангаси мўрига ўрлар эди. Гулхан ёнида қўлиға касав тутқан Султонали мирзо олов жўнашдириб ўлтурап эди.

—Сиз ҳам совуққа қотқанларданмисиз!—деб кулди Анвар.

—Жон олов—жон эр, депти бир хотин... Гулхан ўтлик йигитнинг иссиқ қучоги эмиш. Қани, бу ёққа марҳамат! Қоровул ва Султонали миззоларнинг қисташлари билан

<sup>1</sup> Утика—бузоқ терисидан тайёрланган кўн.

<sup>2</sup> Қўсқи—жулдур, эски.

Анвар гулханнинг тўрига, тўрт қатланиб солинган кийизга ўлтуриб, қўлини оловға тутди.

—Ўзингиз ўлтурмайсизми, ака, ўлтуринг!

Анварнинг бу сўзи билан адаб сақлаб турған қоровул гулханнинг бир чеккасига чўккалаб, гулхан ёнидаги қора қумғонни оловға тираброқ қўйди.

—Совуқ тузук бўлди,—деди Анвар исиниб.—Ўрдадан чиқиб, ўзингизни гулханга урибсиз-да?

—Қарасам уйга еткунча қотадирғанман, Тойир акамнинг туйнугида тутун кўриб, эшикни очсан, иш катта. Хиралик бўлса ҳам кирдим, нима қилади... Бироқ, сизни Тойир акамнинг ўзи чақириб киргандга ўхшайди, ҳали сизга чой дамлайман, деб овора бўлса ҳам эҳтимол...

Тойир ака қумғонни яна олов томонга итариб қўйди:

—Хозир дамлаймиз, тақсир, ҳозир. Сув ҳам қалқиб қолибдир, яхши кўк чойимиз ҳам бор.

—Ўзларингиз ичмасангиз, меним учун ҳожат эмас, мен ҳозир кетаман.

—Шу гулханни ташлаб, қаёқقا?

—Уйга... Балки кишилар кутиб ўлтурган чиқарлар.

—Шундай совуқда сизни ким қутсин, чойни дамлай беринг, Тойир ака, мирзобошини юбормаймиз.

—Шундай бўлсин, тақсир... Ғарибларнинг чойидан ҳам бир ичиб қўйсилар,—деди Тойир ака ва ўридан туриб бурчакдаги ёрилган тарашадан бир қучоқни келтириб гулхан ёниға ташлади. Қайнаб тошқан қумғонни оловдан олиб, чой дамлади.

—Тойир акамнинг гулханини ташлаб кетиб бўлмайди,—деди Султонали,—бир-икки пиёла чойидан ҳам ичиш керак, бир-икки калима суҳбатини ҳам эшитиш керак.

Анвар илжайиб қўйди. Тойир ака қозиқдаги тугунни очиб тўрт-бешта нон, бир ҳович каттақўргон магиз олиб, кичкина баркашчага солди. Баркашни Анвар олдига келтириб, узр айтди:

—Камбағалчилиқ, тақсир, олдингизга дастурхон ёзолмадиқ...

—Нима айби бор,—деди Анвар,—мен шундай қоронги уйда гулхан ёнида ўлтуришни ва шу ҳолда чой ичишни жуда яхши кўраман.

—Бу ўлтуришнинг ўз олдига бир нашъаси бор,—деди Султонали.

—Бор... Шоирона, дарвешона бир маъноси бор. Мен

ёш, ятим чогим, опамнинг уйида шу ҳолни кўрар эдим. Язнам қашшоқ косиб эди. Қиш келди дегунча гулхан ёқар ва шу йўсун гулхан ёнида ўлтуриб чой ичар эдик. Шу гулхан ҳаётси ҳануз меним эсимдан чиқмайдир ва шу ҳаётка ҳамиша кўнгилда бир муҳабbat сақлайман.

Тойир ака Анварга сопол пиёлада чой узатди. Гулхан кейинги қалангтан тарашалар билан аллангаланиб ёнди. Қоронги ҳужра ёришиб, учқунлар билан зийнатланди.

—Бола-чақангиз борми, Тойир ака?

—Йўқ, тақсир... Шу ерда юртни дуо қилиб ётаман.

—Тойир акам ҳам сизга ўхшайди,—деб кулди Султонали.—Тўйни кўкламга қолдирғанингиз яхши бўлмади, қиши кунлари Тойир акамдек ёлғизлиқ...

—Чунки мен Тойир акам турмишини яхши кўраман... Дардисарнинг нима кераги бор-а, Тойир ака?

Тойир ака қўлида касав билан олов тўғрилар эди.

—Қурби еткан кишининг бола-чақа қилғани маъқул, тақсир.

—Нима учун?

Тойир ака олов жўнашдириб, бир оз жавобсиз ўлтурди. Соқол-муртига учиб тушкан учқун кулларини селпиб ташлади.

—Худой фарзанд берса, қариган кунларингизда ишинингизга ярайди,—деб қўйди Тойир ака, яна бир оз олов тўғрилаб турди.—Менда ҳеч ким йўқ... Ёшим эллидан ошқан, тақсир... Ҳозир куч-қувват бор, бир нарса топиб бўлади... Бир вақт келар, куч кетар, шунда менга ким қарайди, тақсир? Иссиқ жон, мен оғриб ётарман, бир қошиқ сувға мұхтож бўларман... Шунда сувни менга ким беради, тақсир? Ўлим ҳақ, ажал етиб амонатни олса, кўзим юмилса, бир чеккада ўлиб қолғанимни ким билади, тақсир?.. Кишининг бола-чақаси бўғандай шундай гаплар йўқми, деб ўйлайман-да.

—Тўғри гап,—деди Султонали,—дарҳақиқат, киши қандай кунларга қолишини билмайди. Тойир акам айтканча, бола-чақа бўлса, бир оз кўнгил тўқи-да.

Анвар бир оз сўзсиз, ўйланиб турди, қўлидағи пиёласини бўшатиб, Тойир акага узатти.

—Уйлантириб қўяйлиқми сизни?

Тойир ака миннатдор оҳангда кулди.

—Э, жонингдан, тақсир,—деди,—энди бўлмайди.

—Нега бўлмайди?

—Соқолға қаранг, ўлим иси келади...

—Бўлмаған гап... Сиз биздан ҳам ёш кўринасиз.

—Кўнгил қариган, тақсир, кўнгил,—деди Тойир ака, ҳўлини кўкрагига тегизиб олди.—Энди кўнгил ҳеч нарса ҳам тиламайди, фақат тинчлиқ тилайди... Тинчлиқ қачон бўлади, унисини билмаймиз-да.

Сўзни яна айлантириш카 йўл қолмади. Анвар ер остидан Султоналига кўз юборди. Султонали маънолик бош иргатиб қўйди. Тойир ака ўз олдидағи ёниб ўчкан хокаларни кулдан ажратиб, гулханга ташлар эди. Бояги шиддати йўқолған гулхан нафис кўк тутун чиқариб оҳистагина чайқалиб ёнар эди. Куллар кўкка учар, чўғлар кулга ботар, чалалар чўққа айланар эдилар... Учави ҳам сўз қўйишқандек анча вақт гулханинг шу ҳолини таъқиб этдилар.

### 39. БИШЎЙ, ЭЙ ХИРАДМАНД...

—Муфтиларингиз меним орқамдан жўнаған бўлсалар керак, мирзо Анвар?

Хаёли бошқа нарсада бўлған Анвар Султоналининг сўзига тушунибми, эмасми, ҳар начук бош иргатиб қўйди.

—Мен сиз билан хайрлашиб кўчага чиқсан, "дўстингиз" мулла Абдураҳмон уларни кутиб турған экан. Чамаси кундузги "суҳбат"нинг мобаъди<sup>1</sup> бўлса керак?!

Анвар хаёли билан видоълашқандек, тилар-тиlamас Султоналига юз ўғирди.

—Қандай суҳбатнинг?

—Суҳбатнинг эмас, гийбатнинг.

Анвар кулди:

—Сиз мулла Абдураҳмон домлани кўралмай қолдингиз.

—Масала кўралмасликда эмас, унинг нолойиқ ҳаракатида, дўст кўриниб душманлик кўчасига киришида.

—Биз унинг чин кўнглини билишдан ожизмиз.

—Ҳар ҳолда бу калтакесак бизга дўст эмас.

—Хўш?—деб кулди Анвар.

—Муфтилар бизга дўстми, душманми?

—Балки душмандирлар, лекин биз уларга душман эмасмиз.

—Бали!—деди Султонали мирзо.—Башарти бизнинг ёр-

<sup>1</sup> Мобаъд—давоми.

дамимизда ишлик бўлган бир одам, эрта-кеч бизнинг душманимиз ҳисобланған кишилар билан ҳамсуҳбат бўлса, оғиз-бурун ўпишса, биз унга қандай баҳо беришимиз керак? Бундай одамни биз очиқдан-очиқ душман ёки аҳмоқ деймиз. Аммо мулла Абдураҳмон аҳмоқ эмас, кўб иш кўрган туллак! Энди фақат унинг душманлик тарафи қолди, ҳам бу аниқ. Меним ҳукмимга қаноат қилмасангиз, ҳикматка қаранг. Шайх Саъдий:

"Бишўй, эй хирадманд, аз он дўст даст,  
Ки бо душманонат бувад ҳамнашаст".—

дейдирлар...

—Мен мулла Абдураҳмонни яхши киши, деб ўйлайманми?

—Ўйламайсиз, бироқ унинг ўзига яраша муомала қилмайсиз, шу билан бирга анови муттакамларни ҳаддидан оширасиз!

Анвар баркашдаги магиздан бир-икки дона олиб қўлида ушлади.

—Сизнингча, улар билан қандай муомала қилишимиз керак?

—Мулла Абдураҳмонни ўрдадан жўнатиш керак; тинч-кина имом ва хатиблигини қилсан. Муфтиларга ҳам қозиҳонадан бирар вазифа топилиб қолар.

Анвар бош тебратиб кулди. Тойир ака гулханга ўтун қалаб шом учун жойнамоз ёзди. Султонали мирзо имом бўлиб, уч киши шомға турдилар. Шомни ўқуб гулхан ёнига ўлтуар экан, Султонали сўради:

—Еки уларни ўрдадан жўнатиш осон эмасми?

—Осон, бироқ осон ишда лассат йўқ,—деб кулди Анвар.—Сизнинг шу гапингиз билан бир киши ёдимға тушти: ўзи мулла Абдураҳмоннинг қавмларидан бўлган оқ кўнгилли содда бир киши бор. Оти... ҳа, оти Сафарбой, касби бўзчилиқ. Ўткан кун ўрдадан қайтиб борсам, шу киши уйда мени кутиб ўлтурибдир. Хўш, келинг, Сафар aka?—Куйган-пишкан, менга "арз" қилди: мулла Абду-

<sup>1</sup> Бишўй, эй хирадманд, аз он дўст даст.  
Ки бо душманонат бувад ҳамнашаст (Саъдий).  
(Эй ҳушёр киши! Душманларинг билан бирга ўлтуришкан—ҳамсуҳбат бўлган дўстингдан қўл ювғил (муал).)

раҳмоннинг бир дўстидан эшиткан эмиш, гўё мулла Абдуроҳмон биравга "мирзо Анварнинг тегига яқинда сув келади" деган эмиш... "Бу нима деган гап, мирзо, нега сизнинг тегингизга сув келади?" деб сўрайди. Мен кулдим... "Ҳозирча тегим қуруқ, башарти тегимга сув келса, бўзчилиқни ўргатасизми?" деб сўрадим. Саволимга жавоб бермайди, фақат сизнинг сўзингизни айтиб: "Имомимиз фисқи-фасод, бундай кишини ҳайдаганингиз маъқул" дейди. Сизга ёқадирған сўзни айтдимми, Султонали ака?!

—Бу киши сизга чин дўст экан,—деди Султонали жиддий.—Мен ўз фикримда янгишмасман. Бу калтакссак юткан чаённинг юрагида, худой билсин, сизга қарши катта адоват бор.

Шу ҷоққача олов кавлаб жим ўлтурган Тойир ака сўзга қотишти:

—Сафар, елкаси чиққан, жиккак йигит эмасми, тақсир?

—Бали, бали.

—У меним ошнам бўлади. Эҳеј, у билан биз ҳар ёз бирга мардикор ишлар эдик, ўзи ўбдан яхши йигит.

—Вассалом,—деди Султонали мирзо.—Бас, Абдураҳмон ҳам адоватда муфтилардан қолишмайдир. Шунча яхшилиқни билмаган киши...

—Яхшилиқ қил, дарёға ташла; балиқ билмаса, холиқ<sup>1</sup> билур, деганлар. Фузулий: "Даҳр<sup>2</sup> бир бозордир, ҳар ким матоъин арз эдар" деб жуда тўғри сўзлайдир. Шунга ўхшаш биз ҳам, ўзимизда бўлган матоъни бозорға соламиз, улар ҳам бисотларини кавлаб шундан бошқасини тополмайдирлар.

—Бу шундай, мирзо Анвар, аммо ўзингизни душмандан мудофаа қилиш керакми, йўқми?

—Мен нимани душмандан мудофаа қиласай?—деб кулди Анвар.—Агар уларнинг адовати мендан бош муншийликни олиш учун бўлса, марҳамат қилсинлар, ҳатто ўзим уларга ёрдам ҳам берай. Тўғри, сиз уларнинг номуссизона ҳаракатларидан қизишасиз, аччиғланасиз. Менчи, мен ҳам бир инсон, кўқдан тушкан фаришта эмасман, ўз устимдаги гийбатлардан, ҳайвонча қилиқлардан, иззати нафсимга

<sup>1</sup> Холиқ—яратувчи, худо.

<sup>2</sup> Даҳр—дунё, олам.

түқинган ҳаракатлардан аччиғланаман. Сиз айтканча, уларни ўрдадан ҳайдаш мулоҳазаларигача бориб етаман. Бироқ, баъзи андишалар менинг учун камчилик кўринадир; иккинчи, уларни девондан ҳайдаш тўғрисига келганда яна андишалар бор: башарти муфтиларни девондан чиқарсан халқ нима дейди, беш кун амалга миниб, ўттуз йиллик мирзоларни қадр қилмади, демайдими? Агар улар тинчкана чиқиб кетса-ку, яхши, билъакс, хон ва шоғовул домлалар воситасида яна кириб олса, мен нима деган одам бўламан? Бу ҳолда бир адовар устига юз адовар замланишида шубҳа йўқ. Энди мулла Абдураҳмон тўғрисида: бошда мен бу кишини ўрдага олишга қарши бўлиб, биринчи кўришимдаёқ бу мулладан яхшилиқ кутмаган эдим. Бироқ, сизга айтканимча, ўртада нозик бир киши восита бўлди, шундан кейин ноилож хизматка олишқа мажбурият туғулди. Мулла Абдураҳмон ифлослар қаторига ўткан экан, иши осон, жўнатиб юбориш қўлимииздан келади. Ва лекин, фикримча, уни ҳам жўнатиш маслаҳат эмас. Аввало хизматка олмаслиқ керак эди; олингач, уч ой ўтмасдан жўнатиш... Жуда оғир, агар ифлос бўлса унинг табиъати, биз ўзгарта олмаймиз, ҳар ким тилаган ошини ичадир.

Султонали мирзо муфтилар тўғрисида бир нарса деялмаса ҳам, Абдураҳмонни жўнатишга исрор этди<sup>1</sup>.

—Хўб, муфтилар қолсин, яна бир неча кун сасишин. Бироқ, Абдураҳмонни тўхтатманг, агар сиз шу чувалчангнинг баҳридан ўтсангиз, ҳамроҳларига катта ибрат кўрсаткан бўласиз.

Анвар кулиб қўиди.

—Сиз менинг дўстимга қаттиғ тикилдингиз...

—Тикилишкага—тикилдим,—деди Султонали мирзо жиддий,—сиз лоақал шуни ҳам жўнатмасангиз, мен кетаман. Муфтиларнинг афтини кўриб қийналар эдим. Энди бу учунчи ифлоснинг юзига қарашқа тоқатим қолмади!

Султонали жиддийлашкан эди, Анвар яна қарши боришини мувофиқ кўрмади.

—Хўб,—деди,—сиз шуни маслаҳат кўрсангиз, жўнатайлиқ.

<sup>1</sup> Исрор этмоқ—қистамоқ.

—Бали!—деди Султонали.—Сиздан яна бир талаб: эртадан бошлаб мени ўз ҳузурингизга олинг, токи муфтилар эртадан кечкача гийбат сўзлаб, маймун бўлиб вақт кечирмасинлар.

—Бу ҳам осон,—деб кулди Анвар,—улар мен йўқ вақтдан фойдаланиб, юрак бўшатар эдилар. Энди бундан ҳам бечораларни маҳрум этмакчисиз, бу қадар зулм...

Султонали яна кулмади:

—Қилганга қиласмиш-да.

Шундан кейин кетишкага чоғландилар. Анвар қўзғалар скан, ёнчигидан бир тилло олиб, Тойир акага узатти. Тойир ака билибми, билмасданми, ҳар ҳолда тиллони қўлига олғандан сўнг, яна тез қайтариб берди:

—Уят, уят бўлади.

—Бу пул ўзимга, деб ўйламанг,—деди Анвар Тойир аканинг қўлини итариб,—сиз бу пулга ўтун, магиз, ортиб қолса чой оласиз. Султонали акам билан келганимизда гулхани бундан ҳам катта қилиб берасиз.

—Сизлар келсаларинг ҳаммасиям ўзимиздан топилади.

Анвар пулни олмади. Тойир ака маслаҳат сўрағандек Султоналига қаради. Султонали дуо қилиб олинг, деган каби ишорат қилди. Тойир аканинг дуосидан кейин чиқдилар.

#### 40. АЛДАШ УЧУН БОЛА ЯХШИ

Бир неча кунлардан бери Сафар бўзчи хурсанд эди. Мулла Абдураҳмоннинг хизматдан чиқишиға ўзим сабаб бўлдим, деб ўйлар; ўз сўзи билан мулла Абдураҳмон каби бир кишининг сувға тушкан нондек шилқиллаб қолишиға: "Кўрпангта қараб оёғ узат, муллавачча!" деб ўзича кулиб қўяр эди. Кеча Самад бўқоқни кўчада учратиб, пичинг отди: "Мирзабошимнинг тегига сув келипти-я, гапингни тўғри чиқишиға қара, Самад?"—деди. Чунки Анварга бориб айткан хабарни шу Самад бўқоқдан эшиткан эди. Самад бўқоқ унинг бу пичингидан қизарди: "Қулогимга янглиш кирган экан-да, аблаҳ!" деб гапни кулгуликка бурди. Сафар бўзчи ҳам "пайрав" қилди. "Бир қўчқорнинг боши кеткунча, минглаб қўйнинг боши кесилар эмиш, деб айт домлангга!" деди. Самад бўқоқ индамади.

Сафар бўзчи мулла Абдураҳмоннинг хизматдан бўшатилғанини эшиткандан бери "Мирзамни бир кўрсан" деб Анварнинг олдиға боришқа чоғланниб қолди. Бироқ, дастгоҳ ёнидан қўзғалишқа ишни қизганди. Бу кун иш

түқур экан, ўзича қарор берди: "Бу кун чоршанба, эрта панжанба... жумъа кун мен ҳам бўш, миরзам ҳам бўш. Ҳа, индин борганим маъқул".

Шомдан бир оз илғарироқ Сафар ака ишдан чиқди. Куннинг совуқлиғига ҳам қарамай музлаган совуқ сувда таҳорат қилди, нари-бери бўз салласини чулғаб, масjidга юргурди. Ул жиловхонадан кирганда, масжиднинг тўрдаги ҳужрасидан мулла Шаҳодат муфти, Калоншоҳ миরзо ва мулла Абдураҳмонлар намозга чиқиб келар эдилар. Сафар бўзчи ҳар икки муфтининг ҳам ўрдада туришларини яхши билар эди. Мулла Абдураҳмонни ўрдаға яна оладиган бўлибдиirlарми, деб ўйлади ва уч уламо келиб масjidга киргунларича адаб сақлаб, масжиднинг бўсагасида қўл боғлаб турди. Улар келиб масjidга кирар экан, мулла Абдураҳмон кўзининг пахтасини чиқариб, Сафар бўзчига қараб ўтди, улар орқасидан Сафар бўзчи ҳам хонақоҳга кирди. Аммо ҳалиги қараашдан сўнг Сафар бўзчининг бошидан: "Бу муллалар ҳам домламдек ўрдадан ҳайдалгандармикин? Миризамнинг гийбатига йигилишқанлармикин?" деган бир фикр ўтиб кетди.

Сўфи такбир тушурди, мулла Абдураҳмон меҳробка ўтди, муфти ва бошқалар унга иқтидо қилдилар. Ином қироатда, Сафар бўзчи сомиълик<sup>1</sup> ўрнига—"манови кетман соқолнинг афти хунук, уттасининг авзойи бузуқ, домламнинг бўлса ғурраги бола очқан... Учави ҳам аламзада бўлсами? Домламнинг кўнглини кўтаргали келганлардир, ёки миризам билан икки орани битиштирмакчиларми?.. Миризамнинг битишмагани маъқул, икки оғиз гап учун ҳанузгача кек сақлаған домла..." деб ўйлар эди. Шу йўсун васвасаланиб шом намозини қандай ўқуғанини ўзи ҳам билмади, аммо ётиб туришдан эринмади. Фотиҳадан сўнг жамоат тарқала бошлади. Беш-олти киши, жумладан, Сафар бўзчи ҳам адаб сақлаб, домлалар масжиддан чиққунча қўзғалишмадилар. Улар чиқиб кеткандан сўнг сўфи шамъни ўчирди, бошқалар масжиддан тарқадилар. Сафар бўзчи саҳнга тушиб ҳужрага қаради; ҳужра даричасидан шамъ ёруқлиғи тушар, ичкаридан қўлида қуроқ дастурхон ушлаган, ўн бир-ўн икки ёшлиқ бир бола чиқиб келар эди.

<sup>1</sup> Сомиълик—тинглаш.

Сафар бўзчи жиловхонага ўтиб тўхтади. Ҳужрадан келган бола ўз ёнига еткач, болани олдинга ўткариб, унинг орқасидан кўчага чиқди. Бола кўчанинг ўнг томониға қараб кетди. Сафар акаминг ҳавлиси кўчанинг чапида эди, лекин ул ўз ҳавлиси томонга юрмай, шу бола орқасидан борди.

—Ҳой, Шукур сўфининг ўғли!

Шукур сўфининг ўғли—бала, йўл устида тўхтади. Сафар бўзчи унинг ёнига етиб олди.

—Қани юравур, сенинг отинг Маматқул-а?

—Хи.

—Маматқул... Сен бизнинг Асқарбойни танийсанми?

Бола ажаблангансумон Сафар бўзчига қараб олди.

—Асқар меним ўртоғим-да, шу топқача билмайсиз экан-да!

—Ҳа, ҳа...ўзинг ҳам яхши йигит кўринасан... Масжидда нима қилиб юрган эдинг?

—Имом поччамнинг ҳужраларида чай қўйиб бердим. Катта домлалар меҳмон бўб кепти.

—Ҳа, ҳа... Энди қаёққа борасан?

—Имом поччамнинг уйларидан ош об келаман-да.

—Туппа-тузук дасёр бўлиб қопсан-да. Ош олиб келтанингдан кейин тағин чой қўйиб берарсан ҳали?

—Ҳа, қўйиб бераман. Домла поччалар жўнағунча хизмат қилиб тураман.

—Ҳа, ҳа... Катта домлалар қачон келишди экан?

—Дадам азонга чиққанда келишди-да, қўйиб берган чайимни шу топта ичишяпти.

Сафар бўзчи ўн қадамча сўзсиз борди.

—Ўзинг кўб яхши боласан-да, Маматқул, домла поччаларинг нима дейишяпти?

—Ҳали гапуришканлари йўқ-да.

—Маматқул-чи, шу домла поччаларнинг сўзига яхши қулоқ солиб тифнаб оған киши бемалол жаннатка кириб кетавуради-да... Сен ҳам уларнинг сўзини тифнаб оласанми?

—Ҳа, тинғаб оламан. Дадам ҳам савоб бўлади, деяпти.

—Бали, Маматқул, жуда яхши тифнаб ол-да... Агар сен шу домла поччаларнинг сўзини яхши тифнаб, улар жўнағандан кейин менга бориб сўзлаб берсанг-чи, Маматқул, мен сенга ўн пул бераман-да.

Маматқул тушуналмаслик ичидаги Сафар бўзчига қаради:

—Чин айтаяпсизми, Сафар ака?

—Елғони йўқ-да, Маматқул, —деди Сафар бўзчи ва бўз яхтагининг чўнтагини силкитиб жарақлатди.—Кўраяпсанми чақаларни.. Агар уларнинг гапини тифнаб менга сўзлассанг-чи, ўн пулни олавурасан-да, Маматқул.

—Тунда сизнинг олдингизга боргани қўрқаман-да.

—Нимадан қўрқасан, Маматқул? Асқар ўрготинг кечаси ҳам қўрқмасдан юравуради.

—Мен итдан қўрқаман-да.

—Бизнинг кўчада ит йўқ-ку, тентак, қўрқсанг эта-метан бор. Агар имом поччанг энди кетавур деса-чи, Маматқул, хўб, деб ҳужрадан чиқ-да, ҳеч кимга билдиримай, дарчанинг тегидан гапни эшиш, ҳами?

Маматқул нима учундир илжайиб қўйди ва маъқул деган каби бош иргатди.

—Қўрқмасанғ, улар жўнағандан кейин бизникига бор, мен дўконда иш тўқуб ўлтураман; ўн пулни олиб кела-вурасан-да, сендан нима кетди, Маматқул...

—Тузук.

Бола шу сўзни айтиб кичкина, тор кўчага бурулди. Сафар бўзчи боланинг орқасидан бир оз қараб турғандан сўнг, орқасига қайтди. Сафар бўзчи болага берган ўзининг бу ваколати билан келаси кун мирзобошининг олдиға яна бир гап топиб бормоқчи эди. Унинг фикрича, эҳтимолки, кейинги домла поччалар ҳам ўрдадан ҳайдалишка лойик, мирзобошига душман бўлиб чиқар эдилар. Шу хаёллар билан келиб, уйига кирди. Эрини кута-кута қозондаги туппаси аталаға айланган Тўхтабиби Сафар бўзчини ко-йиб қарши олди.

#### 41. ЧАҚАНГИЗ СИЙҚА ЭМАСМИ?

Ул аксар шом ва эрталабки намозларнигина масжидда ўқуб, қолғанларини уйида адо қилар, пешин, аср, хуфтаниларга вақт тополмас эди. Аммо бу кеч жўртта хуфтанга чиқмади. Яъни Маматқул ўн пул учун шошиб, топқан гапини кишилар орасида сўзлаб берса эҳтимол эди. Ошдан сўнг ишхонасига чиқди. Дастроҳ ёнидаги қора чарогни ёқиб ўришдаги узуқларни улади, аймашқан ипларни ешди, чигилларни ёзиб тароғлади, оғзи билан охор буркиб, яна таради ва энг сўнг қурутиш учун ўришни елпиди. Ўриш тўқишқа ростлангандан кейин, эски тўппидаги найчага солинган ипларни (арқоқни) олиб, дастроҳка тушти, тиф ва гулани орқага суриб моккини ростлади.

Қора чароғ аранг-аранг дастгоҳни ёритар, елкаси ташқарига туртиб, күкраги ичка ботқан Сафар бўзчи, гўё дастгоҳка қуюлиб қўйғандек кўринар эди. Тепки босишдан ғич-ғич қилған нағма эшитилар ва бу нағма оҳангига ййнагучи мокки у ёқ-бу ёққа ўтиб турар, лаҳза сайин арқоқ-ўриш бирлашиб, тўрт эллик бўз ҳосил қилар эди. Сафар бўзчининг бир кечлик ишига бир оҳор мўлжал бўлиб, қора чароғнинг мойи ҳам соат вазифасини ўтар, яъни қора чароққа тўлдирилган мой ҳар кун бир оҳорга стиб битар эди.

Сафар бўзчи наворт ёғочини ўраб, оҳорлиқ тандага — ўришка мўралади ва нос отиб, кўча томонга қулоқ солди. Чунки ул ҳануз Маматқулнинг келишидан умидвор эди. Бир оз қулоқ солиб турғандан кейин, моккига янги найча жойлаб, яна ишқа уринди. Ичкарида чарх тоблаб найча солиш билан машғул Тўхтабиби кўйлак енгини иплик ўришчалар билан тўлдириб чиқди. Гап-сўзсиз, ўришчаларни эски тўпига ағдариб, бўшалған найчаларни йигиб олди.

—Оёғим совуқ қотти, оловнинг иложини қил-чи.

—Ўт ёқиб берайми?

—Ҳа, бали, уч-тўртта тарашани кертиб кирсанг бўлади.

Тўхтабиби чиқиб кетди. Сафар ака асабийлангандек тез-тез тепки босиб ишқа қаради. Мокки тўхтовсиз икки ёққа сапчиб турди. Ўн дақиқа чамаси шу ҳолда иш қизғин давом эткандан кейин, бирдан мокки тўхтади, Сафар бўзчи ташқарига қулоқ солиб қолди. Кўча эшик "ғийқ" этиб очилиб, йўлакдан кичкина оёқ товши келди. Сафар бўзчи моккиси қўлида ўзича илжайди, яна бир-икки оёқ босқандан кейин, дўконхона эшиги очилди.

—Бали, Маматқулим, бали... Эшикни ёп, эшикни!

Маматқул эшикни ёпди ва икки қўлини оғзиға кўтариб исинди.

—Совуқ қотдингми, Маматқул? Ҳозир олов ёқамиз, ҳозир... Боядан бери Маматқул келади, деб ўн пулни сақлаб ўлтурибпан-да.

Шу пайтда эшик қияғина очилиб, яна ёпилди.

—Киравур, Тўхта, киравур: ўзингнинг Маматқулинг-ку.

Тараша кўтариб Тўхтабиби кирди ва Маматқулға қаради.

—Маматқулмидинг,—деди Тўхтабиби.—Бемаҳалда нима қилиб юрибсан, болам? Энанг эсон-соғ юриптими?

Маматқул Тўхтабибининг сўзига бош иргатиб, Сафар бўзчиға қаради...

—Маматқулнинг менда иши бор, холаси. Оловни тез-роқ ёқ. Маматқул совуқ қотипти...

Тұхтабиби үтунни гулхан ўрниға ташлаб, құлидағи қовғасини қора чароққа тутиб ёндириди ва бориб үтунни ёқди.

—Уларни жүнатиб келдингми, ўғлим Маматқул?.. Бали, бали. Еңларингта яна бошқа киши ҳам келдими?

—Йүк.

—Ха, ҳа... Имом поччанг сенга кетавур демапти-да?

—Мен тағин икки қайта чай қўйиб бердим-ку: мен кетсам уларга ким чай қўйиб берарди. Мен чайни қўйиб гапни тингаб ўлтурдим.

—Бали, бали,—деди Сафар қулиб ва хотинига қараб қўйди. —Йигит деганинг ана шундай бўлсин-да, бизнинг Асқарбойлар ҳам "йигит"да. Қани, Маматқул, гулханнинг ёниға борайлиқ-чи, исиниб гапиришамиз-да.

Иккиси гуриллаб ёнған олов ёниға чўнқайдилар. Сафар aka оёғини кафшидан чиқариб оловға тутди.

—Асқарбой ухлаб қоғанми, дейман, хола?

—Ухлаб қоған,—деди Тұхтабиби ва бориб дастгоҳ ёнидағи бўшаған найчаларни йигиб олди.—Шуларни тўлдириб берсам, бу кечка етар?

—Тўлдиравур-чи, кўрамиз-да.

Тұхтабиби дўконхонадан чиқди. Сафар бўзчи Маматқулга қараб илжайди. Маматқул ҳам ўз навбатида илжайиб, Сафар бўзчининг чақалиқ чўнтағига қўз ташлади ва нима учундир энтикиб қўйди.

—Хўш, Маматқул охун?

Маматқул ўйлаб иккиланди:

—Китоб... китоб сўзини айтишмади-да, ҳе... Катта домлам қурғандаги<sup>1</sup> ижжани<sup>2</sup> ўқуған эди, мен...

Сафар бўзчи боланинг андишасига тушуниб кулди:

—Сен уқуб ололмадингми, аттанг. Майли, уқуб олғанингни айта бер.

Маматқул енгилланиш нафаси ютди, кўзини беихтиёр Сафар бўзчининг чўнтағига тикди.

—Китоб сўзи бўлмаса ҳам чақани беравурасизми, Сафар aka?

<sup>1</sup> Курған—қуръон.

<sup>2</sup> Ижжа—хижжа.

Сафар бўзчи кулгидан ўзини тўхтата олмади,  
чўнтағидан чақаларни чиқариб қўлига олди:

—Беравураман-да. Кўраяпсанми?.. Шундан ўнови сеники.

—Имом поччам,—деди Маматқул кўзини чақадан олол-  
мағани ҳолда,—имом поччам ўзи ўрдаға мирзабоши бўган  
экан-да... Уша хат битадуган жайда мулла эмас бир киши  
катта бўб қоған экан... Уша мулла эмас хоми киши имом  
поччамни хат битишкага тозаси экан, деб миризахонадан  
чиқарған экан-да... Али миризо деган киши имом поччамни  
унга ёмонлапти...

Сафар бўзчи Маматқулнинг сўзини бўлди:

—Кимга ёмонлапти?

—Уша мулла эмас хоми кишига ёмонлапти-да...Шун-  
нан кейин имом поччамни чиқарипти. Энди катта домлам-  
ларни ҳам ўрдадан чиқарсам, деб юрган экан. Ўзи жуда  
ёмон киши экан-да...Катта домламлар буни нима қиласиз  
энди, деб имом поччамнинг олдига келишипти экан-да,—  
деди Маматқул ва бир исча фурсат Сафар бўзчининг  
қўлидаги чақага қараб турди.—Чақангиз сийқа эмасми,  
Сафар aka?

Сафар aka кулди, чақадан бештасини ажратиб Ма-  
матқулга узатти.

—Мана ўзинг кўр-чи.

Маматқул чақани олиб, уёқ-буёғини текшириди:

—Муҳри бутун экан. Бир пулга ўн пайса ҳолва берар-  
микин, Сафар aka?

—Нега бермасин. Чақани чўнтағингга солиб қўй,  
қолғанини сўзлаб бўғанингдан кейин оласан. Катта домла-  
лар кенгашка келган эканлар, дегин?

—Ха... Чақамни белбогимга тұгсам тушиб қолмасми-  
кин?

—Ҳозир тұгма, мендан яна беш пулни олғанингдан  
кейин, қўшиб тұгарсан.

Маматқул қўлидаги пулни жарақлатиб ўйнади ва шу-  
нинг орқасидан ижирганиб шикоятланди:

—Оёгим ивишиб қоған.

—Чўнқайиб ўлтурма.

Маматқул ўлтуриб олғандан кейин, яна ижирганди:

—Игна санчяпти?

—Қулоқ солма, сўзлай бер, ҳозир ўзи тузалиб қолади.

—А, шундайми,—деди Маматқул маҳсисини силаб.—  
Сизники ҳам ашундақа бўладими, Сафар aka?.. Катта  
домлам соқолини тутамлаб, ўшани янди, тузоқча тушар,

деди. Имом поччам ўйлаб ўтурди, ундан кейин... Санчяпти-ку, Сафар ака?

—Хозир тузаласан, хүш?

—Ундан кейин... Сизларга маъқул бўлса бир гап хотиримга келади, деди. Ўша кўклам чиқса уйланади, деди...

Сафар бўзчи Маматқулни тўхтатиб сўради:

—Ўша ким, ўша?

—Ўша-да, мулла эмас, синглиталоқ-да... Ўзингиз ҳам сўрай берайди экансиз-да!.. Оладуған хотини чиройлиқ, деб эшиштаман, деди. Бу ҳам бир гап-да, шу қизни хонга тўғриласақ бўладимикан, деди. Катта домлалар маъқул дейишиди. Ҳай-ҳай дейишиди... Шу ерда Маматқул бир оз ўйлаб қолди,—бунинг давоси гулчин бўлади, дейишиди.

Сафар бўзчи кейинги сўзни такрорлади:

—Гулчин бўлади, дейишиди?

Маматқулнинг ўзи ҳам бу тўғрида иккилангандек бўлди.

—Мен яхши пайқамадим-да: давоси гулчин бўлади, дейишиди... гулчай... йўқ.

—Ундан кейин?

—Шу, бўлди.

—Бари?

—Бари шу... Мен ташқарига чай қўйғани чиққанимда гап тингамадим-да.

—Маъқул, маъқул,—деди Сафар бўзчи,—ундан кейин улар кетдиларми?

—Кетдилар. Имом поччам энди уйиннга бор, деди менга... Чақани берсангиз қўшиб тугар эдим.

Сафар бўзчи кулиб, қўлидағи чақадан яна беш пулни узатди.

—Мендан ўн пул олғанингни ҳар кимга сўзлаб юрма, тузукми? Ҳа, ундан кейин бу гапни ҳеч кимга айтма, домлаларингнинг сўзи савобсиз гаплар экан... Уйиннга ёлғиз кеткали қўрқмайсанми?

Маматқул бир оз ўйланиб, белидаги чақа тугунини қўли билан ушлади, Сафар аканинг "қўрқмайсанми" саволига жавоб бермай, бориб эшикни очди ва юргурганча чиқиб кетди.

## 42. ҚУВ ОДАМ ЭКАН

Сафар бўзчи дарбозадан киргандан, ичкаридан ясамол бир хотин чиқиб қолди. Мундай яхши кийингган ва ҳусндор хотинни ул ўз умрида биринчи мартаба кўргани учун бўлса керак, хотин яшириниб олгунча, ундан кўзини олмай қаради. Таажжуб ва ҳайрат ичидаги келиб меҳмонхонага кирди. Меҳмонхонада Анвар йўқ, Анвар ўрнида бегона бир киши—Султонали мирзо ўлтурас эди. Сафар бўзчи салом берди. Султонали мирзо жавоб бериб, ўлтурган жойидан Сафар бўзчига жой кўрсатди. Сафар бўзчи бир оз сўзсиз ўлтурғандан кейин, "мирзасини" сўради. Султонали мирзо, Анварнинг қўшниларидан бири-никига зарур бир юмиш билан чиқиб кетканлигини ва бир оздан сўнг келишини сўзлаб, ундан мирзода қандай юмиши борлигини савол қилди.

—Юмиш-ку, йўқ, тақсир,—деди Сафар.—Биз бир холис дуогўй одам... Мирзамни бир зиёрат қиласай, деб келган эдим.

Султонали Сафар бўзчини бир нарсанинг тамаъида юрган киши, деб ўйлади. Чунки Анварнинг қўли очиқлигини, унга кўб ҳожатмандларнинг ўрганиниб қолғанлиқларини яхши билар эди. Аммо Сафар бўзчи Султоналининг силлиқ муомаласидан хурсанд бўлиб, унга қарши ўзида дўстлиқ сезди. Бир оз жим ўлтурғандан кейин Сафар яна тилга келди:

—Барака топсин мирзам одамжон-да, одамжон; биздек фақирлар билан ҳам оғайни, сизлар билан ҳам шундай, барча баробар.

Бу сўз Султонали мирзонинг бояги фикрига қарши сўзлангандек тушди. Сафар бўзчининг мирзо билан оғайнилиқ даъвоси уни таажжубга солди.

—Шундай, шундай... Мирзо, сиз айтканча, барчага баробар йигит, —деди Султонали. —Нима касб қиласиз?

—Бўзчилиқ, тақсир. Лекин мирзам, сен бўзчисан, деб биздан ҳазар қилмайди, биз шунисига адод-да, тақсир... Бўлмаса гузаримизнинг оқсоқоли ҳам икки оғиз гапимизга қулоқ солсин-чи. Нафсамбир гап яхши-да, тақсир.

Сафар бўзчининг "нафсамбир" гапи Султоналини бсихтиёр кулдириди.

—Тўгри айтасиз. Исмингиз нима?

—Биз деворнинг кавагида ётқан бир одам-да. Ўзимиз

киму, исмимиз нима бўлар эди. Шаҳарнинг Олим қовоғи<sup>1</sup> эмасмизки, айткан он таниб олсангиз.

Султонали мирзо яна кулди,—”нафси замр” гаплардан завқланиб, ул ҳам Сафар бўзчиға қарши ўзида яқинлиқ ҳис этди ва бир оз ўйлаб турди.

—Исмингизни айтсангиз, балки мен танир эдим... Сиз бўзчи бўлсангиз, ўткан ҳафта мирзо Анварга бир сўз айткан эмасмисиз?

—Айткан бўлсангиз эҳтимол; нега десангиз, қўл бўшаганда миrzамнинг зиёратига келиб тураман-да.

—Сиз... Сиз мулла Абдураҳмоннинг қавмларидан эмасмисиз?

—Хе-хе-хе... Худда, тақсир.

—Агар янгишмасам, исмингиз Сафарбой чиқар?—Сафар бўзчи завқланиб, кайфланиб кулиб юборди:

—Мирзам айткан эканлар-да.

Султонали мирзо ҳам кулди ва кулги ораси латифа қилди:

—Сиз ўзингизни паст уриб Олим қовоқ эмасманки, отимни айткан он танисанг дейсиз, ҳолбуки, сизни ўрданинг миrzобошиси, шаҳарнинг қўрбоши, даҳбошиси ҳам танийдир.

—Тавба қиппан, тавба қиппан,—деди Сафар.—Мен ўз қадримни билмай юрган эканман-да.

Иккиси ҳангама сўқиб бир неча пайт кулишдилар ва бир онда эски қадрдонлар ҳолига ўтишдилар. Султонали уни “Сафар ака” деб хитоб қила бошлади ва мулла Абдураҳмоннинг кейинги аҳволидан сўради. Сафар бўзчи мулла Абдураҳмоннинг бўшатилғанидан хурсандлигини изҳор қилди ва унинг лаби гезарид юрганини сўзлаб, Султоналини кулдирди.

—Шунчалик ҳолинг бор экан, думингта қумғон боғлашинг нима ҳожат эди, деб куламан. Эгри тўнкага—эгри тўқмоқ; мирзам хўб яхши иш қилғанлар-да.

—Шундай,—деб кулди Султонали,—кишиларга энди нима дер экан, балки қулогингизга чалинғандир?

Сафар бўзчи ўнг қовоғи устини силаб олди ва қўлининг текис ўスマған тирноқлариға қаради.

<sup>1</sup> Худоёрга чет мамлакатлардан мол келтириб сотгучи машҳур савдогар (муал.).

—Бу тұғридағи сўзини эшитканим йўқ-ку... Энди ўзи ёмон одам-да.

—Масалан, ёмонлиги?

—Ёмонлиги...—деб яна тирноғига қараб қолди,—ишиқилиб, тақсир, шу одамни пайини қирқсан, дейди-да. Илгари холисанлилло душман бўлса, энди аламзада бўлдида...

Сафар бўзчининг содда кўнглида яширган сир оз-оз сиртига ҳам тепиб турар эди. Унинг—"...энди аламзада бўлди-да" жумласидан шубҳаланиб қолған Султонали жиддий тус олди:

—Мен мирзо Анвар билан бирга тураман, Сафар ака,—деди.—Мирзо билан бизнинг орамизда ҳеч бир яширин гап бўлмайди. Масалан, сизни тусмол билан танишим, мулла Абдураҳмон тўғрисида келиб айткан сўзингизни билишим...

—Мен буни билиб туриппан, тақсир.

—Билиб турған бўлсангиз,—деди Султонали ўпкалик қиёфатда,—нега мендан шубҳаланасиз?

—Йўқ, йўқ, ука, мен худой ҳаққи...

—Бўлмаса, нега мулла Абдураҳмон тўғрисидағи саволимга тузук жавоб бермайсиз?

—Мен айтдим-ку, ёмон одам-да, ўзи...

—Унинг ёмон одамлигини ўзим ҳам биламан. Аммо мени ҳам ёмон одам деб ўйлаганингиз учун... Хўб, ҳали мирзо Анвар келганда ўша мендан яшириб турган гапинизни сўзларсиз, мен шунда сизни уялтиарман...

Сафар бўзчи бирдан кулиб юборди ва қўли билан Султоналини яниб қўйди:

—Уят қилсангиз ҳам "нафсамбир"ини айтай, анча қув одам экансиз.

Бу содда баҳо Султоналини кулдирди:

—Сиз мендан ҳам қувроқ экансиз.

—Мен топқан гапимни миrzамнинг ўзига айтай, деган эдим-да.

—Албатта айтасиз, лекин мен ҳам эшитсан, зарар қилмайди. Хўш: "аламзада" нима қилмоқчи?

—Аламзадами?—деб кулди Сафар ва бир оз ўйлаб турди.—Ўрдада турадиган бўлсангиз, анови катта гўзим муфтиларингиз бор-ку?

—Бор, бор: пул берсангиз ҳаром ўлган эшакнинг ҳалоллиғига фатво берадирган муфтилар. Хўш?

—Гапларингиз ҳам қизиқ экан... Ана шу муфтиларин-

гиздан иккитаси ўткан кун домламизнинг ҳужрасига мәҳмон бўлишиди...

Сафар бўзчи ўткан фаслда ёйилған можарони бир-бир сўзлаб борди. Эшиткучи бўзчининг соддагина қилиб сир олишини кулиб, завқланиб тинглаб турди.

—Боланинг сўзи кўб тутал келди, тақсир. Чамаси миражам бир қизга уйланмакчи экан-да. Қизи қургур чиройлиқ бўлса, қўйинг-чи, шу қизни хонга олдирмоқчи бўлғанларда. Кишига алам қилғандан кейин ҳар бир куракни бемалол...

Султонали мирзо бу сўзни эшитиш билан бирдан ўзгариб кетди, кўзи катта очилиб, манглайида узун-узун ажинлар ҳосил бўлди:

—Тутылмаган гап... Хўш, сўзлай беринг-чи?

—Боланинг хуллас гапи шу,—деди Сафар ва бир оз жим қараб турди.—Ҳа, ҳа, яна бир нарса ҳам бор экан: улар шуни мувофиқ кўрганларидан кейин—"бунинг давоси гулчин" деб айткан эмишлар. Мен боланинг бу сўзига ҳарчанд тушуналмадим. Бола янгишқанми ёки муллаларнинг шундай тожикиси ҳам бўладими, мен энди авом одамман-да, тақсир.

Султонали мирзо шу жумла устида ўйладими ёки бошқача бир андиша уни машғул этдими, баҳархол, бирар дақиқа чамаси сўzsиз хаёл суриб қолди. Сафар бўзчи эса, бу ҳолдан бад олиб, манглайнини қашиди. Қашир экан, бармоқ ораси Султонали мирзонинг юзидан бир нарса ўқушқа тиришар эди.

—Улар қайси кун шу маслаҳатни қилған эдилар?—деб сўради Султонали мирзо.

—Ўткан кун, тақсир.

—Яъни орада кеча панжшанба ўткан?

—Бали, бали.

Султонали бошини чайқаб тебранди. Сўнгра мирзо Анварнинг кўкламга чиқиб уйланмакчи бўлғанини, қиз эса, шу уйнинг боласи эканини, домлалар мирзо Анварнинг обрўсини тўкиш фикрига тушканликларини сўзлаб чиқди:

—Раҳмат сизга, Сафар ака,—деди Султонали.—Сиз мирзо Анварнинг обрўсига тўқунмоқчи бўлган бир ёмонлиқнинг хабарини олдиндан олиб келгансизким, мирзо Анварнинг бир дўсти бўлишим сифати билан сизга миннатдорчилик изҳор қиласман ва шунинг билан бирга бу хабарни мирзога билдиримаслигингизни, ҳозирча бу сирнинг иккимизнинг орамиздагина қолишини сиздан сўрайман.

Негаки, мирзо Анварни бу хабар билан ташвишка солған бўламиз. Мирзога бу хабарни айтишдан илгари ошиғич равиша сиз билган ифлослар қаршисиға чиқиб ишлашимиз, мирзонинг обрўсига тўқунадирған ёмонлиқни дафъ қилишимиз ва шундан кейингина бўлиб ўткан бу можарони унга сўзлашимиз керакка ўхшайдир. Мен ҳозир мирзо Анвар қайтиб келмасданоқ, шу гап орқасидан бир жойга бораман.... Борадирған жойимни сизга айтиб ҳам қўяй: "Давоси гулчин" жумласидаги "гулчин" сўзини бола янглиш онглаған, улар—"давоси Гулшан" деганлар. Зероки "Гулшан" сўзи бир хотиннинг исми бўлиб, бу хотин хонга чиройлик қизлар топиб бергучи ҳарам далласидир<sup>1</sup>. Улар ўзларининг ифлос ниятларига шу хотин орқалиқ етмакчи, шу воситада мирзо Анвардан ўч олмоқчи бўлғанлар. Фурратни қочирмай шу хотиннинг олдиға боришим керак. Гапка тушунган чиқарсиз, Сафар ака.

—Тушундим, садағанг кетай, тақсир.

—Гап шундай бўлсин; иш бартараф бўлгунча бу тўғрида мирзога оғиз оча кўрманг, жон ака,—деди такрор Султонали ва ўрнидан турди.—Мен мирзо Анвар келмасдан жўнай, келса юбормайдир. Сиздан мени сўраса, бир киши чақириб кетди, дерсиз, дурустми?

—Хўб, мен ҳам сиз билан кетаберсам?

—Йўқ, сиз ўлтуринг, меним дарагимни айтиб уни хотиржамъ қилинг. Ундан кейин келаси жумъа албатта шу ерга келиб мендан натижани эшитарсиз, мирзо билан учавимиз ўлтуришиб суҳбатлашармиз, маъқулми?

—Хўб.

Султонали хайрлашиб, ошиғич меҳмонхонадан чиқди.

### 43. ЧЎЛОҚ ҚУШ

Айвонда салла ўраб овора бўлған маҳдум йўлакдан "зайфа" шапрасини олиб, танчада санама тикиб ўлтургучи Раънога:

—Йўлакда хотин киши кўринади, хабар ол-чи, болам,—деди. Раъно йўлакда ярмисини кўрсатиб ёндама турған хотиннинг олдиға борди.

—Ассалому алайкум...

<sup>1</sup> Дамла—қўшмачи.

Хотин саломга жавоб бериб, йўлак томонға ўтди ва Раънони ўз олдиға имлади. Ясамол, пўстун кийган бу хотин Раънонинг дикқатини ўзига жалб этди. Бориб кўришиди.

—Насиббекнинг ҳавлилари шу эмасми, отин қиз?

—Йўқ,—деб кулди Раъно,—биз Насиббекнинг қўшнисимиз.

Хотин бошдан-оёқ Раънога қараб чиқди:

—Шўрим қурсин,—деб қўл силкди хотин,—мен адашиб сизларни овора қилибман...Кези келганда танишиб қўйганни айби йўқ, бу кимнинг ҳавлиси?

—Солиҳ маҳдумнинг.

—Мен адашмай кетай, жуда уят бўлибти-да, ҳали мен маҳдум поччамнинг ҳавлиларига кирдимми... Сиз кимлари?

—Мен... қизлари.

—Кўб яшанг, исмингиз?

—Раъно... Қани, бу ёқقا.

—Раҳмат, Рағнохон... Насиббекнинг уйи сизнинг қайси тарафингиздаги эшик бўлади?

—Сўлимиздаги биринчи дарбоза?

—Раҳмат, Раънохон.

Хотин хайрлашиш ўрнига, яна бир оз Раънога қараб турди. Раъно бу ҳолдан ўнгтайсизланиб, ерга қаради. Хотин кулимсиб олғандан кейин, Раъно билан хўшлашиб орқасиға қайтди, ташқарига чиқиб, Сафар бўзчиға учрашди...

Раъно хотинни жўнатиб, ичкарига кирганда, маҳдум "зарурат" тўнини кийиб, ўзига оро берган ҳолда, айвондан тушиб келар эди. Хотиннинг ким эканини сўрағандан кейин, Раънога бу кунги рўзгор ишлари тўғрисида баъзи таълимотларни берди. Чунки Нигор ойим бу кун эрталаб қариндошларни кига меҳмон бўлиб кеткан, Раъно уйда ёлғиз қолған эди.

—Онанг кеч қайтади, бинобарин, таомни барвақтроқ қилсанг ҳам бўлади... Ҳабба, таомни ўзинг билан Анвар акангта лойиқ қил, мен бўлсам тўйдан албатта тўйиб келаман, онанг ҳам оч келмас,—деди ва бир неча қадам юриб, яна тўхтади.—Анвар акангдан, нима таом қилай, деб сўрасанг яхши бўлади, қизим!

Раъно отасига маъқул ишоратини бериб айвонга келди, маҳдум чиқиб кетди. Раъно айвонда бир неча вақт санама тикиб ўлтургандан кейин, ишини йигиштириди, рафдаги китоблардан бирини олиб очди. Китоб устида ҳам анча

шүгүлланиб, бундан ҳам зерикди. Сүнгра ўрнидан туриб, ташқарига йўл солди. Боқча эшиги ёнига келганда, Анвар ташқариди ким биландир хайрлашар эди. Раъно эшик ёнида кутиб турди. Бир оздан кейин Анвар ёлғиз қолиб, шу томонга—ичкарига қараб кела бошлагандек бўлди. Раъно кулимсиб ўзини эшик панасига олди.

—Ассалом.

Бир-икки қадам олдинга ўткан Анвар мулоимгина эшитилган "ассалом" сўзи билан чўчиб, ёнига қаради ва жуда ҳам қўрқан киши бўлиб атрофига туфлай бошлади.

—Жоним чиқиб кетди... Бу нима қилғанинг, ҳой қиз!

—Буми, бу сизни чўчитканим.

—Хўш, нима қилиб юрибсан?

—Сизга ош қилиб берайми, деб сўрагали чиққан эдим.

—Отамдан сўра.

Раъно отасининг тўйға кетканини ва сўзини айтди. Анвар кулимсиди.

—Уч қават ҳавлида иккимиз ёлғиз қолсақ қандай баҳт бу?.. Бўлмаса мен дарбозани занжирлаб келай.

—Ҳа... занжирлаб келинг...

—Нега аччиғланасан, яхши қиз, мен ичкари кирсам, меҳмонхонанинг ёлғиз қолишини ўйламайсанми?

Раъно истиғноланди.

—Мен сизни ичкарига таклиф қилғали чиқмадим, нима ош қилишни сўрагали чиқдим.

—Мақсадингга тушуниб турибман, аммо сен ёлғиз зе-рикмагил деяпман.

—Мен зерикмайман... Қандай ош қилай?

—Қайси хилини буюрсам экан?—деб ўз-ўзига савол берди Анвар.—Убрага уқувинг йўқ, паловни ланж қиласан, сомсани ёполмайсан, туппани кесалмайсан, сенга қайла буюргандан, атала қил деган яхши, чунки эзилтириб юборасан, манти тўғрисида ўйлаш ҳам ортиқча... Яна шу ҳолда қандай ош қилай, деб дўйк урганинг қизиқ.

—Мен уқувсиз бўлсам, ўзингиз ош қилинг.

—Мен ҳам ош қилишни яхши билмайман, шунинг билан бирга дўйқ ҳам урмайман,—деди Анвар.—Лескин иккни ёрти—бир бутун бўлсақ эҳтимол яхши ош қилармиз... Сен бориб ўчоқ ҳаракатини кўрабер, сабзи-пиёз тўғрашни менга қўй, хўбми, яхши қиз?

Раъно жавоб бермади, ўпка намойиши остида ичкарига жўнади. Анвар кулги ораси ташқарига чиқди...

Раъно ўчоққа олов չқиб, қозонни ювар, Анвар ўчоқбо-

шининг сүфасига энгашкан кўйи сабзи тўғрап эди. Раъно ҳануз ўпка сақлаб, Анварнинг саволларига жавоб бермас, унинг қизиқлиқ сўзларига ҳам тескари қараб кулгисини унга кўрсатмас эди.

—Хотин кишининг чархи билан ўчогига тегма, деган гап тўғри эмиш... Албатта, сен хотин киши эмассан-ку, бироқ, "куллу шайъин яржиъу ила аслиҳи"<sup>1</sup>. Сабзини майдада тўғрайми, йирик? Бир бор эмиш, бир йўқ эмиш, ўткан замонда бир қиз бор эмиш: кўзига тутун кириб юмюм йиглаған эмиш. Сабабини сўрасалар, ўтун ҳўл эмиш, аммо қизнинг аччиғи хийли мўл эмиш... Тескари қараб кулма, ҳой қиз! Ўҳ, латта келтири, қўлимни кестим!

Раъно ялт этиб Анварнинг қўлига қаради ва алданғанини билиб яна ўз ишида давом этди.

—Қўлингни кесссанг ҳам бу қиз ишонмайди. Сочинг куяди, яхши қиз.

Раъно сочини орқасига ташлаб, ўчоқбоши сүфасига чиқди; қозонға ёғ солиб, Анварнинг олдига гўшт билан пиёз келтириб қўйди. Анвар гўштни тўғраб, яна тегажаклик бошлади:

—Тўйинглар қачон, ҳой қиз... Жавоб берсанг-чи, ахир, агар насрни писанд қилмасанг, назм билан ҳам сўрай:

Нагма унлари,  
Баҳор кунлари,  
Ишрат тунлари,  
Етарми, Раъно?

Раъно секин илжайиб, Анварга ён қаради, сўнгра кўзини ўзоқ ёнидағи бир нуқтаға олиб, ҳаракатсиз қолди.

—Насрга жавоб бералмаган, назмга... Ўзим ҳам қизиқман-да,—деди Анвар.

Раъно бир неча вақт бояғича ҳаракатсиз, Анварнинг пичинггиға илтифотсиз турди, сўнгра Анвар томонга бир оз майл этиб илжайди:

Кечакундузлар,  
Қизарди юзлар,  
Уятли сўзлар  
Битарми, мирзо?—

деди ва орадан озгина фурсат кечириб яна:

<sup>1</sup> Куллу шайъин яржиъу ила аслиҳи—ҳар бир нарса ўз аслига қайтади.

Үчөк бошидан,  
Дүсти қошидан,—  
Қараб Рошидан  
Кетарми, мирзо?—

деди ва шунинг орқасиданоқ:

Манглайн қашиб,  
Мендан ҳам ошиб,  
Жавобим шошиб  
Этарми, мирзо?

Анвар уст-устига тушкан қатор бу ҳужумлар остида шошиб қолди, байтларнинг қайси бирисига жавоб беришни билмай кулди.

—Лўли экан бу қиз!—деди.

Раъно ўчоқ ёнига чўнқайиб олов жўнашдирад экан, ер остидан Анварга қараб илжайди:

—Жавоб.

Анвар кулимсиган ҳолда ўйлаб қолди.

Нозмидир, қа?  
Билмадим, аё,  
Гўзал, дилбаро.  
· · · · ·

Анвар охирғи мисраъни айталмай тутилиқди, чунки қофия топиш қийин эди. "Кетар, етар" вазнлик сўзлар қофия учун камбагал бўлиб, ўхшашлари тўрт-бештадан ошмас ва шулар ҳам Раъно томонидан олиниб биткан эдилар. Анвар ҳар қанча уриниб, кейинги мисраъга қофия тополмагандан сўнг, Раънога қўшилишиб кулишиди.

—Қушингизнинг боши билан икки қаноти бор, лекин оёғи йўқ.

—Қуш учун баш билан икки қанот кифоя, Раъно...  
Қуш учиб юрса, бас!

—Чўлоқ қуш кўкда учиб чарчагандан кейин дарахтка қўнолмайди, аммо ерга тушса мушук еб қўяди,—деди Раъно ва қулиб қотиб қолди.

Кучлик кулгидан Раънонинг кўзи ёшланиб, ўсиқ кипраги жуфталаанди, кулги ва ўчоқ ҳарорати билан икки юзи

<sup>1</sup> Қўқон туманида бир қишлоқ исми (муал.).

қизил олмага айланиб, латиф бурни устида марварид резалари ҳосил бўлди.

Анвар ўзининг мағлубиятидан хафа эмас, Раъононинг ҳуснидаги ҳозирғи ажаб ўзгариш муваффақиятидан ўзини тутолмай кулгучи шоиранинг намойишкор хурсандлиги Анвар учун бир юз мағлубиятка арзирлик эди.

#### 44. ҚОП ЙЎҚОТДИНҒИЗМИ?

Султонали мирзо "Қушбеги" маҳалласига келиб, бир дарбозага кирди. Қоронги йўлакдан юриб бориб, ички эшикни тақиrlатди. Ичкаридан "Ҳозир!" деган товуш эшитилгандан кейин бир неча қадам орқага қайтиб келди. Бир оздан сўнг ичкаридан беқасам чопонини елкасига хом ташлаған, маҳсисиз оёғига сағри кафш кийиб кўйлакчан баданини чопони билан ўраган қирқ ёшлар чамалиқ бир йигит чиқди ва Султонали мирзога салом бергандан сўнг, шошиб чопонининг енгини кийди, келиб кўришиди.

—Марҳамат, тақсир.

Бу киши молтопар хотинни олиб, суяги тинчиб қолған Холбой—Гулшанинг эри эди. Уйида эрта-кеч бекор ётиб, Гулшанинг топиб келганига қаноат қилар, фақат ош пишириб ҳавли супурар эди. Бошқа оиласарда хотинлар уй иши билан бўлиб, эркаклар кўча ишини қилсалар, Холбой аканинг оиласи тамоман шунинг зиддига қурилған эди. Султонали мирзо Гулшанинг ўрдаға кетканлигини эшитиб силласи қуруди, бир неча вақт фикрга толиб қолди.

—Ўрдаға кетканлигини аниқ биласизми?

—Бундан чиқиб бир жойга бормоқчи эди,—деди Холбой,—агар иши битса—тўғри ўрдаға кетмакчи, битмаса уйга қайтиб келмакчи эди. Шу ҷоққача қайтиб келмагани учун, ўрдаға бордими, деб ўйлаб туриппан.

—Сиз ўша борадирган жойини биларсиз?

—Пайқолмадим, тақсир.

Султонали мирзо тинкаси қуруғандек орқасига тисланиб, йўлакнинг тоқчасига ўлтурди ва манглайнини қашиди:

—Кеча янгамни ҳеч ким йўқлаб келдими?

Холбой бир оз ўйланиб соқоли остини чимчилади.

—Йўқлаб келган экан, мен уйда йўқ эдим.

Султоналининг туси ўзгариб, бошини қимирлатиб қўйди, шипка, кўчага қаранди.

—Агар янгам келса, менинг айтасиз, мен яна қайтиб

келаман... Уйдан силжимай, мени кутсин, катта бир иш бор, дурустми?

Султонали мирзо Холбайдан ваъда олиб кўчага чиқди, илдам-илдам оёғ қўйиб, келган томонига йўл солди. Қингир-қийшиқ кўчалар бўйлаб борар, кўчада кўринган ҳар бир хотин текшириб оёғ босишига қараб ўтказар эди. Бозорчага етканда теваракдан жумъа азони эшигиди. Кўчада дуркум-дуркум салла ўраган халқ масжидларга қараб оқар, ул эрса жумъани унугиб аллақаёққа чопар эди. Солиҳ маҳдум кўчасини босиб тўғрига ўтди, ўн қадамча юриб тўхтади. Бир оз тараддулданиб турғандан сўнг, орқасига қайтиб, Солиҳ маҳдум кўчасига кирди. Дарбоза қия очилиб турар, ташқари кишидан холи, меҳмонхона қулфланған эди. Султонали мирзо боқча эшигига тўхтаб, тирқищдан мўралади. Хотин киши йўқлиғига қаноатланғандан кейин, боқчага қадам бости ва секин-секин юриб ичкари ҳавлиниңг эшигига тўхтади.

—Мирзо Анвар, ҳов мирзо Анвар!

Чақириш уч-тўрт такрорлангадан кейин, йўлакдан гурс-гурс оёқ товши келди. Султонали мирзо ўзини эшикнинг ёнига олиб, яна чақирди. Ичкаридан: "Йўқлар!" деган жавоб бўлди.

—Қаёқдалар?

—Жумъага кетдилар.

Султонали роҳат нафас олғандек кўриниб, кўзини эшик остонасиға тикди:

—Сиздан сўраб кетсан ҳам бўлар, синглим... Шу ерга бир хотин келдими?

—Йўқ... Ҳа, боя бир хотин адашиб кирган эди,—деган жавоб бўлди.

Султоналининг кўзи олаланиб, пешонасида қатор ажинглар зоҳир бўлди.

—Адашиб кирди?

—Ҳа.

—Адашиб кирганига қанча бўлди?

—Боя, эрталаб.

Султонали бошини чайқади. Раънога раҳмат айткандан кейин, ташқарига қараб юрди. Кўчага чиқиб яна боягича оёғини қўлига олғандек, югуриб кетди. Ўрдагача бир ярим чақирим чамаси йўл бўлиб, ул бу масофани ўн беш дақиқа ичида бости. Ҳавонинг совуқ бўлишига қарамай, манглайидан тер қўйған ҳолда ўрданинг биринчи дарбозасига келиб етди. Дарбозабонлар ёнида тўхтаб сўзлашди, манглай терини артиб, дарбоза суфачасига ўлтурди.

—Қоп йўқотдингизми, тақсир,—деб кулди дарбозабонлардан бири.

—Ўхаш... Жаноб жумъага чиқдиларми?

—Чиқмадилар .

Султонали мирзо дамини ростлаған каби бир оз сўзсиз ўлтурди.

—Ҳарамга бирав хотин кирдими?

—Битта кирмади,—деб кулди дарбозабонларнинг бири.—Беш-ўни кирди чамаси...

Султонали унинг ҳангамасига кучланиб кулди, аммо яна оғиз очишга мажолсиз каби ўлтуриб қолди. Чунки, энди бундан нарига югура олмас, қўли шундан ортиқчага етмас эди. Кўзини ерга тикиб, икки соатдан бери қилған ҳаракатларининг шамолға кетканини хотирлади. Абдураҳмон ва шериклари ўзларининг ифлос мақсадлариға етмасалар, деб энтиқди, айниқса мирзо Анварнинг душманлари олдида обрўси тўкулиши унга оғир туюлди. Бу оғирлиқнинг устига Абдураҳмон тўгрисида қилған ўзининг худраълигини<sup>1</sup> хотирлағач, яна ҳам кўнгли гаш тортди. Бу жиҳат билан гўё ёмонлиқнинг бош омили Султоналиниг ўзи бўлиб чиқар, "Агар мен Абдураҳмонни ўрдадан чиқариб юборишқа исрор этмасам, мирзони бу ишка мажбур қилмасам, балки бу адоватлар бўлмасми?" деб ўйлар, Анварнинг таъна қилмаслигини билса ҳам, яна маънан эзилишини, унинг юзига қаролмаслигини чамалар эди. Андишаси шу жойга еткандан кейин ўринидан турди, дарбозанинг кичкина эшикласини очиб, ичкарига кирди. Тўғри йўлни қўйиб, қор остида босилиб қолган собиқ гулзорлар ичи билан айланиб юрди. Ички ўрада қўргонлари остида яроғлиқ йигитлар айланиб турар эдилар. Султонали мирзо юра-юра ўрданинг чап муюшига, қоровул йигитлардан бирининг яқинига етиб, у билан сўрашди, бир-икки оғиз сўзлашиб, ўрданинг шарқига юзланди. Бундаги дарбоза беклари билан борди-келди айтишиб: "Жумъа кун нима қилиб юрибсиз?" деган саволга: "Бу кун жаноб кўнгил очмоқчилар, деб эшилткан эдим" жавобини берди. Булар ёнида ҳам бир оз ўлтуриб, яна қўзғалди, ўрданинг шимол қисмига ўтди. Ҳарам ва хон оиласига маҳсус янги даҳма теварагида уч-тўрт нафар

<sup>1</sup> Худраъ—ўжарлик, ўзбилармонлик.

қора қулчалар ичида Үрмонбек ўқ ўйнаб юрар эди. Султонали мирзо дахмага қараб борди, "кичкина хон"ға таъзим қылғандан сүңг, дахманинг бир чеккасига ўлтуриб, қурьон ўқуди. Аммо күзи ўйнаб юрган болаларда, тили қироатда эди. Фотиҳадан сүңг қорихонанинг айвон муюшига чүнқайиб болаларнинг ўюнига томоша қилди. Үрмонбек камончага ўқ қўйиб отар, ўқлар кўкка кўтарилиб турли масофага бориб тушар, қулчалар отилған ўқларни териб келиб Үрмонбекка берар эдилар. Отилған ўқлардан бири Султоналининг оёғи остиға келиб тушти. Султонали энгашиб ердан ўқни олди, ўқнинг уринган патини тўғрилаб ўлтурди. Шу ҳолда қулчаларнинг бири югуриб етди. Гап-сўёзиз ўққа қўлини узатқан эди, Султонали қулчанинг бўйи етмайдирган қилиб қўлини юқори кўтарди.

—Ўқни беринг, ака, тақсир қафа бўлати!

Султонали ҳазиллашкан бўлиб, ўқни юқорида кўтариб тураберди.

—Сен Гулшан опани танийсанми?

—Танисам не?! Беринг ўқни!

—Шошма хувари, Гулшан опа бу кун ҳарамга келдими?

—Келса не?..

—Ўқ ўйнаб бўлғандан сүңг Гулшан опани менга чақириб бер, дурустми?

—Қўп.

Султонали ўқни қулчанинг қўлиға ушлатди, аммо яна қўйиб юбормай қўргон ости билан юриб турған йигитларга қаради...

—Аниқ чақириб берасанми, ўғлим?

—Қўп дедим-қув.

—Мени танийсан-а?

—Сизни? Сиз мирзо—тақсир.

Султонали ўқни бериб юборди. Қулча югуриб Үрмонбек ёнига кетди. Султонали қўргон остидағи йигитларга кўз қирини ташлаб, уларни ўзидан парвосиз топди. Чунки унинг ҳозирги иши, яъни бола орқалиқ ҳарам билан алоқа тутиш қўрқинчли саналар, башарти бу хил гап сезилиб қолса, катта фалокатларга ҳам сабабчи бўлар эди. Үрмонбек яна бир оз ўқ отқандан сүңг, зерикиб, камончани ерга ташлади ва ўзи ҳарам дарбозасига қараб жўнади. Қулчалар ҳам уни таъқиб этдилар. Султонали мирзо болаларни ҳарамга киргизиб қабрларға яна "фотиҳа" ўқуди ва секин-секин орқасиға қайтди.

## 45. "ФОТИХА—МУҲРИ ХУДОДИР"

Махдум чувирлашиб ўқуб ётқан болаларға тұхталиш ишоратини бериб, ўзи иргиб ўрнидан турди ва шошқанча мактабхонадан чиқиб, саңы ўртасида турған икки нафар машҳур беклар истиқболига югурди. Улар билан энгташиб күришкандан сұнг, бориб меҳмонхона эшигини очди.

—Марҳамат, тақсирлар, марҳамат!

Махдум бу қадар шошиб қолишға ҳақли эди. Чунки, келгучиларнинг ҳар иккиси ҳам хон ёнида мұътабар ва ҳамиша унга мусоҳиб<sup>1</sup> беклардан эдилар. Улар меҳмонхонаға кириб ўлтурғандан кейин, махдум ўрнидан туриб, құл қовуштируди ва "хуш келдилар!" деди. Меҳмонлар ҳам махдумнинг ҳұрматига қўзғалишиб қўйдилар.

—Начук худо ярлақади, тақсирлар? Ғарибхонамизни муборак қадамларингиз билан мунаввар этканларингиз учун ҳазорон раҳмат.

Беклар махдумга ташаккур айтдилар. Абдурауф тунқотар ҳамроҳига қараб олғандан кейин "ташриф" сабабига тил очди:

—Жаноби пушти паноҳ бизни зиёратларига буюрдилар, сизга улуғ меҳрибончилик ато қилдилар.

Махдум жойидан қўзғалиб ўлтурди, аммо "жаноб"нинг "марҳамат"ларига тушуналмай шошди. Тунқотарнинг сўзига Муҳаммад Шариф дастурхончи изоҳ берди:

—Ҳар кимса ҳам пушти паноҳнинг марҳаматларига лойиқ кўрила олмайдир. Пушти паноҳ ўзларини домодлиққа чоғлаб, бу башоратни бизлар орқалиқ сизга еткаришка амр қилдилар...

Махдум бояғидек яна қўзғалиб олса ҳам, аммо товши чиқмай, сукутка кетиб қолди.

—Тақсиримда ожиза борлигини пушти паноҳ эшиткан эканлар...—деди тунқотар.—Мирзо Анвар каби донишманд етиштирган киши оқила ва жамила<sup>2</sup> қиз ҳам тарбия қилмағанмукин деган андишага борибдирлар... Шогирдингизга қилған марҳаматни жанобингиз ва каримангиз учун ҳам даріғ тутмаслик ниятида, бизни хизматингизга буюрдилар. Албатта, бу марҳаматнинг нечоғлиқ улуғлигини сизга сўзлаб ўлтуриш ҳам ҳожат эмас.

<sup>1</sup> Мусоҳиб—сұхбатдош.

<sup>2</sup> Жамила—чиройли, гўзал.

—Қуллиқ, раҳмат, пушти паноҳнинг давлатлари зиёда бўлсин,— деди маҳдум узоқ сукутдан бош кўтариб.—Бир эмас, юз қизимиз бўлғанда ҳам жанобнинг канизликларига назр қилиш вазифамиз эди... Аммо камина ва ожизамизда бир қанча гуноҳлар, нуқслар, узрлар бор, тақсирлар.

—Беайб парвардигор,—деди тунқотар.—Банда ҳамиша маъзур ва хатоликдир, тақсир.

Маҳдум бош иргатиб бир оз сукутда ўлтурди, сўнгра кўзини тунқотарнинг тизасига тикиди.

—Жанобларига ожизона арз... Аввало камина ожиз, нотавон, афтодаҳол; пушти паноҳ жиҳатларидин содир бўлған улуғ марҳаматка сазовор ва лойиқ эмасдирман; сониян—ожизамиз олампаноҳдек улуғ зотка ҳамхоб бўлмоқ учун кофий тарбия олмаган бир қулбаччадир. Бас, биз шу кайфиятда онҳазратнинг меҳрибонлиқларига арзирму, тақсирлар?

—Пушти паноҳнинг сизнингдек аҳли илмларига қаратилған дарё марҳаматлари арзитар, тақсир.

Тунқотар бу марҳаматнинг беҳад улуғлигини шарқ қилиб кетди. Маҳдум бир неча фурсат сукутда ўлтургандан кейин, тунқотарнинг муболагаларига бош иргатиб қўйди.

—Шак йўқ, шак йўқ, мен онҳазратка мусалламман<sup>1</sup> ва лекин... ва лекин бир узри фақирни андишага қўядир: ожизани бир важҳ билан мирзо Анварга ишонтирган эдик... мана шу масала каминага бир оз мушкил кела-дир...

Бу сўздан тунқотар дастурхончиға қаради, дастурхончи қўй силкиб кулади:

—Ҳеч боки йўқ,—деди дастурхончи,—мирзо Анвар пушти паноҳнинг ўз кишилари, бу хабарни мирзо эшитса, шубҳасиз, сўюнадир.

—Иншооллоҳ.

—Биз бориб онҳазратка жанобингизнинг дуонгизни эшитдирамиз: ҳусни қабулингизни, ижобатингизни уқдирамиз... Жанобнинг хурсанд бўлишларида шубҳа йўқ, тақсир,—деди дастурхончи ва бошқа сўзга йўл қўймай ҳатто кейинги масалаларга ҳам келиб етди.—Тўй фурса-

<sup>1</sup> Мусалламман—хоннинг ихтиёрларидағи одамман.

тини таъйин қилиш албатта, онҳазратнинг ихтиёрларига... Қани тунқотар, фотиҳа қилайлиқ, фотиҳа—муҳри худодир!

Тунқотар фотиҳага қўл очди, маҳдум саросима ҳолатда уларни таъқиб этди. Фотиҳадан сўнг "совчилар" ҳеч нарсага қарамай қўзгалдилар. Ўн беш дақиқалиқ бу ҳодисадан маҳдумнинг мияси шиши, ҳатто айтишка чоғлаб турған муҳим бир сўзини ҳам унутди. Уларни дарбозага кузатиб чиқар экан, мазкур йўқотиб қўйған муҳим сўзини хотирласам, деб кучанар эди. Беклар билан хайрлашар ҷоқдагина бирдан "ҳабба" деб юборди. Унинг совчиларга айтмакчи бўлған сўзи ҳақиқатан муҳим, яъни бу воқиға хабарини Анварга шу беклар воситаси билан етказиш эди. Улар бу илтимосни маълмамнуният қабул қилдилар, мирзога ётиғи билан сўзлаб, маҳдумнинг маъзур қолғанлигини унга уқдиromoқчи бўлдилар.

Маҳдум "улуг меҳмонлар"ни жўнатиб, меҳмонхонаға қайтиб келди. Мияси ҳануз тузукрак муҳокамага қобил эмас, кутилмаган бу ҳодиса ўзи учун фойдалиқми, зарарликми—имтиёз<sup>1</sup> қилолмас эди. Анварни аяғанлиқми ёки ундан уялғанлиқми, баҳарҳол, кўнглида бир хил гашлиқ, чигаллик бор эди. Муҳокама ҳар турлиқ: тўйни илгарироқ қилиб қўйсақ бўлар экан, деб ўйласа, иккинчи тарафдан, "хонға падари аруслик" масаласи ораға кўндаланг тушиб, яна фикричувалиб кетар эди. Бир тарафдан Анвар, иккинчи тарафдан хон... Шу йўсун, фикри бир йўлда тиномай гангиган ҳолда меҳмонхонани ёпиб чиқди.

Маҳдумни мактабхона эшигига кўрган болалар чувирлашиб сабоқ такрорлашка тутиндилар. Лекин маҳдумга ҳозирғи чувур-чувур ёқмади; унинг учун ҳозир тинчлик, кутилмаган ҳодисанинг ўнг-терсини ўйлаш керак туюлди. Маҳдум мактабга кириб ўз ўрниға ўлтургач, болаларни тўхташға буюрди. Болалар жим бўлғандан кейин "озод!" деб юборди. Болалар домлага салом бериб, бир онда мактабхонани бўшатиб кетдилар. Маҳдум дарс ўрнидан қўзгалмай яна ўйлаб қолди.

Анвар тўғрисидаги кўнгил гашлиги бир турлиқ бўлса ҳам, бошқа тарафдан анчагина яхши умидлар туғулиб қолдилар. Хонга қайин ота бўлиш эл қошида кичкина гап

<sup>1</sup> Имтиёз қўлмоқ—фарқламоқ

эмас эди. Қалин түғрисида подшоҳ-куявдан кўб, маблағ кутилса бўлар эди. Агар худо ўғул набира ато қилса, Худоёрнинг тахт вориси бўлиш эҳтимоли ҳам бор эди... Тўйининг кейинга силтаниши эса, тақдир иши; Раъононинг тақдирни хонга битилган, шунга биноан Анвар тўйни кейинги силташка, биткан ишни етиришка<sup>1</sup> мажбур эди... Яна шу ҳолда ва шунча янги умидлар ичидаги кўнгилдан ҳалиги гашликни, ўзига номаълум илинжни ювиб юбора олмади. Яна бир оз шу тўғрида қийналиб ўлтургач, Анварга қарши ўзида бир аччиғ сезди: "Тўйни кўкламга қўй, деб унга ким айтди? Бу ўзи ҳар ишда ҳам сустқадам. Энди, хон сўратқандан кейин рад қилишга кимнинг ҳадди бор!" деб кўнглидан кечирди. Шундан сўнг ул озгина тинчиди, яна бир мунча фикрланиб ўлтургандан кейин кўз ўнгига— қалин учун бериладирган бирсаноч олтин, эл қошидаги обрў, энг охирда Худоёрнинг тахт вориси бўлған хонзода келиб кечдилар. Ўзини эл сўраб турган ёш хон ёнида кўриб, илжайди...

Шу йўсун маҳдум ўзини босиб олди, кўкдан тушкандек бу совчилиқни ўз истиқболининг хайрлик фоли, файзи илоҳий, деб қувонди, ҳануз кўнглини гаш қилиб турган Анвар масаласини хотирига келтирмасликка, "хаёли фосид"<sup>2</sup>-дан қочишқа қарор берди. Маҳдум шуни ўзига маъқул қилғандан кейин бошқа кишилар андишасини, айниқса, уйдагилар раъини ўйлаб турмади. Ўзича саодат бўлиб кўринган бу фожиъа хабари билан Нигор ойимни эсанкиратди, йиглатди. Раъно эрса танчада ўқуб ўлтурган Хайём рубоиёти устига ҳушсиз бошини қўйди.

—Ўн йиллаб бизга кийдирган, едирган бечора Анварга оқибатимиз шу бўлдими! Шўрлик Раъно бир юз хотин ёнига юз биринчи кундаш бўлиб борадими?!—деб йиглади Нигор ойим.

Раъононинг ҳозирги аҳволини биз ёзиб ўлтурмаймиз. Аммо маҳдум уларнинг ҳар иккисини аҳмоққа чиқариб, ўзи "оқиллар" қаторига ўтди.

<sup>1</sup> Етмоқ—йўқ қилмоқ, барбод бўлмоқ.

<sup>2</sup> Ҳаёли фосид—бузук ҳаёл.

Маълумки, кеча Султонали мирзо қул болага Гулшанни чақиришни таъйинлаб, ўрдадан чиқсан эди. Шу чиқишида ўрда атрофидан силжимай, кечгача Гулшанинн кутди. Аср намозидан бир оз кейинроқ ўрдадан уч-тўртта хотинлар чиқдилар, буларнинг орасида Гулшан ҳам бор эди. Султонали мирзо хотинлар билан сўрашиб (чунки ўрдаға алоқалиқ хотинларнинг ҳаммаси унга танишдир) Гулшанин четка чақириди, унинг билан сўзлашиб иш қўлдан кетканлигини ва душманларнинг яна бир ифлос найдрангларини онглади. Шундоғки, Гулшанинг ёнига борғучи мулла Абдураҳмон, гўё ўзини Солиҳ маҳдум тарафидан юборилгучи қилиб кўрсаткан. Ҳатто мулла Абдураҳмон орқалиқ Солиҳ маҳдум, қизимни хонга маҳтасин, деб Гулшанга бир неча тилло пул ҳам бериб юборган эмиш...

—Мен қиз топишни икки-уч ойлардан бери ташлаб юборган эдим,—деди Гулшан,—кишиниг ҳожати чиқсин, дедим. Кейинчалик ўзимга гап тегдирмаслик учун аввал бориб қизини кўрдим; қизни ёқтирганимдан сўнг не андишалар ичидан хонга келиб арз қилдим... Мен у қизнинг мирзо Анварга айтдирилғанлигини, ўртада адоват борлигини туш билайми, Султонали ака... Энди иш ўтди, мен хоннинг олдиға кириб кечаги сизга маҳтаған қизим фалон экан, деб айта олмайман. Мирзо Анвар уйланадирган бўлса, мен кўриб қўйған яхши қизлар бор, айбонам<sup>1</sup> учун мирзо Анварга мен бошқа бир қиз топиб берай.

Султоналининг тарбузи қўлтуғидан тушиб, Абдураҳмон ва шерикларидан гижинған ҳолда, Гулшан билан хайрлашди. Бутун кун зир югуриб юрганига эмас, ифлосларнинг ғализ муваффақиятига чидамас эди. Бу чучмал адоват билан ингичка табиъатлик Анварнинг не кайфиятка тушишини тасаввур қиломас; ит феъл, қадр билмас хонга аччиг қилиб мирзолиқни ташлаб кетмаса, деб қўрқар эди.

Гулшан айтканча, иш ўткан, гап мазмунича, албатта хон Солиҳ маҳдумга куяв бўлмай қўймас, ҳозир бунинг қаршисиға бирар тадбир топиш жуда қийин ва бу хабарни Анварга айтиш-айтмаслик масаласи ҳам яна оғир. Султонали мирзо бу гапдан Анварни хабардор қилиш ва қилмас-

<sup>1</sup> Айбона—зарар учун тўланадиган жарима.

лиқ түгрисида күб ўйлади. Қанча мулоҳазалардан кейин уни хабардор қилишни маъқул кўрди. Чунки юзда тўқсон тўққузга қарши бир эҳтимолгина бу фожиъанинг бўлмай қолишлиги тарафида эди. Анварни хабардор қилса, эҳтимолки, унинг ўзи бирар чора топар ёки масала Султонали ўйлағанча унинг учун аҳамиятлик бўлиб чиқмас, башарти аҳамиятлик бўлганда ҳам фожиъани кутиб, ўзини босиб қарши олиш ногаҳонийсига қарағанда хийли енгил кўчар эди.

Султонали эрталаб уйқудан туриб, намозни ўқуди, болалари ёнида чой ичмай, Солиқ маҳдумнинг ҳавлисига қараб кетди.

Меҳмонхонада ўрдага кетмакчи бўлиб турған Анвар Султоналини ранжиб қарши олди:

—Шундай ҳам иш бўладими, кечаки нега мен келгунча кетиб қолдингиз?

—Бирақ чақириб келди-да... Мен ўз ўрнимга Сафар акамни ташлаб кетдим-ку.

Анвар ўпкалик илжайиб, ундан чой ичкан-ичмаганлигини сўради. Султонали гўё ўзини шу яқиндаги қариндошлардан бириникида қолған ва шунда нонушта қилиб, йўл устидан Анварнинг олдига кирган каби кўрсатди. Иккиси биргалашиб йўлға тушдилар. Кўчада йигирма қадам чамаси борғандан сўнг, Анвар кулимсиб Султоналининг кўзига қаради:

—Кечаки бизнинг ҳавлига кимни сўраб келдингиз?

Султонали манглайини қашиди:

—Мен чақириб келганда сиз уйдамидингиз?

—Мен уйда эдим,—деб кулди Анвар ва бир оз жим борди.—Мен уйда бўлмасам ҳам, уйдагилар сизни таниғанлар. Уйдан шу хабарни эшишиб, кечадан бери таажжубка тушдим... Хўш, сиз сўраған хотин ким? Ўзи нима гап?

—Арзимаган гап...

—Қани?

Султонали масаланинг қулай кўчишидан снгил тортиб, бир оз сўзсиз борди.

—Кулги гап... Сизга бир оз тегишлиги бўлса ҳам арзимайдир... Арзимаса ҳам?

—Гапуринг... Сизнинг келиб юрганингизни эшиктанимдан бери анча ташвиш чекдим.

—Сизга бир сўзни айтиб ҳам бўлмайди,—деб кулди Султонали,—игнани туюдск, хасни харидск кўрасиз.

—Менми? Хайр, дунёни сел ювса ҳам тўпуғимға чиқмасин, сўзлангиз.

Султонали ҳикояни Сафар бўзчидан бошлади. Лекин жиддий эмас, ярим жиддий қилиб мулла Абдураҳмон ва муфти бечораларнинг ақлиға гўё шундан бошқа пастлик ва масҳарароқ фикр келмаган, шу қадар аҳамиятсиз, ту-банлиқ билан гўё ўч олмоқчи бўлганлар руҳида сўзлаб борди. Анварнинг бир неча кундан бери ўзи тушунмай чеккан ташвиши, кўнгил ғашлиги ҳақиқатка айланиб борса ҳам, Сафар бўзчининг болани алдағ йўлға солишидан, сир олишидан ва Абдураҳмонларни камситиб, масҳаралаб қилинган ташбихлардан кўб ўрунда қулиб, Султонали мирзога енгиллик берди. Сўз Гулшан билан учрашиш ва ундан олинган жавобка етканда, Анварнинг туси ўзгариб, кипрак остлари учиб кетди. Аммо кутилмаган равишда яна совуққонлиқ сақлади.

—Зарари йўқ,—деди Анвар бир хил вазиятда қўл силтаб.—Мен улардан бу хилда ифлослик вужудга келишини тасаввур қилмаган бўлсан ҳам, лекин ҳар ҳолда адоват куткан эдим... Зарари йўқ, Султонали ака.

Султонали Анварнинг товуш оҳангидаги ўзгаришка ётибор этмаган бўлса керак, ҳануз бояғи ярим жиддий руҳидан силжимади.

—Саллалик эшакларнинг диринглаши оғилхонағача... Улар мирзо Анвар уйланмакчи бўлган қизни хонга тўғрилаб, шунинг билан гўё ўч олмоқчилар. Мирзо Анвар хотинсиз қолсин, демакчи-да, бу аҳмоқлар. Ҳолбуки, бутун мамлакат қизлари мирзо Анвар учун соч тарайди. Агар сиз хоҳласангиз қозикалон ёки домла шоговул ва шулар сингари калонполарга куяв бўлолмайсизми? Кесак отиб арслонни енгмакчи бўлган галварсларнинг ишига кулгим қистайдир...

—Зарари йўқ...

—Раҳмат, Анвар. Мен сизнинг баъзи тўғриларда юрагингиз кенглигидан аччиғланар эдим... Дарҳақиқат, ўйлаб қарасам, юрак кенглиги ўзи бир фазилат эмиш... Бундан бошқа маъно онгламангиз, Анвар. Муфти кабиларнинг паст, бачканা адоватининг киши қитиғиға тегиши бўлмаса, сиз ва дўстларингизча ҳам қиз оти топилмайдирған матоъ эмас.

—Албатта.

Анвар ўзини фавқулодда текис ушлаб борар, ҳозир унда бояғи ўзгаришларнинг ҳеч бириси ҳам кўринмас эди.

Султонали мирзо бу бемаза гапни Анварнинг кўнглидан чиқаришқа тиришиб ҳалигидек юпатишларни оғзидан қўймас, эшиткучи эса қисқагина жумла билан унинг фикрига қўшуладар ёки илжайиб, тасдиқ ишорасини берар эди. Иккиси бирга девонга кирдилар. Ишка илгарироқ келган мирзолар ёзув билан машғул эдилар. Анвар мирзолар билан саломлашиб сўрашди, ҳатто ҳеч гап бўлмаған каби Шаҳодат муфтилардан ҳам аҳвол ва соғлиқ сўради. Муфтиларни кўриши ҳамоно нафрати жунбушка кирган Султоналининг бу ҳондан таажжуби ортиб Анварга қаради ва кўнглидан "йигит" деган сўзни кечирди. Султонали айтканча, шубҳасиз, бу йигитнинг кўнгли ёлгиз муҳаббаткагина эмас, муҳаббатдан гайри фазилатларга ҳам қобил эди.

Султонали мирзо ҳам нариги хонадан Анварнинг ҳузурига ўткан, Шаҳодат муфтилар қаторида ўлтуриб ишлар эди. Анвар бу кунги нома ва аризаларни йигиштириб удайчига топширди, девоннинг ўзига тегишилик бўлғанларини мирзолар орасида тақсим қилди. Ҳар ким ўз вазифасига берилиб, орага жимжитлик кирди. Фақат бу тинчликни савогич қаламларнинг қоғоз устида қирилаши ва гоҳо буқланган қоғозларнинг шилдираши бузар эди. Шу ҳол бир соат чамаси давом эткандан сўнг, ондасонда сўз ҳам қўзғалди. Анвар ҳузуридагилардан Шаҳодат муфти қоғоз-қаламни ёнига қўйиб, сандалда исинди.

—Мулла Наврӯз кўб паст одам-да,—деди муфти—унинг иши кечадан бери менга ажаб таъсир қиласди-да...

—Паст, паст,—деди Калоншоҳ.

Султонали Анварга қараб қўйди. Анварнинг эса кўзи ёзувда эди.

—Шунча кишининг илтижосини ерда қолдириши ўзи ярамаслиқ... Қазоси етиб ўлган экан, келиннинг молига нима дахлинг бор? Бу одамият эмас-да.

—Паст кишида одамият нима қилсин.

Султонали кулимсираб бир-икки қайта муфтиларга қараб олди.

—Уйингга икки тарафдан шунча одам йигилди, сўзга кирмай, уларни овора қилдинг, лоақал бир лаган ош билан уларни жўнатсанг ўлиб қолармидинг... Э, ҳайф сендек мумсукка!<sup>1</sup>

<sup>1</sup> Мумсук—ўтакетган хасис, баҳил, зиқна.

—Мен ҳам мулла Наврўзни бунчалик билмас эдим,—  
деди Калоншоҳ,—одамиятни еб қўйған киши экан.

Султоналиниң ранги ўчиб, қовоқ ослари пиrr-пиrr  
уча бошлиған эди.

—Қизиқ баҳсни қиласиз, тақсиrlар,—деди бирдан Сул-  
тонали,—шу замонда одамият қолдими? Агар озгина ан-  
диша қилиб кўрсак, сиз ҳам, биз ҳам одамиятни пок-по-  
киза еб қўйған чиқамиз. Бу замонда ўзгани қўя туриб  
ҳатто ўзларингиздан ҳам одамият кутмасангиз бўлади,  
тақсиrlар!

Юраги тор—асабий Султоналиниң бу сўзи "ширин  
суҳбат" устидаги муфтиларни ҳайрон қилиб қўиди. Анвар  
Султоналига қараб унинг кўзини учраталмади. Чунки ул  
ҳалиги сўзларни айтиб, қўлидаги таҳрирга берилган эди.

—Сиз ажаб одамсиз-да, Султонали,—деди муфти.—Биз  
нима төяпмиз-ку, сиз нимадан ўтлайсиз.

—Сизлар одамиятдан баҳс қилаётисизларми, ахир?  
Мен ҳам бу вақтда одамият йўқлиғидан зорландим-да...

—Сизнинг сўзингиз ажаб, Султонали. Сиз бизнинг од-  
амиятимиз йўқлиғини бирар жойда кўрганмисиз ёки ди-  
могингизга футур етиб қолғанми?

Анвар Султоналиниң кўзини учратишка урунди, аммо  
Султонали муфтиларга юз ўғуриб ўлтурди.

—Сизларниң одамиятингиз йўқлиғини ҳеч бир жойда  
кўрганим ва эшитканим йўқ албатта,—деб заҳарханда  
қилди Султонали.—Аммо ҳозир ўз нафсимдан бир ҳисоб  
олиб кўрсан, ҳатто шу ҳафтанинг ичидаёқ неча жиноятка  
иртико<sup>1</sup> қолғанман. Шунинг учун ҳам бояғи сўзни айт-  
дим-да. Йўқса меним ким билан қанчалиқ ишм бўлсин,  
тақсиrlар...

Муфтиларниң ранги бўзариб, иттифоқлашқандек Ан-  
варга қараб қўйдилар ва Султоналидан зорланғандек бош  
чайқадилар.

—Султонали ака,—деди Анвар зорланған оҳангда,—  
тақсиrlарим айтканча, димогингизга бир оз футур етканга  
ўхшайдир: шундай гаплар нима ҳожат, нима алоқаси бор?  
Тинчкина ишингизга қарасангиз-чи, худо хайр берсин.

Сўнгра Анвар муфтилар томонга кулимсиб, Султонали-  
ниң гапига аҳамият бермасликка ишорат қилди. Шаҳодат

<sup>1</sup> Иртико—машгул бўлиш, қўл уриш.

муфти бир иарсаларни айтиб ишига қаради. Султонали ҳам кулиб, гүё Анварга итоат қилғандек, сұйсизгина, қаламини құлиға ушлади. Ҳар ким ўз ишига қараб, орада яна бояғича тинчлик бошланды.

Кечка томон мірзолар тарқалишиб, орада Султонали ва муфтілар ҳам бириң-сирин чиқиб кетділар. Энг сүнгға қолиб құзғалған Анвар девонхона даҳлизіда тунқотарға учрашди. Тунқотар Анвар билан ҳазиллашқандек, унинг құйыдан ушлаб, ичкарига—девонға бошлади. Ичкарига кирділар.

—Хизмат, тақсир?

—Хизмат шуки,—деб қулди тунқотар,—сизнинг устин-гиздан бир ўқтамлық қилинди?

—Яхши... Эшитсам бўладими?

—Жаноб бу кун бизни устозингиз Солиҳ маҳдумникига қулчилиққа юборган эдилар. Бориб эшитсамиз, фотиҳа сизга бўлған экан... Биз қиблагоҳ учун кечарсиз, деб ўйладиқ...

Анвар бу заҳарлик сўз билан илон каби тўлғаниб олса ҳам бутун кучини сарф қилиб, сир бермасликка тиришди.

—Атиги шу гапми?

—Шу гап, мирзо Анвар.

—Арзимаган гап... Буни мендан сўрамасангиз ҳам бўлар эди.

—Раҳмат, мирзо, мен сизнинг бу садоқатингизни жанобга сўзлайман.

—Йўқ, йўқ,—деди Анвар бош чайқаб,—зинҳор гапирманг, зинҳор.

—Нега ахир, нега? Жаноб ҳам ўзларининг содиқ қулларини таниб қўйсинашлада.

Анвар мажҳул оҳангда қулди: —“Айтманг, мен хоҳламайман” —деди яна. Иккиси бирғалашиб девондан чиқдилар.

Ҳаво текис қорамтил булут билан ўралған, Қўқоннинг машҳур шамоли қанот ёйған эди. Қорамтил булутлардан қуйироқда олақарғалар қанот қимирлатмай саёҳат қиласа ва онда-сонда ёмғур қатралари томчилар эди. Шу вақтда кўпрук ёнига келиб тўхтаған Анвар қаёққа бориб ётсам, деб тараддулланди...

## 47. ОЧИҚ ХАТ

Шом намозини ўқуб қайтқан маҳдум меҳмонхонанинг эшигини очиқ кўрди. Унинг келганлигини фаҳмлаб, тўғри ичкарига ўтди. Бир оздан кейин товоқда ош кўтариб Ниғор ойим чиқди. Йигидан кипраклари терилиб, чуқур андиша ичидаги бошини қўйи солған эди. Ниғор ойим кирганда Анвар ҷароғояға шамъ ёқар эди. Ниғор ойим дастурхон ёзиб, товоқни Анварнинг олдига қўяр экан, бирдан пиқ-пиқ йиглаб юборди. Анвар ҳайрон бўлиб қолмади, йиги сабабига тушунди.

—Нега йиглайсиз? Тақдирни ўзгартиб бўладими? Хафа бўлиш яхши эмас, сиз шундай бўлсин деганимидингиз...

Ниғор ойим жавоб қайтармади, йиглаған кўйи меҳмонхонадан чиқишга ошиқди. Анвар ошдан бир-икки луқма олиб, қўлини артди, сандал кўрпасини бағрига тортиб, кучли ва узун тин олди.

Ҷароғоядаги шамъ бедиллар юрагидек титраб, меҳмонхонани аранг-аранг ёритар, шамънинг титроғи билан кўзини бир нуқтага тиккан Анварнинг ҳозирги хәёлчан юзи ҳам қалтирағандек кўринар эди. Меҳмонхона тип-тинч, фақат бу тинчликни ташқарида ёққан ёмғурнинг кучсиз шитирлаши, ўқтин-ўқтин қўзғалиб қўйған шамолнинг даричага келиб уруниши ва аллақайси том бошидаги бир мушукнинг мавлаган товши бузар эди. Дарича тирқишидан келиб кирган кейинги шамол ҷароғоядаги титроқ шамъни ўчураёзиб, меҳмонхона қоронғиланди ва шу чоқда ичкаридан чиқиб келган оёқ товши билан Анвар хәёлдан кўз очиб, танча устидаги товоққа қўл узатди ва товоқни ушлаганча бир оз қулоқ солиб турди. Оёқ товшининг меҳмонхонадан узоқлашқанини, маҳдумнинг хуфтан учун масжидга ўтканини фаҳмлади ва товоқни ўлтурган жойидан орқасидаги тоқчага олиб қўйди. Орадан бир пиёла чой ичиш фурсати кечкандан кейин яна оёқ товши эшитилди. Буниси адим сайнин меҳмонхонага яқинлашиб келар эди. Меҳмонхона даҳлизида қўлида чойдиш кўтарган Раъно кўринди... Икки кўзи қип-қизариб, қовоқлари олудек кўпчиган, юзида ҳам зўриқиши аломати бор эди. Ерга қараған ҳолда оқ чойдишни Анварнинг яқинига келтириб қўйди, тоқчадаги пиёлани олиб чойдишдаги чой билан чайқади, пиёлани сочиқлағач, яна чайиб иккисини Анварнинг ёнига сурди ва бирдан ўкраб юзини танча устига қўйди...

—Раъно, Раъно,—деди шошиб Анвар.—Боламисан, ҳали ҳеч гап бўлғани йўқ-ку.

Раъно бошни кўтармай, пиқ-пиқ йиглар эди. Анвар уни юпатиб, ялинған ҳолда йигидан тўхтатишқа уринар эди.

—Бекорга йиглайсан, Раъно. Йигидан бир фойда чиққанини эшикканмисан ёки мени ҳам йиглатмоқчимисан?.. Агар ўйлаб кўрсанг, йиглаш сенинг ҳаққинг эмас, меним ҳаққим, ҳолбуки мен йигламайман. Негаки, йиги энг сўнити иш... Мен йиглаған кишини ёқтирумайман... Тур, жоним, тур.

Анвар Раъонинг сочини силади, икки қўли билан бошини кўтариб, юзидан ўпти.

—Мендан кўнгли қолсин десанг, йигла. Юзингни ёш билан ювибсан, Раъно, ўнглан, мен юзингни артиб қўйяй. Ўзингта кел, ақлингни йиғ, оғир қиз бўлиб, сўзимга қулоқ сол.

Раъно юзини четка ўгуриб, бошидаги рўймоли билан юзини артди, узун энтикли.

—Йиглаб бир натижага етиб бўладими? Ҳеч. Кўзинг яна ёшланди, сен йиглай бер, мен сўзламайман, Раъно.

Раъно яна четка қараб кўзини қуритди. Анвар пиёлага чой қуйиб, Раънога узатти:

—Ма, Раъно, ич.

Раъно ичмайман дегандек, бош чайқади. Анвар қистаб чойни олдириди.

—Ҳаммасини ичмасанг ҳам бир-икки ҳўпла.

Раъно Анвар айтканча, икки-уч ҳўплаб, пиёлани олдиға қўйди. Анвар ўрнидан туриб даҳлизга чиқди, қўлида обдаста, дастшў кўтариб Раъонинг ёнига келди.

—Юв юзингни, Раъно.

Анвар сув қўйиб турди, Раъно юзини ювди. Анвар қозиқдан сочиқ келтириб берди. Раъно артинди.

—Ана тамом... Энди одамшаванда сўзлашайлик, йиги нима ҳожат.

Раъно қайғиларини озайтиргандек энтикли, ўзига ярим жиддий тикилиб турган йигитка жавобан илжайди.

—Яна бир кул, Раъно.

Раъно бирдан тундлиқقا оғишиди.

—Кулги соати эмас...

—Кулги соати бўлмаса йиги фурсати ҳам эмас,—деди Анвар ўлтуриб. —Сенинг мурассасъ<sup>1</sup> халтачага ўхшаш кич-

<sup>1</sup> Мурассасъ—қимматбаҳо тошлар билан безалган.

кинагина юрагинг бор, ичини қийматли тошлар билан тўлдирғансан. Бу кун қазо муншийси<sup>1</sup> шу мурассаъ халтакадаги қийматли тошлар орасига қўпол бир нарса келтириб тиқди... Табиъий, сенинг кичкина юрагинг бу қўполлиқни кўтара олмади, қийматли тошлар сиқилдилар, сен йигладинг, сенинг каби мен ҳам шу қўполлиқни қабул қилишда қаттиғ энтиқдим, бироқ йигламадим. Нега? Негаки, бу қўполлиқ меним юрагимдаги жавоҳирни сиқиб чиқара олмас, фақат унга тангликина берар эди, сенга ҳам шундай эмасми, Раъно? Хўш, энди бизнинг фожиъамиз сабабига келайлик. Бу ҳодиса тўғридан-тўғри хоннинг ўзидан келган гап эмас. Хон—ҳазми ҳар бир ифлослиқни ҳам кўтарадирган катта бир ҳайвон. Унинг теварагида майда қашаротлар кўб, булар ҳам ўзларига яраша ҳайвонлиқ истайдилар. Бироқ қўл қисқа, шунинг билан бирга ётиб қолишқа кўнгил тинчимайдир. Шундан кейин хон—катта ҳайвонни қитиқлаб ишка соладирлар... Балки ёдингдадир, мулла Абдураҳмон исмлик бири сенинг харидоринг эди, шоир айтканча:

Мендин ўтиб гулга бўйи етмади,  
Умид узиб ўз йўлига кетмади.

Хабаринг бор, мен отангнинг тазиёни остида уни ўрда хизматига олдим, ул ўрдадаги бир неча ифлослар билан биргалашиб, меним қаршимга ишлади... Мен... уни ўрдадан жўнатдим, натижада ҳозирги ифлосликка енг шимардилар. Бироқ, улар бизни бир-биримиздан ажратадирларми? Йўқ. Мажозий ажралиш—ажралиш эмасдир, чунки биз бир-биримизга мажозий боғланмаганмиз, ҳақиқий боғланишни эса қатъ<sup>2</sup> этиш ифлослар уҳдасидан келмас. Бас, шу ҳолда биз икав нега хафа бўлайлик, Раъно? Ишқ давоси авом ўйлаганча васл эмас—ҳажрdir. Зеро, васл ишқ ўтини сўндиргучи, ҳажр эса камолатка эришдиргучидир... Сен шу иккidan қайси бирисини танлайсан, Раъно?

Раъно кўзини тизасига тикиб, қўли билан шолча ипини чирмаб ўлтуар эди. Ҳалиги савол Анвар тарафидан яна такрорланди.

<sup>1</sup> Қазо муншийси—оллоҳнинг иродаси, тақдир.

<sup>2</sup> Қатъ этмоқ—узмоқ.

—Мен кейингисини... Бироқ, хоннинг ифлос тўшагида ётмайман.

Анвар бир неча вақт сукутда ўлтурди. Раъонинг жавоби унга оғир таъсир қилған эди...

—Буни мен ҳам хоҳламас эдим... Бироқ, ифлослар меним чора йўлларимнинг ҳаммасини кесдилар, Раъно... Яна ўйлашмоқ учун фурсат бор, айниқса, сен бирар тадбирни мувофиқ кўрсанг мен бош эгаман... Сени йиғлатиб ҳайвон чангалига бермасман... Шундай, сен йиғлама, ақлли қизларча ҳаракат қил, мен...

Анвар сўзини тугата олмади, меҳмонхона эшигига маҳдум кўринди:

—Ичкарига кир, Раъно, бевақт бу ерда нима қилиб ўлтурибсан?

Анварнинг вужуди гизз этиб кетди: қаршисида боягича ўлтурган Раънога "тур, жўна" деган каби ишорат қилди, лекин Раъно қимиirlамади. Маҳдум бошқа сўз айтмай, даҳлиздан орқасига қайти.

Анвар жуда ҳам оғир тортқан эди. Ҳақиқатан ҳам маҳдумнинг бу ҳаракати ақлсизча, аҳмоқларча эди. Анварга оғир келишини ўйламай бу "буйруқ" билан Раъонинг кундалик одатини манъ қилар, ҳар кечаси ўз вақтида ўлтурган Раъно гўё бу кун "бевақт" ўлтурап эди. Бундан бошқа, унинг Анварга учрашмай намойишкор чиқиб кетиши, қандайдир яна бир маънони онглатқандек ҳам бўлар эди.

Раъонинг юзидағи қайғи белгилари ўйқолиб, унинг ўрнини ғазаб, нафрат аломатлари олди.

—Андишасиз!

—Зарари йўқ, аччиғланма,—деди Анвар.—Энди бошқа сўзимиз ҳам йўққа ўхшайдир...

Раъно яна бир оз қўзгалмай ўлтуриб қолди, сўнгра кўзига жиқ ёш олиб, меҳмонхонадан чиқди.

Эрта билан Нигор ойим чой олиб чиққанда, меҳмонхонада Анвар йўқ, сандал устида очиқ бир хат ётар эди:

"Мехрибон хола

Ёшлиқдан сизнинг тарбиянгиздан ўсдим, сизга ва тақсиримга кўб заҳматлар бердим. Бу заҳмат бадалига тегишилик ҳақ қайтаролмаған, хизмат қилолмаған ҳолда маълум сабаблар тазиҳи остида сизнинг шафқатли тарбиянгиздан кетишкага мажбур бўлдим.

Сўнгра уйдаги менга алоқадор барча нарсалар, шу жум-

ладан, ўзингиздаги амонат олтинлар ҳам оиласигизга мендан ҳадядир. Мен олтинларни қизингизнинг тўйига атаб йиғкан эдим, мундан сўнг ҳам шу оқчани Раъононинг тўйига сарф қилсангиз, деб сўрайман. Мени йўқлаб келгучиларга ўрда дарагини айтилса эди. Шафқат ва марҳаматингиз билан гуноҳимни кечирапсиз умидида:

Анвар".

## 48. ТЎЙ АРАФАСИДА

Хоннинг совчилари иккинчи мартаба келиб тўй вақтини таъйинладилар: келаси жумъа маҳдумнинг уйида тўй ижро қилиниб, маросимдан сўнг Раъно ўрдага юборила-дирған бўлди. Тўй вақти белгилангандан бир кун кейин тўй жамарғаси ҳам келди. Хоннинг ҳадяси уч юз тилло пул, шу қадар қийматка арзидирған шоҳона сарполар, маҳдумга алоҳида илтифот қилинган "раисулмакотиблиқ"<sup>1</sup> унвонларидан иборат эди.

Шунчалик илтифотлар ичида гангид қолған маҳдум уч кундан бери дараксиз кеткан Анвар тўғрисида ўйлай олмади, фақат бундан "ҳамоқат", "андишасизлик" деган на-тижа чиқариб тинчиди. Ниғор ойим эрса ўзини бирмунча босиб олди, тоғо Анварга юраги ачиб қўйса ҳам, уни ошиғич келган тўй ҳозирлиги масаласи ихтиёрсиз равища бу тўгрини ўйлай олмаслиққа мажбур этди.

Раъно!.. Мъялумки, бу кунларда Раънога тикилган фалокат беҳад улуғdir: фалокатлик, ҳалокатлик кунлар яқинлашадир. Бунинг устига уч кундан бери Анвар дараксиз. Анвар "висол—муҳаббатни ўлдиргучи, ҳажр эса—камолатка эришдиргучидир", деб Раъони ҳамишаликка ташлаб кетдими ёки маҳдумнинг бемаза муомаласидан кўнгли олиниб, араз қилдими? Ҳолбуки ҳозирғи кунлар араз, аччиғ ва фалонларни кўтарадирған вақтлар эмас, ҳеч бўлмаганда бечора қизға гап билан, сўз билан маънавий ёрдам бериб туриш соатларидир. Бечора Раъно ҳамиша яхшилиқ, ақллилиқ кўриб келган бир кишисидан ҳам охирда дағаллиқ кўрар, вафосизлиқ бўйини олар эди. Шу дудама фалокат бир неча кун ичида Раъно гулинини

<sup>1</sup> Раисулмакотиб—мактаблар раиси.

сүлитаёзди, ҳатто жоду күзлар ёш түкишдаи ҳам түхтадилар.

Раъно сандалда ўлтуриб жумъа куни—мудҳиш жумъа куни тўғрисида ўйлар эди. Бу кун сешанба, жумъагача яна икки кун бор. Фақат икки кунгина... Раъно бундан ортиқни кўз ўнгига келтира олмас, гўё ўзини жар ёқасида кўрган кишидек панжшанба кечдан беихтиёр, гўё савқи табиъий<sup>1</sup> остида орқасиға тисарилар эди. Шундан кейин Анвар тўғрисида хаёл суриб, унга—Анварга қарши ўзида кучлик бир кек сезар, шундай оғир соатларда ташлаб кеткан "йигит" яна бир кўринса, қандай киноялар билан истиқбол қилишини—кутиб олишини ўйлар эди: "Ҳамма даъволарингиз пуч! Сиз, мирзобошилиқдан маҳрум бўламан, деб қўрқдингиз, бизнинг уйда ўн йил турсангиз ҳам, отамнинг феълини билмаганидиниз? Ҳолонки, мен сизни хондан қам юқори ўрунга қўйған эдим. Энди фурсат қўлдан кеткач, нима учун келдингиз?.." Лекин ул кейинги итоби маъносидан ўзига ҳисоб бермас, агар бунга қарши Анвар: "Қандай иш ва фурсат ўткандан кейин келдим?" деб сўраса, эҳтимолки, Раъно сукут қилас, чунки ҳозиргача унинг фикрига вақти ўтадирган бирар чора келмаганидек ва бу тўғрида ўйлаб ҳам кўрмаган, фақат бу фожиъа қаршисида такягоҳ<sup>2</sup>, деб Анварни истаган, Анвар эса кўздан йўқолиб, Раъннинг мажруҳ юрагида яна янги бир жароҳат очқан эди.

Нигор ойим ошиғич ҳозирликлар орқасидан чопиб юрар, бешикда ётиб зериккан Масъуд қичқириб йиғлар эди. Бояғи хаёллар ичида ўлтурган Раъно узоқ энтиқди ва асабий ҳаракат билан ўрнидан туриб бешик ёнига келди. Тебраткан билан бола тийила бермагач, уни йиғлаган кўйи ташлаб, ҳавлига тушти ва нариги айвонда юмиш қилиб ўлтурғучи онасиға "эмизинг!" деб асабий ҳайқирди, ўзи йўлак томонга қараб ўтди.

Боқчада Маҳмуд ва Мансурлар қўшни болалари билан ўқ отиб ўйнар эдилар. Атроф олашовур қор билан ёпилған, сўри остидаги суванинг четлари ёғин билан нураб, устидан бир неча жойи узун-узун ёрилған эди.

Суфа ёнида тўхтаған Раъно болалар ичидаги Маҳмудни чақириб, сўради:

<sup>1</sup> Савқи табиъий—табиий ҳаракат.

<sup>2</sup> Такягоҳ—сувинчиқ.

- Маҳмуд, даданг қаерда?
- Дадам... бозорда.
- Ташқарида ким бор?
- Ичким.

Раъно бошқа сўз айтмай, ўрта эшикка келди. Маҳмуд айтканча, ташқарида ҳеч ким йўқ, тўй муносабати билан мактаб шогирдлари бир неча кунга озод қўйилған эдилар. Нима мақсад биландир ташқарига чиққан Раъно меҳмонхона эшигини қулфланған кўриб, машқхонага қараб келди. Эшик занжирини тушуриб ичкари кирди. Саҳнидаги бўрё ва бордонлари чувалиб, титилиб ётқан машқхонанинг ҳар бир тоқасига кўз ташлаб, бирар нарса излагандек юринди. Тўрдаги тоқчадан устига кўк сир берилган бир давотни олиб қаради. Давотнинг ичидағи лосларини қора-сариқ тусда қуриб қолған кўргач, оёқ остига ташлаб машқхонадан чиқди.

—Маҳмуд!

Камончасига ўқ қадаб ётқан Маҳмуд ўрта эшикда турған опасига қаради.

—Ҳмм?

—Бери кел.

Маҳмуд тилар-тиламас опаси—Раъононинг ёниға келди.

—Ҳмм?

Раъно Маҳмудга ўз орқасидан келишка ишорат қилиб, яна машқхонага қараб кетди. Маҳмуд қўлидағи камончасини турли тарафка ўқтала-ўқтала Раъно билан машқхонага кирди. Улар иккиси бир неча вақт машқхонада қайси тўғридадир сўзлашиб қолдилар.

Уйда хат ёзиб ўлтурған Раъно онасининг ким биландир ҳавли юзида кўришиб, сўзлашқанини эшилди ва бир оздан сўнг юмалоққина, тўла-тўқис бир бўғоз хотинни айвон муюшида кўриб, ёзувини тўхтатишқа мажбур бўлди. Чунки хотин Раъонони кўриб қолған, шунинг учун бўғоз хотин билан чиқиб кўришиш Раънога лозим бўлған эди. Раъно чиқиб кўришди. Нигор ойим танимаган меҳмонни сандалга таклиф қилди.

—Бу ёққа, айланай, бу ёққа.

Хотин қистатмай сандалга чиқиб ўлтурди, кўзи Раънода экан, фотиҳа ўқуб рўймол-лачагини тузатди:

—Танимаган хотин нима қилиб юруйди, деб ўйларсизлар, айланай,—деди хотин ва чўнтагидан бир қоғоз чиқарди,—Мирзо бир-икки кундан берли бизникидлар... Танисаларингиз керак, ўргулай, мен мирзо Султо-

налининг кўчлари<sup>1</sup> бўламан... Китобсиз зерикдим, уйда бир китобим бор эди, деб боя—эрта билан шу қоғозни берибтилар, айланай...

Хотиндан бу сўзни эшишиб Ниғор ойим ачиниш ва уялиш вазиятига кирди. Танчадан нарироқда тик турған Раъно Ниғор ойимдан қизғанғандек, келиб хотиннинг қўлидаги буқланган қоғозни олди.

—Мирзодан уятлигмиз... Айниқса уч кундан бери қаёқларда қолди, деб ич—этимни едим,—деди Ниғор ойим, тақдирга ҳеч нарса деб бўлмас экан... Биз мирзо билан уланишармиз деб ўйлаган эдик.

—Тақдирни азал, айланай,—деди хотин.—Мирзо ҳам юртда иккита ақил бўлса биттаси. Сизлардан ҳануз миннатдор эканлар; шундай, шундай иш бўғандан кейин келишка андиша қилиб қоғонлар-да, айланай.

Улар шу сўзда экан, Раъно уйга кирди:

“Холамға, сўнгра Раънога Беҳад салом ва дуо. Мендан ранжимангиз, на учунким, шундан бошқа чорам йўқдир. Хат олиб борғучидан Шайхи Саъдий куллиётини<sup>2</sup> бериб юборсангиз, бўши соатларимдан фойдаланар эдим. Раънога маълум бўлсинким, бундан сўнг сенга меним машқларим(шевър дафтарим) керак бўлмас ва ўзинг билан олиб юришинг ҳам эҳтиётдан эмас. Агар хафа бўлмасанг, шуни ҳам бериб юбор. Соғлиқ аҳволотингиздан ёзингиз.

Аддои Анвар”.

Хат шу қисқа жумлалардан иборат, яна шундай ҳам бўлса Раъно учун қийматли эди.

Ҳали ёзиб бошлигаган қоғозни нима учундир йиртиб ташлади, айвондагиларнинг ўзаро сўзлашиб турғанларидан фойдаланиб, жавоб ёзишқа шошилди.

#### 49. РАМЗ

Анвардан бир оз илгарироқ қайтқан Султонали оғилхона айвонида сигир соғиб ётқан хотини устида тўхтади.

—Бордингми, Рузрон?

—Бордим,—деди Рузрон ва эмчакдан “пов-пов” сут соғишда давом этди.—Бордим, олиб келдим.

<sup>1</sup> Кўчлари—хотинлари.

<sup>2</sup> Куллиёт—шоирнинг асарлар тўплами.

—Меҳмонхонага олов қилғандирсан?

Рузвон боши билан қилдим, ишорасини берди.

Султонали мирзо уйга ўтди, салла-чопонини ешиб, яна хотинининг ёнига келди.

—Бузоқни ешиб юборинг-чи, . айланай.—Султонали мирзо устунга бояланган бузоқни ешиб юборди. Бузоқ онасининг эмчагига ёпишди. Рузвон хурмадаги сутни кўтариб ҳужрага ўтди, Султонали ҳам хотини орқасидан кирди.

—Хўш, нима гап бўлди, Рузвон?

Рузвон хурмадаги сутни товоқларга бўлар эди.

—Бордим, хатни бердим, чой қайнатдилар, талай гапуришиб ўлтургандан кейин, китобни олиб қайтдим.

—Кимлар бор экан?

—Отин хола, қизи.

—Қизи қалай?

Рузвон афсус қилғандек, бошини икки елкасига иргатди ва тилини тағлайига тегизиб "чалоқ" этдириб қўйди.

—Мен, мирзобоши жуда хафа кўринади, деганингиздан ҳам шуни ўйлаган эдим. Баайни сурат: киши ҳам бундай бежирим бўлар экан.

—Ҳа, Ҳа!

—Чамаси улар ошиқ-маъшуқ, балоҳўр хон лоақал шунга чўвагини тиқмаса нима қилар эди. Бечора қиз, шундай хафа, шундай хафа. Дор-дунёси<sup>1</sup> қоп-қоронги.

—Ҳа, ҳа... Отин холаси-чи?

—У бечора ҳам ҳайрон, "болаларимнинг сўйинчи ичига тушти", дейди.

Султонали афсуслангандек бош чайқаб қўйди.

—Китобни қаерга қўйибсан?

—Меҳмонхонада... Ҳа, айтканча, ичидা кичкина хат ҳам бор.

Султонали мирзо кечлик ош тўғрисида баъзи гапларни айтиб, ташқарига чиқди. Меҳмонхона очиқ эди. Тирсаги билан танчага такя қилған Анвар Саъдий куллиётини варақлар эди. Султонали кириши билан Анвар китобни ёнига олиб қўйди ва кучлангандек илжайди.

—Раҳмат, олиб келган эканлар.

—Китобнинг ичидা хат бор эмиш, балки кўргандирсиз?

<sup>1</sup> Дор-дунё—кўнгил, ич.

Анвар хатни кўрмаган эди, китобни қайтадан очиб, муқовадан тўрт буқланган бир қоғозни олди. Хат масаласи билан Анварнинг бир оз шошиб қолганини сезган бўлса керак, уйда бир иши борлигини сўзлаб, Султонали меҳмонхонадан чиқди. Анвар хатни очди.

"Ҳурматлик Анвар ака, ассалому алайкум. Ҳаммамиз соғ ва саломатмиз. Келин ойим орқалиқ бериб юборган хатингизни олдиқ, соғлиғингизни, тинчлиғингизни ўқуб ва эшишиб жуда хурсанд бўлдиқ: илоҳи, саломат бўлсинлар. Соңий, биздан аҳвол сўрасангиз алҳамдуиллоҳ тинчмиз, хотиржамъ бўлурсиз. Сўратиб юборган китобнингизни бериб юбордим. Аямдан сизга салом, боқий сўзни Шайхи Саъдийдан ўқурсиз деб хатни мухтасар<sup>1</sup> қилдим, Раъно".

Анвар ёзувни қўлида ушлаган ҳолда қараб қолди. Бир оз ўйланиб тургандан кейин, хатни яна ўқуб ҳар бир жумла устида тўхталиб ўтди. "Соғлиғингизни, тинчлиғингизни эшишиб жуда хурсанд бўлдиқ" жумласи билан "сиз тинчиб кетдингиз" демакчи эди. Чунки, шу жумладан кейинги—"илоҳи, саломат бўлсинлар" кинояси буни таъкид қилар, "соңий, биздан аҳвол сўрасангиз, алҳамдуиллоҳ тинчмиз, хотиржамъ бўлурсиз", яна киноя, аммо энг кейинги—"боқий сўзни Шайхи Саъдийдан ўқурсиз деб хатни мухтасар қилдим" жумласи бир оз ўрунсиз каби эди. Анвар бу жумлани "мундан сўнг ёнингизда Раъно йўқ, бўш вақтингизни Шайхи Саъдий ўқуб кечирингиз" маъносида тушунди.

Анвар қоғозни буқлаб китобнинг муқовасига солди ва хатнинг оғир маъноси таъсирида энтикиб сукутка борди. Унинг бу кунларда кечириб турған ҳоли жуда оғир, бу оғирлиқ устига Раънонинг мазлумона ёрдам сўраб kinoялар ёзиши яна аламлик эди. Чора нима? Бу фожиъани дафъ қилиш учун бирар йўл, бирар хил тадбир? Фақат бир йўл, энг сўнгги чора: Ҳудоёр олдида сирни очиш, Раънога ва Раънонинг эса ўзига қарши муҳаббатларини фош қилиб, хоннинг оёғига бош уриш—ялиниш, ёлбориш... Ҳайҳот, бу разолатни Анварнинг нафси ҳазм қилолмаганидек, "адолатпаноҳ"нинг ҳам бу тўғрида "марҳамат"лари шубҳалик. Башарти Анвар шу разолатка иртикоф этса, адабсизлик, уятсизлиқда айбланиб, бирар жазога йўлиқиши ҳам яқин эҳтимолдир.

---

<sup>1</sup> Мухтасар—қисқа.

Маънан ва жисман эзилган, айниқса, ҳозирги аҳвол ичидаги кўз ўнги қоронғиланған Анвар мәҳмонахонага кириб келгучи Султоналидан ҳам ибо қилмай, гүё ҳушсиз каби бошини икки қўли орасига олиб, сандал устига энгашти... Масала билан бирмунча таниш Султонали мирзо бу ҳолни дафъатан бояғи хат мазмунидан деб ўйлади. Уялмасин, деган каби бир нарса излаган бўлиб, тоқчаларни айланди... Анвар қаддини ростлаб, узун нафас олди ва Султоналига ўлтуринг ишоратини қилди. Султонали ўлтурди.

—Нега ундаисиз, Анвар?

Анвар кучланиб илжайди.

—Ҳалиги хат мени хафа қилди,—деди ва бир оз тўхталиб турди.—Сиздан яширап сир йўқ, хат ёзгучи билан орамизда анчадан бери яқинлиқ каби бир гап бор эди. Маълум гаплар туғилгач, мен ўзимни четка олишни, қатъий алоқа қилишни мувофиқ кўриб, сизнинг устингизга келдим. Воситангиз билан бу кун хат ёзиб, мендан ранжийдир, тинчидек кетдингиз деб, киноя қиладир. Ёш, ақлсизга нима ҳам деб бўлсин, фақат диққатлик... Мана, ўқуб кўрингиз, сартопо киноя.

Султонали кулимсиди, аммо ўзида ўнгтайсизлиқ, тусида қизариниш бор эди. Хатни мирзонинг қўлидан олиб ўқуди. Ўқуб чиққач, ёзувнинг яна аллақайси жумласига иккинчи мартаба қаради.

—Қизиқ, "боқий сўзни Шайхи Саъдийдан ўқурсиз, деб хатни мухтасар қилдим..." Бу жумла билан нима демакчи?

—Бу ҳам киноя,—деди Анвар,—бундан сўнг меним тўгримда ўйламай, бўш вақtingизни Шайхи Саъдий ўқуб кечирингиз, демакчи бўлса керак.

Султонали мажҳул ҳаракат ясади.

—Балки...

Бу муҳмал тасдиқ ва мажҳул вазият Анварни шубҳага тушириди.

—Хўш, сизнинг фикрингизча?

—Мен... Мен ҳам сизнинг фикрингизга келиб қолдим, мен бошқачароқ тушунган эканман.

—Масалан?

—Мен: "Китобнинг ичидаги яна бир хат бор, қолган сўзни шундан ўқурсиз" деб.

—Эҳтимол сизники тўғридир,—деб алланглади Анвар.— Бу ҳам бир эринмаганлик бўлсин, китоб ичини ахтариб кўрайми?

Султонали кулди:

—Майли... Мен уйга кирнб, таом етилган бўлса, олиб чиқай.

Султонали кетди. Анвар китобнинг ўнг-терсини очиб, ахтара бошлади. Ҳеч нарса кўрина бермагандан кейин бирма-бир саҳифа очиб боришдан ҳам эринмади. Бош тарафдан ўттузлаб саҳифа текширилган эдиким Султоналининг фоли ҳақиқатка ошиб, саҳифа орасига буқлавсиз қўйилган бир хат китоб четига қоқилиб чиқди. Анвар шошди.

"Андиша ва эҳтиёт юзасидан бу хатни алоҳида ёзib, китоб ичига яширдим: Анвар ака, оғир соатларда ёнинг гизда турғучи дўстдир; қочқучи эсаким—буни сизнинг ҳукмингизга ҳавола қиласман. Ваъда бериш осон, лекин уҳдаси мashaққат; бундан сўнг шуни ҳам хотирда яхши тутингиз. Оғир дақиқаларда арзимас гапни кўнгилга олиш сизнинг каби олижаноблар иши бўлур, деб ким ўйласин. Баҳтсиз бир қизнинг нажоти учун тебранмадингиз, деб сизни айблаб бўлмас; бироқ, баҳтсиз Раъно таҳлика остида қолғанда, уни бу кун-эрта бир фожиға кутканда вафолиқ, деб билган бир кишисидан бу янглиғ жағо кўриши нақлларда ўқулғанми, афсоналарда тўқулғанми? Шу қадар гуноҳим бор эмиш, деб хафа бўлмангиз, Анвар ака. Башарти шу гуноҳларнинг ювилиб кетишини тиласангиз, сизга бир хизмат бор, ҳам сизнинг учун энг осон хизмат: эртага чаҳоршанба кечқурун, тиласангиз—очиқча, тиласангиз—яширинча бўлса ҳам бизникуга келингиз, мен билан охирғи мартаба видоълашингиз. Чунки сиз нашъу намо қилған жойда Раънони ҳалокат кутадир".

Анвар ёзувни онда-сонда ўқуб тезлик билан китобка қайтариб солди, саҳифалар орасида қолдириб, устига янги саҳифалар уя борди. Чунки лаганда манти кўтарган Султонали даҳлизга қараб ўткан эди.

—Борми?—деди Султонали лаганни сандал устига қўйиб.—Валлоҳи аълам, маъно сиз тушунгандадир. Мен янгишқан чиқарман.

Анвар унинг сўзини тасдиқ қилған каби бош иргатиб, китобни ёпди, қўл ювгали даҳлизга чиқди.

## 50. МАЪШУҚА МАҲБАСИ<sup>1</sup>

Раънонинг иккинчи хати Анвар учун яна бир ташвиш эди. Унинг ёнига боришдан ҳеч бир мантиқ топмас, билъакс, юрак ўтининг аланга олишини, жароҳатларнинг янгиланишини кўрар эди. Китоб баҳонаси билан хат ёзиб, ўз дарагини айтиб, эвазига шундай ташвиш ортдириб олған Анвар, кечаги кунларда ҳиссиятка қаттиғ берилиб, китоб сўратиш оқибатини яхши муҳокама эталмаганидан пушаймон эди. Шунинг билан бирга ўзининг мундан сўнгти ҳаракатида ҳам амният<sup>2</sup> сезмас эди. Чунки Раънога учрашишдан ҳеч бир фойда тасаввур қилмаган муҳокамаси қарисидаги кучлик бир майл, Раънога йўлиқишдан фойда эмас маъно кўрсатар эди... Учрашилганда шубҳа йўқум, Раъно йиглар, кўнгилни бузар, шундан бошқа иш чиқмас, лекин иккинчи тарафда неча йиллиқ муҳаббат яна шу фожиъ учрашишка мойил каби эди.

Ул тун бўйи учрашишнинг яхши ва ёмон тарафларини ўйлаб ухлай олмади, ора-чора ухлаб кеткан аснолари ҳам яна шу учрашишка алоқадор тушлар билан кечди. Ҳар қанча ақл изи билан ҳаракат қилишға тиришса-да, яна учрашмаслик, сукут қилиб кетишилик эб кўринмас эди. Учрашиш—нечоғлиқ тадбирсизлик, жон койитиш бўлмасин, Раънонинг: "Мен билан охириги мартаба видоълашингиз, сиз нашъу намо қилған жойда мени ҳалокат кутадир" жумласи ҳар қандайдур андишаликни енгарлик ва бу жонсўз хитобадан кўз юмиш йигитлик шаънига ярашадирған кўринмас эди.

Анвар қатъиян бориши қарорига келганда, девонда ўлтуриб ишлар эди. Унинг Эндиғи тараддути учрашиш ёки учрашмаслик борасида эмас, Раънонинг олдиға очиқча боришли, яширинчами тўғрисида эди. Башарти очиқ борса, маҳдумнинг шубҳаланиши, Раънони четка қоқиб ёки уларни таъқиб этиб, ярага туз сепиши, Анварнинг иззати нафсига тўқуниши аниқ. Яширин борса... Орада хиёнат, бузуқ ният бўлмагандан кейин яшириниб юриш нима ҳожат? Хайр, яширинча ҳам борсин, бандогоҳ маҳдум кўриб қолса... Унинг учун бу масалани ҳал қилиш ҳам мушкил эди.

<sup>1</sup> Маҳбас—ҳибсхона, қамоқхона

<sup>2</sup> Амният—тигуцлик

Иккиси кечқурун қайтишиб келдилар: Султонали мирзо кундаги каби Анварни яхши ошлар билан меҳмон қилди. Шомни ўқуғандан кейин Анвар "бир неча соат ичидагиянлари олдига бориб келиш учун" Султонали мирзодан изн олиб чиқди.

Қишининг охирги кунлари, кўчада қора совуқ билан изгириқ юрар эди. Тўққуз-ён кунлик ой шаҳарнинг қоқ устида чети қорайған сариқ барқашдек ялтираб турар эди. Маҳалла болалари эшикма-эшик юриб—"Барот келди, билдингизми, идиш-оёқ қилдингизми?" ашуласини айтар эдилар.

Анвар маҳдумнинг маҳалласига келиб етканда, киши танимаслиқ даражада қоронғи тушди ва шу қаторда Анварнинг кўнглидаги қоронғилиқ ҳам кучайди, юрак уриши ѝтидолдан чиқиб, ўғри кишидек атрофига қарана бошлиди. Бундан бирар ҳафта илгари баҳт бўйини онғитқан бу маҳалла ҳозир шунинг зидди билан ҳувиллар; ҳаммаёқ тим қоронғи, фақат бу маҳалла устида нурланиб кўринган ойгина унинг кўнглини ёритар, бироқ... Бироқ қажрафткор фалак<sup>1</sup> уни ҳам бағрида қора доги билан ўрда томонга қараб судрар эди...

Анвар ёпиқ ҳолда турған дарбоза ёнига келиб оҳиста итарди. Дарбозани занжир кўриб, кўз ўнги қоронғиланди... Бир неча фурсат дарбоза ёнида қадалиб турғандан сўнг, тўғрига ўтди. Йигирма қадам чамаси юриб, қўшнининг дарбозасини итарди, буниси очиқ эди. Қоронғи йўлакка кирди. Ул маҳдумнинг хуфтанга чиқишидан фойдаланмоқчи, хуфтан азони айтилгандан кейин ҳам дарбоза очилмаса, сўнгра қайтиб кетмакчи эди. Узоқ кутишка тўғри келмади, маҳалла масжидида хуфтан азони айтилди, шундан бир оз кейин Раънолар дарбозаси ҳам гийқиллаб очилди.

Дарбозадан чиқсан оёқ товши Анварга яқинлаб келар эди. Анварнинг юраги арзиқиб қўшни дарбозасининг ички томонидан очиқ табақа орқалиқ йўлға мўралар эди. Раънолар дарбозасидан чиққучи тўғрига ўтиши билан Анвар турған йўлакнинг ичкарисидан ҳам оёқ товши келиб қолди. Анвар шошиди, маҳдум беш-олти қадам йироқлашқар, йўлакдан чиқишқа мажбур бўлди. Анвар оёғидан товуш

<sup>1</sup> Қажрафткор фалак— ўри айланувчи фалак

чиқармаслиққа тиришиб, секин-секин дарбозага юриб келди. Орқадаги оёқ товушларининг узоқлаша борғанини сезиб, хотиржамъ ичкарига кириб олди. Мәҳмонахона саҳнида бир оз аланғлаб турғандан кейин, тұғриға—машқона эшигига ўтди. Машқона эшигини очар экан, орқасиға—дарбоза йүлдигига қарапди.

Даричалари ёпиқ машқонанинг ичи ҳосидлар<sup>1</sup> юрагидек қоп-қоронғи, даромад ҳам ёпилғандан сүнг уй гүё лаҳад тусига кирди. Зулумот ичидә қолған Анвар орқа-үнгитини ажратолмай бүрә устини чоғлаб бир-икки қадам юриб келди ва икки құлы билан тизасини құчоқлаб чүнқайды. Даричалар тирқишидан түшкан ёргулиқ билан зулумот бир оз күчсизланди, шунда ҳам унинг күз ўнгти қов<sup>2</sup> каби қоронғи эди. Ҳамма тип-тинч; қулоқ остидаги чивиллашибдан бошқа товуш эшитилмас, ора-чора узоқдан келган бола йигиси бу тинчлиқни бузғандек бўлар эди. Шу ҳолда орадан неча дақиқалар ўтиб кетди. Бир вақт ер ости дукиллагандек бўлди. Бу дукиллаш секин-секин оёқ товшиға мубаддал бўлиб, унинг қулоқлари тиккайди. Ичкаридан чиқан бирав йўлакками, мәҳмонахагами ўтиб кетди. Анвар энтиқди, мәҳмонахонанинг эшиги очилиб бир оздан кейин яна ёпилди, ҳавли саҳнида яна бирав юринди. Борған сайнин машқонаға яқинлашиб келган оёқ товши билан Анвар тоқатсизланди. Эшик очилиши билан беихтиёр ўрнидан туриб кетди...

—Анвар ака.

—Мен...

Эшик очқан Раъно эди, бир-икки қадам ичкарига кириб тўхтади. Анварга озгина қараб турғач, узун нафас олиб орқасиға қайтди. Анвар бу ҳолнинг сабабига тушуналмаганидек, уни чиқармай тўхтатишқа ҳам ўзида жасорат топмади. Бирар дақиқадан сүнг эшикда яна Раъно кўриниб, Анварнинг олдига қорамтил бир нарса келтириб қўйди.

—Сизга кўрпача олиб келдим,—деди шивирлаб,—уйга аммам ва холамлар келишкан, мен уларни ухлатиб чиқаман...

Раъно шу сўзни айтиб, орқасиға қайта берди, эшикни

<sup>1</sup> Ҳосид—ҳасад қилувчи, баҳил.

<sup>2</sup> Қов—кўйдирған пахтага иисбат.

бояғыча ёпиб, ҳужрадан йироқлашди. Ақволга бир оз ту-шунган Анвар күрпачани бүрёға солиб, устига чиқди ва эркін нафас олиб ёнбошлади. Энди Раъононинг ҳар ҳолда чиқишини билса ҳам, бироқ, қачон чиқишини билмас, шунга биноан бир тавқ ўткунча кутиб ўлтуришини чамалар эди. Орадан бир оз фурсат кечканда дарбоза очилиб ёпилди. Анварнинг қулоги тиккайиб, қаддини ростлаб ўлтуришка мажбур бўлди. Оёқ товши яқинлашди, узоқлашди ва охирда битиб ҳам кетди.

Вақт жуда қийинлиқ билан ўтар, ташқарида "тиқ" эткан товуш уни бир алланглатар эди. Бир тавқ ўтканига талай вақт бўлса ҳам, ҳамон Раъно дараксиз. Юраги сиқиған Анвар гоҳ ўлтуриб, гоҳ ёнбошлар, совуқда музлаб кеткан маҳсилик оёгини турли вазиятка солиб кўрар эди. Шу азоб ичида яна талай вақт кечти. Маъшуқа маҳбасига тушкан Анвар ўлтуриб чидалмади, кафшини кийиб, ўрнидан турди, музлаган оёгини иситиш ва оғриққа кирган аъзосини ҳаракатлантириш учун уй бўйинча кезина бошлади. Неча вақт саҳн айланиб, яна ўлтурди. Ой ҳам бота бошлиған, чунки четдаги дарича тирқиши орқалиқ тушиб турған кучсиз ойдин изи ҳам йўқолиб, уйни қоронгилиқ босқан, теваракда чалинған довулларнинг "гум-гум" оҳанги ичида хўроzlар иккинчи мартаба қичқириб юборған эдилар. Анвар бир оз ёнбошлағандан кейин яна ўрнидан турди, кафшини кийиб келиб, эшикни очди, саҳнга тушиб кўзини уқалади. Кўкда дуркум-дуркум юлдузлар сайдар этар эдилар. Том бошидан ботишқа яқинлашқан ой нури аранг-аранг кўзга чалинап эди. Анвар тоза ҳаво исқаб узун нафас олди.

—Зерикмадингизми?

## 51. ЖАСУР ҚИЗ

Кулоги остидағина айтилган бу сўз Анварни чўчитди ва ўз ёнида қўлида бир нарса кўтариб турған Раъонни кўрди.

—Уларни ухлатмай чиқолмадим... Уйга кирайлик, Анвар aka.

Юраги арзиққан Анвар Раъононинг орқасидан машҳо-наға кирди. Иккиси кўрпача устига ёнма-ён ўлтуришдилар.

—Китоб ичидаги хатни пайқамайсизми, деб қўрққан эдим,—деди ярим товуш билан Раъно.—Пайқамассангиз...

—Үзинг ҳамма гапка тушуна туриб, яна бунчалик аччиг ёзганинг нимадир, Раъно?

—Чунки шунчалик аччиг ёзмасам,—деди Раъно товшида титроқ оҳанг билан,—сиз келмас эдингиз... Сиз... сиз мирзобошилиқни яхши кўрасиз-а?

Анвар бу муносабатсиз саволдан бир оз ҳайрон бўлиб турди.

—Тушунмадим... Нима демакчисан?

—Сиз мирзобошилиқни яхши кўрасизми, деяпман?

—Яқинда мирзолиқни ташламоқчиман, Раъно?

—Мирзолиқни ташлагандан сўнг нима иш қиласиз?

—Қўқондан кетаман, саёҳат қиласан.

—Мени... мени ҳам ўзингиз билан олиб кетмайсизми?

Анвар яна тушунмади. Раънонинг юзига анча қараб турди:

—Сен... сенга мумкинми, Раъно?

—Мумкин,—деб қалтиранди Раъно.—Мирзобошилиқни ҳозирдан эътиборан ташласангиз мумкин...

Бу сўз Анварни ҳам қалтиратиб юборди.

—Нима деяпсан, Раъно?

Раъно бир неча вақт жавоб бералмай турди. Ўзини тўхтатиб олиш, ҳаяжонини тиндириш оғир эди.

—Ҳалиги... ҳалиги сўзингиз чин бўлса, мен ҳам сиз билан кетишни хоҳлайман... Башарти сизга оғир ошмасам...

Анвар жим бўлиб қолди, тушига ҳам кирмаган бу таклифка нима дейишини билмай энтиклиди...

—Башарти сизга оғир ошмасам,—деди такрор Раъно.

"Жасур қиз" деб ўйлади Анвар. Чиндан ҳам бу жасура на исён хотин-қизлар томонидан Худоёрнинг ҳайвоний истагига қарши биринчи кўтарилиш эди. Анвар истиқболда қанчалиқ мушкилот ва хатар кўрмасин, бу жасоратни хуш қабул қилишга мажбур, чунки муҳаббатдан ҳам илгари йигитлик тақозоси шу эди.

Ул ўз яқинида турган қора тугунни ушлаб қаради.

—Бу нима, Раъно?

—Бу... бу сизнинг эски кийимларингиз.

—Нима учун бу?

—Башарти сиз хоҳласангиз.

Анвар паранжими, деб чамалаған эди. Мантиқсиз бу жавоб уни шоширди.

—Хўб, сенинг ризолигинг йўлида...—деди Анвар ярим товушда.—Меним эски кийимларим сенга нима даркор?

Раъно жавоб бериш ўрнига узун сўлиш олиб ёнидаги тугунини еша бошлади.

—Паранжи олмадингми, ахир?

—Хозир...—деди Раъно ва қоронғида бир нарсалар қила берди.

Паранжиси ҳам бордир, деб ўйлаған Анвар уни ўз ҳолига қўйиб турди. Бираар дақиқадан кейин Раъно ердан бир нарсани тутиб қўзғалди, паранжи каби узайған нарса ичидан "чоқ" эткан бир нарса ерга тушти.

—Топиб олинг шуни.

Анвар ерни тимискилади.

—Нима эди?

—Аямга берган амонатингиз.

Анвар тушкан нарса олтинлар эканини пайқади, узоқни ўйлаған Раънога қарши юрагида яна ҳароратлироқ муҳаббат сезди.

—Топдингизми?

—Топдим.

—Туринг энди.

Анвар Раъно билан бошлашиб ҳужрадан чиқди ва ўз ёнида паранжи ёпинган қизни эмас, телпак ва тўн кийган ёш, ўспурин бир йигитни кўрди...

—Бу нимаси, Раъно?

Раъно жавоб бериш ўрнига йўлакка қараб юра берди. Дарбозани очиб кўчага чиққандан сўнг, Анвар Раънонинг олдиға тушиб йўл бошлади ва ўзида енгиллик ҳис этди. Чунки Раънонинг йигит суратига кириши андозасиз маъқул; бемаҳалда паранжилик хотинни бошлаб юриш миршаб ва қоровулларда ҳам турли шубҳа тугдирғани каби, Анварнинг ўзи учун ҳам ўнгтайсиз бўлар эди. Гўё бир ўртоғи билан кетиб борғандек парвосиз кўринган Анвар, бурилишка етканда ўзидан ўн қадам орқадаги ҳамроҳини кутиб турди. Гуруби<sup>1</sup> яқинлашқан қип-қизил ой Анвар тўхтаган муюшка кўлага каби заиф нур сочар эди. Раъно Анвар ёнига етиб "қаёққа юрамиз", деган каби бир йўлға ва бир ҳамроҳига қаради. Соч ўрумларини телпак остига босиб, тўни тўпуғи устига тушаёзған "ёш йигит" Анварнинг кўзига яна ҳам дўндуқроқ кўринди. Анвар Раънонинг тўнини бир оз кўтариброқ ушлатди,

<sup>1</sup> Гуруб—ойнинг ботиши.

онда-сонда телпакдан чиқиб қолған соч толаларини яшириди ва "үнгіта" деган ишоратни құлди. Раъно олдинда, ундан икки-уч қадам орқада Анвар йўлға тушдилар. Енгил бедона маҳсиси билан қала кафши кичкина оғигига жуда ҳам келишкан Раъно, гүё учкандек тез юриб борар, орқада келган Анвар гояи омолға<sup>1</sup> ошиққандек ундан қолишимасқа тиришар эди. Узоқ юрдилар. Элли қадам чамаси нарида гулхан теварагида уч-тўрт нафар кишилар кўриниб, Раъно тўхталди.

—Тўхтама, Раъно,—деди орқадан Анвар,—сен писанд қилмагандек, парвосиз гулхан ёнидан ўта бер, мен улар билан сўзлашиб қолсан, нарироқда кутиб тур.

—Миршаблар бемаҳалда қўймас эмиш-ку.

—Мен билан сени қўяр... Қўрқмай боравур.

Раъно иккилангансумон йўлға тушти, гулхангача ўн қадам қолғанда миршаблардан бири ҳайқирди:

—Тўхта!

Раъно Анварга қараб тараддулланди, Анвар юра беришка ишорат қилиб, тезлик билан гулхан ёнига етди. Анварни таниған миришаб ва қоровуллар таъзиман ўрунларидан қўзғалдилар.

—Қўзғалманглар,—деди Анвар гулханда исиниб,—даҳбоши ҳам шу ерда эканлар...

Анвар "даҳбоши" деб атаған юм-юмалоқ киши Қорунбой исмлик бўлиб, миршабларнинг қизиқроги, шунинг учун ундан "даҳбоши" деб истеҳзо қиласр эдилар:

—Ёнингизда бесақал билан бемаҳалда нима қилиб юрибсиз, тақсир? Одамзодга ишониб бўлмас экан-да...

Анвар, "даҳбоши"нинг кўзи Раънога тушиб қолғанини онглади. Гулхандан ўттуз қадамча нарига бориб тўхтаған "бесақал"га кўз қирини ташлади.

—Зиёфатда эдик, даҳбоши.

—Ҳа-а-а-а-а, менам айтдим... Уй бу ёқда қолиб, энди қаёққа кетапсиз, тақсир?

Анвар қўлинни яқиндан иситмакчи бўлиб гулхан тарафка бир қадам бости.

—Эшитмадингизми, ҳали?.. Мен Раис кўчадан... янги ҳавли олдим.

—Муборак, муборак.

<sup>1</sup> Гояи омол—умид-мақсад.

Анвар қутлуғ айтиб, улар билан хайрлашди. Миршаблар унинг ҳурмати учун қўзғалишиб қолдилар.

Гулханчилардан элли қадамлаб узоқлашқач, Раъно Анварнинг етиб келиши учун йўл устида тўхтади.

—Нима деяпти у гўрсўхта?

Анвар ҳиринглаб кулди ва Раъононинг елкасига қоқди:

—Юр, юр, йигитча. Гўрсўхта тўғри айтятпи.

—Етаёздиқми, қаерга борамиз?

—Яқин қолди, кечаги хотиннинг уйига...

Раъно олдинга тушиб кетди, узоққина сўзсиз борғандан кейин орқасига қайрилиб сўради:

—Ўзлари яхши одамларми?

—Яхши, яхши,—деди Анвар ва ўн қадам чамаси индамай борди.—Сен уй эгасидан қочиб ўлтурма, ўзи меним оғам... Тузукми, Раъно?

—Хўб.

Яна бир оз юриб торроқ бир кўчага бурилдилар. Султоналининг дарбозасига еткунча иккиси ҳам оғиз очиб гапиришмадилар.

## 52. ДЎСТЛИҚ "КАРОМАТИ"

Эрталаб хоннинг ҳарамдан чиқиш вақти яқинлашқан, салом ва истиқбол учун хослардан саккиз-тўққузи йиғилған эдилар. Шу кутиш асноси эшикда ҳовлиқиб Султонали кўринди. Қора бармоғи билан хослар ичидаги Абдурауф тунқотарни ўз тарафига имлаб, орқасига қайтди. Абдурауф тунқотар ажабланган ҳолда даҳлизга чиқиб, ўзини четка олиб турған Султоналига, нима гап, деган ишоратни қилди. Султонали лабини тишлаб, қўли билан тунқотарни ўз ёнига чақирди. Тунқотар маҳсичан оёгини ерга босиб Султоналининг ёнига келди.

—Хўш?

Султонали бошини икки елкасига иргатиб, лабини тишлаб олди.

—Мирзобошимизнинг миси чиқиб қолди-ку.

—Хўш, хўш?

Султонали тунқотарнинг қулоги остига энгашти ва ярим товуш ичидаги деди:

—Мирзо Анвардан онҳазратка номуссизона бир хиёнат содир бўлди.

Тунқотар бошини қўйироқ тушуриб, Султоналининг афтига эгри қаради:

## —Масалан?

—Мирзо Анвар уч-тўрт кундан бери меним ҳавлимда қўйниб юрар эди,—деди Султонали ва сўз ораси уёқ-буёққа қараб қўйди.—Чамаси устозига бир хиёнат қилғандан ке-йин меним ҳавлимда ётиб юрган экан... Ўз устозини билмаган бу беспадар, олампаноҳнинг ҳам бетларига оёқ қўйишдан тоймай, мазкур устозининг қиблагоҳ учун му-вофиқ кўрилган қизини йўлдан оздириб, бу кун кечаси уни қочириб меним ҳавлимга олиб келди... Гарчи ўз ҳавлимда ётқан меҳмоним ва дўсти қадрдоним бўлса ҳам, валинъематимнинг ҳаққи намакларини унуткан бу беҳаёнинг андишасизлигидан ҳар мўйим бир ништардек кийимимдан тешиб чиқаёзди. Унинг йигитлигига тилда таҳсин ўқуб, ичдан лаънат айтиб, жанобни хабардор қилиш учун югуриб келаётқаним-да, бек ака.

Тунқотарнинг кўзи қинидан чиқаёзиб, бир-икки қайта соқолини қўли билан букиб ямлади.

—Падар лаънат. Ўзи ҳозир сизнинг уйингизда?

—Ҳа, ҳа... Қиз ҳам шунда. Жанобнинг раъйларини билиш қийин-ку, бироқ менга қолса, вақт қочирмай уни ҳозироқ қўлга олиш керак-да.

—Бўлмаса-чи,—деди тунқотар елкасини қисиб,—мен ҳозир арз қиласай. Раҳмат сизга.

Тунқотар ҳузури хоска кириш учун шошилди. Султонали хоннинг "ҳаққи намагини" бенуқсон адо қилиб, хотиржамъ девонга қайтди. Анварнинг энг содиқ кишисининг охирги "каромати" ниҳоят шу бўлди.

Кўб фурсат ўтмади. Девоннинг даричаси ёнига келган тунқотар Султоналига чиқ ишоратини қилиб, ўзи нарироққа кетди. Ҳовлиққан, энтикан Султонали оёгини онда-сонда ташлаб, девонхонадан чиқиб келди.

—Марҳамат?

—Ушлашкаб буюрдилар.

—Айни каромат,—деди Султонали.—Иккисини ҳам албатта?

—Албатта.

Ёнига тўрт нафар ясовул олиб, Султонали йўлга тушти. Та什қи дарбоза ёнига қантарилған отлардан бирисига миниб, тунқотар ҳам уларнинг изига кирди. Озгина юргандан кейин, тунқотар яёвлардан ўзди. Унга етиб юриш учун Султонали ва ясовулларслиб бордилар. От билан баробар югуришар, озгина кейинда қолсалар, отлиқ тунқотар тез юришга қистар эди. Шу йўсун ҳаллослашиб

узоқ чоптилар... Бурулишқа етканда Султонали бир оз сүстланиб, ўзидан ўн от адими йироқда борған тунқотарни чақириб тұхтатди ва қўлини ўнгта силтади. Тор кўчага кириб кетдилар. Уч дақиқа чамаси елғандан сўнг, Султоналининг дарбозаси кўринди. Султонали тұхтади...

—Ўша кўриниб турған дарбоза... Озгина таҳаммул қилинсин-чи, бек почча, меним киришим яхши бўлмас, дейман?..

Тўрт адимча олдинда борған тунқотар отнинг жилавини тортди.

—Нима учун?

—Меним дўстлиқ отим бор... Мен четроқда турсам маъқул бўлмасми?

—Маъқул, маъқул.

—Раҳмат... Дарбозадан кирсангиз меҳмонхона бор; ул шунда бўлса керак, қиз эса ичкарида эди.

Султонали шу сўзни айтиб, ўзини қаршидағи дарбоза йўлагига олди. Тунқотар йигитлар билан дарбозага қараб кетди. Дарбозанинг ҳар икки табақаси ҳам ланѓиллаб очилған, ичкари тарафдан хотин ва эр кишининг сўзлашкан товушлари эшитилар эди. Тунқотар отдан тушиб жилавини ясовуллардан бирининг қўлига берди:

—Сен от билан шу ерда турасан, дарбозадан на хотин ва на эркак кишини чиқармайсан,—деди тунқотар.—Сиз йигитлар, мени орқамдан кирингиз, Аварни кўрганингиз он ҳеч нарсага қарамай, қўлини боғлангиз.

Ясовуллар садоқат нишони кўрсатдилар. Тунқотар учтўрт қадам ичкари юрди ва йўлак даромадида тўхтаб ичкарига қулоқ солди. Ичкаридан эр ва хотин сўзларини эшиди.

—Шарманда бўлдим, расво бўлдим!..

—Шарманда бўлиш ҳеч гап эмас,—деди ичдан тунқотар.

—Вой шўрим қурсин!..

—Албатта шўринг қуруйди, моча!..—деди тунқотар.

Тунқотар, йигитларга "орқамдан" ишоратини қилиб, бирдан саҳнга чиқди... Саҳннинг ўртасида қўлида бир қоғоз ушлаб, бошини қўйи солған Солиҳ маҳдум турар эди. Маҳдумнинг ёнида икки киши, улардан берироқда паранжилик уч хотин қадалған эдилар. Тунқотар ва ясовулларнинг шапраси билан ҳамма чўчиб кетди. Маҳдум қўлини бир-бирига уриб, оҳ чекти:

—Шарманда бўлдим, расво бўлдим!

Тунқотар шошиб, олпонғ-толпонғ маҳдумнинг ёнига келиб етди.

—Нима гап?

Маҳдум шарт этиб, пешонасига уриб, йиғлади:

—Сўзлагали тил йўқ... Жанобнинг олдиларида шармисор, ғазабка сазовор бўлдим... Эрталаб уйғонсақ, бепадар ожизамиз йўқ... Саросима ўён-буён югуриб турганимизда, мирзо Султоналиницидан, қизингиз бизнекида, деган хабар борди. Биз аёллар билан югуришиб келсан, бир онда...

—Хўш, хўш?

—Ҳаромзода Анвар уни йўлдан оздириб, бу ердан ҳам олиб қочибдир... Ҳарчанд ичкари ва ташқарини излаб, ушбу хатдан гайри асар топмадиқ... Эвоҳ!..

Хотинларнинг биридан йиги товши эшитилди. Тунқотар маҳдумнинг қўлидағи хатни юлқандек ўз қўлига олди.

"Иzzатлик мирзо Султонали оғамизға! Маълум бўлсинким, синглингиз билан маслаҳатлашиб ўз ҳаётимиз учун сизницида туришини хавфлик, деб ўйладиқ. Гарчи дўст кўринсангиз ҳам, баъзи нолойиқ ҳаракатларингиз бизни шубҳага солди. Айниқса хотинингизнинг Раънога бузуқ қиз билан қилған каби муомаласи яна бизни хавотирга туширди. Шуларга мабни<sup>1</sup> алдаған каби сизни ўрдаға жўнатишқа, сиздан сўнг уйингиздан кетишка маҷбур бўлдиқ. Дунёда дўсти содиқни топиш қийин экан. Сизга ҳарчанд: "Мен ошиқман, қиз маъшуқамдир, олампанаоҳқа қилған бу хиёнатим ёлғиз ўз тарафимдан содир бўлған жиноят эмас", десам ҳам, сиз "Ёшлиқ қилибсан, марҳаматлик подшоҳинг ҳақини унутибсан!" дейсиз. Лекин сиз шу қиз йўлида ҳатто бош муншийликдан ҳам кечиб турганимни ўйламайсиз. Бунинг учун мен сиздан ранжимайман. Аммо сизни инсон фаҳмлаб, уйингизга дўст олиб келганда бу қадар тундлиқ, бу қадар риоясизлигингиз кишига қаттиғ таъсир қиласидир. Ичкарида ҳатто қиз бечоранинг бошиға ёстиқ ҳам бермаганлар. Баракалла сизга, баракалла янгамизга, баракалла одамгарчиликка!..

Аддои дўстингиз АНВАР".

—Одамгарчиликни ҳам билади, бу туз кўр қигур!—деди заҳарханда ичидаги тунқотар ва хатни бувлаб ёнига

<sup>1</sup> Мабни—биноан.

солди.—Ичкаридан мирзо Султоналиниң хотинини қақириб беринглар-чи!

Хотинлардан бири ичкарига құзғалды. Рузвон йүлакда турған бўлса керак, хотин ички эшик ёнида тўхтаб, йўлак билан сўзлашди. Тунқотар эшик ёнига келди.

—Сиз шундамисиз, янга?

—Ҳа, айланай.

—Сиз бу гаплардан нима биласиз?

Рузвон эшик панасиға яшириниб, бир оз жавобсиз турди ва бир-икки томоқ қириб қўйди:

—Уч кундан бери мирзо Анвар отлиғ йигит бизнинг меҳмонхонада ётиб туар эди, айланай... Шу йигит бу кун ярим кечада бир қизни бошлаб келди, мен ҳайрон бўлиб мирангиздан сўрасам, шундай-шундай гап... Жуда хафа бўлиб кетдик-да, айланай. Кет дегали юз чидамайди, киши чақирғали яна вақт эмас; мирангиз билан кенгашиб, эмди ҳарчи эрталабгача жой берайлик, тонг отса, буларнинг татигини бергучилар топилар-ку, ахир дейишдик. Тонг отди, мирзо Анвар у кишига: "Мен бунда яна бир кун тураман, шунгача бизни эҳтиёт қиласангиз бўлади", деган эмиш. Мирангиз шошиб ўрдаға кетди, у кишидан кейин мен ҳам тинч ўлтуралмадим, айланай. Қўшнимизнинг боласини қизнинг уйига чоптиридим. Бир вақт мен билан сандалда ўлтурган қиз уйдан чиқди, мен ташқариға чиқуси келдими, деб бепарво ўлтурабериппан, айланай... Шу чиққани билан қайтиб кирмади-қўйди. Кўнглим ғаш тортиб, ҳавлига чиқиб қарадим. Йўқ, ташқаридамикин деб шу турған жойимга келган эдим, уёқдан булар келишиб қолди... Бўған гап шу, айланай!

Тунқотар афсус чекиб маҳдумнинг ёнида турған кишиларга яқин келди.

—Сизлар нима қилиб юрасиз бу ерда?

—Биз... биз мирзо Султоналиниң қўшнилари бўламиз.

—Жуда яхши, хизмат?!

Тунқотарнинг кариҳ<sup>1</sup> бу муқобаласидан кишилар сиқилиб қолдилар.

—Мен кўчада эдим,—деди бириси қўрқа-писа,—уёқдан домла билан аёллар келиша берди... Аёллар йиглашқанга мираннинг уйида бир гап бўлғанми, деб.

<sup>1</sup> Кариҳ—ёқимсиз, хунук.

—Текин томошачиман, дегин... Хўб, сен-чи?

—Мен ҳам мирзо Султоналига қўшни бўламан,—деди иккинчи киши: буниси ўзига бир оз тетикроқ эди.—Бироқ мен сизларнинг гапларингни эшитиб, бир нарсага ҳайрон бўлиб туриппан-да.

—Нимага ҳайрон бўласан?

—Мен шунга ҳайрон бўляпманки, янгамнинг сўзига қарағанда, мирзо Анвар ўз ёнида паранжилик хотин билан чиқиб кетса керак эди... Боя мен уни дарбозадан чиқиб борғанида кўрдим, ёнида хотин-потин деган гап йўқ эди.

—Ёлғизмиди?

—Ёлғиз-ку эмас эди, бироқ ёнидағиси аёл эмас, дўйдиққина бир бесақал эди.

Тунқотар қўшнининг сўзига тушунмади, елкасини қисиб қўйди.

—Сиз аниқ кўрибсиз, Карим ака,—деди у ёқдан Руз-вон.—Киз кечаси келганида ҳам эркак кийимида эди.

—Ўб, падар лаънат!—деб юборди тунқотар.

Устиға тоғ ағдарилған маҳдум бошини яна қуйироққа солиб, ҳўнгир-ҳўнгир йиғлади.

—Бўлар иш бўлған...—деди тунқотар атрофига хитобан, —улар-ку, албатта, қўлға тушиб жазосини топар, бироқ жанобнинг шаънларига жуда оғир гап. Биноан алайҳ, шу ердаги сирга воқиф бўлғанларнинг вазифаси бу ҳодисанинг кишига сўзламаслик, кўрган-кечирганини шу ерда қолдириб кетишлик!

Кишилардан: "Албатта, албатта!" деган жавоб бўлди. Сўнгра тунқотар маҳдумнинг ёнига келди.

—Сизда гуноҳ йўқ, бироқ қиз ўсиришни билмас экансиз.

—Бандамиз, бандамиз,—деб йиғлади маҳдум.—Илоҳи жувонмарг бўлсин, мени ерга қаратди.

Паранжидаги хотинларнинг бири бўлған Нигор ойим пиқ-пиқ йиғлади. Тарбузи қўлтуғидан тушкан тунқотар ясовулларнинг олдиға тушиб, тарс-турс кўчага чиқди, йигитлардан бирининг кўмагида отқа миниб, жилавини қўйди. Султонали яширинған дарбозага етканда йўлакай чақириб ўтди:

—Мирзо Султонали, чиқинг. Қочқан, падар лаънатлар! Султонали қўзини катта очиб, дарбозадан чиқди.

—А, чинми?

—Қочқан,—деди тунқотар хатни Султоналига узатиб,— ўқуб, яна менга қайтаринг, жанобга ҳам кўрсатишимииз керак...

...Султонали шу ҳодисанинг иккинчи куни хонга қылған садоқатининг самарасини ҳам кўрди, яъни бош мунший бўлиб белгиланди.

### 53. ЧАЁННИНГ НАМОЙИШИ

Бу кеч масжид ҳужраси яна обод, катта шамъни тоқчага қўндириб, очиқ танчага писта кўмир солиб, маъюс, бир-бирига ёнма-ён ўлтургучи икки муфти қўлларини оловга товлар эдилар. Ҳужранинг тўрдаги тоқчасига бешолти дона қалин муқовалиқ китоблар терилган, уларнинг варақ тахида—"Шарҳи мулло Жомий", "Ақоиди маъалҳавоший", "Ҳикматул-айн", "Алвиқоя", "Сияри шариф" каби сўзлар ёзилған эди. Кун ботиш тоқча деворига гул равишида туширилган дуо ёки шунинг каби муқаддас қалималар ёзиғлик бир қоғоз ёпиштирилған. Сирлар билан турланган қозиқларнинг бирига бева хотиннинг декласидек бир салла илингган эди.

Шаҳодат муфти касавни олиб, чўғни титди ва кенг кўкрагини шишириб нафас олди.

—Ажаб бедаво дард-да.

Калоншоҳ мирзо бошини иргатиб қўйди.

—“Сўйган ёрим сен бўлсанг, кўрган куним не бўлғай”,—деб давом этди муфти.—Улуламир қадрношунос бўлғандан сўнг қийин экан. Шу оқпадарнинг қўл остида ишлагандан девонни ташлаб кеткан беҳроқ.

—Сабр қилинг, домла, сабр: “Инналлоҳа маъассобирин”<sup>1</sup>.

—Албаттa... Ва лекин Султоналидек бемаънига бош эккандан, ҳар рўз ўн таёқ еган яхши.

Хуфтанин ўқуғандан сўнг таҳорат янгилаb юргучи мулла Абдураҳмон ҳужра эшигига кўринди. Кичкина ховонча бошидаги оқ тепчима тўппи ва қора узун соқоли уни ҳиндиларнинг савдогари қисфатига қўйған эди. Мулла Абдураҳмон ичкари кириб, қозиқдағи саллани оқ тўппи устидан кийди.

—Мен жанобларнинг сўzlари билан уйга овқат буюрмадим-а?

—Лозим эмас, биз уйдан овқатланиб келганимиз.

<sup>1</sup> Оллоҳ сабр қилгучилар билан биргадир (Оят) (*муалі*).

Мулла Абдураҳмон танча ёнига келиб ўлтурди ва ер остидан Шаҳодат муфтига қараб илжайди.

—Шундай қилиб, мирзо Анварни қиз билан қочирдингиз?

—Қочириш бўлса, қочирдиқ ва лекин қордан қутулиб ёмғурға тутилдиқ, мулла Абдураҳмон.

—Мен эшитдим.

—Куллу явмин батар<sup>1</sup>—буниси ундан ҳам қабиҳроқ бўлди... Беш кундан бери юраклар зардобка тўлди, мулла Абдураҳмон,—деди муфти.—Кеча бизникига йўқлаб борған экансиз. Сиз кетибсиз, мен келибман-да, кўб афсус қилдим. Бу кун мулла Калоншоҳни олиб, сиз билан суҳбатлашиб қайтайлиқ, деган ниятда...

—Қуллиқ, тақсир, қуллиқ,—деб мулла Абдураҳмон қимиirlаб ўлтурди.—Мен Анвар билан Султонали можаросини фақат кеча мирзо Бойсдан эшитдим. Бу тўғрини аниқроқ билиш учун жанобингизнинг хизматингизга борганим эди... Хўш, ҳаводис нима?

—Ҳаводисми? Қани сўзланг-чи, мулла Калоншоҳ.

Калоншоҳ, сўзлай беринг, дегандек Шаҳодат муфтининг ўзига ишорат қилди. Шаҳодат муфти кўзини юминқираб, ҳаводисдан<sup>2</sup> саҳифа очди:

—Ҳаводис шулки, Анвар борасига сизнинг олған нишонингиз жиддан тўғри тушиб, биз куткандин ҳам зиёдароқ самараға эришкан, яъни магрур гўдагимиз қизни олиб қочқан...

Мулла Абдураҳмон ҳакимона илжайди, Шаҳодат муфти давом этди:

—Чамаси, нисфи шаб-ярим кеча асноси, дўстим, деб ёнида қиз, Султоналиниң уйига келган. Султонали тонг отқунча икки гўдакнинг қўйинини пуч ёнгоққа тўлатиб чиққан, эрта билан улар уйқуда ётқанда, Султонали ўрдаға югуриб келган; воқиъани тунқотарга сўзлаб, тунқотар хонга йўлиқиб, хоннинг буйруги билан ёнлариға ясовуллар олиб келсалар, ошиқ-маъшуқ йўқ, улар жойида Султоналига аталған бир сабнома<sup>3</sup> бор... Чамаси, Султонали аблаҳлик қилиб, Анварни бад олдириб қўйған ва тонг вақти, улар уйқуда экан чоқда гойиб бўлиб, яна шубҳани ортдирған бўлса керак. Султонали Анвар билан қизни

<sup>1</sup> Куллу явмин батар—кундан--кун баттар.

<sup>2</sup> Ҳаводис—ҳодисалар, воқеалар.

<sup>3</sup> Сабнома—сўкиб, таққир қилиб ёзилган хат (муал.).

тутиб бералмаса ҳам, баҳарқол хонга яхши кўриниб, Анварнинг ўрнини олишқа муваффақ бўлди. Барча ҳаводис мана шундан иборат.

Абдураҳмон ҳикояни эшиткандан кейин, бир неча вақт сўёзсиз ўлтурди. Танчадаги оловни тузатар экан, ер остидан муфтиларга қараб илжайди.

—Мирзо Бойисдан ҳам шу маолни<sup>1</sup> эшиткан эдим,—деди ниҳоят.—Жанобларнинг фикрлари балки тўғридир, аммо мен бу маолдан бир оз шубҳа қиласман...

—Яъни, масалан?

Абдураҳмон қўлини ўйнаб, яна бир оз сукутда ўлтурди, сўнгра лаби оҳиста-оҳиста очилиб юмила бошлиди:

—Бу ҳаммаси Султонали билан Анварнинг ўюнидир, деб ўйлайман... Бу андишамга бир неча сабаблар ҳам бор. Жаноблардин махфий эмасдирким, биз ўзаро қандай яқин бўлсақ, Султонали билан Анвар ҳам ўзаро шундай қалин дўст эдилар. Бинобарин, ақлға "қарға қарғанинг кўзини чўқур эканми?" деган савол келадир; жаноблар шу борани қандай тушундилар экан.

Шаҳодат муфти Калоншоҳқа қараб қўйди, Калоншоҳ парвосизроқ кўринар эди. Орада яна бир неча вақт сукут ҳукм сурди.

—Султонали сармунший бўлиш учун дўстидан кечса ҳам мумкин,—деди муфти.—Иккинчи тарафдан, сизнинг фикрингиз ҳам эҳтимолдан баъид<sup>2</sup> эмас.

—Султонали дўстидан кечмай туриб ҳам бу найрангни қиласа мумкин эмасми, домла?—деб кулди Абдураҳмон.—Масалан, хон олмоқчи бўлған қизни қочиргучи Анвар икки бошдан-ку, қайтиб сармунший бўлолмайдир, бошқа тарафдан, хиёнаткор дўсти бўлиб танилған Султоналининг ҳам ҳаётси таҳлика остида турадир... Бас, шу ҳолда бу найранг тўқилған бўлса, яна тўғриси, шу ҳийланни Султоналининг амнияти талаб қилған бўлса, сиз билан мен грайз қандай мантиққа суюна оламиз?

Шаҳодат муфти ўрнидан турди, Абдураҳмоннинг ёнига келиб, орқасини қоқди:

<sup>1</sup> *Маол*—мазмун, маъно.

<sup>2</sup> *Баъид*—узоқ.

—Раҳмат, ўғлим, раҳмат. Сени туққан онанғға ва ўқутган устозингта раҳмат.

Абдураҳмон ерга қараған ҳолда илжайди. Шаҳодат муфти унинг ақлиға таҳсин ўқуй-ўқуй, нос чакиб ўз жойига ўлтурди.

—Мулла Калоншоҳ-а, шу гап бизнинг ақлимизға асло келмабти-да?

Шаҳодат муфтининг хурсандлигига қўшулмай, тунд ўлтургучи Калоншоҳ, парвосиз қўлинни оловға иситди.

—Мен шу андишани ҳам қилған эдим,—деди бир оздан кейин Калоншоҳ,—лекин ақлим бовар қилмаған эди ва ҳозир ҳам бу фикрға қўшула олмайман.

—Сабаб?

—Боис шулки, Султонали Анварга суюқасд қилмағанда ҳам унга ҳеч гап йўқ эди. Аммо ул хонға қаробат<sup>1</sup> ҳосил қилиш учун азтаҳидил Анварнинг қасдиға тушканким, бунда шубҳа йўқ.

Ўзгалар тарафидан сўзланган фикр ёки баҳс ҳар қанча мантиқий бўлғанда ҳам Калоншоҳнинг қарши чиқиш феъли бор эди. Унинг бу феълига яхши тушуниб қолған Шаҳодат муфти бош чайқади.

—Биз янгишамиз.

Калоншоҳ яна юқоридағи сўзини тақрорлади:

—Бачи маъни янгишамиз? Мулла Абдураҳмоннинг ўзи ҳам ўйлаб кўрсин, башарти Султонали дўстлиқ юзасидан Анварни қочириб юборганда ҳам унга ҳеч бир зарар йўқ эди. Бас, Султоналиниң ҳамма ҳаракати тўғри, Анварга хиёнат қилиши мансаб умидида эканлиги шубҳасиз.

Орада ўз фикрига қарши шунча раддия ўтса ҳам, парвосиз, гўё муроқбада<sup>2</sup> ўлтургучи мулла Абдураҳмон яна илжайиб бош кўтарди.

—Султоналиниң Анвар билан ати-қатилиғи ўрдадан ҳар кимга маълум-ку, домла. Башарти ўз уйида турған Анварнинг хиёнати тўғрисида Султонали ўзини тағофулға солса, мардумнинг кўнглига нима гап келар эди, айниқса, жанобларингиз қандай андишага тушар эдингиз... Ожизнинг фикримча, ул найрангбозлар бир ўқ билан неча қушни урганлар, масалан, жанобга Султоналиниң са-

<sup>1</sup> Қаробат—яқинлик.

<sup>2</sup> Муроқбада—мушоҳада қилиш

доқати зоҳир бўлди, сармуншийлик вазифасига беозор ўлтуриб олди ва учунчидан, мардум кўзини бўяди.

—Баҳарҳол... баҳарҳол Анварга қарши чиқмагандага ҳам Султоналини на хон ва на биз айблай олар эдик.

—Хўш?

—Хўш-пўши йўқ,—деди қизишиб қолған Калоншоҳ,—биравнинг устига айб қўйиш учун, шаръян шоҳидлар лозим, даъвони исбот қилиш ғерак... Xах-хах-хах, сен фалончи гуноҳкор билан дўст эдинг, деб кишини айлаш. Масалан, ушбу даъвони қилғучи ўзингиз ҳам уларнинг маслаҳати устида бўлмағансиз; фақат шундаймикин, деган мулоҳазада сўзлайсиз, ҳолбуки, сизнинг сўзингизнинг шаръян тўрт пуллик қиймати йўқ, ука...

Калоншоҳ жуда қизишиб кетди, "шаръян сўзингизнинг тўрт пуллик қиймати йўқ, ука" таҳқири билан мулла Абдураҳмон ҳам бўзариб олди.

—Меним сўзим бир мулоҳаза, тақсир, мулоҳаза шаръян исботка буюрилмаған. Ҳоказо, ўзингиз айтканча, гёё маснад<sup>1</sup> учун жон отиб юрган Султоналининг зоҳир<sup>2</sup> ҳаракатига ҳам ишониб бўлмайдир.

—Шунинг каби, сизникуга ҳам вусуқ<sup>3</sup> йўқ.

—Мен айтаяпман-ку...

Жанжалнинг каттага кетишини фаҳмлаган Шаҳодат муфти Абдураҳмоннинг сўзини бўлиб, орага тушди:

—Баҳс нима ҳожат? Мулла Калоншоҳники ҳам тўғри, сизники ҳам ҳақиқат... Аммо ҳозирги масаламиз қайси фикр тўғрилиги устида эмас, қайси йўл билан Султоналини бу ўрундан олиб ташлаймиз борасида.

Кўб йиллардан бери бирга юриб, ўз руҳига тушуниб қолған Шаҳодат муфтининг бу сўзи билан Калоншоҳ озгина ёришиди.

—Ана бу бошқа масала,—деди,—мулла Абдураҳмоннинг фикрини тўғрими, эгрими, суриштирмай, унга фақат

<sup>1</sup> Маснад—мартаба.

<sup>2</sup> Зоҳир—ошкора, очиқ.

<sup>3</sup> Вусуқ—ишонч.

бир тадбир деб қарасангиз бу бошқа гап, аммо маҳзи ҳақиқат<sup>1</sup>, деб билиш бус-бутун хато.

Шаҳодат муфти бу масалани ёпиб, иккинчи тарафка ўтишка шошилди. Чунки Абдураҳмон яна бир илжайиб икки оғиз сўз айтса Калоншоҳнинг оғзини тикиш оғир ошар, Шаҳодат муфти буни яхши онглар эди.

—Халос, халос,—деди муфти,—менда воқиъ ҳологи фараҳ<sup>2</sup> ҳам фақат шунинг устида, йўқса, илми ғайбни<sup>3</sup> ким билибдир. Аммо мулла Абдураҳмон мулоҳазасининг қиймати шундаким, Султонали муаммосини тез ҳал қилса бўлур.

Муфтининг сифориши<sup>4</sup> сўзлаши билан Калоншоҳ жуда ҳам ўзига келиб қолди ва "ҳалли қандай" деб ёвошқина сўраб ҳам қўйди.

—Ҳалли осон, жуда осон,—деди муфти.—Биз мулла Абдураҳмоннинг мулоҳазаси айни билан жанобга бир ариза ёзамиз, халос.

Мулла Абдураҳмон намойишкор Калоншоҳка қараб, ўнг қўли билан манглайнини қашиди... Аммо Калоншоҳ қаноатланмагандек қилиб бош чайқади.

—Хон Султоналининг садоқатига қаноат ҳосил қилған, яна шу ҳолда бу аризага ишонадирми?

—Агар ҳақиқатни айтилса, хон ўзидан бошқа ҳеч кимга эътимод қилмайдир,—деди муфти,—хайр, Султоналига эътимод қўйған ҳам бўлсин, яна бу тақдирда ҳам биз аризани ёза берамиз. Нега? Агар ишонса, Султоналини ўрдадан ҳайдар, ишонмаса, яна бизга нима зарар; бу гап сизга қандай ўхшайди, мулла Абдураҳмон?

Абдураҳмон кўзини катта очиб, тўгри топқан каби бош иргатди.

—Аризамиз ўрунласа кўб яхши, билъакс, ўрдадан ўзимиз ҳайдалурмиз,—деди Калоншоҳ.

—Нима учун?—деб сўради муфти.

—Ахир аризани ким берганлиги маълум-ку.

<sup>1</sup> Маҳзи ҳақиқат—фақат тўғри гап.

<sup>2</sup> Менда воқиъ ҳологи фараҳ—мендаги ҳалиги хурсандлик.

<sup>3</sup> Илми ғайб—гойибни билиш, келажакда бўладиган воқеани олдиндан билиш.. Бу хусусият фақат Оллоҳга хосдир.

<sup>4</sup> Сифориши—меҳрибонлик, ҳурмат.

—Йүқ,—деди муфти.—Биз ариза остига имзо қўймаймиз, Калоншоҳ.

—Имзосиз ариза мұттамад<sup>1</sup> бўлмас.

—Мұттамад бўлсин-бўлмасин бизга нима зарар; баҳарнавъ шу эҳтимолни хоннинг қулогига еткарсак басда, Калоншоҳ.

—Кимнинг дастхати билан ёзасиз?

—Бу осон, сиз бунисидан хотиржамъ бўлинг, Калоншоҳ!

Калоншоҳ ноилож ариза ёзишқа рогиб<sup>2</sup> бўлди. Аризанинг шу мажлисда, мулла Абдураҳмон ҳузурида ёзилиши мувофиқ кўрилиб, муфти таҳрирга ўлтурди.

#### 54. ИККИ ХИЛ САДОҚАТ

Кечаси ёмгур савалағандек ёгиб турадир... Қопкоронги, олти қаричлиқ тор кўчанинг муюшида турган бир кўлага ёмгурдан қочқан каби, кичкина эшик панасиға сиқилган ва зўр бериб эшикни қоқадир.

—Ким?

—Мен, очинг.

—Сафармисан?

—Ха.

Эшик занжири "ширқ" этиб кўтарилди. Емгурда бўккан Сафар ўзини торғина, олди очиқ йўлакка олиб, эшикни занжирлади.

—Тинчликми?

—Тинчлик,—деди эшик очқан кампир.—Нега кеч қолдинг, Сафар?

—Ёмғурни кўрмайсизми...

Сафар кампирнинг орқасидан сўзланиб саҳнга чиқди. Тор саҳннинг йўлак қаторида, тўрт бўйра эни катталигига ости бир қаричқина срдан кўтарилиб ишланган каталак айвоннинг тўр тоқчасида қора чароғ сасиб ёнадир. Сандалнинг бир чеккасида гўза сугуриб ўлтургучи бир кекса кўр киши қўлидаги гўза пўчоқ ва сугурган пахтаси билан бошини баланд кўтариб ҳавлидаги сўзга қулоқ солиб турадир. Сандалнинг иккинчи тарафида, юзини рўймоли би-

Мұттамад—ишончи.

Рогиб—мойил.

лан яширган, хотинми, қизми—үлтурибди, сандалнинг учунчи томонида, бир тўда чиқарилган пахта орасида чигириқ кўринадир...

—Ойим қизим бизни жудаям уялтирди, Сафар,—деб сўзланди кампир.—Шунча қайтарсақ ҳам бўлмайди, эртакеч отасининг ёнида гўза сугуришади.

—Синглим зериккандир-да, опа,—деди Сафар.—Эсономон ўлтурибсизми, почча, ассалом алайкум.

Кўр киши бошини яна ҳам баландроқ кўтариб, икки тарафка чайқади.

—Ваалайкум салом... Ҳа, нега жим бўлиб кетдинг, Сафар? Мулланинг олдига кирақо, ёмғурда ивидингми, хўб.

Сафар танчадаги юзини яширгучига қарамаслиққа тиришиб, даромади айвондан бўлган ҳужра эшигига чиқди.

—Эски ҳикояларингизни сўзлаб, опами зериктирмай ўлтурибсизми, почча?

—Ҳа, ҳа,—деди кўр киши,—қизимнинг ўзиям ҳикояга жуда уста экан-да, дам мен ҳикоя айтаман, дам ойим қизим айтади, асти қўйсанг-чи бизни, Сафар.

—Бали, бали.

Сафар ҳужранинг эшигини очиб, ичкарига кирди. Сандал устига қора чароғ қўйиб, олдига китоб ёзган Анвар Сафар бўзчининг истиқболига қўзғалди.

—Ўлтуринг, ўлтуринг, шу ишингиз ёмон-да, мирзам... Саломатмисиз? Зерикмадингларми? Уч кун кечикдим-а. Мендан хафа бўлған чиқарсиз-ов... Ҳа деганда у ёқдан хабар бўлавермади, унинг устига аёллар навқасланиб<sup>1</sup> қолди...

—Зарари йўқ, тоза ивибсиз, Сафар ака. Асли бу кун ҳам чакки овора бўлғансиз.

—Жаззаси чопонни солиб ташлаш-да, мирзам,—деди Сафар чопонини ешиб.—Қани ўлтуринг... Юртда тинчлик, ёр-дўстдан сизга салом, мирза оғайнингиз хотиржамъ миризабошлиқни қиласяпти... Мен бўлсам, сенгаям бали, устозингтаям бали, деб юрибпан.

Анвар илжайди. Сафар бўзчи сандал ёнига ўлтуриб, маҳсисининг қўнжидан бир қофоз олди. Анвар қофозни ундан олиб сандал устига қўйди. Қозиқда осилған чопонини келтириб, Сафарнинг яхтакчан елкасига ёпти.

<sup>1</sup> Навқасланиш—ҳолсизланиш, дармонсизланиш, касалга чалиниш.

—Шамоллайсиз, Сафар ака, ўраниб ўлтуриң.

—Ҳамма вақт кайиб қогансиз-да, мирзам,—деди Сафар ва устига ёпилған беқасам чопонининг астар-аврасини текшириди.—Тоза яхтак киймаган эдим, бунингиз менга увалда, ука.

Анвар ўлтурап экан, эътиборсиз қўл силкди ва сандал устидан хатни олиб очди:

“Баланд маҳом, лойиқи эҳтиром, буродари ч мирзо Анвар. Дўйстлар шод, душманлар ғамгин, явми саодат<sup>1</sup> яқиндир. Фалак қажравлиги аҳли салоҳ<sup>2</sup> устига ҳар рӯз ҳар ранг<sup>3</sup> жавр түгдирса ҳам, ба ҳамаҳол<sup>4</sup> лайли залиманинг<sup>5</sup> явми навираси<sup>6</sup>, риёзати қавиянинг<sup>7</sup>, ажри азимаси<sup>8</sup> бордир. Жаноби сарвари коинот<sup>9</sup>, мушриклар<sup>10</sup> шарридин<sup>11</sup> сақланмоқ учун ўзларини ғор паноҳига олған эрдилар-ким<sup>12</sup>, бу амсолингиз<sup>13</sup> каби уммати ҳақиқийларға<sup>14</sup> суннат бўлди. Баъда, камина дўсти хосдин<sup>15</sup> арзи ихлос<sup>16</sup> шудирким, барча тадбирларимиз шоҳи мажнунга<sup>17</sup> ва ғайри ашқиёға<sup>18</sup> баайни афсун каби таъсир қилиб, ўткан хатда ёзған мулоҳазаларим хаёлдин ҳақиқатка ошмоқда. Камина га хоннинг эътиномоди ёндошмоқда ва ул андишаларимиз эҳтимоли биздин узоқлашмоқдадир. Можаро бир

<sup>1</sup> Явми саодат—саодатли кунлар.

<sup>2</sup> Аҳли салоҳ—тўғри кишилар.

<sup>3</sup> Ранг—турли.

<sup>4</sup> Ба ҳамаҳол—ҳамиша.

<sup>5</sup> Лайли залима—қора тун.

<sup>6</sup> Явми навира—нурли кун.

<sup>7</sup> Риёзати қавия—кatta машаққат.

<sup>8</sup> Ажри азима—улуг мукофот.

<sup>9</sup> Жаноби сарвари коинот—пайгамбар.

<sup>10</sup> Мушрик—Оллоҳга ишонмовчи, будпараст.

<sup>11</sup> Шарр—ёмонлик, гуноҳ иш.

<sup>12</sup> Муҳаммад пайгамбар исломни ошкора тарғиб этаёған даврида Макка мушрикларининг таъқибидан Мадина шаҳрига қочиб, Абу Бакр ва бошқа саҳобалар билан бирга йўлда горга яшириниб жон сақлайдилар Султонали шунга мисол қиляпти.

<sup>13</sup> Амсол—мисол.

<sup>14</sup> Уммати ҳақиқий—пайгамбар йўлидан боргнлар.

<sup>15</sup> Дўсти хос—яқин дўст.

<sup>16</sup> Арзи ихлос—самимий арз.

<sup>17</sup> Шоҳи мажнун—ошиқ хон.

<sup>18</sup> Ғайри ашқиёғ—ўзга золимлар.

нечакун сир бўлиб кечса ҳам, алҳол ўрдадин баъзилар бу сирга воқиға бўлғанга ўхшайдирлар, маъаҳозо<sup>1</sup> очиқ сўзлашка ҳеч кимда ҳад ийк. Аммо, иккинчи тарафдин, сизни излашка маҳфий буйруқлар берилди, дарбоза беклари ёнига хуфиялар юборилди, бинобарин, сиздин илтимос, ушбу хавфлар кўтарилгунча бениҳоят эҳтиётда бўлиш, Тошканд ниятини бир неча ҳафтага мавқуф<sup>2</sup> қўйишадир. Хизматингизга Сафарбой билан ушбу хатни озғина кечиктириб юборишим боиси ҳам, мазкур хавфлар борлиғидин бўлиб, маълумингиздир, Сафарбойнинг табиъатидан андак бебоклик<sup>3</sup> ва лоқайдлик бор. Бинобарин, мухобароти дигаримизни<sup>4</sup> унинг аёли воситасида қилсамми, деган андишадаман. Зоро, аёл киши, ба ҳарҳол, мардум назарига яхши ва кундуз кунлари борса ҳам хавфсиз. Аммо бошқа эҳтиёт ўзингизга мунҳасир<sup>5</sup>. Зинҳор ба сади<sup>6</sup> зинҳор, ҳамсоялардин хотиржамъ бўлинмасин. Соний—сизга тегишилик ғарива<sup>7</sup> хабар шудирким, кеча ўрдадин қайтиб келсан, меҳмонхона саҳнида уч нафар йигит ўлтурибидир. Ҳар учави ҳам бизнинг Фарғона кийимида бўлмаған бу йигитларни ариза ёздиргали келганми, деб ўйладим. Салом-аликдин сўнг уларни меҳмонхонага олиб кирдим. Истифҳоми<sup>8</sup> сабаби ташрифдин сўнг, йигитлардин бири меним ким эканлигимни аниқлаб олди, баъда, афсус чекиб, сизнинг можаронгизни сўзлади. Мен тамом ҳайратда қолиб, хуфияларми, деган андишага тушдим. Бу ҳодисани кимдин эшилдингиз, мирзо Анварга қандай алоқангиз бор, деб сўрадим. Опамдин эшилдим, ўзим мирзо Анварнинг оғаси бўламан, деган жавобни берди. Мен таажжубда қолдим; зоро, оғангиз борлиғини сиздин эшилмаган эдим. Ўткан хатимда ёзғанимча, бу йигитка ҳам опангизга берган жавобни айтдим, яъни, ўзимни оқлаш учун ҳодисага бирмунча ёлғон аралаштириб

1 *Маъаҳозо*—шу билан бирга.

2 *Мавқуф*—тўхтатиш.

3 *Бебоклик*—1. Ҳайиқмаслик; 2. Мулоқазасизлик.

4 *Мухобароти дигар*—бундан кейинги ёзишма, аълоқа.

5 *Мунҳасир*—боглиқ.

6 *Сад*—юз.

7 *Ғарива*—ажаб, таажжубли.

8 *Истифҳом*—сўраб билиш.

сүзладым. Йигит-оғанғиз бўлмиш афсус чекти, ўн ишлардин бери Қўқонда бўлмаганилигини, бухоролиқ бир саркарда эшигига хизмат қўлғанилигини, қариндошларини кўриш учун Бухородан Самарқандга келиб, у ердаги катта оғасини тополмаганини, ундан Қўқонға ўтиб, бунда ҳам сизга йўлиқолмай қолғанини сўзлади. Баъдаз унинг устидаги шубҳам бир оз зойил<sup>1</sup> бўлиб, кўнгил кўтардим. Оғанғиз бўлмишининг ёнидағи йигитлар бизнинг бу тарафнинг кишиисига ўхшамайдирлар. Булар оғанғиз бўлмишининг ҳамроҳлари, Қўқонни томоша қилғали келган эмишлар. Сизга оғалиқ даъво қилгучининг исми Қобилбой, туси сизга ўхшаб келса ҳам, ўзи тўла, паҳлавон йигит ва ҳар учави ҳам забардаст кўриндилар. Ҳарчанд қистасам ҳам, уларни овқатқа тўхтатиб бўлмади. Сиз кечаги мактубингизда меним сармунший тайинланишимдан ташвишланиб, орада муфтилар, Абдураҳмонлар бор, сизга бирар заҳмат етарми, деган андишани ёзивбиз. Воқиътан, меним учун бу ҳафф бор, бундан кўз юмиб бўлмас. Модомики, "садоқатим он ҳазратка офтобдин равшанроқ бўлди, девонда мендин ғайри мавсүкроқ<sup>2</sup> киши топилмади, баъдаз сармуншийлик менга ҳавола қилинди, ҳалос". Ўткан ҳатимда ёзғанимдек, бу "марҳамат"дан бош тортишқа ҳеч бир йўл топмадим, агар узр баён қилсан, сизни тутиб беришкага бўлған ҳаракатимнинг соҳиталиги очилиши эҳтимоли бор эди. Чунки хонға садоқат бизнинг "одамлар" фикрича, бирар манфаат тақозосидир. Агар мен хонға "садоқатлик қўл" эканман, бу "садоқат" замирида бир манфаатим бўлмоғи лозимдирким, ул ҳам ўз дўстимни ҳологи "садоқатимға" қурбон қилиб, эвазига сармуншийлик маснадини олишимдир. Башарти шу маснаддин бош тортсам, менга ишончсизлик тугулиши шубҳасиз эди. Бас, шу мажбуриятда мен бу вазифани қабул қилдим. Менга заҳмат етиши тўғрисида сиз ташвиш чека кўрмангиз, модомики, тақдирим шу экан, тағийри<sup>3</sup> мумкин эмасдир. Бу йўлда қанчалиқ заҳмат чекмайин ва ҳатто бошим ҳам кетмасин, меним учун қийматлироғи инсонга садоқат ва шу садоқатни то

<sup>1</sup> Зойил—йўқолмоқ, аримоқ.

<sup>2</sup> Мавсүқ—ишончли.

<sup>3</sup> Тағийр—ўзгартиш.

ўлгунча қўлдин бермасликдир. Синглимиз Раънобибига салом айтурсиз. Ота-оналарига ҳеч бир зарар бўлмади, фақат "ҳадя" ларнингина қайтариб олдилар. Охирги сўзим яна эҳтиётлик устида: зинҳор-зинҳор ҳар эҳтимолга қарши ҳозир турилсин.

Аддои мирзо Султонали".

Анвар мактубни тутатиб, олдида ёниб турған қора ча-роққа тутиб, куйдирди.

—Эҳтиёт керак-а, Сафар ака?

—Албатта, мирзам, албатта.

—Бу кеч қоласизми, кетасизми?

—Кетмасам бўлмайди, Султоналингиз хафа қилади, ука.

Анвар кулди.

—Кетсангиз, хат ёзиб туришим керак экан,—деди ва тоқчадан сиёҳ-қалам олди.—Исидингизми, Сафар ака?

—Ҳа, ҳа... Жон кириб қолди, мирзам.

\* \* \*

... Биз ўткан 51-инчи фаслда Анвар билан Раъонни Султоналинг дарбозасида қўйиб, 52-инчи-фаслга сакраган эдик. Шунда чала қолған бир неча аҳволни ҳозир айтиб кечмасак, муҳтарам ўқуғучига Султонали масаласи бир оз онглашилмай қоладирган кўринди. Шундогки, Анварнинг мажбурият остида Раъно билан келиши Султоналини жуда ҳам шошириб қўйди. Икки орада кучлик муҳаббат борлигига яна бир карра амалда қаноат ҳосил қилганидек, уларнинг истиқболини қоронгилиқда кўрди. Яна шу ҳолда матонатини йўқотмай, "дўстинг учун қон ют" мақолидаги каби, уларни қаҳрамонлиқда табрик этди. Анвар эса фақат ўз истиқболи устидагина қайгириб қолмай—чунки Раъно ва ўзининг истиқболлари мундан кейин ё чик, ё пук эди—аммо икки ўргада бу ботқоққа тойиб кетиши аниқ бўлған Султонали масаласида жиддийроқ ўйлади. Зоро, мулла Абдураҳмонга илҳом бўлганидек, Анвар тинчкина Раъонни ёнига олиб қочса албатта Султонали ушланар эди. Мулла Абдураҳмоннинг фикрларидан ташқари, Султоналинг ўз хотини Рузвониби орқалиқ маҳдумнинг уйи билан қилинган китоб алоқаси ҳам бор, энг охирда муфти ва Абдураҳмонларнинг Султоналига кучлик адоватлари... Шу мулоҳазаларини Султоналига баён қилиб,

фикр сүрағанида, ундан ақамиятсиз жавоб олди. Чунки дүстлиқ тақозоси ҳар қандай оғирлиқ қаршиисида матонат, күкрап керишдир, бошингға төг йиқилиш әхтимоли бұлғанда ҳам турған жойинғдан силжимасликдир — Султонали шу эски қонун тобиъларидан ягона вакил зди. Лекин Анвар ўз дүстини балоға қўйишни хоҳламади. Ҳар әхтимолга қарши чора кўришни лозим топиб, ўқугучига маълум йўлларни, Султоналига таклиф қилди. Табиъий, ул кўнди. Шу йўсун эртага ўйналатурған томошаға Султоналининг хотини ҳам ўргатилди, ҳатто ярим кечада қўшни Каримбой ҳам уйқудан уйғотилиб, бир тилло барабарига ёлғон гувоҳ тикланди ва шу ондан бошлаб Анвар билан Раъно Каримбойнинг уйига чиқиб яшириндилар.

Маълумдирким, эртаси кун ҳар ким ўз рўлини яхши адо қилиб, иш жуда сиљлиқ ўтди, ҳатто бу ўргада Солиҳ махдум ҳам оқланиб қолди. Султонали шу кун кечқурун Тойир акани Сафар бўзчига юборди. Чунки бу ишда сирдон бўлиш ва Султоналига кўмаклашиш учун энг мувофиқ, ҳам ишончлик киши бирдан-бир Сафар бўзчи зди. Хуфтан асносида Сафар бўзчи етиб келди, воқиъани эшитиб, дафъатан мирзони яшириш учун шаҳарнинг четроғида бўлған язасининг уйини жўплади. Дарҳол язаси, яъни опасининг уйига югуриб жой ҳозирлатди ва шу кечасидаёқ Анвар билан Раъонони элтиб жойлаштириджиким, қолгани ўқуғимизга маълумдир. Аммо Анварнинг ҳийласи хон ва яқинлариға шундай яхши таъсир қилдиким, биз буни Султоналининг сармунший белгиланишидан онглаймиз.

\* \* \*

"Қир-қир" хат ёзиб борған Анвар, савоғич қалам учини сочиға суйкаб, қаламга ёпишқан лос қилчигини тушурап экан, Сафар бўзчига юз ўғирди:

—Мундан сўнгги келишингизда мирзо Султонали ёнингизга бир киши қўшса керак. Сиз шу йигитни бу ерга олиб келасиз, ўзи меним оғам бўладир, хўбми?

—Хўб, мирзам, хўб. Мирза оғайнингизга шуни таъйинлаб битсангиз бўлди-да.

—Шундай, мен битяпман.

Анвар яна ёзувға қаради, Сафар бўзчи сандал кўрпасига ўраниброқ ўлтурдиди. Ташқарида ёмғур тинаёзиб, кучлик шамол қўзгалған, ёмғур томчиларни тоғо том устига тўпиллатиб қаттиғ тушурап, дарича тирқишидан кир-

ган шамол билан қора чароғ чайқалиб-чайқалиб ёнар, айвондаги кампирнинг чигиригидан гижиллаб чиққан товуш мушук бола мавлаган каби ҳужрага эшитилиб турар эди.

## 55. БАРИМТА

Кун чошкоҳдан ошиб, Чорсуда ҳалқ олағовири бошланса ҳам, шундаги бўш дўконларнинг бирида уч нафар йигит ҳануз донг қотиб ухлар эди. Чорсуда бўлиб турган тарстўполон гўё бу уч йигитни аллалар эди. Бошига биттадан шапарак кир ёстиқ қўйиб, остига яланқават тақир кўрпача ёзган ва устига гуппи чопонини ёпиб, яна шу ҳолда баҳузур хуррак отиб ухлаган бу уч йигит мусофирга ўхшар эдилар. Улар шу йўсун роҳат қилиб ётқанда, тахтабандлик дўкон ёнига ташқаридан бирав келиб тўхтади ва ҳамма товшини қўйиб, бақириб юборди: "Тўхта, ҳовв Наврўзқул!"

Ухлагучиларнинг иккиси пинагини бузмади, аммо дўконнинг тўрида ётқан чувак бир йигит сўчиб, бошини кўтарди, уйқулиқ кўз билан атрофига қарагандан кейин, ҳамёза тортди, керишди, сўнгра энг четда ётғучига кўзи тушиб, ёнидаги йигитни туртди:

—Тўр, Шариф, тур, пешин бўлубту.

Иккинчи йигит кўзини очди:

—Эй, қўйсанг-чи, Раҳем.

—Тур-да, ахи, ана Қобелбой ҳам кеб тўхтабту.

Шарифбой ёстиқдан бурилиб, ёнидаги учунчи йигитка қаради:

—Палаънат, қачон келган экан?

—Ким билсин... Инисини бо учратдимикин? Кани, уйғот-чи, палаънатини.

Шарифбой ётқан жойидан қўлинни узатиб, Қобилбойнинг муртидан тортди, Қобилбой ғиншиб уйғонди:

—Тек ёт, Шариф.

—Инингга йўлиқдинг-чи?

—Йўлиқдум, икавингта салом айтди,—деди Қобилбой ва юзини улардан четка ўгуриб олди.—Бир оз тинч қўй, ухлайман.

—Эби, эби,—деди Раҳим,—буродаринг аҳволини гапурда, ахи. Бар падари уйқуки, пешинга чикин<sup>1</sup> бўлса; кўчага бўлиб ёткан тўпалангни гўшингта иласанми?

<sup>1</sup> Чикин—...гача.

—Кеч келдим, кўб жоврама-чи, Раҳим.

—Қорунни тўйгузиб, сўғун ухла акун<sup>1</sup>, қорунлар ҳам пиёз бўлиб тўхтабту, ионуштани қаерга қиламиш, Шариф?

—Чойхонага қиламиш.

—Кани, сен ҳам кафанингни ёпиниб шунда чикин ётма, палаънатинг бо ухлаб кетдими?

Иккиси туриб кийина бошладилар. Раҳим узун бел-богини тўғрилар экан, бир қанча чақа ва тангалари ерга сочилиб тушти.

—Ўҳӯ, ўҳӯ, сабил,—деди Раҳим пулларни териб.—Худо буларни ҳам кўб кўрди чоги, акун, Қўқонинг бизга тўғри келмади, иш топилмайде, пул сочиладе, оч қоламиш чоги, Шариф?

—Қобелбойнинг Қўқонжонига лаънат,—деди Шариф,—лоақал темирчи ҳам шогирд олмайди, бизга бирон иш топиб бермаса, тўппа-тўғри нар хар Қобелнинг устига минамиш.

Буларнинг вақирлашига уйқуси ўчиб кеткан Қобил, тўнгур-тўнгур бир нарсаларни сўзлаб, ёстиқдан бошини кўтарди.

—Чумчуқдек чирқиллашдинглар-да, тожиклар,—деди Қобил.—Ишсиз қолган бўлсаларинг, Тошкандга кетамиш.

—Ана-ана, яна топди гавни,—деди Раҳим.—Валдир-валдир қиласан, Қобелбой акун, Тошканд бориш учун пул кани?

—Пул топилади.

—Пул топилади?—деб кулди Раҳим,—бу бепадар бойбаччангизни қара, Шарифбой.

—Пул топилади,—деди яна Қобелбой ва яхтагининг чўнтағига қўл солдай.—Паст одамларсан-да: биринг темирчиниг ўғли, иккинчинг шустагарнинг<sup>2</sup> боласи...

—Вой-вой,—деди Раҳим,—назари баланд бўёқчининг ўғлидан хафа бўллем!

Қобилбой чўнтағидан бир нарса олиб, уларнинг оёғи остига ташлади ва ўзи оғзини катта очиб, ҳамёза тортди.

—Ана пул, керак бўлса ол, сендеқ ифлосларни бир йил боқади.

Раҳим билан Шарифбойнинг оёқлари остига икки тил-

<sup>1</sup> Акун (акнун)—энди.

<sup>2</sup> Шустагар—мато оқорловчи.

ло келиб тушти, улар бир олтинларға ва бир Қобилбойға қараб қолдилар.

—Эби, кимни ўлдуурдинг?

—Ота қасбим одам ўлдириш эмас.

—Иниси берган,—деди Шариф.—Кани, ининг билан кўришдингми, Қобел?

—Кўришдим.

—Одами нагз бўлған?

—Одами нагз.

—Акун шу қочиб ёта берайкан-да,—деди Раҳим.—Бирон чора боқсин-да, айтмадинг-чи, ахи?

—Айтдим... Пайт топиб ҳаммамиз Тошканд кетмакчи бўлдиқ.

—Бале-бале!—деди Раҳим ва Шарифка қараб қош қоқти.—Тошканд кетамиз дегани тексиз<sup>1</sup> эмас экан-да, палаънатнингни. Ҳай, иш битти, Қобелбой, Тошкандга юрамиз, ўруsingни ҳам бир кўрайлик.<sup>2</sup>

Шариф ерда ётқан икки тиллони олиб Қобилга узатти:

—Ма, тиллонгни киссангта тиқ, Қобел.

Қобил олмади.

—Тилло ўзларингта, икавинг бир тиллодан бўлиб ол.

—Аччигингни қўй, ахи, биз сенга даҳанаки айтдик-да. Қобил кулди ва парвосиз кийина берди.

—Олмайсанми, палаънат?

—Ўзларингта деяппан-ку, иним сенларга атаб берди.

—Биздан қарзи йўқ-ку, ахи?

—Тушунмаган одамларсан-да,—деди Қобил.—Иним қочиб ётқан ҳолда уларни меҳмон қиломладим, деб сенларга шу икки тиллони бериб юборди... Энди тушундингми?

—Вой, палаънат... Ҳали сан бизни ўз пулимиз билан бетимизга урдинг?

Қобил кулди. Улар иккиси бирининг оғзидан бири олиб, Қобилни паст уриб, Анварни мақтаб кетдилар.

—Сан отанг ўғли эмассан, агар отанг ўғли бўлсанг, мирзо Анвардек меҳмондўст бўлайдинг. Мирзо Анвар меҳмоннинг бетини кўрмай, бошидан тилло нисор<sup>3</sup>

<sup>1</sup> Тексиз—бекор.

<sup>2</sup> Шу вақтларда Тошканд ўрус қўлида эканлиги унутилмасин (муал.).

<sup>3</sup> Нисор—социш.

құлғанда, сан палаңнат бизни туконхонага қамаб құясан.  
Буродаринг бүлмаса, Құқонжонингни күтариб оғзингінгі  
урайдик, мурунингдин мағзи саринг оқиб тушайды!

Қобил бир нарса деб тұнғиллади.

—Э, тұнғиллама, палаңнат. Биз пул ошноси эмас, одам  
ошноси... Сени бозори подшога олиб чиқса, оғзига тиши  
бор деб саккыз пулға ҳам олмайды, ба худо!

Улар шу ҳангаманинг устида әдиларким, Чорсудаги  
шовқин-сурон ичидан баҳайбат бир ҳайқириқ әшитилди:  
бозор ола-ғовири бирдан кесилиб, бу учави ҳам ташқарига  
қулоқ солиб қолдилар:

Эй-й-й-й-й-й...

—Бозор аро йигишлишиб гул терғанлар!  
Қасам ёдлаб, подшога сұз берғанлар!  
Мирзо Анвар отлиғ злға маълум киши,  
Үрда ичра қаламқашлик эрди иши.  
Арзимаган гуноҳига қочди, кетди.  
Бундин андак подшога озор етди.  
Унинг дүсті Султонали номлиг мирзо,  
Бу қочищдан чекмакдадир беҳад изо.  
Мирзо Анвар гуноҳига тойилди зор,  
Халойиқни тұхтатишдан мақсадим бор.  
Әрта пешин асносида Султонали,  
Орсиз Анвар гуноҳига ўлгай, бали.  
Жамиятда қозир бұлса осий Анвар,  
Ёки унинг дүсті ошносидин бирап.  
Гуноҳинде Султонали ұлар, десин,  
Әрта пешин вақти, афсус, сұлар десин.  
Имонлик қул нағси учун дүстин сотмас.  
Гуноҳи йұқ ошносини ұтка отмас.  
Қулоқ солған гуноҳсизнинг фарәдига,  
Дард қолмагай, етар ҳар вақт муродига!

Жарчи тұхтади, шовқин-сурон яна эскича давом этди.  
Жарнинг давомида қулоги тиккайиб, күзи катта очилған  
Қобилбой сұкутка кетди...

—Нега хомуш тұхтадинг, Қобел? Акун жарчинг нима  
деб вақырлайды?

Қобил жавобсиз бошини чайқади.

—Гапур,—деди Шариф.—мирзо Анвар, осий Анвар, де-  
япти өғи?

Қобил яна жавоб бермади.

—Забонинг бор, ахи, буродарингни тутканлар-чи?

—Йұқ.

—Бўлмаса нега ундаи чикин хомуш тўхтадинг?

—Энди тутмакчилар...

—Энди тутмакчилар?—деб заҳарханда қилди Раҳим.—

Дарди харинани тутади.

—Тушунмай ётибсанлар, анови кун биз бир мирзонинг уйига борған эдик-а.

—Ҳай.

—Ана шуни, сен Анварнинг дўсти эдинг, деб баримта<sup>1</sup> ушлаганлар... Эртагача Анвар келмаса, шу Султоналини ўлдурап эмишлар...

Жар маъносига энди тушунган йигитларнинг юзида бирдан ўзгариш кўрилди, кўзларида газаб, нафрат ўти ёнди:

—Бу хон йўқ<sup>2</sup>, бу даюс!—деди Раҳим.—Акун санинг лабингта кесакни ман суртай, ўрготим Шарифни ўлдир? Бу хон йўқ, бу даюс. Азбаройи худо, даюс!

Қобил лабини тишлаб, секинроқ ишоратини қилди. Чунки хуйланиб кеткан Раҳим бутун дўконхонани бошига кийиб бақира бошлади.

—Бу хон йўқ, бу даюс! Вой дар даҳанат хонаша!..

—Секин-секин!—деди қўрқувлиқ Қобил ва ўрнидан туриб кетди,—бир фойдаси борми, жинни!

—Вой дар даҳанат хонаша!..

Қобил югуриб бориб, дўконхона эшигидан кўчага қарди.

—Қўй акун, даюсинг мени ҳам бўғиз қилсин... Вой дар даҳанат...

Раҳимнинг эскидан шунинг сингари асабий оғриги бор эди. Шариф билан Қобил унинг фсълига яхши тушунар, ул бирар ҳақсизликка дуч келса, гарчи масаланинг ўзига тааллуқи бўлмагандা ҳам шунинг сингари жинни бўлиб олар эди. Раҳим уч-тўрт дақиқа сўкуниб, титраб дўконхонани бошига кўтаргандан кейин тинчиди, Қобил дўконхона эшигини ёпиб, ўртоқлари ёнига келди. Учави бир неча вақт хомуш ўлтурдилар.

—Шу бевафо дунёга бир иш қиласиз, Қобелбой,—деди яна кўзи олаланған Раҳим.—Даюсингни зиндони қаерга?

—Зиндонини нима қиласан?

<sup>1</sup> Баримта—гаров.

<sup>2</sup> Бу хон эмас... (муал.).

—Ана ман бор, ана Шариф, ана сан,—деди Раҳим.—Шу тунга учавимиз бориб ё ўламиз, ё шу бечорангни рўшноликқа оламиз.

Қобил манглай остидан Шарифка кўз юборди. Шариф кулимсиб, Раҳимга қаради..

—Э, сенга чи бало шуд?<sup>1</sup>

—Ҳеч чи,—деди Раҳим.—Акун биз дунёга нима олиб борамез, ҳай ўллук; дунёга ўн тилло пулимиз қолайдими, ё уйга сочини тараб тўхтаған хотунимиз қолайдими?

—Йўқ, қолайтикони йўқ,—деди кулиб Шариф.

—Дасташа гир,—деди Раҳим. Шариф билан Қобилға икки қўлинин чўзиб, улар иккиси ҳам илжайған кўйи қўлларини бердилар.—Лафзатон якми?

—Як-яқ, Раҳим дав.

—Ҳазилаш нест?

—Нест.

—Тамом,—деди икки қўлинин бўшатиб Раҳим.—Шуд.

Бу аҳдлашишдан сўнг учави ҳам хомуш қолдилар. Ташқарида шовқин-сурон давом этар, узоғроқ жойдан қаландарлар талқини эшитилар ва дўкон ёнидағи бир каллапаз зўр бериб ёғлиқ хасипини маҳтар эди. Полос устидаги чўпларни ўйнаб ўлтурган Қобилбой узоқ сукутдан бош кўтарди.

—Меним бир неча ерларга боришим керак экан.

—Қаёнга?

—Кеча мени олиб кеткан бўзчининг уйига, ундан кеийин инимнинг олдига.

—Нима учун?

—Балки Султоналининг қамалиши ёлғондир, агар чин бўлса, иним билан албатта кенгashiш керак. Ўрунсиз кучаниб қолмайлиқ-да.

Шариф Қобилнинг сўзини маъқуллаб, бош иргатди.

—Ҳай, кет,—деди Раҳим.—Биз шу ерга бўламиз, ханжарларни чархка тоблаймиз. Кўб тўхтама, палаънат.

Шариф ва Қобил унинг жиддиятидан кулимсишдилар. Қобил дўкондан чиқди.

<sup>1</sup> Э, сенга нима бало бўлди?

## 56. ХАЙР ЭНДИ, РАЬНО!

Хотин-қизлар жинсидан иродаси кучлик, ҳатто эрлардан ҳам жассурроқ шахсларни кўб учратамиз. Шунинг билан бирга, уларни нақадар кучлик иродага молик бўлмасинлар, яна ҳиссиётларига мағлуб кўрамиз. Масалан: ҳикоямиз қаҳрамони Раънонинг жасорати, хонга қарши исёни, ҳатто маъюс қолған Анварни йўлга солиши—ўз замонаси учунгина эмас, бизнинг ҳозирги асримиз учун ҳам лойиқи таҳсин ва Раъно ёшлиқ қизларимизга ибратдир. Лекин иродаси кучлик шу Раъно ҳозир яна ҳиссиёти қўлида мағлуб эди.

Бу кечада Анвар оғаси билаи кенгashiб, шу кунлар миёнасида Тошканд кетишни ўзига жазм қилди. Раънога ҳам Кўқон билан видоълашиш оғир сезилмади. Аммо, масала қатъий ҳал қилингач, Раънода бир тарафдан қўрқунч, иккинчи тарафдан қизиқ яна бир жасорат туғулди; кампир билан биргалашиб ота маҳалласига борар эмиш; ўзи биравнинг йўллагида туриб, кампир орқали онасини айтдириб чиқар эмиш.

Туни билан шуни ўйлаб чиққан Раъно, эрталабдан бери Анварни хафа қилар, ўз сўзида исорат этар эди. Кичкина ҳужранинг сандалида қаршима-қарши ўлтурғучи Анвар ва Раъно бир-бирисидан ўпкалик қиёфатда эдилар.

—Ҳиссиётка қаттиғ берилибсан, Раъно... Ҳар қадамингда сени бир фалокат кутадир, менга қолса аямга ҳам ишониб бўлмас.

—Паранжи ичида борған Раънони таниш учун ҳеч кимда каромат йўқ; аямга нега ишониб бўлмасин?

—Сен қочқан, аянгнинг обрўсини тўккан қиссан...

—Ҳеч, ҳеч... Аямнинг кўнглини мен яхши биламан, аям сиз ўйлаган хотинлардан эмас, ҳеч.

—Яхши, йўлда ҳам сени ҳеч ким танимасин, кампир ҳам аянгни алдаб олиб чиқсин, аянгнинг ўзига ҳам ишонайлиқ; яна ҳар ҳолда меним учун шу қасдингдан кечсанг нима бўлади, Раъно? Биз Тошкандга бориб еткан куни мизоқ, соғлиғимизни ва узримизни айтиб, хат ёзармиз-ку, жоним.

Раъно жавоб бериш ўрнига бирдан йиглади, анча вақт кўз ёшисини юзи орқалиқ тўкиб турди.

—Балки мен... аям билан абадий кўришмасман.

—Ҳай Раъно, Раъно,—деди Анвар. —Худоёр юз йил яшайди, биз Тошкандда ўламиз, деб ўйлайсанми? Хайр,

күб бўлса Худоёр яна беш йил яшасин, ваҳоланки, унинг зулми шу йўсун давом этканда, биз чамалаған бу фурсат ҳам кўб; зеро, зулм некадар кучайса, унинг умри шунча қисқа бўлиши тажрибалар билан событдир. Агар шунгача ҳам сабринг етмаса, бошқа чораси топилар, Раъно, масалан, аянгни Тошкандга чақирамиз ёки гапни бир оз эскиткандан сўнг Қўқонга ўзимиз келсак ҳам бўлади.

Раъно жавобсиз яна кўз ёшишини тўка берди, бу ҳолдан сиқилған Анвар, Раънога бир оз қараб турди:

—Хўб, йиглама. Ҳали бир-икки кунсиз йўлға чиқолмасмиз, бу кун кечаси акам келса, эрта бозорға чиқиб йўл ҳозирлигини кўрса, ҳар ҳолда бириси кун кечқурун жўнашимиз ҳам аниқ эмас. Бинобарин сен ошиқмасанг ҳам бўлади. Ундан сўнг, сенинг ўйлаған йўлинг жуда қалтис, бу тўғрида бошқачароқ тадбир топармиз...

Раъно индамади, бир энтикиб ором ҳавосини ютди ва рўймоли билан кўз ёшишини қурилди. Анвар ўпкалик илжайиб Раънони янди. Улар шу ҳолда экан, ҳужра девори кўча тарафдан уч-тўрт қайта гурс-гурс урилди. Иккисининг ҳам қулоқлари тиккайиб бир-бираисига савол назари юбордилар...

—Бегона киши эмас,—деди бир оздан кейин Анвар.—Мен Сафар aka билан кундузи учун девор уришни шарт қилған эдим... Сен чиқиб кампирга айт, эшикни очсин.

Раъно ҳужрадан чиқди. Бирар дақиқадан кейин ҳавли саҳнига бир неча оёқлар кирди. Бемаҳал йўқлашдан Анварнинг кўнгли ғаш тортиб, келгучини Сафар aka бўлар деб ўйлади. Ҳужра эшиги очилиб, ичкарига бири орқасидан бири—Қобилбой билан Сафарбой кирдилар. Анвар яна онглашилмовчилик ичида қолди, Сафар аканинг тинчсиз—ҳаяжонли кўзи Анварнинг илгаридан кўриб қўйған бир неча эҳтимолларини хотирлатиб, уларга жой кўрсатди.

—Вақтсиз йўқлашларингиз сабабсиз бўлмас,—деди товшини секинроқ чиқариб Анвар.—Биздан хабар топқанларми?

Сафар ҳамроҳига қараб, икки қўлинни қовуштириб енглари ичига олди.

—Йўқ...

—Султоналини қамағанларми?—деб яна сўради Анвар.—Қамағанлардир?

Сафар ва Қобил бир-бирларига қарашилар.

—Шундай, миrzам, шундай... Бизлар жуда ҳайрон бўлиб қолдиқ-да.

Анварда қонсизланиш ва кипрак осталарида ҳаракат күрүлди.

—Зарари йүқ, қутқарамиз... Қачон қамағанлар?

—Кеча кечкүрун... Боя бизнинг уйга Султоалининг хотини келган эди, мен шундан эшилдим. Унинг устига акангиз бориб қолди...

—Сиз кимдан эшилдингиз, ака?

Жарчы хабарини ва бу түғрида ўртоқлари билан берган қарорини Қобилбой сүзлади. Анвар оғасининг сўзини жиддий эшитиб, бир неча вақт ўйлаб ўлтурди.

—Сиз ва ўртоқларингизнинг ҳамиятларингизга раҳмат... Лекин бу йўл билан Султоалини қутқариш қийинроқ, балки мумкин ҳам бўлмас, деб ўйлайман.

—Агар биз унинг қамалған жойини билсак, нима учун мумкин бўлмасин, Анвар? Ўртоқларим юраксиз йигитлар эмас, бу ёғидан хотиржамъ бўлингиз.

—Раҳмат. Албатта, бу жасоратни юраксиз кишилар қилолмас. Меним бу жасоратка умидсиз қарашиб сабаби шунинг учунки, бундай шартлик ва нозик ҳабслар<sup>1</sup> аксар ўрданинг ўзидағи овоққа қамалгучи эди.

—Ўрдага кириш қийинми?

Анвар бош чайқади.

—Ҳеч мумкин эмас, тун бўйи элли нафар йигит ўрда қўргони остидан айланниб турадир.

Қобилбой маъюс Сафар бўзчиға қаради. Сафар бўзчи зўр бериб мўйлабини тишлиб, узар эди.

—Зинданга қамаған бўлсалар, эби бор экан-да, тақсир.

—Эби... Зинданга қамашлари эҳтимолдан узоқ, Сафар ака.

Яна бир неча фурсат сукутда қолдилар. Қобилбой ҳар он тўпписини қайириб, бошини қашир эди. Анвар сандал кўрпасидаги бир ипни узиб олмоқчи бўлғандек қўлини силттар эди.

—Зиндандан хабар олдиришимиз керак экан-да, Анвар?

—Хабар олинса... бўлади.

Қобилбой Анвардан шу жавобни олиб, Сафар бўзчиға юз ўгирди:

—Мирзонинг уйига бир киши юборсақ-да, унинг хотини эрига таом келтирган бўлиб зинданга борса... Шу қандай бўлар экан, Сафар ака?

<sup>1</sup> Ҳабс—маҳбус.

—Маъқул, ука, маъқул.

—Сизга-чи, Анвар?

Анвар тўғри ишорасини берди.

—Бояги андишамизни ҳам айтиб ўтайлик,—деди Қобилбой.—Биз йўлда бу тўғрини мулоҳаза қилиб келдик, Анвар. Сўзнинг рости шуки... Сиз бу уйдан ҳозир кетсангиз маъқул. Ҳарчи одам боласи-да. Ҳалигидек жони кўзига кўриниб иқрор бўлиб қўйса...

Анвар бош чайқаб, кулимсиди.

—Султонали ундай одам эмас, бундан хотиржамъ,—деди Анвар қаноат билан ва бир оз ўйлаб турди...—Аммо Султоналининг хотини, тўғриси, бир оз хавфлироқ; хотин киши эримни қутқараман, деб нодонлиқ қиласа, иш расво...

Сафар бўзчи боя Султоналининг хотини келганда, Қобилбойнинг ниятини эшлиб хотиржамъ бўлғанини сўзлади.

—Жуда яхши қилинған, раҳмат... Ҳали унинг уйига киши юборсангиз, яна уқдириш, хотиржамъ қилиш керак, шундай ишонтирилсинки, эрта пешингача эрининг озод бўлишига шубҳаси қолмасин, ҳатто уни бу йўсун алданса ҳам бўладир. Эрта билангача қутқарилса, хўб, қутқарилмаса Анварнинг ўзи бориб қутқарар эмиш, агар сен шунгача сабр қилмасанг, эрингнинг яна жазо тортишига сабаб бўласан, дейилсан.

—Хўб, мирзам, хўб.

—Сизга яна бир хизмат, Сафар aka,—деди Анвар, Сафар ҳозирлик ишорасини қилиб, энгташиб олди.—Хизмат шуки, синглингиз мен билан бирга турмаса, сиз олиб кетсангиз...

—Хўб, хўб.

Анвар ўрнидан турди ва ҳозир қайтиб киришини сўзлаб ҳужрадан чиқди. Кўр киши зўр бериб гўза суғурар, кампир чигириқ чиқарар, Раъно эса, кўзини бир нуқтага тикиб, сандал ёнида ўлтурас эди. Анвар ҳавлига тушиб, Раъони ўз тарафига имлади. Иккиси ҳавлининг чеккарогига бордилар.

—Эшиздингми, Раъно?

—Нимани?

—Уларнинг сўзини?

—Йўқ.

—Бизнинг бу ердалигимизни сезиш эҳтимоллари бор экан, Султонали қамалған, иқрор қиласа эҳтимол эмиш...

Раъонинг кўзи қавариб кетди.

—Аҳ?

—Құрқма... Сен ҳозир Сафар ака билан кетасан, мен ҳам башқа жойға бораман. Йўл ҳозирлигини күриб битиргунча бир неча кун айрилишиб турмасак бўлмас... Сен бориб кийин.

—Ростданми?

—Ростдан, сен қўрқма, фақат бу бир эҳтиёт, ҳозир Султоналининг қамалишидан башқа гап йўқ.

—Кийимларим ҳужрада...

—Ҳужрада бўлса улар чиққандан кейин кириб кийи нарсан.

Иккиси айвонга қайтиб, Анвар ҳужрага кирди.

—Синглингиз ҳозир кийинади,—деди Анвар.—Бирга юриш яхши бўлмас, икавингиз бир оз илгарида, Раъно орқада борсин.

—Хўб.

—Ундан кейин сиз зиндан хабарини билиб, хуфтан чоғи меним олдымға келингиз, Қобил ака.

Қобил ваъда ишоратини бериб, Сафар ака билан ҳужрадан чиқди. Раъно кириб кийина бошлади. Анвар маъюс эди, бир оз шошинқираб кийинган Раънонинг латиф юзига қаттиғ тикилган эди.

—Сиз кимниги борасиз?

—Менни, мен... мен шу яқиндаги биравникига.

—Мен ҳам сиз билан турсам бўлмасмиди?

—Йўқ, ҳавф бор.

Раъно айрилғуси келмагандек уфлади. Кийиниб бўлиб паранжисини ҳам қўлиға олди, Анвар ҳужранинг бурчагига ўтиб, Раънони ўз ёнига имлади. Раъно келгач, Анвар уни қаттиғ қучоғлаб ўпди.

—Акам сенинг ёнингта мендан хабар етказиб турар, сенга башқа ёрдамлар ҳам қиласар, Раъно.

—Тошкандга тезроқ кетайлик, мен... уч кундан ортиққа кўнмайман.

—Хўб... яна бир ўпай, Раъно.

Раъно табассум ичида яна юзини тутиб берди. Анвар бир неча вақт унинг юзидан ажралолмай турди.

—Бўлди... Улар кутишиб қолғандирлар.

Анвар уни бўшатди...

—Пулни сен олиб кет, Раъно, меним эсим йўқ, йўқотиб қўярман.

Раъно бурчакдаги кийиз тахидан бир ҳамён олтунни олди.

—Сизга бир-икки тилло бериб кетайми, балки керак бўлар?

Анвар керак эмас, деб бош чайқади. Яна шу ҳолда Раъно ҳамёндан икки тилло олиб, Анварга кўрсатди:

—Шу икки тиллони холам билан отамга биттадан бе-риб кетаман?

—Бер, бер... Хайр энди, Раъно!

Раъно ҳам, хайр, дегандек бош иргади ва шошиб ҳужрадан чиқди. Раъно айвондагилар билан хайрлашар экан, ҳужрада қолған Анварнинг икки кўзи жиқ ёшқа тўлиб, кўкраги кучлик-кучлик силкинди ва гавдаси ўзига оғирлиқ қилғандек деворға бориб суюнди...

## 57. ҚЎРҚУНЧ БИР ЖАСОРАТ

Қобилбой бу сўзни эшиткучи қулоқлариға ишон-магандек, Анварнинг яқинроғига сурилди.

—Нима деяпсиз, Анвар, мен яхши онгламадим?

Анвар яна ўша сўзини такрорлади. Қобилбой энди бир оз орқасига қочиб кўзини катта очди ва бир неча вақт қотиб турди...

—Сиз нима қилмоқчисиз, ука. Ўз оёғингиз билан... Йўқ, бу бўлмаган гап. Балки бу—хоннинг унга пописасидир, шу ҳийла билан мақсадига етмакчиидир... Қўйинг бу гапни, ука, қўйинг...

Анвар ҳамон бояги вазиятда, кўзини бир 'нуқтаға тикиб, сандал устидаги қофозни оғаси яқинроғига суриб қўйди...

—Башарти пописа бўлмаса?..—деди Анвар.—Хон пописани билмайди, унинг ҳамма ҳаракати жиддий. Шундай, сиз бу хатни эртага унинг қўлиға берасиз ва ундан ҳар бир ёрдамингизни аямайсиз.

—Бу ақиллиқ гап эмас, ука...

—Мен энди шунга қарор берганман, —деди Анвар ўзгаришсиз. —Бу азмдан қайтиш йўқ... Фақат, сиз ундан ёрдамингизни аямаслиққа менга сўз берсангиз бўлди.

Қобилбой энтиқди, хатни қўлиға олиб, бир неча фурсат сукутда ўлтурди... Сўнгра бирдан ўрнидан туриб ҳужрадан чиқа бошлади.

—Йўл бўлсин?

—Кетяппан.

—Хайр, кечирингиз.

Қобилбойдан жавоб бўлмади.

\* \* \*

Кун қнёмға яқынлашқан. Яна бирап соатдан сүнг Султоналини ўлимга олиб чиқар әдилар. Ўрда ҳеч бир ўзгаришсиз, одатий такаллуфида ҳаракатланар, баҳмал ва заррин кийган саркардалар ичкари билан ташқарига тұхтөвсиз қатнашиб турар әдилар. Бу кунғи девонда бир неча муқтарамларнинг чақ-чақи билан яна бошқача рұх, икки кундан бері яна девон хизматини адо қила бошлаган бир муқтарам ёш олимнинг мұлойим сиймоси миңзолар орасини яна мұнаввар эткан ва юзидан ғолибият маңынси қакиыллаб турған икки муфтийнинг мутоябаларига ёш олимнинг майин нигоҳи ҳар замон илжаяр әди.

—Унинг учун икки йўл,—дер әди Шаҳодат муфти,—ё аммазодасини топиб бериш, ё ўлим, фақат икки йўл.

—Албатта шундай,—деб унинг сўзини тасдиқ қилас әди мулла Абдураҳмон.—Топиб берганда ҳам яна жазо бор, бу тарафи ҳам унтилмасин.

—Яна қандай жазо?—деб ажабланар әди мулла Калоншоҳ.

—Топиб беришни бўйниға олдими, бас, бу сўз Анварни қочирған ҳам ўзим, деган иқордир.

Бу бийрон жавоб мулла Калоншоҳга ёқинқирамас әди.

—Топиб беришни бўйинга олмаслиқ, гуноҳсизлик деган сўздир. Дарҳақиқат, Анварнинг қаерға кетканини билмаса, қандай қилсан? Бас, бу ҳолда Султонали қатл қилинадир, гуноҳсиз ўлдириладир... Бунга ким сабаб, унинг қони кимни тутадир? Мен шунисига ҳайронман-да.

Бу сўз қаршидағи икки муқтарамни лом дедирмай қўйиб, чақ-чақ шу ерда шарт кесилди. Шаръий либос кийдириб, ўз менлигини ишқа оширган мулла Калоншоҳ ғолиб ва мағрур, қўлидағи таҳрирга қаради.

Шундай: шу соат ичида Султоналини ўлим жазосига олиб чиқар әдилар. Ўрдадан ҳар ким унинг нажот топишиға ишонмас; хоннинг олдига чақирилди—ўлди, башарти гуноҳи бўлиб, иқор қилса, яна жазога қолди, вассалом. Аммо Анвар хон ҳузурига келиб ўзини унинг ҳукмига топширадир, чин йигитлик йўли билан дўстини қутқарадир, деган хаёлға ким ишонсин? Кеча жарчи кўй-гузарларни айланиб, Анварни инсофга чақириди, киши қонига қолмаслиқ фазилатини тараннум эттириди. Бироқ, Анварнинг бундай "ҳамоқати"ға ахлоқан сукут этиб, виждонан музлаган ўрда арбоби ва бошқалар ишонсинми?

Шундай: ўрда арбоби бу кун пешиндан бир оз илгари-роқ мужассам бир виждон, тоғюрак бир йигит ва ўлим сари кулиб келгучи бир арслонни ўз тарихида биринчи мартаба кўрди ва тонг ажабда қолди. Бу улуг жасорат бир неча дақиқаларғача зулм итларини сукутка солди, уларни ишдан тўхтатди. Ўрда арбобларининг маҳкамада ўлтурғанлари эшик ёнига чиқиб, йўлда борғанлари ҳаракатсиз қолиб, парвосиз ҳар ким ёнидан саломлашиб ўткучи арслонни тамоша қилдилар.

Анвар девонхона қаршисиға етканда, нима мақсад биландир даричалар ва эшик ёнидан мўралашқути мирзоларга умумий бир таъзим ифода қилди ва событ қадам зиналарга оёқ қўйиб, юқорига, хон ҳузурига чиқиб кетди. Пойтахт бўсағасидаги доимий ясовуллардан ўтиб, даҳлизда тўхтади. Чунки бундан нарига ўтиш учун ҳудайчи воситасида хондан рухсат олдириш лозимдир. Биринчи эшик ёнида қўл қовуштириб турғучи Дарвеш ҳудайчи таажжуб ва ҳайрат ичиди Анварни қаршилаб, иккинчи хонадаги "жаноб" ҳузурига кетди.

Тахтига такя қилған Худоёр икки кўзи тўғрисига икки жаллодни қўйиб, ёнидаги домла шоғовул, Турсун оталиқ ва ғайри бир неча аъёнлар билан суҳбатлашар эди.

—Пушти паноҳо!—деди ҳудайчи,—хиёнаткор ўз ихтиёри билан келиб, доми адолатингизга таслим бўлмоқчи!

—Хиянаткаринг ким?

—Мирзо Анвар!

Хон сесканиб кетди, ҳамнишинлар ҳам алонг-жалонг бўлдилар.

—Келтир!

Ҳудайчи қулиқ қилиб, орқасига қайтди. Даҳлиздаги Анвар биринчи хонадаги аъённи ҳайратка солиб, иккинчи танобийнинг бўсағасида, жаллодлар ўртасида тўхтади ва хонга таъзим адо қилди.

Рақибни бу қадар жасоратда кўрган Худоёрнинг кипрак остлари учиб, соқол туклари сиякинди ва бир оз сўз тополмағандек тамшаниб турди.

—Сен бизга хиянат қилдинг, ит увли!

Анвар бош иргатди.

—Иқрорман.

—Тузимни унутдинг!

—Тонмайман.

—Иқрорсен, тонмайсен, ўбдан иш!—деди заҳарханда қилиб хон,—ўлувдан ҳам қайтмайсен!

—Мен сиздан марҳамат сўраб келган эмасман,—деди илжайиб Анвар.—Ўзимни ўлимга бериб, бир гуноҳсизни қутқазиш учун келганиман.

Ҳамнишинлар лабларини тишлашдиilar. Худоёр ис-теҳзолик кулди.

—Пусулмончилиқ қигансан-да?

—Албатта,—деди Анвар,—бошқалар киши гуноҳи учун гуноҳсизни тутиб пусулмончиликдан чиққач, мен пусулмонлиқ билан ўлишни ўбдан билдим.

Бу жавоб Худоёрни қип-қизил туска қўйиб, манглайида терлар кўринди, газаб ўти аланга олди.

—Сенинг қиган ишининг пусулмончилиқда борми, ит увли?

—Мусулмончилиқда юзлаб хотин устига, бир камбагал уйланмакчи бўлған қизга ҳам зўрлиқ қилиш борми, қиблали олам.

—Чиқар буни, жаллод!

Жаллодлар ҳаракатландиilar.

—Ханжаримиз қонсирафан!

Анвар бош чайқаб кулди.

—Гуноҳсизни меним кўз ўнгимда банддан озод қилинmas экан, Анварни бу срдан чиқара олмаслар, қибли олам,—деди ва ўзини ташқарига торта бошлиған жаллодларни арслонларча силтаб юборди,—сиизда адолат борми, жаноб??!

Қўрқунч бу ҳайқириқ Худоёрни инсофка келтирди. Жаллодларни тўхташқа ва ҳудайчини Султоналини ҳозирлашга буюрди. Кўзи қонланған Анвар икки қўлини ёнига ташлаб Худоёр қаршисида туриб қолди. Ҳамма сукутда... Шундай фурсатларда гуноҳкорни адабсиз сўзлаг билан сўкиб тургучи Худоёр ҳам жим. Чунки, аъён назарида ҳар бир адабсизлигига Анвар тарафидан кучлик бир ҳақорат олиш эҳтимоли бор. Шайхи Саъдий айтканча, дунёда ҳаётидан кўл ювғучидек тили узун киши бўлмас. Дарҳақиқат, инсонни разолатка солғучи унинг манфаати тақозаси, қола берса ўлимдир. Бу иккисидан кечгучига эса на подшоҳнинг қаҳри ва на жаҳаннамнинг қаъри фарқсиздир.

Кўб фурсат ўтмай ҳудайчининг орқасида Султонали кирди, хонга қарши тургучини таниб, титради... Титрар экан, Анвардан бир оз кейинда туриб хонга таъзим қилди.

—Сиз озод бўлдинииз,—деди хон,—девонга чиқиб ўз ишингизга қарани!

Султонали ихтиёrsизча хон томонға букулиб олди...  
Анвар "истeхэоли" вазиятда Султоналига ён қаради:

—Меним қаршимга ишлаб, жанобға неқадар содиқ қолсанғиз ҳам, садоқатингиз сизни најотка чиқара олмади, бильякс, сиз ўйлағанча мен—инсоғиз сизни қутқардим... Сиз шуни унұтmasанғиз бўлди, Султонали ака,—деди Анвар ва хонға ишорат қилди.—Қўлимни боғласинлар, чиқариб ўлдирсинлар.

Султонали орқасига қайтди, қайтар экан, кўзидан бир неча томчи ёши оқиб тушди.- Жаллодлардан бири келиб, Анварнинг қўлини орқасига боғлади. Анварнинг қўли боғланар экан, Муҳаммад Ниёз домла ўрнидан туриб, хонға қуллиқ қилди.

—Шу адабсизнинг гуноҳини меним учун кечсинлар.

Хон юзини четка ўғиди:

—Растага чиқаринг!

Анвар хонни ва ҳамнишинларини масхаралагандек таъзим адо қилди. Жаллод олдинга тушди, унинг орқасидан Анвар юрди ва орқадан икки нафар қуроллиқ ясавул эргаштилар. Анвар ўзини ўрдаға киришида қандай тетик туткан бўлса, ўлим сари чиқишида ҳам ўшандог парвосиз эди. Кўзи тушкан таниш ҳар кимса билан "Хайр, хўш" деган каби имлашиб олар эди. Ранги қув ўчиб ҳушсиз каби ташқи дарбоза ёнида турған Султонали билан ҳам алоҳида видоълашди. Анварнинг қарашидағи маънога тушунган Султоналининг юраги сув бўлиб оқди ва ҳушсиз, ҳиссиз, Анвар кўздан йўқолғунча қараб қолди...

Янги растада ҳалқ қайнашар эди. Қўлида яланғоч ханжарини ушлаб, белига ойболтасини қистирған манфур жаллод орқасида келгучи маҳкумга кўзи тушкан ҳалқдан баъзиси жазо майдонига қараб оғилди ва баъзиси нафртланган кўйи ўзини четка тортди. Жазо майдони янги раста билан ўрда богининг муюшида бир дор ва остиға қон оқизиш учун қазилған чукурдан иборат, эди. Дор остиға келиб етдилар. Бир онда дор атоғига юзлаб йигилған томошабин ҳалқни ясовуллар четланишқа буюрдилар. Ҳалқ орқага силжиган бўлиб, яна сиқилиша берди. Дор остида Анварнинг қўли ешилиб, таҳорат олиш учун унга сув берилди. Чунки бу маҳкумнинг қонуний ҳаққи эди. Анвар таҳорат олар экан, жаллод ва ясовуллар ханжар яланғочлаб унинг теварагини қуршаб турдилар. Анвар таҳоратланиб, устидаги тўнини ерга ёзди. Жаллодлар доирани бир оз кенғайтиб, Анвар икки ракаъат намоз ўқуди.

Дуодан сүнг Анвар ўрнидан турди, қўлини боғлашқа бе-риб, атрофига бесаранжом аланглади. Теваракни сириб олған ҳалқ олдида манфур кўзини мойландириб ўз устига тўп-тўгри қараб турған мулла Абдураҳмонни кўрди. Анвар титради. Абдураҳмон илжайди...

—Кулишка ҳаққингиз бор, домла, чунки ўч оласиз,—деди Анвар. Бирдан ҳамманинг кўзи Абдураҳмонга тушди.—Фақат сиз ифлослиқ натижасида куласиз, мен... мен тўғрилиқ самарасини ўраман, сиз ифлос виждан билан ғолибсиз, мен соғ виждан билан мағлубман... Мени дор остига ким келтирди? Виждан эмасми, тақсир?! Сизни бу ерда ким томошабин қилди. Ифлослиқ эмасми, тақсир?!

Ҳалқ чуқур сукутда, ўз орасида турған "пешво"га киналийк кўз билан тикилган эди... Жаллод қўли боғланған Анварни дор томонга олиб борди. Анвар ўз ихтиёрича чуқур ёнига ўлтурди ва ханжарини яниб келган жаллодга қўли билан "озфина тўхтант" ишоратини қилиб, Абдураҳмон томонга кулди:

—Меним ҳолимни кўрингиз, домла,—деди Анвар кулган юзда,—қўлим боғланған, устимда ханжар ялтирайди. Лескин мен куламан... Нима учун бундай, тақсир? Чунки виждан роҳатда, жон тинч, юракда ишқ... Дуруст, мен кўмилгач, қабрим устида кўкси доғлиқ қизил лолалар кўкарап... Нимадан бу? Бу—сизнинг каби тубанлар солған из...

Томошабинлар тоқатсизланғандек кўринидилар, Анвар узаниб ётди... Жаллод ханжарини енгтига яниб Анвар устига энгташти.

\* \* \* \* \*

...Энгташти, бироқ орқадан берилган кучлик бир зарб билан Анварнинг устидан ошиб, мукканча чуқурга йиқилди. Жаллоддан беш қадам нарида турған ясовуллар ҳам кўқдаги ханжарлик қўлларини остига букалмай, кимлар биландир олишиб ётар эдилар ва шу онда кучлик шапалоқ товши эшитилиб, салласи чувалган бир ёш мулла ерга ўлтуриб қолди. Ҳалқ тартибсизланди... Қобилбой Анварнинг дастбандини кесди ва иккиси тартибсизлик ичига кириб йўқолдилар. Қуролсизландирилған ясовуллар гурр этиб турли томонга сочилған ҳалқ ичидан дўст-душманни ажратолмай гарангсидалар. Шу вақт бутун аъзоси эски қонларга беланған жаллод чуқурдан чиқишқа интилар эди...

\* \* \*

Шу воқытадан икки кун сүнг ярим кече вақти, Беш ариқ билан Хұжанд дарбозалари ўртасидағи құргон девори остиға түрт нафар күлала келип тұхтади... Йигирма иккі-йигирма уч күнлик ой ҳали унча күтарила олмаған, айниқса ой нурига құргон девориға тирмаша бошладилар. Би-ринчи мартаба кунгира ёниға чиққучи эмаклаб юриб ат-роғни текширди, текширгүчининг бетига ой нури сепилиб, таниш бир юз—Сафар бүзчи зохир бўлди. Құргон ташқариси кенг дараҳтсиз қир, туманлық—хира ойдин ва узоқдан бир неча туп яланғоч дараҳтлар күлагаси кўринар эди. Сафар бүзчи ўзидан бир зина қуйида турған ҳамроҳларини бирин-бирин ўз ёниға чиқара бошлади. Анвар, паранжилик Раъно, энг охирда қўлида арқон кўтарған Султонали юқорига чиқдилар. Султонали аста-секин кунгира ёниға келиб, остға қаради.

—Саккиз газ бор,—деди шивирлаб Султонали.—Кс-линг, Анвар....

Анварнинг құлтуғи остидан арқон солиниб бөгланди. Султонали ва Сафар бүзчи Анвар билан құчоқлашиб кўришилар... Сүнгра Анвар кунгира ёниға келиб, қуйига осилди. Сафар билан Султонали арқонни секин-секин юбориб турдилар.

—Етдим,—деган товуш келди қуйидан ва бир оздан сүнг арқон ҳам бўшалди.—Тортинг...

Арқон тортилиб олинди. Паранжиси аралаш Раъно ҳам арқонға бөгланди.

—Арқонни қаттиғ ушлаб, оёғингизни деворға тираб туласиз, Раъно... Энди омон бўлинг, синглим...

—Келин ойимларға салом айтинг, сиз ҳам, амаки.

Раъно тоx chalғиб, тоx тұхтаб, қуйига силжиди. Ерга тушишка бир газ чамаси масофа қолғанда девор остида кутиб турған Анвар уни күтариб олди.

—Қўйинг, ўзим тушаман.

—Тегимиз ариқ, лойға ботасан.

Анвар шу сүзни айтты, уч-түрт қадам босди, Раъони "Түя тойди" аригининг нариги чеккасига чиқарип қўйди. Раъно құлтуғи остидағи арқонни сшди, арқон девор устиға томон соғилиб олди. Анвар яна құргон девори остиға юриб чиқди ва секин юқорини чақирди.

—Султонали ака!

Құрғон кунгирасидан Султоналиниң күлагаси қуйига әнгташти.

—Әхтиёт бўлингиз, Султонали ака,—деди Анвар.—Сиз ҳам шу ҳафтадан кечикманг. Такрор айтаман: зинҳор кўриниш фикрига туша кўрманг.

—Хотиржамъ, хотиржамъ.

Чунки Анварниң қутилған кунидан бошлаб Султонали ҳам яширинганди. Гарчи, хон уни қайтадан йўқламаса ҳам, яна шу эҳтиётни мувофиқ кўрган эдилар. Султонали уй ишларини саранжомлаш учун улардан бир ҳафта ке-йинроқ йўлға чиқмоқчи эди.

Анвар "Туя тойди" ариғидан Раъно ёниға ўтиб, охирги мартаба хайрлашдилар.

—Хайр, Султонали ака, хайр, Сафар ака!

—Хайр, амакилар!

—Оллонинг паноҳига, Анвар!

—Сафаринглар бехатар бўлсин!

Қўрғон устидагилардан кимдир бири пиқ-пиқ йиглади. Анвар Раъони олдиға солиб, узоқда кўринган дараҳт кўлагасига қараб юрди. Ер жуда ботқоқ, ҳар бир қадамни аранг ердан узилар эди. Йигирма қадам чамаси борғач, Раъонининг кафши лойға тишлашиб оёғ узолмай тўхтади. Икки қадам орқада келган Анвар Раъони кўтариб олди.

—Меним этигим бор, чимга чиққунча жим тур,—деди Анвар.

—Қўрғон устида... Қўйинг, уяламан...

Анвар жавоб бермади. Ўттуз қадам чамаси бориб Раъони ерга қўйди ва қўрғон устидан ҳануз мўралашиб турғучи кўлагаларга "кетинг" деган каби қўл чайқади. Иkkиси яна бошлашиб кетдилар. Улар ўн беш қадам босар-босмас дараҳт кўлагаси остидан икки отлиқ югуриб чиқди ва бир онда Раъонолар ёниға келиб, отлиқдан бириси "тўп" этиб ерга тушти ва жилавни Анварга тўғрилаб турди.

—Акун, сувор бўлинг.

Анвар Раҳим кўмагида отқа минди. Узангидан оёғини чиқариб Раъони чақирди. Раъно—Анвар билан, Раҳим—Шариф билан мингашиб олдилар. Анвар яна қўрғон кунгирасига қаради. Ҳануз икки кўлага кўринар эди. Қамчисини уларга тўғрилаб силкитди, отни йўлға солди. Дараҳт кўлагаси остида соябонлиқ араванинг шотисига такя қилған Қобилбой уларни қаршилади. Раъно от орқасидан аравага ўтди. Анвар ҳам отдан қўниб, арава-

га—Раъно ёнига чиқди. Раҳим ўз отига мнниб, Қобилбой аравани йўлға солди. Икки отлиқ араванинг икки шотиси ёнига кириб қўзғалдилар. Тўғун<sup>1</sup> темири ердаги майда тошларга уруниб, шақ-шуқ товуш чиқара бошлади. Арава ва отлиқлар қўлагаси дақиқа сайин кичиклаша борди, бора-бора кенг қирнинг бағрида кўзга кўринмас бўлиб кетди. Фақат, яна бир оз тўғуннинг кучсиз-кучсиз тошқа уриниши эшитилиб турди...

*Битди.*

---

<sup>1</sup> Тўғун—ғилдиракнинг ташқи гардиши.

## МИРЗО АНВАРНИНГ КЕЙИНГИ ҲАЁТИ ТЎҒРИСИДА

Мен мирзо Анвар ҳикоясини отам марҳумдан эшиткан эдим. Мирзо Анвар Қўқондан қочиб келиб, уч-тўрт йил чамаси Тошканднинг машҳур Эскижўва маҳалласида тұрган. Ул вақтларда бизнинг ҳавлимиз шу Эскижўвада бўлиб, мирзо Анвар отамга қўшини эмиш.

"Қўқондан бир мирзо кўчиб келиб, фалончининг ҳавлисини ижарага олған эмиш", деган гап чиқиб қолди,— деб ҳикоя қиласар эди чол.—Мен мирзо хабарини эшитсан ҳам, бир ҳафтагача ўзини кўралмадим. Рўза кунларининг бирида биз масжиддан шом намозини ўқуб чиқар эдикким, сўфи: "Ҳаммангизни Худоёрхоннинг мирзоси ифторга таклиф қилған", деди. Биз йигирма чоғлиқ киши янги қўшнининг уйига бордиқ. Бир уй ва айвонга яхши полослар солинган, кўрпачалар ёзилған, ўртада анвоғи дастурхонлар... Биз уйга кириб ўлтургандан кейин эшик ёнида хушсурат бир йигит кўринди. Бизга тавозиъланаб хуш омади айтди. Мирзо Анвар, дегани шу эмиш. Биз ифторга қарадиқ, мирзодан аҳвол сўрадиқ, тошкандлик бўлғумиз келди, деб кулди. Биз—тошкандликлар хуш кўрадирган норин қилдирибди, хўб едик... Домла билан бир нечалар фотиҳага яқин ташқариға чиқиб кетдилар. Биз нима воқъиъ бўлғаниға тушунмадик. Орадан бир оз ўткандан кейин яна қайтиб кирдилар. Дастурхонлар йигилиб иш фотиҳага тўхталған эдиким, домланинг олдига бир коса сув келтириб қўйдилар. Домла никоҳ хутбасини бошлади... Биз ҳайрон бўлдиқ. Хутба охириға етиб, мирзо Анварга бир қизни никоҳладилар; биз, мирзо билан қизнинг ҳаққига дуо қилиб, тарқалишдиқ. Лекин хилоғи одат бу никоҳ ҳар биримизни таажжубга солди. Яна бирар ҳафта ўткач, бир нечамиз мирзо билан таниш бўлиб олдиқ, кейинроқ мирзони улфатчилигимизга ҳам олиб кела бошладиқ ва

шунда мирзонинг ўз оғзидан Худоёр билан кечкан можаросини эшилдиқ, таажжубландик ва минбаъд мирзога ихлосимиз ортди..."

Чолнинг сўзига қарағанда мирзо Анвар Худоёрнинг қўли етмайдирган Тошкандда (ўрус қўл остида) тинч, аммо жуда ҳам фақир яшаган, бойларга мирзолиқ қилса ҳам, даромади доимий бўлмаган. Тошкандда туришининг учунчи йилларида Худоёрдан бир афвнома олиб, қашшоқлиқ жонига теккан мирзо Анвар, ўйлаб турмай, Раъно билан Қўқонға қайтқан. Орадан уч-тўрт ой ўткач, Қўқондан келгучилар мирзонинг ўлдурилганлигини сўзлаганлар. Нега ўлдурилган, эски "гуноҳи" учунми, бошқа сабаб биланми ёхуд "афвнома" ҳам мулла Абдураҳмонларнинг найранги бўлғанми, отам бу тарафини яхши билмас эди.

Мен ушбу китобка материал йигиш учун Қўқон бордим, яшаган кишилар билан сўзлашиб юрдим: ўзи Худоёр девонида ишламаган бўлса ҳам, Худоёр мирзоларига ҳамаср бўлған бир кекса мирзога учрашдим. Унинг сўзига қарағанда, мирзо Анвар ўлдурилмаган. Худоёрдан сўнг анча йил яшаб, ўз ажали билан ўлган эмиш. Мен ҳайрон бўлиб қолдим ва икки ўргада тараддулданиб, мирзонинг кейинги ҳаётини шу ҳолда битиришкага мажбур бўлдим.

*Абдулла Қодирий—Жулқунбой*

*Тошканд, 1928-нчи йил,  
15 февраль*

# ЎЗБЕК РОМАНЧИЛИГИНИНГ ШОҲ АСАРЛАРИ

## СҮНГСЎЗ

Атоқли сўз санъаткори Абдулла Қодирийнинг "Ўткан кунлар" романи ўзбек совет адабиётининг биринчи ва энг яхши — классик насрый асари-дир. Худди Алишер Навоий сингари мумтоз шоир унинг ўзигача ва ҳозиргача бўлмаганидек, Абдулла Қодирий ҳам ўзигача ва ўзидан кейинги давр ўзбек романчилиги ижодкорлари даврасида ягона, мислсиз сиймо бўлиб қолмоқда.

Муаллиф ўз уринишларини бу соҳадаги шунчаки бир машқ деб қараган бўлса, тарих бу камтарлик маҳсулини шундай юқори баҳоладики, "Ўткан кунлар" ҳануз ёзувчиларимиз учун бадиий ижод соҳасидаги олий намунаидир.

"Ўткан кунлар"нинг мазкур нашри романнинг шу кунгача эълон қилинган нусхалари орасида мукаммали ва муаллиф таҳририга мувоғифидир. Нашрга тайёрловчи заҳматкашлар ижодкор услубини, унинг қаламидан чиққан сўзларнинг асл шаклини сақлашга уриниб тўғри қилишган. Чунки маъно ва нафосатнинг барчаси ҳарфларда ифодаланади. Асарнинг лотин ёзувидағи нашри ютуқлари ҳам бу китобда ўз аксини топган. Нашр мутасаддилари илк ва кейинги нашр ҳақидаги муаллиф мулоҳазаларини ҳисобга ҳаракат ҳилганилар.

Тургунилик йилларида ҳам қатагон йилларининг шарпаси сезилиб турганидан "Ўткан кунлар"нинг бир неча нашрларидан асар композицияси, сюжети ва бош гоялари учун муҳим бўлган бир қанча бадиий парчалар кесиб олиб ташланган эди. Биринчидан, буюк миллатчилик таъсири ўлароқ илмий тарихимизда бўлганидек, чоризмнинг зобит лашкарбошилари ва аскарлари ҳақидаги ҳақиқатлар, яъни уларнинг босқинчилик вазифалари сир тутилар ва романдан ҳам бу ҳақидаги муҳим ватанпарварлик руҳи билан сугорилган нутқ қисман кесиб ташланган эди.

Иккинчидан, инқиlobнинг дастлабки кунлариданоқ, динга қарши мағкуранинг тантанаси туфайли нашрларимиздан диний фикрлар юлқиб ташланаверди. Худди шундай фикрни "Ўткан кунлар" нашри ҳақида ҳам айтиш мумкин. Динга нисбатан тутилган қатагон сиёсат романдан Муҳаммад пайғамбернинг бебаҳо ҳадислари ва бошқа ахлоқ-одобга доир диний материалларнинг қисқартириб ташланиши боиси бўлган эди.

Кайд эттанимиздек, муҳтарам ўқувчилар ушбу китобдан Абдулла Қодирий ҳаламидан тушган барча сўзларни ўқишига мұяссар бўладилар.

Энди нашрнинг тил хусусиятларига тегишли изоҳга келсак: Абдулла Қодирий шахси бугун учун тарихий сиймо ва унинг "Ўткан кунлар", "Меҳробдан чаён" романлари худди Алишер Навоий достонлари сингари адабий ёдгорлик мақомидадир. Адабий ёдгорликнинг ҳар бир сўзигина эмас, ҳар бир ҳарфи ҳам дахлсиз, асраш ва авайлашни талаб этадиган

инжуладир. Абдулла Қодирийнинг ушбу романлари, асримизнинг йигирманчи йилларидаги ўзбек адабий тилининг сўз бойлиги, нафосати, ҳиди, товушлари оламини ўзида мужассамлаштирган бадий обидадир. Гап шундаки, 20-йиллар ўзбек адабий тилида оғзаки ва ёзма нутқ бир-бирига ҳозиргига нисбатан ҳам яқинроқ экан. Ҳозир эса чунончи "Ўткан-кеткан" деймиз-у, имлода "Ўтган-кетган" тарзида ёзмиз ва ҳоказо. Романдаги воқеаларнинг XIX аср ўрталарида Тошкент ва Марғилонда кечганлигини ҳисобга олсак, асар тилини XX асрнинг 90-йиллари имлосига мувофиқлаштиришнинг ўзи гайримантикий бир ҳол эканлигини англаймиз. Ана шу мулоқазаларга кўра, ушбу нашрда илмий-академик нашр талаблари тақозоси билан муаллиф нускаси тили ва имлосини аслича сақлашга қарор қилинди: китобни ўқиш жараённада ўқувчи шунга амин бўладики, аслията садоқат ҳатто товуш йўсими, сўз ва гап қурилишига амал қилиш асар тилига ўзига хос шира, таъсирчаник ва жозиба багишлаган. Гўё биз Абдулла Қодирийнинг ўз товушини тинглаётгандай бўламиз. Бинобарин, асар номининг ҳам "Ўткан кунлар" деб ёзилиши мантиқий бир ҳолдир.

Биринчи қарашда китобхонга галати туюладиган "Ўткан" сўзидан бошлаб, имлодаги сезиларли фарқлар аввал эриш туюлар, бироқ бир-икки саҳифадан сўнг китобхон воқеалар гирдобида суза бошларкан, муаллиф тили унга шунчалик сингишиб кетадики, имло ҳақидаги хаёллар унинг ёдидан кўтарилиб кетади.

Демак, форсий ва арабий сўзларнинг асл Жулқунбоячасига ифода этилгани, асарнинг асосий сўзлари, ҳатто тиниш белгиларигача муаллиф таҳрир вариантидаги каби сақланиши адабий ёдгорлик мақоми талаблари ижроси билан изоҳланади.

20-йиллардаги ўзбек адабий тилида ҳали классик адабиётимиз насрининг таъсири анча сезиларли эди: буни сўз бойлигидаги тоҷикча ва арабча сўзларнинг кўплиги исботлаб туради. Бундай лексик бўёқ Абдулла Қодирий романларига ҳам хосдир.

Айни пайтда лугат барқарорлигининг кучлилиги билан бирга янги тавтар ва рус тилининг ҳам таъсир кўрсататгани сезилади. Чунончи, "А, Отабек", "мошинавор" (машинальний) ҳамда изоҳ тариқасида қўлланилган "искеlet" сингарилар бундан дарак бериб туради. Кўрятмизки, ўша тасоддифий саноқлик сўзлар ҳисобга олинмаса, муаллифнинг ўзбек адабий тили софлигини сақлаш учун бўлган майли асар тилининг чуқур миллий қиёфа караб этишини таъминлаган.

Ҳа, мазкур икки шоҳ асар матни ўзбек адабий тилининг 20-йиллардаги асл қиёфасини ўрганиш учун муҳим адабий манба бўлиб хизмат қиласади.

\* \* \*

Абдулла Қодирий "Ўткан кунлар" ва "Меҳробдан чаён" романлари билан ўзбек адабиётida шу жанр тараққиётида ўзига хос инқиlob жараёнини вужудга келтирди. Бу романларгача бўлган уринишилар, жумладан, Ҳамзанинг "Янги саодат" асари мутлақо мұваффақиятсизликка учради. Абдулла Қодирий жаҳон романлари қитъасига ўзбек ресманлари қитъасини қўшган буюк бир қашшоф бўлди.

Ўзбек ҳалқ оғзаки ижоди ва ўзбек адабиётидаги йирик характерлар сафи: Эр Ҳубби, Рустам, Тўмарис, Широқ, Гўрўғли, Алномиш, Барчин,

Юнус пари, Аваз, Ҳасан, Равшан, Рустамхон, Фарҳод, Ширин, Лайли, Мажнун, Баҳром Гӯр, Искандарлар Отабек, Юсуфбек ҳожи, Кумуш, Мирзо Анвар, Раъно каби кўркам образлар билан мукаммаллашиди.

Ўтмиш дақоларининг юзига қора чагланиб, бугун эъзозланиб ўша қора қурумлар артилаётган бир замонда "Ўткан кунлар" романни, ундаги эртаклардаги қаҳрамонлардан ўзадиган жозибали Кумуш ва ўкта Отабеклар образи, улуг оқсоқоллик рамзи бўлган Юсуфбек ҳожи сиймолари бугунги кунда ўзгача аҳамият касб этади. Зотан замон ва кишиларимиздаги миллӣй уйгониш бу қаҳрамонлар сиймосига ўзгача виқор, ўзгача моҳият ато этадир.

Мен бу романдан ўз замони фожиалари асосига қарши онгли курашган оқил оталар (Юсуфбек ҳожи) ва доно фарзандлар (Отабек) сиймоларини кўраман. Юсуфбек ҳожидаги элнинг бугунги ва эртанги қисматини мукаммал идрок этиш, кечаеттган тарихий жараённи теран таҳлил этиш ва ягона тўғри йўлни кўрсата билиш қудрати бу образга алоҳида салобат ва тафаккур қудратини бахш этган. Отабек эса оддий савдогар йигит. Бироқ, ундаги юрт қисмати учун куйинишилар, виждан ва йигитлик ҳақидаги қон-қонига сингит тасаввурларни мулоҳаза қилиб кўрайлик...

Ана шу икки образни жумҳурият Олий Кенгашидаги вакиллар ва савдо соҳасидаги корчалон йигитларимизга бир қиёслаб кўрайлиг-а... Беихтиёр ким эдик ва ким бўлиб қолдик? — деган савол сиртмогига тушиб қоламиз.

Замонамизга назар ташлаб бир асрдан кўпроқ вақт ўтиб ҳам айrim миллиатдошларимизнинг Юсуфбек ҳожи ва Отабекларча мулоҳаза юрита олмасликларини ва ўзаро низоларига эрк беришларини кўриб эзилиб кетади киши. Асосий ҳаётий муаммони идрок этмаслик, асосий ёвни ажратади билмаслик касали ҳали ҳам миллиатимизга хос экан, таассуф билан бугунги ҳаётимизни ҳам ўтган кунлар дегим келади!

Абдулла Қодирий қаҳрамонлари ижобий қутбининг ҳар бири ўз қиёфаси, ўз ақл закоси, мулоҳазалиги, фикрий тўлақонлиги, онгнинг олмос қадар ўтириллиги, мантиқнинг букилмаслиги, мумтоз андишалик, тамкин, ижобий маънодаги виқор билан алоҳида кўзга ташланади.

Асардаги ижобий қаҳрамонлар билан салбий образларнинг савол-жавоблари тўла маънодаги фикрий қиличбозлиkdir. Муаллиф шу даражада санъаткорликда олга кетадики, бу усулдан ижобий характерлар диалогига ҳам фойдаланади. Эслайлик: Ўзбек ойим ўз ҳоҳишича Зайнабни Отабекка унаштириб келган. Отабек бундан бехабар. Бироқ, зимдан бундай воқеа содир бўлишини сезиз юради.

Романнинг бу ҳақдаги воқеаси баёнида Юсуфбек ҳожилай фикри тийран оқсоқол Отабекнинг кучли мантиқий мулоҳазаси олдида довдираф қолади:

"Ўзбек ойим келип киргандан сўнг Юсуфбек ҳожи бир неча вақт ўйлаб қолди. Ўзбек ойим депсиниб-депсиниб эрига қараб олар эди. Анчагина сўзсиз ўлтургандан сўнг, ҳожи мулоҳишмона сўз очди:

— Ўглим, ҳали сан эшидинеми, йўқми, ҳайтовур биз санинг устиндан бир иш қилиб қўйди...

Отабек, маълумки, уларнинг "қилиб қўйган ёки қилмоқчи бўлған ишларини" албатта билар эди. Шундек ҳам бўлса билмаганга солинди:

— Ақралик кишиларнинг ўгуллари устидан қилған ишлари албатта но маъкул бўлмас, — деди.

**Хожи ўғлининг бу жавобидин ерга қариди ва ними деб диком қилишини билмай қолди.**

Фарзанд жавоби шу қалар кучли мантиқий құдратта этаки, ота бундан қаттық таъсирланиб. Бирмунча вақт ган тополмай бөш эттанча ўтиради. Ич-ичидан қыллингап ишдан пушаймон бұлади. Чунки Ўзбек ойим қылган иш ақпли кишиларнинг ўз үгіллары устидан қылладын түгрі ишлары эмас зди... Юсуфбек ҳожи үттис үйлдан ортиқ замондан бери бирга яшаёттан думбул бұлса ҳам уй бекаси Ўзбек ойимға айниң кіләмаслық учун қыллингап иш ижроқиларни "биз" деб күрсатади... Ота ўйлай-ўйлай охир шундай бир қатын асосни ўз фарзандига рұпара қыллады, бу важ ҳам ма-саланы үзил-кесил ҳал қылади, ҳам ушбу оның аъзоларына хос бўлган буюк фазилат; лафзға вафодорликнинг исботи бўлиб хизмат қылади:

**"— Жуди түгрис айтасин, ўғлим; бироқ онаныннинг бир му-лоҳизасизлігига бошадақ мен табиимни тишилаб қолған здим. Ҳозирда ҳам шу ҳолда қолмоққа мажбурман... Биз ҳозир андышанинг бандаси, мен эмас онинг биравны шиондир қўйған; бизнинг оиласдан лафзизлик чиқиши менга маъкул кўринмайдир.**

*Отибек ота-она орзусига, ўз таъбирича, жансиз ҳайкал бўлиб ризолиқ берди.*

Оқилона удум олдидағы масыулият бизни ҳайратта солади. Негаки, бугунги интеллектуал инсон, XX аср фарзанди ва анча-муніца даҳолари ҳам лафзизликни давлат мақоми даражасига олиб чиқиб қўйғандар...

Юсуфбек ҳожи ва Отабек сұхбатларнан худди доңишманлар савол-жа-вобларипи эслатади. Энди ўша ҳолатни ҳозирги ўзбек хонадонига кўчирайлик. Қандай манзарани кўрамиз? Бунда ҳам жамиятимизда ота ва ўғлиниң бундай оқилона мақке тута олишлари кўриладими? Ота ҳурматни ва фарзанд өззози ўтган кунлардагидекми? Тарбияда, ота-ўғил муносабатларидан нималарга эришдик?..

Юсуфбек ҳожидаги босиқлик, бир қараш ёки бир ҳатти-ҳаракат билан тегишли маъноларини англатиши, беҳад оз сұзлаш, фақат мұхым гапгагина оғиз очиши, сұхбат одоби на баҳс йўсунидаги мұмтозлик — буюк тамкин этаси фазилатларнинг асосий қисми Отабекка ўтандыр. Фақат яни аллад — ота қисматини тақрорлашни истамайди. Энди у ўз умр йўлдоши отасининг умр йўлдошидай бўлишига кўнникомайди. Отабек ичдан ёнар қаҳрамондир. У ўз кўнглида ҳамма андиша, ўй-фикрларини муттасил таҳлил қилиш билан кун кечиради. Вақти келганды қатын ға ҳал қылувчи амалимётта ўтади. Бирордан ёрдам сўрашни у ожизлик деб тушунади. Шунинг учун ҳам иккى үйлilik сарсонлик азобларини ўз бўйнинг олади: на отасидан, на Ҳасаналидан ёрдам сўрайди.

Кумуш — орзубот образ. Унинг ҳатти-ҳаракати тасвирига келсак, Абдулла Қодирий уни фақат эркалаб чизигилар келтиради. Унинг портрети, ҳар бир ҳатти-ҳаракатидан мұаллиф мислив инжак латофат кузатади. Менимча, ўзбек адабиётидаги бирор аёл қаҳрамон ижодкор томонидан бундай эркалатилган эмас. Аслида Кумуш ана үзундай эркалатишларга арзиди. Оқилалиқ, аслик, мулоҳазалилик, садоқат, фидойилик, қўйинги, барча аёллик ижобий фазилатлари унда барқ урайб туради.

Кумуш ўз баҳти учун фожиали бўлган Отабекнинг иккинчи уйланиш воқеасини эшигтагч, оламни бузуб дод-фарёд қылмайди. Фақат "Мени иккунт-майсизми?" деган мүниса сўзи Отабекни ажойи тамом қылади ва уни Ку-мушгагина фидо бўлишга отлантиради.

Абдулла Қодирий романчиликда сөхграр санъаткор: у ўқувчи кутмаган лаҳзаларда ҳам тасвир мўъжизаларини яратади. Қаҳрамонларнинг ички ва ташки қиёфаларини, турли қолат ва манзараларни шундай маҳорат билан чизадики, ўша воқеа-қодисаларни китобхон аниқ тасаввур қиласди, худди ўша воқеалар кўз ўнгимида, ёнгинамида содир бўлаётгандек туюлади. Кумушбилининг тўйи тафсилотлари, Кумушнинг гамнон ҳолати, унинг кайфиятига монанд қизлар томонидан куйланётган қўшиқ, куёвнинг кириб келишини ифодаловчи тасвирлар ва ниҳоят... келин-куёвнинг учрашувлари... Бундай манзараларни фақат буюк санъаткоргина чиза олади. Айниқса, манзара ва воқеалар тасвирида қаршилантириш усулидан кенг фойдаланади: фожиға ёнига байрамни ёнма-ён қўйиш ва шунинг аксича чечакларга тўлган баҳор манзарасида қон тўкишлар...

\* \* \*

Асар матни устида қўлда қалам билан, кўзда қалқан ёш билан беихтиёр: "Нега Отабекни биринчи марта Марғилонда дор остидан Кумуш қутқарди... Иккинчи марта Қўқонда жаллод қўлидан Ҳасанали озодликка чиқарди-ю, Абдулла Қодирийдек ватанинн улуг фарзандини ҳеч ким дор остидан қутқармади?" — дейа фигон чекаман. "Тарихимизнинг энг кир, қора кунлари бўлган кейинги "хон замонлари" да ҳақиқат овозига ҳар қалай кулоқ солишган-ку, бизнинг сабиқ СОЦИАЛИСТИК ЖАМИЯТИМИЗДАЧИ?!"

Отабекнинг ватан озодлиги йўлида қурбон бўлганлиги воқеасига келганимда, худди ўша милтиқ ўқидан муаллиф ҳам бағрини чанглаб жон берганини ўйлаб-ўйлаб тош қотаман...

ХХ аср деган БЮОК ИНТИЛИШ тушунчасининг бўшга кетаётгани, асрнинг одам характерини одамий қиломаганини ўйласам, яна Юсуфбек ҳожи ва Кутидорларга ҳавасим келади. Кутидордаги босиқлик ва мантиқ кучи, Юсуфбек ҳожидаги узоқни кўра билиш, бугуннинг дардларига маҳдам топишга мутафаккирларча уриниш фазилатларини кўрар эканман, муҳитдан шундай кишиларни топиб, тавоғ қилгим келади. Бироқ улар нақадар оз!

Аммо... Зайнаблар-чи? Етмиш йиллик улуг бир тарих Ўзбекистонномли мамлакатда юз минглаб Зайнабларни, яна шунча Ҳушрўй бибиларни яратмадими? Чунки қўлларидан китоб тортиб олинниб, миллионлаб жўякларга ҳайдалган қизларимиз, ё Зайнаб каби бахтгдо телба бўлишлари керак эди, ёки Ҳушрўй каби талончи ўткир аёл бўлиб "бахт" топишлари керак эди. Ора йўл йўқ эди чамаси...

Кумушларга яшаш ҳамма замонларда ҳам машақкат, қийин ва қатто фожиали бўлган. Вужуди билан машъъал бўлиб ёнаётган, давр оловида куяётган аёлларимиз — Кумушларимиз эмасми ахир?

Мен ўзбек совет адабиётшуносларини журналистик муаммоларини аданбийтдан изламаслика, матбуот муаммосини адабиёт фазилатига йўйимаслика, адабиётни сўз санъати ва одамлар оламини тадқиқ этишга чорлаб, қайта-қайта "Ўткан кунлар"ни синчиклаб ўқишлиарини сўрайман. Ўзбек адиларини эса, тасвир жилоларининг минг хиллигини илгай билмоқ, инсон дарди ва баҳтигининг милён қирраларини кўра билишни ўрганмоқ учун ушбу шоҳ наср намунасини ўқишлиарини истардим.

Азиз китобхон! Сиз ушбу романни ўқир экансиз, Юсуфбек ҳожини, Кутидорни, уста Алимни, Мусулмонқулни, Худоёрни, Отабекни, Ҳомидни мулоҳазангиз тарозусига қўйиб кўринг. Уларнинг ҳар бири кимлигини ўйланг, атрофингиздаги исмлари бошқа-ю, аммо қилмишлари муштарак кишиларга қиёсланг...

Ўзингиз кимга ўҳшайсиз?

Юсуфбек ҳожи сингари совуққонларча мулоҳаза юритиб, ўз шахсингизга баҳо беринг...

Ҳаётдан бақадек қотган Зайнаблардан асл Кумушларни фарқлай билинг...

Исми-жисмига номуносиб одамлар кўплигини унумтанд: исми Жаннат бўлса-да, Кумушлар баҳтига дўзахий чуқур қазигувчи, озигина пулга имонини пулловчи оналарни таний олинг...

Содик-чи? Пулга содикларни, пулни кўрганда одам жони чумолидай кўринмайдиган юзлаб замонамиз Содикларни таний оласизми? Мутал полвон каби табиат берган улуг кучини уч-тўрт тиллага сотиб, одамларни хонавайрон қилувчи бефаросатлар атрофимизда йўқ деб ўйлайсизми?

Уста Алим ва Отабекларнинг сал ўҳаша бахтлари ва фожиаларидан ўкинманг. Йигланг, кўнглинигиз ёришади. Бироқ ўкинманг. Инсон баҳт учун яратилган. Бироқ нобоп жамият ўз аъзоларини бир гуруҳ қамтовақлар ва зўравонлар қурбони қилиб қўйишини идеал жамият мисолида кўриб турибсиз.

Ҳамма бирдек баҳтли бўлолмайди. Бу — чин. Бироқ кўпчилик баҳтли бўла олади. Бунинг учун одамлар одамий — чин инсон бўлишлари зарур.

Инсоннинг биринчи фожиаси нодонлик ва жоҳилликдир, мулоҳазасизлик ва ўз қилмишини баҳолай билмаслиkdir. Ўқиш идрокни кучайтиради. Сизга "Ўткан кунлар" сингари романлар мутолаасини тилайман...

Мен "Ўткан кунлар" китобини ёпар эканман, ҳозиргача кечган ҳаётимиз, ўзимизни англашиб етиш, ўзлигимизни, тарихан буюк миллатимизни англашга қаратилган буюк жараён — янги кунлар қаршисида қора ўтмиш бўлиб қолишини чин юракдан истадим ва етмиш йиллик ўзбек адабиётидан "Ўткан кунлар"га тенг келадиган бошқа бирор асар тополмаганимдан ўқиндим...

Немислар Вертер ва Фаустлари қисматига куюнсалар, руслар Онегин ва Татьяна гам чексалар, ўзбеклар Отабек ва Кумушлари учун жон чекадилар, Абдулла Қодирийлари учун фигон чекадилар...

\* \* \*

Таносух мазҳаби вакилларининг тасавурича инсон руҳи бир неча ма-ротаба вужуд либосини кийиб, ўз феъл-автори ва ниятларига яраша гоҳ одам, гоҳ бўри, гоҳ шер, гоҳ тулки, гоҳ эшак, гоҳ чаён... тарзида тақрор-такрор ҳаётта қайтар эмиш...

Кишилик аъзоларининг хатти-ҳаракати, феъл-автори, қилмишларини кузатиб, беихтиёр шу таълимотда қам "жон" борлигига тан берамиз. Чунки шундай кишилар борки, уларнинг одамийлиги ва покдомонлигига фариштанинг ҳаваси келади; шундай нусхалар ҳам борки, чаён уларнинг олдида ип эшолмай қолади. Агар ўҳшатиш билан иш тутадиган бўлсан, кишилар-

ни феъл-авторига кўра ҳайвонлар ва ҳашоратлар сиймосида кўрадиган бўлсак, галати манзаралар кўз ўнгимида жонланар эди...

"Меҳробдан чаён" романни ҳақида сўз очмоқчи бўлганимда, шу фикрлар хаёлимда чарх ураверди. Чунки бу романни олдинги "Ўткан кунлар"дан фарқини изламоқчи бўлганимда, аввал умумий ўхшашлик фикримни банд этди: ҳар иккала роман тарихий-майший мавзудадир. Ҳар икки асар тарихимизнинг кир бир даври, XIX асрнинг 40-60 йилларини акс эттиради.

Бироқ икки китоб иккни бадний жаҳондир. Нега? Чунки адабиёт — характерлар, образлар хазинасиdir. "Меҳробдан чаён"да "Ўткан кунлар"даги бош қаҳрамонларга хос идеалик: мислиз сулувлик, ўқтамлик уччалик сезилмайдигандек. Бироқ кейинги романнаги характерларнинг ҳар бири ўз қиёфаси, ўз тақдиди, ўз тирикчилиги, ўз майшати билан билишга арзигулик сиймолардир. "Меҳробдан чаён"нинг бош қаҳрамонлари мирзо Анвар ва Раъно деймиз. Бу чин гап. Аммо асар номи бош қаҳрамон Абдураҳмон домла эканлигига ишора қылмаяптими? Қаранг-а, ахир чәйнлар ҳам яшайди-ку, яшаш учун курашади-ку! Абдураҳмон ҳам шундай одамзод ургидан чиққан бир ҳашорат-да, газандада, ахир!

Унинг Бухородаги "таҳсил" ниқоби остидаги ифлос яшаш тарзи, Қўлонга қайтгандан сўнг, қайта-қайта "муносиб" жойларга жойлашишга урининиши китобхон газабини қўзгатади, ижиргантиради. Бироқ нетайлик: ҳаёт ўзи бунақаларни урчтишиб ётилти-ку?

Солиҳ маҳдум-чи? Намунали бўлмаган ўз мактабига бошқа маҳалладан талабаларни жалб қилишга урининиши; мирзо Анварнинг мирзолигидан фойдаланиб, арзга келувчилардан чойчақа йигишга уринишлари ота образини кўз ўнгимида маънан чилларчин этади. Аммо ҳаёт тақозосининг ўзи шу эмасми?

Гулшанни олайлик. Бир вақтлар кимсан, Худоёрхоннинг хотини эди. Кейин бир навкарга тегиб, яна ҳаётини бир қуладай изга солиш учун собиқ эрига маҳаллама-маҳалла изғиб қиз танлайди... Бу ишда шунчалик иблисонга маҳоратлар кўрсатадики... Унинг саройга кириб бориши, хон хотини олдидаги мулозамати, қирқ қизларга самимий муносабати... ҳаммачаммасида ҳаёт ҳақиқати барқ уриб турипти.

Менимча, "Меҳробдан чаён" романидаги ҳар бир қаҳрамон қисмати бир тўқис фожиадир. Тойир акани оласизми, Гулшанними, Абдураҳмон домланими, Худоёрхонними, Солиҳ маҳдумними, Назминими... қайбирини олманг, ўз даври, ўз қисмат фожиаларини бадний кўзгуда намоиш этади. Мен Худоёрхон хотинларининг рўйхати асар учун ортиқча юк, асар шаклини бузган деб ҳисоблайман. Бу адабиётшунос фикри. Бироқ чуқур ўйлаб қарасангиз, муаллиф лаҳзалик персонажлар қисматида ҳам шахсий фожиаларни, давр фожиасини гавдалантириш пайида бўлгандар.

Абдулла Қодирий икки романнада характер яратишида икки усулни қўллайди. Биринчи романнада Отабек, Кумуш ва бошқа образлар портретини муаллифнинг ўзи эриимай чизади. "Меҳробдан чаён" романни қаҳрамонлари сиймосини эса ижодкор усталик билан кўпроқ бошқалар тилидан беришга уринади ва бунга тўла эришади. Агар мирзо Анвар қиёфасини кўз ўнгингизга келтирмоқчи бўлсангиз, муаллиф тасвирида дўмбоққина ёш болани кўз олдингизга келтирасиз. Мирзонинг камолот ёшидаги қусн камолини эса қирқ қизларнинг биридан сўрайсиз!

Нозик Гулшанга мирзо Айварни учратганини ҳикоя қилади:" — Ўзи

қандай йигит деб сўра: сурма қўйғандек оху кўзи бор, қизил олмадек та-  
ранг юзи бор, энди чиқиб келган кўк майса мўйлоби. Розия хонимницидан  
ҳам нағисроқ қалам қоши... Устига кийған беғасам тўни ўзига шундай  
ярашқанки... биз қизлар ихтиёрсиз унга қарашидик...

Шу ҳикоянинг ўзидаёт Нозик фожисининг янги саҳифаси синиқ қиз  
кўнглини яна чил-чил этади. Нозик "пари йигит"нинг кимлигини Гулшан-  
дан сўраб билади ва ниҳоят сўрайди:

— Ўзи ўйланганмикин?

— Ўйланмаган бўлғанда ҳам, сени олмас.

— Албатта мени олмас, — деди Нозик, унинг товшида шу чоққача  
эшитилмаган бир синиқлик оҳангি бор эди — Албатта... мени олмас.  
Менга ит теккан..."

"Менга ит теккан"... Бу гапни ўша китобда рўйхати берилган ва на-  
зарда тутилган юздан ортиқ хотин айтиши мумкин эди. Бу ит — Худоёр-  
хон эди... Бу ит "Ўткан кунлар"даги илонвачча эди. Энди бу асарда у  
аждаҳоға айланган.

Абдулла Қодирий ўзбек адабиёти образлар дунёсини ўз романларидағи  
характерлар галереяси билан бойитди. Буларнинг ҳар бири ўз жисмоний  
ва маънавий-ахлоқий қиёфаси ҳамда шахсий қисмати билан китобхон кўз  
ўнгига саф тортади. Солиҳ махдум, Сафар бўзчи, Султонали мирзо, Тойир  
ака, Ниғор ойим, Гулшан, Шаҳидбек, Худоёрхон қизиқлари: Зокир-ғов,  
Бахтиёр, Баҳромлар, мирзолар: Шаҳодат муфти, мулла Калоншоқ, Самад  
бўқоқ, Шукур сўфи... — асар бўйлаб ёки лаҳзалик — эпизодик  
қаҳрамонлар ҳам эсда қоларли чизгилар билан таъминлангандирлар.

Абдулла Қодирий китобхон учун сеҳргар санъаткор, адиллар учун ижо-  
дий мезон муаллифи дидир. Қаҳрамонлар тасвирининг хилма-хил усусларга  
бойлигидан киши ҳайратга тушади. Чунончи, адил носирга хос бўлган му-  
аллиф тилидан сиймо тасвирини шундай келтиради:

"Ичкаридан ён юзи сут билан сугорилғандек оқ, қуралай кўзи ойсиз  
ва булутиқ кечасидан ҳам қорароқ, қадди саро каби мавзун, қора сочи  
тақимини ўпган, уст-боши ишак ва олтинлар билан гарк бир хоним хи-  
ромон чиқиб келди. Боишдаги ҳисобсиз кокилларини санама тикилган оқ  
ҳарир рўймол билан озорсизгина боғлаган, ёқа ва этакларига нағис жияк  
бириклирсан хонатлас кўйлак, Бухоро кундайлан қиргоқтарига олтин  
уқа (қўр) тутулган енгисиз желатка кийиб, ёқут кўзлик олтин тұғма-  
ларни бўшқина соглган, ҳуснда мисли оз бу нозанин хонининг суюкли хо-  
тини — мазкура Розия хоним эди".

Бу холисона баҳога асосланган тасвир сиймони нақадар аниқ тасаввур  
етиши имконини берса, шунинг аксича башара тасқаралигига ишора қулиув-  
чи ўта киноялар: "ҳусни Юсуф", "нозанин" сўзлари китобхонда ўзгача та-  
саввурлар уйготади. Зотан ўзбек адабиётидан идеал гўзал юз чиройи —  
Юсуф ҳуснидир.

"Унинг ёнида бўз яхтак богичини осилтириб, ҳандалакдек бўқоги ўнг  
томонини зийнатлаган ўрта яшар яна бир "ҳусни Юсуф" кўринар эди"  
— дей муаллиф Самад бўқоқ сиймосини чизади.

Энди асар унвонига кўра асосий қаҳрамон деса бўладиган мулла Аб-  
дураҳмон ҳақидаги айрим чизгиларни келтирайлик. Мана у шахснинг тे-  
жамкорлик билан чизилган нусхалари:

"Жилюхонанинг тўрида ўлтурған қора тўйнлик, ўттуз ёшлар чама-

сиде рангиз ва ёшилгига қарамасдан қуюқ соқолини баҳайбат ўстуриб, бир бурдагина юзига от тўрба осган каби бир киши эди".

Китобхон кечагина йигирма ёшида ҳам мўйчинак билан юзидағи тукларни терадиган Абдураҳмоннинг бу қиёфасидан жирканади албатта. Негаки, у имоматтава баччаликни идеал баҳт деб қисбларди. Азбаройи тирикчилик — энди соқолни баҳайбат ўстиришга мажбур...

Зеро муаллиф қайд эттиандек: "Абдураҳмон... ҳаммабоп бўлишга қаранганди хонбоп бўлишга тиришарди" деган маълумотида ҳам унинг яна бир ўзгаришга мойиллигини ўқувчи сеза олади.

Султонали тилидан Абдураҳмон образини тўлдирувчи чизгилар берилади:

"— Мен ўз фикримда янглиши масман. Бу қалтакесак юткан чаённинг юрагида, худой билсин сизга қарши катта адоват бор".

Ниқоят асар хотимасида меҳробдан чиққан чаённинг асл қиёфаси ҳақидаги муаллификинг сўнти чизгиси келади.

Анвар қатли манзарасида шундай тасвирга кўзимиз тушади: — "Теваракни сирраб алган ҳалқ олдида манфур кўзини мойландирив, ўз устига тўп-тўғри қараб турган мулла Абдураҳмонни кўрди. Анвар титради, Абдураҳмон илжайди..."

Табиат күёш сингари багри кенг. Инсонларча яшайдиганларни ҳам, чаёнларча яшайдиганларни ҳам ўз багрида урчитаверади... Факат инсон ким бўлишини ўзи танлашга масъуддир.

Дунё романчилиги ютуқлари даражасини назарда тутган ҳолда бир мулоҳазани айттим келади: Абдулла Қодирийнинг "Ўткан кунлар" ва "Меҳробдан чаён" романлари ўзбек адабиёти баҳтига яратилган сўз санъати мўъжизаларидир. Жаҳон китобхони ўзбек адабиётининг насри қақида ана шу икки роман ордали тўғри тасаввур ҳосил эта олади. Ана шу, маънода Жулқунбой ўзбек романини олам миқёсига чиқарған адабидир.

*ВАҲОБ РАҲМОНОВ,  
тил ва адабиёт фанлари номзоди*

«ҮТКАН КУНЛАР» РЎМОНИНИНГ 1926 ВА 1933  
ЙИЛЛАР НАШРЛАРИДАГИ ТАФОВУТЛАР

1. Биринчи ва иккинчи нашрларида ўрнига-ўрин киритилган сўз ва жумлалар сочма ҳарфларга олинган.

2. Иккинчи нашрида киритилган сўз ва жумлалар тўлқинли (курсив) ҳарфларга олинган.

3. Иккинчи нашрида тушириб қолдирилган сўз ва жумлалар қавс ичига олинган.

(Ёзмоқға ниятланганим) ушбу — «Үткан кунлар» янги замон рўмончилиги билан...— 6-бет.

... бу донгдор саройни Тошканд, Самарқанд ва Бухоро савдогарлари эгалаганлар — ...саройга Тошканд, Самарқанд ва Бухоро савдогарлари жойлашганилар...— 7-бет.

... бир-икки ҳужрани истисно қилиш билан бошқалари мусофиirlар ила тўла — билан.— 7-бет.

...ҳам эта жиҳатидан диққатни ўзига жалб этарлик (эди).— 8-бет.

... бир туркман қўлидан Отабекнинг бобоси ўн беш тилло баробарига — олтин.— 9-бет.

... ундан самимий вавъдалар олиб юргучи оқ қўнгиллик бир қул эди — «кул».— 9-бет.

Отабек бу ҳолатни сезди...— буни...— 10-бет.

... отам Тошканд борганиларида тўп-тўгри сизнинг эши-кингизга тушсинларда, сиз саройга тушинг...—...отам билан мен Тошканд борганимизда тўп-тўгри сизнинг эши-кингизга тушайликда, сиз саройга тушинг.— 10-бет.

... деди Ҳомид эътиrozланиб — эътиroz қилиб.— 11-бет.

Мирзакарим исмлик қирқ беш-элли ёшлар чамасида қора қош, қора кўз (кўркам юз)...— 14-бет.

Бу ўринсиз текшириш мажлисни бир оз сукутка юборди-да...— гап.— 15-бет.

Дарҳақиқат ўз ора битмас низоъларнинг асли маншаини ул яхши онглаб таҳлил қилас — бир қадар.— 20-бет.

Сабабига тушичиш қийин бўлган истеҳзога қарши Ҳасанали сукут қилмади — аччиқга — 20-бет.

... бекнинг бунчалик ангравланишига қандай маъно беришни ҳам билмас эди — билмади.— 22-бет.

Унинг ҳужраси Отабекники билан бир қаторда бўлиб, газмол, пой-афзал ва шунинг сингари... — қалапой афзали. — 22-бет.

... турibi кетмакчи бўлди ва шу ҳолатда ичкаридан уйқусиравш эшидти... — уйқусираган каби товуш. — 24-бет.

Ўртадан кўб фурсат ўтмали, бояги уйқусириш яна такрорланди — товуш. — 24-бет.

Охирида Ҳасанали Отабекнинг тусига бир неча қайта кўтарилиб қўйди — юзига. — 25-бет.

... ҳатто юкоридаги жавобни эшиккан вақтида нима учунидир ўзини (бир турлил) кулгидан... — 25-бет.

Шунинг учун куч сарф қилиб бўлса ҳам унитиш... — бинобарин. — 27-бет.

... ийлакнинг ниҳоятига бориб ўнгта юрилса ахтахонага... — бурилса. — 28-бет.

Бу қиз суратида кўринган малак қутидорнинг қизи — Кумушбиби (эди). — 29-бет.

Киши кунлари бир тутам, «ҳа, дегунча» (кеч бўладир. Бу кун ҳам «ҳа, дегунча»га ҳам қолмай) кеч бўлган, меҳмонларнинг келишканига ярим соатлаф вақт ўткан эди. — 32-бет.

...зиёфат қулоқ-суюқлари билан тўла-тўқис давом этар эди. — тўлиб-текис. — 32-бет.

Хон томонидан хирож (закот-солиқ) учун юборилган девон бекларини ўлдирган. — 34-бет.

Сизлар бу эҳтимолга қандог қарайсизлар! — 36-бет.

... ундоғ бўлса сира ҳам тинчимангиз, — деди-да, ёвошина илжайиб қўйди. — 37-бет.

Ҳасаналини ҳалиги мулоҳазадан воз кечдириб, бошқа йўсунларни қаратмоққа мажбур эти — ўйлларни. — 38-бет.

Кечлик ошни ўтказгач Ҳасанали (ўз) ҳужрасидан кийиниб чиқди-да, Отабек ёнинг кирди. — 38-бет.

Тўйбека бўлса ўзининг ўюқ боши ёнидаги уйчасини титратиб хуррак отар эди — бошига кўтариб. — 44-бет.

... «йигит наслини айбситиб бўлмайдир, (тўғрисига кўчканда бу йигит наслан биздан аллақанча юкорида турадир),» — деб қўйди. — 45-бет.

... деб миннатдорлик қилгандек бўлар эди. (Ҳасанали уйгониб кетар ва қайтадан шу тўғрида ўйлаб бошлар эди) — «Бечора... — 47-бет.

Ҳайтовур ялиниб, ялпогланиб, аранг ҳаммомга юбордиқ — ҳарчи. — 52-бет.

Бу уйга ўтгуз-қирқ чамалиқ қизлар йигилганлар. — уйда — 53-бет.

... қизлар ўзларининг (энг латиф), энг гўзал бир аъзоларини бу кун,... — 53-бет.

... эл ичиди кулгига ҳам қолурсиз, (расво ҳам бўлурсиз) — эски шоирларча айтганда ҳалқа афсона ҳам бўлурсиз. — 53-бет.

Нега десангиз ул келсин эди-да, агар чиндан ҳам шу қизни севган бўлса, суйганини бир кўрсин эди. — 53-бет.

Икки-уч қиз чопиб ҳавлига тушдилар-да (Кумуш) бибидан паранжи-ни олиб уйга бошладилар. — 54-бет.

Мажлиснинг бунчалик руҳсизланиб, маъюсият ичиди қолишига Гул-син (Гулсум) биби чидаб туролмади. — 55-бет.

Домла (Хутба бошпайдир. Форсча ўқилган ҳамд, салавот ва бошқалардан сўнг хутба энг нозик бир ўринга келиб тўхтайдир) — «Сизким Отабек Юсуфбек ҳожи ўгли Кумушбиби Мирзакарим қизини... — 58-бет.

... Отабек бу тақаллуфка чидалмайдыр — тақаллуфкача боролмайдыр.— 58-бет.

...үйнинг оқлари, кўклари, сариқлари ва қизиллари билан товланиб хаёлий бир сиймода... — 59-бет.

— Ўлаш қаерда, сиз бўлурсиз, деб кўнглимга ҳам келмаган эди,... — хаёлимга.— 61-бет.

Кумуш (биби) қизаринди.— 61-бет.

Мантиқсиз бу жавобга қарши қўроғи аччиги билан бақирди:... — кулгули.— 65-бет.

... қўргоннинг ташқари теграсида айланиб турайлиқ — тевараги-

да.— 67-бет.

... қизил дуҳобадан кийнган кўркам бир ўғлон палов сб турар эди

— баҳмалдан.— 68-бет.

— Давлатлари ёри берса ҳукуматимиз учун қўрқунч бўлган бу-  
зуқилар уясини тоғқандекман... — ҳисобланса бўлатурған.— 69-бет.

... Кумушеби үчун бу (ҳол) кутилмаган бир баҳтсизлик... эди.—

75-бет.

... эрининг ҳам бу вартага тушмоги чидай оларлиқ бир ҳол эмас  
эди — тушиши.— 75-бет.

Кутилдор оиласида бошқа эр зоти бўлмаганлиқдан Оф-  
тоб ойим қариндошларидан «жонкуяр» деб танилган киши  
Кумушнинг тогаси Аҳмадбек бўлиб, ул ҳам умрининг  
кўпини Қўқондами, Ҳўжанддами ўткарар, шунинг учун  
ундан ҳам ёри кутиш узоқ гап эди. (Мана бу жиҳатдан ҳам  
Кумуш ва онасининг бирдан-бир ишонганилари яна Ҳасаналининг ўзи эди)  
Демак барча оғирлиқ Ҳасаналининг устида. — Кутилдор оиласида  
бошқа эр зоти бўлмай Офтоб ойимнинг бирдан-бир огаси  
бўлмиш Аҳмадбек ҳам умрининг кўпини Қўқондами.  
Ҳўжанддами ўтказганилкдан ундан ёри кутиш ҳам узоқ  
гап эди.— 76-бет.

Зиё шоҳичи билан унинг ўғли Раҳматдан яхшигине умид тут-  
кан... — умидлангани.— 76-бет.

Худайчининг хабаридан сўнг мудофиълар жавоб қайтардилар —  
башаротидан — 83-бет.

... Азизбек қотига келиб қулиқ қилди — қошига — 83-бет.

Худоёр хон исмими эшиккучи аъён унинг таъзими учун ўриниларидан  
туриб яна ўлтурдилар.— 94-бет.

Қамалган кунимдан берига ундан хабарим йўқ, тақсир.— деди-да  
(Оғабек) Кумушка қаради.— 102-бет.

(Шоил бўлдишлар), аммо ўзлари ҳам яхшигине бўлиб қолдилар.— 103-  
бет.

... заҳ ер остларида очлиқдан, ташнилиқдан, совуқлиқдан (азиз)  
кўкрагини ерға бериб жон бердимикин? — 104-бет.

Гўё бириси қувраган тўқайга ўт туртди — тутди — 107-бст.

...чии орқалари шашвар, милтиқ, хайжар, наиза ушлаган оломон билан лиқ шўйла эди.— 107-бет.

... қулоқ солмай тўсин-тўска қочиб бошладилар.— 109-бет.

Ул бириничи мартаба ўлароқ ўзининг ички касалини (ҳозиқ деб) Нор-  
муҳаммад қушбегига очди.— 111-бет.

Рўмоининг ўн учунчи фаслида:— Китобнинг — 112-бет.

...Тошкандда кўриб танишқан равишча кийимлик сипоҳлар...—  
ясовлиқ — 112-бет.

Ашадду фақир ва эхтиёжда (авқоти талх мурурига мажбур ва масбур)  
үлгап қыргыз муллалари...— 114-бет.

Шояд давлат душманларини ўз оёгларидан й и т и б кетишларига сабаб бўлган бўлурманд — бети б.— 116-бет.

Ҳаммадан ҳам Үтаббойни айтингиз, аглаҳ бир одам экан,— деди,— мени сийламаганда ҳам сизни риоя қилса керак эди.— Үтаббой... кўрнамак бир одам экан,— деди,— лоқал сизни ҳам ригоя қилмаган.— 117-бет.

Унинг ўтиклини ёлғиз эриғани эмас. Тонканд хотинларига ҳам ом эди.— умумий.— 129-бет.

... ёз кунлари айвониниң тўрига ёсланиб Ҳасаналиниң хотини бўлган Ойбодоққа, (чўри қиз Ҳанифага) хамирни ачитмасликни...— 130-бет.

...бунинг орқасидан кўратурган орзу-ҳавас, тўю-томошаларини шартта кесиб қўйган бу уйланишкан...— бўги б.— 130-бет.

Бир йилдан бери ичинга йигиб келган кинасини бир варакай тўкиб берди.— 135-бет.

Сан б ун га яхши ишон — б у и ш г а.— 135-бет.

— Билган топиб (сўзлар, билмаган қопиб) деганиларидек...— 136-бет.

... чумчуклар, читтаклар, тўрғайлар, саъвалар ва бошқа алла қанча қуни дуркумлари...— бул буллар, майналар.— 138-бет.

Бу ошишлар, (бу кечинилар) ўзга нақтларда Отабек учун ҳузур ва ошикиш багишилаған бўлсалар...— 139-бет.

Унинг (оний) бу ўзгариши шундан иборат эди...— 141-бет.

— Билмадим, чинми, чин эмасми, ҳайтовур қизиниңиздан эшиткан-дек бўлган эдим,— ҳарчи.— 143-бет.

Қутидор қафаска янги солинган қушдек уринимакка олган хотини босмоқ бўлди — урина бошлаган.— 145-бет

— Ничоқни ўзинита ур, огри маса бошқага деган бир гап бор,— деди, қутидор жиддий назиятда.— 146-бет.

— Яхши,— деди,— мен сизнинг таклифингизга кўнайин, аммо кўнишиниң ва ризолиқиниң зарурни қизиниңизда эмасми?— зарур тарафи.— 149-бет.

Ул нима деб айтишка сўз тономлай қолди.— Отабек.— 151-бет.

— Бор-бор, авлия, (битта) бачча бўлсангиз идиши билан сизники.— 152-бет.

...қисқаси шақарининг катта-кичигидан ўзига ихлосмандлар ортдирган ва кўбла рининг тарифидан қилган кароматлари ривоят этилган бир мажнун эди — кишинлар.— 152-бет.

Шаҳардаги ҳар ким унинг ошинаси, каромати билан бепарво бўлганлар ҳам унин (қизиқ) ҳаракатларига на тутал сўзларига қизиқар эди.— 152-бет.

— Дадам мусаллас қовоқ...— бўза.— 153-бет.

Ҳасанали (қийналди ва) ганини бошқага ҷалғитини учун...— 163-бет.

(Кўзи ичидан тўзгиб, чуввалиб кўришган соч толаларини тўғрилаб ўзини кузатди.)— 167-бет.

Битта тоқчадаги чети учкан, қони қочқан уч-тўртта пиёла...— Тоқчалардан биридаги.— 175-бет.

... гўё оналарининг «зиёндоп албасти»ларидек хунук қиёфада йигитка қараб югуриб (кела) бошлади.— 175-бет.

— Билмадим, дўстданми, душманданми ҳайтовур олдинг очилмай турадир...— ҳарчи.— 175-бет.

— Сан манга ўша...ни кўрсатиб бер, тобини олиб қўяй ўша онангни...— ўшанингни.— 176-бет.

Гам сманг (ака), хом бўлса ўбдан ишиштари миз, ўл масак.— 179-бет.

Бу сўздан сўнг Ҳомид устидаги юкини отқандек сўлиш олиб қўйган эди — нафас олди.— 181-бет.

... иккинчи йигит «Содиқбой, (Содиқбой)» билан чақиришга тутишиб...— 182-бет.

Ҳар ҳолда Марғилоннинг четротидаги бошин берк бир кўчада ва (катта бир) дарбоза ёнида турганинги тушунди.— 184-бет.

Ул ўйлаб тургана дарбоза ичкарисидан иккى кишининг жайрлашиб ажралнишканлари сесилар эди — найқала р.— 184-бет.

— Ман,— деди Отабек ва ўзининг мантиқсиз жалобидан ўнгтайсилалиниб...— йўлси з.— 185-бет.

Отабекнинг узрига қулоқ бермай ошга урнашка олди — бошлиади.— 186-бет.

— Кашибим тўқуғучилиқ, Шокирбек,— деди уй эгаси ва тўхтатди.— 188-бет.

Ошни сузуб келтиргач меҳмонни ошга таклиф қилишдан бурун яна тоқчадаги кўвачани олиб...— илгари.— 190-бет.

— Уйланганимисиз, (бек)?— 190-бет.

Ваъда кунидан уч-тўрт кун ўтиб кеткан бўлса қам...— Ваъададан.— 193-бет.

... бир неча замон манинг учун сўз тониш ҳам қийинлашкан эди — фурсат.— 193-бет.

Унтутолмаса нима қилсан?— Саёқ йўлда.— 204-бет.

Отабек ёлгиз меҳмонхонада ётиб кун кечириши билангина қолмади. (Кечаларни алла қаёкларга кетиб қолатуридан одатлар ҳам чиқарди) ва бир-икки қайта ортиқча маст бўлган ҳолда қайтиб Ҳасаналини тамом ҳайратда қолди.— 205-бет.

Лекин жавоб тамом ҳақиқатка мутоғийир ва кишини ҳайратка соларлиқ (бўлди).— 207-бет.

Бизда ким кўб йиглайдир?— Қора кунлар.— 208-бет.

А Отабек тўғрина, катта кўчага қараб юрди — Аммо.— 218-бет.

— Мен бу кунгами, деб ўйлабман,— деди кулиб Отабек.— кулимсираган бўлиб.— 226-бет.

Мен ҳайтовур бечора йўлини тоқиб олдиёв деб юрар эдим — ҳарчи.— 231-бет.

— Яхши маслаҳат, қутидорникига қанақа қилиб тушамиз?— бойникига.— 241-бет.

...илгариги кучланнишлардан қолди ва бир-икки дафъа тўлганиб жимгина жон берди — тинчиди.— 247-бет.

Тешуккенинг юқорисидан бир оз туйнук очилган бўлгани учун ичкаридан қулоққа енгузлача ишишлаш эшишилар эди...— очилган эди.— 248-бет.

... бунга ҳам сизнинг билан бўлган ошиналигим кўмак берганликдан сизга миннатдорлик қилишидан ожиздирман — қилиб битиришдан.— 253-бет.

— Кўтарилгани йўқ, Отабек, ёмошиниг жанозасидан яхшининг ҳикояси Фойдалик кўринадир...— мазъқул.— 254-бет.

— Уч кишига таҳо ўзи?— (қутидор ишонмаган эди).— 260-бет.

Кумушебиби уялиб, нетиб турмади ва кимдан деб ҳам сўраб ўлтурмади...— такаллупланниб.— 263-бет.

Чунки мен бу ваҳшийликни ишлашда иктиёрсиз эдим: ҳаётингизнинг, (номусингизнинг) сақланиши буни тақозо этар эди...— 264-бет.

Бұл маслақат фақиrlарнинг ақли қосирларимизға күб тафаккурлар бағында көлиб жаға разын савоб үзларнда бўлгай — илҳом илоҳидай бўлиб.— 271-бет.

(Хали бу ҳисобка фуқародан ўлдирилган бечоралар кирмайдир.)— 275-бет.

...«мен турған ерда қипчоқ минибопни бўлсинми» деган кек ораснда бу фикр унинг томонидан майдонига чақирилганнинг Юсуфбек ҳожи мулоҳазасидан ўтди — билан.— 275-бет.

Боболарнинг муқаддас гавдаси мадғун Түркистонимизни тўнгизхона қилишига ҳозирланган биз итлар яратгучининг қаҳрига албатта йўлиқармиз — оёқ ости.— 295-бет.

Отабек гўё тог остида қолган эди — шошиб.— 307-бет.

Ўзбек ойим кулимсираб йўлак томонига қарди.— 311-бет.

Шаҳло кўзлари кулимсирашкан яқин ҳолда уятлик эдилар — оҳу.— 311-бет.

Ўзимиз жуда чўлла б қелган эдик, шунинг учун кечирдик — ча ниқа б.— 316-бет.

Кўмуш Отабекнинг елкасига қўлинни ташлади...— юборди.— 331-бет.

(Маълумки) кишин ойнага боққанды нечогчиқ айбеня бўлса ҳам ўзини бир камчилиги орқалик кўралди.— 334-бет.

Шаҳло кўзлар, ўсиқ жинтила кинраклар, қундуз қоп ва қора холлар ва бошқа латофатлар ўзига писанд бўлмадилар...— оҳу.— 334-бет.

Шунчаликка бир-биравимиздан четлашиб, (мингайшиб) юришимиз кишига оғир келар экан.— 336-бет.

Сўзини чўзмоққа ҳожат йўқ; эрларимизнинг Офтоб ойимларга қарани ҳамиша шундан бошқа эмас — юкори.— 344-бет.

Йўл ҳозирликлари битиб Ўзбек ойимининг Қутидор, Офтоб ойим ва Ойша кампирларга атаб тиқдириган саруполари ҳам битди.— 350-бет.

— Баракалла, баракалла.— 366-бет.

«МЕХРОБДАН ЧАЁН» РЎМОНИНИНГ 1929 ВА 1935 ЙИЛЛАР  
НАШРЛАРИДАГИ ТАФОУТЛАР

Кимларнинг воситаси биландир мазкура гўзал канизнинг таърифи Бу-  
хоро амири Баҳодир — (Ботур) хонга етиб...— Насрулло.— 384-  
бет.

... шу канизни қўлга киргизиш тўгрисида бош оғритиб, нос чакиб  
юрган Баҳодир хон қулолига...— Ботурхонининг.— 384-бет.

... улардан дарҳол бир «фатвойи баҳайбат»ни талаб  
қилига ида...— «фатво» талаб қиласди.— 384-бет.

Дариюқиъ «холисона» бу фатвои амир Баҳодир хон «бетарафо-  
на» қиймат бериб — Насруллоҳон.— 385-бет.

Амири Баҳодирининг бу «холисона» жиҳоди — Насрулло-  
нинг.— 385-бет.

...ҳам амири Баҳодир томонидан қатл қилинди — Насрулло  
— 385-бет.

... ва Баҳодир томонидан ҳад урилган уламоларнинг — Нас-  
рулло.— 386-бет.

... аранг (ит азоби) рўзигорга етиб турар эди.— 386-бет.  
Маҳалла кишилари бинорас тўни «зарурат» деб атаган бўлсалар  
ҳам...— ҳазилмандлари.— 389-бет.

... (аммо) кўбичлик маҳдумни рапожитар эдилар.— 391-бет.  
... ниҳоят Лолани сув олини учун кўза ушлаб (кўчага) чиққан ҳолатда  
кўрдим.— 394-бет.

Чунки, афу этасиз, ўша кезларда шундии тўғриларда аччигланишига  
ҳаққим бор эди...— 395-бет.

...муданинга мойилроқ жоду кўзи кишига қаттиқ қараганда қора-  
лиқдан бошқача яна бир турлук қизғаш нур сочар эди.— 395 бет.

...укаларининг бутун ўюнига комил ҳуқуқли бир аъзо тариқасида  
иштирок этади.— 396-бет.

Қора чиниқ беқасамдан ҳарир тўн кийтап мавзун қад Анвар...—  
и пак.— 403-бет.

— Тескарнига бурма (Ратно), балки сенинга бермакчидирлар.— 404-  
бет.

...құлдагы хархашаша қилиб бошлаган болани овитишиң үтүн тебрәнди.— хархашалана.— 405-бет.

Шаҳидбек Айвар билан энтика-энтика күришкәч жой күрсатылмасданоқ сұфанинг түрига ўлтуриб олди.— ташланди — 406-бет.

10 фасл охирида (Шаҳидбек Айвар билан сұзлашканы ва уны күндеріргали келгандек күрінса ҳам аспыда гарасыз одам эмасдыр).— 409-бет.

— Сабаби шулықи,— деди Айвар, күзини дастурхонининг алла қайси нұқтасында түккән ҳолда,— мен буннингде масъул, айниқса тантаналик вазифаларға ҳаваскор эмасман.— 410-бет.

...Сизге ўшаш йигитлар ҳамиша бир үрунда ўлтуриб қолмайдырлар — ерда.— 410-бет.

— Кишилар мұболова қылғандес мемдә истеъод ийүқ,— деди Айвар ерга қараған ҳолда — бошими күтартмagan.— 410-бет.

— Сен ўз ишинини билиб қылсанғ, вазифаныда сүстлик күрсатмасанғ,— деди баланд тоюши билан,— сенге бутун олам душман бўлганда ҳам бир мўйининг ҳам қиrolмас.— 412-бет.

— Сенинг мисолининг,— деди маҳдум бирмунча кучанған ҳолатда,— нодирлан воқиъдир.— 413-бет.

...Мен ҳам буни билиб турибман, болам Айвар,— деди маҳдум мулодимланиб.— 414-бет.

...Айвар ўз ризолигини маҳдумининг ёлгиз шахси билан билдириди...— ризолик сиёқини.— 415-бет.

...«ўзи ўлтур ит мизожми» деб таъна қилишларидан чўчили мижозми.— 416-бет.

Бир онадан неча хил бола түгиладир...— алвон.— 421-бет.

Насим ўи беш ёшлар чамасида чечак касали билан оғриди ва ўша кезларда давосиз ҳисобланған бу касалдан ўнглалмай ва-фот қилди.— замонасадығи чечекдан Эмлаш аҳамиятига тушумаганилиқ, яъни хонлиқ жаҳолатига фожиъ қурбон бўлди.— 423-бет.

Моҳлар оймининг Раъионни Айварга бериш түгрисидаги «безмани, аҳамиятсыз» сўзлари...— 425-бет.

Айвар бир йил ичида ҳисоб ва иништо қоидаларини ўрганди ва бошқа ларсларидан ҳам яхши муваффақият қозонди.— 426-бет.

(Айвар) Нигор ойим, Раъибо ва ўзига кийимликлар сотиб олди.— 428-бет.

Булардан биринчи муҳтарам шу масжидининг ёш имом ва хатиби Абдураҳмон домла (жаноблари) бўлиб...— 435-бет

Дуо қилиб қалам учисига бўзни бердим. олмайди.— узатдим.— 437-бет.

Унинг орқасыча «надар лаънат, жоҳил» деди имом...— деб сўкини.— 439-бет.

Ҳозир Абдураҳмон ўзининг яқин мөнайисида...— энди.— 444-бет.

Раъибо маҳдумининг орқасидан нима учундир кулиб юборди.— юзи-ни қўллари билан яшириди.— 456-бет.

— Жуда қаттимги?— (деб сўради).— 456-бет.

— Ҳай, мулло Солиҳ, яна бир гапни саҳ в қилибман,— деди ҳазрати мударрис.— фаромуши.— 458-бет

— Кўб яхши скан,— деди,— деб қўйди.— 460-бет.

— Нима дедим ахир, шунчалик илмлари бўлса ҳам толеълари озгина пастилик қилиб турадир, дедим.— билимлари.— 462-бет.

Аммо бунда бир қанча сабаблар бўлиб...— Лекин.— 464-бет.

— Сен уял, уялма, барибир улар бизни жуфтлашидирлар.— жуфтлашидилар.— 476-бет.

Гулшандан паранжи, чашмабандни олиб, секингина «хуш келдилар» деди.— 485-бет.

...оёқларига бедонадан кафш, маҳси, кийган ёш каниzlар сочиған ҳолда вазифалари орқасидан юрар эдилар. Уларнинг шу яқинда турган душманга сездиrmаслигка тиришкандек ёки уйқуда ётқан мудҳиси йиртқични уйғотиб юъоришидан қўрқандек, оёқларини ерга секин босиб, авайлаб қўзгатишимири ва бир-бирлари билан имлашиб ночор қолганда ярим товуш чиқариб муомала қилишлари бу ҳавлида нимадир бир фавқулодда аҳвол борлигини сездирап эди. Гулшан ҳам бу аҳволга тушунгандек улар билан оҳиста сўрашди ва каниzlарнинг бирордан ярим товуш ичизда сўради...— 485-бет.

— Ойиконим чақирадирлар,— деб бир каниz шивирлади.— 486-бет.

Эшик ичкарисида қўл қовишириб ўлтурган каниz ўрнидан туриб букилди.— турган каниz букилиб таъзим қилди.— 486-бет.

Икки чилдирма қизитилди ва дутор, танбур, гижжак, чаңг каби асбоблар созланди.— чалгувлар.— 499-бет.

Қизлардан уч-тўрттаси Нозикни таъқиб этдилар.— 502-бет.

— Нега маъни бўлмасин, бизга ўхшаш маънисиз кўпаяди. (Яна кулғи кўтарилид. Қизларнинг «маъни» дан бошланган «пайрав»ларининг кейинги жумласи Гулшанга ҳам таъсир қилиб ҳиринглади). 503-бет.

(Шу йўсун) маҳдум бир неча ҳафтадан бери бу «ҳунар»ни ўзига касб қилиб олган...— 509-бет.

Улардан дамчиقا бермагач...— то в у ш — 526-бет.

Анварнинг арабча, форсийча лафзлардан холи.— сўзлардан.— 531-бет.

...ёш «олим»ни ҳам гарчи бир «нодон» тарафидан келтирилган бўлса ҳам «заршунос» деб билдилар...— «қадршунос»— 532-бет.

Чақангиз сийқа эмасми, Сафар aka?— деб сўради.— 546-бет.

Султонали мирзо, Анварнинг қўшнилардан бириникига зарур бир юмиш билан чиқиб кетканлигини...— беклардан бириникига бир зарур иш билан кетканлигини.— 548-бет.

— Жанобларига ожизона арз...— у з р.— 562-бет.

... бу хабарни мирзо эшилса, шубҳасиз, сўюнадир — севина-дири.— 562-бет.

Маҳдум (мактабга) кириб ўз ўрнига ўлтургач болаларни тўхташга буюрди.— 563-бет.

... Гулшанга бир неча тилло (пул) ҳам бериб юборган эмиш...— 565-бет.

— Кечакинчи дафъа бизнинг ҳавлига кимни сўраб келдингиз?— 566-бет.

...сиз ва дўстларингизча ҳам қиз оти топилмайдирган матоъ эмас — деган — 567-бет.

Ерга қараган ҳолда оқ чойдишни Анварнинг яқинига келтириб қўйди — ёнига.— 571-бет.

Бу кун қазо муншийси шу мурассасъ халтачадаги қимматли тошлар орасига қўпол бир нарса келтириб тиқди,— фарроши, ташлади.— 573-бет.

...ҳар кечаси ўз вақтида ўлтурған Раъно гүё бу кун «бевақт» ўлтурар эди — қа чо н.— 574-бет.

Энди Раъонинг қар ҳолда чиқишини билса ҳам, бироқ қачон чиқишини билмас (шунга биноан бир тавқ ўткунча кутуб ўлтуришини чамалар) эди.— 586-бет.

Паранжидаги хотинлардан бири (бўлган) Нигор ойим пиқ-пиқ йиглади.— 595-бет.

Чамаси, нисфи шаб — (ярим кеча) асноси...— 597-бет.  
Мен бўлсам, сенгаям бали, устозинитаям (бали), леб юриппан.— 603-бет.

... бунингиз менга увал-ла, ука,— деб сиқилинқиради — 604-бет.

... Масалан, аянгни Тошкандга чақирамиз, ёки (гапни) бир оз эс-киткандан сўнг Кўқонга ўзимиз келсак ҳам бўлади.— 616-бет.

(Яна шу ҳолда) Раъно ҳамёндан икки тилло олиб, Анварга кўрсатди.— 620-бет.

Йигирма икки-йигирма уч кунлик ой ҳали унча кўтарила олмаган, айниқса озгина кўтарилиб чиққан ой нурига қўргон девори тўскун эди.— 626-бет.

(Қўргон устида...) Кўйинг, уяламан...— 627-бет.

## "ҮТКАН КҮНЛАР"

Езгучидан . . . . .	6
---------------------	---

## БИРИНЧИ БҮЛІМ

1. Отабек Юсуфбек әожи үгли . . . . .	7
2. Хон қизига лойиқ бир йигит . . . . .	14
3. Бек ошиқ . . . . .	21
4. Марғилон ұавоси әқмади . . . . .	25
5. Киройи қуявинг шундог бўлса . . . . .	28
6. Тошканд устида қонлиқ булутлар . . . . .	34
7. Мажбурият . . . . .	38
8. Кутлуг бўлсин! . . . . .	41
9. Қаршилаш . . . . .	47
10. Тўй, қизлар мажлиси . . . . .	51
11. Кутиммаган баҳт . . . . .	57
12. Чақимчилик . . . . .	62
13. Қамоқ . . . . .	66
14. Нажот истаб Тошкандга . . . . .	75
15. Тошканд қамалда . . . . .	78
16. Азибек . . . . .	81
17. Юсуфбек әожи . . . . .	85
18. Жар . . . . .	89

19. Ҳукмнома	94
20. Истиқлол дарди	103
21. Инқилоб	106
22. Бир гарibi бечора	112
23. Мусулмонқул	118
Узр	127

## ИККИНЧИ БҮЛІМ

1. Ота-она орзуси	129
2. Ұнұтмайсизми?	137
3. Қовоқ девонанинг белбоги	152
4. Жодугар қинди	156
5. Хиәнат	166
6. Иситма орасыда	174
7. Қувланиш	182
8. Баҳт ва баҳтсизлик	190
9. Ұнұтолмаса нима қылсун?	204
10. Бизда ким күб йиглайдір?	208
11. Наво күйи	213
12. Жонсұз бир хабар ва құрқунч бир кеч	218
13. Кулиб қарамаган баҳт	222
14. Рақиб изидан	234
15. Душанба күн кечаси	245
16. Ұзни танитиш	250
17. Хайриқоҳ қотыл	255

## УЧУНЧИ БҮЛІМ

1. Мусулмонқул истиббодига хотима	268
2. Қоронги күнлар	281
3. Қипчоққа қирғин	287
4. Ой этак билан ёпилмас	295
5. Мактуб	298

6. Ўзбек ойим — огма, Зайнабнинг дарди	301
7 Қудаларни кутиб олиш	308
8. Зимнан адоват	312
9. Ҳожи этак силккан	317
10. Ҳасаналининг ҳийласи	320
11. Кумушнинг сўз ўюни	325
12. Кундаш — кундашдир	331
13. Эсон бўлсақ кўришармиз	344
14. Хушрўйбиби ва Зайнаб	353
15. Эсини киргизди	357
16. Ой-куни яқин эди	362
17. Хотима	376
Ёзгучидан	378

### "МЕҲРОБДАН ЧАЁН"

Рўмоннинг мавзуъи тўғрисида	380
1. Раъононинг эгаси	381
2. Амир Умархоннинг канизи	383
3. Махдумнинг уйланиши ва мактабдорлиги	386
4. Махдумнинг баъзи хислатлари	388
5. Оила ва кишилар билан муомала	390
6. Нигорхоним	392
7. Раъно	394
8. Бир ўрдалиқ	397
9. Ўпка ва ҳазил	402
10. Хайриҳоҳ бир одам	406
11. Махдумнинг таҳдиди	409
12. Бахмалбофда фақир бир оила	415
13. Танисанми шу жажжи қизин?	418
14. Чин ўртоқ	421
15. Махдумнинг баҳти	425
16. Хоннинг илтифоти	429
17. Анварнинг андишаси	432
18. Жиловхонада бир жанжал	435
19. Ифлос бир мозий	440

20. Ҳүшёрлиқ	444
21. Ёрлик бериш маросими	448
22. Адрес түн ва иссиг нон "Фожиъаси"	454
23. Китоб сўзи	458
24. Шоирнинг сирри	463
25. Ҳаёт шамъи	468
26. Нега ерга қарайсан, Раъно?	474
27. Зулм ўчоги	478
28. Ҳарам	481
29. Огача ойим	486
30. Хоним ойимлар	492
31. Қирқ қизлар	496
32. Нозик	501
33. Янги "ҳунар"	507
34. Хайрул-умури авсатуҳо	512
35. Хон кўнгил очмоқчи	519
36. Қизиқлар	524
37. Бирикиш	530
38. Фариб кўнгли	533
39. Бишўй, эй хирадманд...	536
40. Алдаш учун бола яхши	540
41. Чақангиз сийқа эмасми?	543
42. Қув одам экан	548
43. Чўлқ қуш	552
44. Қоп йўқотдингизми?	557
45. "Фотиҳа — муҳри худодир"	561
46. Йигит	565
47. Очиқ кат	571
48. Тўй арафасида	575
49. Рамз	578
50. Маъшуқа маҳбаси	583
51. Жасур қиз	586
52. Дўстлиқ "каромати"	590
53. Чаённинг намойиши	596
54. Икки хил садоқат	602
55. Баримта	609

56. Хайр энди, Раъно!	615
57. Қўрқунч бир жасорат	620
Мирзо Анварнинг кейинги ҳаёти тўгрисида	629
Ўзбек романчилигининг шоҳ асарлари	631
"Ўткан кунлар" рўмоннинг 1926 ва 1933 йиллар нашрларидағи тафовутлар	640
"Меҳробдан чаён" рўмоннинг 1929 ва 1935 йиллар нашрларидағи тафовутлар	642

*Гадыр Гүләм номидаги Адабиеттән санъат наширеңти*

*Адабиет-бадиий наир*

**АБДУЛЛА ҚОДИРИЙ**

**ҮТКАН КҮНЛАР**

**МЕХРОБДАН ЧАЁН**

*Наирға тайёрловчы Ҳондамир Қодирий*

*Масъул мұхаррир Вахоб Рақимов*

*Рассом Миркос Корпузас*

*Мұхаррир Ұбайдулла Сайдуллаев*

*Расмлар мұхаррири Александр Кива*

*Техн. мұхаррир Валентина Барсукова*

**ИБ №5255**

Босмахонага 17.01.94 да берилди. Босишига 04.08.94 да рухсат этилди. Бичими 81x108<sup>1</sup>/32-2-нав босмахона қозози. Тип таймс гарнитураси. Юқори босма. 34,44 шартли босма тобоқ. 36,0, нашр босма тобоги. Жами 60 000 нусха. 1441 рақамли буюртма. Бақоси шартнома асосида. 63-94 рақамли шартнома.

Гафур Фулом номидаги Адабиёт ва санъат на-  
шриёти, Тошкент, Навоий кӯчаси, 30.

Ўзбекистон Республикаси Давлат матбуот Коми-  
тети Ижара пурдатидаги Тошкент полиграфия  
комбинати. 700129, Тошкент, Навоий кӯчаси, 30.